


# Katcha



Katcha-Kadugli-Miri: Katcha (Old Testament)

**Katcha  
Katcha-Kadugli-Miri: Katcha (Old Testament)**

copyright © 2020 Wycliffe Bible Translators, Inc.

Language: (Katcha-Kadugli-Miri)

Contributor: ECS Diocese of Khartoum Translation Department

All rights reserved.

2020-11-18

---

PDF generated using Haiola and XeLaTeX on 18 Apr 2025 from source files dated 29 Jan 2022  
bc98a4a0-1c85-5c7a-932a-7dcefd213f80

## Contents

Rawus . . . . .	1
Yünan . . . . .	5
Matta . . . . .	8
Murkus . . . . .	46
Lüütka . . . . .	70
Yühanna . . . . .	110
Kadafiinī . . . . .	140
Rööma . . . . .	176
1 Kürünsüs . . . . .	192
2 Kürünsüs . . . . .	207
Galatiya . . . . .	217
Afosus . . . . .	223
Filippi . . . . .	229
Kölösi . . . . .	233
1 Tasalanükü . . . . .	237
2 Tasalanükü . . . . .	241
1 Timosaws . . . . .	243
2 Timosaws . . . . .	248
Tito . . . . .	251
Filimon . . . . .	253
Ebraniin . . . . .	254
Yaguub . . . . .	266
1 Bütrüs . . . . .	271
2 Bütrüs . . . . .	276
1 Yühanna . . . . .	279
2 Yühanna . . . . .	284
3 Yühanna . . . . .	285
Yahüüsa . . . . .	286
Tumma tanno Yasu . . . . .	288

## Rawus Tafa'da tumma

Sorne ya eema tumma ma aka tammo ana eere a'da Rawus mo. Oogo ma mada Müwab. Ömö'di unggenee nya laala tiya iini ndama Beetlaham kaco Müwab, kudumma iire kagu ege kaanya ma Yahüusa. A 'bii'bal yeene öccö aga arna Rawus ma mada Müwab mo. Lakiini kadu nye'de kaaya illi nüümö meene mana eere a'da Naüümii. Maföönyö a'da eema ageene dhabbu afe'de ka Yahüusa. Mikirii ka asaasa tafada maco Beetlaham. A Rawus tafara masaasa tunggeene nya oono, miki a'da kadu ma Yahüüdü kara ta kadu tanno oono, oogo ma tamma Masala ma Israyil.

Köö'dö ka Beetlaham ana iisine 'döngönyö. A Masala tö'dö ana ömö'di tiya a'diila ya ana eere a'da Büwas ma tarna Rawus afa ka Naüümii. Ma ndada ma Büwas nya Rawus aga Dawud tiya uugaara ya. Tumma ma Rawus kiki a'da Masala mamana baraka ömö'di tiya ana eedi ma tasaasa co kono ya.

### Naüümii nya Rawus

<sup>1</sup> Billi ka naguuru ma naguugaara tahükümü ka Israyil, a iire tümmüanya, a ömö'di inggide amaanya ma Beetlaham ma Yahüusa, i'i nya aka tammo iini ana laala tiya eene keera. Kunggeene kacoanya ma Müwab.

<sup>2</sup> Eere yiini a'da Alimalik, aka miini mana eere a'da Naüümii, a laala ya eene tana eere a'da, Mahlöön nya Kiliyöön. Eege kama Afrata ka Beetlaham ka Yahüusa.

<sup>3</sup> Kanna ya, a Alimalik teyi a Naüümii tüüt nya laala tiya oono na eera no.

<sup>4</sup> İkiri laala ka kuna iiya ka Müwab katarna eege. Mo mana eere a'da Rawus mo mana eere a'da Ürfa, kada kiidi nagürüünü kada'baaga kaanya ma Müwab.

<sup>5</sup> İkiri Mahlöön nya Kiliyöön ka tinyi Naüümii ku'bu unggodho oogo kungngo.

<sup>6</sup> Amussu kungngo ya, a Naüümii taföönyö a'da Masala moolonaanya ka iire a kuri tanna ka kadu 'do ka Yahüusa, a Naüümii nya ligadaada moono kindinaana oona ma tafada ma co Yahüusaanya tammo eene.

<sup>7</sup> Mikirii Naüümii ka fiki'dö nya ligadaada moono kinyianya ma Müwab ku'bu kara ka tunggeene kümümü fiinii ma tapadaga co Yahüüdiya.

<sup>8</sup> Yungngo a Naüümii ka tiki a ligadaada moono, "Aaga fada aaga tapadaga co nöö'di tanno nakanüümö tanno ada. Tafa ka Masala tala ta'diila aaga afa maada

kaala a naganyori tanno ada no aaya no aaga tala a'a.

<sup>9</sup> A Masala tanangnga aaga ka lïngnge ka 'di ma naganyori tanno 'diila no." Mikirii ka tattoogeege, katafaraana ka oona.

<sup>10</sup> Kiki oono, "Ara ungngo tunggeene nya o'o, ungngo co ka kadu tanno üüdü nya o'o."

<sup>11</sup> Illi Naüümii miki, "Laala eede, aaga pataga co öö'di. Ara aaga tö'dö nya a'a amana? Ara a'a co teene laala ya eera tö'dö taganyuri ma aaga afe'de ya?

<sup>12</sup> Aaga padaga co 'di laala eede, sa a'a tadharu 'do meede ka tagona nyuri afe'de. Nassa ka takiki a'da naleefe a'a tagona nyuri, nassa ka tüürü na tarnadene ka ooso tanno nadageene laala.

<sup>13</sup> Ara aaga taneene, aaga tindhiggi eege kara ka tinggiridene ka sere? Ara aaga tüütü 'bala tanyuri kara ka teesere? Kaw, laala eede. Taalo agu'daana ana aaga 'do kungngo afa miini ka 'duu'du a'a kungngo, kudumma iisine ma Masala külli kede!"

<sup>14</sup> Kafada ka tafara afe'de. İkiri Örpha ka tööjülü taada moono mattogo oogo, illi Rawus mamma'da ka ono.

<sup>15</sup> A Naüümii tiki, "Sele, mafada kööje ma o'o mapadaga ka kadu tanno oono nya namasala tanno oono. Aafada nya oono."

<sup>16</sup> Illi Rawus miki oono, "Fa tuuru a'a ka tino a'da nafada ara ka tinyi o'o ku'bu. Kita üüdü kico, ara a'a co, a kita üüdü ka tanna kide ara a'a taneene. Kadu nüüdü kara ta kadu tanno eede, a Masala müüdü ta Masala tiya eede,

<sup>17</sup> Kita üüdü ka teyi kide ya ara a'a teyi kide natu'büdene kita miini kita. Fa ka Masala ma ümmü a'a, üürü nüümö inggide a tanangnga ku'bu bala inde."

<sup>18</sup> Ka Naüümii ka tassa ka Rawus kanumüti ka asaasa tino nya oono ya, mikirii ka taadha ka taara oogo keere ka tino nya oono.

<sup>19</sup> Kikirii köö'dö ka Beetlaham eege a teera. Ka daara ka teene ya a kadu nye'de takiri ikiye kene, a iiya tindineene kiki, "tara ada Naüümii oogo mungngo?"

<sup>20</sup> "Aaga fa tümmünü a'a a'da Naüümii," oogo miki eene. "Agümmünü a'a a'da Mara (a'da ta'diiri), kudumma Masala tammo ana türü mo manangnga tefe ka 'di neede ka 'diiri 'do.

<sup>21</sup> Nunggeene a'a ka tiginigo, a Masala tafada ana a'a ka ta'döngöngönyö Kümmünü aaga a'a Naüümii amana? Mamuru Masala dhïngkirii a'a, uuрутagoroo'bo kede ka oona."

<sup>22</sup> A Naüümii tapadaga co Beetlaham oogo nya Rawus, kööce moono a'da karaana kadu ka nasigeene.

**2**

*Rawus malinggo ka siga tanna Büwas*

<sup>1</sup> A ömö'di inggide ama 'dī, idhindhi a siliga ma Alimalik ya nyuri tiya Naüümii ya, ana eere a'da Büwas.

<sup>2</sup> Uuru öccö ka inggide ka Rawus mada Müwab ka tiki a Naüümii, "Fa kede naco nasigeene ürü a'a ninnyo naluna ömö'di yeede ka ta'dila kini ka oona ya afa kede neere migile mo öreeene kini keere mo."

A Naüümii tiki oono, "Badaada eede, kolo."

<sup>3</sup> Yungngo a Rawus ka tunggeene maco a nasigeene ma teere migile ma suusuli ka kadu keere mo. A'da siga ka tanna Büwas, siliga ya Alimalik.

<sup>4</sup> Amussu kungngo ya, a Büwas tö'dö ndama Beeltham, öjöülü kataraana ma migile, "A Masala tafa kada."

Kapadaga iini, "A Masala tafa küdü."

<sup>5</sup> Yungngo a Büwas ka tindini ömö'di ya aguri a'a kadu tanno araana ka siga no, "Bandaada ma aaga oogo mungngo?"

<sup>6</sup> A ömö'di tiki iini, "Mada Muwaab möö'dö ndama Müwab nja Naüümii mo oogo miini."

<sup>7</sup> Miki, 'Ma aaga fa kede nungngo kada keere neere migile ma suusuli mo.' Madagalinggo ndama kiitaka taalo magüümii illi idhilli.'

<sup>8</sup> Yungngo a Büwas ka tiki a Rawus, "Badaada eede, aföönyö tumma neede. Fa co tere migile ka siga töccö, naafa co ku'b'ba ndama kita. Ütü kita nja iiya tanno eede ka siga no.

<sup>9</sup> Iiri siga, kita nagiide ka taraana kide ya, nöö'dö ka iiya keere. Nadirina a'a eema a nagiide a'da kafa taada o'o ka oona ka teneye kara tagu o'o ya kolo tindi 'büdi ka anyee'de tanno nagiide kadigaana no."

<sup>10</sup> A Rawus tikirri ka titi ku'b' a dhugudha miki iini, "Minna agu o'o nana 'bangnga ma a'a kada matajeene?"

<sup>11</sup> A Büwas tiki oono. "Naföönyö a'a a'da o'o naafa ka taada ma o'o, niimö ma nyuri tiya üdü ya eyi ya, ninyi o'o faafa ma o'o nja nuufa tümüüdü ku'b', ninyi anya müüdü ku'b' ara o'o köö'dö taneene nja kadu tüüüdü taalo naakussu eege no.

<sup>12</sup> A Masala tafanna ta'dila a o'o kööye ma ta yüüdü ka tagüünii ya. A Masala Siidi ma Israyil yüüdü ka öö'dö küdhü kini ka egedhe ya tafa küdü."

<sup>13</sup> A Rawus tiki, "Nagüünii o'o ta'dila ana a'a, nasaasa a'a tinsili ka eedi nja o'o turi ömö'di kede. Naana o'o 'bangnga ma a'a, nafunügü a'a ko'do a tumma ka'dila a'da taalo a'a nafeene nja mada talinggo tammo üyüdü."

<sup>14</sup> Kene ka ndagu eema ya, a Büwas tikirri ka tiki oono, "Ayau emmi kita nagu eema,

indi miteene nata ka kala naguri." Kono ka ndemmi, ikiři Büwas kagona tinggile no füfüfdene no, oono madaguri müüsü a türeene miini tüütü.

<sup>15</sup> Kono ka ntatfiki'dö ma teere migile ya, ikiři Büwas ka tiki a kadu tanno alinggo no, "Salla kono ka teere migile manda mi'dideme mo iyya aaga tafaga oogo keere.

<sup>16</sup> Aaga kona ka migile mo ndaradene mo adha ya aaga tagona oono mamana kono ku'bu."

<sup>17</sup> Mikirri Rawus ka teere migile ka siga a 'buugu ta siiya, ma teere migile möö'dö ka tamana ma almiti.

<sup>18</sup> Ma'duga migile mateefe tala a taada moono, manangnga türeene ma kuri tiya oono ka taguri ka siga yoono.

<sup>19</sup> A taada ma Naüümii tindini oogo, "Nagalinggo o'o kiga ka uuru tanno? A Masala tafa ka ömö'di tiya ana 'bangnga ma o'o ya." Mikirri Rawus ka tiki a taada moono a'da ömö'di ma siga ana eere a'da Büwas.

<sup>20</sup> A Naüümii tiki a Rawus taada moono. "Tafa ka Masala anangnga iyye a kadu na eefe ka 'dī nja tanno kaaya no, a'da taalo mana 'bangnga ma eene. A eere ya Masala fidhindhi. Ömö'di ya a siliga ma angnga."

<sup>21</sup> A Rawus tiki oono, "Iki a'a a'da nütü ka talinggo nja kadu ka siga kidhi ka tiimö taraana ka siga."

<sup>22</sup> Yungngo a Naüümii ka tapadaga tumma a taada moono miki. "A'diila küdü 'badaada eede na o'o talinggo ka siga tanno iini nja iiya, kudumma kadu könö ka oroko."

<sup>23</sup> Yungngo a Rawus ka tüütü ka siga tanna Büwas nja iiya ma linggo ma tere migile kadhi katüümö taraana ka siga. A Rawus tüütü ka taganeene nja taada moono.

**3**

*Rawus ma föönyö tumma na Naüümii*

<sup>1</sup> A Naüümii tiki a taada moono, "Badaada eede, taalo a'a nara tawwa nyuri ya a'diila ya, ya ara tümmü o'o aafa küdü ya o'o?

<sup>2</sup> Büwas ya siliga ma angnga yüüdü ka tagalinggo ka siga tanno iini ya, ungngo ara tödhe ka 'deeli tanno iini ka uuru tanno.

<sup>3</sup> A tigine nakirin'i ten'di ya a'diila ya küdü ka oona na'bunaana oona a kondho nasülüğü caa'bu naco 'deeli, nasa fa tala oona iini ara ka tümmü eema aagala ii sine emmi tikingga.

<sup>4</sup> Natineene i'i ko'do, na o'o tessu 'buugu yiini ka tüyü kide ya. Kini ka ntijüyü aküdhü ten'di kini ka oona ya, kolo na'diniga ten'di ko'do kini ka uune ara o'o tessu niimö yiini ka titirina o'o ya."

<sup>5</sup> A Rawus tiki, "Nüümö yüdü ka tirina a'a ya ara a'a tünni."

<sup>6</sup> A Rawus tasülügű caa'bū malla maaco 'deeli, mütü ka tagüünī afa ma 'berki moono ka tirina oono ya kungngo.

<sup>7</sup> Ka Büwas ka ndagu kuri ma ooso ya, ikiři ka tüyü ka migile kete. A Rawus tunggeene amussu ma'diniga ten'di coo'do kini ka 'buugu ma uune mara ka tüyü kide.

<sup>8</sup> Ooso ka teene a Büwas asinī ko'do eefelege aduna aka ka füngngö kini ka 'bandaguune.

<sup>9</sup> Iki oono, "O'o na mada?"

Mapadaga tumma iini miki. "A'a na Rawus 'badaada ma kalinggo ka siga tanno nüüdū mo, kesse 'dakeyi ma ten'di tammo üüdū kede ku'bu kudumma o'o na siliga ma a'a ya ara tafa kede ya."

<sup>10</sup> İkiři Büwas ka tiki oono, "A Masala tafa küdü, 'badaada kede. Tumma nüüdū ka tagüünī 'bitingngö no, ka'diila 'do karisi ka tanno üüdū ka tagüünī ada a taada ma o'o ka dhidha no. Kudumma üüdū taalo o'o nüüsö ka kadimöögö keere a tanyuri, alla no kütüsö no, alla no eema ka titalo kene no."

<sup>11</sup> A 'bitingngö ya, fa tariba 'badaada eede, ara a'a tünni nüümö yüdü ka asasa ya o'o, kudumma kadu ma anya tammo nye'd'e ya, kussu a'da o'o na aka tammo a'diila mo.

<sup>12</sup> Timin'da, a'a na siliga ma o'o, illi ömö'dü inggide akete kede a küdü.

<sup>13</sup> İfüyü kita ka ooso tanno, üürü tako ka taadha angnga sa ka tassa kide, üürü ama siliga ma o'o ya ka tümmü o'o ma tafa küdü ya, a'diila. Üürü kini ka taanu ya, a'a sa 'duga o'o. Keere ma Masala tiya efe ka 'di ya. İfüyü narigide ara taka kataadha.

<sup>14</sup> Mikirii ka tüyü kini ka 'bandaguune a taka taadha, illi oogo milli ka tino a'da aleefe 'buugu talüllü a'da üfürü ömö'dü tussu, kudumma Büwas ka tiki oono, "Fa tafa ka ömö'di tussu a'da maganna aka ma linynya mo ka 'deeli tiya."

<sup>15</sup> Iki oono, "Kese ten'di yüdü ka ramba ya kita." Mikirii ka tümmönö ma kese ku'bu, yungingo iini ka tuuru na nalmiti ma migile ka iidümmü kafünü unggodho (6) kono kide, eyi oogo ara katunggeene aaco a madiina.

<sup>16</sup> A Rawus co 'di ka taada moono kide, a taada moono tindini oogo, "Ka iki tumma nya 'badaada eede?"

Mikirii Rawus ka tageema ka eema ya Büwas ka tagalinggo ana oogo ya nye'd'e de co taada moono miki.

<sup>17</sup> "Anangnga nalmiti ma migile a'a ka iidümmü kafünü unggodho, ata miini ka tiki a'da naafa tafada ana iisine 'döngngönyö nöö'dö küdü iini."

<sup>18</sup> A Naüümö tiki, "Badaada eede, öödhü ara o'o ka tassa ka tumma tanno. Kudumma ömö'dü tiya taalo ara talingnge kini taalo atüümö yiini ka saasa tünni ya 'bitingngö."

## 4

### Büwas arna Rawus

<sup>1</sup> A Büwas tasüričö co anya, aaco a fangga emmi kide, ikiři siliga miini yiini ka tiki a Rawus ya köö'dö. A Büwas tikiři ka tiki iini, "Taya, aayu emmi kita." Yungngö iini emmi.

<sup>2</sup> A Büwas tagürünü ka naguugaara ma anya kada'baaga iki eene. "Aaga emmi kita."

<sup>3</sup> İkiři Büwas ka tiki a siliga miini, "Mafada Naüümö ndama anya ma Müwab, masaasa tanadene a siga tana Alimalik, siliga ma angnga.

<sup>4</sup> A'a nasaasa tadirina o'o a'da nussu kidha ma naguugaara ma anya nemmi kita no. Üürü ara o'o tana, nadirina a'a kene kidha, kudumma o'o no ungngö natagarna kide ka dhidha, na a'a sa siki küdü kada siliga."

İkiři siliga miini ka tiki, "Ara a'a tana."

<sup>5</sup> A Büwas tapadaga tumma iini iki, "Uuru nüüdū ka tana siga ka Naüümö no, na o'o takarna ka Rawus mada Müwab, aka ma siliga ma angnga ya eyi ya, nggeege ya ara o'o ta karana ka eema tiya siliga ma angnga naafa kide."

<sup>6</sup> İkiři siliga ka tapadaga tumma a Büwas iki, "Nggeege ya, taalo a'a na tussu ka takarana kide, ka takarana kide ya, ara laala tiya oono tö'dö ta karna ka eema tiya eede. 'Birni kide o'o na'duga kudumma eede taalo natussu ka takarana kide."

<sup>7</sup> Aka taanyara ma Israyil 'billi, ömö'dü ka tana nüümö alla kini ka tagere nüümö ka ömö'dü töccö ya, akirnö egüide kini ka uune anangnga a ömö'dü yiini ka tana alla yiini ka tagere nüümö kini ya.

<sup>8</sup> Ka siliga ma Büwas ka tiki iini a'da aana siga ya, ikiři ka kirnö egüide kini ka uune anangnga a Büwas.

<sup>9</sup> İkiři Büwas ka tiki a naguugaara ma anya no, a kadu tanno kemmi nye'd'e de no, "Aaga fa keedinö kide ka uuru tanno, naana a'a eema nja laala tiya Alimalik, Kiliyöön nja Mahlöön ka Naüümö nye'd'e de kungngo."

<sup>10</sup> Na'duga Rawus küüme ma Mahlöön kada aka kede amang kede tafa ka keere nja eema tiya ömö'dü tiya eyi, afa taama, aaga kadin'i kide ka uuru tanno."

<sup>11</sup> A naguugaara ma anya nja kadu tanno emmi nye'd'e de no tiki a Büwas, "Kadini inggide ka uuru tanno. Masala tafa ka aka mara tö'dö ka 'di tiya üüdū mafiigi

afa Rahiil nja iiya no keene kadu siliga ma Israyil. Na o'o tana eere ya idhindhi ka anya ma Afraata, naana eere ka Israyil.

<sup>12</sup> A siliga ya Masala kara tagona o'o ka aka tammo ya, tafeene nja afa ma 'bügööri tiya Fares ya Tamaara ka tageene ada a Yahüusa ya."

<sup>13</sup> A Büwas tarna Rawus aco 'dī ana oogo, a Masala tanangnga oogo ka tagüröönö ma tageene 'bii'bala.

<sup>14</sup> A iiya tiki a Naüümī, "Amma ka Masala ana eedi, kudumma miini ka anangnga 'bii'bala ya eere tiya iini ka tussu adene ka Israyil nye'd'de ya.

<sup>15</sup> Ara tafa kündü 'do, kündü ka tadharu, kudumma taada ma o'o masasa o'o 'do kungngo, maheere a laala ka iidümmü kafünü eera no (7), oogo mungngo mageene i'i."

#### *Siliga ya Dawud*

<sup>16</sup> A Naüümī ta'duga 'bii'bala ma nangnga i'i kono ko'do ma takinggiri i'i.

<sup>17</sup> A iiya na anna kene kete no tiki, "Mageene Naüümī 'bii'bala." Ka nangnga eere iini a'da Obiid, i'i yungngo a pupa tiya Yessi, ya pupa tiya Dawud ya.

<sup>18</sup> A kadaada ma Fares eege kungngo, Fares aga pupa tiya Hasrüün.

<sup>19</sup> Hasrüün a pupa tiya Raam, Raam a pupa tiya Aminadab.

<sup>20</sup> Aminadab a pupa tiya Nahshön, a Nahshön ta pupa tiya Salamöön.

<sup>21</sup> A Salamöön a pupa tiya Büwas. Büwas a pupa tiya Obiid.

<sup>22</sup> A Obiid ta pupa tiya Yessi, a Yessi ta pupa tiya Dawud.

## Yünan Tafa'da tumma

Sorne ya eema tumma ma ne'bi tiya ana eere a'da Yünan ya. Masala miki iini a'da co tadünögü tumma oono co a kadu ma anya Ninawa, na diidi ma Yahüdü no, lakiini Yünan asasa Masala ka kirina kadu ma Ninawa ikiři ka asaasa tarünö ka Masala ku'bu. Aka ka mürkabü ma tara co fiüni tiya a'bana ko'do ma tra co Tarshiish. Lakiini tanya kagiisö ikiři ka'dikö co to ndama mürkabü, a Masala tanangnga mädigilöögö ma dhabbu mo ka toolona i'i. Ndama kanna unggenee aco teema tumma na Masala ka Ninawa, a kadu nye'de taadha ka tatoroko tanno eene. A Masala tafa ka kadu 'do nja anya tammo eene. Lakiini Yünan agoroo'bo 'do kudumma Masala ka titalo magapusu eege. Keere kungno sorne ala tumma a Yunan a'da Masala masaasa mana 'bangnga, oogo mara toolona ömö'di ya ara taadha ka tatoroko ümmü eyi yiini ya.

### *Yünan anu ka tumma tanno Uugaara*

<sup>1</sup> A tumma na Uugaara agöö'dö ka Yünan 'bii'bala ya Amtaya.

<sup>2</sup> Iki, "Fiki'dö naco Ninawa anya ma dhabbu mo naco teema tumma nja kadu miini, a'da nussu a'a tatoroko neene."

<sup>3</sup> Ikiři Yünan ka titalo innyo Ninawa agala ka co anya ma Tarshiish kini ka arünö kudumma Uugaara, innyo anya ma Yaafa aduna mürkabü mara co Aspaniya anangnga faana miini ku'bu aka kide nja nasawaaga miini ma tara co Aspaniya kita iini kara tagu'b'ba ka Uugaara ku'bu kide ya.

<sup>4</sup> Lakiini Uugaara anangnga tanya ka tüsö dhindho ka to a tanya tagüsö dhindho ka kete ka 'bunaana mürkabü ku'bu.

<sup>5</sup> A nasawaaga kari'ba tiidhe ko'd'o kafara ka masala tammo iini. Kadhfifi eema könö kürö ndama mürkabü amang kono tapalpala a'da munggeene. A Yünan aco mürkabü ka tüm'bü, iiyü kide arigide.

<sup>6</sup> A taga sawaaga tö'dö kini iini, "Minna agu o'o narigide kungno? Fiki'dö nafara ka masala tammo üüdü amang kono tana 'bangnga mangnga angnga tafa takaya."

<sup>7</sup> A nasawaaga teema ana ka oona unggodho eege kiki a'da, "Kada fanna muduru amang kaja tagussu nüümö ya ö'dö a tumma aja ka eyi ya." A tameerö ta'dinggö ka Yünan.

<sup>8</sup> Kikiři ka tiki iini, "Tirina ungngo o'o nungngo nö'dö a tumma tanno? Nalinggo o'o minna? Nö'dö o'o ndama kiga?" Anya

müüdü mana eere nya? Kadu müüdü eege ka mada?

<sup>9</sup> Ikiři ka tiki eene, "A'a na taga Yahüdü, a'a nümmü Masala Uugaara ma 'dotombo'do marü'bü 'büdhülü nja to mo."

<sup>10</sup> A Yünan tiki eene a'da i'i ya arünö ka Uugaara ku'bu, ari'ba tümmü nasawaaga dhorro kiki iini, "Minna i'i yungngo üüdü ka tagüünü ana ungngo?"

<sup>11</sup> A tanya ka tüsö dhindho ya. Kikiři ka tiki iini, "Ara ungngo tönynyö ana o'o amang ka to töödhi?"

<sup>12</sup> Ikiři Yünan ka tiki, "Aaga a'dina a'a aaga tapügü a'a co to, amang kono töödhi. Nussu a'a a'da a'a nungngo nö'dö a tumma tanno a to talumuli."

<sup>13</sup> Lakiini nasawaaga ka asasa tagürünögü mürkabü co tinggini ma to illi eege kitaalo kambaanya kudumma to kada kakogoona ma talumuli dhindho.

<sup>14</sup> Kikiři ka fara ka Uugaara kiki, "Ka Uugaara, fa tagirina ungngo kudumma ömö'di tiya o'o nungngo nama tumma tanno, o'o nungngo nakalingngo tumma no ma eedi tiya üüdü."

<sup>15</sup> Kikiři ka 'duga Yünan kapügü i'i co to, ikiři to ka taadha ka talumuli ajeene.

<sup>16</sup> Ari'ba ma Uugaara tümmü nasawaaga ma mürkabü, kiki a'da ara eege tümmü Uugaara dhorro, kada kirri.

<sup>17</sup> Uugaara tanangnga mädigilöögö ma dhabbu mo ka a'duuru Yünan, ada kanna ka mädigilöögö ka eedi a naguuru kiidoona ana ooso miini.

## 2

### *Yünan afara ka Masala*

<sup>1</sup> A Yünan tafara ka Masala Uugaara miini ndama mädigilöögö ka eedi,

<sup>2</sup> "Nikiři a'a nafara küdü Uugaara  
namma ka dhügürü tiya eede.  
Nafara küdü ndama teeme Uugaara na  
taföönyö tumma neede.  
Ndama la ma oofo ka tüm'bü namünögü  
a'a ko'do,  
na taföönyö tumma neede.

<sup>3</sup> Napügü a'a co 'buugu ka tüm'bü ma to  
kita

<sup>4</sup> 'büdü ka taküdhü a'a ka oona in'dili  
nja türü ma 'büdü tiya üüdü nye'de küsö  
kede ko'do.

<sup>5</sup> Niki a'a kide a'da o'o nagasoro a'a kidha  
ma o'o

<sup>6</sup> taalo a'a nara tassa ka 'dü tiya üüdü ya  
insili ya afe'de.

<sup>7</sup> A 'büdü taküdhü a'a nja m'boro  
a to ta'duuru a'a ka oono 'do,

<sup>8</sup> ooyo ma to taküdhü üüdü yeede.

<sup>9</sup> Nadhigi co tüm'bü ma na'dikinya ka  
'büdhülü tiya, naco ka 'büdhülü tiya  
'buugu ya,

nagïnyeene miini ka taterre kede ta'billi no.

Lakiini o'o Masala Uugaara meede  
ara o'o sa tunggu a'a ko'do ndama  
ta'buugu kadinö.

7 Ka tefe ka 'dï tanno eede kara tapadaga  
kede  
ara a'a tagiigï o'o Uugaara  
ara fara yeede tala o'o  
ka 'dï tiya üüdü ya insili ya.

8 Kadu na ümmü tumma ma eema ma  
namasala na oroko na korokoro no,  
amang kene kafa tata'da ka eema tiya  
keere,  
kara kanu ka türü tanno üüdü.

9 Lakiini ara a'a tüwe tüüsü ma tamana  
ta'diila o'o,  
ara tirri o'o.

Nüünii eema yeede ka takiki a'da ara a'a  
tüünii ya,  
toolona kara tö'dö ndama o'o Uu-  
gaara."

10 İkiri Uugaara ka anangnga  
müdiglöögö ka tapügü Yünan co  
'dukundaala.

### 3

#### *Yünan innyyo Ninawa*

1 Uugaara tageema nja Yünan afe'de iki  
iini,

2 "Fiki'dö naco Ninawa anya ma dhabbu  
mo naco teema tumma neede ka tirina o'o  
no."

3 İkiri Yünan ka fiki'dö aco Ninawa afa  
ma tiya Uugaara ka tiki iini ya kungngo.  
Ninawa anya ma dhabbu kungeene  
angnga kide a füngögö iidoona.

4 A Yünan co anya ada kungeene ka  
anya uuru na in'dili no eema iki a'da, "Ka  
füngögö kara tö'dö a kadu keera ya, ara  
Ninawa taga'dadene."

5 A kadu ma Ninawa tamma ka tumma  
tanno Masala, kikiri ka tiki a'da, a kadu  
ümmü tenege in'dili kadara ka kadu  
tanno iifi no nja na idhiidhi no, kakirnö  
fö'dö kene ka oona amang ka kadu tussu  
a'da eege kaadha ka tatoroko.

6 Ka uugaara ma Ninawa ka föönyö  
tumma no ya, afiki'dö ndama uugaara tiya  
iini akirnö ten'di ma tauugaara iini ka  
oona, ara kakirnö taliisi iini ka oona emmi  
ka fu'dö.

7 Anangnga tumma a kadu ma Ninawa,  
"Tumma no kö'dö ndama uugaara nja  
kadu tanno iini na iifi no, taalo ömö'di  
ma tagolo nüümö, kadu in'dili nja eema  
ma eriidö nja kidheefele nja eefo taalo  
kara tagu nüümö nja tooye 'büldi.

8 Kadu nye'de nja eema ma eriidö  
kagirnö nataliisi kene ka oona, a kadu  
nye'de tafara ka Masala dhorro, kaadha  
ka tam'baga tanno eene kadagalinggo no  
nja eema türü.

9 Amang ka Masala tafada ka  
tagoroo'bo tanno oono na dhiiri no, maana  
'bangnga amang kaja tafa takaaya."

10 Ka Masala ka tassa ka linggo tanno  
eene ka talingga no, kaadha ka tatoroko  
tanno eene no, mafada maadha ka tagirina  
meene afa ma tiya oono ka tiraana ya  
kungngo, mitaalo ma kirina eege.

### 4

#### *Tagoroo'bo na Yünan*

1 Eedi tatoroko ka Yünan ka tumma  
tanno, yungngo iini ka tagoroo'bo.

2 İkiri ka tafara ka Uugaara iki, "O'o na  
Uugaara no, taalo nüümö yeede ka tiraana  
a'da naleefe a'ka 'dï, i'i yungngo eede ka  
arünö areere naco Tarshiish. Nussu a'a o'o  
na Masala masaasa kadu mana 'bangnga,  
taalo magoroo'bo sose sose masaasa kadu  
dhorro ma taalo mapusu kadu mo.

3 'Bütüngögö Uugaara, fa kede neyi,  
a'diila eede kara teyi bala kede kefe ka 'dï."

4 Uugaara tiki iini, "A'diila küdü kara  
tagoroo'bo?"

5 A Yünan tö'dö küro ndama anya emmi  
ka fiimi ma ndanaaya ma anya, ataküüfü  
fangga emmi ka tallappa miini indhigï  
nüümö ya ara tö'dö ka Ninawa ya.

6 İkiri Masala Uugaara ka anangnga  
tansükülü ka tinggiridene ka Yünan ka  
üüdü, a tallappa miini tafa kini ii'di nüümö  
tili i'i ka oona, ikiri Yünan ka tadhodho  
kuduma tansükülü.

7 Lakiini na'bu ma taka, a Masala  
tanangnga nda'diino ka anyege'de  
tansükülü karume.

8 Ka ndanaaya ka ndö'dö ko'do ya, a  
Masala tö'dö a tanya ndama fiimi ma  
ndanaaya kagu'daana a ndanaaya tagu'du  
Yünan ka üüdü eyigi ko'do. Iki a'da,  
"A'diila eede kara teyi bala ka tefe ka 'dï."

9 Lakiini Masala miki iini, "Tumma  
kungngo üüdü dhorro nagoroo'bo dhindho  
kudumma tansükülü?"

A Yünan tiki, "Nagoroo'bo a'a 'do ma  
tara teyi."

10 Lakiini Uugaara iki iini, "Minna agu  
o'o nagoroo'bo ma tansükülü tanno üüdü  
ka titalo nadhügürü ma tinggiri i'i ya,  
a tansükülü mo ma inggiridene ooso  
kungngo eyi taka.

11 Anya ma Ninawa mo madhabbu,  
yungngo eede ka tiniglöögö moono, kadu  
ma Ninawa kö'dö 120,000 taalo kussu nüüsö  
ma kuri neene ndama nüüsö ma küüle

tanno eene eema ma eriidö inggide ad-  
habbu afe'de?"

## İnjülli Matta Tafa'da tumma

Matta i'i ya aga ömö'di ma tulu'ba ma naguugaara ma Rööma ka Yasu ka tagümmünü i'i ma turna i'i keere. A Yasu tagesse i'i a'da alinggo nja kadaifiini tanno ö'dö kada'baaga kafünü eera no. Matta arigiri a Yahüdüü a'da Yasu i'i ya Almasiihi tiya Masala ka takiki a'da ara oogo tagürünü. Matta afa'da tumma ma sorne a nagereene ma kadaada alla aco ka Dawud nja Abrahiim. I'i iki a'da, Yasu atümö tumma na nagane'bi ka tageema 'billi no.

Matta adiri tumma ma taneene ma tauugaara ma Masala kafaanya. I'i iki angnga a'da tauugaara ma Masala kama kadu in'dili na linggo eema ya Masala ka asaasa. Ka Yasu ka fik'i dö ndama inde ya, adrina eema a kadalaadene tanno iini a'da kunggeene kaco talaana kadu nye'de amang kene ta kadalaadene tanno iini (Matta 28.20).

### *Kadaada ma Yasu (Lüüka 3.23-38)*

<sup>1</sup> Sorne ya ma nagereene ma kadaada ma Yasu Almasiihi, 'bii'bala ya Dawud, 'bii'bala ya Abrahiim.

<sup>2</sup> Abrahiim tageene Ishak,

Ishak tageene Yaguub,  
a Yaguub tageene Yahüüsa nja nagöre tanno iini.

<sup>3</sup> A Yahüüsa tageene Fares nja Zareh ndama Tamar,

a Fares tageene Hasrüün,

a Hasrüün tageene Aram.

<sup>4</sup> A Aram tageene Aminadab,

Aminadab tageene Nahashön,

a Nahashön tageene Salmöön.

<sup>5</sup> A Salmöön tageene Büwas ndama Rihab, a Büwas tageene Obiid ndama Rawus, Obiid tageene Yessi.

<sup>6</sup> A Yessi tageene Dawud ya uugaara ya.

A Dawud tageene Siliman ndama aka tammo Üüriya.

<sup>7</sup> A Siliman tageene Rahabam, a Rahabam tageene Abiya, Abiya tageene Asa.

<sup>8</sup> Asa tageene Yüshafat, a Yüshafat tageene Yüram,

a Yüram tageene Üsiya.

<sup>9</sup> A Üsiya tageene Yüsam,

a Yüsam tageene Ahas,

Ahas tageene Hasakiya.

<sup>10</sup> A Hasakiya tageene Manasi,

a Manasi tageene Amüün, a Amüün tageene Yüsiya.

<sup>11</sup> A Yüsiya tageene Yakniya nja nagöre tanno iini ka ürüünü ma tadasaga ka Babil.

<sup>12</sup> A kadu kanco ka tadasaga ka Babil ya, a Yakniya tageene Shaltiil, a Shaltiil tageene Zarbabil.

<sup>13</sup> A Zarbabil tageene Abiyahüt. Abiyahüt tageene Aliyakiim.

Aliyakiim tageene Asüür.

<sup>14</sup> Asüür tageene Sadük, a Sadük tageene Akiim, a Akiim tageene Alyüd.

<sup>15</sup> Alyüd tageene Aliaser, a Aliaser tageene Mattan, a Mattan tageene Yaguub.

<sup>16</sup> A Yaguub tageene Yüüsif nyuri ya Mariyom tammo ageene Yasu mo, ya ana eere a'da Almasiihi ya.

<sup>17</sup> A sere ya nye'de ndama Abrahiim öö'dö ka Dawud, ö'dö ada'baaga afünü egüsö. Kandö'dö ndama Dawud alla aaco ka tadasaga ka Babil, a sere ya miini ya ö'dö ada'baaga afünü egüsö. A sere ya ö'dö ndama Babil ya alla aaco ka Almasiihi ö'dö ada'baaga afünü egüsö.

### *Teneedene na Yasu Almasiihi (Lüüka 2.1-7)*

<sup>18</sup> Teneedene na Yasu Almasiihi kungngo, ka Yüüsif ka tagümmünü Mariyom ku'bu ya, maduna eyi yoono ka küröönö ndama Koronggore tiya Insili ya a'da küfürü ta'duga ajeene.

<sup>19</sup> A Yüüsif i'i a'diila i'i taalo asaasa tanangga modolo oono ka oona, ikirü ka asaasa taadha kono kumu kume ün'düngüngö.

<sup>20</sup> A kini ka tasüngüri ma tumma tanno ya, a tadhangga ma Masala ö'dö kini a kümböödö iki iini, "Yüüsif 'bii'bala ya Dawud, fa tari'ba ma ta'duga aka müüdü Mariyom kada aka tammo üüdö, kudumma tagüröönö tanno oono ka oona no, ndama Koronggore tiya Insili ya.

<sup>21</sup> Mara teene 'bii'bala nanangga eere iini a'da Yasu, kudumma iini kara toolona kadu niini ka eema tiya toroko ya."

<sup>22</sup> Tumma no ka innyyo ööye miini afa ma tiya Uugaara ka takatiraana a nüünö tanno ne'bi Asaya no kungngo,

<sup>23</sup> "Badaada ma tölömü mara tagüröönö meene 'bii'bala

kanangga eere iini a'da Emanwil" a'da, Masala nja angnga.

<sup>24</sup> Ka Yüüsif ka ajeene ka tarigide ya, adagalinggo afa ma tiya tadhangga ma Masala ka tirina iini ya, a'duga aka miini.

<sup>25</sup> Lakiini i'i itaalo iifyü nja oono midhi ma tageene 'bii'bala yoono, a Yüüsif tanangnga eere iini a'da Yasu.

## 2

### Kamasala

<sup>1</sup> Ka Yasu ka tageenedene ka Beetlaham ma Yahüüdiya ka ürüünü tanno Hirüdüs kadagauugaara ya, a'da köö'dö kamasala na ussu tumma ma midigi no ndama fiinii ma ndanaaya, köö'dö ka Örsaliim.

<sup>2</sup> Kiki a'da, "Uugaara ma Yahüüdü ya aageenedene ya iifye? Kasala ungngo timidiigii niimi ka fiinii ma ndanaaya, yungngo iidi köö'dö tafara kini."

<sup>3</sup> Ka Hirüdüs ka taföönyö tumma no ya, a ri'ba tümmü i'i nja kadu ma Örsaliim nye'de kungngo.

<sup>4</sup> İkiri ka tawagaana naguugaara ma ka'boge koona nja katalaana ma seriye indini eege iki, "Ara Almasihi teenedene kiga?"

<sup>5</sup> Kiki iini, "Ka Beetlaham ma Yahüüdiya, kudumma ne'bi ka tagarigiri ada ka sorne iki,

<sup>6</sup> 'Ka Beetlaham anya ma Yahüüsa taalo o'o na dhilli ka naguugaara ma Yahüüsa, kudumma uugaara kara tö'dö ndama o'o öö'dö tafa ka kadu tanno eede Is-rayil.'"

<sup>7</sup> İkiri Hirüdüs ka tagümmünaana kamasala koona kume kume indini eege ma uuru tanno timidiigii ka tö'dö ko'do iini no.

<sup>8</sup> İkiri ka tuurugu eege co Beetlaham iki eene, "Aaga agolo aaga co tawwa 'buugu ma 'bii'bala amussu kada kaduna i'i ya aaga tadirina a'a nöö'dö tafara kini tekere."

<sup>9</sup> Kene ka ndaföönyö tumma ka uugaara ya, kikiri ka tunggeene, kene ka tunggeene a timidiigii neene ka tijöögö ka fiinii ma ndanaaya no, kunggeene kene kidha kidhi köödhi ka üüdü ma 'buugu tiya 'bii'bala ka tanna kide ya.

<sup>10</sup> Kene ka tasala timidiigii kikiri ka tadhodho 'do.

<sup>11</sup> Kikiri ka co a 'büggöri kaduna 'bii'bala nja nüümö tammo iini Mariyom. Kikiri ka tüürü ku'bu ana küüge kamma kini, kikiri ka tafa'da nakanjoko neene kanangnga dahaba iini nja kondho nja maaga.

<sup>12</sup> A Masala tiki eene a kümböödö a'da kafa tapadaga ka Hirüdüs kanna, kikiri ka tigaala ka fiinii tököönö kaco anya tammo eene.

### Tarünö ma co Misiri

<sup>13</sup> Kene ka ndunggeene ya ikiri tadhingga ma Uugaara ka öö'dö ka Yüüsif a kümböödö iki iini, "Fiki'dö na'duga 'bii'bala nja nüümö narünö naco a Misiri nanna kide, ara a'a saga tirina o'o aaga sa köö'dö, kudumma Hirüdüs ka asasa tawwa 'buugu ma 'bii'bala iidi i'i."

<sup>14</sup> İkiri Yüüsif ka fiki'dö a'duga 'bii'bala nja nüümö ooso kungngo kaco Misiri,

<sup>15</sup> adaganna kide idhi Hirüdüs teyi. Tumma no ka inynyo ööye miini afa ma tiya Uugaara ka takatiraana a nüönö tanno ne'bi Asaya no kungngo, "Natümmünü a'a 'bii'bala yeede ndama Misiri."

<sup>16</sup> Ka Hirüdüs ka tassa ka kamasaala katümmünü ünggü iini ya, ikiri ka agoroob'o 'do, ikiri ka kürünü nasigira kagirina laala ya nagiide ya ka Beetlaham nja na'buugu tanno kete kide no, laala ma nagürünü keera kadara co tanno asigi kene no tamana ma uuru tanno iini ka taföönyö ka kamasaala no.

<sup>17</sup> A tumma na ne'bi Armiya ka tatiraana no tarooro ka co ööye miini,

<sup>18</sup> "Kaföönyö kadu takeere ka Raama, fara nja ndhiidhe ko'd do.

Rahiil mafara kudumma laala tiya oono taalo masaasa kadu ka talomo oogo kudumma eene ka taalo kefe ka 'di.'

### Tafada ndama Misiri

<sup>19</sup> Aga Hirüdüs ka ndeyi ya, ikiri tadhingga ma Masala ka öö'dö ka Yüüsif a kümböödö ka Misiri,

<sup>20</sup> iki iini, "Fiki'dö na'duga 'bii'bala nja nüümö nafada naco anya ma Israyil, kudumma kadu tanno asaasa tagiidi i'i no kaaya."

<sup>21</sup> İkiri ka fiki'dö a'duga 'bii'bala nja nüümö aco anya ma Israyil.

<sup>22</sup> İkiri ka föönyö a'da Arkilaus ümmü tauugaara na pupa tiya iini Hirüdüs ka Yahüüdiya, ikiri ka ari'ba co. A Masala tiki iini a kümböödö, ikiri ka tunggeene aco Jalili.

<sup>23</sup> Öö'dö ka anya tammo ana eere a'da Nasira mo adaganna kide, amang ka tumma tanno nagane'bi co ööye miini, "Ara tana eere a'da taga Nasira."

## 3

### Yühanna ya tatambeese ya indinaana fiini

(Murkus 1.1-8; Lüüka 3.1-18; Yühanna 1.19-28)

<sup>1</sup> Ka naguuru tanno miini no, agöö'dö Yühanna ya Tatambeese ya, ka dhiile ma Yahüüdiya adünügü tumma ma İnjii'l co a kadu,

<sup>2</sup> "Aaga aadha ka linggo ma eema tiya toroko ya kudumma tauugaara ma 'dotombo'do ka ndakete."

<sup>3</sup> Yungngo a ne'bi Asaiya ka tageema tumma miini iki a'da,  
"Kafara takeere ka dhiile,  
'Aaga indinaana fiini ka Uugaara ku'bu,  
aaga indinaana nafiini kini ku'bu, ka tadhidho.'"

<sup>4</sup> A Yühanna tagümmü en'di ma musa ma nagamalaga ka oona imi'di eedi ana jönnö ma öttö aagu müdümü njä küde ma dhiile.

<sup>5</sup> A kadu ta kicci kini ndama Örsaliim njä Yahüüdiya nye'de njä na'bugu tanno kete ka Ri ma Ürdün no.

<sup>6</sup> Atagambeese euge ka Ri ma Ürdün eene ka tamma ka Masala kaadha ka eema tiya toroko ya.

<sup>7</sup> A Yühanna tiji naFariisi njä Sadügiin dhabbu ka tikki kini ma tambeese, ikirii ka tiki eene, "Aaga na laala ma nööni no! Mada i'i yungngo alaana aaga ka nafiini aaga tarünö ka tagoroo'bo tanno unggunu tö'dö no?

<sup>8</sup> Aaga alinggo eema ya a'diila ya ara tanangnga kadu katuss a'da kaadha aaga ka eema tiya toroko ya.

<sup>9</sup> Aaga tafa tiki ka nanggeyi tanno ada a'da Abrahiim ya pupa tiya ada, nikirii a'a ka tiki aaga, Masala mana türü moono kara ta'bele nüigisi no kada laala tiya Abrahiim.

<sup>10</sup> Asa kafa takete ka teedhe ereere ma naafa, fa ya taalo ö'dö ana iifye ka'diila ya, atendhe apügünja ka issi.

<sup>11</sup> "Nambeese a'a aaga a 'büüdi ma toolona tatoroko. Lakinji ömö'di inggide ara tö'dö kede keere agii'bi a'a nitaalo natambaanya tagildhe egüide yiini ara tambeese aaga a Koronggore tiya Insili ya nja issi.

<sup>12</sup> Si'diga ma ungngo iini agirnaana 'deeli ko'do iini awagaana migile miini koona uurugu co 'boode, ara kafü issi ka koforo ka finne turi."

*Yühanna ambeese Yasu  
(Murkus 1.9-11; Lüüka 3.21-22)*

<sup>13</sup> A Yasu ka ö'dö ndama Jaliil aaco Ürdün ka Yühanna a'da ambeese i'i.

<sup>14</sup> Lakinji Yühanna anu iki iini a'da, "Nagala a'a ka asaasa o'o ka tambeese a'a, na o'o sa agala ka öö'dö kede adha?"

<sup>15</sup> Ikirii Yasu ka tiki iini, "Fa kide ama 'bitüngngö, amang kaja tafara linggo na Masala." Yungngo Yühanna ka tamma.

<sup>16</sup> Ka Yasu kanda kambeesedene ikirii ka öö'dö ko'do ndama 'büüdi, a 'dotombo'do

tatanfa'da asala Koronggore ya Masala ka tunggunuaku'bu ka afene njä ndalambo idhi kini ka oona.

<sup>17</sup> A tumma tö'dö ndama 'dotombo'do kiki, "Bii'bala yeede ka asaasa i'i dhorro ya, i'i yungngo, ka'diila oona eede ma iini."

## 4

*Ebliisi a'b'ba Yasu  
(Murkus 1.12-13; Lüüka 4.1-13)*

<sup>1</sup> A Koronggore tüögü Yasu aaco dhiile iini, a Ebliisi co ta'b'ba i'i.

<sup>2</sup> Ümmü tenege a fungngö ukumu kadu keera ooso kungngö ana uru miini, idhi iire tümmü i'i.

<sup>3</sup> Ikirii Ebliisi ka öö'dö kini iki iini, "Üürü o'o na 'Bii'bala ma Masala, iki a nüigisi tanno ka tem'bele kada miteene."

<sup>4</sup> Ikirii Yasu ka tiki iini, "Sorne ma Masala iki,

Taalo miteene unggodho oogo mamana ömö'di keefe ka 'di iini,  
lakiini a tumma tanno Masala ka teema no nye'de.'

<sup>5</sup> Ikirii Ebliisi ka 'duga i'i aaco anya tammo insili mo iini, anangnga i'i ka 'dingnge ka la ma Masala ka 'dasala ko'd'do.

<sup>6</sup> Iki iini, "Üürü o'o na 'Bii'bala ma Masala ya, pügü eyi yüdücaa'b'u kudumma sorne ma Masala ka tiki a'da,  
'Ara Masala tiki a kadhangga tanno oono a'da kaada o'o ana iisine  
kudumma mäsi kara teedhe o'o ka awwa.'

<sup>7</sup> Ikirii Yasu ka tiki iini, "Sorne ma Masala iki a'da, 'Fa ta'b'ba Masala Uugaara müüdü ka oona.'

<sup>8</sup> Ebliisi ta'duga Yasu asirö anya ma dhonggoro mo iini, aala i'i ka tauugaara ma 'büdhülü njä türü miini nye'de kungngö.

<sup>9</sup> Iki iini, "Eema ya nye'de kungngö ara a'a tanangnga o'o, küdü kara tüürü ku'bu kede kidha namma kede."

<sup>10</sup> Ikirii Yasu ka tiki iini, "Sigi co kannade ka oona o'o na Ebliisi no, sorne ma Masala iki,

Üürü ku'bu ana küüge kidha ma Masala Uugaara müüdü nalinggo ada oono unggodho oogo,  
üüd ka tüürü ku'bu namma kono.'

<sup>11</sup> Ikirii Ebliisi ka tinyi i'i ku'bu, a kadhangga tö'dö kalinggo ada iini.

*Yasu alaana kadu ka Jaliil  
(Murkus 1.14-15; Lüüka 4.14-15)*

<sup>12</sup> Aga Yasu ka taföönyö a'da Yühanna ananja ka pabuusu ya, ikirü ka tunggeene aaco Jaliil.

<sup>13</sup> İkirü ka tunggeene ka Nasira aco tanna ka Kafarnahööm ka tinggini ma to ma Jaliil, ka anya ma Zabaloon nja Naftali.

<sup>14</sup> Amang ka tumma tanno ne'bi Asaiya ka takiki no, co ööye miini.

<sup>15</sup> "Ka 'büdhülü ma Zabaloon nja Naftali, ndama nafiinii ma to ma tadigaala ka Ürdün,

Jaliil ma kajeeene.

<sup>16</sup> Kadu na anna ka ndüüli no, kasala töyeene na dhabbu no a kadu na anna ka 'buugu ma ndüüli ma inde no ka'daranja töyeene kene ka oona."

<sup>17</sup> Ndama uuru tanno miini no ikirü Yasu ka talaana kadu iki, "Aaga aadha ka tatoroko kudumma tauugaara ma 'dotombo'do kanda kete."

*Kadalaadene na dhidha no  
(Murkus 1.16-20; Lüüka 5.1-11)*

<sup>18</sup> A Yasu tagunggeene ka tinggini ma to ma Jaliil asala nagöre keera, Samaan yeene ka tümmünü i'i a'da Bütrüs ya nja örre tiya iini Andraws kapapügü sa'baka co to kudumma eene ka tümmü kilöögö.

<sup>19</sup> İkirü Yasu ka tiki eene, "Aaga ö'dö kede keere nalaana aaga ka kinne kadu."

<sup>20</sup> Kikirü karooro ka tinyi nasa'baka neene ku'bu kara kaduurna i'i keere.

<sup>21</sup> Unggeene ndama kanna asala nagöre könö keera afe'de, Yaguub 'bii'bala ya Za'bedi nja örre tiya iini ya ana eere a'da Yühanna ya, kungno ka mürkabü, nja pupa tiya eene Za'bedi kindinaana nasa'baka neene, ikirü Yasu ka tagümmünü euge.

<sup>22</sup> Karooro ka tinyi mürkabü ku'bu nja pupa tiya eene kara kaduurna i'i keere.

*Yasu oolona kadu ka maara  
(Lüüka 6.17-19)*

<sup>23</sup> A Yasu takunggunaana ku'bu ka naanya ma Jaliil nye'd'e kungno, alaanana kadu ka naala ma talaana adünügü tumma ma tauugaara ma 'dotombo'do eene, oolona kadu ka maara.

<sup>24</sup> A tumma miini tanyala ku'bu ka Süüriya nye'd'e kungno, a kadu na maara no tö'dö kini nye'd'e nja tanno nagoronggore ka talinggo egee no, nja namügüre nja tanno ana insigiri no, oolona egee.

<sup>25</sup> A kadu ma Jaliil tuurna i'i keere kadhabbu, nja Naanya tanno ada'baaga no nja Örsaliim nja Yahüüdiya nja nda'da ma Ürdün.

## 5

*Talaana na Yasu ka 'dikinya*

<sup>1</sup> Aga Yasu ka tasala kadu kadhabbu ya, ikirü ka sирö 'dikinya emmi, a kadalaadene niini tö'dö kini kete,

<sup>2</sup> ikirü ka talaana egee iki,

<sup>3</sup> "A'diila nja kadu tanno iicolo ka nanggeedi a koronggore no, kudumma eene ka taluna tauugaara ma 'dotombo'do.

<sup>4</sup> A'diila nja kadu tanno afara no, kudumma Masala ma tayugu fara eene ka iÿye.

<sup>5</sup> A'diila nja kadu tanno üpü nanggeyi neene co kudumma Masala no, kudumma eene kara takarna ka 'büdhülü.

<sup>6</sup> A'diila nja kadu tanno iire kagu egee nja teneye ma tumma tanno dhorro no, kudumma eene kara tüüsü.

<sup>7</sup> A'diila nja kadu tanno amana eema a kadu no, kudumma Masala mara tana 'bangnga meene.

<sup>8</sup> A'diila nja kadu tanno insili ka nanggeedi no, kudumma eene kara tiji Masala.

<sup>9</sup> A'diila nja kadu tanno alingga ta'diila no, kudumma eene kana eere a'da, laala ya Masala.

<sup>10</sup> A'diila nja kadu tanno kürümüdene no kudumma eene kadho ka fiinii, kudumma tauugaara ma 'dotombo'do kungno eene.

<sup>11</sup> "A'diila nja aaga a kadu ka teela aaga ka linggo aaga kafünü korokoro kada ka oona ma eema tiya toroko ya kudumma eere tiya eede.

<sup>12</sup> Aaga dhodho aaga ta'deema, kudumma eema ma talingñe ungngö ada ka 'dotombo'do dhabbu, tafiqi meene ka tagüünü tatoroko a nagane'bä kada kidha.

*Töyeene nja tangga'dala*

*(Murkus 9.50; Lüüka 14.34-35)*

<sup>13</sup> "Aaga ka tangga'dala ma 'büdhülü, a tangga'dala kara tasügüni üürü tanye'deny'e de miini kara titaaloo 'dee, ara angnga tanangnga egee kada tanye'deny'e de nya afe'de? Illi a kadu tadhifi co aküro a kadu tüsiraana kide.

<sup>14</sup> "Aaga ka töyeene ma 'büdhülü, taalo noö'dü no ka anya ko'do no kara tadünggüdhü.

<sup>15</sup> A ömö'dü taalo ara tata issi ka lamba anangnga ka dhafala ka tüm'bü, lakiini a'diniga oogo ka ndanda amang kono töyeene ada ka kadu tanno ka 'büggöörü no.

<sup>16</sup> Aaga fa ka töyeene tanno ada ka öyeene ada ka kadu kidha, nggeege

amang kene tiji linggo naada na 'diila no kafünögü Pupa yaada ya ka 'dotombo'do ya ko'do.

### Talaana ma Seriye

<sup>17</sup> "Aaga fa tiki kide a'da a'a nö'dö taadha ka tumma ma Seriye nja tumma ma nagane'bi, taalo a'a nö'dö taga'da, lakiini a'a nö'dö tak'i di egee ku'bu.

<sup>18</sup> Ara a'a tadirina tumma aaga dhorro, salsa a 'büdhülü nja 'dotombo'do tamanyaga, taalo 'bandumma unggodho kungno a titalo 'do sala idhilli kungno ka tumma tanno seriye ara titalo illi a tumma ma Seriye tafaradene 'do.

<sup>19</sup> Ömö'di ya aga'da tumma no, mündä ya idhilli ya, ara ka talaana kadu a'da üünü nggeege afa i'i ya, ara tidhilli ka tauugaara ma 'dotombo'do, illi ömö'di ya linggo iini dhorro ya, alaana kadu, ara tidhindhii ka tauugaara ma 'dotombo'do.

<sup>20</sup> Ara a'a tiki aaga, ka ta'diila tanno ada, taalo kagii'bi naFariisi nja katalaana ma seriye ya, tumma dhorro taalo aaga kara co ka tauugaara ma 'dotombo'do.

### Tagoroo'bo

<sup>21</sup> "Kaföönöyö aaga Seriye ka takiki a kadu ma 'billi a'da, 'Kafa tagirina kadu, ömö'di ya tagirina kadu ya, ara uugaara tümmü i'i iidaana.'

<sup>22</sup> Lakiini a'a niki aaga, ömö'di ya agoroo'bo nja örre tiya iini ya, ara tahükümüdene afe'de, ömö'di ya iki örre tiya iini a'da sölömö ya, ara kadu ma la ma kadiifi ma Yahuüdü tindini i'i, lakiini ömö'di ya iki o'o a'da 'baga ya ara co ka issi ma Jahanan.

<sup>23</sup> "Küdü kara tasaasa türri a nüümö ma eriidö ka müsi ma türri ya, nassa ka tagiigü tumma ma 'bandagoroo'bo unggno ada ku'bu nja örre tiya yüüdü ya.

<sup>24</sup> Nyi nüümö ma taraana yüüdü ka müsi ma türri. Unggeene naco teema tumma ma ta'diila nja örre tiya üüdü ka dhidha, nassa kico türri a nüümö ma eriidö tiya üüdü.

<sup>25</sup> "Areeere na'diila nja diidi ma o'o a'da kaleefe aaga tunggeene ka fiin ma co ka seriye nja iini, i'i'di tümmünü o'o uugaara, a uugaara tümmünü o'o a tamönggö, a tamönggö ta'duga o'o unggu ka pabuuusu.

<sup>26</sup> Ara a'a tadirina tumma o'o dhorro, taalo o'o nara tö'dö kürö ndama iini, illi küdü ka anangnga gürüüsi ku'bu nye'd'e.

### Temelö

<sup>27</sup> "Kaföönöyö aaga ka kadu ma 'billi katiki a'da, 'Aaga fa temelö.'

<sup>28</sup> Lakiini a'a niki ömö'di ya assa ka aka asaasa oogo ana eedi ya i'i afüngngö ana oogo ana eedi.

<sup>29</sup> Üürü ööye ma nüsö ma kuri yungno ya nangnga o'o ka talinggo eema ya toroko ya, agodhe i'i nüpü co küdü ka oona, a'diila a tuu'da tököönö ka 'dugadene küdü ka oona, a tuu'da tafa co ka issi ma Jahanam nye'd'e.

<sup>30</sup> Üürü nüsö ma kuri nüüdü ka amana o'o ka talinggo tatoroko ya, rumuna eege co üdü ka oona, a'diila nggeege a tuu'da tököönö ka 'dugadene küdü ka oona, amang ka tuu'da tanno üüdü nye'd'e tafa co ka issi ma Jahanam."

### Tadheene

(Mattta 19.9; Murkus 10.11-12; Lüüka 16.18)

<sup>31</sup> 'Ageemadene a'da, 'Ömö'di ya adheene nja aka tammo iini ya, anangnga waraga ma tadheene oono.'

<sup>32</sup> Lakiini a'a niki aaga, ömö'di ya apa ka aka tammo iini ya, ara tanangnga oogo ka temelö illi kini ka aduna oogo ka füngngö nja ömö'di. Ömö'di ya arna aka ma adheene nja nyuri mo, i'i ya afüngngö ana oogo a nyoro.

### Taküdöönö

<sup>33</sup> 'Kaföönöyö aaga, iini ka takiki a kadu ma 'billi, 'Aaga fa taküdöönö a korokoro, lakiini aaga fa ka taküdöönö tanno ada ka tagüüni ada Uugaara no.'

<sup>34</sup> Lakiini a'a niki aaga, aaga fa taküdöönö 'do a 'dotombo'do kudumma eene kada 'buugu ma temmi tiya Masala.

<sup>35</sup> Aaga fa taküdöönö a 'büdhülü kudumma iini kada 'buugu ma uune tanno oono i'i ya miini nja Örsaliim kadaanya tammo Uugaara tiya Dhabu ya.

<sup>36</sup> Fa taküdöönö ana üüdü tiya yüüdü, kudumma üüdü taalo na tanangnga ndanawu ka unggodho kungno ka ta'bassa nja eene ka ta'dü'dü.

<sup>37</sup> Lakiini aaga, fa ka tumma tanno ada a'da, 'I'i' nja 'U'u, ömö'di ya agusu nüümö öccö kide ya i'i ya ömö'di tiya toroko ya.'

### Ta'düünö

(Lüüka 6.29-30)

<sup>38</sup> 'Kaföönöyö aaga iini ka tiki a kadu ma 'billi, 'Ööye nja ööye miini, tinggini nja tinggini.'

<sup>39</sup> Lakiini a'a niki aaga, aaga fa ta'düünö kömüsü ma eema tiya atoroko ya, ömö'di kara tabbü o'o ka tanggarama ma nüsö ma kuri ya, napelanaga könö iini.

<sup>40</sup> Üürü ömö'di öccö asaasa tasigi o'o a'duga ten'di müüdü ma teene mo ya, fa kini a'duga ten'di müüdü ma kürö mo afe'd'e.

41 Üürü ömö'di a'bunu o'o a'da nunggeene nja meelee ma unggodho ya unggeene nja iini nameele keera.

42 Ka ömö'di ka arangnga nüümö küdü nanangnga iini, aga ömö'di ka asaasa nüümö küdü a kümüsü nafa ta'duga kini.

*Asaasa nadiidi nüüdü*  
(Lüüka 6.27-28, 32-36)

43 "Kaföönyö aaga iini ka takiki 'billi, 'Asaasa ömö'di ya kete küdü ya, naanu ka diidi ma o'o."

44 Illi a'a niki aaga, aaga asaasa nadiidi naada, aaga tafara ka Masala kudumma kadu tanno alinggo aaga no.

45 Amang kada ta laala tiya Pupa tiya ada ya ka 'dotombo'do ya, kudumma iini ka anangnga ndanaaya ka öyeene ada a kadu tanno oroko no nja tanno a'diila no, amana tomb'o do a kadu tanno a'diila no, nja tanno üünii ada kadu ku'bu no.

46 Kada ka tasaasa kadu na asaasa aaga no, nüümö yaada ka taluna kide i'i iyye? Taalo kadu na ama tulu'ba no kalinggo eege?

47 A kada kara tööjülü nagöre naada unggodho eege, ara aaga taluna minna ya a'diila ya kide? Taalo kadu na taalo kussu Masala no kalinggo nggeege?

48 Aaga 'diila dhorro kudumma Pupa tiya ada ya ka 'dotombo'do ya, a'diila dhorro."

## 6

*Nyi eema a kadu tanno eema katitaalo kene no*

1 "Aaga adin'i ko'do aaga tafa tamana eema a kadu ka kadu kidha, amang kene tiji aaga, nggeege ya taalo Pupa yaada ya ka 'dotombo'do ya ara tanangnga eema aaga afe'de.

2 Küdü kara tanangnga nüümö ömö'di, fa tabbü amba nja tinüidö afa ma tiya kadu töccö ka talinggo ka naala ma talaana nja nafüni no kungngo, amang ka kadu tafünügү eege ko'do, ara a'a tadirina tumma aaga dhorro kadu no ka nda'duga faana yeene nye'd'e.

3 Lakiini küdü kara tanangnga nüümö ömö'di ya, fa tafa ka nüüsö ma küüle tafa kussu nüümö ya nüüsö ma kuri ka talinggo ya.

4 Amang ka linggo tanno miini no tanna ka küdhü, amang ka Pupa tiya yüüdü ya iji eema ka küdhü, ya tanangnga talingnge nüüdü o'o.

*Tafara ka Masala nja tümmü tenegē*  
(Lüüka 11.2-4)

5 "Kada kara tafara ka Masala ya, aaga tafa tafeene nja kadu tanno a'diniga nanggeyi neene coo'do no, kasaasa tafara

ka Masala ka naala ma talaana nja nattinggini ma nafüni amang ka kadu tadinö kene, ara a'a tadirina tumma aaga dhorro, kadu na miini no ka nda'duga faana yeene nye'd'e.

6 A küdü kara tafara ka Masala ya, kolo la tiya yüüdü neere ka iyye, na o'o sa ka fara ka Pupa tiya yüüdü ya ka küdhü ya, a Pupa yüüdü ya iji o'o ka küdhü ya, i'i yungngō ara tanangnga talingnge nüüdü o'o.

7 Aaga fa teema tumma aaga tam'birinaana kada kara tafara ka Masala afa kadu na taalo kussu nafüni ma Masala no, eege kiki kide a'da Masala mara tamma kene ka tumma eene kadeema tumma kadhabbu.

8 Aaga fa tafeene nja eene, kudumma Masala Pupa yaada milli ka tussu nüümö yaada ka asaasa ya a'da küfürü aaga tarangnga.

9 "Aaga afara ka Masala afa ma tiya kungingo,  
Pupa yüüdü ya ka 'dotombo'do ya,  
fa ka eere tiya yüüdü iihindhi.

10 Fa ka tauugaara tanno üüdü ka öö'dö  
fa ka tumma tanno üüdü küünidene  
ka 'büdhülü nja 'dotombo'do.

11 Nanangnga kuri ma uuru tanno ungngo.

12 'Duga tam'baga nüüdikidü ka oona  
afa müüdikidü ka afa ka kadu tanno üüni  
tatoroko ana ungngo no.

13 Fa tafa kidü ungngo ta'dünggö ka  
ta'b'badene,

lakiini olona ungngo ka tatoroko.'

14 Kada kara tüüpü nanggeyi co ka eema tiya kadu ka talinggo ana aaga ya, ara Pupa yaada ya ka 'dotombo'do ya tafa ka tatoroko tanno ada.

15 A kada katitaalo kafa ka tam'baga tanno kadu, taalo Pupa yaada ata'duga tam'baga naada ada ka oona.

*Tümmü tenegē*

16 "Kada kara tümmü tenegē, aaga tafa tafa ka kadu kussu a'da kümmöönö aaga, aaga fa tafeene nja kadu tanno alinggo eema ka kadu kidha a'da kiji eege. Kamüürü kaga'da iyye neene, kalaala a kadu amang kene tiki a'da eege kümmü tenegē, nikirü a'ka tiki aaga a'da kadu no kanda'duga faana yeene.

17 Lakiini küdü kara tümmü tenegē na'bunaana uu'ba küdü ka üüdü nagala iyye.

18 Amang ka kadu tafa tussu a'da nüümü o'o tenegē, illi Pupa yüüdü ya anna ka küdhü ya i'i yungngō ussu, a Pupa yüüdü ya ka küdhü ya, ara tanangnga talingnge o'o.

*Almaala ka 'dotombo'do*  
(Lüüka 12.33–34)

<sup>19</sup> "Aaga fa tawaana eema ma 'büdhülü ada ku'bu, kudumma iini kara tala'ba a kü'düü'dü talimi nya kanyooro kara tagü'dü kanyooro.

<sup>20</sup> Lakiini aaga waanaga eema co 'dotombo'do kita a tasügüni katitalo kide nya kü'düü'dü ya, amang ka kanyooro tafa tagü'dü ka 'duga.

<sup>21</sup> 'Buugu ya eema tiya üüdü ka tanna kide ya ara eedi yüüdü tanna'daga co.

<sup>22</sup> "Töyeene ma tuu'da tanno üüdü a'da ööye, ööye yüüdü kara ta'diila, ara oona nüüdü töyeene nye'de kungngo.

<sup>23</sup> Üürü ööye yüüdü atatoroko ya ara oona nüüdü ta ndüülii a töyeene na küdü no kara ta ndüülii ara ndüülii miini tatoroko dhorro.

<sup>24</sup> "Taalo ömö'di kara tamaanya talinggo ada a kadu keera, kudumma iini kara tüünii ada ya ku'bu asaasa ya, ara tamma kada öccö aana ka töccö, taalo aaga ka tamaanya talinggo ada Masala nya almaala.

*Fa tadinigöögö*  
(Lüüka 12.22–34)

<sup>25</sup> "I'i yungno eede ka tiki aaga, aaga fa tadinigöögö ma nangnga eyi tanno ada ma tooye nya kuri, nya en'di ma tagirnii ka oona, taalo tefa ka 'di kagii'bi kuri, a tuu'da tagii'bi en'di?

<sup>26</sup> Aaga assa ka uyi ma 'dotombo'do taalo ka leele kitaalo karaana taalo kodhde kuurugu co na'boode, a Pupa yaada ya ka 'dotombo'do ya sa kaamana eema eene, taalo aaga kagu'daana aaga tagii'bi eege?

<sup>27</sup> Mada ana kada ara tagussu mitiri ka oona tanno iini kadhonggoro?

<sup>28</sup> "Minna agu tumma ma en'di kagu'du aaga ka oona? Aaga üri togoogo ma lodho inggiridene nya taalo kadhügürü kayaana.

<sup>29</sup> Ara a'a tiki aaga, mündä Siliman ka tüdhindhi tanno iini 'do, taalo akümmü ten'di ka oona ka'diila afa ma togoogo tiya miini ya kungngo.

<sup>30</sup> Ooyo ma lodho ya abbü tulii 'bütingngö atinyogo taka, magirnii Masala en'di ya a'diila ya kene ka oona adha illi aaga taalo mara tagirnii en'di ada ka oona? Aaga na tumma ma Masala ka titaalo kada ka nanggeedi no.

<sup>31</sup> Aaga fa tadinigöögö aaga tiki a'da, 'Ara ungno tagu minna ara angnga tooye minna, ara angnga tümmü minna ka oona?'

<sup>32</sup> Kadu na taalo kussu Masala no eege kungngo ka asaasa eema nggeege, a Pupa yaada ya ka 'dotombo'do ya ussu a'da kasaasa aaga eema ya nye'de kungngo.

<sup>33</sup> Lakiini aaga asaasa tauugaara ma Masala ka dhidha nya fiinii tiya oono, eema ya nye'de assa ka kusunja kada kide.

<sup>34</sup> Nggeege aaga fa tadinigöögö ma eema ma taka, kudumma taka eema yeene inggide unggodho eege fa ka eema ma uuru tanno ama miini unggodho i'i.

## 7

*Tafünü tumma ka kadu ko'do*  
(Lüüka 6.37–38, 41–42)

<sup>1</sup> "Aaga fa tasigi kadu amang kada tafa tasigidene.

<sup>2</sup> Afa maada ka tasigi kadu ara aaga tasigidene tekere, yaada ka talinggo a kadu ya, ara talinggo adene ana aaga nggeege.

<sup>3</sup> Minna agu o'o nadinö 'bandiisi yungno ka örre tiya yüüdü ka ööye ya, ara o'o ka titaalo naana iifye ka ndagee'di tanno üüdü ka ööye no.

<sup>4</sup> Ara o'o tiki a tööjöögö a'da, 'Öödhü na'duga 'bandiisi küdü ka ööye,' a'da ndagee'di kungngo üüdü ka ööye kadhabbu.

<sup>5</sup> O'o adha na 'dinigi eyi yüüdü coo'do no, 'duga ndagee'di küdü ka ööye tikinggi amang küdü tiji 'buugu dhorro, na o'o saga 'duga 'bandiisi ka tööjöögö ka ööye.

<sup>6</sup> "Aaga fa tamana eema ya a'diila ya a tiini, aaga fa tamana eema yaada ya insilli ya a nagüdürü, kudumma eene kara tüsüri kide ana uune kudumma eene kara tapadaga kada kadhagaana aaga ku'bu.

*Aaga arangnga amang kada taluna*  
(Lüüka 11.9–13)

<sup>7</sup> "Aaga arangnga amang eema tananja aaga, aaga asaasa eema amang kini tananja aaga, aaga adhoodho iifye ka tanfa'da nya aaga.

<sup>8</sup> Kudumma ömö'di tiya arangnga ya ara ta'duga niimö ya miini ya, ömö'di ka asaasa niimö aluna, a ya adhoodho iifye ya kara tafa'danja iini.

<sup>9</sup> Mada ana kada a 'bii'bala tiya iini kara tarangnga miteene kini anangnga müsi iini.

<sup>10</sup> Üürü asaasa midigilöögö kini anangnga ni iini.

<sup>11</sup> Aaga kada oroko kungngo kussu aaga kaamana eema ya a'diila ya a laala tiya ada, anda ara tafaanya a Pupa tiya ada ka 'dotombo'do ya kara tamana eema ya a'diila a kadu tanno arangnga i'i no.

<sup>12</sup> Eema yaada ka asaasa ka kadu kadalingga ana aaga ya, aaga linggo nggeege ana eege tekere, kudumma talaana ma seriye nya nagane'bi eege kamiini nye'de kungngo.

*Iifye na iciri no*  
(Lüüka 13.24)

13 "Aaga tigaala ka iňye tanno iciri no, kudumma iňye tanno ömbölö ka falangnga no, fiinii ma tara taama i'i ya miini, a kadu kadhabbu ka ndigaala kide.

14 Fiinii ya iciri ya nja tiya iideene ya i'i yungngo amanaga kadu co fiinii ma tefe ka 'dii, a kadu ka idhilli euge kungngo kara taluna i'i.

*Fa nja iňye müni  
(Lüüka 6.43–44)*

15 "Aaga adinii ko'do kudumma nagane'bi tanno korokoro no, kicci kada kafeene nja kidheefele, lakiini ka nanggeedi tanno eene kafeene nja öö tiya ümmü kadu ya.

16 Ara aaga tussu euge ndama linggo tanno eene, kira 'dee kara teene ki'bim'bi, a ndhaaru 'dee ara teene, indiňye?

17 Fa ya a'diila ya ara teene iňye na a'diila no, fa ya toroko ya a teene iňye na oroko no.

18 Taalo fa ya a'diila ya ara teene iňye na oroko no, a fa ya toroko ya taalo ara teene iňye na a'diila no.

19 Fa ya taalo eene iňye ka'diila ya, a kadu teedhe i'i küüpü ka issi.

20 Ndama linggo tanno eene ara angngaa tussu euge.

*Tumma nja linggo  
(Lüüka 13.25–27)*

21 "Taalo kadu no kümmünü a'a a'da, 'Uugaara, Uugaara,' no nye'de kara co ka tauugaara ma 'dotombo'do, illi ömö'di ya alinggo a tumma ma Pupa tiya eede ya ka 'dotombo'do ya.

22 Kadu dhabbu kassa ka tiki a'a ka uuru tanno miini no a'da, 'Ka Uugaara, Ka Uugaara, taalo ungngo kageema tumma ma Masala ana eere tiya yüüdü, ungngo tagasoro nagana'bu ka kadu ka oona ana eere tiya yüüdü, ungngo tagalinggo eema keefe ana eere tiya yüüdü?

23 Nikirii a'a ka tiki eene, 'Taalo a'a nussu aaga 'do agolo kanna aaga na oroko no!'

*Katarü'böönö ma nöö'di keera  
(Lüüka 6.47–49)*

24 "A ömö'di ya aföönyö tumma neede alinggo iini ya, afeene nja ömö'di tiya a'dara ya arü'bü 'di yiini ka 'dokon'da ya.

25 A tombo'do ta'dingga a faaya a tanya ma talingga 'di asa ka taalo a'dingga 'do, kudumma iini ka tarü'bü adene ka 'dokon'da.

26 A ömö'di ya aföönyö tumma neede asa ka taalo alingga iini ya, afeene nja ömö'di tiya a'baga ya, arü'bü 'di yiini ka ndamugu.

27 Íkirii tombo'do ka öö'dö a tanya ka kürü 'di yiini ku'bu a'dingga, ta'dingga miini ka toroko 'do."

28 Ka Yasu ka ndatuumö tumma niini, a kadu tadhere ka talaana tanno iini no.

29 Kudumma iini ka talaana euge a türü, taalo kafeene nja tanno katalaana ma seriye no kungngo.

## 8

*Yasu oolona ömö'di ya ana kutukunya ka oona ya*

*(Murkus 1.40–45; Lüüka 5.12–16)*

1 Ka Yasu ka ta'bardaga caa'bu ndama 'dikinya ya, a kadu tuurna i'i keere kadhabbu.

2 A ömö'di ya ana kutukunya ka oona ya tö'dö üürü kini kidha, iki iini, "Ka Uugaara, üürü nasaasa o'o nanangnga a'a ka tinsili ka oona."

3 Íkirii Yasu ka kilina nüüsö ümmü i'i ka oona iini, "Namma a'a a'da o'o tinsili." Íkirii kutukunya ka arooro ka tinsili, a kutukunya tarooro ka titao.

4 Íkirii Yasu ka tiki iini, "Aföönyö fa tadirina ömö'di töccö 'do, lakiini unggene naco tala oona nüüdü a ta'boge, na o'o saga nangnga türri na Müüsa ka tiki no ku'bu amang kene tussu iini."

*Yasu oolona ömö'di ma linggo  
(Lüüka 7.1–10)*

5 Íkirii Yasu kico Kafarnahööm, uugaara ma nasigira na ö'dö miya no ö'dö kini adageema nja iini.

6 Iki iini, "Ka uugaara, ömö'di ya alinggo nja a'a ya amaara ada inni ka 'di afüngngö, oona kagu i'i 'do itaalo amabaanya tino."

7 Íkirii Yasu ka tiki iini, "Ara a'a tö'dö toolona i'i."

8 Íkirii uugaara ma nasigira ka tiki iini, "Uugaara, taalo a'a na'diila ma üüdü kara co 'di tiya eede, lakiini tiri tumma ün'düngngö, a ömö'di yeede a ta'diila.

9 A'a na uugaara ma nasigira kinggide kalinggo ada a'a nara tiki a tiya a'da, 'Unggeene,' aföönyö aco, niki a tiya a'da, 'Aayu,' aföönyö öö'dö, nara tiki ömö'di tiya alingga ada a'a ya a'da, 'Alingga kungngo,' aföönyö alingga.

10 A Yasu tadhere, iini ka taföönyö tumma niini no, ikirii ka tiki a kadu tanno unggene nja iini no, "Tumma dhorro euge kungngo eede ka tadirina aaga, taalo ömö'di ma tamma ka Masala ana eedi afa ömö'di ya ka Israyil.

11 Nikirii a'a ka tiki aaga, kadu kinggide kadhabbu kara sa köö'dö ndama fiinii ma ndanaaya nja ta'buugu köö'dö temmi nja Abrahiim nja Ishak nja Yaguub ka tauugaara ma 'dotombo'do.

<sup>13</sup> Lakiini kadu na ma tauugaara no kara tuurunja co kürö ka ndüüli kabbünaana igini ka oona kide."

<sup>14</sup> İkiri Yasu ka tiki uugaara ma nasigira, "Kolo afä ma tamma tanno üüdü ana eedi no ara ta'diila." İkiri ömö'di ya maara ya karooro ka'diila ka ööye miimi.

*Yasu oolona kadu kadhabbu*

<sup>15</sup> İkiri Yasu ka co kita Bütrüs aluna 'berki miini ka tamaara ma füngnö.

<sup>16</sup> İkiri ka tümmü oogo ka nüüsö a maara taadha kono, maflik'i dö müünü ada eema eene.

<sup>17</sup> Ka 'buugu kanda siiya ya ikiri kadu ka öö'dö a kadu tanno indima no a Yasu kadhabbu, ikiri ka tagasoro nagoronggore ka kadu ka oona nye'de kungngo a tumma ma nüünö olona kadu na maara no nye'de.

<sup>18</sup> A tumma na ne'bi Asaiya ka tageema no, co ööye miini, iini ka tiki, "A'duga tin'di kaja a'duga maara kaja ka oona."

*Yasu alla kadu ma 'büdhüllü*

(Lüüka 9.57-62)

<sup>19</sup> A Yasu tassa ka kadu ka tadhabbu kini ka oona ya, ikiri ka tiki a kadalaadene tanno iini a'da kada'da kaco tinggini ma to tököönö.

<sup>20</sup> İkiri tatalaana ma seriye ka öö'dö kini iki iini, "Ka Tatalaana, ara a'a turna o'o keere kita üüdü kara co kita."

<sup>21</sup> İkiri Yasu ka tiki iini, "Kijeene kungngo a nasura a nafü kungngo uyi ma 'dotombo'do, illi 'Bii'bala ma Tadü'dü dö taalo 'buugu miini ka anangnga üüdü kide."

<sup>22</sup> A köönö ana ka kadalaadene tanno iini tiki iini, "Uugaara, fa kede naco tatü'bü pupa yeede tikinggi."

<sup>23</sup> İkiri Yasu ka tiki iini, "Uurna a'a keere fa ka kadu tanno aaya no katü'bü kadu neene no aaya no."

*Yasu arıği tanya*

(Murkus 4.35-41; Lüüka 8.22-25)

<sup>24</sup> İkiri Yasu ka taka ka mürkabü, a kadalaadene turna i'i keere.

<sup>25</sup> İkiri kadalaadene niini ka co iini kete kiji i'i kiki iini, "Uugaara, oolona ungngo ari ungngo taaya."

<sup>26</sup> İkiri Yasu ka tiki eene, "Minna agu aaga, aaga tariba? Kitaalo tamma ma Masala ada ka nanggeedi." İkiri ka fiki'dö agirnaana ka tanya nja 'büdü ka to, a 'buugu tamusuli ku'bu amudhudhuli.

<sup>27</sup> A kadu tadhere kiki a'da, "Ömö'di öjö yungngo? A tanya nja to kaföönyö tumma niimi!"

*Yasu oolona kadu keera*

(Murkus 5.1-20; Lüüka 8.26-39)

<sup>28</sup> Aga Yasu ka ndala nda'da ma to kete ma Jadriini a kadu tö'dö kürö ndama naala ma oofo keera ana koronggore tanno oroko no ka tuurunja kene ka oona kindima, koreene nja iini a kadu tariba taalo kunggogene ka fiinii tiya miimi ya.

<sup>29</sup> Kidhe kiki, "Minna yüüdü nja ungngo, Yasu 'Bii'bala ma Masala, nö'dö kita ma tapusu ungngo a'da aleefe 'buugu?"

<sup>30</sup> A'da nagüdürü kinggide kaguri ku'b'ba kadhabbu.

<sup>31</sup> A nagana'bu tikiri ka tiki a Yasu, "Küdü kara tasoro ungngo ya, uurugu ungngo ka nagüdürü ka oona."

<sup>32</sup> İkiri ka tiki eene, "Aaga agolo." Kikiri ka öö'dö kürö kafiri ka nagüdürü ka oona a nagüdürü tarünö ndama nsorondho kafiri co to nye'de kungngo ka'duuru 'büdü kaaya.

<sup>33</sup> A katasaana tarünö kaco anya ka teene kadirina eema a kadu ma eema tiya agalinggo adene ya a kadu tanno eera no, nanagana'bu ka taganna eene ka oona no.

<sup>34</sup> A kadu ma anya tammo iini mo, tö'dö kürö in'dili ma co toreene nja Yasu, kene kaduna i'i ya, kiki iini a'da unggene ka anya tammo eene.

## 9

*Yasu oolona mügüre*

(Murkus 2.1-12; Lüüka 5.17-26)

<sup>1</sup> A Yasu taka ka mürkabü ata'da to aaco anya tammo iini.

<sup>2</sup> A kadu tö'dö ana ömö'di iini ka sekede a mügüre, ikiri Yasu ka iji tamma neene, iki a mügüre, "Dhi oona ku'bu 'bii'bala eede, noolonadene o'o ka toroko tanno üüdü."

<sup>3</sup> A katalaana ma seriye könö teema unggodho eege kiki a'da, "Ömö'di ya eela Masala."

<sup>4</sup> İkiri Yasu ka tussu tumma neene, iki eene, "Minna agu aaga, aaga tümmü tumma na toroko no ka nanggeedi?

<sup>5</sup> Öjö i'i yungngo taalo agu'daana, 'Koolonadene tatoroko nüüdü,' alla tiki a'da, "Fiki'dö nunggeene?"

<sup>6</sup> Ara tala aaga amang kada tussu a'da 'Bii'bala ma Tadü'dü, türü kungngo iini ma eema ma 'büdhüllü miini ka toolona tatoroko," ikiri ka tiki a mügüre, "Fiki'dö na'duga eema ma füngnö yüüdü naco 'dii tiya üüdü."

7 Ömö'dü tafikii'dö unggeene aco öö'dü kita iini.

8 Ka kadu kadhabbu ka tasala tumma no nggeege ya, a ri'ba tümmü egee, kafünügü Masala ko'do manangnga türü a kadu afa ma tanno kungngo.

### *Yasu ümmüni Matta*

(Murkus 2.13–17; Lüüka 5.27–32)

9 A Yasu tunggeene asala ömö'dü ka temmi ka 'buugu ma tulu'ba, ana eere a'da Matta, ikirii ka tiki iini, "Aayu kede keere." Ikirii ka flikii'dö uurna i'i keere.

10 Aga Yasu ka ndagu eema ka 'dö kita Matta ya, a kadu ma tera tulu'ba tö'dö kadhabbu nja tanno oroko no kemmi nja Yasu nja kadalaadene tanno iini.

11 A naFariisi könö tiji tumma no, kiki a kadalaadene tanno iini, "Minna agu tatalana yaada aguri nja kadu ma tulu'ba nja kadu tanno oroko no?"

12 A Yasu taföönöyö tumma neene iki, "Taalo kadu na 'diila no ka asasa Digtörö, illi kadu na maara no.

13 Aaga unggeene aaga co tussu tumma no, 'Nasaasa a'a 'bangnga taalo taraana ma eriidö." Taalo a'a nöö'dö tümmüni kadu na 'diila no lakiini na oroko no.

### *Tümmü tenegē*

(Murkus 2.18–22; Lüüka 5.33–39)

14 A kadalaadene na Yühanna ya Tatambeese ya tö'dö ka Yasu kiki iini, "Minna agu ungngö nja naFariisi ungngö tümmü tenegē ara kadalaadene nüüdü katitaalo kümmöönö?"

15 Ikirii Yasu ka tiki eene, "Ara kadu ma ömö'dü tiya arna ya, tagoroo'bo ana i'i kide kungngö? Lakiini uuru kinggide a tatarna kara ta'dugadene kene ka söödö ya, kassa ka tümmü tenegē.

16 Taalo ömö'dü ara tar'da 'banten'di ya issi ya ka ten'di tiya illi ya kudumma iini kara töörese ten'di ya illi ya anangnga ööye miini ka tadhabbu.

17 Taalo ömö'dü ara tuuru ngeeli ka 'belde tammo illi mo kudumma oono kara töörese muuru ngeeli co, a 'belde taga'dadene, lakiini kuuru angnga ngeeli na aleefe tedhe no ka 'belde tammo issi mo amana ka 'belde nja ngeeli tüütü ka'diila."

*'Badaada ma eyi mo nja aka ma maara mo*

(Murkus 5.21–43; Lüüka 8.40–56)

18 Ka Yasu ka aleefe teema nja eene ya, ikirii uugaara ma la ma talaana ka tüürü ku'bu kini kidha iki iini, "'Badaada meede manda eyi, lakiini aayu nümmüni iisine nüüdü kono ka üüdü amang kono tefe ka 'di."

19 A Yasu tafikii'dö uurna i'i keere nja kadalaadene tanno iini.

20 Aka minggide eriidö ka tiisö kono mandagu'du nagürüünü kada'baaga kafünü eera, mö'dö ndama iini keere maa'ba tinggini ma ten'di ma oona tammo iini.

21 Kudumma oono ka tiki ana eedi ka teene a'da, "Kede kara taa'ba ten'di ma oona miini a nüüsö ün'dügüngngö, naorooro ka a'diila."

22 Ikirii Yasu ka tassala keere asala oogo iki, "Idhi oona ku'bu 'badaada eede, tamma nüüdü ka oolona o'o." Aka tarooro ka a'diila ka ööye miini kungngö.

23 Ka Yasu ka co la ma uugaara ma Yahüüdü, asala kadu na üwe tüüsü no, anno co kalumuli.

24 Ikirii Yasu ka tiki eene, "Aaga agolo kürö taalo 'badaada meyi, oogo marigide," ikirii ka takiji i'i.

25 A kini ka nduurugu kadu co kürö ya, ikirii ka co la ümmü oogo ka nüüsö mafiki'dö.

26 A tumma no tanyala njaana ku'bu ka 'buugu koona nye'd'de kungngö.

### *Yasu oolona kisinsoro keera*

27 Aga Yasu ka ndunggeene kita miini kita ya, a kisinsoro tako'd'do kini keere keera kidhe kiki, "Ka 'Bii'bala ya Dawud, ana 'bangngö ma ungngö."

28 A kini ka co a 'büggööri, a kisinsoro na eera no, tö'dö kini kete, ikirii Yasu ka tiki eene, "Kamma aaga a'da ara a'a talingga dhorro?"

Kikirii ka tiki iini, "Ii kamma ungngö Uugaara."

29 Aa'ba eege ka iiye iki, "Ara talingga adene afa ma tiya ada ka tamma a nanggeedi ya kungngö."

30 Iiye neene tatanfa'da ikirii Yasu ka tirina tumma dhorro, "Aaga fa tadirina ömö'dü töccö."

31 Lakiini kene kico a kürö kanyalaana tumma no ka 'buugu koona nye'd'de kungngö.

### *Yasu oolona möri*

32 Aga kisinsoro ka öö'dö kürö ya, a'da kadhe kadu a möri, a na'bu ka taka kini.

33 Aga Yasu ka tagasoro na'bu ya, a möri teema, a kadu tadhere kiki, "Taalo ungngö kadini ka nüümö afa ma tiya kungngö ka Israyil."

34 Lakiini naFariisi kiki a'da, "I'i asoro naEblisi ana uugaara ma naEblisi."

### *Yasu ana 'bangnga ma kadu*

35 A Yasu takunggunaana ku'bu ka naanya nja nadaara 'do, alaana kadu ka naala ma talaana miini, adünnü tumma

ma ïnjülli ma tauugaara ma Masala, oloona kadu ka namaara kada tonggoonyo.

<sup>36</sup> ïkiri ka tasala kadu a 'bangnga meene tagu i'i kudumma eene ka tagi'di a nüümö kitaalo kene kaneene aka kidheefele na tadasanaa ka titalo kene no kungno.

<sup>37</sup> ïkiri ka tiki a kadalaadene tanno iini, "Asa linggo tadhabbu, illi kadu ma linggo kadhilli.

<sup>38</sup> Aaga arangnga Uugaara ma linggo a'da agürünü kadu ma talinggo linggo niini."

## 10

*Kadalaadene na ada'baaga kafünü eera no*

(Murkus 3.13-19; Lüüka 6.12-16)

<sup>1</sup> A Yasu tagümmänü kadalaadene niini no ada'baaga kafünü eera no. Anangnga türü eene ma tasoro nagoronggore na oroko no ka kadu ka oona koolona eege ka namaara dhabbu.

<sup>2</sup> A nagereene na kadafiinü na öö'dö kada'baaga kafünü eera no eege kungno, ya dhidha ya, Samaan, yeene ka tümmänü i'i a'da Bütrüs ya, nja örre tiya iini Andraws, nja Yaguub, 'bii'bala ya Za'bedi nja örre tiya iini Yühanna,

<sup>3</sup> nja Filibüs nja Bartülmaws, nja Tööma, nja Matta ya ama tulu'ba ya, nja Yaguub 'bii'bala ya Halfa nja Tatawus,

<sup>4</sup> nja Samaan ya tatagu'daana ka eedi ya nja Yahüüsa Askaryüütä ya agümmänü Yasu a naguugaara ya.

*Yasu agürünü kadalaadene na ada'baaga kafünü eera no*  
(Murkus 6.7-13; Lüüka 9.1-6)

<sup>5</sup> A Yasu tagürünü eege iki eene, "Aaga fa co anya ma kajeene aaga tafa co anya ma Samira.

<sup>6</sup> Lakiini agolo ka kidheefele ma Israyil na aama no.

<sup>7</sup> Kada kara tunggeene aaga tadünögü eema a kadu ka naffiinü a'da, 'Tauugaara ma 'dotombo'do ka ndakete.'

<sup>8</sup> Aaga oolona kadu na maara no, aaga tinji kadu na ake no, aaga tanangnga kadu na ana kutukunya ka oona no katin-sili, aaga tasoro nagoronggore na oroko no ka kadu ka oona. Ka'duga aaga ün'dügüngngö a'da taalo aaga kafaana, aaga amana a kadu ün'dügüngngö.

<sup>9</sup> Aaga fa ta'duga gürüüsü dahaba nja fudda nja tanyaanya ka taganna kada ka naganjoko.

<sup>10</sup> Aaga fa taagufu 'belde ma eema ma kuri, aaga fa tagona en'di eera, aaga fa ta'duga kuufi, kudumma ömö'di tiya alinggo ya ara ta'duga talängne niini.

<sup>11</sup> "Kada kara co anya alla daara ya, aaga tawwa ömö'di ya ara tamma kada aaga

taneene nja iini ya, aaga tanna kide aaga tunggeene ndama iini.

<sup>12</sup> Kada kara co a 'büggöörä aaga tööjüü kadu miini.

<sup>13</sup> Kadu ma 'büggöörä tiya miini ya, ka ta'duga tööjüü kada a tööjüü naada tüü nya eene, a kene kara tanu ka tööjüü tanno ada a tööjüü naada tüü kada.

<sup>14</sup> Ömö'di ya ara tanu kada ya itaalo asaasa taföönyö tumma naada, aaga unggeene ka 'di tiya miini ya nja anya tammo iini mo aaga tafidhi ndhünggrü miini kada ka uune.

<sup>15</sup> Ara a'a tadirina tumma aaga dhorro, ara uuru ma tahükümü ma naanya ma Sadöma nja Amuura ara tapalpala adagii'bi anya mü.

*Töödö ma uuru ma talinggo kadu*  
(Murkus 13.9-13; Lüüka 21.12-17)

<sup>16</sup> "Ara a'a tagürünü aaga afa kidheefele ka öö ka teene kungno, aaga unggeene a ta'dara afa nööni, aaga tiicolo afa alambo.

<sup>17</sup> Aaga adini ko'do kudumma kadu, kara tümmü aaga a naguugaara kabbü aaga ka naala ma talaana,

<sup>18</sup> kümmü aaga kamanaga aaga ka naguugaara kidha kudumma eere tiya eede amang kada tussu iini kidha nja kajeene.

<sup>19</sup> Kene kara tümmänü aaga a naguugaara aaga tafa tadinigöögö, a'da ara aaga tiki nya aaga teema minna ka uuru tanno miini no ara tumma tananja aaga, aaga teema iini.

<sup>20</sup> Taalo aaga kungno kara teema, lakiini Koronggore ya Pupa tiya ada yungngo ka 'dotombo'do ya i'i yungngo ara teema kada ka oona.

<sup>21</sup> "Ara ömö'di tümmänü örre yiini kümmänü ka inde afe'de, a laala talinggo kafaafa meene kagirina eege.

<sup>22</sup> A kadu takirimi aaga nye'd'de kungno kudumma eere tiya eede, lakiini ömö'di ya idhi oona ku'bu ta'billi ya ara toolonadene.

<sup>23</sup> Kadu kara talinggo aaga ka anya ya, aaga arünö aaga co anya tökömö, ara a'a tadirina tumma aaga dhorro, ara 'Bii'bala ma Tadü'dü töödö a'da küfürü aaga tafara naanya ma Israyil nye'd'de.

<sup>24</sup> "Taalo tatalaadene agii'bi tatalaana yiini, a tasaga taalo ara tii'bi ömö'di ya ana i'i ya.

<sup>25</sup> Ara tatalaadene tagala kafeene nja tatalaana tiya iini, a tasaga tafeeme nja ömö'di ma 'dii ka tiki iini a'da Balsabül eege ka ndatümmänü kadu ma 'dii nya?

<sup>26</sup> "Aaga fa tariba eene kudumma nüümö tiya aküdhü ya ara tabbü 'dala, a nüümö ya ka kume ya ara tussu adene.

<sup>27</sup> Nüümö yeede ka tirina aaga a 'buugu ka talüllü ya aaga tiraana a 'buugu ka

öyeene, a yaada ka föönyö kadadaayaaya ya aaga asirö na'dala aaga teema iini ko'd'do.

<sup>28</sup> Aaga fa tari'ba a kadu tanno agirina tuu'da ma ömö'di no kassa kitalo kara tambaanya tiidaana ma koronggore, lakiini aaga ari'ba ömö'di tiya ara tidi koronggore nja tuu'da ka issi ma Jahanam ya.

<sup>29</sup> Taalo uyi eera anadene ana gürüsü unggodho? Lakiini taalo könö unggodho kungngo ada'dünggö ka 'büdhülü a'da taalo Pupa yaada ya ka 'dotombo'do ya ussu.

<sup>30</sup> Lakiini awu ma nanggüdü tanno aada aginnidene nye'd'de kungngo.

<sup>31</sup> Aaga fa tari'ba kudumma ada ka tagii'bi uyi dhabbu.

<sup>32</sup> "Ömö'di ya amma kede ka kadu kidha ya, ara a'a tamma kini kidha ma Pupa tiya eede ya ka 'dotombo'do ya.

<sup>33</sup> Ömö'di ya 'düsünü a'ka kadu kidha ya, ara a'a ta'düsünü i'i kidha ma Pupa tiya eede ya ka 'dotombo'do ya.

<sup>34</sup> "Aaga fa tiki kide a'da a'a nö'dö a ta'diila ka 'büdhülü, taalo a'a nö'dö a ta'diila, nö'dö a'a a koro'bo.

<sup>35</sup> Nö'dö a'a tanangnga ömö'di ka takirimi pupa yiini  
a 'badaada takirimi niimö moono  
aka ma 'bii'bala takirimi taada moono.

<sup>36</sup> A kadu ma 'di tiya unggodho ya tanu aana ka oona.'

<sup>37</sup> "Ömö'di ya asaasa pupa yiini alla niimö miini ara kanu kede ya, taalo a'a nara tamma kini, ömö'di ya asaasa 'bii'bala yiini alla 'badaada miini ara kanu kede ya taalo a'a nara tamma kini.

<sup>38</sup> Ömö'di ya taalo a'duga salii'bi yiini uurna a'a keere ya, taalo a'a nara tamma kini.

<sup>39</sup> Ömö'di kaafa ka oona tanno iini ya ara taama, Ömö'di ya ara tüpü eyi yiini co ka üüdü ma a'a ya, ara taduna.

<sup>40</sup> "Ömö'di ya amma kada ya amma kede, ömö'di ya amma kede ya amma ka ömö'di tiya agürünü a'a ya.

<sup>41</sup> Ömö'di ya amma ka ne'bi kudumma iini kada ne'bi ya, ara taduna faana yiini ka ne'bi, ömö'di ara tamma ka ömö'di ya a'diila ya a'da ara taduna faana yiini ka ömö'di tiya a'diila ya.

<sup>42</sup> Ömö'di ya inyi 'biidi ya iicolo a laala tiya dhiidhi ya kudumma iini ka tatalaadene tiya eede taalo faana yiini ara taama."

## 11

*Yasu nja Yühanna tiya Tatambeese ya (Lüüka 7.18-35)*

<sup>1</sup> Aga Yasu ka ndatiimö tumma niini nya kadalaadene tanno iini na ö'dö kada'baaga kafünü eera no, ikirö ka tunggeene ndama kanna ma co talaana kadu keema ka tumma ma İnjilli co kadu ka naanya ma Jaliil.

<sup>2</sup> A Yühanna taföönyö tumma linggo tanno Almasilih a'da ungngo ka pabuuus, ikirö ka kürünü kadalaadene niini,

<sup>3</sup> kaco tiki iini a'da, "O'o nungngo nara tö'dö alla ungngo tindhigü ömö'di öccö afe'de?"

<sup>4</sup> A Yasu tapadaga tumma eene iki, "Aaga fada aaga co tadirina eema a Yühanna ma eema tiya ada ka taföönyö aaga tadinö kide ya,

<sup>5</sup> kisinsoro kiji 'buugu a kadu na sogo'do no tunggeene, a kadu ma kutukunya tinsili a näkinggiri taföönyö eema, a kadu na ake no tafiki'dö ka inde, a kadu na eema ka titaalo kene no taföönyö tumma ma İnjilli.

<sup>6</sup> A'diila nya ömö'di tiya ya ri'ba ma a'a katitalao kagu i'i ya."

<sup>7</sup> Aga kadalaadene tanno Yühanna ka ndafada ya, ikirö Yasu ka teema tumma Yühanna nja kadu iki eene, "Kinynyo aaga a dhüle aaga tiji minna 'bandam'bala a tanya ka tüsö iini?

<sup>8</sup> Alla kö'dö aaga kürö aaga tiji minna? Ömö'di ümmü en'di ya nyulinlyuli ya? Kadu na ümmü en'di ya nyulinlyuli ya kanna ka nöö'di ma naguugaara.

<sup>9</sup> Lakiini kö'dö aaga kürö aaga tiji minna ne'bi? I'i ara a'a tiki aaga a'da, i'i ya miini lakiini i'i agii'bi ne'bi.

<sup>10</sup> I'i yungngo a sorne ka tageema tumma miini iki,  
'Ara a'a tagürünü taffiinü yeede küdü kidha aco tindinaana naffiinü üdü ku'bu.'

<sup>11</sup> Ara a'a tadirina tumma aaga dhorro, taalo ömö'di ana ka kadu ageenedene ndama iiya taalo ömö'di ma tagii'bi Yühanna ya Tatambeese ya, lakiini ömö'di ya idhilli ka tauugaara ma 'dotombo'do ya idhindhü adagii'bi i'i.

<sup>12</sup> Ndama uuru tanno Yühanna ya Tatambeese ta'bitingngö, kaleefe tauugaara ma 'dotombo'do tinggiridene a türü tanno oono, ömö'di ya asaasa tö'dö kide ya a kadu takirimi i'i.

<sup>13</sup> A nagane'bi nya seriye tiya Müüsa tageema tumma ma tauugaara ma 'dotombo'do idhi a Yühanna tö'dö.

<sup>14</sup> A kada kara tasaasa tamma kide ya, aaga tussu a'da Yühanna i'i ya İliya ya kadu ka takindhigü i'i ya miini.

15 Ömö'di ya ana iisine ma taföönyö ya fa kini aföönyö.

16 "Ara a'a tiki a'da sere ya afeene nya minna, afeene nya laala tiya emmi ka 'dadillö ma mansala, kiidhaana ka oona kiki,

17 'Kabbü ungngo kaaru aaga,  
aaga taalo kasili,  
ungngo teema ngooro  
aaga taalo kafara.'

18 A Yühanna tö'dö taalo agu eema itaalo ooye kiki a'da, 'Na'bu ungngo iini.'

19 A 'Bii'bala ma Tadü'dü tö'dö agu eema ooye, kiki a'da, 'ömö'di ya aguri ake ka ngeeli, a teefe ma kadu ma tulu'ba no nya tanno oroko no,' a ta'dara na Masala kussu adene dhorro a linggo tanno eene."

*Naanya na taalo kamma ka Masala no*  
(*Lüüka 10.13-15*)

20 İkiri Yasu ka asanna ka kadu ma naanya tanno iini ka takalaala türü niini eene kadhabbu no, lakiini eege kitaalo kaadha ka tatoroko tanno eene.

21 "Kadu ma Korosiin am'ba kada, kadu ma Beet Sayida am'ba kada kudumma türü tanno ağıüni adene ka Suur nya Saiyda no, ara kadu miini takilli ka takaadha ka tatoroko kagirñi en'di ma natalisi kene ka oona küdhü fü'dö eene ka nanggüdü.

22 Lakiini ara a'a tiki aaga a'da ara uuru ma tahükümü ta'diila ada Suur nya Saiyda adagii'bi taneeene naada.

23 O'o no Kafnahööm no, nasaasa o'o ta'dinigi oona nüüdü co 'dotombo'do? Kaw, ara o'o saga co ka ta'buugu ma inde, üürü eema ya agalinggo adene keefe ka Sadöma ara tagaleefe ta'bitingngö.

24 Lakiini ara a'a tiki aaga, ka uuru ma tahükümü tanno Masala kara tö'dö, ara Masala tana 'bangnga ma kadu ma Sadöma mara kafa kada."

*Aaga ö'dö kede aaga talıngnge*  
(*Lüüka 10.21-22*)

25 Ka uuru tanno miini no ageeme Yasu iki, "Ara a'a tanangnga ta'diila o'o Pupa, Uugaara ma 'dotombo'do nya 'büdhülö, kudumma üüdü kaala eema ya kaküdhü ya a kadu tanno dhiidhi no, ara o'o ka titaalal nala a kadu tanno 'dara kussu eema no

26 İi, Pupa a'diila küdü nggeege.

27 "Pupa yeede anangnga eema a'a nye'd'de, taalo ömö'di ma tussu 'Bii'bala illi Pupa, ömö'di ma tussu Pupa taalo illi 'bii'bala nya kadu tanno 'bii'bala ka asaasa tala oona eene no.

28 "Aaga kö'dö kede aaga in'dili aaga no agi'di a dhögürü ma linggo ma eema tiya indhi ya nanangnga aaga ka lingngé.

29 Aaga kirni kadholle neede kada ka nanggeyi aaga tümmü talaana neede, nana a'a 'bangnga niicolo ka eedi. Aaga taluna talingnge ma nagoronggore tanno ada.

30 Dholle yeede taalo indhi a nüümö yeede kara tanangnga aaga ya ipalapala."

## 12

*Uugaara ma Sa'bidi*

(*Murkus 2.23-28; Lüüka 6.1-5*)

1 Ka naguuru tanno miini no akunggeene Yasu ka nasigeene ka uuru ma Sa'bidi, ikiri iire ka tümmü kadalaadene niini. Kikiri ka tuu'bu migile kuyu kaguri.

2 İkiri naFariisi ka tasala eege kikiri ka tiki a Yasu, "Assa ka kadalaadene nüüdü ka talinggo nüümö ya taalo alingga adene ka uuru ma Sa'bidi ya."

3 İkiri Yasu ka tapadaga tumma eene iki, "Taalo aaga kakiiri tumma ma Dawud ka sorne ka iire ka tümmü i'i nya kadu tanno kunggeene nya iini no?

4 Innyyo la ma Masala katamü miteene ma tirri a'da taalo ama eene kaguri kudumma oono kada tammo ka'boge unggodho eege.

5 Taalo aaga kaduna tumma ka Sorne ma seriye ka tiki a'da ka'boge kaga'da Sa'bidi ka la ma Masala ka uuru ma Sa'bidi a'da taalo ömö'di ma tindini eege.

6 Ara a'a tiki aaga a'da ömö'di ungngo idhindhü adagii'bi la ma Masala.

7 Ürü kada kara tagussu tumma no ya, 'Nasaasa a'a 'bangnga taalo a'a nasaasa tirri,' taalo aaga kara tagümmü kadu na hetti ka titaalal kene no.

8 'Bii'bala ma Tadü'dü i'i yungngo Uugaara ma Sa'bidi."

9 Unggeene ndama kanna aco la ma talaana tiya eene.

10 İkiri ka tuna ömö'di inggide eyi ka nüüsö, kikiri ka tindini i'i kawwa eema ma tümmü i'i iini, kiki, "A'diila aja kara toolona ömö'di ka uuru ma Sa'bidi?"

11 İkiri ka tiki eene, "Mada ana kada ana dheefele unggodho ka 'dinggö co ööye ka uuru ma Sa'bidi taalo tümmü i'i unguu i'i ko'do?

12 Ömö'di idhindhü adagii'bi dheefele yungngo a linggo tanno a'diila no kara talinggo adene ka uuru ma Sa'bidi."

13 İkiri Yasu ka tiki ömö'di tiya miini ya, "Kilina nüüsö." İkiri ka kilina eege kikiri ka'diila kafeene nya tööje.

14 İkiri naFariisi kico akürö kafünü ajeene ma tiidi Yasu.

*Ömö'di ma linggo ya Masala ka tagesse i'i ya*

<sup>15</sup> Ka Yasu ka tussu tumma no ya, ikirii ka tunggeene ndama kanna, a kadu turna i'i keere kadhabbu oolona egee ka maara nye'd'de kungngo.

<sup>16</sup> Adagadiünögü eema eene a'da kafa tadirina tumma miini a kadu 'do.

<sup>17</sup> Amang ka tumma tanno ne'b'i Asaiya ka tatiraana no kinyno ööye miini.

<sup>18</sup> "Ömö'dii ma linggo yeede ka tagesse i'i ya,

yungngó eede ka asaasa i'i ana eedi,  
ka'diila oona eede miini,

ara a'a tuuru Koronggore yeede kini ka  
oona

amang kini tadünögü tumma ma tad-  
hidho co kajeene in'dili.

<sup>19</sup> Taalo ara tadiidi nja ömö'dii itaalo a  
tiidhe ko'd'do

a ömö'dii taalo taföönyö tumma niini  
ka nafüni.

<sup>20</sup> Tam'bala na ko'do no taalo ara ta'buna,  
itaalo ara tadhü'lü lamba ma finne mo  
ku'bu,

idhi a tumma ma tadhidho tii'baana.

<sup>21</sup> A kadu 'do tündhigü eere yiini."

### *Yasu nja Balsabül*

(Murkus 3.20-30; Lüüka 11.14-23)

<sup>22</sup> A kadu tö'dö ana ömö'dii a Yasu a soro,  
itaalo eema kudumma na'bu ungnöö iini  
ka oona. A Yasu toolona i'i arooro ka  
tafa'da iïye iji 'buugoo eema.

<sup>23</sup> A kadu tadhore kindini ajeene kiki,  
"Taalo 'Bii'bala ya Dawud i'i yungngó?"

<sup>24</sup> Lakiini ka naFariisi ka taföönyö  
tumma no, kikirii ka tiki a'da, "Ömö'dii  
ya asoro nagana'bu a türü ma Balsabül  
uugaara ma naEbliisi."

<sup>25</sup> İkirii ka tussu tumma no, eema  
iki eene, "Ka tauugaara kara tasümünü  
njaana ku'bu kara tatangga'da, a kadu ma  
anya tammo unggodho mo nja siliga kara  
tasümünü njaana ku'bu taalo ka tüütü ka ta  
unggodho.

<sup>26</sup> Üürü Ebliisi a tasoro Ebliisi nggeege  
asümünaana oona ku'bu unggodho i'i ara  
tauugaara niini tidhi oona ku'bu nya?

<sup>27</sup> Üürü a'a nasoraanaga nagana'bu kürö  
ana Balsabül, a laala yaada ara tasoro  
mada? Egee kungngo ka tümmü aaga ka  
tatoroko.

<sup>28</sup> Lakiini üürü a'a nasoro nagana'bu a  
Koronggore ma Masala ya, tauugaara ma  
Masala ka ndöö'dö kada.

<sup>29</sup> Ara ömö'dii tambaanya co 'bügöörii  
tiya ömö'dii tiya ana türü anyooro eema  
yiini nya? Illi kini ka timi'dini i'i ku'bu ka  
dhidha, asa ka tanyooro 'dii yiini.

<sup>30</sup> "Ömö'dii ya taalo aneene nja a'a ya, i'i  
ya diidi ma a'a, ömö'dii ya taalo awaana  
koona nja a'a ya, i'i ya aparsaana ku'bu.

<sup>31</sup> Nikirii a'a ka tiki aaga, a'da tatoroko  
nya teelaana nye'd'de ara Masala tafa ka  
kadu kide, lakiini teelaana ma Koronggore  
tiya Insili ya, taalo Masala mara tafa kide.

<sup>32</sup> Ömö'dii ya tadirina tumma ka 'Bii'bala  
ma Tadü'dü ka oona ya, ara tafa kini  
kide, illi ömö'dii ya tirina ka Koronggore  
tiya Insili ya ka oona ya, taalo ara tafa kini  
alla ka ürüünü tiya alla ka tiya tö'dö ya.

<sup>33</sup> "Aaga fa ka fa tiya a'diila ya eene laala  
ya a'diila ya, fa ya toroko ya ara teene laala  
ya toroko ya, kussu kadu fa ana iïye miini.

<sup>34</sup> Aaga laala ma nööni, ara aaga teema  
tumma no dhorro nya a'da ka oroko aaga,  
kudumma nüümö tiya ka ömö'dii ka eedi ya,  
i'i yungngó iini ka teema iini.

<sup>35</sup> Ömö'dii ya a'diila ya ö'dö ndama nüümö  
tiya iini ya a'diila ya, ömö'dii ya toroko ya  
ö'dö ndama nüümö tiya iini ya toroko ya,  
eema tumma na toroko no.

<sup>36</sup> Lakiini ara a'a tiki aaga, tumma  
na eemadene ün'dügüngngö no ara  
tahükümü iini ka uru ma tahükümü kara  
tö'dö.

<sup>37</sup> Tumma nüüdü kara tanangnga kadu  
ka tapa küdü, a tumma nüüdü afe'de kara  
tanangnga o'o ka tahükümüdene."

### *NaFariisi kasaasa tassa ka türü* (Murkus 8.11-12; Lüüka 11.29-32)

<sup>38</sup> A katalaana ma seriye könö nja na-  
Fariisi tiki iini, "Ka tatalaana, kasaasa  
ungno tiji türü küdü."

<sup>39</sup> İkirii ka tiki eene, "Sere ya oroko a  
temelö asaasa türü, taalo kara tasala kide  
illi türü na ne'b'i Yünan.

<sup>40</sup> Afa ma Yünan ka taganna ka  
müdigilögö tammo dhabbu mo ka eedi a  
füngngö iidoona ana ooso miini, nggeege  
ara 'Bii'bala ma Tadü'dü tanna ka  
'büdhü'lü ka teene a füngngö iidoona ana  
oso miini.

<sup>41</sup> Ara kadu ma Ninawa saga fiki'dö  
ka uru ma tahükümü nja sere tiya mümmü  
eege, kudumma oono ka öö'dö ndama  
'büdhü'lü keere ku'b'ba ma tö'dö taföönyö  
tumma ma ta'dara na Siliman, ömö'dii  
ungno kita agii'bi Siliman.

<sup>42</sup> Ara Uugaara ma küülü saga fiki'dö ka  
uru ma tahükümü nja sere tiya mümmü  
eege, kudumma oono ka öö'dö ndama  
'büdhü'lü keere ku'b'ba ma tö'dö taföönyö  
tumma ma ta'dara na Siliman, ömö'dii  
ungno kita agii'bi Siliman.

<sup>43</sup> "Ka koronggore tiya toroko ya kara  
tö'dö kürö ndama ömö'dii, ikirii ka talööle

ka dhüile awwa 'buugu ma tagünü kide itaalo aduna.

<sup>44</sup> Iki, 'Ara tapadaga co 'dī tiya eede ka öö'dō ndama iini ya,' afada aduna i'i ka ta'döngngönyö insili kada akindininjaana ku'bu.

<sup>45</sup> İkiri ka tunggeene aco öö'dō a nagonronggore ka üdümmü kafünü eera ka oroko kadagii'bi i'i. Kaco kanna kide a taneene na ömō'dī tiya miini ya, katoroko ka tagii'bi na dhidha no. Taneene ma sere tiya oroko ya kara tafifig nggeege."

*Yasu nja nüümö nja nagöre tanno iini*  
(Murkus 3.31–35; Lüüka 8.19–21)

<sup>46</sup> Aga Yasu ka taleefe teema nja kadu ya, a nüümö miini nja nagöre tanno iini ta'dingeene ko'do kürö kasaasa teema nja iini.

<sup>47</sup> A ömō'dī öccö tiki, "Nüümö müüdü nja nagöre tanno üüdü ka'dingeene ko'do kürö kasaasa teema nja o'o."

<sup>48</sup> İkiri Yasu ka tiki iini, "Nüümö meede oogo müyye a nagöre neede eege kiiye?"

<sup>49</sup> İkiri ka laga nüösö ka kadalaadene tanno iini iki, "Nüümö meede nja nagöre tanno eede eege kungngo.

<sup>50</sup> Kudumma ömō'dī tiya alingga a tumma tanno Pupa tiya eede ya ka 'dotombo'do ya i'i ya örre tiya eede nja iinye tammo eede nja nüümö tammo eede."

## 13

*Tafeene ma tumma ma taleele*  
(Murkus 4.1–9; Lüüka 8.4–8)

<sup>1</sup> Ka uuru tanno miini no ö'dö Yasu kürö ndama 'dī aco a tinggini ma to emmi kide.

<sup>2</sup> A kadu tarügü kini ka oona kadhabbu, ikiri ka sıro mürkabü emmi kide a kadu tadiği ka tinggini ma to nye'de d'kungngo.

<sup>3</sup> Adageema tumma nja eene a tafeene ma tumma dhabbu iki, "Unggeeme taleele ma taco a siga tadin tööyö ka siga tanno iini.

<sup>4</sup> A kini ka tadin migile ikiri kömö ka a'dünggö ka fiin, uy to'dö eeraga a'duuru.

<sup>5</sup> A kömö ta'dünggö ka 'buugu tiya 'dokon'da ya, ya kuraaga ka taalo kadhabbu kide ya afü'döönö areere kudumma kuraaga taalo kinynyo aa'bu.

<sup>6</sup> A ka ndanaaya köö'dö ko'do ma tinyogo, kudumma ereere katitalo kene ma'bayaga ko'do.

<sup>7</sup> A kömö ta'dünggö ka immi ka teene, immi teesere mamar'di oogo.

<sup>8</sup> Ammo ta'dünggö ka tüm'bööri tanno a'diila no, ammo to'dö a kadu kiidümmü, ammo to'dö ana iiye a kadu kiidoona, ammo to'dö ana iiye kukumu ömō'dī aaco iisine adhabbu a tiya adinidene ya.

<sup>9</sup> Ömō'dī ya ana iisine ya fa kini atoodo kide."

<sup>10</sup> I'i yungngo a kadalaadene kö'dö ka Yasu kindini i'i, "Neemaga o'o kene a tafeene ma tumma amana?"

<sup>11</sup> Iki eene, "Tumma ma tauugaara ma 'dotombo'do na küdhü no ananja aaga, illi eego taalo kananja eene.

<sup>12</sup> Ömō'dī ya ana eema dhabbu ya ara könö tagusunja kini kide dhabbu, a ömō'dī ya eema ka titaalo kini ya, münda ya idhilli ya kini ya ara ta'dugadene kini.

<sup>13</sup> I'i yungngo eede ka teema nja eene a tafeene ma tumma kudumma eene kadinö kide kassa katitalo kijöögö, katoodo kide kasa kitaalo kaföönyö kitaalo kussu.

<sup>14</sup> Amang ka tumma tanno ne'bi Asaiya co ööye miini,  
Salla aaga taföönyö taalo aaga kara tussu,  
aaga tadinö kide aaga sa kitaalo kara tijöögö.

<sup>15</sup> Kudumma eedi tiya kadu tanno akidhö köödhi iisine neene ka'bürü iiye, kudumma eene taalo kasaasa taföönyö ana iisine  
kussu a nanggeedi tanno eene amang kene taadha ka tatoroko noolona eege.'

<sup>16</sup> Lakiini a'diila nja aaga kudumma iiye tanno ada kiji 'buugu iisine naada taföönyö eema.

<sup>17</sup> Ara a'a tadirina tumma aaga dhorro, nagane'bi kadhabbu nja kadu tanno insili ka nanggeedi no, kasaasa tadinö ka eema tiya ada ka ijöögö 'bitüngngö ya kitaalo kijöögö, ka asaasa taföönyö eema yaada ka föönyö ya taalo kaföönyö.

<sup>18</sup> "Aaga föönyö tafeene ma tumma ma taleele.

<sup>19</sup> Ka ömō'dī kara taföönyö tumma ma tauugaara saga titaalo assumunaana kide ya, Eblisi to'dö ökösö tumma no adininja kini ka eedi no. Tööyö ma tadinidene ka fiin mo.

<sup>20</sup> Aya adinö ada ka 'dokon'da ya i'i yungngo aföönyö tumma na Masala amma ereere adhodho.

<sup>21</sup> Lakiini kudumma ereere ka titaalo kini ya atagünü idhilli kungngo. A 'buugu kara tiideene a kadu talingga eege kudumma tamma ma Masala kareere ka tapadaga oona keere.

<sup>22</sup> Aya adinidene ka immi ka teene ya, i'i yungngo aföönyö tumma, adinigöögö ma eema ma 'büdhüllü nja tallogo ma almaala, kamir'di tumma itaalo ana iiye.

<sup>23</sup> Aya adinidene ka tüm'bööri ya i'i yungngo aföönyö tumma na Masala assumunaana kide, i'i yungngo ara to'dö a tööyö, ammo to'dö a tööyö mukumu kadu

ka iidümmü (100), ammo tö'dö ana iiye a kadu kiidoona (60), ammo töö'dö ana iiye kukumu ömö'di aco iisine (30) a dhabbu a tiya adinidene ya."

#### *Tafeene ma tumma ma moome*

<sup>24</sup> A Yasu tadirina tafeene ma tumma könö eema eene afe'de iki, "Tauugaara ma 'dotombo'do kafeene nya ömö'di tiya adinö tööyö ma 'diila mo ka siga tanno iini.

<sup>25</sup> Ka ooso töccö a kadu ka ndarigide ikirö diidi yiini ka öö'dö adadini moome ka migile ka teene assa ka tunggeene.

<sup>26</sup> Ka migile ka ndafü'döönö ma unggü koforo kürö ya, ikirö moome kabbü 'dala nja oono.

<sup>27</sup> "Ikirö kadu na linggo ka siga no, kadingindi i'i kiki a'da, 'Ka ömö'di eede, nadini o'o tööyö ma 'diila mo ka siga tanno üüdü a moome sa öö'dö nya?'

<sup>28</sup> "Ikirö ka tapadaga tumma eene iki, 'Didi ma a'a i'i yunggo agalinggo nggege.'

"Kikirö ka tiki iini, 'Nasaasa o'o ungngö kico tafanna moome ku'bu?'

<sup>29</sup> "Ikirö ka anu iki eene, 'Aaga fa kide ii'dü aaga tafanna migile ku'bu nya moome.

<sup>30</sup> Aaga fa ka moome masere nya migile tikinggi ara uuru ma taraana köö'dö, na a'sa ka tiki a kadu tanno araana no aaga awagaana moome koonä ka dhidha aaga tami'daana aaga tüfü issi kide ara aaga ka tödhe migile aaga tuurugu co 'boode tiya eede.'

#### *Tafeene ma tumma ma tanuure*

(Murkus 4.30-32; Lüüka 13.18-19)

<sup>31</sup> Adirina tafeene ma tumma eene afe'de iki, "Tauugaara ma 'dotombo'do kafeene nya ndaniye ma tanuure na ömö'di ka 'duga adadini' ada ka siga tanno iini

<sup>32</sup> A'da ka yoyo iiye miini, lakiini kene ka taseri ka ta fa ya dhabbu ya liganaafa ma siga nye'de kungngö uyi tüüfü nafü ka naseldhe miini."

#### *Tafeene ma tumma ma tigiüdü*

(Lüüka 13.20-21)

<sup>33</sup> A Yasu tafada adirina tumma no eene a tafeene ma tumma tököönö afe'de iki, "Tauugaara ma 'dotombo'do kafeene nya tigiüdü aka ka a'duga manangnga ka nyalemelö iidoona idhi elö tüüfü nye'de kungngö."

#### *Yasu eema a tafeene*

(Murkus 4.33-34)

<sup>34</sup> Tumma no nye'de kungngö adirina Yasu a kadu a tumma kafeene itaalo eema nya eene ün'dügüngngö illi a tumma kafeene.

<sup>35</sup> A tumma na ne'bi co ööye miini, "Kede kara teema eema a tumma keefe,

nadiri eema ya aganna ka küdhü ma 'billi ya a'da üfürü 'büdhülu tadinadene."

#### *Yasu asaana tafeene ma tumma ma moome ku'bu*

<sup>36</sup> Ikirö Yasu ka tinyi kadu ku'bu ara kico 'di, ikirö kadalaadene niini ka öö'dö kini kiki iini, "Asaana ana tafeene ma tumma ma moome ma siga küdi ku'bu amang küdi tussu."

<sup>37</sup> Apadaga tumma eene iki, "Ömö'di ya adinö tööyö ka'diila ya, i'i ya 'Bii'bala ma Tadü'dü.

<sup>38</sup> A siga a'da 'büdhülu, a tööyö ma'diila mo ka laala ma tauugaara ma 'dotombo'do, a moome ka laala ma Ebliisi.

<sup>39</sup> A diidi ya adinö moome ya i'i ya Ebliisi uuru ma taraana a'da tödhe ma 'büdhülu a kataraana a'da kadhangga.

<sup>40</sup> Afa ma taleele ka tawaana moome koona üfü issi kide ara tafeene nggege ka töödhi ma 'büdhülu.

<sup>41</sup> A 'Bii'bala ma Tadü'dü tagürünüñ kadhangga niini kagesse kadu na oroko no nya tanno aga'da 'buugu ka tauugaara tanno iini no.

<sup>42</sup> Kadzhifi egee ka issi ma tambürüü'dü kita eene katafara kabbünaana igini ka oona.

<sup>43</sup> A kadu na 'diila no töyeene afa ndanaaya ka tauugaara tanno Pupa tiya eene. Ömö'di ya ana iisine ya fa kini atoodo kide.

#### *Tafeene ma tumma ma almaala tiya küdhü ya*

<sup>44</sup> "Tauugaara ma 'dotombo'do kafeene nya gürüüsü tiya aküdhüdene ka siga ya, a ömö'di taluna aküdhü a dhodho tagu i'i ka oona, adanege ana eema tiya iini nye'de ateefe tana siga na miini no.

<sup>45</sup> "A tauugaara ma 'dotombo'do tafeene afe'de nya ömö'di tiya anadene ana eema ya agawwa lüülü ya agu'daana ya.

<sup>46</sup> Kini ka ndaluna lüülü ya agu'daana ya, ikirö ka tanegi ana eema tiya iini nye'de kungngö eenege i'i.

#### *Tafeene ma tumma ma sa'baka*

<sup>47</sup> "A tauugaara ma 'dotombo'do tafeene nya sa'baka ma kilöögö a kadu tanno akinni no, kadara'baga co to kümmü kilöögö kadhoonyo.

<sup>48</sup> Kini ka ndadigine, kikirö ka 'dinigi i'i ka tingini ma to. Kikirö ka tagesse kilöögö na 'diila no kadzhifi kene ka naayo kara katadhifigi na oroko no co.

<sup>49</sup> Ara tafifi nggege ka uuru ma töödhi ma 'büdhülu. A kadhangga tö'dö kagesse kadu na oroko no ka kadu tanno 'diila no ka teene.

<sup>50</sup> Kadhifi eege ka issi ma tambürüü'di ka teene, kita eene kafara kabbünaana igini ka oona."

<sup>51</sup> İkiri Yasu ka tindini eege iki, "Kussu aaga tumma no nye'd'de kungngo?"

Kiki iini, "Kussu ungngo."

<sup>52</sup> Iki eene, "Tumma no a'da tatalaana ma serye ya talaana kadu na anangnga tauugaara afeene nja ömö'di ma 'di tiya amanaga tööyö ma 'bitingngö mo nja tammo illi mo kürö."

*Kadu ma Nasira kanu ka Yasu*

(*Murkus 6.1-6; Lüüka 4.16-30*)

<sup>53</sup> Ka Yasu ka ndatümö tafeene ma tumma ya ikiri ka tunggeene ndama kanna.

<sup>54</sup> Aaco anya tammo iini alaana kadu ka la ma talaana tiya eene, a kadu tadhere kindini ajeene kiki, "Aduna ta'dara nja türü tanno kiga?

<sup>55</sup> Taalo i'i yungngo a 'bii'bala ma tadasaana ma kee'di? A nüümö miini mana eere a'da Mariyom a nagöre niini a'da Yaguub nja Yüüsif nja Samaan nja Yahüüsa?

<sup>56</sup> Taalo naqinye niini kungngo kita nye'd'de nja angnga, assa aduna tumma no kiga?"

<sup>57</sup> Kitaalo kamma kini, ikiri ka tiki eene, "Taalo kadu ma tanu ka ne'bi illi kadu ma anya tammo iini nja kadu ma 'di tiya iini."

<sup>58</sup> Itaalo ala türü eene dhabbu kudumma eene taalo kamma ana eedi.

## 14

*Inde na Yühanna tiya Tatambeese ya*  
(*Murkus 6.14-29; Lüüka 9.7-9*)

<sup>1</sup> Ka uuru tanno miini no aföönyö uu-gaara Hirüdüs tumma na Yasu.

<sup>2</sup> İkiri ka tiki a kadu tanno alingga nja iini no a'da, "Yühanna ya Tatambeese ya afik'i'dö ka inde, i'i yungngo iini ka talingga eema keefe a türü."

<sup>3</sup> Kudumma Hirüdüs ka tagümmü Yühanna adimi'di i'i anangnga ka pabuuus, kudumma Herüdiya aka ma örre tiya iini Filibüs.

<sup>4</sup> Kudumma Yühanna ka tageema nja iini, iki iini a'da, "Taalo a'diila küdü kara ta'duga Herüdiya aka ma örre tiya yüüdü."

<sup>5</sup> Asaasa tiidi i'i illi i'i ari'ba a kadu kudumma eene ka tümmü Yühanna kada ne'bi.

<sup>6</sup> Ka uuru ma taanyara ma teenedene tanna Hirüdüs, a 'badaada ma Herüdiya tasili kide a'diila ka Hirüdüs ka oona adhodho.

<sup>7</sup> Adimi'di tumma nja oono iki a'da, nüümö yoono ka asaasa ya ara i'i tanangnga oono.

<sup>8</sup> İkiri nüümö ka tagalaana oogo, mikkir ka tiki a Hirüdüs, "Nanangnga üüdü ya Yühanna ya Tatambeese kide ka dho tammo."

<sup>9</sup> Uugaara tagoroo'bo, lakiini i'i anangnga kadu köö'dö iini, kudumma iini ka timi'di tumma ka kafala tanno iini kidha.

<sup>10</sup> Agürünü kadu kateefe tarmuna üüdü ya Yühanna ka pabuuus.

<sup>11</sup> Köö'dö iini ka dho a'duga anangnga a 'badaada, mikkir ka 'duga mateefe tunggu co nüümö,

<sup>12</sup> İkiri kadalaadene na Yühanna ka öö'dö ka'duga oofo yiini katatü'böönö kassa ka co kadiriniga co Yasu.

*Yasu amana kuri a kadu köö'dö ana alif ka üidümmü*

(*Murkus 6.30-44; Lüüka 9.10-17; Yühanna 6.1-14*)

<sup>13</sup> Ka Yasu ka taföönyö tumma no ya, ikiri ka tunggeene ndama kanna aka ka mürkabü aaco lodho unggodho i'i. Lakiini kadu kadhabbu ka tussu kuurna i'i keere ndama naanya tanno eene ana uune.

<sup>14</sup> A kini ka nda'barda ndama mürkabü asala kadu kadhabbu a 'bangnga meene tümmü i'i oolona eege ka maara tammo eene.

<sup>15</sup> A 'buugu kanda siiya ya, ikiri kadalaadene niini ka köö'dö kini kiki iini a'da, "Asa 'buugu tefe co, dhüle i'i yungngo iki a kadu ka unggeene kaco nöö'di ma tana eema ma taguri."

<sup>16</sup> İkiri Yasu ka tiki eene, "Taalo kama tunggeene adha, aaga inyi eema eene kaguri."

<sup>17</sup> İkiri ka tiki iini, "Taalo nüümö kidi illi miteene ma üidümmü a kilöögö keera."

<sup>18</sup> İkiri Yasu ka tiki eene, "Aköö'dö iini a'a kita."

<sup>19</sup> İkiri ka anangnga kadu nye'd'de katemmi ka ooyo, ikiri ka 'duga miteene müidümmü mo nja kilöögö tanno eera no, asala co 'dotombo'do anangnga baraka kide asümünaana miteene ku'bu anangnga a kadalaadene tanno iini kata-mana a kadu.

<sup>20</sup> Kadaguri in'dilli kungngo küüsü. Kadagawaana türeene miini koona kadigi nasingilli kada'baaga kafünü eera.

<sup>21</sup> A kadu na kuri no nagiide no köö'dö na alif ka üidümmü (5,000) a'da taalo kakinni iiya nja laala tiya dhiidhi ya.

*Yasu unggeene ka 'büdü*

(*Murkus 6.45-52; Yühanna 6.15-21*)

<sup>22</sup> İkiri Yasu ka anangnga kadalaadene niini ka taka ka mürkabü kadhe ko'do kaco ka nda'da ma to ndama 'dakeyi tiya

faga co kanna ya ara kaduuru kadu ka tino.

<sup>23</sup> Kini ka nduuru eege ka tino ya, ikirii ka sиро 'dikinya unggodho i'i afara ka Masala. Idhi a 'buugu ta siiya.

<sup>24</sup> A tanya tagürü mürkabü kasigi oogo co ku'b'ba ndama tinggini ma to, kudumma tanya ka talingga oogo ndama dhugudha.

<sup>25</sup> A na'bu ma taka a Yasu tunggeene ka 'biidii ana awwa unggunu ka kadalaadene tanno iini.

<sup>26</sup> Ka kadalaadene tanno iini ka tasala i'i ka tunggeene ka to ya, a ri'ba tümmü eege kiki, "Koronggore i'i yungngo," kafara ari'ba kagu eege.

<sup>27</sup> İkirii Yasu karooro ka tiki eene, "Aaga idhi oona ku'bu a'a namiini, aaga fa tari'ba."

<sup>28</sup> İkirii Bütrüs ka tiki iini, "Üürü o'o namiini Uugaara, fa kede nunggeene ka 'biidii ana awwa nöö'dö küdü kanna."

<sup>29</sup> A Yasu tiki, "Aayu." İkirii Bütrüs ka ta'barda ka 'biidii ndama mürkabü unggunu ka Yasu.

<sup>30</sup> Ari'ba tümmü i'i iini ka tassa ka tanya ka tüösö dhindho, anda öö'di ka 'biidii iidhe iki, "Ka Uugaara, ma oolona a'a."

<sup>31</sup> İkirii Yasu ka tunggu nüösö iini ümmü i'i, iki iini, "Minna agu tamma nüüdü ka idhilli kungngo minna agu o'o na'doore kaeedi?"

<sup>32</sup> Kene ka ndasirigö co mürkabü ya ikirii tanya katöödhü.

<sup>33</sup> A kadu na kanna ka mürkabü no, tüürü ku'bu kamma kimi kiki, "O'o no 'Bii'bala ma Masala timin'da."

### *Yasu oolona kadu ka maara (Murkus 6.53–56)*

<sup>34</sup> Kikirii ka tada'da to kaco kata'daga co Genisaret.

<sup>35</sup> Aga kadu miini kandussu Yasu ya, ikirii ka tanyala tumma ka naanya ka oona 'do, köö'dö a kadu na aa'ba i'i ka oona no toolonadene nye'de kungngo.

<sup>36</sup> Kiki iini a'da, kasaasa a'da kakara taa'ba 'dakeyi ma ten'di tammo iini ün'düngngö, a kadu na aa'ba i'i ka oona no toolonadene nye'de kungngo.

## 15

### *Tinsili nja nyoro (Murkus 7.1–23)*

<sup>1</sup> İkirii naFariisi nja katalaana ma seriye köö'dö ka Yasu ndama Örsaliim, kindini i'i,

<sup>2</sup> "Minna agu kadalaadene nüüdü kasilli eema ma kadaada kadagümmün angnga

ma 'billi ya, kitaalo kagunu iiwine kassa kagu eema."

<sup>3</sup> Yungngo Yasu ka tapadaga tumma eene indini eege, "Minna agu aaga, aaga tasilli tumma na Masala ara aaga katümmü talaana na kadaada ma aaga."

<sup>4</sup> Masala mikii a'da, 'Ümmü pupa yüüdü nja niimö tammo üüdü,' kudumma 'ömö'di tiya eela pupa yiini nja niimö tammo iini ya, ara tiididene.'

<sup>5</sup> Lakiini aaga kiki a'da, ömö'di ya ana eema ma tamana a pupa tiya iini nja niimö tammo iini, assa kagala ka tiki eene a'da, 'I'i anangnga a Masala.'

<sup>6</sup> I'i taalo asasa tumma ma pupa tiya iini, nggege kaga'da aaga tumma na Masala ara aaga katümmü talaana na kadaada ma aaga.

<sup>7</sup> Aaga na ümmü nanggeyi naada ka tii'baana no. Tumma na ne'bi Asaiya ka tatiraana ma aaga no kinynyo ööye miini, kini ka tageema a'da Masala mikii a'da,

<sup>8</sup> 'Kadu no akümmü a'a a niinö ün'düngngö  
lakiini nanggeedi neene kagu'b'ba kede.

<sup>9</sup> Taalo kümmü a'a ana eedi dhorro  
kara talaana tumma ma naköö'mö'di taalo talaana neede.'

<sup>10</sup> A Yasu takümünaana kadu koona iki eene, "Aaga toodo kede aaga tussu."

<sup>11</sup> Taalo eema ya ömö'di ka amana kini ka niinö i'i yungngo amana ömö'di ka tanyoro, lakiini eema ya icci a kürö ndama niinö ya i'i yungngo amana ömö'di ka tanyoro."

<sup>12</sup> İkirii kadalaadene niini ka öö'dö kini kiki, "Nussu o'o a'da kagoroo'bo naFariisi kene ka taföönyö tumma nüüdü no?"

<sup>13</sup> İkirii ka tapadaga tumma eene iki, "Fa ya pupa tiya ka 'dotombo'do ya, taalo adho oogo ara tafannadene ana ereere miini."

<sup>14</sup> Aaga fa kene kudumma eene kada katalaana tanno kisinsoro no, üürü ka soro ara tümmüni soro ka tino ya, kara ta'dinggö co ööye ateera meene."

<sup>15</sup> İkirii Bütrüs ka tiki iini, "Asaana tumma no kiidü ku'bu."

<sup>16</sup> İkirii ka tiki eene, "Küfürü aaga tussu ta'bütüngngö?

<sup>17</sup> Taalo aaga kussu a'da niimö ya ömö'di ka tunggu co a niinö ya adheedhe ko'do aco eedi ndama eedi aco kürö ndama tuu'da?

<sup>18</sup> A niimö ya ara tö'dö kürö ndama niinö ya i'i ya öö'dö kürö ndama eedi, i'i yungngo amana ömö'di ka tanyoro.

<sup>19</sup> Kudumma tumma tanno toroko no icci akürö ndama eedi, tagirina kadu nja

taga'da 'buugu nja nyoro, temelö, tadhe kadu nja teelaana.

<sup>20</sup> Eema ya, yunggo amana ömö'dü ka tanyoro, lakiini tagu kuri ana iisine kada nyoro taalo i'i yunggo amana ömö'dü ka tanyoro."

*Tamma ka Masala na aka ma Kanaan  
(Murkus 7.24-30)*

<sup>21</sup> İkiri Yasu ka tunggeene ndama kanna aco a riñfö ma Suur nja Saiyda.

<sup>22</sup> İkiri aka minggide mada Kanaana möö'dö kürö ndama kita miini kita, miidhe miki iini, "Ka Uugaara, 'Bii'bala ya Dawud, ma ana 'bangnga ma a'a na'bu aka ka 'badaada tammo eede, ünni midhi ku'bu ana oogo 'do."

<sup>23</sup> A Yasu taalo adirina nüümö oono, ikiri kadalaadene niini ka öö'dö kiki iini, "Uuru oogo ka tino kudumma oono ma to'd'o do kaja keere miidhe."

<sup>24</sup> İkiri Yasu ka tiki, "Masala magürünü a'a ka kidheeple ma Israyil na aama no unggodho eege."

<sup>25</sup> Lakiini mö'dö müürü ku'bu kini kidha miki, "Uugaara, oolona a'a."

<sup>26</sup> A Yasu tiki, "Taalo a'diila kaja ka 'duga kuri ya laala angnga tanangngä a tiini."

<sup>27</sup> Aka tiki iini, "Tumma dhorro eege kamii Uugaara, a tiini 'do ya kera eema ya öreene asusuli ndama naadho tanna kadu tanno eene."

<sup>28</sup> I'i yunggo Yasu ka tiki oono, "Aka, kidhindhi tamma ka Masala nüüdü, nüümö yüüdü ka asaasa ya ara tananja o'o." A 'badaada moono tarooro ka'diila ka ööye miini kungngo.

*Yasu oolona kadu kadhabbu*

<sup>29</sup> A Yasu tunggeene ndama kanna aco a 'dakeyi ma to ma Jaliil. Asirö anya emmi kide.

<sup>30</sup> A kadu tawagaana oona kini ka oona kadhabbu, namügüre nja kisinsoro, nja kadu tanno sogo'do no njanaküngüri nja kadu könö kadhabbu köö'dö ana eege ka Yasu kidha oolona eege.

<sup>31</sup> A kadu tadhere eene kataasala naküngüri kadeema a kadu na sogo'do no toolonadene, a namügüre tunggeene, akisinsoro tiji 'buugu, kindhügi Masala ma Israyil ko'do.

*Yasu anangnga kuri a kadu köö'dö ana alif ka egüsö  
(Murkus 8.1-10)*

<sup>32</sup> A Yasu tagümmünü kadalaadene niini iki eene, "Magu 'bangnga a'a ma kadu tanno, kudumma eene ka ndüyü kita nja a'a afüngnö tiidoona a nüümö meene kaguri kitaalo nitaalo nasaasa tuuru eege ka tino ana iire kudumma eene kara co tagi'di ka fiini."

<sup>33</sup> İkiri kadalaadene niini ka tiki iini, "Ara angnga taduna kuri kiga ka dhüile kita ma ta'dimo ka kadu tanno in'dili no?"

<sup>34</sup> İkiri Yasu ka tindini eege iki, "Namideene kungngo ada kaanya?"

Kiki a'da, "Namideene ka iidümmü kafünü eera ana ligi kilöögö idhiidhi."

<sup>35</sup> İkiri Yasu ka anangnga kadu katemmi ka 'büdhüli.

<sup>36</sup> A'duga namideene na iidümmü kafünü eera no nja kilöögö anangnga ta'diila a Masala asümünaana ku'bu anangnga a kadalaadene tanno iini katamana a kadu.

<sup>37</sup> Kadaguri eege nye'de kungngo küüsü, kikiri ka tawagaana türeene miini koona kadigi nasinggili ka iidümmü kafünü eera.

<sup>38</sup> A kadu na aguri no tö'dö na alif ka egüsö a'da taalo iiya nja laala tiya idhiidhi akinidene.

<sup>39</sup> İkiri Yasu ka tuuru kadu ka tino ara ka taka ka mürkabü aco anya ma Majdan.

## 16

*Tasaasa ma eema keefe no*

*(Murkus 8.11-13; Lüüka 12.54-56)*

<sup>1</sup> A naFariisi nja Sadügiin tö'dö kini kasaasa ta'b'ba i'i ka eyi, kasaasa i'i a'da aala nüümö eene keefe ndama 'dotombo'do.

<sup>2</sup> Apadaga tumma eene iki, "Ka ndanaaya kara caa'bu, siyya kungngo a 'dotombo'do tadħoyö, aaga tiki a'da a'diila 'buugu.

<sup>3</sup> A 'buugu tara ta ndüüli ka tadħoyö, ligitaka kungngo aaga tiki a'da, ara tombo'do tede. Kussu aaga tasaana tumma ma 'büdhüli ku'bu illi eema ma naguuru tanno ara tö'dö no taalo kara tussu ka tasaana ku'bu.

<sup>4</sup> Ara oroko ma sere tiya na temelö no taalo a'diila ya, asaasa tassa ka türlü ma 'dotombo'do, lakiini eege taalo kara taduna illi türlü na Yünan no." İkiri ka tinyi eege ku'bu ara ka tunggeene.

*Tigüidi ma naFariisi nja Sadügiin  
(Murkus 8.14-21)*

<sup>5</sup> Ka kadalaadene tanno iini ka tada'da to ya, küüri ma ta'duga miteene meene.

<sup>6</sup> A Yasu tiki eene, "Aaga adin'i ko'do kudumma tigüidi tamma naFariisi nja Sadügiin."

<sup>7</sup> Kiki a teema unggodho eege, "I'i iki nggee kudumma aja ka titalo kagufu eema ma taguri nja angnga."

<sup>8</sup> A Yasu tussu tumma neene, ikiri ka tiki, "Aaga no tamma ka Masala tanno ada ka tidhilli no, köö'dö aaga nya aaga tiki a'da miteene mitaalo kaja?"

<sup>9</sup> Küfürü aaga tussu ta'bitingngö? Taalo aaga kagügi namiteene na iidümmü no ma kadu tanno öö'dö na alif ka iidümmü kadigi aaga nasinggili kaanya a miteene?

<sup>10</sup> A miteene ma iidümmü mafünü eera mo ma kadu tanno öö'dö na alif ka egüsö no, kadigi aaga nasinggili kaanya?

<sup>11</sup> Taalo aaga kussu tumma no nya, taalo a'a neema tumma ma miteene njä aaga? Aaga adini ko'do afa ma tigüüdi ma naFariisi njä Sadügiin."

<sup>12</sup> A kadalaadene tussu a'da i'i iki eene a'da kafa taföönöyö talaana naFariisi njä Sadügiin, taalo tigüüdi ma miteene.

*Bütrüs ussu a'da Yasu atimin'da  
(Murkus 8.27-30; Lüüka 9.18-21)*

<sup>13</sup> Ka Yasu ka ndö'dö ka riifö ma Kaiysariya Filippi ya, ikiri ka tindini kadalaadene niini iki, "Kadu kiki nya ma 'Bii'bala ma Tadü'dü?"

<sup>14</sup> Kiki iini, "Kadu könö kiki a'da Yühanna ya Tatambeese ya, a könö tiki a'da İliya, anno tüütü katiki a'da Armiya alla ne'bi öccö."

<sup>15</sup> İkiri ka tiki eene, "Aaga kiki a'da a'a na minna?"

<sup>16</sup> İkiri Samaan Bütrüs ka tiki, "O'o na Almasihi 'Bii'bala ma Masala ma efe ka 'dimo."

<sup>17</sup> İkiri Yasu ka tiki iini, "A'diila njä o'o no Samaan 'bii'bala ya Yüna, tumma no taalo kadherenja o'o ndama ömö'di, lakin-i Pupa yeede yungngo ka 'dotombo'do ya i'i yungngo ala o'o.

<sup>18</sup> Ara a'a ka tiki o'o na Bütrüs no, o'o na 'dokon'da, ka 'dokon'da tammo ara a'a tarü'bünü kaniisa meede kide, a 'buugu ma inde taalo ara tii'bi oogo.

<sup>19</sup> Ara a'a tanangnga nangafata ma tauugaara ma 'dotombo'do o'o, niimö yüüdü ka timi'daana ka 'büdhülyü ya, ara timi'didene ka 'dotombo'do, a niimö yüüdü kara tagildhe ka 'büdhülyü ya, ara tatinggildhe ka 'dotombo'do."

<sup>20</sup> İkiri Yasu ka tiki a kadalaadene tanno iini a'da kafa tadirina tumma no a ömö'di a'da i'i ya Almasihi.

*Yasu eema tumma ma inde njä tafiki'dö  
(Murkus 8.31—9.1; Lüüka 9.22-27)*

<sup>21</sup> Ndama uuru tanno miini no, ikiri ka ndadünögü eema a kadalaadene tanno iini kene ka iiye kungngo a'da ara i'i co Örsaliim aco adhügürü ana eema dhabbu ka nüüsö ma kadiffi njä naguugaara ma ka'boge njä katalaana ma seriye kiidi i'i afiki'dö ka inde a fungngö iidoona.

<sup>22</sup> İkiri Bütrüs ka tagedhe i'i asanna kini iki a'da, "Ka Uugaara, a Masala tafa tö'dö a tumma tanno."

<sup>23</sup> İkiri Yasu ka tafele assa ka Bütrüs ko'do iki iini, "Sigi co kannu kede ka oona o'o na Ebliisi no, nakara o'o kede kidha kudumma a tumma tanno üüdü no tumma ma nakömö'di egee kamiini taalo tumma na Masala egee kamiini."

<sup>24</sup> İkiri Yasu ka tiki a kadalaadene tanno iini, "Ömö'dü ya asasaas to'dö kede keere ya fa kini üüpü eyi yiini co a'duga salii'bi yiini öö'dö ke de keere.

<sup>25</sup> Kudumma ömö'dü tiya asasaas toolona eyi yiini ya, fa kini aama egee kudumma ömö'dü ya üüpü eyi co ka üüdü ma a'a ya, ara taluna egee.

<sup>26</sup> Ara ömö'dü taluna minna kini kara tümmü eema ma 'büdhülyü nye'de ara ka taama eyi yiini, i'i atoolona eyi yiini a minna?

<sup>27</sup> Ara 'Bii'bala ma Tadü'dü sa köö'dö a tiddhindhi ma Pupa tiya iini njä kadhangga tanno iini öö'dö tümmü kadu ana tamana ma linggo tanno iini ka tagalinggo no.

<sup>28</sup> Ara a'a tadirina tumma aaga dhorro, kadu könö kungngó kita, taalo kara tassa ka inde ka oona a'da küfürü tasala 'Bii'bala ma Tadü'dü tö'dö a tauugaara tanno iini."

## 17

*Yasu a'bele oona*

*(Murkus 9.2-13; Lüüka 9.28-36)*

<sup>1</sup> A fungngö ka ndö'dö iidümmü afünü unggodho ya, ikiri Yasu ka 'duga Bütrüs njä Yaguub njä örre tiya iini Yühanna, agede egee asirö anya ma dhonggoro mo nya eene.

<sup>2</sup> A'bele oona eene kide kungngó, a dhugudha yiini töyeene afa ndanaaya, en'di ma oona yiini töyeene kata'bassa.

<sup>3</sup> A Müüsa tadhe kene ka oona njä İliya keema njä Yasu.

<sup>4</sup> İkiri Bütrüs ka tiki Yasu, "Ka Uugaara, a'diila 'do aja kara tanna kita, üürü o'o nasaasa ara a'a talingga ligangga iidoona kita, müüdü njä tammo Müüsa njä tammo İliya."

<sup>5</sup> A kini ka teema ya, a tülüügü tö'dö ka öyeene kene kaküdhü egee ka oona, a tumma tö'dö ndama tülüügü kiki, "'Bii'bala yeede ka asasa i'i ya yungngo yeede ka tamma kini ya, aaga föönöy tumma niini."

<sup>6</sup> Aga kadalaadene ka taföönöyö tumma no ya, ari'ba tümmü egee ka'dünggö a nadhugudha.

<sup>7</sup> İkiri Yasu ka öö'dö ümmü egee ka oona a nüüsö iki eene, "Aaga fiki'dö aaga fa tari'ba."

<sup>8</sup> Kikiri ka ta'dinigi iiye coo'do taalo kasala ömö'dü illi Yasu unggodho i'i.

<sup>9</sup> Kene ka nda'bardaga aku'bu ndama anya ya, ikirī Yasu ka tiki eene a'da, "Kafa tadirina eema yeene ka tadiini kide ya ömö'di, illi a 'Bii'bala ma Tadū'dü ka fik'i'dö ndama inde."

<sup>10</sup> Ikirī kadalaadene niini ka tindini i'i, "Minna agu katalaana ma seriye kiki a'da İliya ara tö'dö ka dhidha?"

<sup>11</sup> Ikirī ka tiki eene, "İi ara İliya tö'dö ka dhidha öö'dö tindinaana eema ku'bu nye'de kungngo.

<sup>12</sup> Lakiini ara a'a tadirina aaga a'da ö'dö İliya illi kadu taalo kussu i'i illi eege kagalinggo niimö yeene ka asaasa ya ana i'i, eege kara talinggo tatoroko a 'Bii'bala ma Tadū'dü afe'de nggeege."

<sup>13</sup> Ikirī kadalaadene niini ka tussu a'da i'i eema ka Yühanna ya Tatambeese ya ka ona.

*Yasu oolona na'bu ka 'bii'bala ka oona  
(Murkus 9.14-29; Lüüka 9.37-43)*

<sup>14</sup> Kene ka ndapadaga ka kadu ka teene ya, ömö'dü tö'dö ka Yasu üürü kini kidha ana kütäge.

<sup>15</sup> Iki iini, "Ka Uugaara, oolona 'bii'bala yeede, kudumma insigiri kungngo iini kalinggo i'i 'do a'dinggaögü ka issi nja 'bii'dü.

<sup>16</sup> Nö'dö ana i'i a kadalaadene tanno üüdü kitaalo kambaanya toolona i'i."

<sup>17</sup> Ikirī Yasu ka tiki, "Ara a'a taneene nja aaga taagaada? Sere yaada taalo ümmü Masala ana eedi kaama, aaga na oroko no. Ara a'a tafa kada tagaada? Aaga ö'dö a 'bii'bala tiya kede kita."

<sup>18</sup> Ikirī Yasu ka kirnaana kini, a na'bu tö'dö kürö ndama 'bii'bala, arooro ka'diila ka ööye miini.

<sup>19</sup> Ikirī kadalaadene ka co ka Yasu unggodho eege kindini i'i kürö kiki iini, "Minna agu ungngo titaalo kambaanya toosoraana ma koronggore tiya toroko ya?"

<sup>20</sup> Ikirī Yasu ka tiki eene, "Kudumma ma tamma tanno ada taalo kakidöhö, ara a'a tadirina tamma aaga dhorro a'da kara takara tana tamma ka Masala ököje nja ndaniiye ma tenuure, ara aaga tiki anya tammo, 'Mooso ndama kita maco kannaa mara tooso,' a niimö ma tara tii'bi aaga kungngo titaalo.

<sup>21</sup> [Na'bu afa ma tiya kungngo ya taalo angnga kasoro i'i ün'dügüngngö illi a tümmü tenege nja tafara ka Masala.]

*Yasu eema tumma ma inde tanno iini  
nja tafiki'dö*

*(Murkus 9.30-32; Lüüka 9.44-45)*

<sup>22</sup> Aga kadalaadene ka ndö'dö ka Jaliil ya, a Yasu tiki eene, "Ara 'Bii'bala ma Tadū'dü tümmününja a kadu ka iisine.

<sup>23</sup> Kara tiidi i'i atüümö füngngö iidoona afiki'dö ka inde." Ikirī kadalaadene kada müürü.

*Yasu amana tulu'ba ma la ma Masala  
ku'bu*

<sup>24</sup> Aga Yasu nja kadalaadene tanno iini ka ndapadaga co Kafarnahööm, a kadu ma tulu'ba ma la ma Masala tö'dö ka Bütrüs kindini i'i, "Taalo tatalaana yaada ara tanangnga tulu'ba ma la ma Masala ku'bu?"

<sup>25</sup> Ikirī ka tiki iini, "İi."

Aga Bütrüs kico a 'bügööri ya, ikirī Yasu ka tata'da i'i ko'do, iki iini, "Niki o'o nya Samaan? Ka mada eege kungngo a naguugaara ma 'büdhüüli kama tulu'ba kene ndama laala tiya eene alla ndama kadu ma ajeene?"

<sup>26</sup> Yungngo a Bütrüs ka tiki iini, "Ka kadu ma ajeene."

A Yasu tiki, "Üürü nggeege ya taalo laala ara tamana ku'bu.

<sup>27</sup> Lakiini angnga taalo kasaasa modolo ka ömö'dü ka oona. Kolo a to napügü ca'bune co 'bii'dü, nümmü mädigilöögö ma dhidha mo nunggu oogo kürö nafa'da oogo ka niinö, ara o'o taluna nakajine ka egüsö nanangnga yeede ku'bu nja tiya yüüdü."

## 18

*Mada i'i yungngo a dhabbu  
(Murkus 9.33-37; Lüüka 9.46-48)*

<sup>1</sup> Ka uuru tanno miini no a kadalaadene tö'dö ka Yasu kindini i'i, "Mada i'i yungngo idhindhü ka tauugaara ma 'dotombo'do?"

<sup>2</sup> Ikirī Yasu ka tagümmänü 'bii'bala ya idhilli ya anangnga i'i ka 'dinggaoge kene ka söödö.

<sup>3</sup> Iki, "Ara a'a tadirina tumma aaga dhorro, üürü aaga kitaalo kapadaga oona keere aaga tafeene afa laala ya dhiidhi ya, taalo aaga kara co ka tauugaara ma 'dotombo'do.

<sup>4</sup> Ömö'dü ya üpü eyi yiini co ya, afeene nja 'bii'bala tiya idhilli ya, i'i yungngo idhindhü ka tauugaara ma 'dotombo'do.

<sup>5</sup> Ömö'dü ya amma ka 'bii'bala afa ma tiya kungngo ana eere tiya eede ya, i'i ya amma kede.

<sup>6</sup> "Ömö'dü ya üpü laala ya dhiidhi ya amma kede ya ka tatoroko ya, aheere a kadu ma tafin'da misi ma tawöönö ma dhabbu mo, kassa ta pügü i'i co tüm'bü ma to.

<sup>7</sup> Am'ba ka kadu ma 'büdhüüli ka eema tiya ara tanangnga 'buugu ka tatoroko, lakiini ara tatoroko nja ömö'dü tiya ara talinggo eema ya.

<sup>8</sup> Üürü nüüsö nüüdü nja awwa tiya üüdü kanangnga o'o ka tüünii tatoroko ya, rumunaga eege co, a'diila küdü kara co ka tefe ka 'd'i ta'billi bala üüdü kana iisine nja uune nassa kaco ka issi ta'billi.

<sup>9</sup> A ööye yüüdü kara tanangnga o'o ka tüünii tatoroko ya, agodhe i'i nüüpü co, a'diila üüdü kara co ka tefe ka 'd'i ta'billi ana ööye unggodho, bala üüdü kana iïye nassa kaco ka issi ma Jahanam.

*Tafeene ma tumma ma dheeafele tiya aama ya*  
(Lüüka 15.3-7)

<sup>10</sup> "Aaga adini ko'do aaga fa tadaana laala ya idhiidhi kalama, niki aaga a'da kadhangga neene kungngo ka 'dotombo'do kadini ka dhugudha ma Pupa tiya eede ka 'dotombo'do.

<sup>11</sup> [Kudumma 'Bii'bala ma Tadü'dü ö'dö miini ka toolona kadu na aama no.]

<sup>12</sup> "Kiki aaga nya? Üürü ömö'di ingide ana kidheefele a kadu ka iidümmü (100) assa ka taama unggodho, taalo ara tinyi na öö'dö kadu ka egüsö ada'baaga iidümmü afünü kide egüsö (99) inyi eege ka na'dikinya ara kico tawwa dheeafele ya aama ya?

<sup>13</sup> A kini kara taluna i'i 'dee, taalo ara tadhodho iini adagii'bi na öreene na öö'dö a kadu ka egüsö ada'baaga iidümmü afünü kide egüsö? Ara a'a tadirina tumma aaga dhorro ara tadhodho iini a tagii'bi tureene miini na taalo kaama no.

<sup>14</sup> Nggeege yungngo a Pupa tiya ada ya ka 'dotombo'do ya ka titalo asasa ömö'di öccö ana ka laala tiya idhiidhi a'da kaama.

*Tafaana ka oona*  
(Lüüka 17.3)

<sup>15</sup> "Üürü ka örre tiya üüdü kara tüünii tatoroko ana o'o ya, kolo kini nadirina tatoroko niini iini unggodho aaga, a kadu tafa tanna kide, kini kara taföönyö tumma nüüdü ya, nggeege nafada o'o örre tiya yüüdü ka tatoroko tanno iini.

<sup>16</sup> Üürü anu ka tumma ya, 'duga ömö'di öccö unggodho üürü keera 'amang kene tessu adene a kadu tanno adinö kide no keera nja eene kara tiidoona.'

<sup>17</sup> A kini kara tanu ka tumma tanno eene ya, tirina a kadu ma kaniisa, a kini kara tanu ka tumma ma kadu ma kaniisa ya, aaga ümmü i'i kada ömö'di tiya taalo ussu Masala ya nja ömö'di ma tera tulu'ba kungingo.

<sup>18</sup> "Ara a'a tädünögü tumma aaga dhorro, nüümö yaada kara tam'i daana ka 'büdhüülü ya, ara timi'didene ka

'dotombo'do, a nüümö yaada kara tagildhe ka 'büdhüülü ya, ara tatinggildhe ka 'dotombo'do.

<sup>19</sup> "Ara a'a tadirina tumma aaga dhorro, a kadu kara timi'di tumma ka 'büdhüülü eege keera ana kada ya meene ka asasa nüümö ka Masala ya, ara aaga taluna ka Pupa tiya eede ya ka 'dotombo'do ya.

<sup>20</sup> A kadu kara temmi keera üürü kiidoona ana eere tiya eede ya, ara a'a tanna kene ka söödö."

*Ömö'di ya taalo ana 'bangnga ya*

<sup>21</sup> İkiri Bütrüs ka tasigi ka Yasu kete indini i'i iki iini, "Ka Uugaara, ara örre yeede tatangga'da nja a'a taanya na a'a saga fa kini na'diila nja iini tüdümmü afünü eera?"

<sup>22</sup> İkiri Yasu ka tiki iini, "Taalo tüdümmü afünü eera, lakiini ukumu kadu kiidoona aco iisine tüdümmü afünü eera.

<sup>23</sup> "Tauugaara ma 'dotombo'do kafeene nja uugaara tiya asasa tadhifi eema yiini ka kadu ma linggo tanno iini ya.

<sup>24</sup> Kini ka ndamaana kene ya, ikiri ka asasa ka töccö ka oona gürüüsö ö'dö na alif kada'baaga.

<sup>25</sup> A nüümö titalo miini ka anangnga ku'bu, ömö'di yiini ka talingga nja iini ya, ka tiki a kadu a'da katenegi ana i'i nja aka tammo iini nja laala tiya iini nja eema tiya iini nye'd'de kungngo. amang kini tanangnga faana miini ku'bu.

<sup>26</sup> "İkiri ka tüürü ku'bu kini kidha olomo i'i iki iini, 'Fa kede ara a'a tanangnga eema yüüdü yeede ka oona nye'd'de kungngo.'

<sup>27</sup> A 'bangnga miini tagu ömö'di uuru i'i ka tino aadha kini ka eema turi.

<sup>28</sup> "Aga ömö'di tiya miini ya ka ndungeene ikiri ka torene nja tööje miini iini ka asasa kömüsü kini ka oona ana nakajine ukumu kadu küdümmü, ikiri ka tümmü i'i ka eyi ndakete kamir'di i'i, ikiri ka tiki iini, 'Nangnga kömüsü meede ma küdü mo a'a.'

<sup>29</sup> "İkiri ka tüürü kini kidha olomo i'i iki iini a'da, 'Anangnga füngngö iini idhilli assa ka nanangnga iini.'

<sup>30</sup> İkiri ka anu eedhe ku'bu ümmü i'i anangnga i'i ka pabuuusu, ara kanangnga eema yiini iini tikenggi.

<sup>31</sup> A kadu na linggo no tiji eema ya agalinggo adene a tagoroo'bo tümmü eege dhorro kunggeene kaco ka uugaara tiya eene kadirina eema ya agalinggo adene ya iini.

<sup>32</sup> "İkiri uugaara yiini ka tagümmü i'i iki iini, 'O'o na tasaga nitaalo o'o na'diila, naadha a'a ka eema ya eede ka asasa

küdü ka oona ya nye'd'de, kudumma üüdü ka takoolomo a'a.

<sup>33</sup> Taalo o'o ama tana 'bangnga ma ömö'di tiya afa meede ka taana 'bangnga ma o'o kungngo?"

<sup>34</sup> Uugaara yiini tagoroo'bo 'do ümmünü i'i a nasigira a'da kapusu i'i, idhi anangnga eema ya ku'bu nye'd'de kungngo.

<sup>35</sup> "Pupa yaada ya ka 'dotombo'do ya ara talinggo ana aaga nggeege üürü taalo aaga kana 'bangnga aaga tafa ka kadu ma kömüsü ndama eedi tiya iini ka teene."

## 19

### Tarna nja tadheene (Murkus 10.1-12)

<sup>1</sup> Ka Yasu ka ndatiimö tumma ya, ikirii ka tunggeene ka Jaliil öö'dö ka naanya ma Yahüüdiya ndama nda'da ma Ri ma Ürdün.

<sup>2</sup> A kadu tuurna i'i keere kadhabbu olonla egee kanna.

<sup>3</sup> A naFariisi tö'dö kini kindini i'i ma tasaasa ta'b'ba i'i, kiki iini, "A'diila ömö'di kara tadheene nja aka tammo iini a 'baniimö idhilli kungngo?"

<sup>4</sup> İkirii ka tiki eene, "Taalo aaga kagiirii sorne ma Masala ka dhidha, Masala marü'bü ömö'di ya miide ya nja aka tammo linynya mo?"

<sup>5</sup> A Masala ka tiki a'da, 'T'i yungngo ömö'di ka tinyi pupa yiini ku'bu nja nüümö tammo iini ara kada unggodho nja aka tammo iini, egee na eera no ata tuu'da na unggodho.'

<sup>6</sup> Nggeege taalo kara teera afe'de, lakiini kara tatuu'da ka unggodho sugi, nüümö ya Masala ka tam'i daana ya, taalo ömö'di ma tagildaana ku'bu."

<sup>7</sup> İkirii naFariisi katindini i'i kiki iini, "A minna agu Müüsa iki a'da ömö'di tanangnga waraga ma tadheene a aka tammo iini ka dheene?"

<sup>8</sup> İkirii Yasu ka tiki eene, "Kudumma ma takidhö ka nanggeedi tanno ada no, egee kungngo kanangnga Müüsa ka tamma a'da aaga tadheene nja iiya tanno ada, lakiini taalo akafigi kungngo ka dhidha.

<sup>9</sup> Lakiini ara a'a tadirina tumma aaga, taalo ömö'di ara tadheene nja aka tammo iini illi kono ka tafüngngö nja ömö'di töccö anyooro, assa ka tapa kono kini ka arna aka ökömö i'i atemelö."

<sup>10</sup> Yungngo a kadalaadene tanno iini ka tiki iini, "Üürü afiigi nggeege ana ömö'di nya aka fa kini afa tarna 'do."

<sup>11</sup> İkirii Yasu ka tiki eene, "Taalo kadu nye'd'de kara tamma ka tumma tanno, illi kadu na Masala kanangnga eene no.

<sup>12</sup> Kadu kinggide kageenedene kada kadheemu ndama nakaniimö ka nanggeedi, könö kinggide a kadu kata'dili eege a kadu könö ka'dili nanggeyi neene kudumma tauugaara ma 'dotombo'do, ömö'di yasaasa tamma kide ya amma."

*Yasu amana baraka a laala tiya dhiidhi ya*  
(Murkus 10.13-16; Lüüka 18.15-17)

<sup>13</sup> A kadu tö'dö ana laala iini a'da ümmünü iisine kene ka nanggüüdü ara kafara ka Masala kudumma eene. Lakiini kadalaadene ka agirnaana kene.

<sup>14</sup> İkirii Yasu ka tiki eene, "Aaga fa ka laala öö'dö kede kita aaga fa tafaga eege keere kudumma tauugaara ma 'dotombo'do ka tanno neene."

<sup>15</sup> İkirii ka tagümmüni iisine kene ka nanggüüdü unggeene ndama kanna.

*Ömö'di ya ana eema dhabbu*

(Murkus 10.17-31; Lüüka 18.18-30)

<sup>16</sup> Ömö'di inggide öö'dö ka Yasu iki iini, "Ka Tatalaana, minna i'i yungngo a'diila eede kara talinggo amang kede taluna tefe ka 'di ta'billi?"

<sup>17</sup> İkirii Yasu ka tiki iini, "Niki o'o a'da a'a na'diila amana, taalo ömö'di ma ta'diila unggodho kungngo illi Masala, üürü o'o nasaasa co ka tefe ka 'di ya, ümmü tumma ma Masala dhorro."

<sup>18</sup> İkirii ka tiki iini, "Tumma öjö?"

Yungngo a Yasu ka tiki iini, "Fa tagirina kadu, fa tatemedö, fa tanyooro, fa tiki a'da o'o nadimi ka nüümö tiya alinggo adene a korokoro.

<sup>19</sup> Ümmü pupa yüüdü nja nüümö tammo üüdü ana eedi dhorro, asaasa ömö'di ya akete küdü afa müüdü ka asaasa eyi yüüdü kungngo."

<sup>20</sup> İkirii ömö'di ya miini ya ka tiki, "Nussu a'a eema ya 'do aminna i'i yungngo öreeene afe'de?"

<sup>21</sup> İkirii Yasu ka tiki iini, "Küdü ka asaasa tinsili ka eedi dhorro ya, kolo ta tanegi ana eema tiya üüdü nye'd'de nasümünaana gürüüsi miini ka kadu tanno eema katiaalao kene no ku'bu, amang ka eema tanno küdü ka 'dotombo'do dhabbu na o'o saga tuurna a'a keere."

<sup>22</sup> Ka ömö'di tiya miini ya ka taföönyö tumma no ya, İkirii ka tunggeene kada 'bandagoroo'bo ka oona kudumma iini ka taana eema dhabbu 'do.

<sup>23</sup> Yungngo a Yasu ka tiki a kadalaadene tanno iini, "Ara a'a tadirina tumma aaga

dhorro, ara tiideene ana ömö'di tiya ana eema dhabbu ya kara co ka tauugaara ma 'dotombo'do.

<sup>24</sup> Ara a'a tiki aaga afe'de, tadigaala ma malaga ka ööye ma ibira taalo ara tagu'dana afa ma ömö'di tiya ana eema ya kara co ka tauugaara ma Masala."

<sup>25</sup> Ka kadalaadene ka taföönyö tumma no ya kadhere 'do kindini i'i, "Amada i'i yungngo ara toolonadene?"

<sup>26</sup> İkiri Yasu ka tassa kene ko'do iki eene, "Eema afa ma tiya ara tiideene ana ömö'di, illi i'i taalo ara tiideene a Masala."

<sup>27</sup> İkiri Bütrüs ka tiki iini, "Kinyi ungngo eema yiidi ku'bu nye'de ara ungngo kaduurna o'o keere. Ara ungngo taluna minna kide?"

<sup>28</sup> A Yasu tiki eene, "Ara a'a tadirina tumma aaga dhorro, uuru ma 'Bii'bala ma Tadü'dü kara temmi ka kööyö ma tühiindhi ma tauugaara tanno iini ka ürüünü tiya ara tö'dö ya, ara aaga sa katemmi aaga na uurna a'a keere no ka nagööyö tanno ada'baaga kafünü eera no, aaga tümmü siliga ma Israyil na ö'dö kada'baaga kafünü eera no.

<sup>29</sup> Ömö'di ya inyi 'dii yiini ku'bu nja nagöre tanno naguide no nja tanno iiya no nja pupa nja niimö nja laala nja nasigeene kudumma eere tiya eede ya, ara taluna eema agusunja kini kide öö'dö a kadu kiidümmü, aluna tefe ka 'dii ta'billi.

<sup>30</sup> Lakiini kadu na dhidha no kadhabbu kara co keere, anno eere no kaco aadha."

## 20

### Kadu ma linggo ma ki'bim'bi

<sup>1</sup> "Tauugaara ma 'dotombo'do kafeene nja ömö'di ma raaga ya illi ka fiki'dö ligitaka so'd' do ma tara co tawwa kadu ma linggo ka raaga tiya iini.

<sup>2</sup> Adimi'di tumma nja eene a'da kalinggo ana jine unggodho\* ka uuru ka unggodho uurugu eege co raaga.

<sup>3</sup> İkiri ka tunggeene ana ndanaaya ka iidümmü afünü egüsö, öö'dö asala kadu könö ka'dingnge ana ko'do ka mansala, a linggo ka titaaloo kene.

<sup>4</sup> İkiri ka tiki eene, "Aaga afe'de agolo a siga ma ki'bim'bi tanno eede a'a saga nangnga faana miini aaga."

<sup>5</sup> Kikiri ka co. Unggeene afe'de uuru ka teene ana ndanaaya kiidoona amuru ma siiya adagüünü nggeege afe'de.

<sup>6</sup> Unggeene siiya kungngo ana ndanaaya ka iidümmü aduna kadu öccö ka'dingnge ana ko'do alingga katitaalo kene, ikiri ka tiki eene, 'Minna agu aaga aaga ta'dingnge

ana ko'do uuru na in'dili no a'da taalo aaga kalinggo?'

<sup>7</sup> "Kiki iini, 'Taalo ömö'di ma tagümmünü ungngo alingga.'

"İkiri ka tiki eene, 'Aaga unggene aaga co a siga ma ki'bim'bi tanno eede aaga co talingga afe'de.'

<sup>8</sup> "A 'buugu kanda siiya, ikiri ömö'di ma raaga ka tiki ömö'di tiya amanaga kadu co raaga ya, 'Ümmünü kadu na kalinggo ka raaga no nye'de de nanangnga talinggae eene in'dili kungngo, nanangnga a kadu tanno ö'dö keere no ka dhidha no sa anangnga a tanno ö'dö ka dhidha no keere.'

<sup>9</sup> A kadu na öö'dö ana ndanaaya ka iidümmü no, tö'dö ka taama nakajine ka unggodho.

<sup>10</sup> A kadu na kalinggo ka dhidha no tö'dö kiki kide a'da ara eege ta'duga yeene adhabbu, kadaama nakajine ka unggodho.

<sup>11</sup> Kadaama nakajine kassa ka ta'digini ömö'di ma siga.

<sup>12</sup> Keema kiki a'da, 'Kadu na ö'dö keere no kagalinggo ana ndanaaya ka unggodho nassa ka tanangnga ungngo kada köje nja eene amana? Kidi ka tagalinggo uuru na in'dili no ka ndanaaya ka teene.'

<sup>13</sup> "İkiri ömö'di ma siga ka tiki ömö'di töccö ana kene, 'Ka teefe ma a'a taalo a'a nüünü ada o'o ku'bu, taalo a'a nimi'di tumma nja o'o a'da faana ana jine unggodho?'

<sup>14</sup> Duga yüdü nunggeene. Ömö'di ya ö'dö keere ya nasaasa a'a tanangnga iini afa ma o'o kungngo.

<sup>15</sup> Nasaasa a'a tüünü niimö yeede ka asasa ya ana almaala a maraada tammo eede, o'o nana kirimü kudumma eede ka'dila?' "

<sup>16</sup> İkiri Yasu ka tiki, "Kadu na eere no katö'dö ka dhidha a kadu na dhidha no kaganna keere."

*Yasu ageema tumma ma inde tanno iini nja tafiki'dö*

(Murkus 10.32-34; Lüüka 18.31-34)

<sup>17</sup> Aga Yasu ka sirö aco Örsaliim ya, ikiri ka tagümmünü kadalaadene niini unggodho eege na ö'dö kada'baaga kafünü eera no, eema nja eene ka fiin iki,

<sup>18</sup> "Angnga kungngo kasirögö co Örsaliim a 'Bii'bala ma Tadü'dü ara tümmününja a naguugaara ma ka'boge nja katalaana ma seriye, kümmünü i'i ka inde.

<sup>19</sup> Kümmünü i'i a kajeene, küünü midhi ku'bu ana i'i kabbü i'i kassa kabünnü i'i ka salii'bi assa ka fiki'dö a fungngö iidoona."

\* 20:2 20.2 Jine ya miini ya i'i ya ma linggo ma uuru unggodho.

*Nüümö ma Yaguub nja Yühanna  
masaasa nüümö*  
(*Murkus 10.35–45*)

<sup>20</sup> A nüümö ma Yaguub nja Yühanna laala ya Za'bedi tö'dö kini nja laala tiya oono ateera meene, müürü ka Yasu kidha ana kүüge masaasa i'i alinggo ada nüümö ya 'diila ya oono.

<sup>21</sup> İkiri Yasu ka tiki oono, "Nasaasa o'o minna?"

Miki iini, "Nasaasa a'a o'o a'da neema tumma dhorro a'da nanangnga laala yeede ya eera ya katemmi, aya temmi küdü ka nüüsö ma kuri aya temmi küdü ka nüüsö ma kүüle ka tauugaara tanno üüdü."

<sup>22</sup> İkiri Yasu ka tiki, "Taalo aaga kussu nüümö maada ka asaasa ya, ara aaga tam-baanya dhügürü yeede ka tadhügürü ya?"

Kiki iini a'da, "Ara ungngo tambaanya."

<sup>23</sup> Iki eene, "Timin'da ara aaga tam-baanya dhügürü afa a'a, lakiini temmi kede ka nüüsö ma kuri nja nüüsö ma kүüle taalo a'nungngo nara tanangnga aaga, illi kadu na Pupa tiya eede ka tindinaana kene ku'bu no."

<sup>24</sup> Aga kadalaadene na ada'baaga no ka taföönöyö tumma no, kagoroo'bo nja nagöre tanno eera no.

<sup>25</sup> İkiri Yasu ka tagümmünen egee nye'd'de kungno iki eene, "Kussu aaga a'da naguugaara ma kajeene kapusu egee a kadu neene na iifi no tüün dhanu ku'bu ana egee.

<sup>26</sup> Taalo a'a nasaasa tumma afa ma tanno ka tanna ka kadu ka söödö, ömö'di ya tadhabbu ana kada ya, fa kini alinggo ada aaga.

<sup>27</sup> A ömö'di ya asaasa tanna ka kadu kidha ana kada ya, fa kini ada tasaga tiya ada.

<sup>28</sup> Kudumma 'Bii'bala ma Tadü'dü taalo ö'dö a'da a kadu talinggo ada iini, lakiini ö'dö talinggo ada eene üpü eyi yiini co, amang kini toolona kadu dhabbu."

*Yasu oolona kisinsoro keera*  
(*Murkus 10.46–52; Lüüka 18.35–43*)

<sup>29</sup> A kene ka ndungeene ka Ariilha ya a kadu kadhabbu tako'd'o ka Yasu keere.

<sup>30</sup> A kisinsoro kungno ka tinggini ma nafiiñi keera, kaföönöyö a'da Yasu ara tadigaala kita, kikirii ka tiidhe kiki, "Ka Uugaara, 'Bii'bala ya Dawud, ana 'bangnga ma ungngo."

<sup>31</sup> A kadu kadhabbu tagirnaana kene a'da kii'döönö lakiini egee ka kardha ku'bu kiidhe dhindho, "Ka Uugaara, 'Bii'bala ya Dawud, ana 'bangnga ma ungngo."

<sup>32</sup> İkiri Yasu ka töödhü a tümmünen egee iki eene, "Kasaasa aaga a'a a'da nöönyö ana aaga?"

<sup>33</sup> Kiki iini, "Nafa'da ungngo ka iifye, Uugaara."

<sup>34</sup> A 'bangnga meene tümmü Yasu anangnga nüüsö eene ka iifye, karooro ka tasala 'buugu kuurna i'i keere.

## 21

*Yasu inynyo Örsaliim*  
(*Murkus 11.1–11; Lüüka 19.28–38;*  
*Yühanna 12.12–19*)

<sup>1</sup> Kene ka ndakete ka Örsaliim ya kikirii köö'dö ka Beet Faji ka Anya ma 'Dikidiyö, ikiri Yasu ka kürünü kadalaadene niini keera.

<sup>2</sup> Iki eene, "Aaga kolo a nöö'dü tanno ada kidha no aaga taluna kisine mimi'dinja ku'bu nja 'bing kisine aaga tagildhe egee aaga tö'dö ana egee a'a."

<sup>3</sup> Üürü ömö'dü öccö iki aaga a'da nüümö ya, aaga tiki iini a'da Uugaara asaasa egee, assa ka tafada ana egee areere."

<sup>4</sup> Amang ka tumma tanno ne'bi ka takiki no co ööye miini.

<sup>5</sup> "Aaga tirina eema a kadu ma Sahyüün a'da,

Uugaara yüüdü unggunu küdü  
taalo an'dinigi eyi yiini coo'do,  
aka ka 'bing kisine.'

<sup>6</sup> İkiri kadalaadene na eera no ka co kadalingga afa ma tiya Yasu kadirina eene ya kungngo.

<sup>7</sup> Kikiri köö'dö a 'bing kisine kadhifi en'di yeene kide ikiri Yasu ka taka kide.

<sup>8</sup> A kadu töö'dö kadhabbu kakese en'di yeene ka nafiiñi anno tasede iisine ma naafaa kakese ka fiini.

<sup>9</sup> A kadu na unggene ka Yasu kidha no nja tanno ö'dö kini keere no kiidhe kiki a'da,

"Aaga amana tiidhindhü a 'Bii'bala tiya Dawud.

Aaga nangnga ta'diila ömö'dü tiya ö'dö ana eere ma Uugaara ya  
nja tiidhindhü ka fiini ma ndanaaya."

<sup>10</sup> Aga Yasu ka ndö'dö ka Örsaliim anya co kamuli muli nye'd'de kungno a kadu tindini ajeene kiki a'da, "Mada i'i yungno."

<sup>11</sup> A kadu kadhabbu tiki a'da, "Yasu i'i ya miini ne'bi ma Nasira ka Jaliil."

*Yasu asoro kadu na anadene ka la ma  
Masala no*

(*Murkus 11.15–19; Lüüka 19.45–48;*  
*Yühanna 2.13–22*)

<sup>12</sup> A Yasu co ka la ma Masala adagasoro kadu na anadene ana eema ka la ma

Masala no. Apudu naterbeesa na kadu na aregere gürüüsü no nja eema ma temmiimi ma kadu tanno anadene ana alambo no.

<sup>13</sup> İkiri ka tiki eene, "Tumma no ka sorne kiki a'da, 'Dî yeede ama teema nja Masala kide,' aaga kanangnga i'i kada 'tumba ma kanyooro.'

<sup>14</sup> A kadu na kisinsoro no nja kadu tanno sogo'do no tö'dö kini ka la ma Masala oolona eege.

<sup>15</sup> İkiri naguugaara ma ka'boge nja a katalaanma serije kene ka tasala türü na Yasu ka tagalinggo no, nja ndiihde ma laala tiya dhiidhi ya ka la ma Masala kagu'du eege ka oona eene ka tiidhe kiki a'da, "Tidhindhi na 'Bii'bala tiya Dawud."

<sup>16</sup> İkiri ka tiki a Yasu, "Naföönyö o'tumma na laala no?"

I'i yungngo iini ka tiki eene, "İi, taalo aaga kagiiri sorne ka tiki a'da,

'Ndama nanïinö ma laala tiya dhiidhi ya tumma ma tafünögü ko'do kungngo eene ka nanïinö'?"

<sup>17</sup> İkiri ka tinyi eege ku'bu ara ka öö'dö kürö aco anya ma Beet Aniya iifyü kide.

*Yasu aga'da fa ma indiïye  
(Murkus 11.12-14, 20-24)*

<sup>18</sup> Aga Yasu ka ndafada unggunu co anya ligitaka kungngo ya iire tümmü i'i.

<sup>19</sup> Asala fa ma indiïye ka tinggini ma fiinö öö'dö kide asala co, taalo asala nüümö kide illi dhaaru miini. İkiri ka tiki eene, "Taalo o'o nara teene afe'de turi." İkiri indiïye karume ka ööye miini.

<sup>20</sup> Aga kadaladene ka tasala eema ya, kadhere kiki, "Karume indiïye nya areere kungngo?"

<sup>21</sup> İkiri Yasu ka tiki eene, "Ara a'a tadirina tumma aaga dhorro, kada kara tamma aaga tafa ta'doore ka nanggeedi ya taalo aaga kara ka tüünı ana eema yeede ka tagüünı ana fa ma indiïye sugi, lakiini afe'de ara aaga tiki anya tammo, 'Fiki'dö napügü eyi yüdüdü co to,' ara tafigiı nggeege.

<sup>22</sup> Nüümö yaada ka asaasa ya a'da kafara aaga ka Masala a tamma ya, ara aaga taluna."

*Türü kananja a Yasu  
(Murkus 11.27-33; Lüüka 20.1-8)*

<sup>23</sup> İkiri Yasu kico la ma Masala alaana kadu, a naguugaara ma ka'boge nja kadiifi ma anya tö'dö kini kiki iini, "Türü öjö eege kungngo üdüdü ka talingga iini, a mada ya anangnga türlü o'o nalinggo iini?"

<sup>24</sup> İkiri Yasu ka tiki eene, "Ara a'a tindini aaga ma nüümö unggodho, kada kara tadirina a'a ya, ara a'a tiki aaga a'da türü öjö eege kungngo eede ka talingga iini unngno.

<sup>25</sup> Türü na Yühanna ka tambeese iini no öö'dö ndama 'dotombo'do alla ndama kadu?"

Kikiri ka teema unggodho eege kiki, "Kaja kara tiki a'da, 'Ndama 'dotombo'do ya,' ara tiki a'da, 'Aminna agu aaga aaga taalo kamma kini?'

<sup>26</sup> A kaja kara tiki a'da, 'Ndama kadu ya,' kari'ba angnga a kadu kudumma eene 'do ya kümmü Yühanna kada ne'bi.'

<sup>27</sup> Kikiri ka tiki a Yasu, "Taalo unngno kussu."

İkiri ka tiki eene, "A'a tekere taalo a'a nara tadirina aaga a'da türü öjö eege kungngo eede ka talingga iini."

#### *Tafeene ma tumma ma laala eera*

<sup>28</sup> İkiri Yasu ka tiki, "Kussu aaga minna? Ömö'di inggide ana laala eera, adagümmüñü ya dhidha ya iki iini, 'Bii'bala eede, unggene naco talingga ka siga ma ki'bim'bi tanno eede.'

<sup>29</sup> "A 'bii'bala tiki, 'Taalo a'a nasaasa co,' lakiini agere eedi yiini unggene aco.

<sup>30</sup> "Öö'dö ka 'bii'bala tiya eera ya asaasa nüümö yiini ka tasaasa ka 'bii'bala tiya dhidha ya iki, 'Ara a'a co uugaara,' lakiini i'i taalo inynyo.

<sup>31</sup> "Mada i'i yungngo agalinggo a tumma tanno pupa tiya iini unngno?"

Kiki a'da, "Ya dhidha ya."

İkiri ka tiki eene, "Ara a'a tadirina tumma aaga dhorro kadu ma tulu'ba nja katemelö kara tadhe aaga kaco ka tauugaarda ma Masala.

<sup>32</sup> Kudumma Yühanna ya Tatambeese ya öö'dö ada ala aaga ka fiinö tiya dhorro ya, aaga taalo kamma kini, a kadu ma tulu'ba nja kadu tanno temelö no tamma kini, aaga tijöögö aaga taalo kafada ka tatoroko keere aaga tamma kini.

*Kadu ma linggo ma ki'bimb'i  
(Murkus 12.1-12; Lüüka 20.9-19)*

<sup>33</sup> "Aaga toodo ka tafeene ma tumma töccö afe'de, akodho ömö'di naafa ma ki'bim'bi adagasaara ataasa anya ma tiyaana kide atagalinggo 'dasala anangnga tamönggö kide anangnga a kadu ma linggo töccö ara ka tunggeene.

<sup>34</sup> Ka uuru ma tawaana ki'bim'bi koona ka ndö'dö ya, ikiri ka kürünü kadu ma linggo niini kene a'da kaco ta'duga ki'bim'bi.

<sup>35</sup> Kikirii kadu na linggo no ka tümmü eäge katabbü ya, kada kiidi ya, kada tüdirü könö a nüügsi.

<sup>36</sup> İkiri ömö'di ma ki'bim'bi ka kürünü kadu ma linggo niini afe'de kadhabbu a tanno adhidha no kadagüünä ana eäge afa ma tanno dhidha no.

<sup>37</sup> Keere kungngo ya ikiri ka kürünü 'bii'bala yiini kene iki a'da, 'Kara tariba a 'bii'bala tiya eede.'

<sup>38</sup> "Lakiini kadu na linggo no ka tasala 'bii'bala ya, kikirii ka teema ana ka oona unggodho eäge kiki a'da, 'Tandaya ara takarna ea eema ya, i'yungngo kada kiidi i'i, angnga ta'duga eema yiini.'

<sup>39</sup> Kümmü i'i kapükü co kürö ndama raaga ma ki'bim'bi kadagiidi i'i.

<sup>40</sup> "Aga ömö'di ma raaga ma ki'bim'bi kara tö'dö ara tönynyö a kadu tanno?"

<sup>41</sup> Kiki iini, "Ara tagirina oroko ya 'do ara ka anangnga raaga ma ki'bim'bi a kadu töccö no, ara tanangnga ki'bim'bi iini ka uru miini no."

<sup>42</sup> İkiri Yasu ka tiki eene, "Taalo aaga kagüiri tumma ka Sorne ma Masala? 'Misi ma katürböönö kanu kide mo,

oogo mungngo ma misi ma kadesse, ma Uugaara ka tadina mo yungngo a kadu katadhere.'

<sup>43</sup> "Ti yungngo eede ka tiki aaga, ara Masala ta'duga tauugaara noono kada manangnga a kadu tanno ara talingga köö'dö keere a tööyö tammo dhorro mo.

<sup>44</sup> Ömö'di ya a'dingga ka misi tammo ya, atili oona, aya misi ka'dingga kini ko'do ya manyiki'daana i'i ku'bu."

<sup>45</sup> Aga naguugaara ma ka'boge nja na-Fariisi ka ndaföönyö tafeene ma tumma tanno Yasu no, kussu a'da i'i yeema kene ko'do.

<sup>46</sup> Ka asasaata tarefe i'i illi eäge kari'ba a kadu kudumma eene katümmü i'i kada ne'bi.

## 22

*Tafeene ma tumma taanyara ma tarna (Lüüka 14.15-24)*

<sup>1</sup> A Yasu tageema nja kadu a tafeene ma tumma afe'de iki,

<sup>2</sup> "Tauugaara ma 'dotombo'do kafeene nja uugaara agüünä ada taanyara ma tarna a 'bii'bala tiya iini.

<sup>3</sup> İkiri ka kürünü kadu na linggo nja iini no a'da kaco tümmünä kadu a'da köö'dö ka taanyara ma tarna, illi eäge ka'dükü co.

<sup>4</sup> Agürünü kadu könö afe'de a'da kiki a kadu tanno akümmünüdene no, 'Nakindinaana a'a kuri needhe a'a nagodha na ìndhi no, nakindinaana eema ku'bu

nye'd'de kungngo, aaga ö'dö ka taanyara ma tarna.'

<sup>5</sup> Lakiini eäge taalo kindineene, ömö'di ya co a siga tanno iini, aya tunggeene aco tanadene ana eema tiya iini.

<sup>6</sup> A kadu könö tümmü kadu na agürünüdene no katabbü eäge kadakalinggo tatoroko ana eäge kagirina eäge.

<sup>7</sup> I'i yungngo uugaara kagoroo'bo agürünü nasigira niini kateefe tagirina kadu na kiidi kadu no, kinyogo anya meene.

<sup>8</sup> İkiri ka tiki a kadu tanno alingga no, 'Kuri ungngo akindinaana njaana anaku'bu, illi kadu na kümmünüdene no taalo eäge kamiimi.

<sup>9</sup> Agolo a nafiini na falangnga no, aaga tümmünä kadu, ömö'di yaada ka aduna i'i ka nafiini ya aaga tö'dö ana i'i ka tarna.'

<sup>10</sup> Kikirii kadu na linggo no kaco nafiini ka awagaana kadu neene ka tuna eäge no, na na'dila no nja tanno oroko no, a 'buugu ma tarna tadigine a kadu tanno akümmünüdene no.

<sup>11</sup> "Aga uugaara ka co 'büggööri ma co tassa ka kadu tanno kagümmünüdene no ikiri ka tasala ömö'di öccö a'da taalo en'di ma tarna iini ka oona.

<sup>12</sup> İkiri ka tiki iini, 'Nö'dö o'o kita nya teefe ma a'a? En'di ma tarna saga titaalo üdü ka oona?' Ömö'di ya miini ya taki'döönö.

<sup>13</sup> İkiri uugaara ka tiki a kadu tanno alingga no, 'Aaga imi'di i'i ka iisine nja uune aaga tapugü i'i co kürö ka ndüüli afara abbünaana igini ka oona.'

<sup>14</sup> Kudumma a kadu tanno akümmünüdene no kadhabbu, lakiini na agessedene no kidhilli."

*Tamana tulu'ba a uugaara  
(Murkus 12.13-17; Lüüka 20.20-26)*

<sup>15</sup> İkiri naFariisi ka tunggeene kateefe teema ana ka oona ma tümmü Yasu a 'bandumma ndama nüünö tanno iini.

<sup>16</sup> Kikirii ka kürünü kadalaadene neene nja kadu tanno Hirüdüs kiki iini, "Ka Tataalaana, kussu ungngo a'da tumma dhorro eäge kungngo üdü nalaana kadu ka fiinä ma Masala tiya dhorro ya, na o'o taalo nalinggo a tumma tanno ömö'di na o'o taalo nari'ba iïye ma kadu.

<sup>17</sup> Tirina ungngö, niki o'o nya? A'dila aja kara tamana tulu'ba a Kayisar alla taalo a'diila?"

<sup>18</sup> İkiri Yasu ka tussu ünggü meene, ikiri ka tiki eene, "Aaga na 'dinigi oona coo'do no, minna agu aaga aaga tasaasa takinne a'a?

<sup>19</sup> Aaga ala gürüüsü ma tulu'ba a'a,"  
kikirii ka anangnga jine iini.

<sup>20</sup> İkirii ka tiki eene, "Koronggore ya  
mada i'i yungngo a tarigiri tanno?"

<sup>21</sup> Kiki a'da, "Na Kayisar."

İkirii ka tiki eene, "Aaga nangnga nüümö  
ya Kayisar a Kayisar, aya Masala aaga  
tanangnga a Masala."

<sup>22</sup> Kene ka taföönyö tumma no, kadhere  
ka tumma tanno iini. Kikirii ka tunggeene  
kinyi i'i ku'bu.

*Tafiki'i dö ka inde*

(Murkus 12.18-27; Lüüka 20.27-40)

<sup>23</sup> Ka uuru tanno miimi no köö'dö  
Sadügiin eege no iki a'da kitaalo tafiki'i dö  
ka inde kindini i'i.

<sup>24</sup> "Ka Tatalaana, Müüsa iki a'da ömö'di  
kara teyi a'da taalo 'bii'bala kini, örre yiini  
ta'duga aka ma örre tiya iini ya eyi ya,  
amang kini teene ada laala iini.

<sup>25</sup> Kaganna nagöre kide ka iidümmü  
kafünü eera, aya dhidha ya tarna eyi a'da  
taalo laala kini inyi aka ka örre ku'bu.

<sup>26</sup> Eyi afe'de aya iidoona ya teyi afe'de  
nya tiya iidümmü afünü eera ya.

<sup>27</sup> Keere kungngo aka teyi afe'de.

<sup>28</sup> Mara ta aka tammo mada ana kene  
ka uuru ma kadu ka tafiki'i dö ka inde?  
Kudumma oono kada aka tammo eene  
nye'de kungngo."

<sup>29</sup> İkirii Yasu ka tiki eene, "Kaama aaga,  
aaga taalo kussu nüümö ya tumma ka sorne  
nja türü ma Masala.

<sup>30</sup> Taalo kadu karnadene kitaalo karna  
ajeene ka uuru ma tafiki'i dö ka inde, laki-  
ni eege kara tafeene nya kadhangga ka  
'dotombo'do.

<sup>31</sup> A kudumma ma tafiki'i dö ka inde no,  
taalo aaga kagüri tumma na Masala ka tiki  
aga ka sorne?

<sup>32</sup> 'A'a na Masala tammo Abrahiim,  
Masala ma Ishak nya Masala tammo  
Yaguub,' taalo Masala ma kadu tanno  
aaya no lakiini oogo ma Masala ma kadu  
tanno efe ka 'di no.

<sup>33</sup> A kadu taföönyö tumma niini kadhere  
ka talaana tanno iini.

*Tumma na dhorro*

(Murkus 12.28-34; Lüüka 10.25-28)

<sup>34</sup> Aga naFariisi ka taföönyö a'da Yasu  
agii'bi Sadügiin ya kümmüñü ana oona,  
a tumma ta unggodho kene.

<sup>35</sup> İkirii tatalaana ma seriye ka tindini i'i,

<sup>36</sup> "Ka Tatalaana, tumma öjö eege  
kungngo kïdhïndhi ka seriye ma Masala  
ungngo?"

<sup>37</sup> İkirii Yasu ka tiki iini, " 'Asaasa Masala  
Uugaara müüdü ana eedi tiya yüüdü

nye'de nya oona tanno üüdü nye'de nya  
üüdü tiya üüdü."

<sup>38</sup> Tumma na dhidha no na idhïndhi no  
eege kungngo.

<sup>39</sup> A tumma na asigi kide afe'de no  
nggege afe'de, 'Asaasa ömö'di ya akete  
küdü ya afa müüdü ka asaasa eyi yüüdü  
kungngo.'

<sup>40</sup> Tumma na eere no eege kungngo  
kama seriye nya talaana ma nagane'bl.'

*Almasiiji nya Dawud*

(Murkus 12.35-37; Lüüka 20.41-44)

<sup>41</sup> Aga naFariisi ka tümmünü ana oona,  
ikirii Yasu ka tindini eege.

<sup>42</sup> "Kiki aaga a'da Almasiiji aminna? I'i  
ya 'bii'bala tiya mada 'do?"

Kiki iini, "Bii'bala ya Dawud."

<sup>43</sup> İkirii ka tiki eene, "Dawud sa agala  
köö'dö nya ümmünü i'i a'da 'Uugaara'  
eema a türü ma Koronggore?

<sup>44</sup> 'Iki Uugaara Uugaara tiya eede,  
Emmi kede ka nüüsö ma kuri  
ara a'ka anangnga diidi yüüdü küdü  
ka uune ka teene.'

<sup>45</sup> Üürü Dawud ka tümmünü i'i a'da, 'Uu-  
gaara,' assa kara tö'dö nya ada 'bii'bala  
tiya iini?"

<sup>46</sup> A ömö'di ana kene unggodho kungngo  
taalo kara tapadaga tumma iini, ömö'di ma  
tana rüsü ka eedi ma tindini i'i kungngo  
itaalo.

## 23

*Yasu eema tumma ma katalaana ma  
seriye nya naFariisi*

(Murkus 12.38-40; Lüüka 11.37-52;  
20.45-47)

<sup>1</sup> A Yasu tageema nya kadu nya  
kadalaadene tanno iini.

<sup>2</sup> İki, "Kemmi katalaana ma seriye nya a  
naFariisi ka kööyö tiya Müüsa.

<sup>3</sup> Nüümö yeene kara tiki aaga a'da aaga  
talingga ya, aaga linggo, lakiini aaga fa  
talingga afa meene kungngo, kudumma  
eene kadeema kassa taalo kalinggo iini.

<sup>4</sup> Kudumma eene kimi'dinaana eema ka  
tindhi kamana ka kadu ka na'dakeyi, laki-  
ni eege taalo kara ta'dina ko'do a 'banüüsö.

<sup>5</sup> Kalinggo eema amang ka kadu tadinö  
kene kamana na'dugiisine ma en'di tiya  
eene kada kadhonggoro.

<sup>6</sup> Kasaasa temmiimi ka nagööyö ma kadu  
tanno iifi no ka na'buugu ma taanyara  
nya na'buugu tanno kidha no ka naala ma  
talaana,

<sup>7</sup> Kasaasa tööjülu kadu ka namansala,  
amang ka kadu tümmünü eege a'da, 'Tata-  
laana.'

<sup>8</sup> Lakiini aaga ya aaga fa tamma ka kadu kümümüü aaga a'da, 'Tatalaana,' kudumma aaga in'dili kungno aaga ka nagöre a Tatalaana ungno ada unggodho.

<sup>9</sup> Aaga tafa tümmünü ömö'di ka 'büdhülü a'da pupa tiya ada, kudumma Pupa tiya ada unggodho ka 'dotombo'do.

<sup>10</sup> Aaga tafa tamma ka ömö'di ka tümmünü aaga a'da dhabbu, kudumma dhabbu ma aaga unggodho, Almasiihi.

<sup>11</sup> Ömö'di ya dhabbu ana kada ya, i'i yungno ara talinggo ada aaga.

<sup>12</sup> Ömö'di ya 'dinigi eyi yiini coo'do ya ara tapadaga keere, ömö'di ya ümmü eyi yiini ka tiicolo ya ara ta'diniginja ko'do.

<sup>13</sup> "Am'ba kada ya aaga ka katalaana ma seriye no nja naFariisi na 'dinigi nanggeyi naada coo'do no, keere aaga ka inye ma tauugaara ma 'dotombo'do ka kadu kidha aaga, ka eyi tiya ada alla aaga co alla aaga tafa ka kadu tanno asasa co no kaco.

<sup>14</sup> "[Am'ba kada ya aaga ka katalaana ma seriye no nja naFariisi na 'dinigi nanggeyi naada coo'do no, küsüni iiya ma nagüüme kaama eema yeene, kafara ka Masala taffifinni amang ka kadu tiki a'da eege ka'diila, eege no miini no, tapusu adene neene kara tatoroko dhindho.]

<sup>15</sup> "Am'ba kada ya aaga no katalaana ma seriye no nja naFariisi no an'dinigi nanggeyi naada coo'do no, kata'da aaga dhiile nja naato amang kada taluna ömö'di unggodho, a nüümö yaada ka talaana i'i kide ya atanangnga i'i aco ka issi ma Jahanam teera adhabbu atiada.

<sup>16</sup> "Am'ba kada ya aaga no naguugaara kada kisinsoro no, kiki aaga, 'Ömö'di ya aküdöönö ka la ma Masala taalo tafa ka taküdöönö niini dhorro, lakiini ömö'di ya aküdöönö ana dahaba ma la ma Masala ya, afa ka taküdöönö tanno iini.'

<sup>17</sup> Aaga kanagaaga aaga takisinsoro minna i'i yungno idhindhi? Dahaba alla la ma Masala ya amana dahaba ka tinsili ya?

<sup>18</sup> Aaga tiki a'da, 'Ömö'di ya aküdöönö ana eere ma müü ma tirri ya, taalo tafa ka taküdöönö tanno iini dhorro, lakiini ömö'di ya aküdöönö ana nüümö ka müü ma tirri ya, afa ka taküdöönö tanno iini.'

<sup>19</sup> Öjö i'i yungno idhindhi aaga na kisinsoro no? Tirri alla müü ma tirri ma amana nüümö ma tirri ka tinsili mo?

<sup>20</sup> Taalo aaga kussu a'da ömö'di ya aküdöönö ana eere ma müü ma tirri ya afa taküdöönö ana eema tiya inggide ya nye'de?

<sup>21</sup> Ömö'di ya aküdöönö ana eere ma la ma Masala, aküdöönö iini nja Masala tammo anna kide mo.

<sup>22</sup> Ömö'di ya aküdöönö ana eere ma 'dotombo'do ya, aküdöönö ana eere ma 'buugu ma temmi ma Masala nja ömö'di tiya emmi kide ya.

<sup>23</sup> "Am'ba kada ya aaga no katalaana ma seriye nja naFariisi no an'dinigi nanggeyi neene coo'do no, kamana aaga faana ma naana ku'bu, kondho nja mürteega. Lakiini aaga sa kadüün tö'bö a nüümö tiya a'diila ka seriye ya, tadho ka nafiiñi dhorro nja 'bangnga nja tindinaana kadu ku'bu, eema ya miini ya yungno ada kara tagalinggo iini aaga tafa tüürü ma töccö.

<sup>24</sup> Aaga na naguugaara na kisinsoro no, ka'duga aaga aruuge ka 'biidü lakiini aaga ka 'duuru malaga.

<sup>25</sup> "Am'ba kada ya aaga na katalaana ma seriye no nja naFariisi na an'dinigi nanggeyi neene coo'do no, kagunu aaga 'dugeere ma ker'de nja 'dugeere ma dho lakiini teene miini adigine ana eema, ma nyooro nja tallogo.

<sup>26</sup> O'o na taga Fariisi na soro no, aagala teene ma ker'de nja teene ma dho, amang kene tinsili afa 'dugeere miini.

<sup>27</sup> "Am'ba kada ya aaga no katalaana ma seriye no nja naFariisi aaga no an'dinigi nanggeyi naada coo'do no, kafeene aaga nja naala ma oofa ka'diila ndama kürö lakiini ndama teene miini kadigine a ku'buuni ma kadu tanno aaya no kada nyoro katunyä.

<sup>28</sup> Aaga kafiigi nggeege ndama kürö kafeene aaga nja kadu tanno a'diila no lakiini nanggeedi naada ka teene nye'de kungno, tadigine ana eema ma korokoro nja tatoroko.

<sup>29</sup> "Am'ba kada ya aaga no katalaana ma seriye no nja naFariisi aaga no 'dinigi nanggeyi naada coo'do no, karübü aaga naala ma oofa ma nagane'bi aaga tindinaana naala ma oofa ma kadu tanno 'diila no.

<sup>30</sup> Aaga teema aaga tiki a'da, 'Kaja kara taganeene ka naguuru tanno kafaafa ma angnga no, taalo angnga kara tagosso ka tagirina nagane'bi eene.'

<sup>31</sup> Aaga tussu nanggeyi tanno ada a'da aaga ka laala ma kadu tanno agirina nagane'bi no,

<sup>32</sup> Aaga tüümö eema ya toroko ya kafaafa ma aaga ka tagüüni ya.

<sup>33</sup> "Aaga ka nööni aaga ta laala ma nööni ara aaga sa karünö ka tapusu adene ma issi ma Jahanam nya?

<sup>34</sup> I'i yungno eede kara sa kürünü nagane'bi kada nja kadu tanno 'dara no

nja katalaana, aaga tagirina könö aaga tabünnü no ka salii'bi, aaga tabbü könö ka naala ma talaana aaga tasoro euge ka naanya kadara co anya tökömö.

<sup>35</sup> Amang ka eriidö tiya kadu tanno agirinadene na adho ka fiini no ya uurunja ka 'büdhüllü ya, ndama eriidö tiya Habiil tiya a'dila ya nja eriidö tiya Sakariya 'bii'bala ya Barkiya yaada ka tagiidi i'i ka söödö ma la ma Masala nja müsi ma türri.

<sup>36</sup> Ara a'a tadirina tumma aaga, eema ya in'dilli kungngo ara tö'dö ka sere tiya.

*Yasu asaasa Örsaliim  
(Lüüka 13.34–35)*

<sup>37</sup> "Örsaliim, Örsaliim, o'o no kirina nagane'bi na tüdiri kadafünni na Masala ka tagürünü euge kono no taanya nasaasa a'a tawaana laala yüdü ka oona afa koogoro ka tawaana laala yoono ka tüm'bü ma egedhe tiya oono, aaga tanu.

<sup>38</sup> Aaga assa ka 'di tiya ada ungngo ara tinyi kada ku'bu.

<sup>39</sup> Ara a'a tiki aaga, taalo aaga kara tassa kede afe'de illi ada kara tiki, 'Baraka ka ömö'di tiya öö'dö ana eere ma Uugaara ya.'

## 24

*Yasu eema tumma ma taga'dadene ma la ma Masala*

*(Murkus 13.1–2; Lüüka 21.5–6)*

<sup>1</sup> İkiri Yasu ka öö'dö kürö ndama la ma Masala ya, ikiri kadalaadene niimi kalaga i'i ka tarü'böönö ma la ma Masala.

<sup>2</sup> İkiri ka tiki eene, "Kiji aaga eema ya nye'd'e ara a'a tadirina tumma aaga dhorro, taalo müsi ma unggodho kungngo mara türeene ka ma tööje ko'do kara türküdü nye'd'e kungngi."

<sup>3</sup> Aga Yasu ka temmi ka Anya ma 'Dikidiyö ya, a kadalaadene niini tindini i'i ka unggondho kiki iini a'da, "Tirina ungngo 'ba, tumma no kara talinggo adene aada, a nüümö i'i yungngo iidü kara tussu iini a'da ara o'o tö'dö nja titaalo ma 'büdhüllü?"

<sup>4</sup> A Yasu tiki eene, "Aaga adinö ko'do ii'di ömö'di öccö tüpü aaga ka taama.

<sup>5</sup> Ara kadu sa köö'dö kada kadhabbu ana eere tiya eede kiki, 'A'a na Almasiihi, 'iisini kadu kadhabbu.

<sup>6</sup> Ara aaga sa kaföönyö tumma ma kadu kadeema koro'bo, aaga taföönyö tumma ma koro'bo ka teamadene ku'b'ba, lakiini aaga fa tarib'a aaga ta'deedene ka oona, tafiigi miini i'i ya miini lakiini taalo titaalo ma 'büdhüllü euge kamiini.

<sup>7</sup> Ara koro'bo tanna ka anya nja anya tököönö, a tauugaara no teema koro'bo

nja tauugaara töccö, a 'buugu ka oona ta ii're a 'büdhüllü ta'digi'di ajeene ka oona nye'd'e.

<sup>8</sup> Tatta tüm'bü ma tin'di ma teene.

<sup>9</sup> "Ka naguuru tanno miini no ara aaga tümmününja a kadu kapusu aaga kagirina aaga a kadu ma 'büdhüllü nye'd'e tanu kada kudumma eere tiya eede.

<sup>10</sup> Ka uuru tanno miini no, ara kadu kadhabbu ka tapadaga oona keere ka tamma ma Masala kümmünü kadu töccö a kadu töccö kakirimi ajeene unggodho euge ömö'di ya tanu ka tööje.

<sup>11</sup> A nagane'bi na iisini kadu no, tabbü 'dala kadhabbu kaama kadu kadhabbu.

<sup>12</sup> Kudumma tadhabbu ma eema ya toroko ya a tasaasa ajeene tiicolo kadu ka nanggeedi kadhabbu.

<sup>13</sup> Ömö'di ya idhi oona ku'bu ya ara toolonadene.

<sup>14</sup> Ara tumma ma İnjili ma tauugaara teamadene ka 'büdhüllü in'dili amang ka kadu nye'd'e tessu uuru na eere no sa köö'dö keere.

*Taga'dadene na dhorro no  
(Murkus 13.14–23; Lüüka 21.20–24)*

<sup>15</sup> "Kada kara tiji tatoroko ma 'buugu na ne'bi Danial ka tageema a'da kara tö'dö ka 'buugu tiya insili ya, fa ka ömö'di ya iröönö ya ussu.

<sup>16</sup> A kadu na ka Yahüüdiya no tarünö kaco na'dikinya.

<sup>17</sup> Ömö'di ya ka la ko'do ya taalo atö'dö ku'bu ma co tindi eema ka 'bügööri.

<sup>18</sup> A ömö'di ya ka siga ya taalo ara tapadaga oona keere aco 'di ta'duga en'di yiini.

<sup>19</sup> Am'ba kada aaga na iiya na agüroönö no nja tanno indine no ka naguuru tanno miini no.

<sup>20</sup> Aaga fara ka Masala amang kada tafa tarünö feele kungngo nja uuru ma Sa'bidi.

<sup>21</sup> Ara tagoroo'bo tö'dö ka 'buugu katoroko taalo agöö'dö ka 'büdhüllü jiddi ma Masala ka tadina i'i ta'büttingngö taalo agalingga adene a'da taalo talinggo adeneafe'de.

<sup>22</sup> Ka Masala kara tafa tanangnga naganuuru na miini no kadhügüdhuğu ya taalo ömö'di ma ta koolonadene 'do, lakiini kudumma kadu tanno Masala ka tagesse euge no i'i yungngo, oono kanangnga naganuuru no miini no kadhügüdhuğu.

<sup>23</sup> Aga ömö'di töccö kara tiki aaga a'da, 'Almasiihi ungngo kita,' alla, 'Inni kanna,' aaga fa tamma kini kide.

<sup>24</sup> Ara kadu kadhabbu sa köö'dö, kiki a'da euge ka Almasiihi na iisini kadu no nja nagane'bi tanno korokoro no tabbü 'dala kalinggo eema keefe kale'bele eema

kamana i'i ka tidihindhi ma taga'da kadu ka nangguedü iimi, üürü kaluna fiinii miini nja kadu tanno Masala ka tagesse egee no.

<sup>25</sup> Aaga föönyö, nilli a'a ka tirina tumma no aaga 'bitingngöö.

<sup>26</sup> "Üürü ömö'di ka tiki aaga a'da, 'Ti inni ka dhiile kanna,' aaga fa co, üürü kiki a'da, 'Ungno ka 'bügööri kita,' aaga tafa tamma kide.

<sup>27</sup> Kudumma tö'dö tanno 'Bii'bala ma Tadü'dü no, kafeene nja talimaana ma tombo'do na alimaana ndama fiinii ma ndanaaya, öyeene ka niimö ma ndanaaya.

<sup>28</sup> 'Buugu ya niimö ka teyi kide ya ara nagolo tarügü kide.

*Tö'dö ma 'Bii'bala ma Tadü'dü*  
(Murkus 13.24-27; Lüüka 21.25-28)

<sup>29</sup> "Ka tatoroko ma 'buugu ka naganuuru tanno miini no,

'ara ndanaaya talifi

a tere taalo ara töyeene,

a midigi ta'dinggeene ndama 'dotombo'do,

a türü ma 'dotombo'do tatinggii'di.'

<sup>30</sup> "Ka uuru tanno miini no ara koola ma 'Bii'bala ma Tadü'dü tabbü 'dala ka 'dotombo'do a kadu tafara ka naanya ka oona nye'de kungno, a kadu tiji 'Bii'bala ma Tadü'dü ka tunggunu tö'dö ndama tülüügü ka 'dotombo'do a türü a tidihindhi miini.

<sup>31</sup> Assa ka kürünü kadhangga niini a tñiüdö kafara ko'd'do ka na'buugu tanno egüsö no ma tawagaana kadu niini ka tagesse egee no koona ndama 'dotombo'do koona nye'de kungno.

*Talaana ma indiyye*  
(Murkus 13.28-31; Lüüka 21.29-33)

<sup>32</sup> "Aaga 'duga talaana ma indiyye no amang kada tussu iini kada katiji naseldhe miini kandana dhaaru ka kirikiri ya aaga tussu a'da koro ka ndakete.

<sup>33</sup> Kadu kara tiji eema ya nye'de kungno afe'de ya, aaga tikirü ka tussu a'da 'buugu andakete kara tö'dö.

<sup>34</sup> Ara a'a tadirina tumma aaga dhorro, ara eema talinggo adene a'da aleefe sere ya kide.

<sup>35</sup> Ara 'dotombo'do titaalo nja 'büdhüü, lakiini tumma neede taalo kara titaalo.

*Tadinö ko'do*  
(Murkus 13.32-37; Lüüka 17.26-30, 34-

<sup>36</sup>)

<sup>36</sup> "Lakiini uuru no miini no nja ndanaaya tanno miini no taalo ömö'di ma tara tussu unggodho kungno salsa kadhangga ka 'dotombo'do alla 'Bii'bala illi Pupa unggodho i'i.

<sup>37</sup> Afa ma tiya agalinggo adene ka uuru ma Nööök, nggeege afe'de ka uuru ma tö'dö tanno 'Bii'bala ma Tadü'dü.

<sup>38</sup> Ka uuru tanno 'biidü ka tüfürü taga'duga 'büdhüü ya kaguri kadu, kooye karnajeene idhi uuru na Nööök kaco a mürkabü no tö'dö.

<sup>39</sup> Kitaalo kussu tumma no, idhi a 'biidü tö'dö a 'duga kadu nye'de kungno, ara tafiigi nggeege ka uuru ma 'Bii'bala ma Tadü'dü kara tö'dö no.

<sup>40</sup> Ka uuru tanno miini no ara kadu tanna ka siga keera akonadene unggodho, aya türeene.

<sup>41</sup> A iiya tawöönö keera ka 'doonya ma tawöönö ammo tagonadene ammo tüütü.

<sup>42</sup> "Aaga adinö ko'do so, kudumma ada taalo ka tussu uuru ma Uugaara ka tö'dö kide no.

<sup>43</sup> Aaga ussu tumma no, ka ömö'di ma 'di kara tussu a'da ara tanyooro tö'dö aada ya, ara tadinö ko'do, taalo ara tarigide taalo taka fa 'di tiya iini anyoorodene.

<sup>44</sup> Aaga indinaana oona ku'bu dhorro, kudumma 'Bii'bala ma Tadü'dü kara tö'dö ka uuru tanno ada katitalo kündhigü i'i kide no.

*Ömö'di ma linggo ya adho ka füni ya*  
(Lüüka 12.41-48)

<sup>45</sup> "Ömö'di ma linggo öjö i'i yungno odho ta'dara ka ömö'di ma 'di, kanangnga i'i ka amana eema ma kuri a kadu ka uuru miini.

<sup>46</sup> A'diila nja ömö'di ma linggo tiya miini ya, ömö'di tiya iini ka tö'dö aduna i'i ka talinggo kungno.

<sup>47</sup> Ara a'a tadirina tumma aaga dhorro, ara tanangna i'i kafa ka eema tiya iini nye'de kungno.

<sup>48</sup> Uuru ömö'di ma linggo ya miini ya atoroko ka eedi ya, iki ka eyi tiya iini a'da, 'Ara ömö'di ma 'di tadoono ku'bu taalo ara tö'dö areere,'

<sup>49</sup> İkirü ka abbü köje na linggo nja iini no, a kuri oyoe nja kadu tanno nake ka ngeeli no.

<sup>50</sup> İkirü ömö'di ma 'di ka öö'dö ka uuru tanno iini ya, taalo ussu a'da ara tö'dö kide no.

<sup>51</sup> İkirü ka ta'dekeraana i'i ku'bu anangnga i'i ka afeene nja kadu tanno oroko no, afara abbünaana igini ka oona.

## 25

*Tafeene ma tumma ma lömü na ada'baaga no*

<sup>1</sup> "Ka naguuru tanno miini no, tauugaara ma 'dotombo'do kafeene nja lömü na

ada'baaga ka'duga nagalamba kunggeene ma tara co toteene nja tatarna.

<sup>2</sup> A könö ka inggide ka iidümmü kanaaga ka oona, anno iidümmü no ka'dara.

<sup>3</sup> Anno nagaaga no tadhifi nagalamba, illi eege kitaalo kagufu uu'ba miini nja eene.

<sup>4</sup> Anno na 'dara no, ta'duga ügü'de ka tigine ana uu'ba ma nagalamba tanno eene.

<sup>5</sup> A tatarna tadoono ku'bu taalo ö'dö areere a lömü tanyege'de ku'bu karigide eege in'dili.

<sup>6</sup> "Ooso ka teene ya, asa ndhiidhe tafara, 'Assa tatarna tö'dö, aaga ö'dö kürö aaga toteene nja iini.'

<sup>7</sup> "İkiri lömü kafiki'dö nye'd'e ma tindinaana nagalamba neene ku'bu.

<sup>8</sup> İkiri na nagaaga no ka tiki a tanno 'dara no, 'Aaga inyi uu'ba yaada ungngo kudumma nagalamba niidi ka tadhülu ku'bu.'

<sup>9</sup> "İkiri na 'dara no ka tiki eene, 'Taalo ara ta'dimo kaja in'dili lakiimi agolo ka kadu tanno anadene iini no aaga co tana yaada.'

<sup>10</sup> "A kene ka ndunggeene ma tara co tana uu'ba ya, a'da adhe tatarna. A lömü na kindinaana eema yeene ku'bu no kaco 'buugu ma tarna nja iini keere ka inye.

<sup>11</sup> "Amussu kungngó ya asa türeene ma lömü tö'dö afe'de kiki, 'Ka Uugaara, ka Uugaara, fa'da inye ungngo.'

<sup>12</sup> "İkiri ka tiki eene, 'Ara a'a tadirina tumma aaga dhorro a'da, taalo a'a nussu aaga.'

<sup>13</sup> "Nggeege aaga adinii ko'do. Kudumma ada katitaalo kussu uuru nja ndanaaya tanno 'Bii'bala ma Tadü'dü kara tö'dö iini.

*Tafeene ma tumma ma gürüüsü ma linggo*

(Lüüka 19.11-27)

<sup>14</sup> "A tauugaara ma 'dotombo'do kafeene afa ömö'dii asasa tunggeene, assa ka tagümmüni kadu ma linggo niini asümüanaa gürüüsü ma linggo eene ku'bu.

<sup>15</sup> Adakinaana kene ku'bu, tamana ma türü tanno iini, anangnga a tiya eema iidümmü, anangnga a tiya eera, anangnga a tiya unggodho. Assa ka tunggeene.

<sup>16</sup> A ömö'dii ya 'duga eema iidümmü ya, tunggeene ateefe talingga iini, aduna ada kide iidümmü afe'de.

<sup>17</sup> A ömö'dii ya a'duga eera ya, tagalinggo nggeege aduna kide eema eera.

<sup>18</sup> Lakiimi ömö'dii ya a'duga niimö unggodho ya, eefe tasigi'di ööye ka 'büdhülu atü'bü eema ya uugaara tiya iini ya kide.

<sup>19</sup> "Kene ka ndagu'du dhabbu ya, ikiri uugaara ka öö'dö ma ta'duga eema yiini kene.

<sup>20</sup> Ömö'dii ya aga'duga eema iidümmü ya, tö'dö adhifi eema ya agusunja kide iini iidümmü afe'de, iki iini, 'Ka uugaara, naganangnga o'o gürüüsü a'a ma linggo iidümmü, na a'a tagalinggo nagusu kide iidümmü afe'de assa kide.'

<sup>21</sup> "İkiri uugaara yiini ka tiki iini, 'Nagalinggo o'o ka'diila na o'o nadho ka fiini no nagaafa o'o ka ligeema tiya idhilli ya nara tanangnga o'o kafa ka tiya adhabbu ya, aayu kico ka dhodho tanno uugaara tiya yüüdü.'

<sup>22</sup> "A ömö'dii ya aga'duga eema eera ya tö'dö iki, 'Ka uugaara, nakadhifi o'o gürüüsü ma linggo a'a eera naduna kide eera, eede ka tagusu kide afe'de assa kide.'

<sup>23</sup> "İkiri ka tiki iini, 'Nagalinggo o'o ka'diila na o'o nadho ka fiini no nagaafa o'o ka ligeema tiya idhilli ya nara tanangnga o'o kafa ka tiya adhabbu ya, aayu kico ka dhodho tanno uugaara tiya yüüdü.'

<sup>24</sup> "A ömö'dii ya a'duga niimö unggodho ya tö'dö iki, 'Nussu a'a a'da o'o na ömö'dii tiya toroko ya, naraana o'o a'da taalo o'o naleele nawaana eema koona a'da taalo o'o nadiniiği.'

<sup>25</sup> Nari'ba a'a na teefe tatü'bü eema yüüdü ka 'büdhülu assa kide la niimö yüüdü.'

<sup>26</sup> "İkiri uugaara yiini ka tiki iini, 'O'o no toroko nadhunu! Nussu o'o a'da a'a naraana a'da taalo a'a nadiniiği nawaana eema koona a'da taalo a'a naleele?

<sup>27</sup> O'o nama tanangnga gürüüsü yeede ka benki, eede ka töö'dö naluna niimö kide.'

<sup>28</sup> "İkiri ka tiki a kadu ma linggo, 'Aaga 'duga eema ya kini, aaga tanangnga ömö'dii tiya ana eema ada'baaga ya.'

<sup>29</sup> Kudumma ömö'dii tiya ana niimö agusunja kini kide adhabbu, aya niimö ka titaaloo kini ya 'bantiya ungngo kini ya aratugadene.

<sup>30</sup> A ömö'dii ya toroko ya aaga pügü i'i co kürö ka ndüüli aaco afara abbünaana igini ka oona.'

#### *Tahükümü na eere no*

<sup>31</sup> "Ka uuru ma 'Bii'bala ma Tadü'dü kara tö'dö ka tidhindii tanno iini nja kadhangga tanno iini, emmi ka kööyö ma tauugaara tiya iini ya idhindii ya ka 'dotombo'do.

<sup>32</sup> A kadu ka 'büdhülu nye'd'e kungngó tö'dö karügü kini kidha ikiri ka tagedhaana eege ku'bu afa tadasaana ka tagedhaana kidheefele ku'bu nja ki'biini kungngó.

<sup>33</sup> Uuru kidheefelege kini ka nüüsö ma kuri, uru ki'biini kini ka nüüsö ma küüle.

<sup>34</sup> "Ikirii Uugaara ka tiki a kadu tanno iini ka nüüsö ma kuri no, 'Aaga kö'dö aaga na Pupa tiya eede ka anangnga baraka aaga no, aaga takarna ka tauugaara tanno, akin-dinaana kada ku'bu a'da üfürü 'büdhülu tagaru'bü adene.

<sup>35</sup> Kudumma iire ka tagu a'a aaga tinyi eema ma kuri a'a, a tenege tagu a'a aaga tinyi 'büdü a'a, na taga töölöge aaga tagamma kede ka nöö'dü tanno ada.

<sup>36</sup> A en'di titalo kede ka oona aaga tagona en'di a'a, na a'a tagamaara aaga tanaana iïye kede, nadaganna ka pabuusu aaga tö'dö tassa kede.'

<sup>37</sup> "A kadu na adho ka fiin no tindini i'i, 'Ka Uugaara, kaduna ungngo o'o kiga iire kagu o'o, ungngo tinyi kuri o'o nja tenege ka tagu o'o ungngo tinyi 'büdü o'o?

<sup>38</sup> Ungngo taduna o'o kada töölöge kiga ungngo tamma küdü ka nöö'dü tanno iidi, nja en'di ka titalo küdü ka oona ungngo tagona o'o, nagirnii küdü ka oona?

<sup>39</sup> Ungngo taluna o'o ka tamaara kiga, nja üüdü ka tanna ka pabuusu ungngo teeefi tassa küdü?"

<sup>40</sup> "I'i yungngo Uugaara ka tiki eene, 'Ara a'a tadirina tumma aaga dhorro, eema yaada ka küüni a nagöre tanno eede no dhiidhi no, aaga kagiüüni ana a'a.'

<sup>41</sup> "Ikirii ka tiki a kadu tanno iini ka nüüsö ma küüle no, 'Aaga sigi co kannu eede ka oona aaga na aga'dadene no, agolo ka issi ta'billi, na akindininja ka Ebliisi ku'bu nja kadhangga tanno iini.

<sup>42</sup> Kudumma iire ka tagu a'a aaga taalo kinya kuri a'a, a tenege tagu a'a aaga taalo kinya 'büdü a'a.

<sup>43</sup> Na a'a taga töölöge taalo aaga kamma kede ka nöö'dü tanno ada, a en'di titalo eede ka oona taalo aaga kanangnga a'a nagirnii kede ka oona, na a'a tagamaara nadaganna ka pabuusu aaga taalo kanana iïye kede.'

<sup>44</sup> "A kadu na miini no tikirii ka tiki iini, 'Ka Uugaara, kaduna ungngo o'o kiga iire kagu o'o nja tenege, na taga töölöge, en'di titalo küdü ka oona, na o'o tagamaara na o'o taganna ka pabuusu ungngo saga taalo kamünügi o'o ko'do?"

<sup>45</sup> "I'i ara sa katiki eene, 'Ara a'a tadirina tumma ma timin'da aaga, nüümö yaada ka titalo kagiüüni ada a kadu tanno dhiidhi no aaga taalo kagiüüni ada a'a.'

<sup>46</sup> "A kadu na miini no kaco ka tapusu adene ta'billi, ara na 'diila no kaco ka tefe ka 'dii ta'billi."

## 26

*Kadu keemaana ka oona ma tümmü Yasu*

(Murkus 14.1-2; Lüüka 22.1-2; Yühanna 11.45-53)

<sup>1</sup> Aga Yasu ka ndatüümö tumma niini nye'de kungngö ya, ikirii ka tiki a kadalaadene tanno iini,

<sup>2</sup> "Kussu aaga a'da Taanyara ma Tada'da ka Erüüdö ka ndöreeene füngngö eera, 'Bii'bala ma Tadü'dü ara tahükümudene abünnünja ka salii'bi."

<sup>3</sup> A ka uuru tanno miini no kemmi naguugaara ma ka'boge nja kadüüfi ma anya ka 'dii tiya Kiyaafa ya uugaara ma ka'boge ya.

<sup>4</sup> Kada keemaana ka oona ma tümmü Yasu ana ünggü kiidi i'i.

<sup>5</sup> Lakiini eege kiki, "Kada fa talingga tumma no ka Taanyara ma Tada'da ka erüüdö ii'di kadu co ka muli muli."

*Aka muuru kondho ka Yasu ka oona*  
(Murkus 14.3-9; Yihanna 12.1-8)

<sup>6</sup> Aga Yasu ka taganna ka Beet Aniya ya ka 'dii tiya Samaan ya akaana kutukunya ya,

<sup>7</sup> aka tö'dö a sügü'de adigine a kondho tammo agu'daana mo marooro ka tuuru kini ka üüdü a'da agu eema.

<sup>8</sup> Ikirii kadalaadene niini ka tasala linggo no ya, kagoroo'bo kiki, "Minna agu kondho maga'dadene ün'dügüngngö.

<sup>9</sup> Taalo ama aja kara tagatenege iini ka agu'daana a gürüüsi miini tananja kadu tanno eema ka titalo kene no."

<sup>10</sup> Ikirii Yasu ka tussu iki eene, "Minna agu aaga, aaga tanyamanya aka mo ka oona? Oogo magalinggo nüümö ya a'diila ya ana a'a."

<sup>11</sup> Kadu na eema ka titalo kene no kaneene nja aaga turi, lakiini taalo a'a nara taneene nja aaga turi kungngö.

<sup>12</sup> A kono ka 'bunaana kondho kede ka oona ya, oogo mindinaana a'a ku'bu ma tatü'büdene.

<sup>13</sup> Ara a'a tadirina tumma dhorro, ka kadu kara tadünügi tumma ma injüüli co a kadu ka 'buugu koonaa in'dili kadünnü tumma na aka tammo afe'de amang kene tagüügi oogo iini."

*Yahüüsa amma ka tümmünü Yasu a kadu*

(Murkus 14.10-11; Lüüka 22.3-6)

<sup>14</sup> A tatalaadene könö ana kada no ada'baaga kafünü eera no ya ana eere a'da Yahüüsa Askaryüütü unggeene aaco ka naguugaara ma ka'boge.

<sup>15</sup> Iki eene a'da, "Ara aaga tanangnga minna a'a ara a'a ka tümmünü Yasu

aaga?" Kikirī ka anangnga gürüüsü iini ukumu ömö'di aco ii sine.

<sup>16</sup> Ndama uuru tanno miini no, andawwa fiinī ma tara tümmünü i'i eene.

*Yasu agu kuri ma tada'da nja kadalaadene tanno iini*

(*Murkus 14.12-21; Lüüka 22.7-14, 21-23; Yühanna 13.21-30*)

<sup>17</sup> Ka uuru ma Taanyara ma Dheedhifi na dhidha no, ikirī kadalaadene ka öö'dö ka Yasu kiki iini, "Kiga i'i yungno üüdü kasaasa a'da ungngo co tindinaana kuri ma Taanyara ma Tada'da ka Erüidö?"

<sup>18</sup> İkirī ka tiki eene, "Agolo ka ömö'dü kaanya aaga tiki iini, 'Tatalaana, asa uuru neede tö'dö nara co tagu eema ma Taanyara ma Tada'da ka Erüidö ka 'di kita üüdü nja kadalaadene tanno eede.'

<sup>19</sup> İkirī kadalaadene ka tagüüni afa ma tiya Yasu ka tirina eene ya, ikirī ka takindinaana eema ma Taanyara ma Tada'da ka Erüidö ku'bu.

<sup>20</sup> Aga 'buugu kanda siiya ya, ikirī Yasu ka temmi ka tarabeesa ma kuri nja kadalaadene tanno iini na ö'dö kada'baaga kafünü eera no ma tara tagu eema.

<sup>21</sup> A kene ka ndaguri ya, ikirī Yasu ka tiki eene, "Ara a'a tadirina tumma aaga dhorro, ömö'dü öccö ana kada ara tümmünü a'a a kadu."

<sup>22</sup> A kadalaadene tamüürü kindini i'i ka unggonaho kiki, "A'a no miini, Uugaara?"

<sup>23</sup> İkirī ka tapadaga tumma eene iki, "Ömö'dü ya ara tunggu niisö ka dho nja a'a ya, i'i yungno ara tümmünü a'a a kadu.

<sup>24</sup> A 'Bii'bala ma Tadü'dü ara teyi afa ma sorne ka tiki, lakiini am'ba ka ömö'dü tiya ara tümmünü 'Bii'bala ma Tadü'dü a kadu ya. A'diila kini kara tafa tageenedene."

<sup>25</sup> İkirī Yahüusa ya ara tümmünü i'i a kadu ya ka tapadaga tumma iini indini i'i iki iini, "Ka Tatalaana, timin'da taalo a'a na miini?"

İkirī ka tiki iini, "İi, O'o na miini."

*Kuri ma taamu ya Uugaara ya eere ya*  
(*Murkus 14.22-26; Lüüka 22.15-20; 1 Kürünsüs 11.23-25*)

<sup>26</sup> A kene ka ndagu eema ya ikirī ka 'duga miteene anangnga ta'diila a Masala asümüunaana ku'bu anangnga a kadalaadene tanno iini iki, "Aaga la aaga kuri, tuu'da neede eege kamiini."

<sup>27</sup> A'duga ker'de ma negeeli anangnga ta'diila a Masala anangnga eene iki, "Aaga ooye kide aaga in'dili kungngo.

<sup>28</sup> Kudumma erüidö tiya eede i'i yungno, erüidö ma timi'di tumma, ya uurunja co

ka üüdü ma kadu kadhabbu ma toolona tatoroko neene.

<sup>29</sup> Ara a'a tiki aaga, ndama uuru tanno taalo a'a nara tooye ngeeli na edhe no, ara uuru ka öö'dö na a'a sa tooye i'i kada issi nja aaga ka tauugaara tanno Pupa tiya eede."

<sup>30</sup> Kikirī ka tüwe tüüsü kö'dö kürö ka co Anya ma 'Dikidöyö.

*Yasu ussu ara Bütrüs ara ta'düsünü i'i*  
(*Murkus 14.27-31; Lüüka 22.31-34; Yühanna 13.36-38*)

<sup>31</sup> İkirī Yasu ka tiki eene, "Ka ooso tanno ara aaga tinyi a'a ku'bu, kudumma sorne ka tiki,

'Ara a'a tabbü tadasaana  
a kidheefele tarünö kasanjanaja ku'bu.'

<sup>32</sup> Lakiini kede kara tafik'i'dö ka inde ya, ara a'a tadhe aaga naco Jalil."

<sup>33</sup> İkirī Bütrüs ka tiki, "Üürü kadu kinyi o'o ku'bu nye'd'de ya, taalo a'a nara tinyi o'o ku'bu."

<sup>34</sup> İkirī Yasu ka tiki iini, "Tumma eege kungngo eede kara tadirina o'o, ka ooso tanno ara o'o ta'düsünü a'a a tiidoona a'da üfürü dhimbü tafara."

<sup>35</sup> A Bütrüs tiki iini, "Assa kada inde ara a'a teyi nja o'o, taalo a'a nara ta'düsünü o'o." A kadalaadene tatiraana nggeege nye'd'de kungngo.

*Yasu afara ka Masala ka Jetsemaani*  
(*Murkus 14.32-42; Lüüka 22.39-46*)

<sup>36</sup> İkirī ka öö'dö nja kadalaadene tanno iini ka 'buugu inggide ana eere a'da Jetsemaani, ikirī ka tiki eene, "Aaga emmi kita ara a'a ka co tafara ka Masala."

<sup>37</sup> A'duga Bütrüs nja laala tiya Za'bedi keera nja iini, a müürü tümmü i'i kada inde.

<sup>38</sup> İkirī ka tiki eene, "Namüürü a'a 'do afa meede kara teyi kungngo, aaga öödhü kiti aaga adinö ko'do nja a'a."

<sup>39</sup> İkirī ka tasigi keere kene ka oona idhilli kungngo iti dhugudha ku'bu ka 'bëdhü'lü eema nja Masala iki, "Pupa yeede, üürü nasaasa 'duga ker'de ma tad hügürü mo kede, lakiini taalo a'da a nasaasa lakiini ndama eedi tiya üüdü ka asasa kungngo."

<sup>40</sup> Apadaga ka kadalaadene aduna eege ka tarigide, ikirī ka tiki a Bütrüs, "Taalo aaga kambaanya tadinö ko'do nja a'a ana ndanaaya ka unggodho kungngo?"

<sup>41</sup> Aaga adinö ko'do aaga tafara ka Masala, ii'dü aaga ta'b'badene a tatoroko. Koronggore ana türü illi tuu'da ka ki'di."

<sup>42</sup> Afada asigi keere afe'de eema nja Masala iki, "Pupa yeede, üürü taalo o'o

nasaasa ta'duga ker'de ma dhügürü mo kede ka oona illi na a'a tooye, fa kide ada tumma tanno üüdü eege kamiini."

<sup>43</sup> Afada öö'dö aduna eege ka tarigide kudumma tarigide ka talinggo eege dhorro.

<sup>44</sup> İkiri ka tinyi eege ku'bu apadaga ka fara ka Masala asa tiidoona ütü ka teema tumma na unggodho no.

<sup>45</sup> Afada apadaga ka kadalaadene tanno iini iki eene, "Aaga kaleefe tafüngngö aaga tarigide? Aaga assa, uuru ma tahükümü tanno 'Bii'bala ma Tadü'dü miini kara tahükümüdene ananja ka iisine ma kadu tanno oroko no.

<sup>46</sup> Aaga fiki'dö, angnga tunggeene, asa ömö'di ya ara tümmänü a'a a kadu ya andö'dö."

### Tümmönö ma Yasu

(Murkus 14.43-50; Lüüka 22.47-53; Yühanna 18.3-12)

<sup>47</sup> Ka Yasu ka taleefe teema kungngo ya, a'da adhe Yahüüsa tatalaadene ana kadu tanno öö'dö kada'baaga kafünü eera no, nja kadu kungngo iini kadhabbu a magulu'ba na kadhonggoro no a maguufi, a naguugaara ma ka'boge nja kadiifi ma anya ka kürünü eege.

<sup>48</sup> A ömö'di ya ara tümmänü i'i a kadu tiki eene, "Ömö'di yeede kara tööjülü i'i ya i'i ya miini aaga ümmü i'i."

<sup>49</sup> İkiri Yahüüsa ka tasigi ka Yasu kete iki iini, "Tatalaan! Aa nööjülü o'o."

<sup>50</sup> İkiri Yasu ka tiki iini, "Ömö'di eede, alinggo nüümö yüüdü ka öö'dö kide ya," kikiri ka öö'dö kümmü i'i.

<sup>51</sup> İkiri ömö'di könö ana ka kadu tanno Yasu ka afanna kulu'ba ma dhonggoro mo armuna ömö'di ya alinggo ada uugaara ma ka'boge ya ka neeso iini.

<sup>52</sup> İkiri Yasu ka tiki iini, "Padaga kulu'ba müüdü mo dhonggoro mo co 'buugu miini, ömö'di ya tafanna kulu'ba ma dhonggoro mo ya, ara tiididene iini.

<sup>53</sup> Kiki aaga kide a'da taalo nara tamaanya tiki a Pupa tiya eede akinyi a'a ma tagürünigü a nasigira ma kadhangga kadhabbu kada'baaga kafünü eera öö'dö iini a'a?

<sup>54</sup> Ara tumma na ka sorne no co ööye miini nya, iki a'da eema ya 'do ya ara talinggo adene nggeege."

<sup>55</sup> Ka uuru tanno miini no ageema Yasu nya kadu kadhabbu, "A'a na tataga'da 'buugu yungno ada köö'dö a magulu'ba tammo kadhonggoro mo nja maguufi? Nagemmi a'a ka 'booro ma la ma Masala nalaana aaga, aaga taalo kümmü a'a.

<sup>56</sup> Tumma nye'de kungngo no, köö'dö amang ka tumma tanno nagane'bi co ööye

miini." İkiri kadalaadene ka rünö nye'de kinyi i'i ku'bu.

*Yasu ungngo kidha ma naguugaara ma Yahüüdü*

(Murkus 14.53-65; Lüüka 22.54-55, 63-71; Yühanna 18.13-14, 19-24)

<sup>57</sup> A kadu na ümmü Yasu no keefe tunggu i'i co Kiyaafa, ya uugaara ma ka'boge ya, a'da katalaana ma seriye nja kadiifi ma anya kinggide kemmi nja iini.

<sup>58</sup> A Bütrüs tako'd'o do kene keere ndama ku'b'ba kadara co öö'dü tiya uugaara ma ka'boge aco a 'bügööri ka teene emmi nja kadu tanno afa ka 'di tiya Kiyaafa, iiri nüümö ya ara talinggo adene ya.

<sup>59</sup> A naguugaara ma ka'boge nja naguugaara tanno emmi no tagawwa nüümö ma korokoro ma tafünü ka Yasu ka oona amang kene tiidi i'i.

<sup>60</sup> Kitaalo kaduna nüümö a'da köö'dö kadu kadhabbu kataküüfü korokoro illi kadu keera kafiki'dö küfü korokoro kiki,

<sup>61</sup> "Ömö'di ya iki a'da, 'Ara a'a tamaanya türürdü 'di ma Masala nassa ka arü'bü i'i a füngngö iidoona."

<sup>62</sup> İkiri uugaara ma ka'boge ka fiki'dö iki a Yasu, "Taalo o'o na tadiri nüümö 'do? Tumma öjö eege kungngo a kadu tanno kadeema küdü ka oona ungngó?"

<sup>63</sup> A Yasu tak'i'döönö dhore, İkiri uugaara ma ka'boge ka tiki iini, "Aküdöönö ana eere ma Masala tammo adinö mo tirina tumma ungngó üürü o'o na Almasiihi 'Bii'bala ma Masala."

<sup>64</sup> İkiri Yasu ka tiki iini, "İi, o'o niki. Lakiini ara a'a tiki aaga, aaga nye'de kungngo ndama uuru tanno ara aaga sa kiji 'Bii'bala ma Tadü'dü ka temmi ka nüüsö ma kuri ma Masala tammo ana türü mo ka tunggunuaku'bu ka tülüügü ndama 'dotombo'do."

<sup>65</sup> İkiri uugaara ma ka'boge ka tarisina en'di ku'bu iini ka oona iki, "Eela Masala! Kasaasa angnga taföönyö minna afe'de? Ka föönyö aaga teelaana ma Masala niini.

<sup>66</sup> Kiki aaga nya ka tumma tanno?" Kikiri ka tiki iini, "Fa kini eyi."

<sup>67</sup> Karoro ka'binyi alaaga kini ka dhugudha kabbü i'i ka karama.

<sup>68</sup> Kiki iini, "O'o na Almasiihi no, tirina ungngó, mada i'i yungngó abbü o'o?"

*Bütrüs a'düsünü Yasu*

(Murkus 14.66-72; Lüüka 22.56-62;

Yühanna 18.15-18, 25-27)

<sup>69</sup> A Bütrüs ungnö ka 'booro ma 'di, a 'badaada ma linggo mo töö'dö kini kete miki, "Naganeene o'o nja Yasu ya ma Jaliil ya."

<sup>70</sup> Lakiini a'düsünigü ka kadu kidha nye'de kungngo iki, "Taalo a'a nussu nüümö yüüdü ka teema ya."

<sup>71</sup> A Bütrüs tunggeene aco iňye, a'badaada kömö tasala i'i miki a kadu tanno kete kono no, "Ömö'di ya aganeene nja Yasu ya ma Nasira ya."

<sup>72</sup> A Bütrüs ta'düsünig'i afe'de andeera aküdönö iki, "Taalo a'a nussu ömö'di ya."

<sup>73</sup> Amussu kungngo ya, a kadu na 'dïngnge ana ko'do no tö'dö ka Bütrüs kiki iini, "O'o dhorro ya o'o na ma kadu tanno, tumma nüdü kafeene nja tanno eene."

<sup>74</sup> A ndeela 'buugu aküdönö, "Taalo a'a nussu ömö'di ya!" İkiri dhimbä ka tagolo fara.

<sup>75</sup> İkiri Bütrüs ka tagiig'i tumma na Yasu, "A dhimbä ka tüfürü tafara ya ara o'o ta'düsün a'a tiidoona." İkiri ka co aküro afara fara ya dhiri ya.

## 27

*Yasu kidha ma Bilatus*  
(*Murkus 15.1; Lüüka 23.1-2; Yühanna 18.28-32*)

<sup>1</sup> Ligitaka so'd'do kungngo ya, ikiri naguugaara ma ka'boge nja kadüfi ma anya ka teema ana ka oona ma tiidi Yasu.

<sup>2</sup> Kikiri ka timi'di i'i küügü i'i kümmünü uugaara Bilatus.

*Inde na Yahüüsa*  
(*Kadafün 1.18-19*)

<sup>3</sup> Aga Yahüüsa ya agümmünü Yasu a kadu ya ka tasala eege katümmü Yasu ya, a tagussu tümmü i'i, afada ana gürüüsü ya ö'dö ukumu ömö'di aco iisine ya, anangnga a naguugaara ma ka'boge nja kadüfi ma anya.

<sup>4</sup> Iki eene, "Tatoroko neede eede ka tümmünü ömö'di ya insili ka eedi ya aaga."

Kikiri ka tiki iini, "Minna yïidü iirü tussu kide nüdü."

<sup>5</sup> İkiri Yahüüsa ka tadhifi gürüüsü co ma Masala. Ara ka tunggeene ateefe tamir'di eyi yiini.

<sup>6</sup> İkiri naguugaara ma ka'boge ka 'duga gürüüsü kiki a'da, "Eema ma eriidö i'i yungngo taalo ama aja ka'duga angnga tanangnga ka la ma Masala."

<sup>7</sup> Kadimi'di tumma kadaana 'buugu ka ömö'di ya adina nadhafala ya ma tatü'bü kölöge kide.

<sup>8</sup> I'i yungngo a kadu ka tümmünü siga na miini no Lodho ma Eriidö ta'bitingngö.

<sup>9</sup> Amang ka tumma tanno ne'bi Armiya co ööye miini iini ka tiki a'da, "Ka'duga gürüüsü ukumu ömö'di aco iisine, i'i yungngo kadu ma Israyil ka takiki a'da faana miini i'i ya miini,

<sup>10</sup> kadaana siga ma ömö'di tiya adina nadhafala ya afa ma tiya Uugaara ka tiki a'a ya kungngo."

*Bilatus indini Yasu*  
(*Murkus 15.2-5; Lüüka 23.3-5; Yühanna 18.33-38*)

<sup>11</sup> İkiri Yasu ka 'dïngnge ka uugaara kidha, uugaara tindini i'i iki, "O'o na uugaara ma Yahüüdü?"

İkiri Yasu ka tiki iini, "İi, O'o niki."

<sup>12</sup> A naguugaara ma ka'boge nja kadüfi ma anya ta'buna tumma iini ka oona assa kï'döönö taalo adiri nüümö.

<sup>13</sup> İkiri Bilatus ka tiki iini, "Taalo o'o naföönyö eema yeene ka teema küdü ka oona ya?"

<sup>14</sup> A Yasu takü'döönö taalo adirina nüümö iini, idhi uugaara tadhere 'do.

*Yasu ümmününja ka inde*  
(*Murkus 15.6-15; Lüüka 23.13-25; Yühanna 18.39-19.16*)

<sup>15</sup> Katadaada uugaara amanaga ömö'di ma pabuusu kürö unggodho ndama pabuusu ya kadu kasaasa ya ka uuru ma taanyara.

<sup>16</sup> A ömö'di aganna kide ussudene 'do ana eere a'da Barabas.

<sup>17</sup> Ka kadu kandarögü ya ikiri Bilatus ka tiki eene, "Kasaasa aaga a'a a'da nuurugu mada aaga? Barabas alla Yasu ya ana eere a'da Almasiihi ya?"

<sup>18</sup> Kudumma iini ka tussu a'da kirimü i'i yungngo anangga eege katümmü Yasu.

<sup>19</sup> Aga Bilatus ka ndemmi ka köyö ma tauugaara ya, mïkiri aka miini ka kürünü kini miki, "Ömö'di ya a'diila ya i'i yungngo, i'i dö'o'o tüünü nüümö ana i'i, nadhügürü a'a ka uuru tanno 'do ana kümböödö kudumma iini."

<sup>20</sup> Lakiini naguugaara ma ka'boge nja kadüfi ma anya kafünü kadu a'da kasaasa Barabas ka öö'dö kürö kara katiidi Yasu.

<sup>21</sup> İkiri uugaara ka tindini eege iki eene, "Kasaasa aaga a'a a'da nuurugu mada ada kürö?"

Kiki a'da, "Barabas."

<sup>22</sup> A Bilatus tiki eene, "A'a nara tönynyö ana Yasu tiya ana eere a'da Almasiihi ya?"

Kikiri ka tiki eege in'dili kungngo, "Bünnü i'i ka sali'bi!"

<sup>23</sup> Iki eene, "I'i agalinggo minna ya toroko ya?"

Kakogoonaa ma tiidhe ko'd'o, "Bünnü i'i ka sali'bi!"

<sup>24</sup> Ka Bilatus ka tasala tumma no ya, taalo ka tö'dö keere a nüümö ya, adha ara tö'dö a talumuli kadhabbu, indi biüdi agala iisine iini ka kadu kidha iki,

"Nagu'b'ba a'a ka eriïdö ma ömö'di tiya, aaga iiri yaada kara tüüni ya."

<sup>25</sup> İkiri kadu nye'd'de ka tiki, "Eriïdö yiini ungngo üidi ka oona nja laala tiya nidi."

<sup>26</sup> İkiri ka tuurugu Barabas eene kürö ara ka tabbü Yasu assa ka anangnga eene a'da kaco tabünnü i'i ka salii'bi.

### *Nasigira kamidhi Yasu*

(*Murkus 15.16–20; Yühanna 19.2–3*)

<sup>27</sup> İkiri nasigira na uugaara ka a'duga Yasu kaco 'di ma uugaara, a nasigira kakedhe i'i ko'do nye'd'de kungngo.

<sup>28</sup> Kakirnö en'di iini ka oona kara kagirnö ten'di ma öödhe mo kini ka oona.

<sup>29</sup> Ka'duga immi kataküüfü niimö ma tu'daana kini ka üüdü afa uugaara kanangnga tam'bala iini ka niisö ma kuri, kamidhi i'i küürü kini kidha, kiki, "Ungngo kööjüü'l o'o na uugaara ma Yahüüdö no."

<sup>30</sup> Kümmü tam'bala kabbü i'i ka üüdü iini ka binygüni alaaga kini ka oona.

<sup>31</sup> Kene kandagüün i midhi ku'bu ana i'i kikiri ka kirni ten'di kini ka oona ma öödhe mo iini ka oona ka'duga i'i ma taco tabünnü i'i ka salii'bi.

### *Yasu ungngo ka salii'bi*

(*Murkus 15.21–32; Lüüka 23.26–43; Yühanna 19.17–27*)

<sup>32</sup> Kene ka ndöö'dö kürö ndama anya ana i'i, kikiri ka toreene nja ömö'di tiya ana eere a'da Samaan ya ma Keriwan ya, kadagapusu i'i kanangnga i'i katümmü salii'bi ya Yasu.

<sup>33</sup> Kene ka ndala 'buugu ya ana eere a'da Jülijüsä (Dho ma Üdüü).

<sup>34</sup> Kanangnga ngeeli ka tatonggoonyo a kembelö, ikiri ka tagolo aanu ka tooye.

<sup>35</sup> Kabünnü i'i ka salii'bi kafanna muduru kasümünaana en'di yiini kene ku'bu.

<sup>36</sup> Kemmi kanna kafa kini.

<sup>37</sup> Kanangnga niimö kini ka üüdü kakiri tumma, ma tümmü adene niini kide, "YASU YA UUGAARA MA YAHÜÜDÜ YA I'I YUNGNGO."

<sup>38</sup> Kabünnü i'i ku'bu nja kanyoro keera, ya ndama niisö ma kuri aya ndama niisö ma küüle.

<sup>39</sup> A kadu na unggene ka fiin no teela i'i ka'dig'i'di nanggiüüdü kiki,

<sup>40</sup> "Tataga'da la ma Masala arü'böönö a fungngö iidonna, üürü o'o na 'Bii'bala ma Masala ya oolona eyi yüüdü nöö'dö ku'bu ndama salii'bi."

<sup>41</sup> A naguugaara ma ka'boge nja kataana ma seriye nja kadiif'i ma anya kamidhi i'i,

<sup>42</sup> kiki, "I'i ya oolona kadu öccö assa ka titalo ambaanya toolona eyi yiini. Üürü i'i ya Uugaara ma Israyil ya tö'dö ku'bu ndama salii'bi amang kidi tamma kini.

<sup>43</sup> Agümmünü eyi yiini a Masala iki a'da i'i ya 'Bii'bala tiya Masala moolona i'i 'bitingngö üürü oogo mamma kini."

<sup>44</sup> A kanyoro na bünnünja ku'bu nja iini no teela i'i keema nggeege.

### *Inde na Yasu*

(*Murkus 15.33–41; Lüüka 23.44–49; Yühanna 19.28–30*)

<sup>45</sup> A 'buugu ka nduuru ka teene a 'büdhüüli nye'd'de talifi ada ndüüli ndanaaya tidhi ka öö'dö kiidoona amuru ma siiya.

<sup>46</sup> Ka ndanaaya ka ndö'dö kiidoona ya, ikiri Yasu ka tadhiya ko'd'o iki, "Iili, Iili, lima sabaktani?" a'da, "Masala meeđe, Masala meeđe, minna agu o'o ninyi a'a ku'bu?"

<sup>47</sup> A kadu könö na kanna kide no taföönyö kiki a'da, "I'i ümmünü İliya."

<sup>48</sup> A ömö'di könö tarünö areere a'duga sifinja anyo'do ka ngeeli ka tonggoonyo a kembelö ka tam'bala amünögü a Yasu a'da oyoe.

<sup>49</sup> A kadu könö tiki, "Aaga ööđhi angnga takassa kini ara İliya tö'dö toolona i'il"

<sup>50</sup> İkiri Yasu ka tadhiya ko'do dhindho afe'de assa ka teyi.

<sup>51</sup> A ten'di ma la ma Masala töörese ndama üüdü miini alla aco aa'bu, a 'büdhüüli tainggi'di ka oona a niigisi türriüdü kasana njaana ku'bu.

<sup>52</sup> A naala ma oofo tatanfa'da a kadu na insili na kaaya no tafiki'dö kadhabbu a tuu'da tanno eene keefe ka 'di.

<sup>53</sup> Ka Yasu ka fiki'dö ka inde kaco anya tammo insili mo kala oona a kadu kadhabbu.

<sup>54</sup> A uugaara ma nasigira na ö'dö a kadu ka iidümmü no (100) nja kadu tanno iini na afa ka Yasu no ka tasala 'büdhüüli ka tinggi'di nja eema tiya agüüni adene ya nye'd'de ari'ba tümmü eege kiki, "Tumma dhorro ömö'di ya 'Bii'bala ma Masala i'i ya miini."

<sup>55</sup> Iiya kinggide kadhabbu küröönö ndama ku'b'ba eege kungngo kungeene nja Yasu ndama Jalil kalinggo ada iini.

<sup>56</sup> Eege kinggide nja Mariyom Almaj-daliya nja Mariyom niimö ma Yaguub nja Yüüsü, nja niimö tammo laala tiya Za'bedi.

### *Tatü'böönö ma Yasu*

(*Murkus 15.42–47; Lüüka 23.50–56; Yühanna 19.38–42*)

<sup>57</sup> Ömö'di inggide ana almaala dhabbu ana eere a'da Yüüsif, ö'dö ndama Raama

a 'buugu kanda siiya, i'i aga tatalaadene tiya Yasu afe'de.

<sup>58</sup> Innyo ka Bilatus asaasa oofo ya Yasu, ikirī Bilatus ka tiki a kadu a'da kanangnga iini.

<sup>59</sup> İkirī Yüüsif ka 'duga oofo ya Yasu a'bürü i'i ka oona a ten'di tammo insili mo.

<sup>60</sup> Unggu i'i co la ma oofo tiya iini ka taleefe takī'köödene ka 'dakamba agürü dhembeliili ma dhabbu aküdhü ka la ma oofo ara ka tunggeene.

<sup>61</sup> A Mariyom Almajdaliya nja Mariyom tökömö temmi kadinö co la ma oofo.

### Tafa ka la ma oofo

<sup>62</sup> A taka ka ndaadha ya, kindinaana oona ku'bu ma uuru ma Sa'bidi, ikirī naguugaara ma ka'boge nja naFariisi kico ka Bilatus.

<sup>63</sup> Kiki iini, "Ka uugaara, kagüigü ungngo tumma no ta korokoro tiya iini ka takaleefe tadinö iki, 'Ara a'a tafikī'köödene ka inde a füngnö iidoona.'

<sup>64</sup> Nggeege nangnga kadu kafa ka la ma oofo idhi a füngnö töödö iidooна kudumma a kadalaadene tanno iini kara tanggaaga tanyoro i'i, kassa ka tiki a'da i'i afikī'köödene ndama inde a tumma no takogoona ma tatoroko dhindho adagiib'i korokoro ya dhidha ya."

<sup>65</sup> İkirī Bilatus ka tiki eene, "Kadu ma tafa ka 'buugu kungno ada, agolo aaga co tafa kide unggodho aaga."

<sup>66</sup> Kikirī ka co kateefe tafa ka la ma oofo kabünñü hitimi ka dhembeliili kanangnga kadu kafa kide.

## 28

### Tafikī'köödene na Yasu

(Murkus 16.1-8; Lüüka 24.1-12; Yühanna 20.1-10)

<sup>1</sup> Ka uuru ma Sa'bidi kanco a taka taadha so'd'o ma uuru ma Lahada ya, ikirī Mariyom Almajdaliya nja Mariyom tökömö töödö tassa co la ma oofo.

<sup>2</sup> A 'buugu tatünggī'köödene dhindho kudumma tadhingga ma Masala öödö ku'bu agürü dhembeliili ka la ma oofo emmi kide.

<sup>3</sup> Alimaana ka oona afeene nja ten'di tiya a'bassa afa körörö.

<sup>4</sup> Ari'ba tümmü kadu na afa kini no kafeene nja kadu tanno aaya no kene ka tasala i'i.

<sup>5</sup> İkirī tadhingga ka tiki iiya tanno eera no, "Aaga fa tarib'a, nussu a'a a'da aaga kasaasa Yasu ya abünnünja ka salii'b'i ya.

<sup>6</sup> Italo kita kudumma iini ka fikī'köödene miini ka takiki, aaga assa ka 'buugu tiya iini ka taganna kide ya.

<sup>7</sup> Aaga unggeene areere aaga co ka kadalaadene tanno iini aaga tiki eene a'da,

T'i afikī'köödene ndama inde, i'i ara tadhe aaga aco Jaliil ara aaga taluna i'i kannaa,' a'a nungno nadirina aaga 'bitüngnö."

<sup>8</sup> İkirī iiya ka öödö kürö ndama la ma oofo küüsö ari'ba kagu eege, küüsö kadhadho 'do kateefe tadirina eema a kadalaadene tanno iini.

<sup>9</sup> İkirī Yasu ka toreene nja eene iki eene, "A'a nööjöülü aaga," köödö kini kete küürü kini kidha kümmü i'i ka uune.

<sup>10</sup> İkirī Yasu ka tiki eene, "Aaga fa tarib'a agolo tiki a nagöre tanno eede a'da kaco Jaliil kaco toreene nja a'a kide."

### Korokoro ma kadu ma Yahüüdü

<sup>11</sup> Kene ka ndunggeene ya, a kadu na kaafa ka 'buugu no kaco anya kateefe tadirina eema a naguugaara ma ka'boge ma eema tiya agalinggo adene ya nye'd'e kungno.

<sup>12</sup> A naguugaara ma ka'boge nja kadüüfi ma anya tageema ana ka oona, kanangnga gürüüsü a nasigira adhabbu.

<sup>13</sup> Kiki eene a'da, 'Kadüünögü eema a kadu a'da, 'Kadalaadene na Yasu köödö ooso kungno a'da karigide ungngo kada-ganyooro i'i.

<sup>14</sup> Ka uugaara Bilatus kara taföönyö tumma no ya, ara ungngo teema nja iini amma a niimö ya toroko taalo ara töödö kada 'do."

<sup>15</sup> A nasigira ta'duga gürüüsü kadagüünö afa ma tiya kadu ka tiraana ya kungno, a tumma no tanyala ku'bu ka Yahüüdü ta'bütüngnö.

### Yasu adele oona a kadalaadene tanno iini

(Murkus 16.14-18; Lüüka 24.36-49; Yühanna 20.19-23; Kadafüni 1.6-8)

<sup>16</sup> Illi kadalaadene na ada'baaga kafünö unggodho no kunggeene kaco Jaliil ka sörö anya kita a Yasu ka takiki eene ya.

<sup>17</sup> Kene ka tasala i'i ya küürü ku'bu ana küüge kini kidha. Lakiini öccö ana kene a'doree ka nanggeedi miini,

<sup>18</sup> İkirī Yasu ka öödö kene iki eene, "Manangnga Masala tauugaara a'a nye'd'e ndama 'dotombo'do nja 'büdhülü.

<sup>19</sup> Aaga unggeene aaga co talaana kadu ka na 'buugu nye'd'e, aaga tambeese eege ana eere ma Pupa nja 'Bii'bala nja Korongore tiya Insili ya.

<sup>20</sup> Aaga laana eege a'da kalinggo a tumma tanno eede ka tadirina aaga iini no, tumma dhorro a'a nungno naneene nja aaga a naganuuru ta'billi idhi a 'büdhülü titaalo."

## İnjülli Murkus Tafa'da tumma

Murkus arigiri sorne ya. I'i ya aga tatalaadene tiya Yasu ö'dö takinyi linggo a tafiiñi Bölis ka naguuru ma tino tanno iini. I'i aga ana eere a'da Yühanna Murkus. I'i aga senaana tumma na Yahüdüd kadhabbu nya eema ma Masala tiya eene, afeene afa i'i arigiri ada co kadu tanno taalo ka Yahüdüd no.

Murkus arigiri ma eema tiya Yasu ka talinggo ada aaga nja talaana ya. Yasu iki a kadu a'da tauugaara na Masala ka ndö'dö. Türu kungngo iini ma nagoronggore tanno oroko no, i'i olonla kadu na maara no kadhabbu, aji 'badaada ka inde, a'duga tatoroko ka kadu, iki a kadalaadene tanno iini a'da ömö'di ya asaasa tatalaadene tiya iini ya, fa kini amma ka dhügürü eyi. Ka Yasu ka ndeyi afiki'dö afe'de, iki a kadalaadene tanno iini a'da kaco ka na'buugu 'do kadünnü tumma miini co kadu nye'd'e de kungngo.

*Lingga na Yühanna ya Tatambeese ya  
(Matta 3.1-12; Lüüka 3.1-9, 15-17;  
Yühanna 1.19-28)*

<sup>1</sup> İnjülli ma dhidha mo meema tumma Yasu Almasiihi 'Bii'bala ma Masala.

<sup>2</sup> Karigirinja ka sorne ma ne'bi Asaiya, "A'a nungngo na tagürünü tafiiñi yeede küdü kidha,  
aco tindinaana fiñi yüdüdü."

<sup>3</sup> "Kafara takeere ka dhiile,  
'Aaga indinaana fiñi ka Uugaara ku'bu,  
aaga indinaana fiñi yiini ku'bu,  
aaga tanangnga nafiiñi niini ka tadhidho."

<sup>4</sup> Yungngo Yühanna ka öö'dö ka dhiile atagambeese kadu iki eene, "Aaga aadha ka tatoroko aaga tambeesedene amang ka Masala toolona aaga ma'duga tatoroko ada ka oona."

<sup>5</sup> A kadu takicci kini ndama naanya ma Yahüüdiya nja Örsaliim nye'd'e de kungngo, ambeese eege ka Ri ma Ürdün, kamma ka tatoroko tanno eene.

<sup>6</sup> A Yühanna tagümmü en'di ma musa ma nagamalaga ka oona, imi'di eedi ana jönnö ma öttö, aagu müdüünii nja küde ma dhiile.

<sup>7</sup> Adageema tumma iki a'da, "Ömö'di inggide assa öö'dö kede keere ana türlü adagii'bi a'a, mündä meena ma egüide tiya iini taalo a'a natambaanya tüürü ku'bu nangjilaana.

<sup>8</sup> Ara a'a tambeese aaga a 'büüdi, illi i'i a tambeese aaga a Koronggore tiya Insili ya."

*Tambeesedene nja ta'b'badene tanno Yasu*

*(Matta 3.13-17; Lüüka 3.21-22)*

<sup>9</sup> Ka naguuru tanno miini no, agöö'dö Yasu ndama Nasira ma ka Jaliil mo, a Yühanna takambeese i'i ka Ri ma Ürdün.

<sup>10</sup> Aga Yasu ka öö'dö kürö ndama 'büüdi ya, asala 'dotombo'do ka tatafa'da, a Koronggore ya Insili ya tidhi kini ka oona ka afeene nja ndalambo.

<sup>11</sup> A tumma tö'dö ndama 'dotombo'do kiki, "O'o na 'Bii'bala tiya eede ka asaasa i'i ya, namma a'a küdü."

<sup>12</sup> A Koronggore ya Insili ya tarooro ka tüügü i'i aco a dhiile iini.

<sup>13</sup> Adaganna kide a füngögö ukumu kadu keera, Ebliisi ta'b'ba i'i. Anna kide nya eema ma erüüdö tiya oroko ya, a kadhangga tagalinggo ada iini.

*Kadalaadene na akümmünüdene ka dhidha no*

*(Matta 4.12-17; Lüüka 4.14-15)*

<sup>14</sup> Ka Yühanna kananja ka pabuuus ya, a'da öö'dö Yasu ka Jaliil adünnü tumma ma İnjülli.

<sup>15</sup> Iki, "Assa ürüünü tö'dö, a tauugaara na Masala ka ndakete, aaga aadha ka eema tiya toroko ya, aaga tamma ka İnjülli."

<sup>16</sup> Aga Yasu ka tunggeene ka tinggini ma to ma Jaliil ya, ikirü ka tasala kadu keera kakinne kilöögö. Samaan nja örre tiya iini Andraws karara'baga sa'baka co to kudumma eene kada kadu ma tümmü kilöögö.

<sup>17</sup> A Yasu tiki eene, "Aaga öö'dö kede keere ara a'a tanangnga aaga ka kinne kadu."

<sup>18</sup> Kikirü karooro kaafa ka nasa'baka tanno eene kara ka turna i'i keere.

<sup>19</sup> Akalogo tino co aadha, asala Yaguub 'bii'bala ya Za'bedi nja örre tiya iini Yühanna, kungngo ka mürkabü kindanaana nasa'baka neene.

<sup>20</sup> Kini ka tümmüü eege ya, karooro ka tinyi pupa yeene Za'bedi ka mürkabü nja kadu tanno linggo nja iini no, kara katurna i'i keere.

*Yasu asoro koronggore ya toroko ya  
(Lüüka 4.31-37)*

<sup>21</sup> Kikirü ka öö'dö ka Kafarnahööm, aco la ma talaana ka uuru ma Sa'bidi, alaana kadu.

<sup>22</sup> A kadu tadhære ka talaana tanno iini, kudumma iini ka talaana kadu a türlü tanno iini, taalo afeene afa katalaana na kadu ma seriye.

<sup>23</sup> Ömö'di ungngo eene ka la ma talaana a koronggore tiya toroko ya ka tuurunja iini ka oona iidhe,

<sup>24</sup> "Minna yüdü nja ungngo, Yasu ya ma Nasira ya? Nö'dö o'o kita ma tiidi ungngo? Nussu a'a a'da o'o na mada, o'o na ömö'di ma Masala tiya Insili ya."

<sup>25</sup> İkiri Yasu ka kirnaana kini iki, "Ki'döönö, aayu kürö ndama ömö'di tiya ka oona."

<sup>26</sup> A koronggore ya toroko ya tüpü i'i co aadhiya ko'd'do öö'dö kürö ndama iini ka oona.

<sup>27</sup> A kadu tadhere nye'd'e ka tumma tanno iini kiki a'da, "Talaana öjö eege kungno kaleefe tö'dö? Kabbü 'dala a talaana nja türü. Münda nagoronggore na oroko no i'i amana tumma eene kaföönyö."

<sup>28</sup> A tumma na Yasu tadhalu ku'bu areere ka Jaliil ka oona nye'd'e kungno.

*Toolona 'berki ma Bütrüs ka maara  
(Matta 8.14-17; Lüüka 4.38-41)*

<sup>29</sup> Kini ka öö'dö kürö ndama la ma talaana ya, ikiri ka tunggeene nja Yaguub nja Yühanna kaco ka 'dö tiya Samaan nja Andraws.

<sup>30</sup> Kajo kaduna 'berki ma Samaan ka tamaara magu'daana ka oona mafüngngö, kikiri ka tirina iini.

<sup>31</sup> İkiri ka öö'dö kono kete ümmü oogo ka niisö a'dina oogo ko'do, a maara taadha kono ka oona, mafiki'dö malinggo ada eene.

*Toolona ma kadu kadhabbu*

<sup>32</sup> Ka 'buugu kanda siiya, ka ndanaaya ka nda'dingga caa'bu ya, a kadu tö'dö a kadu tanno maara no a Yasu nye'd'e kungno nja tanno kaana nagana'bu ka oona no.

<sup>33</sup> A kadu ma anya nye'd'e tö'dö kadigi ka inye ma 'bügööri dhirri kungno.

<sup>34</sup> A Yasu toolona kadu ma maara kadhabbu adagasoro nagana'bu ka kadu ka oona kadhabbu, afaga nagoronggore na oroko no keere ka teema, kudumma eene ka tussu i'i.

*Yasu afara ka Masala a 'buugu tiya kadu katitaalo kide ya  
(Lüüka 4.42-44)*

<sup>35</sup> A ligitaka so'd'do a'da aleefe 'buugu talüllü, afiki'dö Yasu öö'dö kürö aco a 'buugu tiya kadu katitaalo kide ya, afara ka Masala kide.

<sup>36</sup> A Samaan tagawwa 'buugu miini nja köje.

<sup>37</sup> Kene kandaluna i'i kadhere kiki iini, "Kadu nye'd'e kawwa 'buugu ma o'o."

<sup>38</sup> İkiri Yasu ka tiki eene, "Aaga öö'dö ki-jagö anaanya tanno kete no, naco talaana

kadu miini afe'de, eege kungno eede ka öö'dö kudumma eene."

<sup>39</sup> Adagalööle ka Jaliil koona nye'd'e de alaana kadu ka naala ma talaana asoro nagana'bu ka kadu ka oona.

*Yasu oolona ömö'di ya ana kutukunya ka oona ya*

*(Matta 8.1-4; Lüüka 5.12-16)*

<sup>40</sup> Ömö'di inggide ana kutukunya öö'dö üürü ku'bu iki iini a'da, "Küdü ka tasaasa ara o'o tanangna a'a ka tinsili."

<sup>41</sup> A 'bangnga miini tümümü Yasu, akilina niisö ümmü i'i ka oona iini, iki iini, "Nasaasa a'a a'da o'o tinsili."

<sup>42</sup> A kutukunya tadhe ko'do amanyaga kini ka oona insili.

<sup>43</sup> A Yasu tuuru i'i ka tino a tumma dhorro.

<sup>44</sup> Kini ka tiki iini a'da, "Afa tadirina ömö'di. Lakiini unggeene naco ka ta'boge nala oona iini, na o'o sa ka türri oona nüüdü afa ma tiya Müüsa ka tageema ya a kadu tussu iini."

<sup>45</sup> Lakiini ömö'di afiki'dö adagadünnü eema, a tumma tanyaala ka 'buugu ka oona nye'd'e kungno, a Yasu taalo ussu ka tunggeene ma co na'buugu dhorro, ikiri ka tan'danaga co lodho a kadu tö'dö ndama na'buugu kadhabbu kadigi kini ka oona.

## 2

*Yasu oolona mügüre*

*(Matta 9.1-8; Lüüka 5.17-26)*

<sup>1</sup> A füngö idhilli kungno ya, a Yasu tapadaga co Kafarnahööm, a kadu taföönyö a'da öö'dö ka 'di.

<sup>2</sup> Kikiri kadu ka tagawaana oona kadhabbu kadigi ka 'bügööri tiya iini ka öö'dö kide ya idhi a 'buugu ma tatüküülü ka inye titaalao, ikiri ka talaanaga tumma ma İnjiili co eene.

<sup>3</sup> A kadu könö ka egüsö kö'dö a mügüre iini.

<sup>4</sup> Illi 'buugu meene ka tigaala kide ana i'i kunggu co Yasu, titaalao kudumma kadu ka tadhabbu yungno eene kasirö 'dasala kaparsaana tiisi ku'bu ka 'diniga mügüre ku'bu a sekede.

<sup>5</sup> Ka Yasu ka tassa ka tamma ana eedi tiya eene ya, ikiri ka tiki a mügüre, "Bii'bala eede, noolonaladene o'o ka tatoroko."

<sup>6</sup> Kaganna katalaana ma seriye kide kemmi, kikiri ka teema ka nanggeedi tanno eene,

<sup>7</sup> "Minna agu ömö'di ya eela Masala kungno. Mada ana türü ma tama tatoroko ka kadu ka oona illi Masala ungodho oogo?"

<sup>8</sup> A Yasu tadhe ko'do ussu a koronggore tiya iini a'da eege keema kini ko'do ikiri ka

tindini eege, "Minna agu aaga, aaga teema tumma no kungngo?"

<sup>9</sup> Öjö i'i yungngo ipalapala? Tiki a mügüre a'da, 'Noolonadene o'o ka tatoroko tanno üüdü,' alla niki iini, 'Fiki'dö na'duga sekede yüüdü nunggeene'?

<sup>10</sup> Lakiini ara aaga tussu a'da tauugaara kungngo a 'Bii'bala ma Tadü'dü ka 'büdhü'lü kita ma toolona tatoroko," ikirü ka tiki a mügüre,

<sup>11</sup> "A'a niki o'o, fiki'dö na'duga sekede yüüdü naco 'dii."

<sup>12</sup> A mügüre taroro ka fiki'dö a'duga sekede yiini ka kadu kidha aco kürö. A kadu nye'de de tadhere kanangngä ta'diila a Masala kiki, "Taalo ungngo kadinö ka tumma tanno anooso 'do."

### Tümmüneene na Laawi

(Matta 9.9-13; Lüüka 5.27-32)

<sup>13</sup> A Yasu tafada aco a tinggini ma to afe'de. A kadu tö'dö kini kadhabbu alaana egee.

<sup>14</sup> Kini ka tunggeene ya, ikirü ka tasala Lawi 'bii'bala ya Halfa ka temmi ka 'buugu ma tulu'ba, ikirü ka tiki iini, "Aayu kede keere." A Lawi tafiki'dö aco iini keere.

<sup>15</sup> Ka Yasu ka ndemmi ka 'bügööri tiya Lawi ma tagu eema ya, a kadalaadene temmi nya iini nya kadu ma tulu'ba kadhabbu nya kadu tanno oroko no kagu eema nya iini, kudumma kadu kadhabbu ka kata'da kini keere.

<sup>16</sup> Ka naFariisi no katalaana ma seriye no kadinö ka Yasu ka agu eema nya kadu tanno oroko no nya kadu ma tulu'ba, kikirü ka tiki a kadalaadene tanno iini, "Minna agu i'i agu eema oyoe nya kadu ma tulu'ba nya kadu tanno oroko no?"

<sup>17</sup> A Yasu taföönyö tumma neene no iki eene, "Kadu na taalo kamaara no taalo kasaasa digtöörö, illi kadu na maara no eege ka asaasa digtöörö. Taalo a'a nö'dö tümmünü kadu na 'diila no, a'a nö'dö ka kadu tanno oroko no."

### Tindineene ma tümmü tenege

(Matta 9.14-17; Lüüka 5.33-39)

<sup>18</sup> A 'bitingngö kadalaadene na Yühanna nya naFariisi kümmü tenege. Yungngo a kadu könö köö'dö ka Yasu kiki iini, "Kafaanya kadalaadene na Yühanna nya tanno naFariisi kümmü tenege ara nüüdü kitaalo kümmöönö?"

<sup>19</sup> A Yasu tapadaga tumma eene iki, "Ara kafala ma tatarna, tümmü tenege nya a'da i'i ungngo eene ka söödö? Eege taalo ka tümmü tenege a'da i'i ungngo eene ka söödö.

<sup>20</sup> Lakiini uuru kinggide assa köö'dö a tatarna saga a'dugadene kene ka uuru tanno miini no kassa ka tümmü tenege.

<sup>21</sup> "Taalo ömö'di ara tar'da ten'di ya issi ya ka tiya illi ya, üürü i'i agalinggo nggeege, a ten'di ya issi ya ara töörese ya illi ya, alingga ööye adhabbu.

<sup>22</sup> Ngeeli na aleefe tedhe no taalo kara turunja ka 'belde tammo illi mo, ara ngeeli na edhe no, tadhösö 'belde kuurunja co. Ara ngeeli ma 'bitingngö tananja ka 'belde maleefe ta'diila mo."

### Uugaara ma uuru ma Sa'bidi

(Matta 12.1-8; Lüüka 6.1-5)

<sup>23</sup> Ka uuru ma Sa'bidi kinggide ka Yasu ka tigaala ka nasigeene. Ikirü kadalaadene niimi ka armuna migile eene ka tunggeene.

<sup>24</sup> Ikirü naFariisi ka tindini Yasu, "Assa kide, minna agu kadalaadene nüüdü taalo kama tüünii tumma no ka uuru ma Sa'bidi?"

<sup>25</sup> Yungngo a Yasu ka tapadaga tumma eene iki, "Taalo aaga ka kiiri tumma na Dawud ka iire katümmü i'i nya kadu tanno iini?

<sup>26</sup> I'i inynyo la ma Masala ka ürüünü tiya Abiyatra uugaara ma ka'boge, a'duga kuri ya amanjanja ka linggo ma Masala ku'bu, adaguri inya a kadu tanno iini a'da ömö'di ma tagu kuri ya miini ya taalo, illi ka'boge ungodho eege."

<sup>27</sup> A Yasu tüütü ka tiki eene, "Uuru ma Sa'bidi agalinggo nya a kadu, taalo Masala madina ada kadu ka uuru ma Sa'bidi.

<sup>28</sup> A 'Bii'bala ma Tadü'dü i'i ya Uugaara ma Sa'bidi afe'de."

## 3

### Toolonadene ka uuru ma Sa'bidi

(Matta 12.9-14; Lüüka 6.6-11)

<sup>1</sup> A Yasu tapadaga co la ma talaana, aduna ömö'di kide eyi ka nüüsö.

<sup>2</sup> A kadu könö tadinaana i'i ko'do miini ka tanangngä i'i ka a'diila ka nüüsö ka uuru ma Sa'bidi, amang kene tümmü i'i.

<sup>3</sup> Ikirü ka tiki ömö'di tiya eyi ka nüüsö ya, "Fiki'dö ka kadu kidha."

<sup>4</sup> Ikirü ka tiki a kadu tanno emmi no, "Ata'diila aja kadalinggo nüümö ya a'diila ya ka uuru ma Sa'bidi? Nalinggo nüümö ya a'diila ya alla nüümö ya toroko ya, noolona ömö'di alla niidi i'i?" Kaki'döönö.

<sup>5</sup> Ikirü Yasu ka tassa kene ko'do, agoroo'bo ümmü eedi kini kiji nanggeedi neene ka takidhö, ikirü ka tiki ömö'di, "Kilinana nüüsö." Ikirü ka tapadaga co ööye miini ka'diila afa tööje.

<sup>6</sup> Kikirü naFariisi ka öö'dö kürö nya kadu tanno Hirüdüs kimi'di tumma ma tiidi Yasu.

*Kadu kadhabbu kata'da ka Yasu keere*

7 Yasu unggeene aco to nja kadaladene tanno iini, a kadu ma Yahüüdiya tata'da kini keere kadhabbu.

8 Anno tö'dö ndama Yahüüdiya nja Örsaliim nja Adümiya nja kadu tanno afaga co 'dakeyi ma Ürdün no, nja kadu ma Suur nja Saiyda. Eege no nye'de kungngō kaföönyö tumma ma eema tiya iini ka tagalinggo ya kikirri köö'dö.

9 İkiri ka tiki a kadaladene tanno iini a'da kindinaana 'bamürkabü kini ku'bu, kudumma kadu ka tadigi kini ka oona.

10 Kudumma iini ka toolona kadu kadhabbu, idhi a kadu na maara no tagürünögü kadu keere ma tawwa naflinii ma taa'ba i'i ka oona.

11 Ka nagoronggore tanno oroko no kadasala i'i ya, ka'dünggö kini kidha kiidhe, "O'o na 'Bii'bala ma Masala."

12 Lakiini i'i ageema nja eene dhorro a'da kafa teema tumma no iini.

*Tessedene na kadaflinii no ada'baaga kafünü eera no*

(Matta 10.1-4; Lüüka 6.12-16)

13 A Yasu tasirügö co 'dikinya, adagümmünü kadu niini ka asaasa eege no. Kikirri ka öö'dö kini.

14 Agesse kadaflinii ana kene kada'baaga kafünü eera ma tunggeene nja iini agürünü eege ka talaana kadu,

15 anangnga türü eene meene ka tasoro nagoronggore na oroko no ka kadu ka oona.

16 Kadu na ada'baaga kafünü eera no niini ka tagümmünü eege no, Samaan (anangnga eere a Samaan a'da Bütrüs),

17 Yaguub 'bii'bala ya Za'bedi, nja örre tiya iini Yühanna anangnga eere eene a'da Bwanerjis (Laala ma tombo'do tanno abaana no),

18 nja Andraws nja Filibüs nja Bartülmaws, nja Matta nja Tööma, nja Yaguub 'bii'bala ya Halfa, nja Tatawus nja Samaan ya tatagu'daana ka eedi ya.

19 Nja Yahüüsa Askaryüütä ya agümmünü Yasu a kadu ya.

*Yasu nja Balsabül*

(Matta 12.22-32; Lüüka 11.14-23; 12.10)

20 A Yasu tö'dö ka 'dö, a kadu tafada ka tagawagaana oona dhabbu, a Yasu nja kadaladene tanno iini taalo kaduna flinii ma tagu eema.

21 İkiri kadu niini ka föönyö köö'dö ta'duga i'i kudumma a kadu töccö kadeema a'da, "I'i taalo a'diila ka üüdü."

22 Illi katalaana ma seriye na öö'dö ku'bu ndama Örsaliim no kiki a'da, "Balsabül ungngō iini ka oona uugaara ma naEbliisi

i'i yungngō iini ka tasoro naEbliisi ka kadu ka oona iini."

23 İkiri Yasu ka tagümmünü eege adünögü a tafeene ma tumma eene iki, "Ara Ebliisi tasoro Ebliisi nya?

24 Üürü tauugaara ka tasümününjaana ku'bu keera, taalo ka tana türü afe'de.

25 Üürü 'dö ka tasümününjaana ku'bu taalo a ta'düngnige ana türü.

26 Üürü Ebliisi ka tüüni tatoroko ana eyi tiya iini unggodho i'i, taalo atefe ka 'dö ara taama.

27 Taalo ömö'dö aco a 'bügüöri tiya ömö'dü tiya ana türü ya anyooro eema yiini, illi kini kimi'dina ömö'dü ya ana türü ya ku'bu tikinggi assa ka tanyooro 'dö yiini.

28 "Ara a'a tadirina tumma aaga dhorro, kadu na linggo eema ya toroko ya, keela Masala ara Masala ta'duga tumma na miini no kene ka oona.

29 Illi ömö'dü ya eela Koronggore ya Insili ya, taalo Masala ma tagala tatoroko kini ka oona ta'billi, ara tüütü kini ka oona ta'billi."

30 I'i iki nggeege kudumma eene katiki a'da "Koronggore ya toroko ya ungngō iini ka oona."

*Nüümö ma Yasu nja nagöre tanno iini*  
(Matta 12.46-50; Lüüka 8.19-21)

31 A nüümö mini tö'dö nja nagöre tanno iini köödhü kürö, kassa ka kürünü kini a'da öö'dö tamma eene.

32 A'da kadu kemmi kadhabbu kikirri ka tiki iini, "Nüümö müüdü nja nagöre tanno üüdü kungngō kürö kasaasa o'o."

33 İkiri ka tiki eene, "Mada yungngō a nüümö tammo eede a kamada eege kungngō ka nagöre tanno eede?"

34 İkiri ka tassa ka kadu tanno rüü kini ka oona no iki, "Nüümö meeide oogo mungngō nja nagöre tanno eede.

35 Kudumma ömö'dü tiya linggo tumma na Masala ya i'i ya örre tiya eede nja inye tammo eede nja nüümö tammo eede."

## 4

*Tafeene ma tumma ma taleele*  
(Matta 13.1-9; Lüüka 8.4-8)

1 A Yasu tagalaana kadu ka tinggini ma to. A kadu tarügö kini ka oona kadhabbu 'dö ikiri ka taka ka mürkabü ka to emmi kide a'da kadu nye'de kungngō kürö ka tinggini mo to.

2 Adagalaana eege ka eema dhabbu a tafeene ma tumma, ikiri ka tiki eene ka talaana tanno iini,

3 "Aaga föönyö! Taleele inggide unggene aco a siga tadinüügi.

4 Kini ka tiniigü ya, a migile ökömö ta'dünggö ka tinggini ma flinii, uyi tö'dö eeraga.

<sup>5</sup> A migile kömö tasuli ka 'dokon'da a kuraaga ka titaaloo kadhabbu kide, mafü'döönö areere kudumma a kuraaga miini taalo kinyno aa'bu.

<sup>6</sup> Aga ndanaaya ka öö'dö ko'do matinyogo, kudumma areere katitaalo kide marume.

<sup>7</sup> A kömö ta'dingga ka immi ka teene, ikiri immi katasere mamar'i oogo mitaaloo mana iifye.

<sup>8</sup> A kömö ta'dingga ka tüm'bööri tanno a'diila no, mikiiri ka fü'döönö masere, möö'dö ana iifye kukumu ömö'di aco iisine, ammo tö'dö a kadu kiidoona, ammo tö'dö a kadu küdümmü.

<sup>9</sup> A Yasu tiki, "Ömö'di ya ana iisine ma taföönyö eema ya, fa kini aföönyö."

<sup>10</sup> A kini ka ndagedhe oona unggodho i'ya, ikiri kadaladene na ada'baaga kafünü eera no nja kadu tököön kungno iini kete kindini i'i ma tafeene ma tumma tanno kiki nya.

<sup>11</sup> Ikiri ka tiki eene, "Nanangnga tauu-gaara ma Masala na tunggündhü no aaga, illi kadu na kürö no ka taföönyö eema nye'd'e a tafeene ma tumma.

<sup>12</sup> Salla 'ka adinö kide kassa taalo kijöögö salla kaföönyö kassa ka taalo kara tussu, amang kene taadha ka tatoroko a Masala tolouna kene."

*Tasaana tafeene ma tumma ma taleele (Matta 13.18-23; Lüüka 8.11-15)*

<sup>13</sup> Ikiri ka tiki a kadaladene tanno iini, "Taalo aaga kussu tafeene ma tumma tanno? Aaga sa katussu tafeene ma tumma töccö nya?

<sup>14</sup> A taleele tadini tumma na Masala.

<sup>15</sup> A kadu könö kafeene nja migile tammo a'dingga ka 'dakeyi ma fiini mo, kaföönyö tumma na Masala ikiri Ebliisi ka tareere aco tamuru tumma neene ka nanggeedi no.

<sup>16</sup> Kadu öccö kafeene nja migile tammo 'dingga ka kuraaga tanno ka 'dokon'da no, kaföönyö tumma na Masala karooro ka tamma kide a dhoodho.

<sup>17</sup> A tumma no taalo kinyno kene ka eedi kita asigüri kita, kitaalo kidhi oona ku'bu. Ikiri niimö ya toroko ya ka tö'dö kene ka eyi kaadha ka tumma ma İnjili areere.

<sup>18</sup> A kadu könö kafeene nja migile tammo afiki'dö ka immi ka teene mo, kaföönyö tumma na Masala.

<sup>19</sup> Lakiini tadinigöögö ma eema ma 'büdhüllü nja tiisineene ma eema dhabbu nja tasaasa ma eema kafiri kene ka nanggeedi kamir'di tumma na Masala ki-taalo kö'dö keere a niimö.

<sup>20</sup> A kadu öccö kafeene nja migile tammo fiki'dö ka tüm'bööri tanno a'diila no, kaföönyö tumma na Masala kamma kide köö'dö ana iifye kukumu ömö'di kaco iisine (30), ammo tö'dö ukumu kadu kiidoona (60), ammo tö'dö iini ukumu kadu ka iidümmü (100)."

*Lamba ka 'daasa (Lüüka 8.16-18)*

<sup>21</sup> Ikiri Yasu ka tiki eene, "Ara ömö'di tö'dö a lamba ma tiji 'buugu iini aküdü hua dhafala nja iini kanangnga ka tenggere ka tüm'bü? Taalo a ta'dala oogo ka 'daasa sa?

<sup>22</sup> Niimö ya tadünggündhü ya atabbü 'dala, a niimö ya ka kume ya a tadiridene.

<sup>23</sup> Ömö'di ya ana iisine ma taföönyö eema ya fa kini aföönyö."

<sup>24</sup> A Yasu tiki eene, "Aaga adinö ko'do ma eema tiya ada ka föönyö ya, almiti maada ka mana eema a kadu iini mo, ara eema tamananja aaga iini agusu könö ada kide afe'de.

<sup>25</sup> Kudumma ömö'di tiya niimö ka tanna iini ya, könö tagusunja iini kide dhabbu, aya niimö ka titalo kini ya, ara ta'dugadene kini münda ya niimö ka titalo kini ya."

*Tafeene ma tumma ma töönyö ma Siga*

<sup>26</sup> Ikiri ka tiki afe'de, "Kafeene tauugaara na Masala nja ömö'di tiya adinö migile ka tüm'bööri ya.

<sup>27</sup> Arigide ooso kungno afiki'dö uuru kungno, ara migile ka fü'döönö minggirdene a'da taalo ussu a'da ma inggiridene nya.

<sup>28</sup> 'Büdhüllü ka eyi tiya iini ünfü'dü ooyo ka dhidha, assa tunggu koforo kürö, a koforo saga ndö'dö a migile dhabbu.

<sup>29</sup> Aga migile ka nda'diila ya, ikiri ömö'di ka 'duga kulu'ba miini, kudumma uuru ma taraana ka ndö'dö."

*Tafeene ma tumma ma iifye ma tanuure (Matta 13.31-32; Lüüka 13.18-19)*

<sup>30</sup> Iki afe'de, "Kafaanya tauugaara na Masala, alla ara angnga tiki a tafeene ma tumma nya kide?

<sup>31</sup> Kafeene nja iifye ma tanuure no dhi-idhi no yüdü ka tiniigi ka 'büdhüllü no

<sup>32</sup> Kini ka tiniidene asere adhonggoro ooyo ka siga a naseldhe tiifi, uyi tafü nafü kide kanna ka tallappa miini."

<sup>33</sup> A Yasu tageema a tafeene ma tumma kafeene, ma talaana kadu ka tumma ma İnjilli dhabbu amang kene tussu ka ümmöönö ka nanggeedi.

<sup>34</sup> I'i taalo eema nja eene illi a tafeene ma tumma. Lakiini iini ka tagedhe oona

nja kadalaadene tanno iini, alaala eege ka eema in'dili.

*Yasu anangnga tanya ka töödhī  
(Matta 8.23-27; Lüüka 8.22-25)*

<sup>35</sup> Ka uuru tanno miini no siiya kungngó, iki a kadalaadene tanno iini, "Aaga ö'dö angnga caago nda'da tinni."

<sup>36</sup> Kikirí ka tunggeene kinyi kadu ku'bu kaka ka mürkabü tammo Yasu ka taganna kide mo, kunggeene nja iini, a'da namürkabü könö kaganna kide kadhabbu.

<sup>37</sup> A tanya tagiisö dhindho, a 'büdi tabbü mürkabü midhi makete kadigine.

<sup>38</sup> A Yasu tarigide keere ma mürkabü akaraga üüdü ko'do a mahada, kikirí kadalaadene kiji i'i ka fungngö kiki iini, "Ka tatalaana, taalo o'o nanaana üye müüdi ka ta'duuru 'büdi?"

<sup>39</sup> Afiki'dö agirnaana ka tanya iki, "Öödhi! Ki'döönö!" A tanya töödhī a 'buugu ta mudhudhuli 'do.

<sup>40</sup> A Yasu tiki a kadalaadene tanno iini, "Minna agu aaga, aaga tariba? Küfürü tumma ma İnjjilli co ada ka nanggeedi?"

<sup>41</sup> Lakiini eege kari'ba dhorro, keema unggodho eege kiki, "Mada i'i yungngó sii? Idhi atanya nja to taföönyö tumma niimi!"

## 5

*Yasu oolona ömö'di ma nagana'bu  
(Matta 8.28-34; Lüüka 8.26-39)*

<sup>1</sup> Kaala nda'da ma to ma Jaliil, ndama 'dakeyi ma Jarasiin.

<sup>2</sup> Aga Yasu ka ta'barda ndama mürkabü ya, koreene nja ömö'di ö'dö ndama naala ma oofo ana koronggore tiya toroko ya.

<sup>3</sup> Anna ka naala ma oofo, ömö'di ma tamaanya timi'di i'i sulla ana jansiiri titaalo.

<sup>4</sup> I'i agamin'dadene ka niisö nja awwa ana jansiiri, lakiini i'i a'buna jansiiri aparsaana ku'bu, a'buna ndaliili niini ka uune no. Taalo ömö'di ma tana türü ma timi'di i'i.

<sup>5</sup> Anna ka naala ma oofo nja na'dikinya ooso kungngó nja uuru, iidhe aara oona niini a nüügsi.

<sup>6</sup> Kini ka taasala Yasu ka tadhe ku'b'ba kanna ya, areere aco üürü ku'bu ana küüge kini kidha.

<sup>7</sup> Iidhe ko'do eema iki, "Minna üüdü nja a'a Yasu 'Bii'bala ma Masala tammo ko'do mo? A'a nagüdünü o'o ka Masala a'da nafa tapusu a'a."

<sup>8</sup> Kudumma Yasu ka tiki iini, "Koronggore ya toroko ya, aayu kürö ka ömö'di tiya ka oona."

<sup>9</sup> İkiri Yasu ka tindini i'i, "Eere yüüdü a'da mada?"

Iki, "A'a nana eere a'da Nasigira, kudumma iidü kadadhabbu."

<sup>10</sup> Adageema nja Yasu dhabbu asasa i'i a'da afa tasoro ana eege co kürö ndama 'buugu tiya.

<sup>11</sup> A nagüdürü kungngó kadhabbu kaguri ka anya ka tümbü.

<sup>12</sup> Kikirí nagoronggore na oroko no ka tiki iini, "Uurugu ungngó ka nagüdürü ungngó co ta'düngö kene ka oona."

<sup>13</sup> İkiri ka tamma kene kide, ikiri nagoronggore na oroko no köö'dö kürö kuurunja ka nagüdürü ka oona na ö'dö na alif keera no. İkiri nagüdürü karünö ndama nsorondho kafiri co to ka'duuru 'büdi.

<sup>14</sup> A katasaana tarünö, a tumma tanyala ka anya nja na'buugu ka oona nye'd'de, a kadu tö'dö kürö ma co tassa ka nüümö tiya agüünü adene ya.

<sup>15</sup> Kene kaala 'buugu ya Yasu ka tanna kide ya, kaduna ömö'di ya agaana nagana'bu ka oona ka dhabbu ya, ka temmi ana en'di ka oona ka'diila ka üüdü, ari'ba tümmü eege.

<sup>16</sup> A kadu na tünö kini no tadirina eema ya kalinggo adene ya, ma nagana'bu nja nagüdürü.

<sup>17</sup> Kikirí ka teema nja Yasu kasaasa i'i ka tunggeene ka anya tammo eene.

<sup>18</sup> Kini ka ndaka ka mürkabü ma tunggeene ya, ömö'di ya kaana nagana'bu ka oona ya, tiki iini a'da a'duga i'i nja iini.

<sup>19</sup> A Yasu taalo amma ka tunggeene nja iini, lakiini i'i ya iki iini, "Pataga co 'di tiya üüdü nja kadu tanno üüdü nadirina eema ya Uugaara ka tagalinggo ana o'o ya co eene, Uugaara ana 'bangngä ma o'o nya."

<sup>20</sup> Ömö'di tikiri ka tunggeene adagöölele ka Naanya tanno ö'dö kada'baaga no adünnü eema ya Yasu ka tagüüni ana i'i dhabbu, a kadu tadhere nye'd'de kungngó.

*'Badaada ma eyi mo nja aka tammo maara mo*

*(Matta 9.18-26; Lüüka 8.40-56)*

<sup>21</sup> Ka Yasu ka tada'da mürkabü afe'de ata'daga co nda'da ma to tököönö, a kadu tarüügi kini ka oona ka tinggini ma to kadhabbu.

<sup>22</sup> Ömö'di inggide ö'dö, a uugaara ma la ma talaana ana eere a'da Yayiros. Kini ka taasala Yasu ya üürü ku'bu ana küüge.

<sup>23</sup> Adageema tumma nja iini dhabbu iki iini, "Badaada meede madhilli mo ma maara manda kete ka teyi! Ma aayu nanangngä iisine nüüdü kono ka oona amang kono toolonadene ma efe ka 'dö."

<sup>24</sup> İkiri ka tunggeene nja iini a kadu tuurna i'i keere kadhabbu kitü ajeene.

<sup>25</sup> Aka minggide eriidö ka tiisö kono mandagu'du nagürünü kada'baaga kafünü eera.

<sup>26</sup> A nagadektöörö kadhabbu kamana dawwa oono, madhifi eema yoono ka 'd'i nye'd'de massa ka tüü kungngó taalo ma'diila, magala ka takogoona ma tasigi co.

<sup>27</sup> Kono ka taföönyö tumma na Yasu ya maco ka kadu ka teene maa'ba ten'di ka Yasu ka oona ndama eere.

<sup>28</sup> Kudumma oono ka tiki ka eyi tiya oono a'da, "Kede ka taa'ba ten'di miini ka oona ara a'a toolonadene."

<sup>29</sup> Eriidö tarooro karumeene, mussu a tuu'da tanno oono a'da moolonadene ka eriidö.

<sup>30</sup> A Yasu tarooro ka tussu a'da türü kö'dö kürö kini ka oona, afele ka kadu ka teene iki a'da, "Mada i'i yungngó ümmü ten'di meede?"

<sup>31</sup> A kadalaadene niini tiki iini, "Nussu o'o a'da kitaana kadu o'o ka oona, na o'o saga tindineene niki a'da, 'Mada ümmü ten'di meede?'

<sup>32</sup> Lakiini i'i afele keere iiri ömö'di ya kalinggo tumma no ya.

<sup>33</sup> Ari'ba tümmü aka ma'deedene ka oona kudumma oono ka tussu niimö ya agalinggo adene ana oogo ya, möö'dö müürü kini kidha madirina eema ma timin'da iini nye'd'de.

<sup>34</sup> A Yasu tiki oono, "Badaada eede, tamma nüüdü ka Masala no ka oolona o'o, unggeene a ta'diila, eema ya agu o'o ya taalo a tagu o'o afe'de."

<sup>35</sup> Ka Yasu kadeema kungngó ya a'da kö'dö kadu ndama 'd'i tiya uugaara ma la ma talaana ana eere a'da Yayörös kiki, "Meyi 'badaada müüdü fa ta'dig'i'di talaana ka oona."

<sup>36</sup> A Yasu tanangnga iifye a tumma tanno eene iki uugaara ma la ma talaana, "Fa tariba amma ka Masala."

<sup>37</sup> Taalo asaasa ömö'di ka tunggeene nja iini illi Bütrüs nja Yaguub nja Yühanna ya örre tiya Yaguub ya.

<sup>38</sup> Kene ka ndala 'd'i ya uugaara ma la ma talaana ya, a Yasu tasala kadu kiidhe kabbü tageere kafara.

<sup>39</sup> İkiri ka co iki eene, "Minna agu aaga, aaga tafara aaga tiidhe? Taalo 'badaada meyi oogo marigide!"

<sup>40</sup> Kikiri ka takiji i'i. İkiri ka tuurugu eege kürö in'dili kungngó, ara kico ka 'badaada ka la nja pupa tiya oono nja niimö nja kadalaadene tanno kaneene nja iini no.

<sup>41</sup> Ümmü oogo ka niisö iki oono, "Talisa kom!" I'i ya tiki a'da, "Badaada ma idhilli mo a'a niki o'o nafiki'dö!"

<sup>42</sup> Mikiri ka arooro ka fiki'dö ma ungunaana ku'bu, nagürünü noono kö'dö kada'baaga kafünü eera a kadu tarooro katadhere 'do.

<sup>43</sup> A Yasu tageema nja eene dhabbu a'da kafa teema tumma ma eema tiya a küünidene ya, anangngä kadu kanangngä eema oono ma kuri.

## 6

*Kadu ma Nasira kanu ka Yasu  
(Mattä 13,53–58; Lüüka 4,16–30)*

<sup>1</sup> İkiri Yasu ka ö'dö kürö ndama kannac acoanya tammo iini a kadalaadene niini turna i'i keere.

<sup>2</sup> Aco la ma talaana ka uuru ma Sa'bidi alaana kadu, a kadu tadhere kadhabbu kene ka tattoodo kini kiki, "Aluna tumma no kiga? Atindiri eema tanno ananja iini a türü tanno iini ka talinggo keefe no?

<sup>3</sup> Ka'da bii'bala ya Mariyom ya asa kee'di ya i'i ya miini? Taalo örre ya Yaguub nja Yüüsi nja Yahüüsa nja Samaan sa? Ka'da naginje niini kungngó aja kita?" Kassa ka midhi i'i.

<sup>4</sup> İkiri Yasu ka tiki eene, "Taalo kadu kanu ka ne'bi illi kadu ma anya tammo iini, nja siliga tiya iini nja kadu ma öö'di tiya iini."

<sup>5</sup> A Yasu taalo ambaanya talinggo eema ma türü kannac, illi kadu na maara no kidhilli iini ka tümmünü iisine kene ka nanggüüdü ka'diila.

<sup>6</sup> A Yasu tadhere a kadu ka titaalo kümmü Masala ana eedi. İkiri ka tunggeene ka na'buugu alaana kadu.

*Yasu agürünü kadalaadene niini  
(Mattä 10,1, 5–15; Lüüka 9,1–6)*

<sup>7</sup> İkiri ka adagümmünü kadalaadene nö'dö kada'baaga kafünü eera no, agürünü eege kerra kerra a'da kaco talaana kadu, anangngä türü eene ma tasoro nagoronggore na oroko no.

<sup>8</sup> Iki eene, "Aaga fa tagufu niimö ma nafiin'i 'do, illi kuufi, aaga fa ta'duga kuri nja njoko, aaga tafa tümmü gürüüsü ka nagjeee.

<sup>9</sup> Aaga tagirnë egüide kada kuune, aaga tafa tagirnë en'di kada ka oona eera."

<sup>10</sup> İkiri ka tiki eene, "D'i yaada kajo ya aaga tanna kide illi ka uuru maada ka tunggeene ka anya tammo iini mo.

<sup>11</sup> Kita ada kara co kita, a kadu miini taalo kamma kada, kitaalo kaföönyö tumma naada, aaga inyi eege ku'bu aaga tafidhi ndhünggürü kada kuune amang kene tessu iini."

<sup>12</sup> Köleele kadünögü tumma a kadu a'da kaadha ka linggo ma eema tiya toroko ya.

<sup>13</sup> Kasoro nagana'bu ka kadu ka oona, kamana uu'ba ka kadu tanno maara no kadhabbu koolonadene.

*Inde na Yühanna ya Tatambeese ya  
(Matta 14.1-12; Lüüka 9.7-9)*

<sup>14</sup> Uugaara Hirüdüs taföönyö tumma ma Yasu kudumma eere tiya iini ka tüdhindhi. A kadu öccö tiki a'da, "Afiki'dö Yühanna ka inde, i'i yungngo iini ka talinggo eema ma türü."

<sup>15</sup> A kadu öccö tiki, "İliya i'i ya miimi." Anno tiki, "Ne'bi könö ana ka nagane'bi ma 'billi."

<sup>16</sup> Ka Hirüdüs ka taföönyö ya iki a'da, "Yühanna yeede ka armuna i'i ka üüdü ya i'i yungngo, afiki'dö ka inde!"

<sup>17</sup> Kudumma Hirüdüs ka tanangnga kadu ka tümmü Yühanna kadimi'di i'i anangnga i'i ka pabuusu, kudumma Herüdiya aka ma örre tiya iini Filibüs miini ka tarna oogo mo.

<sup>18</sup> Kudumma Yühanna ka tageema nja Hirüdüs iki iini, "Taalo a'diila nggeege küdü ka 'duga aka ma örre tiya üüdü."

<sup>19</sup> Kudumma Herüdiya tagoroo'bo nja iini, masaasa tiidi i'i masa ka titaalao maduna fiin'i miini.

<sup>20</sup> Kudumma Hirüdüs aga ari'ba a Yühanna afa kini, ussu a'da i'i ya ömö'di a'diila insili. Ka Hirüdüs ka tatoodo ka Yühanna ya, adhere 'do, lakiini asaasa tatoodo kini.

<sup>21</sup> Keere kungno ya, uuru ma taanyaara ma tageenedene tanno Hirüdüs ka ndö'dö. İkiri Hirüdüs ka tagümmünü kadu niini na iifi no, na linggo nja iini no, nja naguugaara ma nasigira nja naguugaara ma naanya ma Jaliil ka taanyaara.

<sup>22</sup> Mikiri 'badaada ma Herüdiya kico ma tasiili, oona ta'diila ka Hirüdüs nja kafala tanno iini ka tagümmünü eege no, ikiri Uugaara Hirüdüs ka tiki a 'badaada, "Arangngä nüümö yüüdü ka asaasa ya, ara a'a tanangnga o'o."

<sup>23</sup> Eema tumma nja oono dhorro aküdöönö iki oono, "Ara a'a tanangnga nüümö yüüdü ka asaasa ya o'o, üürü 'dakeyi ma tauugaara tanno eede."

<sup>24</sup> A 'badaada tikiri ka afiri co kürö ma teepe tindini nüümö moono, "Ara a'a tasaasa minna?"

A nüümö moono tiki oono, "Üüdü ma Yühanna tiya Tatambeese ya!"

<sup>25</sup> Mikiri ka tareere maco ka uugaara miki iini, "Nasaasa o'o nanangnga üüdü ma Yühanna tiya Tatambeese ya a'a, ka dho 'bitingngö."

<sup>26</sup> Oona tangooro ka uugaara 'do, illi i'i taalo asaasa ta'dükü oono, kudumma iini ka taküdöönö dhorro kidha ka kafala

tanno iini ka tagümmünü eege no, illi i'i taalo asaasa ta'dükü oono.

<sup>27</sup> İkiri ka tareere agürünü tasigira iki iini a'da aco ö'dö ana üüdü tiya Yühanna. İkiri ka co ka pabuusu ka teene armuna i'i ka üüdü,

<sup>28</sup> öö'dö iini ka dho. Anangnga a 'badaada mateefe tunggu co nüümö tammo ono.

<sup>29</sup> A tumma tala kadalaadene na Yühanna, kikiri ka öö'dö ka'duga oofo yiini kateefe tattü'böönö ka la ma oofo.

*Yasu amana kuri a kadu kö'dö na alif  
ka üdümmü*

*(Matta 14.13-21; Lüüka 9.10-17;  
Yühanna 6.1-14)*

<sup>30</sup> A kadafüni na Yasu tarügü kini ka oona, kadirina eema yeene ka tagalinggo nja talaana.

<sup>31</sup> A kadu takunggunaana ku'bu kaleele kene ka oona kitaalo kaduna fiin'i meene kagu eema, ikiri Yasu ka tiki eene, "Aaga ö'dö unggodho aaga ka 'buugu tiya mudhudhuli ya aaga tagünü idhilli."

<sup>32</sup> Kunggeene a mürkabü unggodho eege kaco 'buugu tiya kadu katitaalo kide ya.

<sup>33</sup> A kadu tasala eege katunggeene, a kadu könö kadhabbu kussu kita eene ka tunggunu co, kunggeene ndama naanya tanno eene ana uune kadhe eene kaco kita eene kara co ya.

<sup>34</sup> Aga Yasu ka öö'dö kürö ndama mürkabü ya, asala kadu kadhabbu a muuyu meene tagu i'i, kudumma eene kafeene afa kidhefele na tadasaana kati-taaloo kene no, ikiri ka talaana eege ka eema dhabbu.

<sup>35</sup> A 'buugu tefe co a kadalaadene tiki, "Asa 'buugu tefe co, a 'buugu ya a'döngngönyö taalo nüümö kide."

<sup>36</sup> Iki a kadu kunggeene kaco nasigene tanno kete no nja nadaara kaco tana eema kide kaguri."

<sup>37</sup> A Yasu tiki eene, "Aaga inya eema eene kaguri." Kikiri ka tiki iini, "Nasaasa o'o ungngö a'da ungngö co tana eema ma taguri ana nakajine kukumu kadu kada'baaga (200), ungngö tanangnga eene kaguri?"

<sup>38</sup> İkiri Yasu ka tiki, "Miteene mungngö ada maanya? Agolo tüörönö." Kene kandussu a'da maanya miteene, kiki iini, "Miteene müdümmü a kilögöök keera."

<sup>39</sup> İkiri ka anangnga eege kamana kadu katemmi ka'dügüllü ka ooyo tiya kirikiri ya.

<sup>40</sup> Kikiri ka temmi ka'dügüllü kukumu kadu ka üdümmü (100), anno ukumu kadu keera kaco iisine (50).

<sup>41</sup> İkiri Yasu ka 'duga miteene müdümmü mo nja kilögöök tanno eera

no assala co 'dotombo'do anangnga ta'diila a Masala, a'düsünaana miteene ku'bu. Anangnga a kadalaadene tanno iini kasümünaana ka kadu ku'bu kasümünaana kilöögö na eera no kene ku'bu nye'de kungngo.

<sup>42</sup> Kadaguri eege in'dili kungngo küüsü.

<sup>43</sup> A kadalaadene tareena türeene ma miteene koona nja türeene ma kilöögö tanno eera no, kadigi nasinggili kada'baaga kafünü eera.

<sup>44</sup> A kadu na nagiide no na agu kuri no, kö'dö na alif kiidümmü.

### *Yasu unggene ka 'büdü*

(Matta 14.22-23; Yühanna 6.15-21)

<sup>45</sup> İkiri Yasu ka rooro ka tiki a kadalaadene tanno iini a'da kaka ka mürkabü kunggunu kini kidha kaco Beet Sayida ka nda'da ma to ara ka tuuru kadu ka tino.

<sup>46</sup> Kini ka tuuru eege ka tino ya, ikiri ka sıro anya aaco tafara ka Masala.

<sup>47</sup> Maganna mürkabü ka to ka söödö siyya kungngo a'da Yasu ungnego ka nda'da ma to unggodho i'i.

<sup>48</sup> A Yasu tiji kadalaadene niini kadhügürü kagürünü mürkabü ko'do a tanya ka talinggo eege, ikiri ka tadhe kene ka oona a na'bu ma taka unggene ana uune ka to, anda kete kene.

<sup>49</sup> Kene kiji i'i ka tunggeene ka to kiki kide a'da na'bu ya miini kiidhe ko'do,

<sup>50</sup> kudumma eene ka tasala i'i ari'ba tümmü eege. İkiri ka tareere iki eene, "Aaga idhi oona ku'bu, aaga fa tarib'a! A'a na miini."

<sup>51</sup> İkiri ka sıro aco kene ka mürkabü, ikiri tanya ka töödhü, kadhere 'do.

<sup>52</sup> Kuri ma miteene nja kilöögö, taalo innyño eene ka nanggüdü, kudumma eene taalo kussu eema, epe kö'dö eene ka oona.

### *Yasu oolona kadu ka maara kadhabbu*

(Matta 14.34-36)

<sup>53</sup> Kada'da to kaco nda'da ma Genisaret kimi'dina mürkabü meene kide.

<sup>54</sup> Kene ka nda'barda ndama mürkabü ya, a kadu tarooro ka tussu Yasu.

<sup>55</sup> Kada kunggeene ka na'buugu nye'de de kama kadu na maara no ka akede kuurna i'i keere ka 'buugu tiya eene ka föönyö a'da inggide ya.

<sup>56</sup> 'Buugu yiini kara co ya a kadu tuurna i'i keere ka nadaara nja nasigeene nja naanya 'do, kamana kadu na maara no ka namansala. Kiki iini a'da kara tafa kene a'da kümmü tinggini ma ten'di tammo miini, a kadu na ümmü i'i ka oona no nye'de de ta'diila.

*Tinsili nja Nyoro*  
(Matta 15.1-20)

<sup>1</sup> A naFariisi nja katalaana ma seriye na ö'dö ndama Örsaliim no, karügü ka Yasu ka oona.

<sup>2</sup> Kikiri ka tasala kadalaadene niini könö kagu eema ana iisine kada "nyoro," a'da taalo ka tanggala.

<sup>3</sup> (Kudumma naFariisi nja Yahüüdü 'do, kümmü eema ya kadaada meene ya ma 'billi ya, taalo ka tagu eema illi kagala iisine neene ta'diila.

<sup>4</sup> A kene ka tafada ndama mansala ya, taalo ka taguri illi kene ka tagala. Eema ma kadaada inggide adhabbu eene ka talinggo iini, afa tagonaana ma naadho nja nasoro nja eema ma tanyaanya.)

<sup>5</sup> İkiri naFariisi nja katalaana ma seriye kadindini Yasu, "Minna agu kadalaadene nüüdü taalo kümmü tumma na kadaada ma angnga no ma 'billi no kara kagu eema ana iisine kada nyoro?"

<sup>6</sup> İkiri ka tiki eene, "Aaga na 'dinigi oona coo'do no. Tumma na ne'bi Asaiya ka tageema no kö'dö timin'da,

"Kadu na kündhigü a'a ko'do ana nüönö, lakiini nanggeedi neene kagu'b'ba kede.

<sup>7</sup> Kümmü tumma ma a'a a korokoro, lakiini talaana neene köö'dö iini no na kadu."

<sup>8</sup> Taalo aaga kümmü tumma ma Masala dhorro, ara aaga katümmü talaana ma tadü'dü."

<sup>9</sup> İkiri ka tiki eene, "Kümmü aaga fiinü ya a'diila ya maada kanu ka tumma tanno Masala ara aaga katümmü fiinü yaada ya ma 'billi ya.

<sup>10</sup> Iki Müüsa a'da, 'Aföönyö tumma na pupa tiya üüdü nja nüömö tammo üüdü,' ana 'Ömö'di ya eela pupa yiini nja nüömö tammo iini ya, a tiididene.'

<sup>11</sup> Kudumma ada ka tiki a'da, üürü ömö'di ya ana eema amana a pupa tiya iini nja nüömö tammo iini, assa ka tiki eene a'da türri eege kamiini, nja eede ka tagalinggo ada Masala.

<sup>12</sup> Aaga fa tafa kini amana eema a pupa tiya iini nja nüömö tammo iini.

<sup>13</sup> Aaga tagere tumma na Masala, a tumma tanno ada aaga takarna kide ana eema könö adhabbu ada kadalinggo."

*Eema ya amana ömö'di ka tanyoro ya*  
(Matta 15.10-20)

<sup>14</sup> İkiri Yasu ka tagümmüñü kadu nye'de iki eene, "Aaga toodo kede aaga nye'de aaga taföönyö.

<sup>15</sup> Taalo nüümö ya ömö'di ka tunggu kini ka eedi ndama kürö ata 'nyoro' i'i, lakiini nüümö ya tö'dö kürö ndama ömö'di ka eedi ya i'i yungngo 'a tanyoro' i'i.

<sup>16</sup> [Ömö'di ya ana iisine ma taföönyö eema ya atoodo kide!]

<sup>17</sup> Kini ka tinyi kadu ku'bu ara kico 'di, a kadalaadene niini tindini i'i ma tafeene ma tumma tanno kiki nya.

<sup>18</sup> İkiri ka tiki eene, "Aaga taalo kussu tumma no afe'de, taalo aaga kussu a'da nüümö ya ömö'di ka tunggu kini ka eedi ndama kürö ya taalo a tanangnga i'i ka tanyoro?

<sup>19</sup> Kudumma iini taalo innyyo kini ka eedi, lakiini i'i innyyo kini ka eedi, öö'dö kürö ndama tuu'da tanno iini." (Ka tumma tanno, a Yasu tiki a'da, kuri nye'd'e insili.)

<sup>20</sup> Afada iki eene, "Nüümö ya tö'dö kürö ndama ömö'di ka eedi ya, i'i yungngo a tanangnga i'i ka tanyoro.

<sup>21</sup> Tumma na toroko no kicci kürö ndama kadu ka nanggeedi ka teene, taga'da 'buugu, füngngö nja iiya a nyoro, nyoro, tagirina kadu, temelö,

<sup>22</sup> tallogo, taga'da 'buugu, nja korokoro nja tar'dana eema nja kirim'i nja ker'de ker'de nja tan'dinigi oona coo'do nja taa'baga.

<sup>23</sup> Eema ya toroko ya nye'd'e ya icci akürö ndama ömö'di ka eedi i'i yungngo amana i'i ka 'tanyoro.'

### Tamma na aka ma Kanaan (Matta 15.21-28)

<sup>24</sup> A Yasu tunggeene ndama kanna aco a riifö ma Suur ya, aco a 'bügööri, kudumma iini taalo asaasa kadu ka tussu tumma iini kide, a taküdhü niini tideene küdhü kö'dö.

<sup>25</sup> Aka minggide eema ma 'buugu ka tuurunja ka 'badaada tammo oono ka oona, kono ka taföönyö a'da Yasu ungngo kanna mikkiri ka tareere maco müürü kini kidha ana küüge.

<sup>26</sup> Miki iini a'da aco tuurugu nagana'bu kürö ka 'badaada tammo oono ka oona, aka miini mo taalo madaga Yahüdü, ma taga Süüriya ma Finikiya.

<sup>27</sup> A Yasu tiki oono, "Fa ka laala küüsü tikinggi, taalo ama ta'duga kuri ya laala nangnga a tiini."

<sup>28</sup> Aka tiki, "İi Uugaara, a tiini ka eyi tiya eene ya kera kuri ya susuli ka laala ka noodho ya."

<sup>29</sup> İkiri ka tiki oono, "Kolo kudumma tumma tanno üüdü ka tiraana no, kö'dö na'bu kürö ka 'badaada tammo üüdü ka oona."

<sup>30</sup> Aka tapadaga co 'dii tiya oono maco taluna 'badaada moono ka tenggere, a

koronggore tiya toroko ya köö'dö kürö oono ka oona.

*Toolona möri nja ömö'di tiya taalo ussu ka teema ya*

<sup>31</sup> A Yasu tunggeene ka anya ma Suur, adigaala aco Saiyda apadaga co to ma Jaliil, akilaana ka Naanya tanno ö'dö kada'baaga no.

<sup>32</sup> A kadu könö tö'dö a möri iini taalo ussu ka teema, kadageema nja Yasu a'da anangnga nüüsö iini ka oona.

<sup>33</sup> A Yasu ta'duga i'i asigi co ku'b'ba iini ka kadu ka oona. Anangnga lakiisine iini ka iisine a'binyyi alaaga ku'bu aa'ba i'i ka onggo'do.

<sup>34</sup> Assa co 'dotombo'do, eela tanya iki ömö'di, "Afaata!" a'da, "Atanfa'da!"

<sup>35</sup> A iisine niini tarooro ka tatanfa'da, onggo'do miini tatinggildhe, aana tumma ka'dilia.

<sup>36</sup> A Yasu tageema nja eene a'da kafa tadırına a kadu 'do, eema nja eene illi eege kutü kadeema iini 'do.

<sup>37</sup> A kadu tadhere 'do kiki, "I'i agalinggo eema in'dili ka'dilia anangnga nakünggiri kaföönyö eema a nagaaga teema."

## 8

*Yasu anangnga kuri a kadu na alif ka egüösö*

(Matta 15.32-39)

<sup>1</sup> A kadu könö tagawaana oona ka naguuru tanno miini no kadhappu a nüümö meene kaguri titalo, ikiri Yasu ka tagümmünü kadalaadene niini iki eene,

<sup>2</sup> "Magu muuyu ma kadu tanno a'a eene kataneene nja a'a a füngngö iidoona a'da taalo eema ma taguri kene.

<sup>3</sup> Kede ka tuuru eege ka tino ana iire, kara tagi'di ka naifiinü, kudumma kadu töccö kö'dö ndama 'buugu tiya ku'b'ba ya."

<sup>4</sup> Lakiini kadalaadene niini tiki iini, "Ara angnga taluna kuri kiga ka dhüile kita, angnga tanangnga a kadu küüsü kide?"

<sup>5</sup> İkiri ka tindini eege, "Miteene munngö ada maanya?" Kiki iini a'da, "Müidümmü mafünü eera."

<sup>6</sup> İkiri Yasu ka tiki a kadu a'da kemmi ka 'büdhü'lü, ara ka'duga miteene müidümmü mafünü eera anangnga ta'dilia a Masala, a'düsünaana ku'bu anangnga a kadalaadene tanno iini a'da kinaana ka kadu ku'bu in'dili, kikiri ka tinaana kene ku'bu.

<sup>7</sup> A likilöökö taganna a kadalaadene idhi-idhi ikiri Yasu ka 'duga anangnga ta'dilia a Masala, anangnga kadalaadene tanno iini kasümünaana ka kadu ku'bu afe'de.

<sup>8</sup> A kadu taguri kidhi küüsü, kikiri kadalaadene ka teeragaana türeene ma

miteene tammo öreeene mo koona, möö'dö ana singgili ka iidümmü kafünü eera.

<sup>9</sup> A kadu na nagiide na aguri no kö'dö na alif ka egüsö. İkiri Yasu ka tuuru eäge ka tino,

<sup>10</sup> aka ka mürkabü nja kadalaadene tanno iini ka öö'dö ka riifö ma Dalmanusa.

<sup>11</sup> A naFariisi tö'dö ka Yasu kindini i'i ka'b'ba i'i ka eedi a'da aala türü na Masala eene ndama 'dotombo'do.

<sup>12</sup> İkiri eedi köö'dö kini ko'do iki, "Minna agu sere ma 'bitingngö ka asaasa kala nja türü tanno Masala? Ara a'a tadirina tumma aaga dhorro, taalo türü na Masala ka talanja a sere ma 'bitingngö."

<sup>13</sup> Inyi eäge ku'bu ara ka tafada a mürkabü aco nda'da tanno afaga co kannan no.

*Tigüdi no naFariisi nja Hirüdüs  
(Matta 16.5-12)*

<sup>14</sup> A kadalaadene tüürü ma tagufu miteene ka fiimi, a nüümö ma taguri titaalokene ka mürkabü illi tamiteene ka ungodho.

<sup>15</sup> A Yasu tanangnga tumma eene dhorro iki, "Aaga ümmü nanggeyi naada ka tigüidi ma naFariisi nja tammo Hirüdüs ka oona."

<sup>16</sup> Kikiri ka tindini ajeene kiki a'da, "Kudumma miteene ka titaaloka jaja."

<sup>17</sup> A Yasu tussu tumma neene kadeema kide no indini eäge, "Minna agu aaga teema tumma ma miteene katitaalo kada? Kaleefe aaga aaga tüffürü tussu kitaalo kinyno ada ka nanggüdü? Nanggeedi naada kakidöh?

<sup>18</sup> Taalo iifye kada ma tiji 'buugu iini, iisine titaaloka ma taföönyö eema iini? Taalo aaga kagügi?

<sup>19</sup> Kede ka tasümünaana miteene ku'bu müdümmü a kadu tanno öö'dö na alif ka iidümmü no, nasinggili kö'dö kaanya ma türeene ma miteene?"

Kiki, "Kada'baaga kafünü eera."

<sup>20</sup> Iki, "Kede ka tasümünaana nami-teene ku'bu ka iidümmü kafünü eera, ma kadu tanno öö'dö na alif ka egüsö no, ka'duga aaga nasinggili kadigine kaanya ma türeene miini?"

Kiki, "Küdümmü kafünü eera!"

<sup>21</sup> "Küfürü tumma no co ada ka nanggüdü ta'bitingngö?"

*Yasu afa'da soro ka iifye ka Beet Sayida*

<sup>22</sup> Kikiri ka öö'dö ka Beet Sayida, a kadu tö'dö a soro a Yasu, kiki iini a'da, ümmü i'i ka oona.

<sup>23</sup> İkiri ka tümmü soro ka nüüsö üügü i'i kaco kürö ndama daara, a'binyi alaaga iini ka iifye, ümmünü iisine iini ka oona assa ka tindini i'i, "Niji o'o nüümö?"

<sup>24</sup> İkiri ka tasalaana ku'bu iki, "Niji a'a kadu ka tunggeene afa ma naafa kungngo."

<sup>25</sup> A Yasu tanangnga iisine yiini ka ömö'dü ka iifye afe'de. İkiri iifye niini ka tatanfa'da iji 'buugu ka'diila 'do.

<sup>26</sup> İkiri Yasu ka tuuru i'i ka tino aco 'dii tyia iini iki iini a'da, "Afa co daara."

*Bütrüs eema tumma ma Almasiiji  
(Matta 16.13-20; Lüüka 9.18-21)*

<sup>27</sup> A Yasu tunggeene nja kadalaadene niini kaaco anaanya ma Kaiysariya Filippi, kene ka ndala ka nafüni ya, ikiri ka tindini kadalaadene niini, "Kadu 'dee kiki a'da a'a na mada?"

<sup>28</sup> Kiki iini, "Kadu könö kiki a'da o'o na Yühanna ya Tatambeese ya, anno tiki a'da o'o na İliya, anno tüütü ka tiki a'da o'o na ne'bi öccö."

<sup>29</sup> Lakiini i'i indini eäge, "Aaga ka eyi tiya ada kiki aaga a'da a'a na mada?"

A Bütrüs tiki, "O'o na Almasiiji!"

<sup>30</sup> İkiri ka tiki eene a'da, kafa tadirina ömö'dü töccö.

*Yasu ussu uuru ma inde tanno iini  
(Matta 16.21-28; Lüüka 9.22-27)*

<sup>31</sup> A Yasu talaana eäge iki, "Bii'bala ma Tadü'dü ara tümmü adene abbü adene, a kadüfi tanu kini nja naguugaara ma ka'boge nja katalaana ma seriye, atididene afiki'dö ka inde a fungngö iidoona."

<sup>32</sup> Adagadünüğü tumma no eene 'bii'n kungngo. İkiri Bütrüs ka 'duga i'i ooso iini agirnaana kini.

<sup>33</sup> İkiri Yasu ka tassa keere asala kadalaadene niini, ikiri ka teela Bütrüs iki iini, "Sigi keere eede ka oona o'o na Eblisi no! Kudumma tumma tanno üüdü no, taalo tumma na Masala tumma ma tadü'dü eäge kamiini."

<sup>34</sup> İkiri ka tagümmünü kadu nye'de kungngo nja kadalaadene tanno iini iki eene, "Üürü ömö'dü ya asaasa tö'dö kede keere ya, a'düsünü eyi yiini a'duga salii'bi yiini uurna a'a keere.

<sup>35</sup> Kudumma ömö'di tiya asaasa toolona eyi yiini ara taama eäge, lakiini ömö'dü ya aama eyi yiini kudumma a'a ya nja talaana ma injüüli ya a toolona eäge.

<sup>36</sup> Ara ömö'dü tö'dö keere a minna kini kara tana eema ma 'büdhülü in'dili kungngo ara ka taama eyi yiini?

<sup>37</sup> Ara ömö'dü tafa eyi tiya iini aminna?

<sup>38</sup> Kudumma ömö'dü tiya ana modolo ma a'a nja tumma tanno eede ka sere ma 'bitingngö na temelö ka oroko no, ara 'Bii'bala ma Tadü'dü tana modolo miini kini kara tö'dö ka tidhündhi tanno Pupa tiya iini nja kadhangga tanno insili no."

**9**

<sup>1</sup> Íkiri ka tiki eene, "Ara a'a tadirina tumma aaga dhorro, kadu könö kungngō aja kita 'bitingngö, taalo kara tassa ka inde, illi kassa ka tauugaara ma Masala tanno atö'dö a türü no."

*Ta'bele oona*

(Matta 17.1-13; Lüüka 9.28-36)

<sup>2</sup> Ka füngngö ka ndüdümmü afünü unggodho ya íkiri Yasu ka 'duga Bütrüs nya Yaguub nya Yühanna, unggenee nya eene kasiröanya ma dhonggoro mo, kadaganna kide unggodho eege, a'bele oona kene kidha kungngō.

<sup>3</sup> A en'di yiini talimaana insili kata'bassa, taalo nüümö ka 'büdhü'lü insili nggege 'do.

<sup>4</sup> İliya nya Müüsa tatele oona eene, keema nya Yasu.

<sup>5</sup> Íkiri Bütrüs ka tiki a Yasu, "Ka Tataalaana, a'dila 'do aja ka tanna kita, angnga tabünnü angga ku'bu iidoona, müüdü ma unggodho ammo Müüsa ma unggodho ammo İliya ma unggodho."

<sup>6</sup> I'i taalo ussu nüümö miini ka teema ari'ba kagu i'i nya köje tanno aneene nya iini no.

<sup>7</sup> Íkiri tülüögü ka öö'dö a tallappa miini takara ndanaaya eene ka oona, a tumma tö'dö ndama tülüögü kiki, "Bii'bala yeede ka asaasa i'i ana eedi ya i'i yungngo. Aaga aföönyö tumma niimi."

<sup>8</sup> Kara tasalaana ku'bu ya, taalo kasala ömö'dü nya eene illi Yasu unggodho i'i.

<sup>9</sup> Kene ka ta'bardaga ku'bu ndama 'dikinya ya, a Yasu tanangngä tumma eene a'da kafa tadirina eema yeene ka tadinö kide ya a ömö'dü, illi ka 'Bii'bala ma Tadü'dü ka afiki'dö ka inde.

<sup>10</sup> Kíkiri ka tümmü tumma niini kafa kide, illi eege kindini ajeene, tafiki'dö ka inde a'da minna i'i ya miini?

<sup>11</sup> Kíkiri ka tindini i'i, "Minna agu kataalaana ma seriye kiki a'da İliya ara tö'dö ka dhidha?"

<sup>12</sup> Kíkiri Yasu ka tiki eene, "Timin'da İliya ara tö'dö ka dhidha indinaana eema ku'bu in'dili, assa öö'dö nya a tumma no ka kirinja ka sorne a'da 'Bii'bala ma Tadü'dü a tadhügürü, a kadu tüünü midhi ku'bu ana i'i?

<sup>13</sup> Lakiini ara a'a tiki aaga, İliya öö'dö ka tagüünä eema nye'de ya tatoroko ya ana i'i, afa ma tiya a sorne kadiri tumma miini ya kungngō."

*Yasu oolona 'bii'bala ya ana korongore ya toroko ya*

(Matta 17.14-20; Lüüka 9.37-43)

<sup>14</sup> Kene ka ndapadaga ka kadalaadene tököönö ya, kasala kadu kadhabbu ka

tarügü kene ka oona a katalaana ma seriye, ta'bununjaana ku'bu nya eene.

<sup>15</sup> Amussu kungngō a kadu tasala Yasu kadhere nye'de kungngō kareere kooreene kaco tööjilü i'i.

<sup>16</sup> Íkiri ka tindini eege, "Nüümö minna yungngö ada kadeema nya eene ungngö."

<sup>17</sup> Öö'dü öccö ka kadu ka teene tiki, "Tatalaana, nö'dö a'a a 'bii'bala tiya eede o'o, kudumma koronggore tiya toroko ya ungnö iini ka oona amana i'i ka titaalou ussu ka teema.

<sup>18</sup> Insigiri kümmü i'i üpü ndoore ka nüünö, abbünaana igini ka oona aküdhö, niki a kadalaadene tanno üdü a'da kassor koronggore kini ka oona kitaalo ki'disi kide."

<sup>19</sup> Íkiri ka tiki eene, "Aaga na sere ma 'bitingngö no 'dee minna agu aaga taalo kümmü tumma na Masala ana eedi, ara a'a taneene nya aaga tagaada? Aaga öö'dö a 'bii'bala a'a."

<sup>20</sup> Kíkiri ka öö'dö ana i'i iini. A koronggore tiya toroko ya ka tassa kini ya, üpü i'i co asigiridene üpü ndoore ka nüünö.

<sup>21</sup> Kíkiri ka tindini pupa ma 'bii'bala, "Maara mümmü i'i aada?"

Iki, "Mümmü i'i miini ka ta kidhilli.

<sup>22</sup> Koronggore ya üpübü i'i co turi kungngö ka issi nya 'biidü ma tasaasa tiidi i'i, ürü' ara o'o tambaanya linggo no, ana 'bangngä ma ungnö nakinyi ungnö."

<sup>23</sup> A Yasu tiki iini, "Üürü namma o'o dhorro ya, eema nye'de ara tananja öö'dü tiya amma ya."

<sup>24</sup> A pupa ma 'bii'bala taroro kalnegee, "Tamma na Masala kungngö eede ka eedi, akinyigi a'a amang kene tadhabbu."

<sup>25</sup> Kíkiri Yasu ka jii kadu kataawaana oona agirnaana ka koronggore tiya toroko ya, "Koronggore ya möri ya a'a niki o'o a'da nöö'dö kürö ndama 'bii'bala ka oona, nafa tapadaga kini afe'de."

<sup>26</sup> Kíkiri koronggore ka tadhiya üpü i'i co dhindö öö'dö kürö, a 'bii'bala tafeene afa ma teyi, a kadu 'do kiki kide a'da, "Eyi."

<sup>27</sup> Lakiini Yasu ümmü i'i ka nüüsö a'dina i'i ko do afiki'dö.

<sup>28</sup> Kíkiri ka co a 'bügöörü, a kadalaadene tindini i'i ka unggondho, "Minna agu ungnö ungnö titaalo kambaanya toosaraana ma koronggore tiya toroko ya?"

<sup>29</sup> Iki eene, "Eema afa ma tiya taalo asorodene illi ada ka fara ka Masala."

*Yasu eema tumma ma inde tanno iini*  
(Matta 17.22-23; Lüüka 9.43-45)

<sup>30</sup> Köö'dö kürö ndama kanna kunggeene kadigaala ka Jaliil. A Yasu taalo asaasa ömö'dü öccö ka tussu tumma miini,

<sup>31</sup> kudumma iini ka tagalaana kadalaaadene niimi iki eene. "Ara 'Bii'bala ma Tadü'dü tümmününja a kadu, kiidi i'i, a kene ka tiidi i'i ya assa ka fiki'dö a füngngö iidoona."

<sup>32</sup> Lakiini eege taalo kussu tumma no, kari'ba ka tindini i'i.

*Mada yungngö adhabbu?*

(*Matta 18.1-5; Lüüka 9.46-48*)

<sup>33</sup> Kikirö ka co Kafarnähööm. Kene kico a 'büggöörö ikirö ka tindini eege, "Minna i'i yungngö ada ka taga'bununjaana ku'bu miini ka fiinö sii?"

<sup>34</sup> Lakiini eege kakü'döönö, kudumma eene ka taga'bununjaana ku'bu ka fiinö ma ömö'di tiya adhabbu ana kene ya.

<sup>35</sup> İkirö ka temmi adagümümünü kadalaaadene niini na ada'baaga kafünü era no iki eene, "Üürü ömö'di ya asaasa tadhabbu ma kadu ya, apadaga oona keere alingga ada eene."

<sup>36</sup> A'duga 'bii'bala ya idhilli ya anangnga kene ka söödö iti kini ka orro iki eene,

<sup>37</sup> "Ömö'di ya amma ka 'bii'bala tiya idhilli ya ana eere tiya eede i'i ya amma kede, ömö'di ya amma kede ya taalo amma kede lakiini amma ka ömö'di tiya agürünü a'a ya."

*Ömö'di ya taalo adiidi angnga ya i'i ömö'di tiya aja*

<sup>38</sup> İkirö Yühanna ka tiki iini, "Ka Tataana, kaduna ungngo ömö'di ka tasoro nagoronggore na oroko no ka kadu ka oona ana eere tiya üdü ungngo tafaga i'i keere kudumma iini taalo nya angnga."

<sup>39</sup> İkirö Yasu ka tiki iini, "Aaga fa tafaga i'i keere, taalo ömö'di ya talinggo a türü ma eere tiya eede assa ka tafada eema tumma ma tatoroko no kede ka oona.

<sup>40</sup> Ömö'di ya taalo adiidi ma angnga i'i nya angnga.

<sup>41</sup> Ara a'a tadirina tumma aaga dhorro, ömö'di ya inynya 'büüdi aaga ana eere tiya eede ya, kudumma ada kada tanno Almasiihi, ara talingnge niini taalo ka taama 'do."

*Niimö ya anangnga angnga ka talinggo tatoroko ya*

(*Matta 18.6-9; Lüüka 17.1-2*)

<sup>42</sup> A Yasu tiki, "Ömö'di ya amana laala ya dhiidhi no ya amma kede ya kadüünö tatoroko ya, ara ta'diila ana i'i aja kara ta'duga nya ma tawöönö angnga tamin'dna kini ka eyi kapüögü co to.

<sup>43</sup> Üürü nüsö nüüdü kalinggo eema ya toroko ya rumunuga eege co, a'diila nggeege küdü ka co ka tefe ka 'dö a nüsö ka unggodho, bala üdü ka co ka issi ma

Jahanam tanno taalo ka tadhülünja ku'bu no,

<sup>44</sup> ['a'dii'do miini taalo teyi issi miini taalo ka tadhülu ku'bu.]

<sup>45</sup> Üürü awwa yüüdü ka tüüpü o'o ka tatoroko ya rumuna i'i, a'diila üdü ka co ka tefe ka 'dö ana awwa unggodho bala üdü kana uune keera nassa kico ka issi ma Jahanam,

<sup>46</sup> ['a'dii'do miini taalo teyi issi miini taalo ka tadhülu ku'bu.]

<sup>47</sup> Üürü ööye yüüdü ka tanangnga o'o ka talinggo niimö ya toroko ya, agodhe i'i nüüpö co, a'diila üdü kara co ka tauugaara ma Masala ana ööye unggodho, bala üdü ka ana üye keera nassa tapügünja ka issi ma Jahanam,

<sup>48</sup> 'a'dii'do miini taalo a teyi issi miini taalo ka tadhülu ku'bu.'

<sup>49</sup> Kadu 'do kara ta tangga'dala tatanja kene ka oona ana issi.

<sup>50</sup> Tangga'dala ka'diila, lakiini tanye'denye'de neene kara titaalo 'dee ara aaga tanangnga eege ka tanye'denye'de nya? Aaga feene nya tangga'dala, aaga tasaasa ajeene."

## 10

*Tarna nya Tadheene*  
(*Matta 19.1-12*)

<sup>1</sup> A Yasu tafiki'dö ndama kanna aco a naanya ma Yahüüdiya ndama nda'da ma Ürdün. A kadu tarügü kini ka oona kadhabbu, adagalaana eege afa ma tiya iini 'bucca kungngö ya.

<sup>2</sup> A naFariisi könö tö'dö kini kete, kindini i'i ma tasaasa ta'b'ba i'i kiki, "Ömö'di ka tapa ka aka tammo iini 'dee a'diila?"

<sup>3</sup> İkirö ka tiki eene, "Iki Müüsa aaga nya?"

<sup>4</sup> Kiki a'da, "Müüsa iki a'da ömö'di tarigiri waraga ma tadheene anangnga oono uuru oogo ka tino."

<sup>5</sup> İkirö Yasu ka tiki eene, "Kudumma taküdhö ma nanggeedi tanno ada, ikirö Müüsa ka tarigiri ada tumma ma seriye no aaga.

<sup>6</sup> Lakiini jiddi ma Masala ka tarü'bü ömö'di ya miide ya nya aka tammo linynya mo.

<sup>7</sup> 'Nggege ömö'di tükirö ka tinity pupa yiini ku'bu nya niimö tammo iini ara ka tümmünaana oona nya aka tammo iini.

<sup>8</sup> Kümmünaana oona a tuu'da ta unggodho kene taalo keera, lakiini tuu'da ka unggodho.'

<sup>9</sup> Niimö ya Masala ka tümmünaana i'i koona ya, taalo ömö'di ma tadhagaana ku'bu."

<sup>10</sup> Kene kico a 'büggööri afe'de ya, a kadalaadene niini tindini i'i ma tumma tanno.

<sup>11</sup> İkiri ka tiki eene, "Ömö'di ya apa ka aka tammo iini ara karna kömö ya, afüngnö nja oono kada temelö ün'dügungnö.

<sup>12</sup> Üürü aka ka tapa ka nyori tiya oono mara ka 'duga ömö'di öccö ya, oogo mafüngnö nja nagiide ün'dügungnö."

*Laala ya dhiidhi ya nja Yasu  
(Matta 19.13-15; Lüüka 18.15-17)*

<sup>13</sup> A kadu tö'dö ana laala iini a'da ümmünü iisine eene ka oona, lakiini kadalaadene kagirnaana kene.

<sup>14</sup> Ka Yasu tiji tumma no, agoroo'bo iki eene, "Aaga fa ka laala öö'dö kede, aaga tafa tafaga eege keere kudumma tauugaara na Masala ka ma kadu afa laala ya.

<sup>15</sup> Ara a'a tadirina tumma aaga dhorro, ömö'di ya taalo amma ka tauugaara ma Masala afa laala ya dhiidhi ya taalo aco."

<sup>16</sup> Ümmü eege ümmünü iisine eene ka oona, anangnga baraka eene.

*Ömö'di ya ana almaala ya  
(Matta 19.16-30; Lüüka 18.18-30)*

<sup>17</sup> Ka Yasu ka tunggeene ka fiinä ya, ömö'di toteene nja iini üürü kini kidha ana küüge indini i'i iki, "Ka Tatalaana ya a'diila ya, ara a'a tüünii minna amang kede takarna ka tefe ka 'di ta'billi?"

<sup>18</sup> A Yasu tiki iini, "Minna agu o'o nümmünü a'a a'da a'a na'diila?" Taalo ömö'di ma ta'diila illi Masala unggodho oogo.

<sup>19</sup> Nussu o'o tumma na Masala kiki a'da, 'Fa tagirina kadu, fa tafüngnö nja iiya tanno kadu, fa tanyooro, fa tafinü korokoro ka kadu ka oona, fa tüünii ada kadu ku'bu, ümmü pupa yüüdü nja nüümö tammo üüdü ana eedi dhorro.'

<sup>20</sup> Ömö'di tiki, "Ka Tatalaana, nakalingnö a'a tumma no nye'de jiddi meede ka takaleefe takadhilli."

<sup>21</sup> A Yasu tassa kini ko'do ana eedi ka'diila iki iini, "Nüümö inggide öreene unggodho üüdü kitaalo nussu, unggenee naco ta tanegi ana eema tiya üüdü nye'de, nasüümünaana nagürüsü miini ka kadu tanno eema ka titalo kene no, amang küdü tana eema ka 'dotombo'do dhabbu, nassa ka öö'dö kede keere."

<sup>22</sup> Ömö'di tagoroo'bo ka tumma tanno Yasu ka tiraana no, unggenee kudumma eema unggö iini adhabbu.

<sup>23</sup> İkiri Yasu ka tinaana iifye ku'bu iki a kadalaadene tanno iini, "Tumma ma co ka

tauugaara ma Masala kara tiideene a kadu tanno ana eema dhabbu no."

<sup>24</sup> A kadalaadene tadhere ka tumma tanno iini, ikiri ka tiki eene afe'de, "Laala eede, kindhi co ka tauugaara ma Masala!

<sup>25</sup> Tadigaala ma malaga ka ööye ma ibira taalo ara tagu'daana afa ma ömö'di tiya ana eema ya kara co ka tauugaara ma Masala."

<sup>26</sup> A kadalaadene takogoona ma tadhere kindineene kiki, "Mada i'i yungno a tambaanya toolonadene adha?"

<sup>27</sup> A Yasu tassa kene iki, "Tumma no ka tiideene ka kadu illi eege kitaalo ka tiideene a Masala, kudumma eema nye'de tealo iideene a Masala."

<sup>28</sup> A Bütrüs tiki iini, "Kinyi ungnö eema ku'bu nye'de ara ungnö tuurna o'o keere."

<sup>29</sup> A Yasu tiki iini, "Ara a'a tadirina tumma aaga dhorro, taalo ömö'di a tinyi 'di yiini ku'bu nja nagöre nja naginye nja nüümö nja pupa nja laala nja nasigenee kudumma a'a nja tumma ma İnjilli,

<sup>30</sup> a taluna ka 'büdhüüli tiya, nja kirimi, nöö'di kadhabbu ukumu kadu ka iüdümü nja nagöre nja nakaniümö nja laala nja nasigenee, illi keere ya a taluna tefe ka 'di ta'billi.

<sup>31</sup> Lakiini kadu na ooso kidha no köö'dö keere, a kadu na kanna keere no co aadha."

*Yasu eema tumma ma inde tanno iini  
(Matta 20.17-19; Lüüka 18.31-34)*

<sup>32</sup> A Yasu nja kadalaadene tanno iini tagunggunu co Örsaliim a Yasu tunggeene kene kidha, a kadalaadene tadhere ari'ba tümmü kadu na unggenee nja eene no, a Yasu tagedhe oona nja kadalaadene tanno iini na ada'baaga kafünü eera no, adünüğü eema ya talinggo adene ana i'i eene.

<sup>33</sup> Iki a'da, "Angnga kungno kara tasirigö co Örsaliim, a 'Bii'bala ma Tadü'dü'lu ara tümmününja a naguugaara ma ka'boge nja katalaana ma seriye kümmünü i'i ka inde kanangnga i'i a kajeene.

<sup>34</sup> Küümü midhi ku'bu ana i'i ka'binyinyi alaaga iini ko'do kabbü i'i, kiidi i'i. Afiki'dö afüngnö iidoona."

*Tasaasa na Yaguub nja Yühanna  
(Matta 20.20-28)*

<sup>35</sup> A laala ya Za'bedi, Yühanna nja Yaguub tissigi kini kete kiki iini, "Tatalaana, kasaasa ungnö o'o namma ka nüümö tiya iidi ka asaasa ya."

<sup>36</sup> A Yasu tiki eene, "Kasaasa aaga a'da nüümö ada minna aaga?"

<sup>37</sup> Kikirī ka tiki, "Nanangnga ömö'di öccö ka temmi küdü ka niisö ma kuri aya temmi küdü ka niisö ma küüle küdü ka tö'dö ka tauugaara tanno üüdü na idhindhi no."

<sup>38</sup> A Yasu tiki, "Taalo aaga kussu niimö mada ka tindineene, ara aaga tambaanya tooye ker'de meeđe kara tooye mo, alla ara aaga tambeesedene a tambeese tanno eede kara tambeesedene iini no?"

<sup>39</sup> Kiki a'da, "Ara ungngo tambaanya." A Yasu tiki eene, "Ara aaga tooye ker'de meeđe kara tooye mo, aaga tambeesedene a tambeese tanno eede kara tambeesedene iini no."

<sup>40</sup> Lakiini tumma ma temmi kede ka niisö ma kuri nja niisö ma küüle no, taalo a'a nama tanangnga aaga kudumma Masala ka takindinaana 'buugu ka kadu miini ku'bu."

<sup>41</sup> A türeene ma kadalaadene na ada'baaga no taföönyö tumma no kagoroo'bo ada ka Yaguub nja Yühanna.

<sup>42</sup> A Yasu tagümmüñü eäge iki eene, "Kussu aaga a'da naguugaara ma kadu tanno taalo ka Yahüüdü no, ka naguugaara ma kadu tanno eene, a kadu neene na iifi no tüünä ada eäge ku'bu.

<sup>43</sup> Eema afa ma tiya afa tanna kada, ömö'di ya asasaada tadhabbu ana kada ya, apadaga oona keere alingga ada aaga.

<sup>44</sup> Ömö'di ya asasa co aadha ana kada ya, ada tasaga tiya ada aaga in'dili kungngó.

<sup>45</sup> Kudumma 'Bii'bala ma Tadü'dü taalo ö'dö a'da a kadu talinggo ada iini, lakiini ö'dö ma talinggo ada eene, afa kömüsü ma kadu kadhabbu ana eyi tiya iini."

#### *Toolonadene na Bartimaus ya soro ya (Matta 20.29-34; Lüüka 18.35-43)*

<sup>46</sup> Köö'dö ka Ariiha, a kini ka ndö'dö kürö ndama Ariiha nya kadalaadene tanno iini nja, kadu kadhabbu, a'da Bartimaus 'bii'bala ya Timaws asoro, emmi ka tinggini ma fiinä arangnga.

<sup>47</sup> Kini ka taföönyö a'da Yasu ya ma Nasira ya i'i ya miini ya, ikirī ka tiidhe, "Ka Yasu, 'Bii'bala ya Dawud, ana 'bangnga ma a'a."

<sup>48</sup> A kadu kadhabbu tagirnaana kini a'da aki'döönö illi i'i akogoona ma tiidhe ko'd'do, "Ka 'Bii'bala ya Dawud, ana 'bangnga ma a'a."

<sup>49</sup> İkirī Yasu ka töödhü iki, "Aaga ümmünü i'i."

Kikirī ka tagümmüñü soro, "Adhodho nafiki'dö na'dingne ana uune. I'i ya ümmünü o'o!"

<sup>50</sup> Ara'baga ten'di miini co afiki'dö ana uune aco ka Yasu.

<sup>51</sup> A Yasu tindini i'i, "Nasaasa o'o a'da nönynyö ana o'o?"

İkirī ka tiki, "Tatalaana, nasaasa a'a tiji 'buugu!"

<sup>52</sup> A Yasu tiki, "Unggeene, tamma nüüdü ka oolona o'o." İkirī ka arooro ka tasala 'buugu uurna Yasu keere ka fiinä.

## 11

*Yasu inynyo Örsaliim  
(Matta 21.1-11; Lüüka 19.28-40;  
Yühanna 12.12-19)*

<sup>1</sup> Kene ka ndakete ka Örsaliim, kassa ndala Beet Faji nya Beet Aniya ka Anya ma 'Dikidiyö, a Yasu tagürünü kadalaadene iini keera.

<sup>2</sup> Iki eene, "Aaga agolo daara tiya ada kidha ya, kada kara co ya, ara aaga taluna a 'bing kisine amin'dinja ku'bu, üfürü ömö'dü takaka kide, aaga kildhe i'i, aaga tö'dö iini kita.

<sup>3</sup> Üürü ömö'dü ka tindini aaga a'da, 'Minna ada kadalinggo?' aaga tiki iini a'da, 'Uugaara asaasa, assa ka tafada iini areere.'

<sup>4</sup> A kadalaadene co kaduna a 'bing kisine kimi'dinja ku'bu ka fiinä ka inye kete kakildhe i'i,

<sup>5</sup> a kadu na 'dingnge kene kete no tindini eäge kiki, "Kinggli aaga a 'bing kisine amana?"

<sup>6</sup> Kadirina eene afa ma tiya Yasu ka tünüğü co eene ya kungngó, a kadu tükirī kafa kene ka unggeene.

<sup>7</sup> A kadalaadene na eera no tö'dö a 'bing kisine a Yasu, kakese en'di yeene kide aka kide.

<sup>8</sup> A kadu kadhabbu takese en'di yeene ka fiinä, anno takese dhaaru neene ka taku'baana ka lodho no ku'bu.

<sup>9</sup> A kadu na unggeene ka Yasu kidha no nja tanno unggunu kiri keere no teema, 'Kafünügü Masala ko'do, Tanangnga ta'diila ömö'dü tiya tö'dö ana eere ma Uugaara ya.'

<sup>10</sup> Aaga nangnga ta'diila a tauugaara tanno ara tö'dö no

tauugaara na pupa tiya aja Dawud.

Kidhindhi ka fiinä ma ndanaaya."

<sup>11</sup> A Yasu co Örsaliim aaco la ma Masala adagiüri eema in'dili, ka 'buugu kanda siyya ya, ikirī ka öö'dö kürö aaco Beet Aniya nya kadalaadene tanno iini nö'dö kada'baaga kafünü eera no.

*Yasu aga'da indüüye  
(Matta 21.18-19)*

<sup>12</sup> Ka taka ka taadha ya kikirii ka tunggeene ka Beet Aniya, iire tümmü Yasu.

<sup>13</sup> İkiri ka tasala fa ma ndiyye ka kirikiri ikiri ka tunggunu co iki kide a'da laala inggide, kini ka ndalaana ya, taalo aduna laala kide illi dhaaro, kudumma uuru ma teene tanno ndiyye ka aleefe.

<sup>14</sup> İkiri ka tiki iini, "Taalo ömö'di ma tagu tööyö müüdü afe'de ta'billi." A kadalaadene taföönyö eema yiini ka teema ya.

*Yasu asoro kadu ka la ma Masala  
(Matta 21.12-17; Lüüka 19.45-48;  
Yühanna 2.13-22)*

<sup>15</sup> Köö'dö ka Örsaliim, ikiri Yasu ka co la ma Masala adagasoro kadu na anadene ana eema kide nja tanno ana eema no apudu eema ma temmuimi nja kadu tanno aregere gürüsü kide no, adhifi eema ya kadu tanno anadene ana alambo no co,

<sup>16</sup> afaga kadu keere ka co la ma Masala ana eema ma ana.

<sup>17</sup> İkiri ka talaana eege iki eene, "Taalo sorne ma Masala iki a'da,  
"D'i yeede 'd'i ma tafara ka Masala  
ma kadu ka ajeene nye'd'de?"

Aaga ta'duga, aaga tanangnga i'i kada tumba ma kanyooro."

<sup>18</sup> A naguugaara ma ka'boge nja kataalaana ma seriye taföönyö tumma no, kikirii ka tawwa fiini ma tiidi Yasu, Kudumma eene ka ri'ba iini, kudumma kadu in'dili kadhere ka talaana tanno iini.

<sup>19</sup> Köö'dö kürö ndama anya a 'buugu kada siya kunggeene.

*Fa ma indiyye arume  
(Matta 21.20-22)*

<sup>20</sup> A kene ka ndafada litatka kungngo ya, kaduna fa ma ndiyye ka teyi arume kadara ka ereere miini.

<sup>21</sup> A Bütrüs tagügi tumma na Yasu iki iini, "Ka Tatalaana, assa ka fa ma indiyye nüüdü ka taga'da eege no, ka'bayaqa ko'do."

<sup>22</sup> İkiri Yasu ka tiki eene, "Aaga amma ka Masala.

<sup>23</sup> Ara a'a tadırina tumma aaga dhorro, üürü ömö'di iki anya tammo, 'Fiki'dö na'dinggö co to,' a'da taalo asanaana eedi ku'bu ya, lakiini amma ana eedi, a'da nüümö yiini ka tiki ya a tüüninja iini.

<sup>24</sup> Nükirii a'a ka tiki aaga a'da nüümö yaada ka tasaasa ada kara tafara ka Masala ya, aaga amma ana eedi a'da ara aaga taluna, mükirii Masala ka anangnga aaga.

<sup>25</sup> Kada kara tafiki'dö aaga tafara ka Masala ya, üürü nüümö ya toroko ya ungngö üüdü ku'bu nja ömö'di naadha kide, amang ka Pupa tiya ada ya ka

'dotombo'do ya, ta'duga tatoroko kada ka onona."

<sup>26</sup> [Kada ka titalo kaadha ka eema tiya kadu kadalinggo ana aaga ya toroko ya, taalo Pupa yaada ya ka 'dotombo'do ya, ta'duga tatoroko naada.]

*Tindineene ma tauugaara na Yasu  
(Matta 21.23-27; Lüüka 20.1-8)*

<sup>27</sup> Kapadaga co Örsaliim, a kini ka tunggunaana ku'bu ka la ma Masala ya, a naguugaara ma ka'boge nja katalaana ma seriye nja kadiiñi ma anya, tö'dö kini.

<sup>28</sup> Kikirii ka tindini i'i, "Türü nüüdü ka talinggo eema ya iini no 'dee na mada? Mada i'i yungngö anangnga türü o'o nalinggo iini ungngö?"

<sup>29</sup> A Yasu tiki eene, "Ara a'a tindini aaga ma nüümö unggodho, aaga tirina a'a, na a'a sa tirina türü öjö eege kungngö eede ka talinggo iini.

<sup>30</sup> Aaga tirina a'a, tambeese na Yühanna 'dee, köö'dö ndama 'dotombo'do alla ndama kadu?"

<sup>31</sup> Keema unggodho eege, "Kaja ka tiki a'da, 'Ndama 'dotombo'do ya,' ara tiki a'da, 'Aminna agu aaga, aaga taalo kamma kinni?'

<sup>32</sup> Ara angnga tiki a'da, 'Ndama kadu?' Lakiini eege kari'ba a kadu, kudumma kadu 'do kümmü Yühanna kada ne'bi.

<sup>33</sup> Kikirii ka tiki a Yasu, "Taalo unggngö kussu!"

A Yasu tiki eene, "A'a tekere taalo na tadırina aaga a'da mada anangnga türü neede ka talinggo iini no a'a."

## 12

*Tafeene ma tumma ma kataleele  
(Matta 21.33-46; Lüüka 20.9-19)*

<sup>1</sup> İkiri ka teema nja eene a tafeene ma tumma, "Ömö'di inggide adinü fa ma ki'bim'bi, adagasaara eege koona adagii'dö ada anya ma tiyaana kide, atarü'bü 'dasala anangnga a kadu ma leele kide ara ka tunggeene.

<sup>2</sup> Ka uuru ma tarumaana ma ki'bim'bi ka ndöö'dö ya, agürünü ömö'di ya linggo nja iini ya ka kadu ma linggo aaco ta'duga iiye ma ki'bim'bi.

<sup>3</sup> Lakiini kümmü i'i, kabbü i'i kuuru i'i ka tino ana iisine 'döngngönyö.'

<sup>4</sup> İkiri ka kürünü ömö'di ma linggo öccö kene afe'de, kabbü ömö'di ya miini ya ka üüdü, kadagüün'i midhi ku'bu ana i'i.

<sup>5</sup> Ütü kagürünü könö kadagiidi ya miini ya, agürünü öccö kadhabbu katabbü könö kadagiidi könö.

<sup>6</sup> "Ömö'di taalo öreene kini miini kara tagürünü illi 'bii'balä yiini ka asaasa ya ma

tagürünü i'i keere ma kadu tanno in'dili no, iki a'da, 'Eege kara taföönyö tumma na 'bii'bala tiya eede.'

<sup>7</sup> Illi kadu ma linggo ma ki'bim'bi keema unggodho eege kiki, 'Taya ya a takakarna ka eema ya i'i yungngo, aaga ö'dö angnga tagiidi i'i amang kaja takarna ka eema.'

<sup>8</sup> Kümmü i'i kadagiidi i'i kara'baga co kürö ndama 'booro ma ki'bim'bi.

<sup>9</sup> "Ömö'di ma ki'bim'bi 'dee ara tönynyö?' Ara tö'dö tagirina kadu na linggo no, ara kanangnga ki'bim'bi a kadu tököönö.

<sup>10</sup> Taalo aaga kagiiri tumma na sorne ma Masala?

'Misi ma katarü'böönö kanu kide mo, oogo mungngo ma misi ma kadesse.

<sup>11</sup> Uugaara agalinggo eema ya, angnga takadherel!'

<sup>12</sup> Kikiri ka asaasa tümmü i'i kudumma eene katussu a'da i'i ya eema a tafeene ma tumma kene ko'do. Lakiini eege kari'ba a kadu kadhabbu, kikiri ka tunggeene kinyi i'i ku'bu.

#### *Tamana tulu'ba a Kayisar*

(Matta 22.15-22; Lüüka 20.20-26)

<sup>13</sup> Kagürünü kadu ma naFariisi nja Hirüdüsiin ka Yasu a'da kümmü i'i a tumma ma nüñö tanno iini.

<sup>14</sup> Kikiri ka öö'dö kini kiki iini, 'Ka Tatalaana, kussu ungngo a'da neema o'o tumma dhorro nitaalo nalinggo a tumma tanno kadu, taalo o'o nalomana kadu ko'do, lakiini nadünnü o'o tumma ma Masala dhorro, a'diila kaja ka tamana tulu'ba a Kayisar alla angnga tanu?'

<sup>15</sup> Ara angnga tamana ku'bu alla angnga tanu?"

İkiri Yasu ka tussu ünggü meene ikiri ka tiki eene, "Minna agu aaga, aaga ta'b'ba a'a ka eedi aaga ungne jine a'a nasala kide."

<sup>16</sup> Kikiri ka anangnga jine iini, ikiri ka tiki eene, "Korongore ya mada i'i yungngo nja eere tiya?"

Kiki a'da, "Ya Kayisar."

<sup>17</sup> İkiri Yasu ka tiki eene, "Aaga nangnga eema ya Kayisar a Kayisar, aaga tanangnga eema ya Masala a Masala." Kadhere ka tumma tanno iini.

#### *Tarna nja tafiki'dö ka inde*

(Matta 22.23-33; Lüüka 20.27-40)

<sup>18</sup> İkiri naSadügiin na iki a'da kitao tafiki'dö ka inde kö'dö kini kindini i'i.

<sup>19</sup> Kiki, "Tatalaana, Müüsa arigiri ada angnga ka sorne a'da ömö'di ka teyi inyi aka miini ku'bu a'da taalo mageene laala,

örre yiini takarna ka aka ma küüme amang kini teene ada laala örre tiya iini.

<sup>20</sup> Kadu kinggide ka iidümmü kafünü eera ka nagöre, ömö'di ya dhidha ya arna aka eyi a'da taalo ageene laala.

<sup>21</sup> Aya ta'duga oogo eyi a'da taalo ageene ada oono, nja türeene miini nye'd'e de nja tiya iidoona ya.

<sup>22</sup> Tumma dhorro taalo ömö'di unggodho ana ka kadu tanno ka iidümmü kafünü eera no taalo ageene, keere kungno aka teyi afe'de.

<sup>23</sup> Oogo ma aka tammo mada ka uuru ma kadu tafiki'dö ka inde? Kudumma oono kadaaka tammo kadu ka iidümmü kafünü eera?"

<sup>24</sup> A Yasu tiki eene, "Kaama aaga kudumma aaga katitalo kussu nakasorne na insili no nja türü tanno Masala.

<sup>25</sup> Taalo kadu karna ajeene ka uuru ma tafiki'dö ka inde, kafeene nja kadhangga ka 'dotombo'do.

<sup>26</sup> A 'bitüngngö kudumma ma tafiki'dö ka inde ma kadu tanno ake no, taalo aaga kagiiri sorne ya Müüsa ma 'bamfa, Masala miki iini, 'A'a na Masala tammo Abrahiim nja Masala tammo Ishak nja Masala tammo Yaguub'?

<sup>27</sup> Oogo taalo Masala ma kadu tanno ake no, lakiini oogo ma Masala ma kadu tanno adinö no aaga ya kaama aaga 'do.'

#### *Tumma na Masala na idhindhü no*

(Matta 22.34-40; Lüüka 10.25-28)

<sup>28</sup> Tatalaana ma seriye könö ö'dö aföönyö eene kata'bununjaana ku'bu a tumma. A Yasu tapadaga tumma co Sadügiin ka'diila, ikiri ka tindini i'i iki, "Tumma na dhidha no eege kiiye ana kada na in'dili no?"

<sup>29</sup> A Yasu tiki, "Tumma na dhidha no kiki, 'Kadu ma Israyil, aaga aföönyö, Masala Uugaara maaja, Uugaara unggodho.'

<sup>30</sup> Asaasa Masala Uugaara müüdü ana eedi tiya üüdü nye'd'e de nja oona tanno üüdü nja üüdü tiya üüdü nye'd'e de nja türü tanno üüdü nye'd'e.'

<sup>31</sup> A tumma öccö afe'de kiki, 'Asaasa ömö'di ya kete küdü ya afa müüdü ka asaasa eyi yüüdü kungno.' Kungno taalo tumma könö kihhindhi ka tagiibi tumma no.

<sup>32</sup> A tatalaana ma seriye tiki iini, "A'diila, nadiri o'o tumma dhorro a'da Masala ma unggodho taalo Masala kömö illi oogo.

<sup>33</sup> Ömö'di tasaasa oogo ana eedi nye'd'e de a tussu miini nye'd'e, a türü tanno iini nye'd'e asaasa ömö'di ya kete kini ya afa

miini ka asaasa eyi yiini kungngo, kagii'bi tara eriidö nja türri."

<sup>34</sup> A Yasu tussu a'da ömö'dii ya adiri tumma ma ta'dara ikiiri ka tiki iini, "Taalo o'o na ku'b'ba ka tauugaara ma Masala ku'bu." Taalo ömö'dii könö ma tana rüüsü ka eedi ma tindini i'i dhabbu kungngo.

*Almasiihi nja Dawud*

(Matta 22.41-46; Lüüka 20.41-44)

<sup>35</sup> Ka Yasu ka tagalaana kadu ka la ma Masala ya, indineene iki, "Katalaana ma seriye 'dee, kiki a'da Almasiihi i'i ya 'Bii'bala tiya Dawud nya?"

<sup>36</sup> A'da Dawud ka eyi tiya iini eema a türü ma Koronggore tiya Insili ya, 'Iki Uugaara Uugaara tiya eede,

Emmi kede ka nüüsö ma kuri,  
ara a'a ka anangnga kadu ma kirimü  
nüüdü küdü ka uune."

<sup>37</sup> A Dawud ka eyi tiya iini ümmünü Almasiihi a'da Almasiihi a'da 'Uugaara,' assa ka ta'bii'bala tiya iini nya?" A kadu tagatoodo ka Yasu ka teema oona a'diila eene.

*Yasu iki aaga aadha ka katalaana ma seriye ka oona*

(Matta 23.1-36; Lüüka 20.45-47)

<sup>38</sup> A Yasu tagalaana euge iki eene, "Aaga aadha ka katalaana ma seriye ka oona. Euge kasaasa tunggunaana ku'bu ana en'di tiya kadhonggoro ya ka oona, a kadu töötüüli euge ka namansala,

<sup>39</sup> kemmiimi ka kadu kidha ka la ma talaana nja na'buugu ma te'deema.

<sup>40</sup> Kiišinii iiya ma nagüümé kagu eema yeene, kümmü nanggeyi neene a'da euge kafara ka Masala keema tafifinni. Euge na miini no ara Masala tapusu euge dhindho."

*Gürüüsü ma aka ma küüme ka tamana ku'bu mo*

(Lüüka 21.1-4)

<sup>41</sup> A Yasu temmi ka la ma Masala ka teene, napele ana iiye ka oona nja 'buugu ma tamana ker'de ma monsoona kide, adinö ka kadu kadapüpügü gürüüsü yeene ka 'buugu ma gürüüsü ka la ma Masala, a kadu nana gürüüsü dhabbu no, tamana ku'bu dhabbu.

<sup>42</sup> Lakiini aka ma küüme mo, eema ka titaalo kono mo, mafaana ana giriisi keera idhilli.

<sup>43</sup> Ikiiri Yasu ka tagümmünü kadalaadene niini iki eene, "Ara a'a tadirina tumma aaga dhorro, aka ma küüme mo, eema ka titaalo kono mo, manangnga gürüüsü ku'bu adhabbu ka 'buugu ma tafaana madagi'i'bi kadu nye'de."

<sup>44</sup> Kudumma eene kanangnga türeene ma eema tiya eene ya dhabbu ya ku'bu,

lakiini oogo, manangnga ya aganna kono ya ku'bu, moono kara takuri ya nye'd'de kungngo."

## 13

*Yasu eema tumma titalo ma 'büdhüüli*  
(Matta 24.1-2; Lüüka 21.5-6)

<sup>1</sup> Kini ka öö'dö kürö ndama la ma Masala ya a kadalaadene niini könö tiki iini, "Tatalaana, ma assala ka nüügi'i nja tarü'böönö tanno ka'diila nya!"

<sup>2</sup> Ikiiri Yasu ka tiki iini, "Niji o'o tarü'böönö na 'diila no? Taalo müsi ma türeene ka ma tööje ko'do, kara tasananjaana ku'bu."

*Dhügürü nja talingga kadu*  
(Matta 24.3-14; Lüüka 21.7-19)

<sup>3</sup> Kini ka asirö Anya ma 'Dikidiyö emmi adinö co la ma Masala, ikiiri Bütrüs nja Yaguub nja Yühanna nja Andraws ka tindini i'i unggodho eege,

<sup>4</sup> "Tirina ungngo, ara tumma no talingga adene aada a nüümö ya tanangnga angnga ka tussu a'da ndakete ka talingga adene i'i ya iiye?"

<sup>5</sup> A Yasu tiki eene, "Aaga adinö ko'do aaga fa tafaga ömö'di töccö iisini aaga.

<sup>6</sup> Kadu kinggide kassa ka öö'dö kadhabbu küsini kadu ana eere tiya eede kiki, 'A'a namiiini!' Küsini kadu kadhabbu 'do.

<sup>7</sup> Kada ka tafoönyö tumma ma koro'bo kateemadene afa ma tiya miini ya, aaga fa tari'ba ara tüünidene, lakiini taalo sugi miini euge kamiini.

<sup>8</sup> Ara anya tadiidi ma anya tökömö a tauugaara tadiidi ma tauugaara könö, a 'buugu tatinggi'i'dii ka na'buugu kadhabbu, a 'buugu ta'iire tata ma tin'di euge kamiini.

<sup>9</sup> "Aaga adinö ko'do, ara kadu tümmü aaga kümmünü a naguugaara ma seriye, kabbü aaga ka naala ma talaana, küügü aaga kamanaga co kidha ma naguugaara ma anya na dhiidhi no nja tanno iifi no kudumma a'a, aaga öödö dhorro aaga tasahüüd kene.

<sup>10</sup> Ara tumma na İnjilli teemadene ka dhidha ka ajeene ka naanya koona nye'd'de kungngo.

<sup>11</sup> Ka kadu kara tümmü aaga kümmünü a naguugaara ya, aaga tafa tadinigöögö a'da taalo aaga kussu nüümö maada ka teema, aaga eema tumma na tö'dö kada ka nüönö no ka ööye miini, kudumma Koronggore tiya Insili ya i'i yungngo eema taalo aaga.

<sup>12</sup> Ara ömö'dii tümmünü örre yiini ka inde, a pupa tümmünü 'bii'bala yiini ka inde, a laala tasilli eema ya kafaafa meene kagirina euge.

<sup>13</sup> Ara kadu takirimi aaga nye'd'de kungngó kudumma eere tiya eede, ömö'dü ya idhi oona ku'bu turi ya oolonadene."

*Tatoroko ma 'buugu*

(Matta 24.15-28; Lüüka 21.20-24)

<sup>14</sup> "Kada ka tiji 'tanyoro ma 'buugu ka tatoroko ya,' na taalo kama tagalinggo adene no amang kada tussu aaga na iroöönö no, a kadu na ka Yahüüdiya no tarünö kaco na'dikinya.

<sup>15</sup> Ömö'dü ya ka la ko'do ya, taalo atö'dö ku'bu alla aco a 'bügööri tagona niimö kide.

<sup>16</sup> Ömö'dü ya ka siga ya, taalo tafada aco a'duga ten'di yiini.

<sup>17</sup> Am'ba ka iiya tanno agüröönö no nja tanno indine no ka naganuuru tanno miini no.

<sup>18</sup> Aaga afara ka Masala a tumma no tafa tö'dö feele kungngó.

<sup>19</sup> Ka naganuuru tanno miini no ara tagoroo'bo tö'dö ka anya a 'buugu tatoroko, üfürü tagatoroko nggege taka öccö jiddi ma Masala ka tarü'bü 'büdhüü itaalao a tö'dö nggege afe'de.

<sup>20</sup> Üürü Uugaara ka titalo anangnga naganuuru na miini kadhügüngü ya, taalo ömö'dü ma tagoolonadene unggodho kungngó. Lakiini kudumma kadu tanno oono ka tagesse egee no, mikiiri karmuna naganuuru manangnga egee kadhügüngü.

<sup>21</sup> "Ka uuru tanno miini no üürü ömö'dü iki aaga a'da, 'Assa, Almasihi ungnego kita,' nja iimi ka tiki a'da, 'Inni kanna ya,' aaga tafa tamma kini kide.

<sup>22</sup> Namasihi na iisini kadu no nja nage'bi tanna korokoro no, kara sa kabbü 'dala kalinggo eema keefe nja eema ma türü meene ka taama kadu na Masala ka tagesse egee no, üürü kaluna fiinii miini.

<sup>23</sup> Nggege aaga adinö ko'do, a'a 'bitingngö nagadünögü a'a eema aaga in'dili kungngó a'da küfürü uuru miini tö'dö.

*Tö'dö na 'Bii'bala ma Tadü'd'dü*

(Matta 24.29-31; Lüüka 21.25-28)

<sup>24</sup> "Lakiini ka naguuru tanno miini no ara sa tatoroko 'do, 'A ndanaaya talifi a tere taalo ara töyeene,

<sup>25</sup> A midigi ta'dünggeene ndama 'dotombo'do

a türü ma 'dotombo'do tatünggi'dü.'

<sup>26</sup> "Ka uuru tanno miini no ara kadu sa kiji 'Bii'bala ma Tadü'd'dü ka tunggunu aku'bu a tülüögü a türü nja tidhindhi.

<sup>27</sup> Assa kagürünü kadhangga niini ka na'buugu tanno tanya ka tüsö na egiisö no koona nye'd'de kungngó, kaco tawaana

kadu niini ka tagesse egee no ka 'büdhüü koonä nye'd'de nja 'dotombo'do.

*Talaana ma fa ma indiyye*

(Matta 24.32-35; Lüüka 21.29-33)

<sup>28</sup> "A 'bitingngö aaga kussu fa ma indiyye, kada kiji i'i ka tasere a dhaaro miini ta kirikiri, aaga tussu a'da kooro ka ndakete.

<sup>29</sup> Kada ka tiji eema ya ka talinggo adene nye'd'de ya, ikiri aaga ka tussu a'da uuru miini ka ndakete ka inye.

<sup>30</sup> Neema a'a nja aaga dhorro, taalo sere ya tadhe ko'do a'da taalo eema agalinggo adene nye'd'de kungngó.

<sup>31</sup> 'Dotombo'do nja 'büdhüü ka tamanyaga kitaalo, lakiini taalo tumma neede ka titalo."

*Taalo ömö'dü ussu uuru na Masala*

(Matta 24.36-44)

<sup>32</sup> "Taalo ömö'dü ma tussu uuru na miini no, alla kadhangga ka 'dotombo'do alla 'Bii'bala illi Pupa.

<sup>33</sup> Aaga adinö ko'do aaga tafa tarigide kudumma ada ka titalo kussu a'da uuru na miini no ka tö'dö aada.

<sup>34</sup> Afeene afa ömö'dü ya inyi 'dü yiini ku'bu ara ka tunggeene anangnga kadu na alinggo no kafa kide, ömö'dü ya talinggo linggo niini keefe, iki a taya afa ka inye ya, adinö afa tarigide.

<sup>35</sup> Nggege aaga adinö ko'do kudumma ada kitaalo kussu tafada na ömö'dü ma 'dü, siiya kungngó alla ooso ka teene, alla a dhimbü ka fara alla ka taka ka taadha.

<sup>36</sup> Üürü i'i ö'dö aluna aaga afa taluna aaga ka tarigide.

<sup>37</sup> Tumma neede ka tirina aaga no, nadünögü a'a co kadu nye'd'de, 'Aaga adinö ko'do.'

## 14

*Tawwa füni ma tiidi Yasu*

(Matta 26.1-5; Lüüka 22.1-2; Yühanna 11.45-53)

<sup>1</sup> 'Bitingngö Taanyara ma Tada'da ka Eriidö nja Taanyara ma Dheedhifi fungngö miini anda öreene eera, a naguugaara ma ka'boge nja katalaana ma serije tagawwa fiinii meene ka tümmü Yasu kiidi i'i.

<sup>2</sup> Lakiini egee kiki a'da, "Taalo angngä ka tüünii nggege ka taanyara ma türü ii'dü kadu taga'da 'buugu."

*Aka muuru kondho ka Yasu ka oona*

(Matta 26.6-13; Yühanna 12.1-8)

<sup>3</sup> Ka Yasu ka taganna ka 'dü kita Samaan ya akaana kutukunya ya, ka Beet Aniya kemmi, aka tadhe a sügü'de ka niisö a

kondho ma nardiin ma dhorro mo kide magu'daana mo, ma'böy sügü'de muuru kondho iini ka tüdü.

<sup>4</sup> A kadu könö tagoroo'bo, keemaana ka oona kiki a'da, "Minna agu kondho maga'dadene kungngo?"

<sup>5</sup> Taalo maaja ka tadenegi iini ana gürüsü ma ürünnü unggodho (gürüsü 300), angnga tüsümünaana nakajine miini ka kadu tanno eema ka titalo kene no," ikirii kamana hetti aka 'do.

<sup>6</sup> İkirii Yasu ka tiki eene, "Minna agu aaga, aaga talingga oogo? Aaga aadha oono ka oona, magalinggo ada nüümö ya a'diila ya a'a.

<sup>7</sup> Kadu no eema ka titalo kene no kinggide 'do aaga amana eema eene üürü aaga kasaasa. Illi a'a ya, taalo a'a na taneene nya aaga turi.

<sup>8</sup> Oogo magiüni a türü tanno oono muuru kondho eede ka oona ka dhidha matindinaana ku'bu ma tatü'bü a'a.

<sup>9</sup> Ara a'a tadırına tumma aaga dhorro, kita İnjilli ka teemadene kide ka 'buugu ka oona nye'de kungngo ya, keema tumma ma eema tiya oono ka tagüünü ya a kadu tagiügi oogo iini."

*Yahüusa amma ma Yasu ka tümmü adene*

(Matta 26.14-16; Lüüka 22.3-6)

<sup>10</sup> İkirii tatalaadene na Yasu könö ana ka tanno ada'baaga kafünü eera no ana eere a'da Yahüusa Askaryüüti tunggeene aco ka naguugaara ma ka'boge ma tümmünü Yasu eene.

<sup>11</sup> Oona ta'diila kene eene kadaföönyö tumma no, kiki iini a'da, ara egee tanangnga gürüsü iini. İkirii ka adinaana i'i ko'do ma taluna füñi ma tümmünü i'i eene.

*Yasu agu kuri ma tada'da nya kadalaaadene tanno iini*

(Matta 26.17-25; Lüüka 22.7-14, 21-23; Yühanna 13.21-30)

<sup>12</sup> Ka uuru tanno dhidha no ma Taanyara ma Dheedhifi ka ndö'dö yeene kaara kid-heefele ma Taanyara ma Tada'da ka Erüidö kide ya, a kadalaaadene na Yasu tindini i'i kiki iini a'da, "Nasaasa o'o unggongo kico tindinaana kuri ma Tada'da küdü ku'bu kiga?"

<sup>13</sup> Agürünü kadalaaadene niini keera iki eene, "Agolo anya aaga taduna ömö'di unggenee a'bandhafala ma 'büidü aaga turna i'i keere.

<sup>14</sup> Kini ka co a 'bügöörö ya, aaga tiki ömö'di ma 'dii a'da, 'Tatalaanä iki a'da la yeede ka tagu kuri ma Taanyara ma

Tada'da ka erüidö nya kadalaaadene tanno eede i'i iifye?

<sup>15</sup> Ara talaala aaga ka la ko'do, la ko'do adhabbu akesenja ku'bu ka'diila, aaga tindinaana kuri kaja ku'bu kide."

<sup>16</sup> İkirii kadalaaadene na eera no ka co, kaluna tumma na Yasu afa ma tiya iini ka tageema kungngo, ka takindinaana kuri ma tada'da ku'bu.

<sup>17</sup> A 'buugu kanda siiya kungngo ya, a Yasu tö'dö nya kadalaaadene tanno iini na ö'dö kada'baaga kafünü eera no.

<sup>18</sup> A kene ka ndemmi ma tagu eema ya, a Yasu tiki, "Ara a'a tadırına tumma aaga dhorro, ömö'dii öccö unggongo aja aguri nya a'a ara tümmünü a'a a kadu."

<sup>19</sup> Oona tatoroko ka kadalaaadene kindini i'i ka unggodho, ka unggodho, "Tumma dhorro taalo a'a namiinti?"

<sup>20</sup> İkirii ka tiki eene, "A könö ana ka tanno na öö'dö kada'baaga kafünü eera no, ara tirri nüüsö ka dho nya a'a.

<sup>21</sup> A 'Bii'bala ma Tadü'dü ara teyi afa ma tiya ka kasorne ma Masala na insili no katiraana ya kungngo, lakiini am'ba ka ömö'dii tiya ara tümmünü 'Bii'bala ma Tadü'dü a kadu ya, a'diila kini kara tafa tageenedene."

*Kuri ma taamu ya Uugaara*

(Matta 26.26-30; Lüüka 22.15-20; 1 Kürünsüs 11.23-25)

<sup>22</sup> Kene kagu eema ya, ikirii Yasu ka 'duga miteene anangnga ta'diila a Masala a'düsünü anangnga eene iki, "Aaga la tuu'da neede egee kungngo."

<sup>23</sup> İkirii ka a'duga ker'de anangnga ta'diila a Masala, anangnga eene, kadakooye kide egee in'dili.

<sup>24</sup> İkirii ka tiki eene, "Erüidö yeede i'i unggongo, ma timi'di tumma ya uurunja co ka üdü ma kadu kadhabbu.

<sup>25</sup> Ara a'a tadırına tumma aaga dhorro ndama uuru tanno, taalo a'a na tooye 'büidü ma ki'bim'bi, ara uuru neede ka saga tooye i'i ka issi ka tauugaara tanno Masala."

<sup>26</sup> Kikirii ka ndaküüwe tüüsü köö'dö kürö kaco Anya ma 'Dikidiyö.

*Yasu eema ta'düsünü i'i na Bütrüs*

(Matta 26.31-35; Lüüka 22.31-34; Yühanna 13.36-38)

<sup>27</sup> İkirii Yasu ka tiki eene, "Ara aaga sa karünö aaga nye'de kungngo aaga tinya a'a ku'bu, kudumma sorne ma Masala ka tiki,

'Ara a'a tabbü tadasaana,  
kidheefele tanyalagaago.'

<sup>28</sup> Lakiini kede ka tafiki'dö ka inde ya, ara a'a co Jaliil kada kidha."

<sup>29</sup> İkiri Bütrüs ka tiki, "Kassa ka tiny o'o ku'bu eege nye'd'de, taalo a'a nara tiny o'o ku'bu."

<sup>30</sup> A Yasu tiki iini, "Ara a'a tadi-rina tumma o'o dhorro ka ooso tanno 'bitingngö no, a'da üfürü dhim'b'i taafara teera ya, ara o'o ta'düsünü tumma ma üdü ka tussu a'a tiidoona."

<sup>31</sup> A Bütrüs takogoona ma teema tumma niini iki, "Taalo a'a na ta'düsünü o'o assa kata inde, ara a'a teyi nya o'o." A kadaladene nye'd'de tatiraana nggeege.

*Yasu afara ka Masala ka Jetsemaani*  
(Matta 26.36–46; Lüüka 22.39–46)

<sup>32</sup> Kö'dö ka 'buugu tiya ana eere a'da, Jetsemaani ya, ikiri Yasu ka tiki a kadaladene tanno iini, "Aaga emmi kita ara a'a kaafara ka Masala."

<sup>33</sup> İkiri ka 'duga Bütrüs nya Yaguub nya Yühanna arooro ka ta'deedene ka oona, ari'ba tümmü i'i.

<sup>34</sup> İkiri Yasu ka tiki eene, "Ka toroko oona eede dhindho kada inde, aaga anna kita aaga tadini ko'do."

<sup>35</sup> Isigi co eene ka oona idhilli kungngo, üürü ku'bu eema nya Masala, amang ka uru tanno tadhe ko'do iini ka oona, üürü Masala masasa.

<sup>36</sup> İkiri ka tiki, "Abba, Pupa yeede, eema nye'd'de nana o'o türü miini, 'duga tatoroko no kede ka oona, lakiini taalo tumma ma eedi tiya eede ka asaasa, lakiini afa ma tiya üüdü ka asaasa ya kungngo."

<sup>37</sup> A Yasu tafada aluna eege ka tarigide, ikiri ka tiki a Bütrüs, "Samaan narigide o'o sa? Taalo o'o nambaanya tadinö ana ndanaaya ka unggodho?"

<sup>38</sup> Aaga eema nya Masala eege tadinö ko'do ii'di aaga ta'dingga ka ta'b'badene. Korongore asaasa, illi tuu'da kagi'di."

<sup>39</sup> Isigi keere kene ka oona afe'de, eema nya Masala indiri tumma na unggodho no.

<sup>40</sup> Afada afe'de aduna eege ka tarigide, a tarigide talingga eege ka iiye, taalo kussu niümö meenee kadirina iini.

<sup>41</sup> Afada tiidoona iki eene, "Kaleefe aaga tarigide, aaga tagünü? Anda 'dimo! Asa uru tö'dö. Aaga assa kide, 'Bii'bala ma Tadü'dü tümmününja ka iisine ma kadu tanno oroko no.

<sup>42</sup> Aaga fikik'dö angnga tagunggeene, a ömö'di ya tümmünü a'a a kadu unggno keda kita."

*Tümmü adene na Yasu*

(Matta 26.47–56; Lüüka 22.47–53; Yühanna 18.3–12)

<sup>43</sup> Kini ka aleefe ateema kungngo ya, a'da adhe Yahüusa ya kadaladene ya ndama tanno ö'dö kada'baaga kafünü eera no, nya kadu kungngo iini a maguufi a nakulu'ba, a naguugaara ma ka'boge nya

katalaana ma seriye nya kadüffü ma anya kagürünü eege.

<sup>44</sup> Ömö'dü ya ümmünü i'i a kadu ya, ala eege ka niümö ma tussu iini iki eene, "Ömö'dü yeede ka tööjüü i'i ya, i'i ya miini, aaga tümmü i'i aaga co ku'b'ba iini aaga tafa kini dhorro."

<sup>45</sup> Ka Yahüusa ka ndö'dö ya ikiri ka öö'dö ka Yasu kete iki iini, "Ka Tatalaana!" ikiri ka tööjüü i'i.

<sup>46</sup> Kikiri ka 'dinggö kini ana iisine karefe i'i.

<sup>47</sup> Ömö'dü öccö ana kene a'dingga ana ko'do kene kete tafanna kulu'ba ma dhonggoro mo, eedhe tasigira ya alingga nya uugaara ma ka'boge ya ka neeso armuna.

<sup>48</sup> A Yasu tiki eene, "Kö'dö aaga kürö a maguufi nya nagulu'ba afa a'a ka ka'da 'buugu?

<sup>49</sup> Naganeene a'a nya aaga, a naguru, nalaanaga kadu ka 'booro ma la ma Masala aaga taalo kümmü a'a lakiini tumma no ka Kasorne ma Masala no eege kungngo ada kadalingga iini ungno."

<sup>50</sup> A kadu nye'd'de kungngo tarünö ka inyi i'i ku'bu.

<sup>51</sup> A 'bii'bala inggide ö'dö kini keere ana oona ku'bu illi i'i aramba oona a 'banden'di, kikiri ka tümmü i'i.

<sup>52</sup> İkiri ka tapa eene ka ten'di, ara ka arünö ana oona ku'bu.

*Yasu ka kidha ma naguugaara ma Yahüüdü*

(Matta 26.57–68; Lüüka 22.54–55, 63–71; Yühanna 18.13–14, 19–24)

<sup>53</sup> Kümmü Yasu kateefe tunggu co uu-gaara ma ka'boge, kikiri naguugaara ma ka'boge nya naguugaara ma anya, nya katalaana ma seriye ka temmi eege in'dili kungngo.

<sup>54</sup> A Bütrüs tako'd'o kini keere ndama ku'b'ba kalla kaco 'booro ma 'di tiya uu-gaara ma ka'boge, ikiri ka co aduna kadu katille issi, ille nya eene.

<sup>55</sup> A naguugaara ma ka'boge nya na ataya ma 'buugu ma temmi ma Yahüüdü tanno kagiirü niümö matra tümmü Yasu ma tiidi i'i iini, lakiini eege kitaalo kaduna.

<sup>56</sup> Kudumma kadu kadhabbu kafünü korokoro iini ka oona illi tumma neene kam-bananjaana ku'bu, kitaalo ka unggodho.

<sup>57</sup> A kadu könö tafiki'dö ana kene kafünü eema iini ka oona kiki a'da,

<sup>58</sup> "Kaföönyö unggno iini ka tiki a'da, Ara a'a tarüdü la ma Masala ya kadu ka tarü'böönö ana iisine ya, na a'a sa karü'bü könö a fungngö iidoona taalo ömö'dü arü'böönö ana iisine."

<sup>59</sup> Nggeege a tumma neene tafada kam-bananjaana ku'bu.

60 İkiri uugaara ma ka'boge ka fiki'dö ko'do kene kidha indini Yasu, "Taalo tumma müdüdü ka tatiraana? Ka eema tiya kadu kadeema küdü ko'do ya?"

61 Aki'döönö dhore kungngo, taalo adiri niimö, uugaara ma ka'boge tindini i'i afe'de, "O'o 'dee na Almasiilii 'Bii'bala ma Masala mana baraka mo?"

62 A Yasu tiki iini, "A'a namiini ara aaga sa kadinö ka 'Bii'bala ma Tadü'dü ka temmi ka Masala ka 'dakeyi ma niisö ma kuri, ka tadhe ka tülüögü ka 'dotombo'do."

63 Uugaara ma ka'boge tarisina ten'di iini ka oona iki, "Ara angnga tasaasa ömö'dü ma tadin'i ka tumma tanno afe'de?

64 Kaföönyö aaga teela Masala niini, aaga kiki aaga nya 'bitüngnö?' Kikirii ka tiki eege nye'de kungngo, eege nye'de kasaasa i'i a'da eyi.

65 A kadu öccö ta'binyyi alaaga iini ka oona, kaküdhü i'i ka iyye, kabbü i'i ana isine, kiki iini, "Eema." A nasigira ta'duga i'i katabbü i'i.

*Bütrüs a'düsünü Yasu*  
(Matta 26.69–75; Lüüka 22.56–62;  
Yühanna 18.15–28)

66 Ka Bütrüs ka taleefe ka iyye ma 'büggööri ka ta'buugu ya a'da mö'dö 'badaada ma alinggo nja uugaara ma ka'boge mo.

67 Mikiiri ka tasala Bütrüs ka tille issi masa kini ko'do miki iini, "O'o ka eyi tiya üüdü naganeene o'o nja Yasu ya ma Nasira ya!"

68 A'düsünigü iki, "Taalo a'a nussu niimö yüüdü ka teema ya," ikiri kico aküro ndama a 'büggööri.\*

69 Mikiiri 'badaada ka tassa kini ko'do madirina eema a kadu tanno kete no miki, "Ömö'dü ya nja eene."

70 A'düsünigü afe'de. Amussu kungngo, a kadu na 'dingnge kete no kiki a Bütrüs, "Tumma dhorro o'o nja eene, kudumma üüdü o'o na taga Jaliil."

71 İkiri ka teela eyi yiini aküdünü eene iki a'da, "Taalo a'a nussu ömö'dü yaada ka teema tumma miini ya."

72 Amussu kungngo a dhümbü tafara afe'de ikiri Bütrüs ka tagiigü tumma na Yasu a'da, "A dhümbü ka tüfürü tafara teera ya, ara o'o ta'düsünü a'a tiidoona," ikiri ka ndafara.

## 15

*Yasu kidha ma Bilatus*  
(Matta 27.1–2, 11–14; Lüüka 23.1–5;  
Yühanna 18.28–38)

1 Ligitaka so'd do, ikiri naguugaara ma ka'boge nja kadiifi nja katalaana ma seriye

nja kadu ma la ma kadiifi ma Yahüüdü nye'de ka tageema ana ka oona, kikirii ka tümmü Yasu kadimi'di i'i kanangnga i'i a Bilatus.

2 İkiri Bilatus ka tindini i'i, "O'o no uugaara ma Yahüüdü?"

A Yasu tiki iini, "O'o natiraana."

3 A naguugaara ma ka'boge tafünü tumma ma korokoro kini ka oona kadhabbu.

4 A Bilatus tindini i'i afe'de, "Taalo niimö müdüdü ka tiraana? Naföönyö o'o eema ya kadu kadeema küdü ko'do ya?"

5 A Yasu taalo adiri niimö 'do a Bilatus tidhi adhere.

*Yasu ümmününja ka inde*  
(Matta 27.15–26; Lüüka 23.13–25;  
Yühanna 18.39–19.16)

6 A Bilatus katadaada amanaga ömö'dü ma pabuuusu kürö unggodho ndama pabuuusu ya kadu kasaasa ya ka uuru ma taanyara.

7 Ömö'dü inggide ana eere a'da Barabas aganna ka pabuuusu nja kadu tanno oroko no, na kirina kadu ka uuru ma taga'da 'buugu.

8 A kadu tawagaana oona, kiki a Bilatus a'da üünii niimö yiimi ka tüünidene katadaada ya.

9 İkiri ka tiki eene, "Kasaasa aaga a'a a'da napa ada ka uugaara ma Yahüüdü?"

10 Kudumma iini ka tussu a'da naguugaara ma ka'boge kakirümi oona kene kümümüni Yasu iini.

11 A naguugaara ma ka'boge tafünü kadu a'da kapa ka Barabas.

12 A Bilatus Albunti tiki eene afe'de, "Ara a'a tönyöö ana ömö'di tiya ada ka tümmüni i'i a'da uugaara ma Yahüüdü ya ma?"

13 Keele ka tumma kiki, "Bünnü i'i ka salii'bi."

14 İkiri ka tiki eene, "Amana? Agüüni minna ya toroko ya?"

Kakogoona ma tiidhe kiki, "Bünnü i'i ka salii'bi!"

15 A Bilatus tasaasa kadu ka'diila nja iini nye'de kungngo, ikiri ka tapa kene ka Barabas. Kene ka ndabbü Yasu a tiiso ya, kanangnga i'i eene ma tara co tabünnü i'i ka salii'bi.

*Nasigira ka üünii midhi ku'bu ana Yasu*  
(Matta 27.27–31; Yühanna 19.2–3)

16 A nasigira tüögü Yasu kaco 'di ma uugaara kawagaana nasigira koona.

17 Kagirñi ten'di ma öödhe mo kini ka oona kadagüüfü tagiya ma immi kagirñi kini ka üüdü.

\* 14:68 14.68 A nakasorne könö kiki a'da, afara dhüm'bü.

<sup>18</sup> Kööjülü i'i kiki, "Ungngo kööjülü o'o Uugaara ma Yahüdü."

<sup>19</sup> Kabbü i'i ka üüdü a tam'bala, ka'binyyi alaaga iini ka oona küürü kini kidha ana küüge.

<sup>20</sup> Kene ka ndüünü midhi ku'bu ana i'i ya, kakirnö ten'di ma öödhe mo iini ka oona kara kagirmi en'di yiini kini ka oona ka'duga i'i ma taco tabünnü i'i ka salii'bi.

*Yasu abünnünja ka salii'bi*  
(Matta 27.32-44; Lüüka 23.26-43;  
Yühanna 19.17-27)

<sup>21</sup> Katakümmünnü Samaan ya ma Kerewan ya pupa tiya Askander nja Rufas ya, kapusu ada i'i ka tümmü salii'bi a'da aleefe tungunu co 'di ndama siga kungngo.

<sup>22</sup> Köö'dö ana Yasu ka 'buugu tiya ana eere a'da Jüljüsä ya, 'buugu ma Dho ma Üüdü.

<sup>23</sup> Kanangnga kembelö iini kada tonggoonyo a tümmü tanno 'diiri no, aanu ka tooye.

<sup>24</sup> Kabünnü i'i ka salii'bi, kasümünaana en'di yiini kene ku'bu kafanna muduru kassa kide ata a'dingga ka mada.

<sup>25</sup> Kabünnü i'i ka salii'bi ana ndanaaya ka iidümmü kafünü egüsö ligitaka kungngo.

<sup>26</sup> Kada rigiri tumma kiki, "UUGAARA MA YAHÜÜDÜ."

<sup>27</sup> Kabünnü i'i ka salii'bi nja kanyoro keera, ya ndama niisö ma kuri, aya ndama niisö ma küüle.

<sup>28</sup> [Afa ma sorne ka tiki, "Kakinaana i'i ka oona nja kadu na oroko no.]

<sup>29</sup> A kadu ma nafiiñi tasala kini ka'digi'dü nanggüüdü keela i'i kiki, "O'o nara taga'da la ma Masala na o'o sa karü'böönö a fungngö iidoona.

<sup>30</sup> Oolona eyi yüüdü, nö'dö ku'bu ndama salii'bi!"

<sup>31</sup> A naguugaara ma ka'boge nja kata-laana ma seriye kamidhi i'i afe'de, anno teema ana ka oona kiki a'da, "Oolona kadu öccö assa taalo ambaanya toolona eyi yiini!

<sup>32</sup> Aaga fa ka Almasiihi tiya, Uugaara ma Israyıl ya öödö ku'bu ndama salii'bi, amang kidi tiji i'i, ungngo tamma kini." A kanyoro no bünnünja ku'bu nja iini keera no teela i'i afe'de.

*Inde na Yasu*  
(Matta 27.45-56; Lüüka 23.44-49;  
Yühanna 19.28-30)

<sup>33</sup> A 'buugu ta ndüülii ka oona nye'de de uru kungngo kadara ka muru ma siiya.

<sup>34</sup> A 'buugu ka ndamuru ma siiya ana ndanaaya kiidoona ya, ikirü Yasu katadiya ya ko'do iki, "Iloy, Iloy, lima sebakatani?" I'i iki a'da, "Masala, Masala, minna agu o'o ninyi a'a ku'bu?"

<sup>35</sup> A kadu na 'dingnge kete no taföönyö tumma no kiki a'da, "I'i ya ümmünü İliya."

<sup>36</sup> Ömö'dü könö tareere a'duga 'banden'di onyo'do ka kembelö, anangnga ka üüdü ma tam'bala amününgü co iini a'da ooye iki, "Aaga öödhü angnga tasala İliya ka ta'dinig i'i ku'bu ya."

<sup>37</sup> A Yasu tadhiya ko'do agiri tanya na eere no eyi.

<sup>38</sup> A ten'di ma la ma Masala töörese ndama oo'do alla aco aa'bu.

<sup>39</sup> Uugaara ma nasigira ta'dingga kete ma salii'bi kini ka föönyö Yasu ka tadhiya asala i'i ka teyi iki, "Tumma dhorro, ömö'dü ya 'Bii'bala ma Masala i'i yungngo."

<sup>40</sup> Ka kanna iiya kide kadhabbu kadïnö co ndama ku'b'ba, Mariyom Almajdaliya minggide nja eene, nja Mariyom niimö ma Yaguub tiya idhilli ya nja Yüüsö, nja Salooma.

<sup>41</sup> Eege kungngo ka kunggeene nja Yasu kalinggo ada iini, kini ka taganna ka Jaliil ya nja tököönö kadhabbu kasirügi co Örsalium nja iini.

*Tatü'böönö ma Yasu*  
(Matta 27.57-61; Lüüka 23.50-56;  
Yühanna 19.38-42)

<sup>42</sup> Ka uuru ma tindinaana oona ku'bu a 'buugu kanda siiya, a'da üfürü uuru ma Sa'bidi tö'dö ya.

<sup>43</sup> İkirü Yüüsif ya ma Raama, ya taga adaya ma la ma kadiifi ma Yahüüdü, i'i aganeene indhgü tauugaara na Masala, ikirü ka takuru rüsü ana eedi aco ka Bilatus, iki iini a'da, anangnga oofo ma Yasu iini.

<sup>44</sup> A Bilatus tadhere iini ka föönyö a'da Yasu anda eyi. Kümmünü uugaara ma nasigira indini i'i, "İlli Yasu kada keyi?"

<sup>45</sup> Kini ka taföönyö tumma ka uugaara ma nasigira ya, ikirü kafa ka Yüüsif a'duga oofo ma Yasu.

<sup>46</sup> İkirü ka taana ten'di ka'dinaka i'i ku'bu ndama salii'bi, kaküdhu i'i ka oona, katü'bü i'i ka la ma oofo iini ka takü'dödene ka 'dakamba. Kikirü ka tagü'dü misi keere ka inye ma la ma oofo.

<sup>47</sup> A Mariyom Almajdaliya nja Mariyom niimö ma Yüüsö tadinö ka 'buugu tiya eene ka anangnga i'i kide ya.

## 16

*Tafiki'dö na Yasu Almasihi  
(Matta 28.1-8; Lüüka 24.1-12;  
Yühanna 20.1-10)*

<sup>1</sup> Ka uuru ma Sa'bidi kanco kürö ya, mükiri Mariyom Almajdaliya nja Mariyom nüümö ma Yaguub nja Salooma kadaana kondho meene kaco tasanna ka Yasu ka oona.

<sup>2</sup> Ka taka ka ndaadha ka uuru ma Lahada ya, a ndanaaya ka ndö'dö ko'do, kikirii ka co la ma oofo.

<sup>3</sup> Keema kindini ajeene kiki a'da, "Mada i'i yungngó atagürü dhembeliili kaja ka inye ma la ma oofo 'bitingngö?"

<sup>4</sup> Kene kadasala co ya, kaasala dhembe-liili ka kürüdene a'da ma dhabbu.

<sup>5</sup> Kikirii ka co la ma oofo, kasala ömö'di ka temmi ndama nüüsö ma kuri, a ten'di tiya 'bassa ya ka oona, a ri'ba tümmü eege.

<sup>6</sup> İkiri ka tiki eene, "Aaga fa tarib'a! Ka asaasa aaga Yasu ya ma Nasira ya bünnünja ka salii'bi ya, itaalo kita, afiki'dö, kita iini kada kannna kide ya i'i yungngó."

<sup>7</sup> Lakiini aaga unggene aaga co tadirina eema a kadalaadene nja Bütrüs, 'Ti a tadhe aaga aco Jaliil, aaga sa kico tassa kini kanna, afa ma tiya iini kada tirina aaga ya kungngo."

<sup>8</sup> Käfri a kürö ndama la ma oofo kadhere a ri'ba tümmü eege, ka arünö, kitaalo kadirina ömö'di 'do a ri'ba katümmü eege.

*Yasu atele oona a Mariyom Almajdaliya  
(Matta 28.9-10; Yühanna 20.11-18)*

<sup>9</sup> [Ka Yasu ka fiki'dö ka inde ligitaka so'd'do ka uuru ma Lahada ya, ala oona a Mariyom Almajdaliya ka dhidha mo iini ka tagasoro nagoronggore na oroko no ka oona ka iidümmü kafünü eera no.

<sup>10</sup> Mikirii Mariyom ka tunggenee maco tadirina eema a kadalaadene tanno iini, maco maduna eege ka tamüürü kafara 'do.

<sup>11</sup> Kitaalo kamma ka tumma tanno oono, kono ka tiki eene a'da i'i afiki'dö ka inde madadönö kini.

*Yasu adele oona a kadalaadene keera  
(Lüüka 24.13-35)*

<sup>12</sup> A Yasu tatele oona, ana oona töccö ala oona a kadalaadene töccö keera, a'da kunggunu co a nya.

<sup>13</sup> Kikirii ka tafada kadirina eema a türeene ma kadalaadene, kitaalo kamma ka tumma tanno eene.

*Yasu adele oona a kadalaadene na  
ada'baaga kafinü unggodho no*

*(Matta 28.16-20; Lüüka 24.36-49;  
Yühanna 20.19-23; Kadafünni 1.6-8)*

<sup>14</sup> Keere kungngo a Yasu tatele oona a kadalaadene tanno iini no ö'dö kada'baaga

kafünü unggodho no, a'da kagu eema amana hetti eene kudumma eene taalo kamma nja takidhö ka nanggeedi tanno eene kanu ka tamma ka kadu tanno adinö kini iini ka fiki'dö no.

<sup>15</sup> İkiri ka tiki eene, "Aaga unggene aaga co ka 'büdhülü nye'd'de, aaga co tadünnü tumma ma İnjili co a kadu nye'd'de kungngo.

<sup>16</sup> "Ömö'di ya amma ya, ambeesedene olonadene, ömö'di ya taalo amma ya aama.

<sup>17</sup> Eema ya ara tö'dö ya kadu na tamma ana eere tiya eede kara tasoro nagana'bu, keema tumma öccö keefe.

<sup>18</sup> Kümmü nöönä ana iisine, kara tooye tümmü taalo nüümö a tagu euge 'do, kama iisine ka kadu tanno amaara no ka nanggüdü ka'diila."

*Yasu a'diniginja co 'dotombo' do  
(Lüüka 24.50-53; Kadafünni 1.9-11)*

<sup>19</sup> Ka Uugaara Yasu ka ndageema nja kadalaadene tanno iini ya, inynyo 'dotombo' do emmi ka Masala ka nüüsö ma kuri.

<sup>20</sup> İkiri kadalaadene ka tunggunaana ku'bu kadünnü tumma ma Masala ka na'buugu nye'd'de. A Uugaara tagalinggo nja eene, anangnga türü niini eene ka oona a linggo tanno eene eefe no.]

## İnjülli Lüüka Tafa'da tumma

Lüüka agarigiri sorne ya nja sorne ma Linggo na Kadafüni, i'i arigiri ada sorne a Yahüüdü nja kadu tanno taalo ka Yahüüdü no. I'i ka eyi tiya iini taalo ataga Yahüüdü, i'i amma ka Yasu. Lüüka eema tumma ma tefe ka 'dii nja linggo tanno Yasu na adho ka fiinii no amang kaja tagussu.

Lüüka aga arigiri ma teenedene tanno Yühanna ya tatambeese ya nja teenedene tanno Yasu. I'i arigiri ma tumma nja linggo tanno Yühanna ya tatambeese ya, nja eema tiya agüüni adene üfürü Yasu tafü'dü linggo niini. Lüüka ala angnga a'da tasaasa na Masala ka kadu nye'd'de. A Yasu tagoolona aka ka maara a nagürüünü kö'dö kada'baaga kafinii eera, adagasoro nagana'bü ka ömö'di ka oona. Lüüka anangnga tafeene ma tumma ma ömö'di ma Samira ya amünügü taga Yahüüdü ko'do, ya kanyooro katabbü i'i ya (Lüüka 10). Ala tafeene ma tumma ma 'bii'bala tiya aga'da eema yiini ya, lakiini kini ka tapadaga ka pupa tiya iini ya, a pupa yiini tamma kini a dhodho (Lüüka 15).

Lüüka ala dhügürü nja inde tanno Yasu ka fiki'dö ka inde. Aala oona a kadalaadene tanno iini, kussu a'da i'i efe ka 'dii. Yasu iki a'da ara i'i tagürünü Koronggore ya Insili ya kene, ikirii ka tafada aco 'dotombo'do.

<sup>1</sup> Kadu kadhabbu karigiri tumma ma eema tiya agalinggo adene kaja ka söödö ya.

<sup>2</sup> Egee karigiri eema yüdü ka taföönyö ka kadu tanno adinö ka eema tiya ka dhidha ya, kadagalinggo ada a Yasu no.

<sup>3</sup> İkirii a'a ka tagüüri tumma na miini no tekere afa meene ka tafü'düdena ka dhidha nye'd'de kungngo, nagiri nunggu o'o no Tiyafilos na ömö'di ya adho ka fiinii dhorro ya,

<sup>4</sup> amang küdü tussu a'da ka dhorro tumma nüüdü ka taföönyö no.

*Tadiridene ma teenedene ma Yühanna ya tatambeese ya*

<sup>5</sup> Ka ürüünü ma tauugaara tanno Hirüdüs, ka anya ma Yahüüdiya, aganna ta'boge kide ana eere a'da Sakariya ama 'bügööri tiya Abiya nja aka tammo iini mana eere a'da Alisabet 'bandaada ma Harüün.

<sup>6</sup> Sakariya nja Alisabet kümmü tumma ma Masala ana eedi dhorro kaafa kide dhindho.

<sup>7</sup> A eege ka ndakidhindharu a laala titaaloo kene kudumma Alisabet ka tamele.

<sup>8</sup> İkirii uuru ma linggo tanno Sakariya nja kadu tanno iini ka ndö'dö, ikirii ka co talinggo ka Masala kidha.

<sup>9</sup> Tafiqi ma linggo ma ka'boge ikirii tamduru ka 'dinggö kini ma ta'd'digi kondho ku'bu. İkirii ka co la ma Masala.

<sup>10</sup> A'da kadu kungngo kürö kadhabbu kafara ka Masala a'da ma dhügö kondho.

<sup>11</sup> A tadhingga ma Masala tatele oona ndama nüüsö ma kuri ma fü'deene ma kondho ka tadhügö kide mo.

<sup>12</sup> İkirii Sakariya ka tasala tadhingga asinii ko'do a ri'ba tümmü i'i.

<sup>13</sup> A tadhingga tiki iini, "Sakariya, fa tarı'ba, maföönyö Masala fara yüüdü, aka müüdü Alisabet Mara tagüröönö ma teene 'bii'bala nanangna eere iini a'da Yühanna.

<sup>14</sup> O'o ta'deema a kadu tadhodho kadhabbu ka teenedene tanno iini.

<sup>15</sup> Kudumma iini ka tidhindhü kidha ma Uugaara. Taalo ara tooye ngeeli nja eema tiya üüfü ya, adigine a Koronggore tiya Insili ya a'da aleefe ka nüümö ka feelü.

<sup>16</sup> Afada a kadu ma Israyil kadhabbu unggu egee ka nafüümö tiya Uugaara Masala meene mo.

<sup>17</sup> Ara tunggeene ka Masala kidha, a koronggore tiya İliya a türü tanno iini, tafada a kafaafa uuraana egee koona nja laala, a kadu na oroko no talingo eema ya adho ka fiinii ma ta'dara ya, amang kene tindinaana kadu ka Uugaara ku'bu."

<sup>18</sup> A Sakariya tiki a tadhingga, "Ara a'a tussu tumma no nya? Sa a'a tadhru aka meede manda dharu afe'de."

<sup>19</sup> A tadhingga tapadaga tumma iini iki, "A'a na Jibrayınl, na'dingnge ka Masala kidha. Oogo magürünü a'a a'da nadirina tumma na o'o.

<sup>20</sup> A 'bitüngngö ya ara onggo'do müüdü timi'didene nitaalo nara tussu ka teema idhi a 'bii'bala teenedene kudumma üüdü taalo namma ka tumma tanno eede ara o'o tüü nggee idhi a tumma neede tö'dö timin'da."

<sup>21</sup> A kadu takamoodo ku'bu kürö ma tündhigi Sakariya kadhere kini ka tütügü co la ma Masala.

<sup>22</sup> Kini ka öö'dö kürö, taalo ussu ka teema nja kadu, kikirii ka tussu a'da i'i asala nüümö ya efe ya ka la ma Masala eema nja eene ana ii sine itaalo alneege a nüünö.

<sup>23</sup> Ka Sakariya ka ndatüümö fungngö ma linggo tanno iimi ya, ikirii ka tapadaga co 'dii kita iini.

<sup>24</sup> Ndama naganuuru tanno miini no aka miini Alisabet tagüröönö maküdhü eyi

yoono ma tagiidi nagatereene kündümmü, miki,

<sup>25</sup> "Uugaara magüün tumma no ana a'a ka naganuuru tanno oono ka tassa kede mabbü modolo kede ka oona ka kadu ka teene."

### *Teenedene na Yasu*

<sup>26</sup> Nagatereene ma tagüröönö tanno Alisabet ka ndö'dö ka iidümmü kafünung godho ya, mälkirü Masala ka kürünü tadhingga Jibrayiil kaanya minggide mana eere a'da Nasira ka Jaliil,

<sup>27</sup> ka 'badaada minggide ma tölöömü mana eere a'da Mariyom, ömö'dü inggide agümmünü oogo ku'bu, ana eere a'da Yüüsif a 'bandaada ma Dawud.\*

<sup>28</sup> A tadhingga co kono, iki oono, "A'a nööjüü o'o, natengese o'o ka kadu ka teene ungodho o'o kungngó! Uugaara taneene nja o'o."

<sup>29</sup> A ri'ba tümmü oogo ma tagesenana eedi ku'bu miki a'da tööjüü öjö eege kungngó 'bitingngó.

<sup>30</sup> Ikiri tadhingga ka tiki oono, "Mariyom, fa tari'ba, naduna o'o ta'diila ka Masala kidha.

<sup>31</sup> Ara o'o tagüröönö neene 'bii'bala nanangnga eere iini a'da Yasu.

<sup>32</sup> Ara tiidhündhi ara tana eere a'da 'Bii'bala ma Masala tammo ko'do mo, a Masala Uugaara mara tanangnga i'i ka tauugaara tanno pupa tiya iini Dawud.

<sup>33</sup> A tauugaara ma 'dü tiya Yaguub ta'billi a tauugaara niini taalo kara titaalo."

<sup>34</sup> A Mariyom tiki a tadhingga, "Ara tumma no töödö nya a'da taalo a'a nussu ömö'dü ya miide ya?"

<sup>35</sup> A tadhingga tapadaga tumma oono iki, "Koronggore ya Insili ya ara tadigi küdü ka oona, a türü ma Masala tammo ka 'dotombo'do mo taküdhü o'o ka oona ka tanangnga tagüröönö o'o, a 'bii'bala yüüdü ka teene ya a tana eere a'da 'Bii'bala ma Masala ya Insili ya.

<sup>36</sup> Mündä Alisabet ma siliga ma o'o manda dharu mo mungno magüröönö a nagatereene miini ka ndiidümmü kafünü ungodho, a'da kiki kadu a'da mamele.

<sup>37</sup> Kudumma nüümö ma takilinigi Masala co kungngó itaalo."

<sup>38</sup> A Mariyom tiki, "A'a na madasaga tammo Uugaara, a tumma nüüdü ka tiraana no, fa kene küünidene ana a'a." Ikiri tadhingga ka tunggeene.

### *Mariyom meeße tassa ka Alisabet*

<sup>39</sup> Mikirü Mariyom ka tunggeene ka naguuru tanno miini no mareere macoanya ma ka na'dikinya ma Yahüüdiya.

<sup>40</sup> Malla maco kita a Sakariya mööjüü Alisabet.

<sup>41</sup> Ka Alisabet ka taföönyö tööjüü na Mariyom no, a 'bii'bala tafiri ko'do kono ka feelü, a Alisabet tadigini a Koronggore tiya Insili ya.

<sup>42</sup> Ma'dili ko'do miki, "Manangnga Masala baraka o'o ka iiya ka söödö nye'de kungngó, manangnga baraka o'o ma 'bii'bala tiya üüdü ka feelü ya.

<sup>43</sup> A'a na mada a nüümö ma Uugaara tiya eede töödö tassa kede.

<sup>44</sup> Kede ka taföönyö tööjüü nüüdü, a 'bii'bala tafiri ko'do kede ka feelü a dhodho.

<sup>45</sup> A'diila nja o'o küdü ka tamma tanno öödö nja oono no ndama Uugaara kara talingga adene."

### *Tüüsü ma Mariyom*

<sup>46</sup> A Mariyom tiki,

"Eedi yeede iindhiigü Uugaara ko'do,

<sup>47</sup> a koronggore yeede tadhodho ada Masala tammo oolona a'a mo.

<sup>48</sup> Kudumma oono ka tagüüri tiicolo ma eedi tiya madasaga tammo oono. Ndama uuru tanno ara sere in'dilli tindhiigü a'ko do.

<sup>49</sup> Kudumma ma eema tiya iihindhi ya Masala tammo ana türü mo kadagalinggo ada a'a ya eege yoona a'da ma insili.

<sup>50</sup> Mana 'bangnga ma kadu tanno ari'ba oono no, mosso ka sere tiya maco ka tiya.

<sup>51</sup> Magalinggo a türü ma nüüsö tanno oono, maparsaana kadu na 'dinigi oona neene co'o do no maga'da tumma neene ka nanggeedi no.

<sup>52</sup> Muurugu naguugaara keere ka tauugaara tanno eene, mara ka ta'diniga kadu na iicolo ka nanggeedi no ko'do.

<sup>53</sup> Manangnga na iire kagu eege no ka tüüsü mara ka tuuru kadu na üüsü no ka tino ana iisine 'döngngönyö.

<sup>54</sup> Oogo mafa ka tumma tanno oono ka tadirina a kafaafa ma angngó no, oogo mandöö'dö takinyigi tasaga yoona Israyil, magüigü 'bangnga miini.

<sup>55</sup> Afä moono ka tadirina Abrahiim nja kadaada miini, a'da ara oogo tafa kene ta'billi."

<sup>56</sup> A Mariyom taganeene nja Alisabet a nagatereene kiidoona massa ndapadaga co 'dii kita oono.

### *Teenedene na Yühanna tatambeese*

<sup>57</sup> Ka uuru ma teene tanno Alisabet ka ndö'dönja oono ya, mikiiri ka tageene 'bii'bala.

<sup>58</sup> A siliga moono nja kadu tanno akete kono no taföönyö a'da Uugaara ala 'bangnga miini ma dhabbu mo, kikiiri ka öö'dö kadhodho nja oono.

<sup>59</sup> A Alisabet tüyü füngngö iidümmü afünü iidoona ya, a kadu tö'dö ma tara 'bii'bala kanangnga eere ma pupa tiya iini iini a'da Sakariya.

<sup>60</sup> Mikiri nüümö ka anu miki a'da, "Ara tana eere a'da Yühanna."

<sup>61</sup> A kadu tiki oono, "Taalo ömö'di ka siliga tiya üdü ana eere nggeege."

<sup>62</sup> İkiri kadu ka tage'e pupa ma 'bii'bala kindini i'i, "Ara o'o tanangnga eere a 'bii'bala a'da mada?"

<sup>63</sup> Yungngö a Sakariya ka tarangnga maraayo, ikiri eere kide a'da Yühanna, a kadu tadhere nye'de kungngö.

<sup>64</sup> A Sakariya tadhe ko'do atinggildhe ka onggo'do alheege ana tumma anangnga ta'diila a Masala.

<sup>65</sup> A kadu nye'de kungngö tasini ko'do a ri'ba tümmü eege. A tumma no tadhalu ku'bu a kadu teema iini ka naanya ma Yühüdiya ka oona 'do.

<sup>66</sup> A kadu na föönyö tumma no tadhere ka indineene, "'Bii'bala ya 'dee ara ta minna?" Kudumma a türü tanno Masala kungngö iini ka oona.

#### *Sakariya amana ta'diila a Masala*

<sup>67</sup> A Koronggore ya Insili ya tadigi ka pupa tiya Sakariya ka oona eema ta'diila a Masala iki,

<sup>68</sup> "Aaga nangnga ta'diila Uugaara, Masala ma Israyil,  
kudumma oono ka öö'dö ka toolona  
kadu noono.

<sup>69</sup> Magürünü tatoolona ya idhündhi ya kaja ndama 'büggöörö tiya tasaga tiya oono Dawud.

<sup>70</sup> Af a moono ka tageema a nagonggo'do ma nagane'bi tanno oono na insili no 'billi,

<sup>71</sup> mara toolona angnga ka diidi ma angnga,  
nja tanno akirimi angnga no nye'de kungngö.

<sup>72</sup> Mara tala 'bangnga a kafaafa ma angnga,  
magügi tumma noono ka tamidaana  
na insili no,

<sup>73</sup> tumma noono ka tamidaana nja pupa  
tiya aja Abrahiim no,

<sup>74</sup> a'da ara oogo toolona angnga ka diidi ma  
angnga,  
amang kaja tafa tari'ba, angnga  
tagümmü oogo a nanggeedi dhorro.

<sup>75</sup> A angnga taga kadu tanno a'diila kinsili  
ka nanggeedi kidha moono,  
a naganuuru ma tefe ka 'di tanno aja  
nye'de kungngö.

<sup>76</sup> O'o 'bii'bala, ara o'o ta ne'bi tiya Masala  
tammo ko'do mo,

na o'o tooso ka Uugaara kidha na o'o  
co tindinaana fiin iini ku'bu,

<sup>77</sup> na o'o talaana kadu noono amang kene  
tussu fiin ma toolonadene,  
ma ta'duga tatoroko eene ka oona,

<sup>78</sup> Masala maaja mana 'bangnga mana  
muuyu,  
mara ta'dara töyeeene ma toolonadene  
ma takara kaja ka oona ndama fiin  
ma ndanaaya.

<sup>79</sup> Öyeene ada ka kadu tanno emmi ka  
talüllü  
nja koronggore ma inde,  
ara ka talaala angnga ka fiin tiya a'diila  
ya."

<sup>80</sup> A 'bii'bala taginggridene ka tuu'da nja  
koronggore, ada kananaga co dhüle assa  
ka ndadele oona Israyil.

## 2

#### *Teenedene na Yasu*

(Matta 1.18-25)

<sup>1</sup> Ka nagürünü tanno miini no kagöö'dö  
tumma ndama uugaara tiya dhabbu ya ma  
Rööma ya, Akustus Kayisar, a'da a kadu  
tinnidene ka naanya ma Rööma koona  
nye'de kungngö.

<sup>2</sup> Tineene na dhidha no eege kamiini, ka  
ürüünü tiya Kariniyus kada uugaara ma  
Süüriya ya.

<sup>3</sup> A kadu tikiiri ka tunggeene kaco naanya  
tanno eene, ma co takiri nagereene neene  
ku'bu.

<sup>4</sup> İkiri Yüüsif ka tunggeene ndamaanya  
ma Nasira ja Jaliil matra co Beetlaham ka  
Yühüdiyaanya ma Dawud ya siliga tiya  
iini ya.

<sup>5</sup> Miini kara co takiri nagereene neene  
ku'bu i'i nja 'bala tammo iini Mariyom,  
a'da magüröönö.

<sup>6</sup> Kene ka ndö'dö ka Beetlaham ya, ikiri  
teene ka öö'dö ka Mariyom.

<sup>7</sup> Mikiri ka tageene 'bii'bala ma dhidha  
kada miide, maküdhü i'i ka oona  
ma'düürü i'i ka ma ma kuri ma leefo, a  
'buugu ma füngngö ka titalo ka la ma  
kafala.

#### *Katasana nja kadhingga*

<sup>8</sup> Ka lodho tiya miini ya katasaana king-  
gide kaguri ana eema ma eriüdö, kala-  
galanjaana kide ooso kungngö.

<sup>9</sup> İkiri tadhangga ma Masala ka tatele  
oona eene a türü na Uugaara ta'dara kene  
ka oona a ri'ba tümmü eege dhindho.

<sup>10</sup> İkiri' tadhangga ka tiki eene, "Aaga fa tari'ba kudumma eede nö'dö a'a a tumma aaga kiidhindhi ma tanangnga kadu ka tadhodho nye'd'de kungngo.

<sup>11</sup> Ka uuru tanno ageenenja Tatoolona yaada, ka anya tammo Dawud, Almasiihi ya Uugaara ya.

<sup>12</sup> Ara aaga tussu a'da tumma neede ka dhorro ara aaga taluna 'bii'bala ka taküdhi oona afüngngö ka ma ma kuri ma leefo."

<sup>13</sup> Kadhim'i ka kadhangga ka tatele oona kadhabbu, anno tö'dö ku'bu ndama a 'dotombo'do küüwe tüüsü kafünögü Masala ko'do.

<sup>14</sup> "Aaga nangnga tidihindhi a Masala ka 'dotombo'do,  
a ta'diila ka 'büdhüli nja kadu tanno oona ka'diila nja eene no."

<sup>15</sup> Ka kadhangga ka ndanyalagaago kene ka oona kaco a 'dotombo'do ya, kadirinaana tumma eene ka oona kiki, "Kico aago Beetlaham tassa ka tumma tanno a Masala ka tirina angnga no."

<sup>16</sup> Kikiri' kico areere kaduna Mariyom nja Yüüsif nja 'bii'bala kafüngngö ka ma ma kuri ma leefo.

<sup>17</sup> Kene ka ndadinö ka 'bii'bala ya, kikiri' ka tagadünögü eene afa ma tiya tadhangga ka tagadünnü ma 'bii'bala tiya kungngo.

<sup>18</sup> A kadu na föönyö tumma no, tadhore ka eema tiya katasaana kadeema ya.

<sup>19</sup> A Mariyom taafa ka tumma tanno nye'd'de mümmü oono madinigöögö miini dhorro.

<sup>20</sup> A katasaana tafada küüwe tüüsü kafünögü Masala ko'do ka eema tiya eene ka tadinö kide kataföönyö ka kadhangga kada tirina eene ya.

#### *Tanangnga eere a Yasu*

<sup>21</sup> Ka fungngö tiya 'bii'bala ka ndö'dö iidümmü afünü iidoona ya, keedhe 'bii'bala kanangnga eere iini a'da Yasu afa ma tiya tadhangga ka tanangnga iini a'da müfürü Mariyom tagüröönö ana i'i.

#### *Kö'dö a Yasu ka la ma Masala*

<sup>22</sup> Ka uuru ma tagala oona tiya eene ka ndö'dö afa ma seriye tiya Müusa ka tiki, kikiri' ka 'duga Yasu kaco Örsaliim iini ma co ndümümü i'i a Masala.

<sup>23</sup> Seriye ya Masala ya kirinja ka sorne ya iki a'da, "Aka mara teene 'bii'bala ya dhidha kada miide, ümmününja a Masala."\*

<sup>24</sup> Kene kara türri 'bii'bala ya, köö'dö ana alambo eera afa ma seriye ma Masala ka tiki.<sup>†</sup>

<sup>25</sup> Ömö'dü inggide aga kanna ka Örsaliim ana eere a'da Samaan, ümmü tumma ma

Masala ana eedi dhorro a Koronggore ya Insili ya yungngo iini ka oona indhgü toolonadene na Israyil.

<sup>26</sup> A Koronggore ya Insili ya tiki iini, "Taalo o'o nara teyi a'da taalo o'o nadinö ka Almasiihi tiya Uugaara ya."

<sup>27</sup> A Koronggore tüügü Samaan ko'do, öö'dö ka la ma Masala. Kikiri' ka öö'dö ana Yasu ma tara tüüni ada taanyara iini afa ma tiya seriye ka tiraana ka sorne ya kungngo.

<sup>28</sup> İkiri' Samaan ka tabamba i'i ana iisine anangnga ta'diila a Masala iki,

<sup>29</sup> "Ka Uugaara, nafa o'o ka tumma tanno üüdü afa müüdü ka takiki kungngo,  
sa apa ka tasaga tiya üüdü eyi ta'diila kungngo.

<sup>30</sup> Asa a'a tadinö ka toolona tanno üüdü ana ööye tiya eede,

<sup>31</sup> yüüdü ka takindinaana ku'bu ka kadu kidha nye'd'de ya,

<sup>32</sup> töyeene ma talaana kajeeene  
ma tanangnga türü a kadu tanno üüdü Israyil."

<sup>33</sup> A Yüüsif nja Mariyom tadhere ka eema tiya Samaan ka tagadünnü ma Yasu ya.

<sup>34</sup> İkiri' Samaan ka anangnga baraka eene ka oona iki a nüümö tammo iini Mariyom, "'Bii'bala ma Masala mö'dö ana i'i ma kadu töccö kara taamä, anno toolonadene ka Israyil, Masala mala eene meene ka talinggo i'i,

<sup>35</sup> Ara tadhore ünggü meene ka nanggeedi mo kürö. Afa kulu'ba mana kuri ma tadhore eedi yüüdü."

<sup>36</sup> Aka minggide maka ne'bi, mana eere a'da Hanna 'badaada ma Fanwiil ya, siliga ma Ashiir ya. Manda dharu, maka aneene nya nyuri tiya oono a nagürüünü ka iidümmü kafünü eera,

<sup>37</sup> magu'du nagürüünü kukumu kadu ka egisiö kafünü egisiö. Ma'danaga co la ma Masala mümmü oogo ana eedi dhorro mümmü tenege mafara kono oosooso nja naganuuru kungngo.

<sup>38</sup> Mö'dö ka uuru tanno miini no mafünögü Masala ko'do madageema tumma a 'bii'bala nja kadu tanno indhgü Masala a'da moolona Örsaliim mo.

#### *Tapadaga co Nasira*

<sup>39</sup> A kene ka ndafara eema nye'd'de afa ma tiya sorne ma Masala ka tiki ya, kikiri' ka tafada kaco Jaliil ka anya tammo eene ka Nasira.

<sup>40</sup> A Yasu taginggiridene ana türü adigine a ta'dara a ta'dila ma Masala.

#### *Yasu ungngo ka la ma Masala*

\* 2:23 2.23 Tö'dö kürö 13.2,12    † 2:24 2.24 Lawiin 12.8

<sup>41</sup> A nüümö ma Yasu nja pupa tiya iini tunggeene kaco Örsaliim, ka Taanyara ma tada'da ka eriüdö turi kungngo a nagürüünü.<sup>‡</sup>

<sup>42</sup> Ka nagürüünü tanno Yasu ka ndö'dö kada'baaga kafünü eera ya, kikirii ka siriögö co Örsaliim ka taanyara afa ma tiya eene ka tüünä a nagürüünü ya kungngo.

<sup>43</sup> Ka taanyara ka nco a kürö kikirii ka tafada, a Yasu toorogo ütü ka Örsaliim a'da taalo Yüüsif ussu nja Mariyom.

<sup>44</sup> Eege kiki kide a'da i'i ungngo ka kadu ka teene, katagunggeene uuru in'dili kikirii ka tawwa i'i ka kadu ka teene eege nja kadu tanno ussu i'i no.

<sup>45</sup> Kitaalo kaduna i'i, kikirii ka tafada kaco Örsaliim tawwa i'i.

<sup>46</sup> Katüümö füngngö iidoona kassa ka tuna i'i ka la ma Masala emmi nja kata-laana ma seriye atoodo ka tumma tanno eene indini eege.

<sup>47</sup> A kadu na toodo kini no nye'd'de kungngo tadhere ka tussu eema tanno iini nja tapadaga tumma eene.

<sup>48</sup> Aga Mariyom nja Yüüsif ka ndasala i'i, kuurugu oona ku'bu a nüümö tiki iini, "Bii'bala eede minna agu o'o natagüünü ana ungngo kungngo?" A'a nja pupa tiya üüdü kadhügürü ungngo ma tawwa 'buugu ma o'o 'do."

<sup>49</sup> Ikirii ka tiki eene, "Kawwa aaga 'buugu ma a'a amana? Taalo aaga kussu a'da ara a'a tanna ka 'di tiya Pupa tiya eede."

<sup>50</sup> Eege taalo kassumunaana ka tumma tanno iini ka teemaga co eene no.

<sup>51</sup> A Yasu tunggeene nja eene kaco Nasira taalo asilli tumma neene, a nüümö tagümmü tumma na miini no ka eedi mafa kide.

<sup>52</sup> A Yasu taginggiridene ka tuu'da nja ta'dara ka Masala kidha nja kadu.

### 3

*Talaana na Yühanna ya tatambeese ya (Matta 3.1-12; Murkus 1.1-8; Yühanna 1.19-28)*

<sup>1</sup> Ka Uugaara Tibariyos Kayisar ka ndagu'du nagürüünü kada'baaga ana awwa ka tauugaara tanno iini ya, aga uugaara Bilatus Albunti ka Yahüüdiya, a Hirüdüs taga uugaara ma Jalil, a'da aga uugaara örre yiini Filibüs ka Itooriya nja Tarkunitis, Lisanios taga uugaara ma Abilina.

<sup>2</sup> Ka naguuru tanno Hanan nja Kiyaafa kada naguugaara ma ka'boge ma la ma Masala, ka naguuru tanno miini no ka köö'dönja tumma na Masala a Yühanna 'bii'bala ya Sakariya a'da ungngo ka dhiile.

<sup>3</sup> Ikirii ka co a naanya tanno akete ka Ürdün no ümmünü kadu a'da köö'dö tam-beesedene amang kene taadha ka tatoroko.

<sup>4</sup> Afa ma ne'bi Asaiya ka takiri ka sorne, "Kafara takeere ka dhiile, Aaga indinaana fiinü ka Uugaara ku'bu, ka tadhidho.

<sup>5</sup> A nagoolo tadigine nye'd'de, a na'dikinya nja nakürünggürü tadhigiga ku'bu

a nafiinü nabuko'dolengge no tadhidho a narukuteene takü'din ja ku'bu.

<sup>6</sup> A kadu nye'd'de tiji toolonadene na Masala."<sup>\*</sup>

<sup>7</sup> A Yühanna tiki a kadu tanno öö'dö ka tambeese kini no, "Aaga na laala ma nööni no, mada agalaana aaga, aaga tiisö a tagoroo'bo tanno unggunu tö'dö no?

<sup>8</sup> Aaga üünü eema ya a'diila ya amang kada tussu adene a'da kaadha aaga ka tatoroko, aaga tafa teema ka nanggeyi tanno ada a'da Abrahiim ya pupa tiya ada, ikiri a'a ka tiki aaga, Masala mana türü mata'bele niigüsi no manangnga eege kada laala tiya Abrahiim.

<sup>9</sup> A 'bütingngö asa kafa tananja ka 'bereere ma fa, fa ya taalo eene iiye ka'diila ya ara ta tendhe apügünja ka issi."

<sup>10</sup> A kadu tindini i'i kiki, "Ara ungngo tönynyö 'bütingngö?"

<sup>11</sup> Ikirii Yühanna ka tapadaga tumma eene iki, "Ömö'di ya ana en'di eera ya, agona a tiya a ten'di ka titao kini ya, a ömö'di ya kuri ka tanna kini ya, osso kide nja ömö'di tiya 'döngngönyö ya."

<sup>12</sup> A kadu na ama tulu'ba no tö'dö kini ma tambeese egee kindini i'i kiki, "Ka Tata-laana, ara ungngo tönynyö 'bütingngö?"

<sup>13</sup> Iki eene, "Aaga fa tama tulu'ba ka kadu adhabbu ada yaada ka asaasa kene ya."

<sup>14</sup> A nasigira tindini i'i, "Ara ungngo tönynyö?"

Iki eene, "Aaga fa tarumuru eema ka kadu a rüüsü aaga fa tümmü kadu a korokoro. Aaga amma ka tiya a naguugaara tanno ada kamana aaga ya."

<sup>15</sup> Kadu 'do kakindihügi Almasiihi kin-dini ajeene ma Yühanna kiki, "Almasiihi yungno?"

<sup>16</sup> Ikirii Yühanna ka tiki eene, "Ara a'a tambeese aaga a 'biidi, lakiini ömö'di ing-gide ara tö'dö ana türü adagi'i bi a'a, taalo a'a nara tampaanya tinggili meena ma egüide tiya iini, i'i yungno ara tambeese aaga a Koronggore tiya Insili ya nja issi.

<sup>17</sup> Si'diga ma ungngo iini ka nüüsö miini kara tuunu migile ka 'deeli uurugu co

'boode ara kafü issi na taalo kara teyi no ka koforo.'

<sup>18</sup> A Yühanna tageema tumma na 'diila no nja kadu ma eema dhabbu a'da kaadha ka naftüni tanno eene no.

<sup>19</sup> A Yühanna tageema nja Hirüdüs ya uugaara ya, kudumma iini ka'duga aka ma örre tiya iini Filibüs mana eere a'da Herüdiya atagalingga eema ya toroko ya dhabbu.

<sup>20</sup> A Hirüdüs tagusu tatoroko ka tanno illi no niini ka tümmü Yühanna unguu ka pabuuus.

### *Tambeesedene na Yasu*

(Matta 3.13-17; Murkus 1.9-11)

<sup>21</sup> A kadu tagambeesedene nye'de kungnoga, a Yasu tagambeesedene tekere, a kini ka ndeema nja Masala ya, a 'dotombo'do tatanfa'da.

<sup>22</sup> A Koronggore ya Insili ya tidhi kini ka oona kafeene nja ndalambo. A tumma tö'dö ndama 'dotombo'do kiki, "O'o na 'Bii'bala yeede ka asaasa i'i dhorro ya, ka'diila oona eede ma o'o."

### *Kadaada ma Yasu*

(Matta 1.1-17)

<sup>23</sup> Ka nagürüünü tanno Yasu ka ndö'dö kukumu ömö'di kaco iisine ikirü ka tümmü linggo niini a kadu tiki kide a'da 'bii'bala ya Yüüsif,

'bii'bala ya Aali,

<sup>24</sup> 'bii'bala ya Matasat,

'bii'bala ya Lawi, 'bii'bala ya Maliki,

'bii'bala ya Yanna, 'bii'bala ya Yüüsif,

<sup>25</sup> 'bii'bala ya Matasiyas, 'bii'bala ya Amus,

'bii'bala ya Nahüm, 'bii'bala ya Hasili,

'bii'bala ya Najayi,

<sup>26</sup> 'bii'bala ya Mat,

'bii'bala ya Matasiyas, 'bii'bala ya Shamii,

'bii'bala ya Yüüsif, 'bii'bala ya Yahüusa,

<sup>27</sup> 'bii'bala ya Yünan, 'bii'bala ya Riisa,

'bii'bala ya Zarbabil, 'bii'bala ya Shaltiil,

'bii'bala ya Niiri,

<sup>28</sup> 'bii'bala ya Maliki,

'bii'bala ya Adi, 'bii'bala ya Küsam,

'bii'bala ya Elmidaam, 'bii'bala ya Ifira,

<sup>29</sup> 'bii'bala ya Yashu, 'bii'bala ya Aliyaser,

'bii'bala ya Yüriim, 'bii'bala ya Matasat,

'bii'bala ya Lawi,

<sup>30</sup> 'bii'bala ya Shamön,

'bii'bala ya Yahüusa, 'bii'bala ya Yüüsif,

'bii'bala ya Yünan, 'bii'bala ya Aliyakiim,

<sup>31</sup> 'bii'bala ya Maliya, 'bii'bala ya Minan,

'bii'bala ya Matasa, 'bii'bala ya Nasaan,

'bii'bala ya Dawud,

<sup>32</sup> 'bii'bala ya Yessi,

'bii'bala ya Obiiid, 'bii'bala ya Büwas,

'bii'bala ya Salmöön, 'bii'bala ya Nähashön,

<sup>33</sup> 'bii'bala ya Aminadab, 'bii'bala ya Admi, 'bii'bala ya Arni,

'bii'bala ya Hasrüün, 'bii'bala ya Fares,

'bii'bala ya Yahüusa,

<sup>34</sup> 'bii'bala ya Yaguub,

'bii'bala ya Ishak, 'bii'bala ya Abrahiim,

'bii'bala ya Tareh, 'bii'bala ya Nahür,

<sup>35</sup> 'bii'bala ya Sürüüp, 'bii'bala ya Raw,

'bii'bala ya Falij, 'bii'bala ya Abir,

'bii'bala ya Shaleh,

<sup>36</sup> 'bii'bala ya Ginan,

'bii'bala ya Arfakshaad, 'bii'bala ya Sam,

'bii'bala ya Nööh, 'bii'bala ya Lamak,

<sup>37</sup> 'bii'bala ya Mütüsaleh, 'bii'bala ya Akanuk,

'bii'bala ya Yard, 'bii'bala ya Mahaliil,

'bii'bala ya Ginan,

<sup>38</sup> 'bii'bala ya Anush,

'bii'bala ya Shiit, 'bii'bala ya Adam,

'bii'bala ma Masala.

## 4

### *Ta'b'badene na Yasu*

(Matta 4.1-11; Murkus 1.12-13)

<sup>1</sup> A Yasu tafada ka Ri ma Ürdün a Koronggore ya Insili ya tadigi kini ka oona, a Koronggore tükü i'i ko'do aaco dhülli.

<sup>2</sup> Adaganna ka dhülli a füngngö ukumu kadu keera, Ebliisi ka ta'b'ba i'i itaalo aagu nüümö, kini ka ndatüümö füngngö ya miini ya, ikirü iire ka tümmü i'i.

<sup>3</sup> Ikirü Ebliisi ka tiki iini, "Üürü o'o na 'Bii'bala ma Masala ya, iki a müsü tammo ma tem'bele kada miteene."

<sup>4</sup> A Yasu tiki iini a'da, "Iki sorne a'da, 'Taalo miteene oogo ma ungngo ömö'di keefe ka 'dö iini unggodho oogo.'"

<sup>5</sup> A Ebliisi tunggu i'i co anya tammo adhonggoro mo ko'd'o aala i'i ka eema ma tauugaara ma 'büdhülü nye'd'de.

<sup>6</sup> Iki iini, "Ara a'a tanangnga eema ya o'o nye'd'e kungnoga a türü müni, kudumma iini ka ananja a'a nara tanangnga ömö'di tiya eede ka asaasa i'i ya.

<sup>7</sup> Küdü kara tüürü ku'bu namma kede ana eedi ya, ara eema ya ta tiya üyüdü nye'd'e kungnoga."

<sup>8</sup> A Yasu tiki iini a'da, "Sorne iki a'da, 'Üürü ku'bu ana küküge kidha ma Masala Uugaara müüdü nalinggo ada oono unggodho oogo.'

<sup>9</sup> Ikirü Ebliisi ka 'duga i'i aaco Örsaliim iini, unguu i'i co 'dasala ma la ma Masala ko'do assa ka tiki iini, "Üürü o'o na 'Bii'bala ma Masala ya, pügü eyi yüyüdü caa'bu ndama kita.

<sup>10</sup> Kudumma sorne ka tiki a'da,

'Ara Masala tiki a kadhangga ta noono köö'dö tafa küdü.

\* 4:4 4.4 Seriye ya eera ya 8.3    † 4:8 4.8 Seriye ya eera ya 6.13

<sup>11</sup> Kara taada o'o ana iisine tanno eene amang ka müsi tafa türini o'o ka awwa.<sup>‡</sup>

<sup>12</sup> A Yasu tiki iini, "Iki sorne a'da, 'Fa ta'b'ba Masala Uugaara müüdü ka oona."<sup>§</sup>

<sup>13</sup> Ka Ebliisi ka ndafara ta'b'baana niini in'dili ya İkiri ka tinyi i'ku'bu tikinggi.

*Yasu atta linggo niini ka Jaliil  
(Matta 4.12–17; Murkus 1.14–15)*

<sup>14</sup> A Yasu tafada a türü ma Koronggore aaco Jaliil a tumma niini tussu adene ka naanya ka oona nye'd'de kungngo.

<sup>15</sup> A tagalaana kadu ka naala ma talaana tanno eene, a kadu nye'd'de takindhiig'i i'ko'do.

*Kadu ma Naasira kanu ka Yasu  
(Matta 13.53–58; Murkus 6.1–6)*

<sup>16</sup> İkiri Yasu ka co Nasira kita iini ka tasere kide ya, aaco la ma talaana ka uuru ma Sa'bidi afa ma tiya iini katadaada ya kungngo, ikiri ka fiki'dö ma türri tumma ka sorne.

<sup>17</sup> Kanangnga sorne ma ne'bi Asaiya iini, ikiri ka tafa'da sorne aluna 'buugu ya iki a'da,

<sup>18</sup> "Koronggore ya Uugaara unngno eede ka oona,

kudumma oono ka kürünü a'a nöö'dö teemaga tumma na'diila no co a kadu tanno asangeema no.

Nuurugu kadu na ka pabuusu no kürö, nafa'da kisinsoro ka iïye,

napa ka kadu tanno anna ka tadasaga no.

<sup>19</sup> Nadirina tumma a kadu ma ürüünü tiya Uugaara ka ndö'dö toolona kadu noono."

<sup>20</sup> İkiri ka tapudaana sorne ka oona, ümmünü ömö'di tiya afa ka la ma talaana ya, ara ka temmi, a kadu na ka la ma talaana no nye'd'de kungngo takirri iïye iini ka oona.

<sup>21</sup> İkiri ka tiki eene, "Tumma naada kataföönyö 'bitingngö no, kagalinggo adene ka uuru tanno."

<sup>22</sup> A kadu tafünögü i'i ko'do nye'd'de kadhere ka tumma türü tanno öö'dö kürö ndama nüönö tanno iini no, keema kiki a'da, "Taalo 'bii'bala ya Yüüsif ya miini sa?"

<sup>23</sup> İkiri Yasu ka tiki eene, "Nussu a'a a'da ara aaga teema ka tumma no kede ko'do a'da, 'Ka Digtöörö, oolona eyi ya üüdü.' Alinggo eema yüüdü ka tagalinggo ka Kafarnahööm ya ka anya tammo üüdü kita."

<sup>24</sup> İkiri ka tiki eene, "Ara a'a tadirina tumma ma timin'da aaga, taalo ne'bi ara tasaasadene ka anya tammo iini.

<sup>25</sup> Ara a'a tadirina tumma aaga dhorro, kaganna iiya ma nagüüme ka Israyil ka ürüünü tiya ne'bi İliya kadhabbu a'da kakarumeene tombo'do kagu'du nagürüünü kiidoona a nagatereene ka üdümü kafünü unngodho, iire tümmü anya ka oona nye'd'de kungngo.

<sup>26</sup> A Masala taalo magürünü İliya ka aka tökömö ma unngodho kungngo, illi aka ma küüme ka anya ma Sarfa ka Saiyda.

<sup>27</sup> A nakünggü'dö taganna ka Israyil kadhabbu ka ürüünü tiya ne'bi Elias, taalo oolonadene unngodho kungngo, illi Numan ya ma Süüriya ya."

<sup>28</sup> A tagoroo'bo tümmü kadu no kanna ka la ma talaana no nye'd'de kungngo kene kataföönyö tumma no.

<sup>29</sup> Kikiri ka fiki'dö kuurugu i'i kürö ndama anya kaco nsorondho ma anya tammo oono ka tarü'bününja kide mo matra tagürünögü i'i caa'bu.

<sup>30</sup> Lakiini i'i aalugu kene ka söödö unngenee.

*Ömö'di ma koronggore tiya toroko ya  
(Murkus 1.21–28)*

<sup>31</sup> A Yasu ta'barda aaco Kafarnahööm ka Jaliil, alaana kadu ka uuru ma Sa'bidi.

<sup>32</sup> A kadu tadhere ka talaana tanno niini kudumma iini ka teema a türü.

<sup>33</sup> Ömö'di inggide ka la ma talaana a koronggore ma na'bu tiya toroko ya unngno iini ka oona aadhiya ko'd'do iki,

<sup>34</sup> "Ka Yasu ma Nasira, nasaasa o'o minna kidi ka oona? Nö'dö o'o ma taama unngno? Nussu a'a a'da o'o na mada. O'o na ömö'di tiya Masala ya Insili ya!"

<sup>35</sup> İkiri Yasu ka kirnaana kini iki iini, "Ki'döönö! Aayu kürö ka ömö'di tiya ka oona!" İkiri na'bu ka tara'baga i'i co ka kadu ka söödö öö'dö kürö, ömö'di taalo illi oona.

<sup>36</sup> A kadu tadhere kindini ajeene kiki a'da, "Tumma öjö eege kungngo, kudumma iini ka teema nja nagoronggore tanno oroko no a türü kicci a kürö."

<sup>37</sup> A eere ya Yasu tanyala ku'bu ka na'buugu ka oona nye'd'de kungngo.

*Yasu oolona kadu kadhabbu  
(Matta 8.14–17; Murkus 1.29–34)*

<sup>38</sup> A Yasu tö'dö kürö ndama la ma talaana aaco 'dii kita Samaan a'da maagu 'bürüdü 'berki miini, kikiri ka tageema nja iini a'da oolona oogo.

<sup>39</sup> İkiri ka co iti kono ka oona asanna ka 'büründü marooro ka'diila mafiki'dö müünii ada kuri eene.

<sup>40</sup> A 'buugu ka ndataamu ya, ikiri kadu köö'dö a kadu tanno amaara no kadhoonyo a Yasu, tikiri ka tümmüni iisine kene ka oona kanggondho oolona eege.

<sup>41</sup> A nagana'bu ticci a kürö ka kadu ka oona dhabbu kiidhe keema kiki, "O'o no 'Bii'bala ma Masala!" Agirnaana kene taalo afa kene keema, kudumma eene ka tussu a'da i'i ya Almasihi.

*Yasu alaana ka la ma talaana  
(Murkus 1.35-39)*

<sup>42</sup> Ka taka ka ndaadha ikiri Yasu ka öö'dö kürö aaco 'buugu tiya kadu ka titalo kide ya, a kadu tagawwa 'buugu miini, tikiri kaluna i'i kümmüni i'i ku'bu i'i dö tunggenee inyi eege ku'bu.

<sup>43</sup> İkiri ka tiki eene, "A'a nasaasa teema ka tumma ma tauugaara ma Masala na 'diila no, naco ka kadu ka naanya töccö afe'de, kudumma eede nagürünüdene a'da naco teema tumma no."

<sup>44</sup> A Yasu tagalaana kadu ka naala ma talaana ka Yahüüdiya nye'd'de kungngó.

## 5

*Yasu ümmüni kadalaadene na dhidha no  
(Matta 4.18-22; Murkus 1.16-20)*

<sup>1</sup> Uuru miini kinggide ka Yasu ka ta'dingnge ka tinggini ma to ma Genisaret, a kadu tarügü kini ka oona ma taföönöyö tumma ma Masala.

<sup>2</sup> İkiri Yasu ka tasala namürkabü keera ka tinggini ma to, a kadu na ümmü kilöögö no tö'dö ko'do ndama eene kagunu nasa'baka.

<sup>3</sup> İkiri Yasu ka sörö mürkabü ma Samaan iki iini, "Sigi keere ka 'dukundaala ka oona." İkiri ka temmi ka mürkabü alaana kadu.

<sup>4</sup> Kini ka ndatiimö tumma niini ya, ikiri ka tiki a Samaan, "Aaga sigi co söödö aaga tara'baga nasa'baka naada co 'biidi aaga tümmü kilöögö."

<sup>5</sup> İkiri Samaan ka tiki a Yasu, "Ka Tatalaana, kadhwürgü ungngo ooso in'dili, ungngo taalo kaduna nüümö, lakiini kudumma üdü ka tiki ara ungngo tara'baga co."

<sup>6</sup> Kikiri ka tara'baga nasa'baka co 'biidi kümmü kilöögö kadhabbu, a nasa'baka tadigine ka kete ka töorese.

<sup>7</sup> Kaalaga iisine a köje tanno ka mürkabü tökömö no a'da köö'dö takinyi eene, yungngo eene köö'dö kadigi namürka'bü ateera meene ka ndakete ka töö'dii.

<sup>8</sup> Ka Samaan Bütrüs ka tassa ka tumma tanno ya, ikiri ka tüürü ku'bu ka Yasu kidha ana küüge iki iini, "Tatalaana, sigi co kanna kide ka oona, a'a na ömö'dii tiya atoroko ya."

<sup>9</sup> A Samaan tadhere nja köje nye'd'de kudumma dhabbu ma kilöögö tanno eene ka tümmöönö no.

<sup>10</sup> A Yaguub nja Yühanna, laala ya Za'bedi na linggo nja iini no tadhere afe'de, ikiri Yasu ka tiki a Samaan, "Fa tari'ba ndama uuru tanno ara a'a tanangnga o'o ka kinne kadu ka ööye ma kilöögö."

<sup>11</sup> Kene ka ndafada a namürkabü kaco a tinggini ma to ya, kikiri ka arooro ka'bilanaa eema ku'bu in'dili kungngó kara ka tuurna i'i keere.

*Yasu oolona ömö'dii ma kutukunya  
(Matta 8.1-4; Murkus 1.40-45)*

<sup>12</sup> A Yasu taganna ka anya tökömö, ömö'dii inggide ana kutukunya ka oona, ikiri ka tasala Yasu, üürü kini kidha adho üüdü ku'bu iki iini, "Ka Tatalaana, üürü küdü kara tasaasa ara o'o taagala maara eede ka oona."

<sup>13</sup> İkiri Yasu ka kilina nüüsö aa'ba i'i ka oona iki, "Namma a'a sa a'diila ma." A kutukunya tarooro ka titalo.

<sup>14</sup> İkiri Yasu ka tiki iini, "Fa tadirina ömö'dii töccö 'do, lakiini kolo naco tala oona a ta'boge naco tirri oona nüüdü afa ma tiya Müüsa ka tirina ya ma taagala oona nüüdü amang kene tussu iini."\*

<sup>15</sup> A tumma na Yasu tanyaala ka na'buugu ka oona in'dili kungngó, a kadu tö'dö kini kadhabbu meene ka föönyö tumma niini koolonadene ka maara tammo eene.

<sup>16</sup> Lakiini i'i unggeene agedhe eyi yiini ma teema nja Masala.

*Yasu oolona mügüre  
(Matta 9.1-8; Murkus 2.1-12)*

<sup>17</sup> Uuru öccö kinggide iini ka tagalaana kadu a'da naFariisi nja katalaana ma seriye tiya Müüsa kungngó kemmi, köö'dö ndama naanya ma Jaliil nja Yahüüdiya nja Örsaliim, a türü na Masala kungngó a Yasu miini ka toolona kadu ka maara.

<sup>18</sup> A kadu tö'dö a mügüre ka sekede kadagawwa fiinii ma tunggu i'i co 'büggöri ma tanangnga i'i ka Yasu kidha.

<sup>19</sup> A kene ka titalo kaduna fiinii kudumma kadu ka tadhabbu ya, kikiri ka sörö 'dasala kafa'da ööye kunggu i'i caa'bu a sekede tiya iini ka kadu ka söödö ka Yasu kidha.

<sup>20</sup> Ka Yasu ka tasala tamma ana eedi neene dhorro no ikiri ka tiki a mügüre, "Ka ömö'dii, noolonadene o'o ka tatoroko tanno üdü."

\* 5:14 5.14 Laawi 14.1-32

<sup>21</sup> Kikiri katalaana ma seriye nja naFariisi ka tindini ajeene kiki a'da, "Ömö'di öjö i'i yungngo eela Masala ungngo? Taalo ömö'di ma toolona tatoroko illi Masala unggodho oogo!"

<sup>22</sup> A Yasu tussu tumma neene ka nanggeedi no, iki eene, "Tumma minna kungngu ada ka nanggeedi?

<sup>23</sup> Öjö i'i yungngo ipalapala? Tiki a'da, 'Tatoroko nüüdö koolonadene,' alla tiki a'da, 'Fiki'dö nungeene'?

<sup>24</sup> Amang kada tussu a'da türü kungngu a 'Bii'bala ma Tadü'dü ka 'büdhüli ma tama tatoroko ka kadu ka oona." Íkiri ka tiki a mügüre, "A'a niki o'o fiki'dö na'duga sekede yüüdö naco 'di kita üüdö."

<sup>25</sup> Arooro ka fiki'dö kene kidha a'duga sekede yiini ka tafüngngö kide ya, aco 'di kita iini afünügü Masala ko'do.

<sup>26</sup> A kadu nye'de tadhore kafünügü Masala ko'do, a ri'ba tümmü egee kiki, "Kadino ungngo ka eema keefe ka uuru tanno."

### *Yasu ümmünü Lawi*

(Matta 9.9-13; Murkus 2.13-17)

<sup>27</sup> Ndama kanna a Yasu tunggeene, asala ömö'di ya ama tulu'ba ka kadu ya, ana eere a'da Lawi, emmi ka 'buugu ma tulu'ba, ikiri ka tiki iini, "Uurna a'a keere."

<sup>28</sup> Íkiri ka arooro ka fiki'dö uurna i'i keere a'bilnaana eema yiini ku'bu nye'de kungngu.

<sup>29</sup> A Lawi tagüüni ada kuri a Yasu dhabbu ka 'di kita iini a kadu ma tulu'ba na jnia kadu töccö kinggide nja eene kadhabbu.

<sup>30</sup> A naFariisi nja katalaana ma seriye tanno eene teema nja kadalaadene tanno Yasu kiki, "Kagu aaga eema aaga tooye nja kadu ma tulu'ba nja kadu tanno oroko no amana?"

<sup>31</sup> A Yasu tiki eene, "Taalo kadu na 'diila no kasaasa digtöörö illi kadu no amaara no."

<sup>32</sup> Taalo a'a nö'dö tümmünü kadu na 'diila no nö'dö a'a tümmünü kadu na oroko no a'da kaadha ka tatoroko."

### *Tindineene ma tümmü tenege*

(Matta 9.14-17; Murkus 2.18-22)

<sup>33</sup> A kadu öccö tiki a Yasu, "Kadalaadene na Yühanna nja tanno naFariisi kümmü tenege kfafra ka Masala turi, lakiini kadalaadene nüüdö kagu eema kooye."

<sup>34</sup> A Yasu tiki eene, "Ara aaga tanangnga kadu na tatarna ka tümmü tenege ka uuru tanno miini no a'da tatarna inggide nja eene?"

<sup>35</sup> Lakiini uuru kinggide a tatarna kara ta'dugadene kene ka söödö kara saga tümmü tenege ka uuru tanno miini no."

<sup>36</sup> A Yasu tadirina tumma eene, "Taalo ömö'di ara töörese ten'di ma issi mo ar'da ka tammo illi mo kudumma a ten'di tammo issi mo Mara tiriseene, a ten'di ma illi mo taalo Mara co koonaa nja tammo issi mo.

<sup>37</sup> A ömö'di taalo ara tuuru ngeeli na aleefe tedhe no ka 'belde tammo illi mo kudumma ngeeli tanno aleefe tedhe no, kara töörese 'belde, a ngeeli tuurunja co, a 'belde taga'dadene.

<sup>38</sup> Lakiini ara ngeeli na aleefe tedhe no tuurunja ka 'belde tammo issi mo.

<sup>39</sup> Taalo ömö'di asasa tooye ngeeli na aleefe tedhe no a'da andakooye ngeeli na illi no assa ka tiki, 'Ngeeli na illi no ka'diila.'

## 6

### *Tindineene ma uuru ma Sa'bidi*

(Matta 12.1-8; Murkus 2.23-28)

<sup>1</sup> A Yasu tagunggeene ka nasigenee nja kadalaadene tanno iimi ka uuru ma Sa'bidi, a kadalaadene niini tikiri ka tuu'bu migile kuuyu kaguri.

<sup>2</sup> Íkiri naFariisi öccö ka tindini egee iki eene, "Minna agu aaga, aaga tüüni eema ya taalo ya üünidene ka uuru ma Sa'bidi ya?"

<sup>3</sup> Yungngo a Yasu ka tiki eene, "Taalo aaga ka kiiri tumma ka sorne ma Dawud ka tagüüni ka iire ka tümmü i'i nja kadu tanno iini?

<sup>4</sup> A'da inynyo la ma Masala a'duga Miiteene ma Masala, adaguri inya a kadu tanno iini, a'da taalo kadu nye'de de kaguri illi ka'boge unggodho egee."

<sup>5</sup> A Yasu tiki eene, "Bii'bala ma Tadü'dü i'i ya uugaara ma Sa'bidi."

### *Ömö'di ya eyi ka nüüsö ya*

(Matta 12.9-14; Murkus 3.1-6)

<sup>6</sup> Ka uuru ma Sa'bidi tököönö a Yasu kico la ma talaana alaana kadu a'da ömö'di inggide eyi ka nüüsö ma kuri.

<sup>7</sup> A katalaana ma seriye ma Masala nja naFariisi tadinaana i'i ko'do ma tassa kini ara toolona kadu ka uuru ma Sa'bidi amang kene taluna nüümö ya toroko kini ma tümmünü i'i a naguugaara.

<sup>8</sup> Lakiini Yasu ussu tumma neene ka nanggeedi no, ikiri ka tiki a ömö'di tiya eyi ka nüüsö ya, "Fiki'dö na'dingnge ka kadu kidha." Íkiri ömö'di ka fiki'dö a'dingnge kene ka söödö.

<sup>9</sup> Íkiri Yasu ka tiki eene, "Ara a'a tindini aaga, ata'diila kaja kara tüüni eema ya a'diila ya ka uuru ma Sa'bidi alla linggo ma eema tiya toroko ya? Toolona ömö'di eefe ka 'di alla taama i'i?"

<sup>10</sup> Íkiri Yasu ka 'dünügü iïye eene ko'do assa ka tiki a ömö'di tiya eyi ka nüüsö ya,

"Kilina nüüsö nüüdü." ïkiri ka kilina nüüsö niimi karooro ka'diila.

<sup>11</sup> A naFariisi tadiginigo a tagoroo'bo kindini ajeene ma nüümö tiya eene kara talinggo ana Yasu ya.

*Yasu esse kadafiinü na ada'baaga kafünü eera no*

(Matta 10.1-4; Murkus 3.13-19)

<sup>12</sup> Ka naguuru tanno miini no, asirigö Yasu co anya ko'do ma co tafara ka Masala, üpü ooso co in'dili miini kafara ka Masala.

<sup>13</sup> Ka takaa kaa ndaadha ya, ïkiri ka tagümmüñü kadaladene niini, agese kene kada'baaga kafünü eera, anangnga eere eene a'da kadafiinü,

<sup>14</sup> Samaan yiini ka anangnga eere iini afe'de a'da Bütrüs ya nja Andraws örre yiini, nja Yaguub nja Yühanna nja Filibüs nja Bartülmaws,

<sup>15</sup> nja Matta nja Tööma nja Yaguub 'bii'bala ya Halfa nja Samaan tiya eene katümmüñü i'i a'da tatagu'daana ka eedi ya,

<sup>16</sup> nja Yahüusa 'bii'bala ya Yaguub nja Yahüusa Askaryüütü ya kümmüñü Yasu a nadiidi miini.

*Yasu alaana afada oloona*

(Matta 4.23-25)

<sup>17</sup> ïkiri Yasu ka ta'bardaga caa'bu ndama 'dikinya nja kadaifiinü tanno iini aco 'dolodho, a kadaladene niini nja kadu kadhappu tarügü kini ka oona, kö'dö ndama naanya ma Yahüüdiya nja Örsaliim nja naanya ma Suur nja Saiyda ka tinggini ma to.

<sup>18</sup> Kö'dö taföönyö tumma kini nja iini ka toolona eege ka maara, a kadu na ana nagana'bu ka oona no toolonadene.

<sup>19</sup> A kadu nye'de tasaasa tümmü i'i ka oona ana iisine kudumma a türü ka takicci a kürö ndama iini ka oona koolona kadu nye'de de kungno.

*Dhodhdho nja müürü*

(Matta 5.1-12)

<sup>20</sup> Assa ka kadaladene tanno iini ko'do iki,

"A'diila oona kada aaga na eema ka titaalo ada no,

kudumma ada kaluna tauugaara ma Masala.

<sup>21</sup> A'diila nja aaga aaga no iire kagu aaga 'bütingngö no,

kudumma ada kara saga tüüsü.

A'diila nja aaga aaga na afara 'bütingngö no,

kudumma ada kara saga takijene.

<sup>22</sup> A'diila nja aaga a kadu kara takirümi aaga,

kasoro aaga keela aaga,

kanu ka eere tiya eede afa nüümö ya toroko ya kudumma 'Bii'bala ma Tadü'ddü.

<sup>23</sup> "Aaga adhodho aaga tasiili ka uuru tanno miini no, kudumma eema ungngo ada ka 'dotombo'do adhabbu kudumma kafaafa meene ka kalinggo ana nagane'bi nggeege.

<sup>24</sup> Lakiini am'ba kada aaga na ma eema dhabbu no  
asa aaga taga'duga talingnge naada.

<sup>25</sup> Am'ba kada aaga na üüsü 'bütingngö no, ara iire sa kagu aaga.

Am'ba kada aaga na kijeene 'bütingngö no, ara aaga sa katamüürü, aaga tafara.

<sup>26</sup> Am'ba kada aaga na kadu ka tindhigü aaga ko'do nye'de no,  
kagüünü kafaafa ma aaga a nagane'bi tanna korokoro no nggeege.

*Tasaasa nadiidi*

(Matta 5.38-48; 7.12)

<sup>27</sup> "Lakiini ara a'a tadirina tumma aaga, aaga na toodo ka tumma tanno, aaga asaasa nadiidi naada, aaga ta'diila nja kadu tanno akirümi aaga no.

<sup>28</sup> Aaga amana baraka a kadu tanno linggo aaga no, aaga afara ka Masala ma kadu tanno akirümi aaga no.

<sup>29</sup> Ka ömö'dü kabbü o'o ka tanggarama ya, nafele no iini. Üürü ömö'dü a'duga ten'di müüdü ma 'doogo mo nafa ta'dükü ten'di müüdü ma teene mo.

<sup>30</sup> A ömö'dü kara tasaasa nüümö küdü nanangnga iini, a ömö'dü kara ta'duga nüümö küdü ya fa ta'duga kini afe'de.

<sup>31</sup> Eema yaada ka asaasa kadu kadüünü ana aaga ya, agüünü ana eege nggeege.

<sup>32</sup> "Kada kara tasaasa kadu na asaasa aaga no 'dee, ta'diila naada eege kiïye? Kadu na oroko no ka asaasa kadu na asaasa eege no afe'de.

<sup>33</sup> A kada kara talinggo ta'diila nja tanno alingo ta'diila nja aaga no, ara aaga tö'dö keere aminna? Mündä kadu na oroko no kamana eema a kadu a kömüsü, amang kene tapadaga eene.

<sup>35</sup> Lakiini aaga asaasa kadu na diidi aaga no, aaga ta'diila nja eene, aaga amana eema eene aaga tafa tam'birina kene. Nggeege ya, ara aaga taluna talingnge naada na dhabbu no, amang kada ta laala tiya Masala ma ko'do mo, kudumma oono mamaa eema a kadu tanno taalo kamana ta'diila oono no nja tanno oroko no.

<sup>36</sup> Aaga ana 'bangnga ma kadu, afa ma Pupa tiya ada ya ka 'dotombo'do ya kaana 'bangnga kungno.

*Fa ta'bunu tumma ka kadu könö ka oona*

(Matta 7.1-5)

<sup>37</sup> "Aaga fa ta'bunu tumma ka kadu könö ka oona, amang ka Masala tafa ta'bunu kada ka oona, aaga fa tümmü kadu amang ka Masala tafa tümmü aaga tekere, aaga eefi ada kadu amang ka Masala ta eefi kada.

<sup>38</sup> Aaga amana eema a kadu amang ka Masala tamana aaga, almiti madigine ko'd'o mo, ara aaga ta'duga ana iisine, almiti maada ka talaala eema a kadu kide mo, oogo mungnogo a Masala kara talaala eema ada kide."

<sup>39</sup> A Yasu tadirina tumma eene iki, "Ara soro tümmünü soro ka tino? Taalo kara ta'dingga co ööye ateera meene?

<sup>40</sup> Taalo tatalaadene agii'bi tatalaana yiini, kini ka ndussu eema 'do ya assa ka taköje nya iini.

<sup>41</sup> "Minna agu o'o nadinö nde'de no ka örre tiya üdü ka ööye no, ara o'o ka titaalo nadinö ndagee'di nüüdü ka ööye no amana?

<sup>42</sup> Ara o'o tiki a örre yüüdü a'da, aayu na'duga 'bandiisi üdü ka ööye nya, ara o'o kafa ka 'bandiisi üdü ka ööye taalo nindineene. Ka 'baga, unggu ndagee'di kürö üdü ka ööye tikinggi, amang küdü tiji 'buugu ta'diila nassa ka tunggu 'bandiisi kürö ndama örre tiya üdü ka ööye.

*Fa nja iiye miini*

(Matta 7.16-20; 12.33-35)

<sup>43</sup> "Kudumma fa tiya a'diila ya taalo ateene iiye na oroko no, fa ya toroko ya taalo ateene iiye na a'diila no.

<sup>44</sup> Kussu kadu fa ana iiye miini, taalo kadu karumu indiyye ka fa ma kira, kitaalo karumu ki'bim'bi ka ndhaaru.

<sup>45</sup> Ömö'di ya a'diila ya amanaga eema ya a'diila ya kürö ndama eedi tiya iini ya a'diila ya, a ömö'di ya toroko ya, eema ya toroko ticci a kürö ndama eedi tiya iini ya toroko ya, nüümö ya ka eedi ya i'i yungngo onggo'do ka teema iini."

*Katarü'böönö keera*

(Matta 7.24-27)

<sup>46</sup> "Kümmünü aaga a'a a'da, 'Uugaara, Uugaara,' amana aaga sa kitaalo kalinggo a tumma tanno eede?

<sup>47</sup> Ömö'di ya ara tö'dö kede aföönyö tumma neede alinggo iini ya, ara a'a tiki aaga a'da afeene nya mada?

<sup>48</sup> Afeene nya ömö'di tiya arü'bü 'dö a'dükü'dü atagii'dö atageese kadesse ka 'dokon'da assa ka tarü'bünü kide, ka faaya köö'dö akilaana ka 'dö, taalo akara tagi'dü i'i ka oona, kudumma iini ka tarü'bünja ka 'dokon'da.

<sup>49</sup> Lakiini ömö'di ya föönyö tumma neede assa ka titaalo alinggo iini ya, afeene nya ömö'di tiya arü'bü 'dö ka 'büdhüü ün'düngnö a'da taalo ageese kadesse. İkiri faaya köö'dö agürü 'dö arooro ka 'dinggö areere türküdü miini ka toroko 'do."

## 7

*Yasu oolona tasaga ya uugaara ma nasigira ma Rööma*

(Matta 8.5-13)

<sup>1</sup> Ka Yasu ka ndatüümö tumma niini nye'd'e a kadu taföönyö ya, ikiri ka tunggeene aco Kafarnahööm.

<sup>2</sup> A ömö'di ya alinggo ada uugaara ma nasigira tanno ukumu kadu ka iidümmü no, amaara akete ka teyi, uugaara ma nasigira tasaasa i'i dhorro.

<sup>3</sup> İkiri ka föönyö tumma na Yasu, yungnö iini ka kürünü kadiifi ma Yahüüdü ka Yasu, a'da öö'dö toolona ömö'di yiini ka maara.

<sup>4</sup> Kikiri ka co ka Yasu katagoolomo i'i 'do kiki iini, "Ömö'di ya ama üdü ka tamünügü i'i ko'do,

<sup>5</sup> Kudumma iini asaasa kadu naaja, i'i yungnö arü'bün la ma talaana ungngö."

<sup>6</sup> İkiri Yasu ka tunggeene nya eene, kini ka ndakete ka 'dö ya, ikiri uugaara ma nasigira ka kürünü kateefe miini a'da kiki iini, "Ka Tatalaana, a'da afa ta'digii'dö oona üdü, taalo a'a na'diila müüdü kara co a 'büggööri tiya eede.

<sup>7</sup> A'a ka eyi tiya eede taalo na'diila meede kara ta'dingga kädü kidha, lakiini tiri tumma a ömö'di yeede toolonadene.

<sup>8</sup> A'a ka eyi tiya eede, uugaara ungngö eede tekere na a'a tauugaara ma nasigira tököönö, niki a tiya, 'Unggeene,' unggeene, niki a tiya, 'Aayu,' öö'dö. Niki ömö'di tiya alinggo ada a'a ya, 'Alinggo nüümö ya kungnö, alinggo.'

<sup>9</sup> A Yasu tadhere kini ka taföönyö tumma no afele, assa ka kadu tanno unggeene nya iini no ko'do iki eene, "Ara a'a tiki aaga nüfürü a'a taduna ömö'di ka tümmü tumma ma Masala ka Israyil afa ömö'di ya."

<sup>10</sup> A kadafiinü tikiri ka tafada kaco 'dö kaduna ömö'di ya maara ya ka'diila.

*Yasu anangnga 'bii'bala ma aka ma küüme keefe ka 'dö*

<sup>11</sup> A taka ka ndaadha ikiri ka tunggeene aco anya tammo ana eere a'da Nayiin mo, a kadaladene niini tunggeene nya iini a kadu töccö kungnö eene kadhabbu.

<sup>12</sup> Kene ka ndala inye ma anya, kikiri ka toreene nya kadu ka tunggeene ana ömö'di ka tenggere ka teyi, ömö'di ya eyi

ya unggodho ka nüümö, a'da oogo ma aka ma küüme, a kadu ma anya tammo iini mo kunggeene nya oono kadhabbu.

<sup>13</sup> Ka Uugaara ka tasala oogo a muuyu moono tagu i'i, iki oono, "Fa tafara."

<sup>14</sup> Öö'dö kete aa'ba tenggere a nüüsö a kadu na ümmöönö no töödhi, ikirü Yasu ka tiki iini, "Bii'bala, a'a nikü o'o nafikidö."

<sup>15</sup> Ikirü ka fiki'dö emmi ana tumma, yungngö a Yasu ka anangnga i'i a nüümö tammo iini.

<sup>16</sup> A ri'ba tümmü kadu in'dili kungngö kamana ta'dilia a Masala kiki a'da, "Ne'bi ya idhindhi ya adele oona kaja ka söödö. A Masala tö'dö a toolona a kadu tanno oono."

<sup>17</sup> A tumma ma Yasu tanyala ka Yahüüdiya nye'de de nya naanya tanno akete koona no.

*Yasu nya Yühanna ya tatambeese  
(Matta 11.2-19)*

<sup>18</sup> A kadalaadene na Yühanna tagadünögü eema ya co iini nye'de.

<sup>19</sup> Ikirü ka tagümmänü könö keera kagürünü eege ka Uugaara a'da kaco tindini i'i, "O'o nungngö nara tö'dö alla ungngö tindhigü ömö'di öccö afe'de?"

<sup>20</sup> Ka kadu tanno eera no ka ndö'dö kiki a Yasu, "Yühanna ya Tatambeese ya, agürünü ungngö a'da ungngö tö'dö tindini o'o, o'o nungngö nara tö'dö alla ungngö tindhigü ömö'di öccö?"

<sup>21</sup> Ka uuru tanno miini no akoolona Yasu kadu kadhabbu ka namaara, adagasoro nagorongore na oroko no ka kadu ka oona, afa'da kisinsoro ka iifye.

<sup>22</sup> Ikirü ka tapadaga tumma a kadalaadene tanno Yühanna iki eene, "Aaga fada aaga co tadiriniga eema a Yühanna ma eema tiya ada ka tadinö kide ya aaga taföönyö ya, kisinsoro kafa'da iifye, a namügüre tunggeene, a kadu ma kutukunya tinsili ka oona, a nakünggiri taföönyö eema, a kadu na aaya no tajeene, a kadu na eema ka titaaloo kene no taföönyö tumma ma Injilli.

<sup>23</sup> A'diila nya ömö'di tiya taalo anu ka tumma tanno eede no."

<sup>24</sup> A kadu na Yühanna ka kürünü eege keera no tunggeene, ikirü Yasu ka tadünögü tumma ma Yühanna a kadu iki eene, "Kada kaco lodho 'dee kadimö aaga ka minna? 'Bandam'bala a tanya ka'digü'di i'i ka oona?

<sup>25</sup> Alla kinynyo aaga a kürö aaga taasala minna? Ömö'di ümmü en'di ya ku'daana ya ka oona? Lakiini kadu na ümmü en'di ya agu'daana ya nya kadu tanno eema kada dhabbu kene no, eege kungngö kannaa ka nöö'di ma naguugaara.

<sup>26</sup> Kinynyo aaga akürö aaga tadinö minna? Ne'bi? Ara tiki aaga a'da ii, lakiini agii'bi ne'bi.

<sup>27</sup> Tumma na miini no eege kungngö a sorne ma Masala ka tiki,  
'Ara a'a tagürünü tafünni yeede küdü kidha,

öö'dö tindinaana fiinü üdü kidha.'

<sup>28</sup> Ara a'a tiki aaga, Yühanna idhindhi adagii'bi laala ya iiya kadegeene ya 'do, lakiini ömö'di ya idhilli ka tauugaara ma Masala ya idhindhi adagii'bi i'i."

<sup>29</sup> A kadu nye'de de taföönyö tumma no nya kadu ma tuluba kamma ka tumma ma Masala kudumma Yühanna ka tambeese egee.

<sup>30</sup> Illi naFariisi nya katalaana ma serije ma Masala kakaanu ka tumma tanno Masala kataanu ka Yühanna ka tambeese egee.

<sup>31</sup> A Yasu tiki, "Ara a'a tiki a'da kafeene sere ma 'bitingngö nya mada? Kafeene nya minna?

<sup>32</sup> Kafeene nya laala tiya anna ka 'dadillö, kiidhe ka köje,  
'Kabünü ungngö kaaru aaga,  
aaga tanu ka siili,  
ungngö tagüüwe tüüsü ma fara aaga,  
aaga taalo kafara.'

<sup>33</sup> Ö'dö Yühanna ya Tatambeese ya taalo agu miteene, taalo ooye ngeeli, aaga tiki a'da, 'T'i indima.'

<sup>34</sup> A Bii'bala ma Tadü'ddü tö'dö agu eema ooye ngeeli, aaga tiki a'da, 'Ömö'di ya aguri, ake ka ngeeli a teefe ma kadu ma tuluba nya kadu tanno oroko no.'

<sup>35</sup> Ata'dara ma Masala kussu adene ka kadu nye'de de kungngö tanno amma ka tumma tanno a Masala no."

*Yasu oolona ka aka tammo toroko mo*

<sup>36</sup> A taga Fariisi könö tagümmänü Yasu a'da aco 'dii kita iini ma tagu eema, ikirü ka co 'dii emmi ma tagu eema.<sup>†</sup>

<sup>37</sup> Maganna aka ka anya tammo iini mo ma toroko mikkirü ka tussu a'da Yasu inni kita taga Fariisi agu eema ya, mikkirü ka öö'dö a sügü'de ma kondho.

<sup>38</sup> Maco ma'dingnge ka Yasu keere mafara, a 'bii'dü ma iifye yoono tasuuru ada kini ka uune muppu ana awu ma üdütiya oono, mu'b'bi i'i ka uune, ma'bunaana a kondho.

<sup>39</sup> Ka taga Fariisi tiya agümmänü i'i ya ka tasala eema ya kadalinggo adene ya, ikirü ka teema kini ka eedi iki, "Ömö'di ya kata kane'bi ya, ara tagussu aka mo müümü i'i ka oona mo oogo ma toroko."

\* 7:27 7.27 Malaki 3.1    † 7:36 7.36 Tafügi ma kadu kata emiimi ka nagööyö kanangnga oona ku'bu kassa agu eema.

<sup>40</sup> İkiri Yasu ka tiki, "Samaan, ara a'a tadirina tumma o'o."

İkiri Samaan ka tiki iini, "Tatalaana, tirina a'a."

<sup>41</sup> İkiri Yasu ka tiki, "Ömö'di ingide asasa kömüsü ka kadu ka oona keera, anangnga a tiya homsumiya jine, anangnga a tiya hamsiin jine.

<sup>42</sup> A nüümö titaalo kene ma tanangnga iini ka kömüsü, ikiri kafa kene kide nye'de kungngo." İkiri ka tiki a Samaan, "Ömö'di öjö ana kene tanno eera no, ara tasaasa i'i dhindho?"

<sup>43</sup> A Samaan tapadaga tumma iini iki, "Niki a'a kide a'da ömö'di ya ma kömüsü dhabbu ya, i'i yungngo agasaasa i'i dhindho."

İkiri Yasu ka tiki iini, "Nadiri o'o tumma dhorro."

<sup>44</sup> İkiri Yasu ka tafele assa ka aka ko'do iki a Samaan, "Niji o'o aka mo? Nö'dö a' a ka 'bügöör'i tiya üüdü taalo o'o ninyi 'büüdi a'a a'da nagala uune iini, lakiini oogo magala a'a ka uune a 'büüdi ma iïye muppugu ana awu ma üüdü tiya oono.

<sup>45</sup> Taalo o'o nööjjüü a'a dhorro, lakiini oogo marooro ka tu'b'bi a'a ka uune.

<sup>46</sup> Na o'o taalo nakara ta'bunaana a'a ka üüdü ana uu'ba lakiini oogo ma'bunaana a'ka uune a kondho.

<sup>47</sup> Nikiri a'ka tiki o'o, atatoroko tanno oono na dhabbu no moolona Masala kono, kudumma oono ka asasa ana eedi dhorro, ömö'di ya Masala ka toolona kini idhilli ya i'i itaalosaasa Masala ana eedi dhorro."

<sup>48</sup> İkiri Yasu ka tiki oono, "Katanggala tatoroko nüüdü."

<sup>49</sup> A kadu na agu eema no tindini ajeene kiki, "T'i ya mada ma tama tatoroko ka kadu ka oona?"

<sup>50</sup> İkiri Yasu ka tiki aka, "Tamma ka Masala nüüdü ka oolona o'o, unggeene a ta'diila."

## 8

### *Tumma ma tadiniigü* (Matta 13.1-9; Murkus 4.1-9)

<sup>1</sup> A Yasu tagunggeene ka naanya nja kadafünni tanno iini na ada'baaga kafünü eera no, adünnü tumma ma tauugaara na Masala,

<sup>2</sup> nja iiya tököönö na unggeene nja iini no niimi ka toolona egee ka nagorongore tanno oroko no nja maara tököömö, Mariyom meene katümmünü oogo a'da Almajdaliya mo, ma Yasu ka tagasoro nagana'bu ka iidümmü kafünü eera kono ka oona,

<sup>3</sup> nja Hanna, aka ma Küsü ya afa ka eema tiya Hirüdüs ya, nja Sawsana nja tököönö

kadhabbu, kamanaga eema ma eyi tiya eene a Yasu no.

<sup>4</sup> A kadu tüütü ka tawaana oona ka Yasu ka oona köö'dö ndama naanya kadhabbu ikiri ka tirina tafeene ma tumma eene,

<sup>5</sup> "Afiki'dö taleele ma tara co tadiniigü, kini ka ndadiniigü ya, ikiri migile kömö ka tasuli ka fiinü, a kadu tisiraana kide ana uune uyi teeraga.

<sup>6</sup> Ammo tasuli ka 'dokon'da mafü'döönö mafada maaya kudumma oono taalo maduna tö'döögö.

<sup>7</sup> A migile kömö tasuli ka immi ka teene mafü'döönö masere nja immi, immi tamiri'di oogo.

<sup>8</sup> A migile kömö tasuli ka 'büdhüüli tiya a'diila ya mafü'döönö, mana iïye dhabbu kukumu kadu ka iidümmü (100)."

Ka Yasu ka ndatüümö tumma ya ikiri ka tiki eene, "Ömö'di ya ana iisine ma taföönyö ya fa kini aföönyö."

### *Teema tafeene ma tumma*

(Matta 13.10-17; Murkus 4.10-12)

<sup>9</sup> A kadalaadene na Yasu tükiri katindini i'i kiki iini, "Kiki tumma no nya?"

<sup>10</sup> A Yasu tiki eene, "Masala manangnga tussu eema na küdhü no ma tauugaara ma Masala tanno aaga, lakiini kadu köönö nadünigü a' eene a tafeene ma tumma, 'Kassa ka tasala taalo kara tijöögö,  
Kassa föönyö taalo kara tussu.\*"

*Yasu adünigü tumma ma tadiniigü co a kadu*

(Matta 13.18-23; Murkus 4.13-20)

<sup>11</sup> A Yasu tiki eene, "Tumma no kiki kungngo, migile tumma na Masala eege kamiini.

<sup>12</sup> "Migile ma asuli ka fiinü mo, mafeene nja kadu tanno aföönyö tumma na Masala a Ebliisi tö'dö a'duga kene ka nanggeedi, amang kene tafa tamma kide koolonadene.

<sup>13</sup> A migile ma asuli ka 'dokon'da mo, kadu na föönyö tumma na Masala kad-hodho areere assa ka titaalo kene, kamma ka Masala amussu kungngo. Ka 'buugu ka tatoroko ya kaadha kide.

<sup>14</sup> A migile ma asuli ka immi ka teene mo, mafeene nja kadu tanno aföönyö tumma na Masala lakiini tadiniigöögö nja tasaasa ma eema dhabbu, ikiri ka anangnga eege ka mir'didene kitaalo kö'dö keere ana iïye.

<sup>15</sup> Ammo a'dinggo ka 'büdhüüli tiya a'diila ya, mafeene nja kadu tanno aföönyö tumma na Masala kafa kide ana eedi dhorro kana iïye a tidhi oona ku'bu.

### *Lamba mungngo ka koyo*

(Murkus 4.21-25)

16 "Taalo ömö'dii ara tata issi ka lamba assa ka taküdhu dho kide nja iini ka tunggu co tenggere ka tü'mbü, lakiini ara ta'dala ko'do amang kono töyeene a kadu na tö'dö ka 'bügööri no tiji 'buugu.

17 Niimö ya aküdhu ya ara tatele oona, a niimö ya kume ya ara tussu adene.

18 Aaga adinö ko'do, kaföönyö aaga tumma ma Masala nya? Ömö'dii ya ana niimö ya ara tagonanja iini adhabbu, a ömö'dii ya niimö ka titaalo kini ya a'dugadene kini salla assa ka tiki a'da ungngö iini idhilli."

*Niimö ma Yasu nja nagöre tanno iini  
(Matta 12.46-50; Murkus 3.31-35)*

19 A niimö ma Yasu nja nagöre tö'dö tassa kini kitaalo kaduna fiinä ma co kini ka 'bügööri kudumma kadu katiti ajeene.

20 İkiri kadu köönö ka tiki iini, "Niimö müüdü nja nagöre tanno üüdü kungngo kürö ka'dingnge ana ko'do ka asaasa tassa küdü."

21 İkiri ka tiki eene, "Niimö meede nja nagöre tanno eede eege kungngo kaföönyö tumma na Masala ka linggo iini."

*Yasu arig'i tanya  
(Matta 8.23-27; Murkus 4.35-41)*

22 Uuru öccö ka inggide ka Yasu ka taka ka mürkabü nja kadalaadene tanno iini, iki eene, "Kada kata'daga co a tinggi ma to ndama 'dakeyi tinni." Kikiri ka tunggunu co.

23 A kene ka ndüsö ya, ikiri Yasu ka tüyü arigide, ikiri tanya ka 'düsöönö dhindho a 'büüdi tadigi ka mürkabü moono kara töö'dii atoroko nja eene.

24 Kikiri kadalaadene kaco ka Yasu ka ici i'i ka füngngö kiki iini, "Ka Tataalaana, ka tatalaana! Ara angnga takaaya!"

İkiri Yasu ka fiki'dö agirnaana ka tanya, a tanya töödhü a 'buugu tamusuli ku'bu amudhudhuli.

25 Yungngo a Yasu ka tiki eene, "Tamma ka Masala naada kiiye?"

Kadhere a ri'ba tümmü eege kindini ajeene kiki, "Ömö'dii öjö i'i yungngo adha si? A tanya nja 'büüdi taföönyö tumma niini."

*Yasu oolona ömö'dii ma nagana'bu  
(Matta 8.28-34; Murkus 5.1-20)*

26 Kagüsö a mürkabü köö'dö ka anya ma Jarasiin mungngö ka nda'da ma to ndama tafaga co Jaliil.

27 Ka Yasu ka nda ta'daga co 'dukundaala ndama mürkabü ya, oreene nja ömö'dii ma anya tammo iini mo indima, taalo en'di iini ka oona ma 'billi i'i taalo anna ka 'di illi anna ka naala ma oofo.

28 Kini ka ndasala Yasu ya, ikiri ka tadhiya üürü kini kidha ana küüge a'dili

ko'd'do iki, "Yasu 'Bii'bala ma Masala tammo ko'do mo nasaasa o'o minna eede ka oona, nasaasa o'o nafa tapusu a'a."

29 Atiraana nggeege kudumma Yasu ka tiki a koronggore tiya atoroko ya a'da öö'dö kürö iini ka oona, kudumma iini ka'dingig'i kini ka oona turi, a kadu tafa kini kimi'di i'i ana jansiiri nja ködhöle armuna, a koronggore ya toroko ya tasanaga i'i co lodho.

30 A Yasu tindini i'i iki iini, "O'o na mada?"

Yungngo iini ka tiki a Yasu, "A'a nana eere a'da, 'Nasigira,' kudumma nagana'bu kuurunco kini ka oona kadhabbu.

31 Kikiri ka tiki a Yasu a'da afa tuurugu eege co ööye tiya adhonggoro ya.

32 A nagüdürü kungngo kaguri ka nsorondho ma anya kadhabbu, a nagana'bu tikiri ka tiki a Yasu a'da, uurugu eege ka nagüdürü tanno miini no ka oona. Yungngo a Yasu katamma kene kide.

33 A nagana'bu tafiri akürö ka ömö'dii ka oona kafiri ka nagüdürü ka oona, a nagüdürü tarünö ndama nsorondho kafiri co 'büüdi ka'duuru 'büüdi.

34 Yungngo a katasaana katassa ka tumma tanno agüünö adene a nagüdürü no, kikiri ka rünö kaco nöö'dii nja nasigeene, kanyala tumma ku'bu 'do.

35 A kadu tö'dö ma tassa ka eema tiya iini ka tagüünö ana ömö'dii tiya akindima ya, kaduna ömö'dii ya miini ya ka temmi ka Yasu ka uune ana en'di ka oona ka'diila, a ri'ba tümmü eege.

36 A kadu na adinö ka Yasu ka toolona ka ömö'dii tiya akindima ya tagadünüğü co a kadu töccö.

37 İkiri kadu ma anya ma Jarasiin ka tiki a Yasu a'da unggene ka anya tammo eene kudumma a ri'ba ka tümmü eege ka eema tiya Yasu ka tagalinggo ya. İkiri ka taka ka mürkabü afada.

38 Ömö'dii ya Yasu ka tagasoro nagana'bu kini ka oona ya tiki a'da i'i asaasa taneene nja iini, lakiini Yasu ka tuuru i'i ka tino iki iini.

39 "Aafada naco 'dii kita üüdü naco nadirina eema ya Masala ka tagalinggo ana o'o ya co eene." İkiri ka tunggeene atagadünüğü eema ya Yasu ka tagüünö ana i'i ya ka anya ka oona nye'd'de kungngo.

*Badaada ma Yayros nja aka tammo aa'ba Yasu ka ten'di mo  
(Matta 9.18-26; Murkus 5.21-43)*

40 Ka Yasu ka ndafada, a kadu tada'da i'i ka kadhabbu kudumma eene katindögü i'i eege in'dili kungngo.

41 A ömö'dii inggide ana eere a'da Yayiros uugaara ma la ma talaana, ö'dö ka Yasu

## 9

üürü kini kidha ana küüge olomo i'i a'da aco 'dī nja iini,

<sup>42</sup> kudumma 'badaada ma ungngō iini ma unggodho a nagürüünü noono kö'dö kada'baaga kafünü eera, a maara tümmü oogo makete ka teyi.

A kini ka ndunggeene ma taco, a kadu türögü kini ka oona kitaana i'i ka oona.

<sup>43</sup> Aka minggide eriidö ka tüüsö kono mandagu'du nagürüünü kada'baaga kafünü eera madaga'da eema yoono ku'bū a nadigötörö, mitaalo moolonadene.

<sup>44</sup> Mliküri ka öö'dö ndama iini keere mümmü tinggini ma ten'di tammo iini, eriidö tarooro ka arumeene kono.

<sup>45</sup> A Yasu tindineene iki a'da, "Mada i'i yungngō aa'ba a'a ka oona ungngō?"

A kadu ta'düsüniigü ikirü Bütrüs ka tiki a Yasu, "Ka Tatalaana, kitaana kadu o'o ka oona kadhabbu, na o'o saga tiki a'da mada i'i yungngō aa'ba a'a ka oona?"

<sup>46</sup> A Yasu tiki, "Ömö'dü inggide aa'ba a'a ka oona, nussu a'a kudumma a türü kö'dö körö kede ka oona."

<sup>47</sup> Aka miini mo tussu a'da taalo tumma noono kaküdhüdene ya, a ri'ba tümmü oogo mö'dö müürü kini kidha ana küüge ka kadu kidha madirina niimö ya anangnga oogo ka taa'ba i'i ka oona marooro ka toolonadene ka eriidö.

<sup>48</sup> Ikirü Yasu ka tiki oono, "'Badaada eede, tamma ka Masala nüüdü ka olona o'o, unggeene a ta'diila ma Masala."

<sup>49</sup> Ka Yasu kaleefe ateema ya, a'da öö'dö ömö'dü ndama 'dī kita Yayiros ya uugaara ma la ma talaana ya iki iini, "Ma eyi 'badaada müüdü fa ta'digi'di tatalaana ka oona."

<sup>50</sup> Ikirü Yasu ka föönyö iki a Yayiros, "Fa tariba, amma ka tumma tanno eede ana edi mara tefe ka 'dī."

<sup>51</sup> Kene ka ndala 'dī ya, ikirü Yasu ka faga kadu keere kaco 'bügööri, illi Bütrüs nja Yühanna nja Yaguub nja pupa tiya 'badaada nja niimö.

<sup>52</sup> A kadu tafara 'badaada, ikirü Yasu ka tiki eene a'da, "Aaga fa tafara taalo meyi, oogo marigide."

<sup>53</sup> A kadu takiji Yasu, kudumma eene ka tussu a'da meyi 'badaada.

<sup>54</sup> Yungngō a Yasu ka ta'diniga oogo ko'do a nüüsö iki oono, "'Badaada, fiki'dö."

<sup>55</sup> A koronggore tapadaga kono ka oona marooro ka fiki'dö, a Yasu tikirü ka tiki eene a'da kanangnga eema oono ma kuri.

<sup>56</sup> A pupa yoono nja niimö tadhere, ikirü Yasu ka tiki eene a'da kafa tadirina tumma na ömö'di töccö.

*Yasu agürünü kadalaadene na ada'baaga kafünü eera no*  
(Matta 10.5-15; Murkus 6.7-13)

<sup>1</sup> A Yasu tagümmünü kadalaadene niini na ö'dö kada'baaga kafünü eera no, ümmünü türü eene meeene ka tasoro naganabu nja türü ma toolona ka kadu tanno amaara no.

<sup>2</sup> Ikirü ka kürünü eege a'da kaco tadünögü tumma ma tauugaara na Masala, koolona kadu ka maara.

<sup>3</sup> Anangnga tumma eene iki, "Aaga fa tagufu niimö ada kara tunggeene alla kuuifi alla njoko alla kuri alla a ömö'di öccö tafa tagufu en'di eera.

<sup>4</sup> 'Bügööri yaada kara co ya, aaga tüütü kide aaga tidhi aaga tunggeene ndama iini.

<sup>5</sup> Anya ma kadu miini ka titalo kamma kada mo, aaga ö'dö körö ndama iini aaga tafidhi ndhünggürü miini kada ka uune amang kene tussu iini."

<sup>6</sup> Kikirü kadafünni ka tunggeene kosso naanya kadünnü tumma ma ïnjülli koolona kadu ka na'buugu koono nye'de kungngō.

*Hirüdüs adhere*  
(Matta 14.1-12; Murkus 6.14-29)

<sup>7</sup> Ikirü Hirüdüs ya uugaara ma Jaliil ya, katadhere ka eema tiya alinggo adene ya kudumma kadu könö ka tiki a'da Yühanna afiki'dö ka inde.

<sup>8</sup> Anno tiki a'da Iliya adele oona a kadu, kónö tiki a'da ne'bi ma 'billi adele oona.

<sup>9</sup> A Hirüdüs tiki, "Narmuna a'a Yühanna ka üüdü a ömö'di öccö i'i yungngō eede ka föönyö tumma miini, afa ma tiya kungngō?" Atagasaasa takassa ka Yasu.

*Yasu anangnga kuri a kadu tanno öö'dö na alif ka üdümü no*

(Matta 14.13-21; Murkus 6.30-44; Yühanna 6.1-14)

<sup>10</sup> Aga kadafünni na Yasu ka ndafada ya kikirü ka tirina eema yeene ka tagüünü ya a Yasu, ikirü ka 'duga eege nja iini unggodho eege kaco ana tammo ana eere a'da Beet Sayida mo.

<sup>11</sup> A kadu tüütü kadussu 'buugu miini kuurna i'i keere, ada'da eege adageemaga tumma ma tauugaara ma Masala eene, oolona kadu na asaasa toolonadene ka maara no.

<sup>12</sup> Ka 'buugu ka ndamuru ma siiya ikirü kadafünni na Yasu no na ö'dö kada'baaga kafünü eera no köö'dö kini kiki iini, "Uuru kadu ka tino kaco naanya nja nasigeene tanno kete no amang kene taluna eema ma taguri nja 'buugu ma füngngö kudumma lodho yungngō."

<sup>13</sup> İkiri Yasu ka tapadaga tumma eene iki, "Aaga nangnga eema eene kaguri."

Kiki iini, "Taalo nüümö kiidü illi miteene mungngo iidi müdümmü a kilöögö keera, illi kiidü kara co tana ada kuri a kadu tanno in'dili no."

<sup>14</sup> Kadu na nagiide no kö'dö na alif kiidümmü.

İkiri Yasu ka tiki a kadalaadene, "Aaga nangnga kadu ka temmi kadu keera aco ii sine."

<sup>15</sup> Kikiri ka anangnga kadu ka temmi kadu keera aco ii sine.

<sup>16</sup> İkiri ka 'duga miteene müdümmü mo nja kilöögö tanno eera no, assa co 'dotombo'do anangnga ta'diila a Masala, a'düsünaana ku'bu assa ka anangnga a kadalaadene a'da kasümünaana ka kadu ku'bu.

<sup>17</sup> A kadu taguri küüsü nye'd'de kungngo kinyi türeene miini ku'bu, a kadalaadene tawagaana koona kadigi nasinggili kada'baaga kafünü eera.

*Bütrüs amma ka Yasu dhorro*  
(Matta 16.13-19; Murkus 8.27-29)

<sup>18</sup> A Yasu tageema nja Masala unggodho i'i ka uuru kinggide a'da kadalaadene niini kinggide nja iini ikiri ka tindini egee, "Kadu 'dee, kiki a'da a'a na mada?"

<sup>19</sup> Kikiri ka tiki iini, "Kadu könö kiki a'da o'o na Yühanna ya Tatambeese ya, anno tiki a'da Iliya, anno tiki a'da ne'bi ma 'billi afiki'dö ka inde."

<sup>20</sup> İkiri Yasu ka tiki eene, "Aaga kiki a'da a'a na mada?"

A Bütrüs tiki ka tiki iini, "O'o na Almasihi ya Masala."

*Yasu eema tumma ma dhügürü tiya iini nja inde*

(Matta 16.20-28; Murkus 8.30—9.1)

<sup>21</sup> İkiri Yasu ka anangnga tumma eene dhorro a'da kafa tadırina tumma no ömö'dü töccö.

<sup>22</sup> Yungngo iini ka tiki a kadafiinü tanno iini, "Ara 'Bii'bala ma Tadü'dü tadħugürü 'do, a kadiifü nja naguugaara ma ka'boge nja katalaana ma seriye ma Masala tanu kini, kiidi i'i afiki'dö ka inde a fungngö iidoona."

<sup>23</sup> İkiri Yasu ka tiki a kadu in'dili, "Ömö'dü ya tö'dö kede keere ya fa kini a'düsünü eyi yiini a'duga saliib'i yiini ö'dö kede keere turi kungngo."

<sup>24</sup> Ömö'dü ya asaasa toolona eyi yiini ya aama i'l, a ömö'dü ya aama eyi yiini kudumma a'a ya, ara toolonadene.

<sup>25</sup> Ara ömö'dü tö'dö keere a minna kini kara tana eema ma 'būdhülü in'dili kungngo ara ka taama eyi yiini?

<sup>26</sup> Ömö'dü ya ana modolo ma a'a nja tumma tanno eede ya, ara 'Bii'bala ma Tadü'dü tana modolo miini kini ka tö'dö ka tidħindħi tanno iini nja tidħindħi tanno Pupa nja kadhangga tanno insili no.

<sup>27</sup> Ara a'a tadırina tumma aaga dhorro, kadu könö kungngo aja kita taalo kara tassa ka inde illi kassa ka tauugaara tanno Masala."

### Tadele oona

(Matta 17.1-8; Murkus 9.2-8)

<sup>28</sup> Kene ka ndaganeene a fungngö andö'dö iidümmü afünü iidoona ya, ikiri Yasu ka 'duga Bütrüs nja Yühanna nja Yaguub kasirö anya ma Yasu kara co teema nja Masala kide.

<sup>29</sup> Ka Yasu ka ndeema nja Masala ya, ikiri dhugdħu yiini ka tatem'bele, en'di yiini ta'bassa kalimaana.

<sup>30</sup> A kadu tatele oona keera, Müusa nja İliya keema nja Yasu.

<sup>31</sup> Kadele oona a tidħindħi ma Masala keema nja iini ka inde tanno iini niini ka teyi ka Örsaliim no.

<sup>32</sup> A tarigide tümmü Bütrüs nja köje, kene kajeene ya, kikiri ka tasala tidħindħi na Yasu nja kadu tanno a'dingne nja iini no.

<sup>33</sup> Aga kadu kandunggeene kene koona ya, ikiri Bütrüs ka tiki a Yasu, "Ka Tatalaana, a'diila 'do kaja kara taganna kita, katabunnü ligangga ku'bu iidoona, müdüd ma unggodho, ammō Müusa ma unggodho, ammō İliya ma unggodho." I'i taalo ussu niimö miini ka teema.

<sup>34</sup> Ka Bütrüs ka taleeffe ateema ya ka'dügħillü nja tülüügħu kö'dö kaküdħu egee ka oona, a ri'ba tümmü kadalaadene kaco ka tülüügħu ka teene.

<sup>35</sup> A tumma tö'dö ndama tülüügħu kiki, "Bii'bala yeede ka tagesse i'i ya yungngo, aaga föönöy tumma niini."

<sup>36</sup> Ka tumma ka ndataalo ya, kaasala Yasu unggodho i'i, kikiri ka takumu oona taalo kadirina eema yeene kada adinö kide ya a ömö'dü 'do ka naguuru tanno miini no.

### *Yasu oolona 'bii'bala ka na'bu*

(Matta 17.14-18; Murkus 9.14-27)

<sup>37</sup> Kene ka ndabdaġa ku'bu ndama anya ka taka ka ndaadha kungngo ya, a kadu toteene nja iini dhabbu.

<sup>38</sup> A ömö'dü talnege ka kadu ka teene iki, "Ka Tatalaana, ma oolona ka 'bii'bala tiya eede ya unggodho kede ya.

<sup>39</sup> Koronggore ya toroko aga kö'dö kini iyini i'i co iidhe üpü ndoore ka niimö, ütū kadhħugħrū ana i'i taalo ara tapa kini areere 'do.

<sup>40</sup> Nageema a'a nja kadalaadene tanno üüdü a'da kasoro i'i illi egee taalo kana türü ma toolona i'i."

<sup>41</sup> İkiri Yasu ka tiki eene, "Aaga oroko aaga na sere ma 'bütüngngö no, taalo aaga kümmü tumma ma Masala ana eedi, ara a'a taneene nja aaga taagaada nam-baanya aaga?" İkiri ka tiki ömö'dü, "Ungge 'bii'bala yüüdü a'a kita."

<sup>42</sup> Ka 'bii'bala ka leefe tunggunu ka Yasu ya, ikiri na'bu ka tara'baga i'i co 'büdhüli asigiridene, ikiri Yasu ka kirnaana ka na'bu, a 'bii'bala ta'diila anangnga i'i a pupa tiya iini.

<sup>43</sup> A kadu tadhere ka tidihindhi ma Masala.

*Yasu eema tumma ma inde tanno iini afe'de*

(Matta 17.22-23; Murkus 9.30-32)

Kene kaleefe tadhere ka eema tiya Yasu ka tagalinggo ya, ikiri Yasu ka tiki a kadalaadene tanno iini,

<sup>44</sup> "Aaga fa tüürü ma nüümö tiya eede kara tadirina aaga ya, ara 'Bii'bala ma Tadü'dü tümmü adene ananja a kadu."

<sup>45</sup> A kadalaadene taalo kassumunaana ka tumma tanno iini ka teema no. Kudumma eene kataküdhü, amang kene tafa tussu, kari'ba tindini i'i miini.

*Mada yungngo idhindhi*

(Matta 18.1-5; Murkus 9.33-37)

<sup>46</sup> A kadalaadene takam'bana njaana ko'do a tumma a'da ömö'dü öjö i'i yungngo adhabbu ana kene.

<sup>47</sup> İkiri Yasu ka tussu tumma neene ka nanggeedi no, ikiri ka a'duga 'bii'bala ya idhilli ya anangnga i'i ka 'dingnge kini kete.

<sup>48</sup> Iki eene, "Ömö'dü ya ara tamma ka 'bii'bala tiya idhilli ya ana eere ma a'a ya, ara tamma kede. A ömö'dü ya ara tamma kede ya, ara tamma ka ömö'dü tiya agürünü a'a ya. Kudumma ömö'dü tiya taalo ara tümmü eedi yiini ka tadhabbu ka kadu ka söödö ya i'i yungngo idhindhi."

<sup>49</sup> İkiri Yühanna ka tiki a Yasu, "Tatalaana, kaduna ungngo ömö'dü ka tasoro nagana'bu ka kadu ka oona ana eere tiya yüüdü, ungngo tasaasa tafaga i'i keere kide kudumma iini taalo ömö'dü tiya aja."

<sup>50</sup> İkiri Yasu ka tiki eene, "Aaga fa tafaga i'i keere kudumma ömö'dü tiya taalo a diidi aaga ya i'i ya ömö'dü tiya ada."

*Daara ma Samira anu ka Yasu*

<sup>51</sup> Ka uuru tanno Yasu ka ndaco a 'dotombo'do ka ndakete ya, ikiri ka tunggeene a rüsü ma co Örsaliim.

<sup>52</sup> İkiri ka kürünü kadafiini kooso kini kidha kikiri ka co daara ma Samira ya ma co tindinaana 'buugu iini ku'bu.

<sup>53</sup> Lakiini kadu ma daara tiya miini ya, taalo kamma kini kudumma iini ka tunggunugu co Örsaliim.

<sup>54</sup> Ka kadalaadene tanno iini Yühanna nja Yaguub ka tassa ka tumma tanno ya kiki iini, "Ka Uugaara, nasaasa o'o ungngo a'da ungngo tatümmünü issi ndama 'dotombo'do köö'dö tafinne egee?"

<sup>55</sup> İkiri Yasu ka tafele agirnaana kene.

<sup>56</sup> Kikiri ka tunggeene kaco daara tököön.

*Kadu no uurna Yasu keere no*  
(Matta 8.19-22)

<sup>57</sup> Kene ka ndungeene ka nafiiñi ya, ikiri ömö'dü könö ka tiki iini, "Ara a'a tuurna o'o keere kita üüdü ka co kita."

<sup>58</sup> İkiri Yasu ka tapadaga tumma iini, "Ki-jenner kungngo a nasura, a nafü kungngo uyi, illi 'Bii'bala ma Tadü'dü'dü taalo 'buugu miini ka anangnga üüdü yiini kide."

<sup>59</sup> A Yasu tiki ömö'dü töccö afe'de, "Aayu kede keere."

Ömö'dü tiki iini, "Ka Tatalaana, fa kede naco tatü'bü pupa yeede."

<sup>60</sup> Yungngo a Yasu ka tiki iini, "Fa ka kadu tanno aaya no katü'bü kadu neene na aaya no, ara o'o ka co teema tumma ma tauugaara ma Masala."

<sup>61</sup> A ömö'dü öccö tiki a Yasu, "Nasaasa a'a tuurna o'o keere uugaara, lakiini fa kede tikinggi naco tattoogu kadu ma 'dü tiya eede."

<sup>62</sup> A Yasu tiki iini, "Ömö'dü ya tümmünü nüüsö ka dhongga ma taleele, assa ka tasasala keere ya, taalo ara tamö'dü ma tauugaara ma Masala."

## 10

*Yasu agürünü kadalaadene kadhabbu*

<sup>1</sup> Ndama kita miini kita ikiri Uugaara Yasu ka tagesse kadu könö kukumu kadu kiidoona kaco iisine kafünü eera, agürünü egee kerra, kooso kini kidha ka naanya nja na'buugu tanno iini ka asaasa co no.

<sup>2</sup> Iki eene, "Kadhabbu linggo ka siga illi kadu ma linggo taalo kadhabbu, aaga eema nja Uugaara ma alinggo amang kini tagürünü kadu ma töö'dö talingga linggo niini.

<sup>3</sup> Aaga agolo, ara a'a tagürünü aaga afa kidheefele na aneene nja needi no.

<sup>4</sup> Aaga fa tagufu njoko, aaga tafa ta'duga 'belde nja egüide, aaga tafa tööjüllü ömö'dü ka fiini.

<sup>5</sup> "Dü yaada kara co ya, aaga tööjüllü kadu miini ka dhidha.

<sup>6</sup> Üürü ömö'dü ma tasaasa tööjüllü ingide ya, ara tööjüllü naada taneene nja iini, üürü anu ka tööjüllü tanno ada ya, a tööjüllü naada tüütü kada.

<sup>7</sup> Aaga anna ka 'dī tiya eene ya, aaga taguri aaga tooye eema yeene kamana aaga ya, kudumma ömö'dī tiya alingga ya, aguri talingga ma linggo tanno iini, aaga tafa tunggunaana ka nöö'dī ün'düngüngö.

<sup>8</sup> Anya maada kaco mo, a kadu miini tamma kada no aaga agu kuri yeene kara tinyi aaga ya.

<sup>9</sup> Aaga oolona kadu na maara no, aaga tiki eene a'da, 'Asa tauugaara ma Masala takete kada.'

<sup>10</sup> Anya maada kara co a kadu miini tanu kada mo aaga unggenee aaga co a nañiñi miini aaga tiki,

<sup>11</sup> 'Mündä ndhunggürü ma anya tammo ada na amma'da kidi ka uune no, kafidhi ungno eege ku'bu, lakiini aaga tussu a'da tauugaara na Masala ka ndakete'

<sup>12</sup> Ara a'a tadirina tumma aaga dhorro, ara uuru ma tahükümü ma kadu ma Sadöma ara tapalpala adagii'bí kadu ma anya tammo."

#### *Naanya no taalo kamma ka Masala no (Matta 11.20-24)*

<sup>13</sup> A Yasu tüü ka tiki, "Am'ba ka kadu ma anya ma Korosiin no, am'ba kidü Beet Sayida, kudumma eema ma türü tanno agalinggo adene kada no kara tagalinggo adene ka Suur nja Saiyda ara kadu takaadha ka tatoroko ma 'billi kadu kemmi ka nataliisi nja fü'dö.

<sup>14</sup> Lakiini Suur nja Saiyda ka uuru ma Masala ka ndaümmü kadu kada misaana ka oona kii'bí aaga.

<sup>15</sup> O'o na Kafarnahööm no, na'diniga o'o oona nüüdü coo'do ara o'o saga tapügünja ka 'buugu ma inde.'

<sup>16</sup> Iki a kadalaadene tanno iini, "Ömö'dī ya aföönyö tumma naada ya, i'i aföönyö tumma neede, a ömö'dī ya anu kada ya, i'i anu kede, a ömö'dī ya anu kede ya i'i anu ka ömö'dī tiya agürünü a'a ya."

#### *Tafada na kadalaadene*

<sup>17</sup> A kadalaadene na kukumu kadu kiidoona kaco iisine kafünü eera no, tafada kadhodho kiki a Yasu, "Ka Tatalaana, mündä nagana'bu kaföönyö tumma niidi ana eere tiya yüüdü."

<sup>18</sup> Apadaga tumma eene iki, "Nasala a'a Eblisi ka'dingga ku'bu ndama oo'do afa talimi ma tombo'do kungngo.

<sup>19</sup> Nanangnga a'a türü aaga a'da aaga tüsüri ka nööni nja na'baja, aaga tii'bí türü na diidi, a nüümö ma tara tili aaga ka oona titaalo.

<sup>20</sup> Aaga fa tadhodho a'da nagana'bu kaföönyö tumma naada, lakiini aaga adha

aaga dhodho kudumma a nagereene tanno ada karigirinja ka sorne ka 'dotombo'do."

#### *Yasu adhodho (Matta 11.25-27; 13.16-17)*

<sup>21</sup> Ka uuru tanno miini no agadhodho Yasu a Koronggore tiya Insili ya iki, "Pupa yeede, nanangnga a'a ta'diila o'o no Uugaara ma 'dotombo'do nja 'büdhülü kudumma o'o ka taküdhü eema ya nitaalo nala a kadu tanno a'dara nja tanno ussu eema no, ara o'o kaala a laala tiya idhiidhi ya. Íí Pupa, o'o nasaasa nggeege.

<sup>22</sup> "Pupa yeede anangnga eema a'a nye'd'e. Taalo ömö'dī ma tussu 'Bii'bala illi Pupa. Kitaalo kussu Pupa, illi 'Bii'bala nja kadu tanno a 'Bii'bala ka tagesse eege ma tatele oona iini."

<sup>23</sup> Afele kadalaadene iki eene ka ungondho, "A'diila nja ömö'dī tiya adinö ka eema tiya ada kadiinö kide ya.

<sup>24</sup> A'a tiki aaga, nagane'bí kadhabbu nja naguugaara kasaasa tadinö ka eema tiya ada kijöögö ya kitaalo kijöögö, kasaasa tafoönyö eema yaada kaföönyö ya kitaalo kaföönyö."

#### *Taga Samira ya a'diila ya*

<sup>25</sup> A tatalaana ma seriye tafiki'dö ma ta'bí ya Yasu iki iini, "Ka Tatalaana, ara a'a tönyöö amang kede taluna tefe ka 'di ta'bílli?"

<sup>26</sup> İkiri Yasu ka tiki iini, "Seriye ya Müüsa iki nya? Nasaana i'i ku'bu nya?"

<sup>27</sup> İkiri ka tiki a Yasu, " 'Asaasa Uugaara Masala müüdü ana eedi dhorro ana oona tanno üüdü a türü tanno üüdü ana üüdü tiya üüdü nye'd'e,\* no 'Asaasa ömö'dí ya kete kidü ya afa müüdü ka asaasa eyi yüüdü kungngo.'†"

<sup>28</sup> A Yasu tiki iini, "Nussu o'o ka tiraana timin'da, alingga nggeege amang küdü taluna tefe ka 'di."

<sup>29</sup> İkiri tatalaana ma seriye ka asaasa tagildhe eyi yiini, ikiri ka tiki a Yasu, "Mada i'i yungngo akete kede ungngó?"

<sup>30</sup> Yungngo a Yasu ka tiki iini, "Ömö'dí inggide akunggunu aku'bu ndama Örsaliim unggunu co Ariiha ikiri kanyooro ka tako'do kini ka tabbü i'i kakirnö en'di iini ka oona kassa kafa kini kada inde.

<sup>31</sup> A'da adhe ta'boge adigaala ka fiini tiya miini ya, ikiri ka tasala i'i ka 'büdhülü adheedhe ko'do.

<sup>32</sup> A taga Lawi tö'dö adigaala ka fiini tiya miini ya asala i'i adheedhe kini ko'do unggenee.‡

<sup>33</sup> A taga Samira tagunggeene ka fiini tiya miini ya ikiri ka tasala i'i ka 'büdhülü a muuyu miini tagu i'i.

\* **10:27 10.27** Seriye ya eera ya 6.5    † **10:27 10.27** Lawi 19.18    ‡ **10:32 10.32** Kadu ma Lawi no linggo ka la ma Masala

<sup>34</sup> Ìkirí ka co kini, asiri uu'ba nja kembelö kini ka nagööla ami'daana a'diniga i'i ka kisine aco lokonda iini atakindinaana i'i ku'bu ka'diila.

<sup>35</sup> A taka ka ndaadha ya, ìkirí taga Samira ka 'duga nakajine keera anangnga ömö'di ma lokonda iki, 'Afa kini namana eema iini salla adhabbu kede kara tafada na a'a saga nanangnga faana miini o'o.'<sup>§</sup>

<sup>36</sup> Ana ka kadu tanno iidoona no 'dee mada i'i yungngo üüdü ka ijöögö akete ka ömö'di tiya kanyoro ka tabbü i' ya?"

<sup>37</sup> Ìkirí ka tiki iini, "Ömö'di ya ana 'bangga mini ya."

Yungngo a Yasu ka tiki iini, "Kolo naco tüüni nggege."

### *Yasu inynyo tassa ka Marsa nja Mariyom*

<sup>38</sup> Ka Yasu ka tunggeene nja kadalaadene tanno iini ya, kikirí ka co daara. Aka minggide mana eere a'da Marsa mada'da i'i aco 'dü kita oono.

<sup>39</sup> İnye moono mana eere a'da Mariyom magemmi ka 'bëdhü'lü ka Yasu kete ma-toodo kini ka teema.

<sup>40</sup> A Marsa takürrada ku'bu anno kadüüni ada eema a kafala mikiiri ka öö'dö ka Yasu mikä iini, "Ka Tatalaana, taalo agu'du o'o ka oona ka İnye tammo eede kafa kede nalinggo unggodho a'a? Iki oono möö'dö takinyi linggo a'a."

<sup>41</sup> A Yasu tatümmünü oogo, "Marsa, Marsa, na'deedene o'o ka oona nadinögöö mö a eema dhabbu,

<sup>42</sup> lakiini nüümö inggide unggodho asasadene, yungngo a Mariyom ka tümmü nüümö ya a'diila ya, ömö'di ka titaalora ara ta'duga kono ya."

## 11

### *Yasu alaana kadu ka fara ka Masala*

<sup>1</sup> A Yasu tageema nja Masala ka 'buugu inggide kini ka ndaadha kide ya, ìkirí tatalaadene yiini öccö ka tiki iini, "Ka Tatalaana, alaana unggongo ka teema nja Masala afa ma Yühanna ka tagalaana kadalaadene niini kungno."

<sup>2</sup> Ìkirí ka tiki eene, "Kada ka tafara ka Masala ya, aaga tiki kungno,

'Pupa yiidi, fa ka eere tiya yüüdü idhündhi, a tauugaara nüüdü tö'dö.

<sup>3</sup> Nanangnga kuri ma uuru tanno unggongo.

<sup>4</sup> 'Duga tam'baga nüüdi kidi ka oona, afa müidi ka afa ka kadu tanno üünii tatoroko ana unggongo no.

Fa tafa kidi unggongo ta'dingga ka ta'b'badene,

[lakiini oolona unggongo ka tatoroko].\*,"

<sup>5</sup> Ìkirí ka tiki eene, "Mada ana kada ara co ka teefe miini ka 'dii ooso ka teene iki, 'Ka teefe ma a'a, kona miteene a'a miidoona a kömüsü.

<sup>6</sup> Kudumma teefe ma a'a öö'dö kede ka 'dii a nüümö meeđe ka nanangnga iini titaalo.'

<sup>7</sup> "Yungngo a teefe miini ka tiki iini ndama la, 'Fa tanyamanya a'a ka oona, ka teere ka İnye, a'a nungngo ka tenggere nja laala tiya eede, nüüdi ka fikidö ma tanangnga nüümö o'o.'

<sup>8</sup> Ara a'a tiki aaga, assa ka titaalo afikidö ma tanangnga iini a'da a teefe miini ya miini, lakiini kudumma miini ka anyamanya i'i ka oona ara tafikidö anangnga nüümö iini ka asasa ya.

<sup>9</sup> "Yungngo eede ka tiki aaga, aaga arangnga amang ka Masala tanangnga aaga, aaga awwa aaga taluna, aaga dhoodho İnye ka fa'danja aaga.

<sup>10</sup> Kudumma ömö'di tiya arangnga ya ananja iini, ömö'di ya awwa ya ara taluna, a ömö'di ya dhoodho İnye ya ka pa'danja iini.

<sup>11</sup> "Pupa öjö yungngo a 'bii'bala tiya iini kara tasaasa müdigilöögö kini, agala ka anangnga ni iini?

<sup>12</sup> Nja iini ka asasa tänsüle kini, anangnga 'baja iini?

<sup>13</sup> Aaga kada oroko kungno kussu aaga kamana eema ya in'diila a laala tiya ada. Ara taköje nya ka Pupa tiya ada ya ka 'dotombo'do ya kara tanangnga Korong-gore ya Insili ya a kadu tanno asasa no?"

### *Yasu nja Balsabül*

<sup>14</sup> Uuru kinggide ka Yasu ka tagasoro koronggore ya möri ya ka ömö'di ka oona, agra koronggore ka öö'dö kürö ya ömö'di teema, a kadu tadhere.

<sup>15</sup> Lakiini kadu könö kiki, "T'i asoro nagoronggore no oroko ka kadu ka oona a türü tanno Balsabül ya uugaara ma nagana'bu ya."

<sup>16</sup> A kadu könö tiki iini a'da aala nüümö ya idhindhi eene ndama 'dotombo'do meene ka ta'b'ba i'i.

<sup>17</sup> Ìkirí Yasu ka tussu tumma neene iki eene, "Ka tauugaara kara tasümünü njaana ku'bu ya kara tatanga'da, a 'dii ya tasümünü njaana ku'bu ya ara türündü.

<sup>18</sup> Ka tauugaara tanno Ebliisi kara tasümünü njaana ku'bu 'dee ara ta'dingga aminna? Kudumma ada ka tiki a'da a'a nasoro nagana'bu ka kadu ka oona a türü tanno Balsabül.

19 Üürü a'a nasoro nagana'bu a türü tanno Balsabül 'dee, ara kadu naada tasoro eege aminna? Kara tümmü aaga.

20 Üürü a'a nasoro nagana'bu a türü ma nüsö tanno Masala amang kada tussu a'da tauugaara na Masala ka ndö'dö kada.

21 "Ömö'di ya ana türü ana eema ma koro'bo ara tafa ka 'd'i tiya iini taalo eema yiini ka ora ta'dugadene.

22 Lakiini üürü ömö'di ya ana türü adagii'bi i'i ara tako'do kini ii'bini kini ya, ara tamuru eema ma koro'bo yiini ka takürrü kide ka oona a'duga eema nye'd'de asümünaana ka kadu ku'bu.

23 "Ömö'di ya taalo aneene nja a'a ya i'i ya diidi ma a'a, a ömö'di ya taalo awaana kadu koona nja a'a ya, i'i aparsaana eege ku'bu.

#### *Tafada na na'bu*

24 "Ka koronggore tiya toroko ya kara tö'dö kürö ka ömö'di ka oona ya, ikirü ka talööle ka dhüüle asaasa 'buugu ma talingnge kide. Üürü taalo aluna ya, ikirü ka tiki, 'Ara a'a tafada naco 'di tiya eede ka öö'dö kürö ndama iini ya.'

25 Ikirü ka co aluna 'd'i ka tinsili ka taki'dinja ku'bu.

26 Ikirü ka tafada aaco ö'dö a töccö ka iidümmü kafünnü eera karisi kini ko'do kafiri kini ka oona kanna kide, a ömö'di ya miini ya, tatoroko adagii'bi yiini ka dhidha ya."

#### *Dhodho na timin'da no*

27 Ka Yasu ka taleefe teema ya, aka talneege ka kadu ka teene miki iini, "A'diila nja aka tammo ageene o'o ma takindine o'o mo."

28 A Yasu tiki, "Ara tagala ka'diila nja kadu tanno aföönyö tumma na Masala kalinggo iini no."

#### *Tasaasa türü ma Masala*

29 A kadu tarügü ka Yasu ka oona, ikirü ka tiki, "Sere ya oroko kasasa tassa ka türü ma Masala eege kitaalo kara talanja eene illi no akalanja a ne'bi Yünan no."†

30 Afa ma ne'bi Yünan ka takalanja a kadu ma Ninawa aga türü nggeege ara 'Bii'bala ma Tadü'dü ta türü ma sere ma 'bitüngngö.

31 Ara Uugaara ma küüülü tafiki'dö ka uuru ma Masala kara tö'dö tümmü sere ya, mümmü eege kudumma oono ka öö'dö ndama ku'b'ba möö'dö taföönyö tumma na Siliman, a'a nungngo nagii'bi Siliman.

32 Ara kadu ma Ninawa tafiki'dö ka uuru ma tahükümü kara tö'dö no nya sere tiya 'bitüngngö ya kümmü kadu, kudumma

eene kaadha ka tatoroko tanno eene kene ka taföönyö tumma na Yünan, a'a no kita nagii'bi Yünan."

#### *Töyeene ma tuu'da*

33 "Taalo ömö'di ara tata issi ka lamba assa ka taküdhü nja iini ka anangnga ka dho ka tüm'bü, lakiini ara ta'dala ko'do a kadu na iji co 'büggööri no, tiji 'buugu iini.

34 İiye eege kungngo ka töyeene ma tuu'da, ka İiye tanno üüdü kara ta'diila ara tuu'da nüüdü ta töyeene, İiye nüüdü taratatoroko ya ara oona nüüdü talüllü.

35 Aaga dini ko'do kudumma töyeene tanno ada ka oona no, kara tanangnga aaga ka talüllü.

36 Üürü oona nüüdü ka öyeene nye'd'de kungngo ya a 'ba'dakeyi öccö taalo kara talüllü ya, kara töyeene 'do afa ma lamba ka ta'dara töyeene küdü ka oona nye'd'de kungngo."

#### *Yasu ümmü naguugaara ma Yahüüdü*

37 Ka Yasu ka taleefe teema ya ikirü taga Fariisi könö ka tiki iini a'da kaco 'd'i tagu eema nja iini, kikirü ka co 'd'i kemmi ma tagu eema.

38 A taga Fariisi tadhere kini ka anaana İiye ka Yasu ka agu eema a'da taalo agala iisine ka dhidha assa aguri.

39 Ikirü Uugaara Yasu ka tiki iini, "Aaga naFariisi no kagunu aaga ker'de nya dho ndama 'dugeere miini, ara nanggeedi naada kadigine a tallogo nya tatoroko ma eema dhabbu.

40 Ka nagaaga, taalo ömö'di ya agalinggo 'dugeere ma nüümö yungngo agalinggo teeme miini sa?"

41 Aaga amana eema yaada a kadu tanno iini ka titalo kene no amang ka eema tiya ada tinsili nye'd'de kungngo.

42 "Am'ba kada aaga naFariisi no, kamaana aaga eema ma naana nya eema tiya ada ka leele ya a Masala, aaga sa kadüün tö'bö, aaga tanu ka eema tiya dhorro ya, aaga tanu ka tasaasa ma Masala, kama aaga ma tagalinggo nggeege aaga tafa tagüün tö'bö ana eege."‡

43 "Am'ba kada aaga naFariisi no, kasaasa aaga temmiimi ka kadu kidha ka naala ma talaana, aaga tasaasa kadu kööjüllü aaga ka naffiini.

44 "Am'ba kada aaga na afeene nya naala ma oofo kitaalo kussu adene no. A kadu na unggeene kide ko'do no taalo kussu a'da naala ma oofo eege kamiini."

45 Yungngo a tatalaana ma seriye ka tiki iini, "Ka Tatalaana, ka tumma tanno üüdü ka teema na o'o neela uningo afe'de."

† 11:29 11.29 Matta 16.4; Murkus 8.12      11:30 11.30 Yünan 3.5      11:31 11.31 1 Naguugaara 10.1-10; 2 Akhbar 9.1-12      ‡ 11:42 11.42 Laawi 27.30 Nanangnga 'dakeyi ma eema ma siga.

<sup>46</sup> İkiri Yasu ka tiki, "Am'ba kada aaga na katalaana ma seriye no, kadho aaga kadu ka oona a tümmü eema ya īndhi ya, aaga taalo ka kara tamünögü 'banüsö eene ma takinyi ta'dina nja eene.

<sup>47</sup> "Am'ba kada ka arū'bü aaga naala ma oofo ma nagane'bi a'da kafaafa ma aaga eege kungngö kagirina eege.

<sup>48</sup> Kussu aaga tamma ka linggo tanno kafaafa ma aaga ka tagalinggo no, eege kagirina nagane'bi aaga tarü'bü naala ma oofo neene.

<sup>49</sup> Yungngö a tumma ma tussu ma Masala ka tiki, 'Ara a'a tagürünü nagane'bi nja kadafiinī kene kassa kagirina könö kapusu könö.'

<sup>50</sup> Ara a'a tasaasa faana ka sere tiya ma eriidö ma nagane'bi tanno ada ka kirina eege jiddi ma 'büdhülü ka tarü'bü adene no,

<sup>51</sup> jiddi ma eriidö tiya Habiil nja eriidö tiya Sakariya ya agiididene ka söödö ma misi ma tirri nja la ma Masala ya. Ara a'a tiki aaga a'da ara a'a tasaasa eriidö ya ka sere tiya kadu tanno in'dili kungngö. §

<sup>52</sup> "Am'ba kada aaga no katalaana ma seriye no, kudumma ada ka 'duga nangafata ma tussu eema, alla aaga co alla aaga tafa ka kadu tanno asaasa co no kaco."

<sup>53</sup> Kini ka leefe ateema tumma no ya, ikiri katalaana ma seriye nja naFariisi karooro ka tamidhi i'i kar'dnaana eema iini dhabbu.

<sup>54</sup> Kadünö ana i'i ko'do ma tasaasa i'i kadiri tumma amang kene tafünü eema ma korokoro iini ka oona.

## 12

*Fa tüsinä kadu*  
(Matta 10.26-27)

<sup>1</sup> Uuru kinggide a kadu kadagawaana oona kadhabbu kiti ajeene anno tisiraana ka köje, ikiri Yasu ka tiki a kadalaadene tanno iini, "Aaga ümmü eyi yaada ka tigüdi ma naFariisi ka oona, kudumma eene ka tüsinä kadu.

<sup>2</sup> Taalo nüümö anna ka küdhü a'da taalo ussudene aya anna ka kume ya ara tadherenja kürö.

<sup>3</sup> Eema yaada ka teema ka 'buugu ka talülli ya ara taföönyödene uuru kungngö, tumma naada ka ayaaya ajeene iini no ka naala no kara saga teemadene ka naala ko'do."

*Kari'ba angnga a mada*  
(Matta 10.28-31)

<sup>4</sup> "Kadu eede ara a'a tadirina tumma aaga, aaga fa tarı'ba a kadu tanno ara tiidi

tuu'da ün'dügüngö no kassa kitaalo katambaanya tüünii nüümö no.

<sup>5</sup> Lakiini aaga ö'dö nadirina ömö'dü yaada kara tarı'ba iini ya aaga, aaga ari'ba ömö'dü tiya ana türü ma tiidi aaga apügü aaga ka issi ma Jahanam ya, nikirri a'a ka tiki aaga, ömö'dü ya i'i yungngö ada kara tarı'ba iini.

<sup>6</sup> Taalo kadu kanadene ana uyi iidümmü ana nagiris keera? Lakiini taalo Masala müürü ma tököön ungodho kungngö.

<sup>7</sup> Mündä awu ma nanggüdü tanno ada aginnidene nye'd'de kungngö aaga fa tarı'ba kudumma ada ka tagi'bi uyi dhabbu."

*Tamma nja tanu ka Yasu*

(Matta 10.32-33; 12.32; 10.19-20)

<sup>8</sup> "Ara a'a tiki aaga, ömö'dü ya ara tamma kede kidha ma kadu ya, a 'Bii'bala ma Tadü'dü tamma kini kidha ma kadhangga tanno Masala.

<sup>9</sup> A ömö'dü ya ara ta'düsünü a'a ka kadu kidha ya, ara 'Bii'bala ma Tadü'dü ta'düsünü i'i kidha ma kadhangga tanno Masala.

<sup>10</sup> "Ömö'dü ya eela 'Bii'bala ma Tadü'dü ya, ara tafa kini illi ömö'dü ya eela Koronggore ya Insili ya, taalo Masala mara tafa kini.

<sup>11</sup> "Kada kara tadüngü ma co naala ma talaana nja ada kara tuuruguna kidha ma naguugaara no iifi no, iiya aaga tafa tadinigöögö a'da ara aaga tümmöönö ka hanggeyi tiya ada nya nja ada kara tiki a'da minna kene kidha.

<sup>12</sup> Kudumma a Koronggore tiya Insili ya ara talaana aaga ka uuru tanno miini no ka nüümö tiya ada kara teema ya."

*Tumma ma tafeene ma ömö'dü tiya tüüsü aa'baga ya*

<sup>13</sup> İkiri ömö'dü könö ka kadu ka teene ka tiki a Yasu, "Ka Tatalaana, iki a örre tiya eede a'da asümünaana eema ma ta pupa kidi ku'bu."

<sup>14</sup> İkiri Yasu ka tiki iini, "Ka ömö'dü, mada anangnga a'a ka tauugaara ma tasümünaana eema kada ku'bu?"

<sup>15</sup> A Yasu tiki a kadu, "Aaga dünö ko'do aaga tafa tallogo, taalo ömo'dü efe ka 'dü ana eema tiya adhabbu ya."

<sup>16</sup> A Yasu tadirina tumma eene iki, "Ömö'dü inggide a siga tanno iini ka tageene eema dhabbu.

<sup>17</sup> İkiri ka teema ungodho i'i iki, 'Ara a'a tonyonyö 'bitingngö? A 'buugu ka titalo kede ma tanangnga eema yeede ka taleele ya kide.'

<sup>18</sup> "İkiri ka tiki, 'Ara a'a tüünii kungngö ara a'a türrüdü na'boode neede no, ara a'a

ka rü'bü ya dhabbu ya, nawagaana migile kide nja eema tiya nye'de kungngö.

<sup>19</sup> Na a'a saga tiki ka eyi tiya eede, Eema ungngö üüdü a'diila adhüküdhükü ara taneene a nagürüünü kadhabbu, lingnge naguri nooye nadhodho.'

<sup>20</sup> "Mikirö Masala ka tiki iini, 'Ka 'baga, ka ooso tanno ara Masala ta'duga tefe ka 'dil nüüdü küdü. Eema yüüdü ka tagawaana koona ya, ara ta tiya mada?'

<sup>21</sup> A Yasu tiki, "Afeene nja kadu tanno awaana eema koona dhabbu ma eyi tiya eene no, lakiini euge kitaalo küüsü kidha ma Masala."

#### *Fa tadinigöögö*

(Matta 6.25-34)

<sup>22</sup> A Yasu tiki a kadalaadene tanno iini, "Aaga fa tadinigöögö ma nanggeyi tanno ada a'da ara aaga tagu minna nja ada kara taluna en'di ma oona kiga.

<sup>23</sup> Tefe ka 'dil kaa kii'bi kuri oona tagii'bi en'di.

<sup>24</sup> Aaga iirü nakaaru taalo kadüñigü kitaalo karaana ka nasigeene, taalo na'boode kene nja nagüdhü, a Masala saga amana kuri eene aaga kagu'daana ka Masala ka oona aaga tagii'bi uyi.

<sup>25</sup> Mada ana kada ara tagusu ürüünü unggodho ka tefe ka 'dil tanno iini kara tadinigöögö.

<sup>26</sup> Üürü taalo aaga kambaanya ligeema ya dhiidhi ya, aminna agu aaga, aaga tadinigöögö ma türeene miini.

<sup>27</sup> "Aaga iirü togoogo ma lodho inggirdene nya, taalo kad hügürü kaya a kusuka kitaalo küüfü en'di. Ara a'a tadirina tumma aaga, münda Siliman ka tihindhi ma tauugaara tanno iini 'do taalo akümmü en'di ka'diila afa tangatogoogo ka unggodho.

<sup>28</sup> Ooyo ya afü'döönö ka siga 'bitingngö, a taka taadha üpünja ka issi atinyogo, magala Masala ka kagirnö en'di eene ka oona, aada aaga adha taalo ma tagirnö en'di ada ka oona, ma aaga no taalo küümmü tumma ma Masala ana eedi dhorro no.

<sup>29</sup> Aaga fa tasaasa kuri aaga tafa tasaasa tooye aaga fa tadinigöögö.

<sup>30</sup> Eema ya i'i yungngo a kadu ma 'büdhü'lü kasaasa, lakiini Pupa yaada ussu a'da kasaasa aaga eema ya.

<sup>31</sup> Lakiini aaga asasa tauugaara ma Masala eema ya nye'de kungngö assa ka kusunja kada kide.

#### *Eema ka 'dotombo' do*

(Matta 6.19-21)

<sup>32</sup> "Ligidheefele ya dhiidhi ya, aaga fa tari'ba kudumma Pupa tiya ada ka'diila oona iini ma tara tanangnga tauugaara aaga.

<sup>33</sup> Aaga tanege ana eema tiya ada aaga tasümünaana gürüüsü miini ka kadu tanno eema ka titao kene no. Aaga amanaga eema ya agu'daana ada ka oona ya co 'buugu tiya kü'düü'dü ka titao kara talimaana ya, aaga tanangnga ya ka 'dotombo' do kita iini ka titao ataama, a tanyooro taalo ara co itao kara taala'ba.

<sup>34</sup> "Buugu ya eema tiya ada ka tanna kide ya, i'i yungngo a nanggeedi tanno ada kara tanna kide."

#### *Kadu ma linggo no adho ka fiin'i no*

<sup>35</sup> "Aaga indinaana oona ku'bu aaga timi'di nanggeedi ma linggo aaga tafa ka nagalamba tanno ada kafinne.

<sup>36</sup> Afa kadu na indhigü ömö'di ma 'dil ara ka öö'dö ndama 'buugu ma tarña kini kara tafada öö'dö adhogo inye kafa'da areere.

<sup>37</sup> A'diila nja kadu tanno miini no ka ömö'di ma 'dil kara tö'dö aluna euge ka adinö. Ara a'a tadirina tumma aaga dhorro, ara takirnö ten'di iini ka oona anangnga euge ka temmi ara ka amanaga kuri eene.

<sup>38</sup> A'diila nja eene kini kara tö'dö ooso ka teene üürü a na'bu ma taka aluna euge ka adinö nggege.

<sup>39</sup> Amang kada tussu a'da ömö'di ma 'dil kara tagussu a'da ara tanyooro tö'dö aada ya, ara tadinö itaalo ara tafa ka 'dil tiya iini anyoorodene.

<sup>40</sup> "Aaga adinö ko'do turi kudumma ada ka titao kussu uuru na 'Bii'bala ma Tadü'dü kara tö'dö iini no."

<sup>41</sup> İkiri Bütrüs ka tiki iini, "Ka Tataalaana, nadünögü o'o tumma no ungnö alla nja kadu in'dili kungngö?"

<sup>42</sup> A Uugaara Yasu tiki, "Amada i'i yungngo adho ka fiin'i a'dara, a ömö'di ma 'dil ara tanangnga i'i kafa ka 'dil amana kuri a kadu tanno ma linggo no ka uuru miini?

<sup>43</sup> A'diila nja ömö'di tiya miini ya ka ömö'di tiya iini ka talingga ada iini ya ka tö'dö aluna i'i ka talingga nggege.

<sup>44</sup> Ara a'a tadirina tumma aaga dhorro, ara tanangnga eema yiini nye'de kungngö afa kide.

<sup>45</sup> Lakiini ka ömö'di tiya alingga kara tiki ana eedi ka teene a'da taalo ömö'di ma 'dil ara tö'dö areere, ikiri ka arooro ka abbü kadu na linggo no nja iiya aagu eema oyee neeli ake kide.

<sup>46</sup> Ka ömö'di kara tafada ka uuru tanno iini ka titao ussu, itaalo ussu a'da ara tö'dö aada, ikiri ka ta'dekeraana i'i ku'bu anangnga i'i kafeene nja kadu tanno taalo kaföönö yö eema no.

<sup>47</sup> "A ömö'di ya alingga assa ka tussu taneene na ömö'di ma linggo assa ka titao alingga a fiin'i tiya iini ka asasa ya, ara tabbü adene niini tadhabbu.

<sup>48</sup> A ömö'dii ya linggo a'da taalo ussu taneene na ömö'dii assa ka tüünii eema ma tara tanangnga i'i ka abbü adene, taalo ara tabbü adene dhindho. Ömö'dii ya eema ka ananja iini dhabbu ya asaasadene kini dhabbu, ömö'dii ya eema ka tümmününja iini dhabbu ara tanangnga ku'bu dhabbu.

*Yasu nja kadu ma 'büdhüü  
(Matta 10.34-36)*

<sup>49</sup> "Nö'dö a'a tüpü issi ka 'büdhüü, a'a nasaasa eäge a'da kassa andafinne.

<sup>50</sup> Namma a'a ka tambeese tanno agu'daana dhindho no, nadinigöögö meene a'da ka öö'dö talinggo adene.

<sup>51</sup> Kiki aaga kide a'da a'a nö'dö a ta'diila a kadu ka 'büdhüü? Taalo nggeege, nö'dö a'a tanangnga kadu kanu aana ka oona.

<sup>52</sup> Ndama uuru tanno kadu ma 'büggöörtyiya unggodho ya ka üidümmü kara tanu aana ka oona, anno iidoona no takirimi na era no anno eera no takirimi no iidoona no.

<sup>53</sup> A pupa takirimi 'bii'bala yiini, a 'bii'bala takirimi pupa yiini, a nüümö takirimi 'badaada moono a 'badaada takirimi nüümö moono, a nüümö ma 'bii'bala takirimi taada moono, aka ma 'bii'bala takirimi taada moono."

*Nagoola ma nagürüünü  
(Matta 16.2-3)*

<sup>54</sup> A Yasu tiki a kadu afe'de, "Kada kara tiji tülüügü ka tunggunu ko'do ndama ta'buugu ya, aaga tiki a'da ara tombo'do tede 'bitingngö, a'da timin'da.

<sup>55</sup> Aga tanya kara tüüsö a ko'do ndama küülüü, aaga tiki a'da ara 'buugu tagu'daana, a'da timin'da.

<sup>56</sup> Ka nagaaga, kussu aaga ka tassumunaana taneene ma eema ma 'büdhüü njä 'dotombo'do, a minna agu aaga taalo kussu tesaana eema ma 'bitingngö ku'bu?"

*A'diila nja diidi tiya üüdü  
(Matta 5.25-26)*

<sup>57</sup> "Minna agu aaga, aaga taalo kiürii nüümö ma eyi tiya ada ya dhorro ya, yaada kara talinggo ya?

<sup>58</sup> A küüdü kara tunggunugu co kita uugaara nja diidi ma o'o kardha ku'bu neema tumma ma ta'dilia nja iini ka fiinii, kudumma iini kara tümmünü o'o a uugaara, a uugaara tanangnga o'o a tasigira, a tasigira tanangnga o'o ka pabuuus.

<sup>59</sup> Ara a'a tiki o'o, taalo o'o nara tö'dö kürö ndama kanna üürü taalo o'o nanangnga gürüüsii ku'bu nye'd'de kungngo."

## 13

*Taadha ka tatoroko*

<sup>1</sup> Ka uuru tanno miini no kadirina kadu eema a Yasu ma kadu ma Jaliil tanno Bilatus ka kirina eäge ka la ma Masala assa ka takonyaana eriidö yeene ka oona nja eriidö ma eema ma eriidö tiya eene ka tirri iini ya.

<sup>2</sup> İkiri Yasu ka tiki eene, "Kiki aaga kide a'da tatoroko na kadu ma Jaliil na miini no eäge ka oroko ka tagii'bi kadu ma Jaliil nye'd'de, yungngö eene ka kirinadene?

<sup>3</sup> Taalo nggeege, ara a'a tiki aaga, kada ka titalo kaadha ka tatoroko tanno ada no, ara aaga taaya nye'd'de afa meene kungngo.

<sup>4</sup> A kadu na ada'baaga ana awwa kafünü iidoona no, a sala ka türküdü kene ko'do ka Salwam kaaya no, kiki aaga kide a'da tatoroko neene kagii'bi tatoroko na kadu ma Örsaliim nye'd'de kungngo?

<sup>5</sup> Ara a'a tiki aaga a'da taalo nggeege, üürü taalo aaga kaadha ka tatoroko tanno ada no, ara aaga taaya nye'd'de afa meene kungngo."

*Tafeene ma tumma ma indiüye no taalo kana üüye no*

<sup>6</sup> Afada adirina tafeene ma tumma eene iki, "Ömö'dii inggide fa ma indiüye afü'döönö kini ka raaga ma ki'bim'bi, ikiri ka co asaasa tarmuna aluna eäge taalo kageene.

<sup>7</sup> İkiri ka tiki a ömö'dii tiya afa ka raaga ya, 'Andö'dö kede nagürüünü kiidoona eede ka ticci ka indiüye tanno ma tasaasa tarumu üüye miini nitaalo naduna, bünnügü eäge co kaga'da 'büdhüü amana?"

<sup>8</sup> "A ömö'dii ya alingga ka raaga ya tiki iini, 'Fa kini ömö'dii eede, ka ürüünü tiya ara a'a ka tasig'i'di i'i ka tüm'bü nanangnga tümükodho kide.

<sup>9</sup> Üürü keene üüye fa kene, üürü taalo keene ka ürüünü tiya unggunu tö'dö ya na o'o sa ka bünnügü co."

*Yasu oolona aka makür'dü ka 'dugeere ka uuru ma Sa'bidi*

<sup>10</sup> Uuru ma Sa'bidi ka inggide ka Yasu ka tagalaana kadu ka la ma talaana.

<sup>11</sup> A'da aka minggide a nagana'bu ka'dingga kono ka oona mamaara makür'dü ka 'dugeere magu'du nagürüünü kada'baaga ana awwa kafünü iidoona taalo mambaanya ta'dingga madhidho 'do.

<sup>12</sup> Ka Yasu ka tasala oogo ikiri ka tümmünü oogo iki, "Ka aka mo, madangala maara üüdü ka oona."

<sup>13</sup> Ümmünü iisine oono ka oona, marooro ka fiki'dö madhidho mamana ta'diila a Masala.

<sup>14</sup> Ìkiri uugaara ma la ma talaana ka koroo'bo kudumma Yasu ka toolona aka ka uuru ma Sa'bidi iki a kadu tanno ka la no, "Füngngö ungngo ada ñüdümü afünü unggodho maada ka talinggo kide, aaga ö'dö aaga toolonadene kide, taalo ka uuru ma Sa'bidi."

<sup>15</sup> Ìkiri Uugaara Yasu ka tiki eene, "Ka nagaaga, taalo ömö'di öccö ana kada ara tagildhe kisine yiini nja kodha tiya iini ka uuru ma Sa'bidi ka 'buugu ma kuri aco tunggu i'i co tooye 'büdi?"

<sup>16</sup> Akä mo ma 'badaada tammo Abrahäm Eblisi ka timi'di oogo a nagürüünü kada'baaga ana awwa kafünü iidoona, taalo ama oono kara tatinggildhe ka uuru ma Sa'bidi?"

<sup>17</sup> Kini ka tiri tumma no, a modolo tümmü kadu na ka diidi i'i no, ara kadu in'dili katadhodho ma eema tiya iini ka tagüünä ya a'diila ya nye'de kungngo.

#### Tafeene ma tumma ma tanuure

<sup>18</sup> Ìkiri ka tiki, "Tauugaara ma Masala 'dee ara a'a tiki a'da kafeene nja minna?

<sup>19</sup> Kafeene nja ndaniiye ma tanuure ka ömö'di ka 'duga adadüni ada ka siga tamno iini kafü 'döönök kasere kada fa tiya dhabbu ya, a uyi ma 'dotombo'do taküüfunü nafü ka naseldhe miini."

#### Tafeene ma tumma ma tigüüdi

<sup>20</sup> Afada iki afe'de, "Ara a'a tiki a'da kafeene tauugaara ma Masala afa minna?

<sup>21</sup> Kafeene nja tigüüdi aka ka a'duga makoonyaana ka müsö ma dhabbu, elö tüüfö nye'de."

#### Fünni ya iciri ya (Matta 7.13-14, 21-23)

<sup>22</sup> A Yasu takunggunaana ku'bu ka naanya alaana kadu ka fiini a'da unggunu co Örsaliim.

<sup>23</sup> Ìkiri ömö'di könö ka tiki iini, "Ka Tatalaana, kadu kadhilli eege kungngo kara toolonadene?"

A Yasu tapadaga tumma eene,

<sup>24</sup> "Aaga kardha ku'bu aaga tagilaana ka inye tanno iciri no, ara a'a tadirina aaga, kadu kadhabbu kara tasaasa co ka tauugaara ma Masala, illi eege taalo kam-baanya.

<sup>25</sup> Aga ömö'di ma 'dö kara tafiki'dö eere ka inye, aaga ta'dingnge ana ko'do kürö, aaga tadhoodho inye aaga tiki, 'Ömö'di eede, fa'da inye ungngo.'

"Ìkiri ka tiki, 'Taalo a'a nussu aaga, aaga ka ma kiga.'

<sup>26</sup> "Aaga tikiri ka tiki, 'Kagu ungngo eema ungngo tagooye nja o'o, na o'o tagalaana kadu ka naifiin tanno iidü.'

<sup>27</sup> "Ìkiri ka tiki aaga, 'Taalo a'a nussu aaga, aaga kö'dö ndama kiga, aaga sigi co kanna kede ka oona, aaga in'dili kungngo aaga na oroko no.'

<sup>28</sup> Aaga tafara aaga tabbiunaana igini ka oona, kada kara tasala Abrahäm nja Ishak nja Yaguub nja nagane'bi in'dili kungngo ka tauugaara ma Masala aaga tuurugunja co kürö.

<sup>29</sup> Ara kadu sa köö'dö ndama fiini ma ndanaaya nja ta'buugu nja küüle nja küülü nja na'buugu koona nye'de kungngo köö'dö temmi ka tauugaara ma Masala kagu eema.

<sup>30</sup> Kadu na kanna keere no kaco kidha, a kadu na kanna kidha no tapadaga oona keere."

#### Yasu asaasa Örsaliim (Matta 23.37-39)

<sup>31</sup> Ka uuru tanno miini no, köö'dö naFariisi ka Yasu kiki iini, "Kolo kürö nungeene kita kudumma Hirüdüs asaasa tiidi o'o."

<sup>32</sup> Ìkiri ka tiki eene, "Aaga unggeene aaga co tiki a sura tammo a'da, 'A'a nungngö nasoro nagana'bu ka kadu ka oona noolona kadu ka maara 'bitingngö nja taka, ka naguuru tanno iidoona no, ara a'a tatiimö linggo no nye'de.'

<sup>33</sup> Lakiini ara a'a tunggeene ka fiini tiya eede ka uuru tanno nja taka nja taka eege, kudumma ne'bi taalo ara teyi kürö ma Örsaliim.

<sup>34</sup> "Ka Örsaliim, Örsaliim, nagirina o'o nagane'bi natüdiri' kadafiini na ünggürünja küüdö no, naguuru kadhabbu eede ka tasaasa tawaana laala yüüdü koona afa koogoro mawaana linsiö kono ka agedhe, aaga taalo kasaasa.

<sup>35</sup> Aaga assa ka 'dö tiya ada ungngo ara tinyi kada ku'bu. Ara a'a tiki aaga taalo aaga kara tassa kede afe'de, illi ada kara tiki, 'Baraka ka ömö'di tiya ö'dö ana eere ma Uugaara ya.'

## 14

#### Yasu oolona ömö'di ka maara

<sup>1</sup> A Yasu co kita dhabbu ma naFariisi ka uuru ma Sa'bidi töccö tagu eema kide, a kadu tadiinö ana i'i ko'do.

<sup>2</sup> A'da ömö'di ungngo iini kidha a maara alüfüü ka oona.

<sup>3</sup> Ìkiri Yasu ka tiki a katalaana ma seriye nja naFariisi, "A'diila aja kara toolona ömö'di ka uuru ma Sa'bidi alla atoroko?"

<sup>4</sup> Kikiri ka ki'döönö, yungngo a Yasu ka tümmü ömö'di ka niisö oolona i'i uuru i'i ka tino.

<sup>5</sup> Assa ka tiki eene, "Mada ana kada a 'bii'bala tiya iini üürü kodha yiini ka 'dingga co össe ka uuru ma Sa'bidi taalo ara tareere ungu i'i ko'do?"

<sup>6</sup> Taalo nüümö meene kateema.

*Tataafala nya tiicolo ka eedi*

<sup>7</sup> İkiri Yasu ka iji kadu na agümmünüdene no, katesse na'buugu ka kadu kidha kemmi kide, ikiri ka tirina tafeene ma tumma neene,

<sup>8</sup> "Üürü agümmünü ömö'di o'o ma tö'dö ka tarna ya, fa temmi ka kere tanno kidha no, kudumma ömö'di töccö inggide agümmünüdene adhabbu o'o.

<sup>9</sup> Ngaga ömö'di ya agümmünü aaga ya tö'dö iki o'o, 'Fa ka ömö'di tiya ka 'buugu tiya üüdü,' a modolo tümmü o'o naco temmi keere.

<sup>10</sup> Lakiini ka kadu kara tümmünü o'o, kolo nemmi ka 'buugu tiya keere ya amang ka ömö'di tiya agümmünü kadu ya, kara tö'dö iki o'o, 'Ömö'di eede, fiki'dö naco temmi ka fiinii ma ndanaaya kanna.' Nggege ya taalo modolo mara tagu o'o ka kadu kidha.

<sup>11</sup> Kudumma ömö'di tiya 'dinigi oona niini coo'do ya, ara ta'diniginja ku'bu, ömö'di ya ümmü eyi yiini ka tidhilli ya ara ta'diniginja coo'do."

<sup>12</sup> Yungno a Yasu ka tiki ömö'di tiya agümmünü kadu ya, "Küdü kara tümmünü kadu a kuri ma uuru nja ooso kungno ya, fa tümmünü kateefe ma o'o nja nagöre tanno üüdü nja siliga ma o'o nja tanno kete küdü no nja tanno ana eema dhabbu no, kudumma eene kara tümmünü o'o tekere kapadaga eema yüüdü o'o ka ööye miini.

<sup>13</sup> Lakiini küdü kara tümmünü kadu a kuri ya, ümmünü kadu na eema ka titalo kene no nja kadu tanno namügüre no nja tanno sogo'do no nja tanno kisinsoro no.

<sup>14</sup> A'diila nja kadu kara tüünii nggege ana egee kudumma eene taalo kara tapadaga eema o'o ka ööye miini, ara sa kananja o'o ka uuru ma tafiki'dö ma kadu tanno a'diila no."

*Tafeene ma tumma ma taanyara tanno dhabbu no*

<sup>15</sup> A ömö'di könö ana ka kadu tanno emmi no ka taföönyö ikiri ka tiki a Yasu, "A'diila nja ömö'di tiya ara temmi agu eema ka tauugaara ma Masala ya."

<sup>16</sup> İkiri Yasu ka tiki iini, "Ömö'di inggide agüünii eema ma kuri dhabbu adagümmünü kadu kadhabbu a'da köö'dö taguri.

<sup>17</sup> İkiri ka kürünü ömö'di ma linggo yiini ka uuru ma kuri, a'da aco tiki a kadu tanno

miini no a'da kasa andö'dö kudumma kuri andananja ku'bu.

<sup>18</sup> "Ka'dükü co kawwa eema ma tümmöönö ka nanggeyi tanno eene, a ya dhidha ya tiki iini, 'Naleefe a'a taana siga, yungno eede kara co ndassa kide nasaasa o'o a'da nafa kede naco.'

<sup>19</sup> "A köönö tiki iini, 'Naana a'a nagodha ka iidümmü ka trenggele a'a nunggunu co nda'b'ba eege, nasaasa o'o a'da nafa kede naco.'

<sup>20</sup> "Aya tiki, 'Narna a'a aka taalo a'a nara tamaanya tö'dö.'

<sup>21</sup> "İkiri ömö'di ya alinggo ya, ka öö'dö adirina eema ya kadu kadgeema ya iini, ömö'di ma 'dii a tagoroo'bo tümmü i'i, ikiri ka tiki ömö'di tiya alinggo ada iini ya, 'Kolo akürö areere ka nafiinii maanya a narukuteene miini, nöö'dö a kadu tanno eema katitaalo kene no nja tanno namügüre no nja tanno asogo'do nja tanno kisinsoro no.'

<sup>22</sup> "İkiri ömö'di ya linggo ya ka tiki iini, 'Ka ömö'di eede, nagalinggo a'a afa tiya üüdü ka tiki ya a na'buugu öccö kinggide ka 'döngngönyö.'

<sup>23</sup> "İkiri ömö'di ka tiki iini, 'Kolo a nafiinii maanya ku'b'ba nja eere ma nsaara nöö'dö a kadu kadigi 'bügööri yeede.'

<sup>24</sup> Ara a'a tiki aaga, taalo ömö'di ana ka kadu tanno agümmünüdene no ara tagolo kuri yeede.'

*Minna asaasadene ka talaana tanno Yasu*

<sup>25</sup> A kadu tunggeene nya Yasu kadhabbu ikiri ka tafele iki eene,

<sup>26</sup> "Ömö'di ya öö'dö kede assa ka taalo anu ka pupa tiya iini nja nüümö, nja aka tammo iini, nja laala tiya iini, nja nagöre tanno iini, nja naginye tanno iini, adagii'bi tasaasa ma eyi tiya iini ya, taalo ara tatalaadene tiya eede.

<sup>27</sup> A ömö'di ya taalo a'duga salii'bi yiini uurna a'a keere ya taalo ara tatalaadene tiya eede.

<sup>28</sup> "Mada ana kada asaasa tarü'bü 'dii ya dhonggoro ya assa ka taalo emmi tikinggi iini eema yiini kara tarü'böönö iini ya, ara ta'dimo kini ka arü'böönö iini?

<sup>29</sup> Kudumma iini kara tanggaaga kadeset ku'bu assa ka titalo ambaanya tarü'be, a kadu na unggeene ka fiinii no nye'd'de kungno, tadinii i'i kamidhi i'i.

<sup>30</sup> Keema kiki a'da, 'Ömö'di ya ata tüm'bü ma tarü'böönö ku'bu assa ka taalo ambaanya tarü'be 'dii.'

<sup>31</sup> "Üürü uugaara inggide asaasa co ka soore ka uugaara töccö, taalo ara temmi tikinggi iiröönö ara i'i tamaanya teema koro'bo nja iini a nasigira köö'dö na alif kada'baaga nja uugaara tiya a nasigira köö'dö na alif kukumu ömö'di no?

<sup>32</sup> Üürü taalo atambaanya, ara tagürünü kadu kaco toreeene nja iini a'da aleefe ku'b'ba, kimi'di tumma a ta'diila nja iini.

<sup>33</sup> Nggeege ya üürü ömö'di ana kada itaalo afa ka eema tiya iini nye'de ya, taalo atambaanya ta tatalaadene tiya eede.

<sup>34</sup> "Tangga'dala ka'diila, lakiini kene ka ndasügünü 'dee kara tamana minna kide?

<sup>35</sup> Taalo kara ta'diila nja 'büdhülü kitatalo kara ta'diila nja tommokodho, kara tadhifi co aküro.

"Ömö'di ya ana iisine ma taföönyö ya, fa kini afoönyö."

## 15

### Dheefele ya aama ya

<sup>1</sup> A kadu na ama talu'ba no nja tanno oroko no kanna ka Yasu kete katoodo kini.

<sup>2</sup> İkiri naFariisi nja katalaana ma seriye kada a'digineene kiki, "Ömö'di ya asasa ka nja na oroko no agu eema nja eene."

<sup>3</sup> İkiri ka tageema nja eene a tafeene ma tumma tanno iki,

<sup>4</sup> "Mada ana kada ana kidheefele kukumu kadu ka iidümmü, aya taama ana kene unggodho taalo ara tinyi no kukumu kadu ka iidümmü aaco aküro unggodho no, ka lodho ara kaco ndawwa dheefele ya aama ya idhi aduna?

<sup>5</sup> Kini ka tuna i'i akarasa kini ka 'dakeyi adhodho.

<sup>6</sup> Aco 'di ümmünü kateefe miini nja kadu tanno kete kini no iki eene, 'Aaga dhodho nja a'a kudumma eede ka tuna dheefele yeede ya agaama ya.'

<sup>7</sup> Yungno eede kara tiki aaga, ara dhodho tanna ka 'dotombo'do nggeege ana ömö'di tiya atoroko ya unggodho kara taadha ka tatoroko tanno iini öö'dö ka Masala agil'bi kadu kukumu kadu ka iidümmü aaco aküro unggodho, na insili no taalo kasaasa taadha ka tatoroko."

### Jine ya aama ya

<sup>8</sup> "Üürü aka minggide mana nakajine\* kada 'baaga assa ka taama unggodho, taalo mara tüfü issi ka lamba makinye 'di mawwa jine amussu midhi maduna i'i?

<sup>9</sup> Kono kara taduna ya, mümmünü kateefe moono nja kadu tanno akete kono no miki, 'Aaga dhodho nja a'a kudumma eede ka tuna jine yeede ya agaama ya.'

<sup>10</sup> Yungno eede ka tiki aaga a'da kadhangga ma Masala katadhodho ana ömö'di tiya toroko unggodho ka taadha ka tatoroko."

### 'Bii'bala ya aama ya

<sup>11</sup> İkiri Yasu ka tiki, "Ömö'di inggide ana laala eera.

<sup>12</sup> İkiri 'bii'bala ya idhilli ya ka tiki, 'Pupa, sa nangnga eema yeede a'a ndama almaala.' İkiri ka sümünaana almaala yiini kene ku'bu.

<sup>13</sup> A füngngö idhilli kungngö ya, ikiri 'bii'bala ya idhilli ya ka tawagaana eema yiini koona nye'de, unggenee aaco a naanya ku'b'ba, ataga'da eema yiini ka eema ma weerö ün'dügüngngö.

<sup>14</sup> Kini ka ndaga'da eema nye'de ya, assa iire tümmü naanya no miini no ka tatoroko, andasaasa kuri.

<sup>15</sup> İkiri ka co ka ömö'di ma anya tammo iini mo, aco talingga nja iini, ikiri ka tururugu i'i co nasigeene tanno iini ma taguri a nagüdürü.

<sup>16</sup> İire tümmü i'i dhindho asasa tagu 'bisinggisi ya nagüdürü ya, illi ömö'di ma tanangnga iini taalo.

<sup>17</sup> "İkiri ka apadaga ka eyi tiya iini iki, 'Kadu no alingga ada pupa tiya eede kagu eema dhabbu, ara a'a ka tanna kita ana iire.

<sup>18</sup> Ara a'a tafiki'dö naco ka pupa tiya eede niki iini, Pupa yeede, nagüüni a'a tam'baga kidha ma Masala a kidha ma o'o.

<sup>19</sup> Taalo a'a nama tümmünüdene kada 'bii'bala tiya üdü, ümmü a'a ka tamö'di tiya alingga ya ün'dügüngngö.'

<sup>20</sup> "İkiri ka tunggeene aaco ka pupa tiya iini, a pupa yiini taasala i'i ka tadhe ku'b'ba a 'bangnga miini tümmü i'i, ikiri ka rünö aaco kini ümmü i'i iti kini ka oona ööjüll i'i.

<sup>21</sup> İkiri 'bii'bala yiini ka tiki iini, 'Pupa yeede, nagüüni a'a tam'baga kidha ma Masala ana o'o afe'de, taalo a'a nama tümmünüdene kada 'bii'bala tiya üdü.'

<sup>22</sup> "Yungno a pupa tiya iini kadirina eema a kadu tanno alingga ada iini no, 'Aaga öö'dö a ten'di tammo a'diila mo areere, aaga tagirni kini ka oona, aaga tagirni ndaneema iini ka 'banüsö aaga tagirni egüde iini ka uune.

<sup>23</sup> Aaga öö'dö a 'bamiide tiya indhi ya, aaga teedhe angnga taguri angnga tagadhadho.

<sup>24</sup> Kudumma 'bii'bala tiya eede ya, aaga eyi ada ungngö efe ka 'di, adagaama adunadene.' Kikiri kanda dhodho 'do.

<sup>25</sup> "A'da 'bii'bala ya dhabbu ya inni ka siga, kini ka ndafada ka siga assa ndakete ka 'di ya, ikiri ka föönyö tüüsü nja siili.

<sup>26</sup> Yungno iini ka tagümmünü ömö'di öccö ya alingga ya, indini i'i a'da, 'Minna inggide?'

<sup>27</sup> Yungno iini ka tiki iini, 'Örre yüüdü afada ka a'diila, a pupa yüüdü tikiiri ka teedhe 'bamiide ya indhi ya.'

\* 15:8 15:8 Jine ya miini ya i'i ya ma linggo ma uuru unggodho.

<sup>28</sup> "Ikiri ka koroo'bo a'dükü co 'bügööri, a pupa yiini tö'dö kürö atakilli i'i a'da aaco.

<sup>29</sup> Ikiri ka tiki a pupa tiya iini, 'Nalinggo ada a'a o'o a nagürüün dhabbu, nitaalo nasilli tumma nüüdü, taalo o'o nakara tümmünü 'banggoromo a'a unggodho kungno a'da nadhodho nja kateefe ma a'a iini.

<sup>30</sup> Lakiini ka 'bii'bala tiya üüdü ya atömü eema yüüdü nye'd'e nja katemelö, kini ka tafada, na o'o tedhe 'bamiide ya ïndhi ya iini.'

<sup>31</sup> "A pupa yiini tiki iini, "Bii'bala eede, nanna o'o ka 'di nja a'a turi, eema yeede yüüdü i'i ya miini.

<sup>32</sup> Lakiini a'diila nja angnga kara tagad-hodho angnga taka'deema kudumma örre tiya üüdü ya aga eyi ada ungngo efe ka 'd', adagaama adunadene."

## 16

### Ömö'di ya alinggo a ta'dara ya

<sup>1</sup> A Yasu tadirina tumma a kadalaadene tanno iini afe'de, "Ömö'di inggide ana eema dhabbu, ömö'di öccö inggide alinggo nja iini, ömö'di könö tilkiri ka tafünaana eema ömö'di tiya ma eema ya iki a'da, 'Ömö'di yüüdü ka anangngä i'i ka afa ka eema tiya üüdü ya aga'da 'do.'

<sup>2</sup> Ikiri ka tagümmünü i'i iki iini, 'Eema minna i'i yungno eede ka föönyö ma o'o ungno? Tirina niimö yüüdü ka tagüün ana almaala tiya eede ya a'a, taalo o'o nara tafa ka eema tiya eede afe'de ndama uuru tanno.'

<sup>3</sup> "A ömö'di ya linggo teema ka eyi tiya iini, 'Ömö'di yeede ya ara tafada a'duga linggo no kede, ara a'a tönynyö 'bitüngngö? Taalo a'a naraumbaanya leele, a modolo ma tarangnga tagu a'a.'

<sup>4</sup> Ikiri ka tiki, 'Nussu a'a niimö yeede kara tüünä ya, amang ka ömö'di ma linggo kara tasoro a'a ya, a kadu tamma kede ka nöö'di tanno eene.'

<sup>5</sup> "Ikiri ka tagümmünü kadu ma kömüsü tanno ömö'di ma linggo tanno iini iki ada könö, 'Ömö'di yeede ya 'dee asaasa küdü ka oona aanya?'

<sup>6</sup> "Iki iini, 'Nadhafala ma uu'ba kukumu kadu küdümmü.'

"Iki iini, "Duga waraga nemmi areere nakirikide eema a kadu keera kaco iisine."

<sup>7</sup> "Iki ada öccö, 'Ömö'di yeede asaasa küdü ka oona aanya?"

"Iki iini, 'Taliisi ma migile kö'dö alif.'

"Ikiri ka tiki iini, "Duga waraga nakirikide a'da eema ukumu kadu kada'baaga ta egüsö (800)."

<sup>8</sup> "Ikiri ömö'di ya ma eema ka tündhigü ömö'di ya alinggo nja iini ya ko'do ya taalo

adho ka fiini ya, kudumma iini ka tagüünä a ta'dara. Kudumma laala ma 'büdhülü tiya ka'dara kadagii'bi laala ma töyeene kadalinggo nja kadu tanno eene.

<sup>9</sup> Nikiri a'a ka tiki aaga, aaga ümmü kateefe ma aaga ana eema ma 'büdhülü, kini kara titaalo ya, kara tamma kada ka buugu ma tefe ka 'di ta'billi.

<sup>10</sup> "Ömö'di kara tafa ka niimö tiya idhilli ya ara tafa ka tiya adhabbu ya, a ömö'di ya üünä ada kadu ku'bu a niimö idhilli ya ara tüünä ada kadu ku'bu ana eema tiya dhabbu ya.

<sup>11</sup> Üürü taalo aaga kafa ka almaala ma 'büdhülü 'dee, mada yungno ara tamma kada ana eema tiya dhorro ya?

<sup>12</sup> Üürü taalo aaga kafa ka eema tiya kadu tököönä a mada i'i yungno ara tamana eema yaada aaga?

<sup>13</sup> "Taalo ömö'di ara tambaanya talinggo ada kadu keera, kudumma iini kara tanu ka tiya ara ka asaasa öccö, nja iini ka föönyö tumma no ada öccö amidhi öccö, aaga taalo kara tambaanya talinggo ada a Masala nja almaala."

<sup>14</sup> A naFariisi tagatoodo kini kamidhi i'i kudumma eene kasaasa almaala dhindho.

<sup>15</sup> Ikiri ka tiki eene, "Kümmü aaga nanggeyi naada ka'diila ka kadu kidha, lakiini Masala mussu nanggeedi naada ka teene, kudumma eema tiya kadu katümmü i'i ka ku'daana ya atoroko ka Masala kidha.

<sup>16</sup> "Aga kanna seriye kide nja talaana ma nagane'bi idhi a Yühanna ya Tatambeese ya tö'dö. Ndama uuru tanno miini no, a kadu tagalaanadene a tumma ma tauugaara ma Masala, a kadu könö takardha ku'bu ma tasaasa co a rüsü kungno.

<sup>17</sup> Lakiini tamanyaga ma 'büdhülü nja 'dotombo'do taalo agu'daana afa titaalo ma 'ba'dakeyi ma seriye unggodho kungno.

<sup>18</sup> "Ömö'di ya adheene nja aka tammo iini atarna kömö ya, i'i ya atemelö, a ömö'di ya arna aka ma nyuri ka dheeene nja oono mo i'i ya atemelö.

### Liyasiri nja ömö'di ma almaala

<sup>19</sup> "A ömö'di inggide ana almaala dhabbu, ümmü en'di ya agu'daana ya nja tiya idhindhi ya ka oona, ümmünaana kadu ka 'di kita iini a naguuru kagu eema.

<sup>20</sup> A ömö'di inggide ana eere a'da Liyasiri taalo eema kini, eema ya in'di yungno iini ka oona nye'd'e de kungno, emiimi kini ka inye ma 'bügööri.

<sup>21</sup> Asaasa tera türeene ma kuri tiya ömö'di ma eema ka aguri ya, a tiini ticci atö'dö kanyege'de eema yiini ya in'di ya.

<sup>22</sup> "A ömö'di ya eema ka titaalo kini ya teyi, a kadhangga ta'duga i'i kanangnga i'i

ka Abrahiim kete, ömö'di ya ana almaala ya, teyi afe'de adatü'büdene.

<sup>23</sup> Ömö'di ya ana almaala ya, andanna ka 'buugu ma inde üünü muuyu assa coo'do asala Abrahiim ku'b'ba nja Liyasiri ka temmi kini kete.

<sup>24</sup> İkiri ka tümmünü eene iki, 'Ka Pupa yeede Abrahiim, oolona kede, kürünü Liyasiri allo üüdü ma 'banüsö tiya iini ka 'büüdi öö'dö iini a'a natala kede ka onggo'do, kudumma eede nungngo ka issi nüünü muuyu.'

<sup>25</sup> "Ikiri Abrahiim ka tiki iini, 'Bii'bala eede, nagügi o'o yüüdü ka ndaga'duga eema ya a'diila yüüdü ka takaleefe ka 'di, ara Liyasiri ka ta'duga dhögürü, i'i 'bitüngnö anda'duga talinge niini ara o'o ka tüünü muuyu kanna.

<sup>26</sup> Eema ya in'dili kungngo koolo ungngo iidi ka söödö nja aaga adhonggoro, taalo ömö'di ma tassumunaana ka tada'da kide aco ada kanna, ömö'di yaada taalo tassumunaana ka tada'da kide öö'dö kidi kita.'

<sup>27</sup> "Ikiri ömö'di ya ma almaala ya ka tiki, 'Pupa yeede Abrahiim, nasaasa a'a o'o nagürünü Liyasiri ka 'di tiya pupa tiya eede,

<sup>28</sup> aco tadirina eema a nagöre tanno eede no iidümmü no amang kene tafa tö'dö ka 'buugu ma dhögürü tiya.'

<sup>29</sup> "Yungno Abrahiim ka tiki iini, 'Müüsa ungngo eene nja nagane'bi, fa kene katoodo kene.'

<sup>30</sup> "Ikiri ömö'di ka tapadaga tumma iini, 'Taalo nggeege Pupa yeede Abrahiim, lakiini ka ömö'di unggodho kara tafiki'dö ndama inde aco kene kara taadha ka tatoroko.'

<sup>31</sup> "Ikiri Abrahiim ka tiki iini, 'Kene ka titaalo kaföönö tumma na Müüsa nja nagane'bi, ömö'di saga fiki'dö ndama inde taalo kara tamma.'

## 17

### Tatoroko

(Matta 18.6-7, 21-22; Murkus 9.42)

<sup>1</sup> İkiri Yasu ka tiki a kadalaadene tanno iini, 'Eema ya amana kadu ka talingga tatoroko ya ara tö'dö, lakiini am'ba ka ömö'di tiya ara talingga ya.

<sup>2</sup> Ara ta'diila eene kara timi'dina arru iini ka eyi kimi'dina ka müsi ka pügü co to afa tamana ma kadu tanno dhiidhi no ka talingga eema ya toroko ya.

<sup>3</sup> Aaga adinö ko'do, ka örre tiya üüdü kara tüünü tatoroko kirnaana kini, üürü Aadha kide ya nafa kini.

<sup>4</sup> Üürü agüünü tatoroko ana o'o iidümmü afünü eera ka uuru ka unggodho ya, assa ka tapadaga küdü

tüdümmü afünü eera assa ka tiki o'o a'da afada i'i Aadha kide, na o'o tafa kini."

### Tamma ka Masala

<sup>5</sup> A kadaffiini tiki a Uugaara, "Tigini tamma ka Masala ungngo."

<sup>6</sup> İkiri Yasu ka tapadaga tumma eene, "Kada kara tamma ka Masala ana eedi idhilli afa ndaniiye ma tanuure, aaga tiki a iidüye tanno, 'Fannadene nadhonja ka to,' kara taföönö tumma naada.

<sup>7</sup> "Mada ana kada ömö'di ka leele iini ka siga nja iini ka kuri a ki'biini, öö'dö ndama lodho iki iini, 'Ereere nemmi nagu eema'?

<sup>8</sup> Ara tagala ka tiki iini, 'Indinaana oona nüüdü nindinaana kuri kede ku'bu nündühgä a'a naguri nooye, o'o sa ka öö'dö taguri nooye.'

<sup>9</sup> Ömö'di ya linggo ya 'dee ara ta'diila nja iini kini kara taföönö tumma na ömö'di tiya iini?

<sup>10</sup> Kafeene aaga nggeege kada kara tüünü nüümö ya kadu ka tiki a'da aaga tüünü ya, aaga tiki, 'Ungngo ka kasaga ma linggo ün'düngnö, ungngo tagalinggo eema ya ananja ungngo a'da ungngo talingga ya.'

*Yasu oolona kadu ma kutukunya kada'baaga*

<sup>11</sup> Aga Yasu ka ndunggeene ka fiini ma tara co Örsaliim adigaala ka Samira nja Jaliil.

<sup>12</sup> Kini ka co daara inggide ikiri ka toreene nja kadu kana kutukunya ka oona kada'baaga, kikiri ka töödhi ku'b'ba.

<sup>13</sup> Kalneege ko'do kiki, "Yasu tatalaana, ana 'bangngä ma ungngo."

<sup>14</sup> İkiri Yasu ka tassa kene iki eene, "Aaga unggeene aaga co alaga oona naada co ka'boge." A kene ka tunggunugu co ya kikiri ka tinsili ka oona.

<sup>15</sup> A könö ungngo eene assa kini ka a'diila ya, afada afünügü Masala ko'do dhindho.

<sup>16</sup> Ömö'di ya miini ya ataga Samira üürü ka Yasu kidha ana kütüge nja dhugudha amana ta'diila iini.

<sup>17</sup> İkiri Yasu ka tiki, "Taalo katanggaladene kada'baaga sa, anno iidümmü kafünü egüsö no kiiye?

<sup>18</sup> Taalo ömö'di ana kene afada öö'dö tündühgä Masala ko'do illi töölöge ya?"

<sup>19</sup> İkiri Yasu ka tiki iini, "Fiki'dö nunggeene, tamma ka Masala nüüdü ka olona o'o."

*Tö'dö ma tauugaara tanno Masala*

(Matta 24.23-28, 37-41)

<sup>20</sup> A naFariisi tindini i'i kiki, "Ara tauugaara na Masala tö'dö aada?"

Iki eene, "Taalo ömö'di ara tadinö ka tö'dö ma tauugaara ma Masala.

**18**

*Tafeene ma tumma ma aka ma küüme  
nja uugaara*

<sup>1</sup> A Yasu tageema nja kadalaadene tanno iini, a tafeene ma tumma a'da kafara ka Masala turi kafa tagi'di.

<sup>2</sup> Iki eene, "Aganna uugaara ka anya minggide taalo ari'ba a Masala itaalo ari'ba a kadu.

<sup>3</sup> Aka ma küüme taganna ka anya tammo iini mo, maleele kini ka oona miki iini, "Ümmöönö kede kudumma diidi ma a'a."

<sup>4</sup> "Atakanu ka tumma tanno oono, lakiini kono ka ndakalele kini ka oona ya, ikiri ka tiki ka eyi tiya iini, 'Taalo a'a nari'ba a Masala nitaalo nari'ba a kadu.

<sup>5</sup> Ara a'a tümmöönö ka aka ma küüme tammo, kudumma oono ka anyamanya a'a ka oona, kudumma oono mara tüütü ka taleele kede ka oona manyamanya a'a ka oona.' "

<sup>6</sup> Ikiri Uugaara Yasu ka tiki, "Aaga toodo ka eema tiya uugaara tiya üün'i ada kadu ku'bu ya ka teema.

<sup>7</sup> Taalo Masala mara toolona kadu noono ka tagesse euge no, na afara kono ooso a naguuru? Mara tadoono ku'bu manangnga iïye eene?

<sup>8</sup> Yungngo eede ka tiki aaga, mara tareere möödhi kene, lakiini 'Bii'bala ma Tadü'dü 'dee ara taluna tamma ka 'büdhülü kini kara tö'dö?"

*Tafeene ma tumma ma taga Fariisi nja  
ömö'di ma tulu'ba*

<sup>9</sup> A Yasu tageema ka tumma co kadu kinggide kümmü nanggeyi neene a'da euge ka'diila kamidhi kadu öccö,

<sup>10</sup> "Kadu kinggide keera kasirigö co la ma Masala ma tafara ka Masala, könö a taga Fariisi, aya tamö'di ma tulu'ba.

<sup>11</sup> Ikiri taga Fariisi ka fiki'dö adageema ka eyi tiya iini iki, 'Nanangnga a'a ta'diila o'o Masala, taalo a'a nafeene nja türeene ma kadu na ama eema ya kadu na, nüün'i ada kadu ku'bu no, nja tanno afüngngö anyoro no, taalo a'a nafeene nja ömö'di ma tulu'ba tiya.

<sup>12</sup> Nümmü a'a tenege teera ka üsbü unggodho namana faana ma la ma Masala ku'bu nye'de.'

<sup>13</sup> "Lakiini ömö'di ma tulu'ba öödhü ku'b'ba taalo asaasa tadin'i co 'dotombo'do, agala ka dhüüdhü orro iki, 'Ana 'bangnga ma a'a Masala kudumma eede ka tatoroko.'

<sup>14</sup> "Ara a'a tiki aaga, ömö'di ma tulu'ba ya inynyo öö'di kita iini ka'diila, ara

<sup>21</sup> Ömö'di tafa tiki a'da, 'Ungngoka, nja iini ka tiki a'da, 'Inni kanna,' kudumma tauugaara tanno Masala kungngko ada ka nanggeedi."

<sup>22</sup> Iki a kadalaadene tanno iini, "Uuru kinggide kassa ka öö'dö, aaga tasaasa tassa ka uuru tanno 'Bii'bala ma Tadü'dü ka unggodho kungngko taalo aaga kara töjöögö.

<sup>23</sup> Ara kadu saga tiki aaga a'da, 'Ungngoka, nja iini, 'Inni kanna,' aaga fa co, aaga tafa tuurna ömö'di öccö keere.

<sup>24</sup> Kudumma uuru ma tö'dö tanno 'Bii'bala ma Tadü'dü kara tafeene nja talimaana ma tombo'do na limi ku'b'ba kasa ka öö'dö töyeene ka 'dakeyi töccö no.

<sup>25</sup> Lakiini i'i ara tadhügürü ana eema dhabbu tikinggi a sere ya ma 'bitingngö ya tanu kini.

<sup>26</sup> "Afa ma tiya agüüni adene ka naguuru tanno Nööh no, ara tüünidene ka naguuru tanno 'Bii'bala ma Tadü'dü.

<sup>27</sup> Kagu kadu eema kooye ngeeli karna ajeene idhi Nööh co a mürkabü ka teene, a faaya tö'dö agirina euge nye'de kungngó.

<sup>28</sup> "Nja tiya agüüni adene ka naguuru tanno Luut no afe'de, kaguri kadu kooye, kanadene ana eema kaana eema, kaleele karü'bü nöö'di.

<sup>29</sup> Lakiini ka Luut ka öö'dö kürö ndama Sadöma a Masala tunggu issi ku'bu nja albaarü kide ndama 'dotombo'do mafine euge nye'de kungngó.

<sup>30</sup> "Ara tafifi gnggege ka uuru tanno 'Bii'bala ma Tadü'dü kara tatele oona.

<sup>31</sup> Ömö'di ya aganna ka la ko'do ka uuru tanno miini no ya, taalo ara tö'dö ku'bu aco a'duga eema yiini ka 'büögöri, a ömö'di ya ka siga ya taalo ara tapadaga oona keere.

<sup>32</sup> Aaga agüigö aka ma Luut mo.\*

<sup>33</sup> Ömö'di ya asaasa toolona eyi yiini ya ara taama i'i, ömö'di ya aama eyi yiini ya oolona euge.

<sup>34</sup> Ara a'a tiki aaga ka ooso tanno miini no ara kadu tafü ka tenggere tanno unggodho no keera, könö ta'dugadene aya tüütü.

<sup>35</sup> A iiya keera kawöönö ka 'doonya ma unggodho, a kömö ta'dugadene ammo tüütü.

<sup>36</sup> [A kadu na nagiide no tanna ka siga keera, ököönö ta'dugadene aya tüütü.]"

<sup>37</sup> A kadalaadene tindini i'i kiki, "Ka Uugaara, ara tumma no talinggo adene kiga?"

Ikiri ka tiki eene, "'Buugu ya nüümö ka teyi kide ya ara nagolo tarügü kide."†

\* 17:32 17.32 Takwiin 19.15-26    17:36 17.36 Matta 24.40    † 17:37 17.37 Ka uuru ma tapusu adene kara tö'dö ara aaga tussu 'buugu miini.

taga Fariisi ka tüütü a tatoroko tanno iini. Ömö'dii ya 'dinigi oona niini coo'do ya ara ta'diniginja ku'bu, ömö'dii ya ümmü eyi yiini ka tidhilli ya ara ta'diniginja coo'do."

*Yasu nja laala tiya dhiidhi ya  
(Matta 19.13-15; Murkus 10.13-16)*

<sup>15</sup> A kadu tö'dö ana laala iini a'da ümmünü iisine eene ka oona, a kadalaadene niini tasala egee kagirnaana kene.

<sup>16</sup> Lakiini Yasu agümmünü egee, "Aaga fa ka laala köö'dö kede aaga tafa tafaga egee keere, kudumma tauugaara ma Masala kungngó eene.

<sup>17</sup> Ara a'a tadirina tumma aaga dhorro, ömö'dii ya taalo amma ka tauugaara ma Masala afa 'bii'bala kungngó taalo ara co."

*Ömö'dii ya ana almaala ya  
(Matta 19.16-30; Murkus 10.17-31)*

<sup>18</sup> A tadiifi tindini i'i iki, "Ka Tatalaana ya a'diila ya, ara a'a tönynyö nassa ka aluna tefe ka 'di ta'billi?"

<sup>19</sup> İkiri Yasu ka tiki iini, "Minna agu o'o nümmünü a'a a'da na'diila? Taalo ömö'dii ma ta'diila illi Masala unggodho oogo.

<sup>20</sup> Nussu o'o tumma no iki a'da, 'Fa temelö, fa tagirina kadu, fa tanyooro, fa tafünü korokoro ka kadu ka oona, ümmü pupa yüüdü nja niümö tammo üüdü."

<sup>21</sup> İkiri ka tiki a Yasu, "Nagalinggo a'a eema ya 'do a'da nakaleefe a'a taga idhilli."

<sup>22</sup> Ka Yasu ka ndaföönyö tumma niini no iki, "Niümö inggide unggodho öreene, adanege ana eema tiya üüdü nye'd'de nasümünaana ka kadu tanno iini ka titaalao kene no amang ka eema tanna küdükä 'dotombo'do, na o'o sa ka öö'dö kede keere."

<sup>23</sup> Ömö'dii tamüürü kini ka taföönyö tumma no kudumma iini ka ana eema dhabbu.

<sup>24</sup> Yungngo a Yasu ka iji i'i ka koroo'bo, ikiri ka tiki, "Kiideene co ka tauugaara ma Masala ka kadu tanno ana eema dhabbu no.

<sup>25</sup> Taalo tadigaala ka ööye ma ibiri ara tiideene ana malaga, afa co ka tauugaara ma Masala ka tiideene ka kadu tanno ana eema dhabbu no."

<sup>26</sup> A kadu na föönyö no tiki, "Amada i'i yungngo aro toolonadene adha?"

<sup>27</sup> İkiri Yasu ka tiki, "Niümö ya iideene a kadu ya ara Masala talinggo."

<sup>28</sup> İkiri Bütrüs ka tiki iini, "Kafa unggido eema tiya iidü ara unggido ka tuurna o'o keere."

<sup>29</sup> A Yasu tiki iini, "Ara a'a tadirina tumma aaga dhorro, ömö'dii ya inyi 'di yiini ku'bu nya aka tammo iini, nya nagöre nya pupa nya niümö nya laala tiya iini kudumma tauugaara ma Masala ya,

<sup>30</sup> ara taluna eema dhabbu ka kusunja kini kide, a 'bitüngngö nya tefe ka 'di ta'bili."

*Yasu adiri tumma ma inde tanno iini tiidoona  
(Matta 20.17-19; Murkus 10.32-34)*

<sup>31</sup> A Yasu tümmünü kadañinä na ö'dö kada'baaga kafünü eera no iki eene, "Angnga kungngó kara tasürigö co Örsaliim 'bitüngngö a tumma na sorne ma nagane'bi kadageema ma 'Bii'bala ma Tadü'dü kara talinggo adene.

<sup>32</sup> Ara tümmününja a kajeene kadaana i'i kalama keela i'i ka'binyyi alaaga iini ka oona.

<sup>33</sup> Kassa kabbü i'i kiidi i'i, assa ka fiki'dö ka inde a fungngö iidoona."

<sup>34</sup> A kadalaadene kitaalo kussu eema yiini ka teema ya, kudumma eene kaküdühüdene kitaalo kussu.

*Yasu afa'da soro ka iiye  
(Matta 20.29-34; Murkus 10.46-52)*

<sup>35</sup> Aga Yasu ka ndakete ka Ariiha ya a'da soro unggido emmi ka tinggini ma fiini arangnga.

<sup>36</sup> Kini ka föönyö a kadu kadhabbu katungeene ya, ikiri ka tindineene, "Minna yungngó?"

<sup>37</sup> Kikiri ka tiki iini a'da, "Yasu ya ma Nasira ya, i'i yungngö unggene kita."

<sup>38</sup> Ümmüneene dhindho iki, "Yasu, 'bii'bala ya Dawud, ana 'bangnga ma a'a."

<sup>39</sup> A kadu na unggenee kidha no tagirnaana kini a'da aki'döönö. Illi i'i iidhe ko'd'o, "Ka 'bii'bala ya Dawud, ana 'bangnga ma a'a."

<sup>40</sup> A Yasu töödhü iki eene a'da köö'dö ana i'i, kini ka ndöö'dö kete ikiri Yasu ka tindini i'i,

<sup>41</sup> "O'o nasaasa a'a a'da nönynyö ana o'o?"

<sup>42</sup> İkiri Yasu ka tiki iini, "Iji 'buugu, tamma nüüdü ka oolona o'o."

<sup>43</sup> Arooro kiji 'buugu uurna Yasu keere amana ta'diila a Masala. Ka kadu ka ndiji tumma no, kündhigü Masala ko'do.

## 19

*Yasu nja Zaka*

<sup>1</sup> A Yasu co Ariiha adheedhe ko'do.

<sup>2</sup> Ömö'di ungngo ka Ariiha uugaara ma kadu ma tulu'ba ana almaala dhabbu ana eere a'da Zaka.

<sup>3</sup> Ö'dö asaasa tassa ka ömö'di tiya ana eere a'da Yasu ya, lakiini i'i ya adhüküdhükü, taalo iji Yasu kudumma a kadu katiti ajeene.

<sup>4</sup> İkiri' ka rünö aaco ka kadu kidha asirö fa ma indiyye amang kini tiji i'i, kudumma Yasu kara tadigaala kide.

<sup>5</sup> Ka Yasu ka ndala kita miini kita ya, assa coo'do asala i'i iki iini, "Zaka, aayu ku'bu areere, kudumma eede kara co tanna ka 'dii kita üdü ka uuru tanno."

<sup>6</sup> İkiri' ka öö'dö ku'bu areere oreene nja iini adhodho.

<sup>7</sup> Ka kadu kadasala tumma no ya, ka'digineene kiki a'da, "Unggeene aco tanna ka 'dii tiya ömö'di tiya atoroko ya."

<sup>8</sup> A Zaka tafiki'dö iki Uugaara, "Ka Tata-laana, ara a'a tanangnga dhüdhü ma eema tiya eede a kadu tanno eema katitaalo kene no, üürü nagüümü ada ömö'di ku'bu a niimö, napadaga co iini ököje nja tiya iini ya ta egüsö."

<sup>9</sup> Yungno Yasu ka tiki iini, "Ndama uuru tanno ka öö'dö toolona ka 'dii tiya, kudumma ömö'di tiya, i'i ya 'bii'bala tiya Abrahiim afe'de.

<sup>10</sup> Kudumma 'Bii'bala ma Tadü'dü öö'dö tawwa kadu na aama no oolona eege."

### Tafeene ma tumma ma gürüüsü ma linggo

<sup>11</sup> Ka Yasu ka ndakete ka Örsaliim, a kadu na toodo ka tumma no kiki kide a'da tauugaara ma Masala kara tatele oona 'bitüngngö, ütü ka teema,

<sup>12</sup> iki, "Ömö'di inggide tadiifi, unggeene aco anya ku'b'ba maco tümmününja ka tauugaara kide assa ka tafada.

<sup>13</sup> İkiri' ka tagümmünü kadu na linggo nja iini no kada'baaga adakinaana nakajine ma dahaba\* eene ku'bu iki eene, 'Aaga anadene iini ara a'a ka öö'dö.'

<sup>14</sup> "A kadu ma anya tammo iini taalo ka asaasa i'i yungno eene kagürünü kadu ka uurna keere kiki, 'Taalo ungno kasaasa ömö'di ya ka tauugaara tiya iidi.'

<sup>15</sup> "A kadu tümmünü ömö'di ya miini ya ka tauugaara afada aco 'dii adagümmünü kadu niini ka anangnga nakajine eene no amang kini tassa kide, ömö'di öccö aluna ka tiya iini aanya.

<sup>16</sup> Aya dhidha ya tö'dö iki, 'Ömö'di eede, naluna a'a ka jine tiya nakajine kada'baaga.'

<sup>17</sup> "İkiri' ömö'di ka tiki iini, 'O'o no ömö'di ma linggo tiya dhorro ya, a'dila nja

o'o nafa o'o ka niimö tiya idhilli ya, ara o'o tauugaara ma naanya kada'baaga.'

<sup>18</sup> "Aya tö'dö kini iki, 'Ömö'di eede, jine yüüdü ya, naduna a'a kide nakajine küdümmü.'

<sup>19</sup> "İkiri' ka tiki iini, 'Ara o'o tauugaara ma naanya küdümmü.'

<sup>20</sup> "A könö tö'dö iki, 'Ka ömö'di eede, jine yüüdü ungngo a'a naküdhü a'a i'i ka mandilli.'

<sup>21</sup> Kudumma eede ka ri'ba o'o kudumma üdü o'o na ömö'di taalo nasaasa kadu, narumuru eema a'da taalo yüüdü, nama eema a'da taalo o'o nadinüigii.'

<sup>22</sup> "İkiri' ka tiki iini, 'Ara a'a tümmü o'o a tumma tanno üdü, o'o na ömö'di ma linggo ya toroko ya nussu o'o a'da a'a taalo nasaasa kadu narumuru eema ka kadu na ama eema yeede ka titaaloo nadinüigii ya.'

<sup>23</sup> A minna agu o'o nanu ka tanangnga jine yeede a kadu tanno alinggo ana gürüüsü no amang kede tafada nöö'dö taluna i'i köö'dö keere dhabbu?'

<sup>24</sup> "İkiri' uugaara ka tiki a kadu tanno 'dingnge kini kete no, 'Aaga 'duga jine kini aaga tanangnga ömö'di tiya ma nakajine kada'baaga.'

<sup>25</sup> "Kikiri' ka tiki iini, 'Ka ömö'di eede, nakajine kungngo iini kada'baaga.'

<sup>26</sup> "İkiri' ka tiki, 'Ara a'a tadirina aaga, ömö'di ya ana niimö agusunja kini kide, ömö'di ya niimö ka titaaloo kini ya, yungno kini ya a'dugadene.'

<sup>27</sup> A kadu na diidi ma a'a no taalo kasaasa a'da na a'a tauugaara tiya eene no aaga öö'dö ana eege kita, aaga tagirina eege kede kidha.'

### Yasu inynyo Örsaliim

<sup>28</sup> A Yasu tageema tumma no, unggeene asirö ma tara co Örsaliim.

<sup>29</sup> Kini ka ndakete ka Beet Faji nja Beet Aniya ka dikinya tammo ana eere a'da Anya ma 'Dikidiyö mo, ikiri' ka kürünü kadalaadene keera.

<sup>30</sup> Iki eene, "Agolo anya tammo ada kidha mo, kada kara co ya aaga taluna 'bing kisine ka timi'dinja ku'bu üfürü ömö'di takaka kide 'do aaga kildhe i'i aaga töö'dö iini.

<sup>31</sup> Ka ömö'di kara tindini aaga ya a'da, 'Kinggilaana aaga amana ya?' Aaga iki iini a'da, 'Uugaara asaasa i'i.'

<sup>32</sup> A kadafinii na eera no co kaluna afa ma tiya Yasu kadirina eene ya kungngo.

<sup>33</sup> A kene katinggili 'bing kisine ya a kadu miini tiki, 'Minna agu aaga, aaga tinggili 'bing kisine?'

<sup>34</sup> Kikiri' ka tiki, "Uugaara asaasa."

\* 19:13 19.13 Jine ma dahaba ököje nja mahiiya ma nagatereene kiidoona.

<sup>35</sup> Kö'dö iini a Yasu kakese en'di yeene ka 'bing kisine a Yasu taka kide.

<sup>36</sup> A kini ka ndunggeene a kadu takese en'di yeene ka fiinii.

<sup>37</sup> Kini ka ndakete ka nsorondho ma Anya ma 'Diküdiyö ya, ikirii kadalaadene kadhabbu katadhadho kindhigi Masala ko'do keema dhindho ka eema ma türü tiya eene kada kadönö kide ya nye'd'de, kiki a'da,

<sup>38</sup> "A'dila ka Uugaara tiya öö'dö ana eere ma Masala ya,  
fa ka ta'dila ka öö'dö ka 'dotombo'do nja tidhindhi ka fiinii ma ndanaaya."

<sup>39</sup> A naFariisi öccö ungno ka kadu ka teene ya iki a Yasu, "Ka Tatalaana, iki ka kadalaadene tanno üüdü a'da ka kii'döönö."

<sup>40</sup> Apadaga tumma eene iki, "Ara a'a tadirina aaga, a kadu no saga kii'döönö ya, ara nügisi tiidhe."

### *Yasu ya afara kudumma Örsaliim*

<sup>41</sup> Kini ka ndakete ka Örsaliim assa kono afara kudumma oono.

<sup>42</sup> Ikirii ka tiki, "Küdü kara tagussu fiinii ma ta'dila ka uuru tanno. Lakiini 'bitingngö allafa küdü ka iiye.

<sup>43</sup> Uuru öccö ka inggide a didi tiya üüdü kara takedhe o'o ka oona kasege ar'da küdü ka oona ka ku'du o'o ko'do ka oona in'dili kungno.

<sup>44</sup> Kürrüdü ana o'o nja laala tiya üüdü ya inggide ya taalo kara tafa ka müsi küdü ka oona kudumma üüdü taalo nussu uuru ma tö'dö tanno Masala ma toolona o'o."

### *Yasu inynyo la ma Masala*

<sup>45</sup> Ikirii ka co la ma Masala arooro ka tasoro kadu na anadene ana eema kide no, uurugu eege co akürö.

<sup>46</sup> Eema nja eene iki, "Sorne ma Masala iki a'da, 'Dü yeede ya, 'dü ma tafara ka Masala, aaga ka anangnga i'i ka tatumba ma kanyoro.'"

<sup>47</sup> Adagalaana kadu ka la ma Masala a naganuuru a naguugaara ma ka'boge nja katalaana ma seriye nja kadüffi ma anya tasaasa tiidi i'i.

<sup>48</sup> Kitaalo kaluna fiinii ma tiidi i'i kudumma kadu nye'd'de kungno ka asaasa i'i ka toodo kini.

## 20

### *Türü na Yasu*

<sup>1</sup> Uuru kinggide iini ka talaana kadu ka la ma Masala adünüğü tumma eene, ikirii a naguugaara ma ka'boge ka öö'dö kini nja katalaana ma seriye nja kadüffi.

<sup>2</sup> Kiki iini, "Tirina ungno, türü öjö eege kungno üüdü ka talinggo eema ya iini?

Mada i'i yungngó anangnga türü na o'o dhorro ungngó?"

<sup>3</sup> Ikirii Yasu ka tiki eene, "Ara a'a tindini aaga a tumma ka unggodho, aaga tirina a'a,

<sup>4</sup> tambeese na Yühanna 'dee ka öö'dö ndama 'dotombo'do alla ndama kadu?'

<sup>5</sup> Kadageemaana ka oona unggodho eege kiki, "Aja kara tiki a'da, 'Ndama 'dotombo'do ya,' ara tiki a'da, 'Minna agu aaga, aaga taalo kamma kini?'

<sup>6</sup> Akaja kara tiki a'da, 'Ndama kadu ya,' ara kadu tatiidiri angnga nye'd'de kungno, kudumma eene ka tussu a'da Yühanna a ne'bi."

<sup>7</sup> Yungngó eene ka tiki iini a'da, "Taalo ungngó kussu a'da köö'dö ndama kiga."

<sup>8</sup> Ikirii Yasu ka tiki eene, "A'a ka eyi tiya eede taalo a'a nara tiki aaga a'da türü na mada eege kungno eede ka talinggo eema ya iini."

### *Tafeene ma tumma ma kaleele*

<sup>9</sup> Ikirii ka ndeema nja kadu a tumma tanno iki eene, "Ömö'di inggide akodho ki'bim'bi adagümmünü kaleele anangnga eene, ara ka tunggeene atügöögö.

<sup>10</sup> "Ka uuru ma taraana müni ka ndö'dö ya, ikirii ka kürünü ömö'di ma linggo yiini kene a'da kanangnga faka ma iiye ma ki'bim'bi tanno iini, kikirii ka tabbü i'i kuuru i'i ka tino ana iisine kada 'döngngönyö.

<sup>11</sup> Agürünü ömö'di könö afe'de, katabbü ya müni ya afe'de katakeela i'i kuurugu i'i ka tino ana iisine 'döngngönyö.

<sup>12</sup> Ikirii ka kürünü könö kassa kanda iidoona, katabbü i'i kanangnga nagoola iini ka oona kapügü i'i co kürö ndama raaga ma ki'bim'bi.

<sup>13</sup> "A ömö'di ma ki'bim'bi tiki, 'Ara a'a tönynyö 'bitingngö?' Ara a'a tagürünü 'bii'bala yeede ka asaasa i'i ya, amang kene tasala i'i ka ri'ba.'

<sup>14</sup> "Kene ka ndasala i'i ya ka ndeema kiki a'da, 'Ömö'di ya ara takarna ka ki'bim'bi, katagiidi i'i, angnga takarna ka eema.'

<sup>15</sup> Kapügü i'i co kürö ndama raaga ma ki'bim'bi, katagiidi i'i."

Ikirii Yasu ka tiki, "Ara ömö'di ma raaga ma ki'bim'bi tönynyö ana eege?

<sup>16</sup> Ara tö'dö agirina kaleele, anangnga ki'bim'bi a kadu tököönö."

A kadu na toodo kini no tiki, "A Masala tafa tö'dö iini."

<sup>17</sup> Assa kene ko'do iki eene, "Tumma no ka sorne kiki a'da minna?

'Müsi ma katarü'böönö yaada kanu kide mo,  
oogo mungngó ma müsi ma kadesse.'

<sup>18</sup> Ömö'di ya a'dingga ka müsi tammo müni mo ya ara tadhosöö, ömö'di ya oono ka 'dingga kini ko'do ya manyiki' daana i'i ku'bu."

### *Faana ma tulu'ba*

<sup>19</sup> A katalaana ma seriye nja naguugaara ma ka'boge tasaasa tümmü i'i ka uuru tanno miini no, illi euge kari'ba a kadu kudumma eene ka tussu a'da i'i eema tafeene ma tumma no kene ka oona.

<sup>20</sup> Katadinö ana i'i ko'do, ka kürünü kadu kini kümmü eyi yeene kada kadu tanno a'diila no, amang kene tümmü i'i a 'bandumma kümmünü i'i uugaara ma Yahüüdiya nja türü tanno iini.

<sup>21</sup> Kikiri' ka tindini i'i, "Ka Tatalaana, kussu ungngö a'da o'o neema tumma na dhorro no nja talaana tanno üüdü no, taalo nari'ba a ömö'di, illi o'o neema tumma ma fiini ma Masala ma timin'da.

<sup>22</sup> A'diila aja kara tamana tulu'ba a Kayisar alla taalo a'diila?"

<sup>23</sup> İkiri' Yasu ka tussu ünggü meene iki eene a'da,

<sup>24</sup> "Aaga lage jine a'a, koronggore ya mada i'i yungngö, eere ya mada i'i yungngö?"

Kiki iini, "Ya Kayisar."

<sup>25</sup> Yungngö Yasu ka tiki eene, "Aaga anangnga niimö ya Kayisar a Kayisar, aaga tanangnga niimö ya Masala a Masala."

<sup>26</sup> Kitaalo kassumunaana ka tumma meene kara tümmü i'i iini ka kadu kidha, kadhere ka tumma tanno iini kakumu onna.

### *Tafiki'dö ka inde*

<sup>27</sup> A Sadügiin no midhi tafiki'dö ka inde no tö'dö kini ka indini i'i,

<sup>28</sup> "Ka Tatalaana, Müüsa arigiri ada angnga a'da, 'Ka örre tiya ömö'di kara teyi a'da aka mo ungngö iini a 'bii'bala titaalo kini, örre yiini ta'duga oogo eene ada laala örre tiya iini."\*

<sup>29</sup> Kadu kinggide ka nagöre ka üidümmü kafünü eera, aya dhidha ya tarna aka eyi a'da taalo 'bii'bala iini.

<sup>30</sup> Aya asigi kini ya ta'duga aka eyi a'da taalo 'bii'bala iini.

<sup>31</sup> Aya iidooyna ya ta'duga oogo, idhi na üidümmü kafünü eera no taaya a'da taalo laala eene euge in'dili.

<sup>32</sup> Aka mikiri' ka teyi afe'de.

<sup>33</sup> Oogo 'dee mara ta aka tammo mada ka uuru ma tafiki'dö ka inde, kudumma oono ka ta aka ma kadu ka üidümmü kafünü eera?"

<sup>34</sup> İkiri' Yasu kiki eene, "Kadu ma 'büdhülü karna ajeene.

<sup>35</sup> Lakiini kadu na ma tafiki'dö ka inde no, kara tefe ka 'di ta'billi taalo karna, kitaalo karna ajeene.

<sup>36</sup> Eege kara tafeene nja kadhangga taalo kara taaya, eege ka laala tiya Masala, kadaala ma tafiki'dö ka inde.

<sup>37</sup> A Müüsa adinö kide aala a kadu a'da tafiki'dö ka inde ka inggide ka 'bamfa ka tafinne, kini ka tümmünü Masala a'da, 'Masala ma Abrahiim nja Masala tammo Ishak nja Masala tammo Yaguub.\*†

<sup>38</sup> Taalo Masala ma kadu tanno ake no, lakiini Masala ma kadu tanno adinö no, kudumma eene nye'd'e kafe ka 'di ana oogo."

<sup>39</sup> A katalaana ma seriye tiki iini a'da, "Nadirı o'o tumma dhorro, tatalaana."

<sup>40</sup> Kitaalo ka'duga rüsü ma tindini i'i ma niimö töccö afe'de.

### *Almasiiji ya Masala*

<sup>41</sup> İkiri' Yasu ka tiki eene, "Keema kadu a'da Almasiiji a 'Bii'bala tiya Dawud nya?

<sup>42</sup> Ara Dawud ka eyi tiya iini ka tiki ka Sorne ma Tüüsü a'da,

'Iki Uugaara a Uugaara tiya eede,

Emmi kede ka niisö ma kuri,

<sup>43</sup> ara a'a ka anangnga o'o ka siri ka diidi tiya üüdü ana uune.\*‡

<sup>44</sup> Aga Dawud ka ndümmünü i'i a'da, Uugaara 'dee,' assa kanda 'bii'bala tiya iini nya?"

### *Yasu nja katalaana ma seriye*

<sup>45</sup> A Yasu tiki a kadalaadene tanno iini a'da, kadu kinggide nye'd'e kaföönyö,

<sup>46</sup> "Aaga adinö ko'do kudumma katalaana ma seriye no asaasa tunggeene ka nafiiñi ana en'di ma oona tiya kadhonggoro ya, kasaasa kadu ka jööjülü eege ka namansala nja na'buugu ma tamii mi no kidha ka naala ma talaana nja 'buugu ma eema ma taguri ya dhidha kana taanyara no.

<sup>47</sup> Küsinii iiya ma nagüüme kagu eema yeene, kafara ka Masala tafifinni amang ka kadu tiki a'da euge ka'diila, euge no miini no, tapusu adene neene kara tatoroko dhindho."

## 21

### *Faana ya aka ma küüme*

<sup>1</sup> İkiri' Yasu ka türi' 'buugu asala kadu na ana eema dhabbu no katamana faana yeene ka dho ka la ma Masala.

<sup>2</sup> Asala aka ma küüme eema ka titaalo kono mafaana ana gürisi keera.

<sup>3</sup> İkiri' ka tiki, "Ara a'a tadirina tumma aaga dhorro, aka ma küüme ma

'döngngönyö mo, mafaana adhabbu a kadu nye'd'de kungngo.

<sup>4</sup> Ya öreene ka kadu tanno ya, i'i yungngo eene kanangnga ka faana ma la ma Masala, lakiini oogo ka ta'döngngönyö kungngo manangnga yoono ka nüüsö ya ku'bu nye'd'de kungngo."

### *Taga'dadene ma la ma Masala*

<sup>5</sup> A kadu könö teema a'da la ma Masala akedesene a nüüsisi ka'diila ana eema tiya a'diila ka teene miini kananja a Masala, a Yasu tiki eene,

<sup>6</sup> "Uuru kinggide kara sa köö'dö, eema yaada kadiinö kide ya, taalo müsi ma unggodho mara türeene ka madööje ko'do kara türrüdü nye'd'de kungngo."

### *Dhügürü nja tüüni midhi*

<sup>7</sup> Kikiri ka tindini i'i, "Ka Tatalaana, ara tumma no talinggo adene aada sii? A nüümö minna i'i yungngo aja kara tussu iini a'da ara talinggo adene?"

<sup>8</sup> İkiri ka tiki eene, "Aaga adinö ko'do a'da ii'di ömö'di öccö taama aaga, kudumma kadu kadhabbu kara sa köö'dö ana eere tiya eede kiki, 'A'a namiini,' a'da, 'Uuru miini ka ndakete.' Aaga fa co eene keere.

<sup>9</sup> Kada kaföönyö a'da koro'bo inggide a tagoroo'bo ma 'buugu, aaga tafa tariba kudumma iini ara tö'dö tikinggi, lakiini i'i titaalo ma 'büdhülü küfürü tö'dö."

<sup>10</sup> İkiri ka tiki eene, "Ara kadu teema koro'bo ka naanya, a tauugaara tadiidi tauugaara könö.

<sup>11</sup> A 'büdhülü tatünggi'di dhindho ka na'buugu kadhabbu a iire tümmü kadu, a maara tümmü kadu kadhoonyo a ri'ba tagu kadu, eema tatele oona ka 'dotombo'do adhabbu keefe.

<sup>12</sup> "Keema tiya miini ya ka taleefe ya, ara kadu tümmü aaga kanangnga ka pabuuusu küüni midhi ku'bu ana aaga, kümümünü aaga a kadu ma naala ma tatalaana nja pabuuusu, kümümünü aaga a naguugaara nja kadüfi kudumma a'a.

<sup>13</sup> Eema ya miini ya ara tafa kada aaga teema kudumma ma tefe ka 'di neede co kadu.

<sup>14</sup> Aaga idhi oona ku'bu, aaga tafa tadinigögö a'da ara aaga tümmöönö ka eyi tiya ada nya?

<sup>15</sup> Kudumma eede kara tanangnga tumma aaga nja tussu eema, nadiidi naada tatiminaana ka tii'baana ma aaga, itaalo ar a tiki a'da ka oroko aaga.

<sup>16</sup> Ara kupupa naada nja nakanüümö tanno ada, nja nagöre tanno ada nja siliga ma aaga nja kateefe ma aaga sa katümmünü aaga a kadu kiidi könö ana kada.

<sup>17</sup> A kadu takirimi aaga nye'd'de kungngo kudumma eere tiya eede.

<sup>18</sup> Taalo ndanawu ka unggodho kungngo kara takara ta suli ada ka nanggüüdü.

<sup>19</sup> Aaga idhi oona ku'bu dhorro amang kada toolonadene.

### *Yasu eema tumma ma tatangga'da ma Örsaliim*

<sup>20</sup> "Kada kara tasala nasigira ka takedhe Örsaliim ka oona ya, aaga tussu a'da taga'dadene noonoo ka ndakete.

<sup>21</sup> A kadu na ka Yahüüdiya no, fa kene ka rünö ka sıro na 'dikinya, a kadu na ka anya ka teene no, tarünö ka co akürö ndama oono, a kadu na aganna ka nasigeene no kitaalo ka co anya ka teene.

<sup>22</sup> Kudumma uuru ma tapusu adene, amang ka tumma tanno ka kirinja ka sorne no co ööye miini.

<sup>23</sup> Am'ba ka iiya tanno agüröönö no nja tanno indine no ka naguuru tanno miini no, kudumma tagoroo'bo kadhabbu kara tö'dö ka 'büdhülü a tagoroo'bo ma Masala talinggo kadu.

<sup>24</sup> Kagirinadene a kulu'ba, ökönö tümmü adene kada ömö'di ma pabuuusu kaco ajeene nye'd'de ana eege, ajeene tüsüraaka Örsaliim idhi uuru neene tatüümö."

### *Tö'dö na 'Bii'bala ma Tadü'dü*

<sup>25</sup> "Eema tatele oona ka ndanaaya nja tere nja midigi keefe, a kadu ka ajeene 'do tadhere kari'ba, afara ma 'büüdi ka to ara talumuli ajeene a tafiri co'o'do ma 'büüdi.

<sup>26</sup> A kadu öccö kara ta'dünggeene, ari'ba kagu eege nja tindhägi nüümö ya ara tö'dö ka 'büdhülü ya, kudumma türü ma 'dotombo'do ka 'dig'i'di ajeene.

<sup>27</sup> Ka uuru tanno miini no, ara kadu tiji 'Bii'bala ma Tadü'dü ka tunggeene ka tülüügü a türü nja tihindhi.

<sup>28</sup> Ka eema tiya ka ndalinggo adene ya, aaga afiki'dö aaga ta'diniga nanggüüdü naada coo'do kudumma ta oolonadene tanno ada ka ndakete."

### *Tafeene ma tumma ma indüye*

<sup>29</sup> Adirina tumma eene, "Aaga assa ka fa ma indüye nja naafa nye'd'de kungngo.

<sup>30</sup> Kene ka ndasiri dhaaru ya, ikiri aaga ka tussu a'da kooro ka ndakete.

<sup>31</sup> Nggeege ada kadasala eema ya, amang ka tussu a'da tauugaara na Masala ka ndakete.

<sup>32</sup> "Ara a'a tadiri tumma aaga dhorro, ara eema talinggo adene nye'd'de kungngo a'da üfirü sere ya co.

<sup>33</sup> Ara 'dotombo'do nja 'büdhülü tamanyaga lakiini tumma neede taalo kara kitaalo.

### *Tadinö ko'do*

<sup>34</sup> "Aaga adinö ko'do, aaga tafa takürrada ka tooye ngeeli aaga take kide, a tadinigöögö ma eema ma 'büdhülü, kudumma uru tanno miini no kara tatiri aaga.

<sup>35</sup> Kudumma iini afeene nja toore ma ta'dinggö ka kadu ka 'büdhülü nye'de kungno.

<sup>36</sup> Aaga adinö aaga tafara ka Masala turi kungno, amang kada taduna fiin ma toolonadene ka eema tiya ara tö'dö ya, amang kada ta'dingnge kidha ma 'Bii'bala ma Tadü'ddü."

<sup>37</sup> A Yasu tagalaana kadu ka la ma Masala uru kungno, a'buugu kara tooso kungno unggeene aco tüüy co 'dikinya tammo ana eere a'da Anya ma 'Dikidiyomö.

<sup>38</sup> A kadu tilli ka fiki'dö so'd' do ma co la ma Masala ka toodo kini ka teema.

## 22

*Yahüusa ümmünü Yasu a kadu*

<sup>1</sup> A uru ma Taanyara ma Dheedhifi no ana eere a'da Taanyara ma Tada'da ka Erüidö no ka ndakete

<sup>2</sup> A naguugaara ma ka'boge nja kataalaana ma seriye tagawwa fiin meene kara tidi i'i kudumma eene ka ri'ba a kadu.

<sup>3</sup> İkiri Ebliisi ka 'dinggö ka Yahüusa ka oona yeeke ka tümmünü i'i a'da Askaryüütä ya, i'i ya ta'ba ma kadaladaadene tanno ö'dö kada'baaga kaffünü eera no.

<sup>4</sup> Unggeene ateefe timi'di tumma nja naguugaara ma ka'boge nja nasigira tanno afa ka la ma Masala no ara tümmü i'i nya ümmünü eene.

<sup>5</sup> Kadhadho 'do ka timi'di tumma nja iini a'da ara eege tanangnga gürüüsü iini.

<sup>6</sup> Amma iki ka adinaana i'i ko'do ma taluna fiin ma tümmünü i'i eene a'da taalo kadu kussu.

*Yasu agu kuri ma tada'da nja kadalaaadene tanno iini*

(Matta 26.17-25; Murkus 14.12-21; Yühanna 13.21-30)

<sup>7</sup> İkiri uru ma Miteene ma Dheedhifi ka ndö'dö yeene kaara kidheefele ma Taanyara ma erüidö kide ya.

<sup>8</sup> Yungno a Yasu ka kürünü Bütrüs nja Yühanna iki eene, "Aaga unggeene aaga co tindinaana kuri ma Tada'da kaja ku'bu."

<sup>9</sup> Kikiri ka tiki iini, "Kiga i'i yungno üüdü ka asasa ungno ka co tindinaana eema kide?"

<sup>10</sup> Apadaga tumma eene iki, "Kada kara co anya ya ara aaga toreene nja ömö'dü a'bandhafa ma 'biidü ungno iini aaga urna i'i keere ka 'di tiya iini kara co ya.

<sup>11</sup> Aaga iki a ömö'dü ma 'di, 'Tatalaana iki o'o a'da, la yeede kara tagu kuri ma

Tada'da kide nja kadalaadene tanno eede i'i ya iiye?"

<sup>12</sup> I'i ara tala aaga ka la tiya 'doogo ya adhabbu akesenja ku'bu. Aaga indinaana 'buugu ya miini ya ku'bu."

<sup>13</sup> Kikiri ka co kaluna afa ma tiya iini kadirina eene ya kungno, kadakindinaana kuri ma erüidö ku'bu.

*Kuri ma taamu ya Uugaara ya eere ya*  
(Matta 26.26-30; Murkus 14.22-26; 1 Kürüsüs 11.23-25)

<sup>14</sup> Ka uru ma tagu kuri ma erüidö ka ndö'dö ikiri Yasu ka temmi nja kadafünni tanno iini ma tara tagu eema.

<sup>15</sup> İkiri ka tiki eene, "Agu iiire a'a ma tagu eema ma erüidö nja aaga a'da nüfürü a'a tadhügürü.

<sup>16</sup> Ara a'a tiki aaga a'da, ndama uru tanno, taalo a'a nara taguri afe'de illi alinggo adene ka tauugaara tanno Masala."

<sup>17</sup> A Yasu ta'duga ker'de anangnga ta'diila a Masala iki, "Aaga la aaga tasümünaana kada ku'bu.

<sup>18</sup> Ara a'a tiki aaga a'da, taalo a'a nara tooye ngeeli ma ki'bim'bi afe'de ndama uru tanno idhi a tauugaara na Masala tö'dö."

<sup>19</sup> A'duga miteene anangnga ta'diila a Masala asümünaana ku'bu anangnga eene iki, "Tuu'da no eege kungno na nanja kudumma aaga, aaga alinggo maada ka tagiigü a'a iini."

<sup>20</sup> A'duga ker'de nggeege afe'de eene ka ndagu eema iki, "Ker'de mo ma ma timi'di tumma ma 'biitungngö ana erüidö tiya eede ya uurunco ko kudumma aaga ya.

<sup>21</sup> Lakiini niisö na ömö'dü tiya ara tümmünü a'a a kadu ya, kungno kita nja a'a.

<sup>22</sup> 'Bii'bala ma Tadü'ddü ara teyi afa ma Masala ka tatraana 'billi, lakiini am'b'ba ka ömö'dü tiya ara tümmünü i'i a kadu ya."

<sup>23</sup> İkiri kadafünni ka tindini ajeene kiki a'da kamada eege kamiini ka asasa talinggo tumma no.

*Mada i'i yungno adhabbu*

<sup>24</sup> Kadiisaana ka oona unggodho eege kiki a'da, mada i'i yungno adhabbu ana kene ungno.

<sup>25</sup> İkiri Yasu ka tiki eene, "Naguugaara ma ajeene ka naguugaara meene, a kadiifi tasaasa tümmünüdene a'da kateefe ma kadu.

<sup>26</sup> "Lakiini aaga ya taalo kara tafiqi nggeege, fa ka ömö'dü tiya adhabbu ana kada ya ümmü eyi yiini ka tidhilli, aya dhabbu ya, tafeene nja ömö'dü tiya alinggo ada a kadu ya.

<sup>27</sup> Amada i'i yungno adhabbu, ömö'dü ya emmi agu eema ya alla ya alinggo

ya? Ya emmi ya i'i yungngo adhabbu, a 'bitüngngö a'a nungngo ada ka söödö afa ömö'dü ya alinggo ya.

<sup>28</sup> Aaga kungngo köödhö nja a'a ka dhügürü tiya eede ya.

<sup>29</sup> Ara a'a tanangnga tauugaara aaga afa ma pupa tiya eede ka anangnga a'a kungngo.

<sup>30</sup> Ara aaga taguri aaga tooye nja a'a ka tauugaara tanno eede, aaga temmi ka nagööyö afa naguugaara, aaga tümmü siliga ma Israyil na ada'baaga kafünü eera no."

### Bütrüs ara ta'düsünü Yasu

<sup>31</sup> İkiri Yasu ka tiki, "Samaan, Samaan, Eblisi ungngo asaasa ta'deke'de aaga afa migile.

<sup>32</sup> Lakiini nafara a'a ka Masala kudumma o'o a'da atamma nüüdü tafa taama, a küdü kara tafada ya, nanangnga nagöre nüüdü ka tidhi oona ku'bu."

<sup>33</sup> Yungngo a Samaan ka tiki iini, "Ka Tatalaana, na amma a'a ka co ka pabuusu na eyi nja o'o."

<sup>34</sup> İkiri Yasu ka tiki iini, "Ara a'a tiki o'o no Bütrüs no, ara o'o ta'düsünü a'a tiidoona a'da üfürü dhimbü tafara."

<sup>35</sup> İkiri ka tiki akadafüni tanno iini, "kede ka tagürünü aaga a'da taalo njoko nja 'belde ada nja egüide ka kasaasa aaga nüümö?"

Kiki a'da, "Kaw."

<sup>36</sup> İkiri ka tiki eene, "A 'bitüngngö ya, ömö'dü ma gürüüsü a'duga nja njoko, ömö'dü ya kulu'ba ka titaalö kini ya, atan-nege a ten'di tiya iini aana kulu'ba iini.

<sup>37</sup> Ara a'a tiki aaga, Tumma na sorne ka tiki a'da, 'Kada kinni i'i nja kanyooro,\* kara tatüümö a tumma na kirinja ku'bu ma a'a no, kara tö'dö timin'da."

<sup>38</sup> Kiki iini, "Ka Tatalaana, magulu'ba mungngo iidi kita meera."

İkiri ka tiki eene, "Ma 'dimo."

### Yasu afara ka Masala unggodho i'i

<sup>39</sup> İkiri ka öö'dö kürö aaco Anya ma 'Dikidüyö afa ma tiya iini ka tadaada ya, a kadalaadene niimi tuurna i'i keere.

<sup>40</sup> Kene ka ndala 'buugu ya, iki eene, "Aaga fara ka Masala iidü aaga ta'dingga ka ta'b'badene."

<sup>41</sup> Asigi co ku'b'ba kene ka oona üürü ku'bu eema nja Masala.

<sup>42</sup> İkiri ka tiki, "Ka Pupa yeede, üürü nasaasa o'o na'duga ker'de ma dhügürü mo kede ka oona, taalo tasaasa ma eedi tiya eede egee kamiini, lakiini üürü tasaasa ma eedi tiya üüdü fa kene künüpödene."

<sup>43</sup> A tadhangga tatele oona ndama 'dotombo'do uu'bu i'i ka eedi.

<sup>44</sup> Akardha ku'bu afara ka Masala dhindho idhi a 'büüdi ma dhugudha tasuru afa ma eriidö a'dölö ka 'büdhüüli.

<sup>45</sup> İkiri ka fiki'dö ka 'buugu ma teema nja Masala aaco ka kadalaadene aduna egee karigide, kudumma eene ka tamüürü.

<sup>46</sup> İkiri ka tiki eene, "Minna agu aaga, aaga tarigide? Aaga fiki'dö, aaga tafara ka Masala iidü aaga ta'dingga ka ta'b'badene."

### Tümmü adene na Yasu

<sup>47</sup> Kini ka taleefe teema ya, a'da kadhe kadu ana Yahüüsa ungngo eene kidha, tatalaadene ya Yasu ana ka tanno ada'baaga kafünü eera no, öö'dö ka Yasu ööjüli i'i.

<sup>48</sup> İkiri Yasu ka tiki iini, "Ka Yahüüsa, nümmünü o'o 'Bii'bala ma Tadü'd'dü a kadu a tööjüli?"

<sup>49</sup> Ka kadalaadene ka ndiji eema ya üünidene ya kiki, "Ka Uugaara, ungngo tabbü egee a nagulu'ba?"

<sup>50</sup> A könö tabbü ömö'dü ma linggo ya uugaara ma ka'boge ka neeso ma niisö ma kuri armuna.

<sup>51</sup> A Yasu tiki eene, "Aaga fa kide." Ümmü i'i ka neeso arooro ka lime.

<sup>52</sup> Yungngo a Yasu ka tiki a naguugaara ma ka'boge nja naguugaara ma nasigira ma la ma Masala nja kadiifi tanno öö'dö kini no, "Tanyooro i'i yungngo ada ka co kini a magulu'ba a maguufi?

<sup>53</sup> Naganna a'a nja aaga ka la ma Masala a naguuru, taalo aaga kümmü a'a, lakiini uuru naada egee kungngo tauugaara ma talülli egee kungngo."

### Bütrüs a'düsünü Yasu

<sup>54</sup> Kikiri ka'duga i'i ka co 'dii tiya uugaara ma ka'boge iini, a Bütrüs tako'd'do kene keere ndama ku'b'ba.

<sup>55</sup> A nasigira tafülle issi ka 'dadillö ma 'di kemmi, a Bütrüs temmi kene ka söödö.

<sup>56</sup> Aka ma linggo mo tasala i'i ka temmi ille issi manaana iifye iini miki, "Ömö'dü ya aganeene nja Yasu."

<sup>57</sup> A'düsünigü iki, "Aka mo, taalo a'a nussu ömö'dü ya."

<sup>58</sup> Amussu kungngo ya, ömö'dü öccö tasala i'i iki, "O'o nja eene."

A Bütrüs tiki iini, "Ömö'dü, taalo a'a nja eene."

<sup>59</sup> Kada kaneene a 'buugu tamuru ya, ömö'dü könö tüüti kadussu i'i iki, "Tumma dhorro, ömö'dü ya a kaneene nja iini kudumma iini ama Jaliil afe'de."

<sup>60</sup> İkiri Bütrüs ka tiki iini, "Ka ömö'dü, taalo a'a nussu nüümö yüüdü ka teema ya." A kini ka aleefe ateema ya, a dhimbi tafara.

<sup>61</sup> İkiri Uugaara ka tafele assa ka Bütrüs. A Bütrüs tagiigi tumma na Uugaara nja iini a'da, "Ka dhimbi ka tüfürü tafara ara o'o ta'düsünü a'a tiidoona."

<sup>62</sup> İkiri ka öö'dö kürö adafara fara ya dhiiri ya.

### *Nasigira küünü midhi ana Yasu*

<sup>63</sup> A kadu na afa ka Yasu no tüünü midhi ku'bu ana i'i kabbü i'i.

<sup>64</sup> Ka küdhü i'i ka iyye, kassa ka tindini i'i, "Mada i'i yungno abbü o'o, tiraana?"

<sup>65</sup> Keema tumma kini ko'do kadhabbu keela i'i.

### *Yasu ungno ka naguugaara kidha*

<sup>66</sup> Ka taka ka ndaadha ya, a kadüffi ma Yahüüdü temmi, egee no naguugaara ma ka'boge nja katalaana ma seriye, köö'dö ana Yasu kide.

<sup>67</sup> Kiki iini, "Üürü o'o na Almasiihi tirina ungno."

A Yasu tapadaga tumma eene iki, "Kede kara tadirina aaga, taalo aaga kara tamma.

<sup>68</sup> A kede kara tindini aaga taalo aaga kara tadirina a'a.

<sup>69</sup> Ndama uuru tanno, ara 'Bii'bala ma Tadü'dü temmi ka türü ma nüüsö ma kuri tanno Masala."

<sup>70</sup> Kikiri ka tiki egee in'dili kungno, "O'o no 'Bii'bala ma Masala?"

İkiri ka tiki, "Kiki aaga a'da a'a namiiuni."

<sup>71</sup> Yungno eene ka tiki, "Kasaasa angnga taföönyö ka ömö'dü afe'de? Angnga ana oona ma angnga kaföönyö angnga ndama nüünö tanno iini."

## 23

### *Kadu köö'dö ana Yasu ka Bilatus kidha*

(Matta 27.1-2, 11-14; Murkus 15.1-5; Yühanna 18.28-38)

<sup>1</sup> A naguugaara tafikü'dö nye'd'de kütügü Yasu kaco ka Bilatus ana i'i.

<sup>2</sup> Kikiri ka tafünü tumma iini ka oona kiki, "Kaduna ungno ömö'dü ya agirnaana kadu ka oona afünü kadu a'da kafa tamana tuluba a Kayisar iki a'da i'i ya Almasiihi ya uugaara."

<sup>3</sup> Yungno a Bilatus ka tindini i'i, "O'o na uugaara ma Yahüüdü?"

A Yasu tiki iini, "O'o natiraana."

<sup>4</sup> İkiri Bilatus ka tiki a naguugaara ma ka'boge nja kadu nye'd'de, "Taalo a'a naduna nüümö ya toroko ya ka ömö'dü tiya."

<sup>5</sup> Kütü ka tumma tanno eene kiki, "I'i ya agirnaana kadu ka oona a talaana tanno

iini ka Yahüüdiya ndama Jaliil alla öö'dö kita."

### *Yasu ungno ka Hirüdüs kidha*

<sup>6</sup> A Bilatus taföönyö a'da ömö'dü ya ama Jaliil iki, "Ömö'di ya 'dee, i'i ya taga Jaliil?"

<sup>7</sup> Kini ka ndussu a'da Yasu ama maanya tammo Hirüdüs, ikiri ka tuurugu i'i co Hirüdüs kudumma Hirüdüs ka uuru tanno miini no agöö'dö ka Örsalim.

<sup>8</sup> Ka Hirüdüs ka tasala Yasu ya oona ta'dila kini 'do kudumma iini ka tasaasa takassa ka Yasu magaada kudumma iini ka taföönyö tumma iini kadhabbu, asaasa tassa kini ka talingga nüümö keefe.

<sup>9</sup> Adakindini i'i ma eema dhabbu, itaalo apadaga tumma iini unggodho kungno.

<sup>10</sup> İkiri naguugaara ma ka'boge nja katalaana ma seriye ka fiki'dö kakogoona ma tüüfunü eema iini ka oona.

<sup>11</sup> A Hirüdüs tagüünü midhi ku'bu ana i'i nja nasigira tanno iini küünü tatoroko ana i'i kagirni ten'di ma limaana mo kini ka oona apadaga i'i co a Bilatus.

<sup>12</sup> A Hirüdüs tarooro ka'diila nja Bilatus ka uuru tanno miini no, a'da kadiidi ajeene ka dhidha.

### *Yasu ümmününja ka tiididene*

(Matta 27.15-26; Murkus 15.6-15; Yühanna 18.39—19.16)

<sup>13</sup> A Bilatus tagüümüün naguugaara ma ka'boge nja kadüffi nja kadu 'do.

<sup>14</sup> Iki eene, "Köö'dö aaga ana ömö'dü tiya a'a aaga tiki a'da i'i ya aga'da kadu ka hanggüüdü, na a'a takindini i'i kada kidha, taalo a'a naduna nüümö yaada ka tümmü i'i kudumma miini ya.

<sup>15</sup> A Hirüdüs afe'de taalo aluna nüümö kini kudumma iini ka tapadaga i'i angnga, a ömö'dü ya taalo agüün'i nüümö ma tanangnga i'i ka teyi.

<sup>16</sup> Ara a'a tabbü i'i nassa ka tapa kini." [

<sup>17</sup> A Bilatus ka tadaada apaapa ka ömö'dü unggodho ndama pabuusu ka uuru ma taanyara.]

<sup>18</sup> A kadu teela ka tumma ko'do, "Iidi ömö'dü ya ara o'o ka tapa ka Barabas!"

<sup>19</sup> Barabas ya anna ka pabuusu kudumma iini ka taga'da 'buugu kaanya nja tagidi ömö'dü.

<sup>20</sup> A Bilatus tageema nja eene afe'de kudumma iini ka asaasa tapa ka Yasu.

<sup>21</sup> Kütü ka tiidhe kiki, "Bünnü i'i ka saliib'i! Bünnü i'i ka ma saliib'i!"

<sup>22</sup> İkiri ka tiki eene asa ndiidoona a'da, "Ömö'dü ya 'dee agüün'i minna ya toroko ya? Taalo a'a naduna nüümö kini ya ma tiidi i'i ya, ara a'a tabbü i'i nassa ka apa kini."

<sup>23</sup> A kadu tüütü kiidhe a tumma ko'd'o kasaasa i'i ka bünnünja ku'bu, kakogoona ma tiidhe.

<sup>24</sup> A Bilatus tamma ka tumma tanno eene a'da eyi.

<sup>25</sup> Ara ka tapa kene ka Barabas tiya ungngó ka pabuuus ya ka kirnaana kadu ka oona, adagiidi ömö'dí kene ka asasa a'da öö'dó kürö, ara ka tümmünü Yasu eene kudumma nanggeedi tanno eene ka asaasa.

*Yasu ungngó ka salii'bí*

(Matta 27.32-44; Murkus 15.21-32; Yühanna 19.17-27)

<sup>26</sup> Kene ka ndüögü Yasu kunggeene iini ya, kükirü ka tümmü Samaan ya ma Kerewan ya, anda fada ka siga kanangnga salii'bí iini unggeene ka Yasu keere.

<sup>27</sup> A kadu tuuruna i'i keere kadhabbu ana iiya kungngó eene ka dhüüdhü naaro a muuyu miini kagu eäge.

<sup>28</sup> A Yasu tafele assa kene iki, "Ka iiya ma Örsaliim, aaga fa tafara kede, aaga afara nanggeyi naada nja laala tiya ada.

<sup>29</sup> Naguuru kinggide kara sa köö'dó a kadu teema kiki, 'A'diila nja iiya tanno taalo kagüröönö no, kitaalo kageene kitaalo kindine laala no.'

<sup>30</sup> Kiki a naanya a'da, 'Kürrüdü kidi ko'do,' iki a kürünggürü, 'Küdhü ungngó ka oona.'

<sup>31</sup> A kene ka ndalinggo kungngó ya a 'bamfa tiya kirikiri 'dee, ara tafaanya nja 'bamfa tiya arume ya.'\*

<sup>32</sup> Köö'dó a kadu tanno oroko no keera ma tara tiidi eäge nja Yasu.

<sup>33</sup> Kene ka ndala 'buugu ya ana eere a'da, Dho ma Üüdü ya, kabünnü i'i ka salii'bí nja kadu tanno era na weerö no, ya ndama nüüsö ma kuri aya ndama nüüsö ma küüle.

<sup>34</sup> İkiri Yasu ka tiki, "Pupa yeede, fa kene kudumma eene taalo kussu nüümö yeene ka talinggo ya." Kasüümünaana en'di yiini kene ku'bu, kafanna muduru miini.

<sup>35</sup> A kadu ta'dingne kadinö a naguuvara neene tamidhi i'i kiki, "Oolona kadu köönö, toolona eyi yiini adha, üürü i'i ya Almasiiji ya Masala ka tagesse i'i ya."

<sup>36</sup> A nasigira tö'dö küüni midhi ku'bu ana i'i afe'de the kamanaga kembelö iini,

<sup>37</sup> Kiki, "Oolona eyi yüüdü üürü o'o na uugaara ma Yahüüdü."

<sup>38</sup> Kada rigiri tumma ka bünnü kini ka üüdü ma salii'bí a'da, "Uugaara ma Yahüüdü i'i yungngó."

<sup>39</sup> Ömö'dí öccö ana ka kadu tanno ka salii'bí na eera no, teela i'i iki iini, "Taalo

o'o na Almasiiji sa? Oolona eyi yüüdü noolona ungngo."

<sup>40</sup> A könö tagirnaana kini iki iini, "Taalo o'o nari'ba a Masala, o'o napusu adene ka eema tiya miini ya?

<sup>41</sup> Tapusu adene naaja no, ka timin'da kapusu adene angnga kudumma aja ka tagüün tam'baga lakiini i'i taalo agüüni nüümö ya toroko ya."

<sup>42</sup> İkiri ka tiki, "Agüügi tumma a'a Yasu, küdü kara co ka tauugaara tanno üüdü."

<sup>43</sup> İkiri Yasu ka tiki, "Ara a'a tadirina tumma o'o dhorro, uuru no ara o'o tanna ka 'dii ma singgi nja a'a."

*Inde na Yasu*

(Matta 27.45-56; Murkus 15.33-41; Yühanna 19.28-30)

<sup>44</sup> A 'buugu kanda uuru ka teene ya a ndüüli tö'dö ka 'büdhülü nye'd'e idhi a ndanaaya tö'dö kiidoona siya kungngó.

<sup>45</sup> A ndanaaya talifi, a ten'di ma la ma Masala tarisina njaana ku'bu ka söödö.

<sup>46</sup> A Yasu tadhya ko'd'o, "Pupa yeede, nüümünü a'a koronggore yeede üüdü ka nüüsö." Iki nggeege eyi.

<sup>47</sup> Aga uugaara ma nasigira tanno ukumu kadu ka iidümmü no ka tasala eema ya afünögü Masala ko'do, iki, "Aga'diila ömö'dí ya dhorro."

<sup>48</sup> A kadu na kanna kide dhabbu no ka tadinö ka eema tiya no kafada kadhuüdhü naara kunggeene.

<sup>49</sup> A kateefe ma Yasu nja iiya nye'd'e kungngó na o'dö nja iini ndama Jaliil no kadinö ka eema tiya ndama ku'b'ba.

*Tatü'büdene na Yasu*

(Matta 27.57-61; Murkus 15.42-47; Yühanna 19.38-42)

<sup>50</sup> Ömö'dí inggide taga adaya ma la ma kadinö ma Yahüüdü ana eere a'da Yüüsif a'diila ümmü tumma ma Masala dhorro.

<sup>51</sup> Taalo agamma ka eema tiya Yahüüdü ka talinggo ya, i'i ya ma anya ma Yahüüdiya mana eere a'da Raama mo, i'i akindhgí tauugaara na Masala.

<sup>52</sup> İkiri ka co ka Bilatus asaasa oofo ya Yasu.

<sup>53</sup> İkiri ka ta'dinigi i'i ku'bu ndama salii'bí a'bürü i'i ka oona a ten'di, atü'bü i'i ka la ma oofo tiya assadene ka 'dokon'da, üfürü ömö'dí tatü'büdene kide.

<sup>54</sup> Ka uuru tanno miini no, kindinaana kadu oona ku'bu ma uuru ma Sa'bidi ka ndakete.

<sup>55</sup> A iiya no kata'da ka Yasu keere ndama Jaliil no kunggeene nja Yüüsif kada kanna ka la ma oofo, kadinö ka oofo tiya iini ananja kide nya.

<sup>23:30 23.30</sup> Hawsha 10.8 \* <sup>23:31 23.31</sup> A kadu ka talinggo tatoroko ana Yasu a'da taalo agüüni nüümö ya toroko 'dee, a'da kara sa kafaanya nja ömö'dí tiya atoroko ya?

<sup>56</sup> Kafada kateefe tindinaana kondho nja russu ku'bu, kalingnge ka uuru ma Sa'bidi afa ma Sorne ma seriye ka tiki ya kungngo.

## 24

*Tafiki'i dö na Yasu ka inde*

(Matta 28.1-10; Murkus 16.1-8;  
Yühanna 20.1-10)

<sup>1</sup> Iiya killi kafiki'i dö ligitaka so'd do ka uuru ma Lahada köö'dö ka la ma oofo a kondho tammo eene ka takindinaana ku'bu mo.

<sup>2</sup> Kaduna dhembeliili ka 'dugadene ka ïnye ma la ma oofo.

<sup>3</sup> Kaco teene miini taalo kaluna oofo ya Uugaara Yasu kide.

<sup>4</sup> Kene ka ndadhere ya, kadhiimä ka kadu ka tatele oona eene keera ana en'di ka oona kalimaana.

<sup>5</sup> Ari'ba tümmü eege küssülü ïye ka 'büdhülü a kadu na miini no tiki, "Kawwa aaga ömö'di ya adinö ya ka kadu tanno aaya no ka teene amana?

<sup>6</sup> Itaalo kita lakiini i'i afiki'i dö, aaga kiigü tumma niini ka tadirina aaga ka Jaliil no,

<sup>7</sup> kini ka takiki a'da, "Bii'bala ma Tadü'dü ara tümmününja ka kadu tanno oroko no ka iisine kabünnü i'i ka salii'bii assa ka fiki'dö a fungngö iidoona."

<sup>8</sup> Yungngó eene ka tagiqi tumma niini.

<sup>9</sup> Kafada ndama la ma oofo kadirina eema a kadafiini no ö'dö kada'baaga kafünü unggodho no nja türeene ma kadu nye'd de kungngo ma eema tiya nye'd de.

<sup>10</sup> Na Mariyom Almajdaliya nja Hanna nja Mariyom nüümö ma Yaguub nja iiya tököön kunggeene nja eene no kadirina eema ya a kadafiini.

<sup>11</sup> A kadafiini taalo kamma ka tumma tanno iiya, kiki kide a'da tumma ün'dügungngö.

<sup>12</sup> Lakiini Bütrüs afiki'dö a'diga co la ma oofo, itigili ku'bu asala en'di unggodho i'i afada adhore ka eyi tiya iini ka eema tiya agüüni adene ya.

*Tino ma tra co Imwas*

(Murkus 16.12-13)

<sup>13</sup> Ka uuru tanno miini no Kadu kingide keera ka kadaladene kunggeene ma tra co anya tammo ana eere a'da Imwas ma ku'b'ba ka Örsaliim ana nameele ka iidümmü kafünü eera.

<sup>14</sup> Kada keemaana ka oona unggodho eege ma eema tiya agüüni adene ya nye'd de kungngo.

<sup>15</sup> A kene ka ndeemaana ka oona kam'bana ko'do a tumma ya, ikiri Yasu ka eyi tiya iini ka öö'dö kene kete unggenee nja eene.

<sup>16</sup> Lakiini ïye neene kaküdhu taalo kussu i'i 'do.

<sup>17</sup> Ikiri ka tindini eege, "Tumma minna eege kungngo ada kadeema iini a'da kunggeene aaga no?"

Köödhi kamüürü.

<sup>18</sup> A könö ya ana eere a'da Kaliyubas tiki iini, "O'o nungngo nefi ka Örsaliim unggodho o'o nitaalo nussu eema ya agalinggo adene kide ka naguuru tanno ya?"

<sup>19</sup> Ikiri Yasu ka tiki, "Minna agüüni adene?"

Kiki iini, "Eema ya agalinggo adene ana Yasu ya ma Nasira ya i'i ya aga ne'bi ana türü ma tumma nja linggo kidha ma Masala nja kadu nye'd de kungngo.

<sup>20</sup> Naguugaara ma ka'boge nja kadiifi tanno aja kümüü i'i ma tiidaana kabünnü i ka salii'bii.

<sup>21</sup> Kagümüü ungngó i'i a'da i'i yungngó ara toolona Israyil adha ya a fungngö ma eema tiya agalinggo adene ya anda iidoona 'bitingngö.

<sup>22</sup> Lakiini iiya niidi tököön kingide kanangga ungngó katadhere. Kunggeene ligitaka so'd do kaco la ma oofo.

<sup>23</sup> Kitao kaluna oofo yiini, kafada köö'dö kiki ungngó a'da kaduna eege kadhangga kiki eene a'da i'i adinö.

<sup>24</sup> A kadu öccö tunggeene ana ka kadu tanno iidi ka co la ma oofo, kaduna afa ma tiya iiya ka tiraana ya kungngo, lakiini eeee taalo kasala i'i.

<sup>25</sup> Ikiri Yasu ka tiki eene, "Ka na-gaaga aaga kadoono aaga ku'bu a tümmü Masala, ma tumma tanno nagane'bi katatiraana no nye'd de.

<sup>26</sup> Taalo Almasihi ara tadhügürü üünü muuyu assa ka co ka tidhindhü tanno iini?"

<sup>27</sup> Ada kadünögü tumma ma eyi tiya iini na ikirinja ka nakasorne ndama seriye tiya Müüsa nja nagane'bi nye'd de kungngo.

<sup>28</sup> Kene ka ndakete ka anya tammo eene ka tunggunugu co mo, a Yasu tüünü eyi yiini a'da i'i unggunugu co a 'buugu tiya agu'b'ba ya.

<sup>29</sup> Kamma'da kini kiki iini a'da, "Aneene nja ungngó kudumma 'buugu kanda siiya ooso ka ndö'dö." Ikiri ka co ma co taneene nya eene.

<sup>30</sup> A kene ka ndemmi ma tara tagu eema ya, a Yasu ta'duga miteene anangnga ta'diila a Masala, a'düsünü anangnga eene.

<sup>31</sup> ïye tatana'da kene kussu i'i, ikiri ka tamanya eene ka oona.

<sup>32</sup> Aya tiki a tööje, "Taalo tunugu abaana kaja ka naaro, kini ka tageema nja angnga ka fiin'i adagadünögü eema ya ka kasorne ma Masala ya angnga?"

<sup>33</sup> Karoro ka tafada kaco Örsaliim, kaduna kadafiini na ada'baaga kafünü unggodho no katemmi nja kadu töccö na aneene nja eene no.

<sup>34</sup> Kadageema kiki, "Afiki'dö Uugaara aala oona a Samaan timin'da."

<sup>35</sup> İkiri kadalaadene na eera no ka tirina eema ya agalinggo adene ka fiini ya, kene ka tussu Uugaara kini ka 'düsünü miteene.

*Yasu adele oona a kadalaadene tanno iini*

(*Matta* 28.16–20; *Murkus* 16.14–18; *Yühanna* 20.19–23; *Kadafüni* 1.6–8)

<sup>36</sup> Aga kadalaadene na eera no ka ndeema ya, ikiri Yasu ka 'dingnge kene ka söödö iki, "A'a nööjüü aaga."

<sup>37</sup> A ri'ba tümmü eege ka'deedene ka oona kiki kide a'da eege kaasala koronggore.

<sup>38</sup> Yungngo iini ka tiki eene, "Minna agu aaga, aaga ta'deedene, aaga tasanaana nanggeedi ku'bu?"

<sup>39</sup> Aaga assa kede ka iisine nja uune, a'a namiini, aaga aa'ba a'a ka oona aaga tüörönö, taalo tuu'da ka koronggore nja ku'buuni afa maada ka tünö kede kungno."

<sup>40</sup> Atiraana nggeege aala iisine niini eene nja uune tanno iini.

<sup>41</sup> Lakiini eege kütü taalo kamma, eene katadhore a dhoodho tagu eege ka oona dhindho ikiri ka tiki eene, "Niimö ma taguri ungno ada kita?"

<sup>42</sup> Kagona 'bamüdigilöögö ma ku'dudene mo iini.

<sup>43</sup> A'duga adaguri kene kidha.

<sup>44</sup> İkiri ka tiki eene, "Tumma neede ka tadirina aaga a'da nagaleefe a'a nja aaga no a'da tumma nakasorne ma seriye tiya Müüsa nja kasorne ma nagane'bi nja sorne ma Tüüsü ma nakaaru na keema tumma ma a'a no kara talingga adene ana a'a nye'de kungno."

<sup>45</sup> Yungngo iini ka tafa'da eege ka nanggüdü amang kene tussu ka sorne.

<sup>46</sup> İkiri ka tiki eene, "Tumma na kakirinja ka sorne kiki a'da Almasiihi ara tad hügürü afiki'dö ndama inde a naguru kiidoona.

<sup>47</sup> Ara kadu tadünnü tumma ana eere tiya iini ma kadu kataadha ka tatoroko, ma toolona tam'baga, kata tüm'bü miini ndama Örsaliim kadhala ka kadu nye'de kungno.

<sup>48</sup> Aaga kungno kadiinö ka eema tiya.

<sup>49</sup> Ara a'a tunggu niimö ya Pupa tiya eede ka tatiraana aaga ya, aga aganna ka anya ma Örsaliim ara türü köö'dö kada ka oona ndama fiini ma ndanaaya."

*Yasu asürigö co 'dotombo'do*

(*Murkus* 16.19–20; *Kadafüni* 1.9–11)

<sup>50</sup> İkiri ka öö'dö kürö ana eege kaco Beet Aniya a'diniga iisine coo'do anangnga baraka eene.

<sup>51</sup> A kini ka ndamana baraka eene ya, asigi keere eene ka oona assa ka ta'diniginja co 'dotombo'do.

<sup>52</sup> Küürü ku'bu kamma kini, kafada kaco Örsaliim kadhodho dhorro.

<sup>53</sup> Kan'danaga co la ma Masala turi kungngo, kamana ta'diila a Masala.

## İnjülli Yühanna Tafa'da tumma

Yühanna aga taffiin'i tiya Yasu ana ka kadu na ö'dö kada'baaga kafünü eera no. I'i eema tumma ma eema keefe ma Yasu ka talinggo no nja talaadene tanno iini ka tamana a kadu no. Yühanna anangnga kadu ka tussu a'da Yasu i'i ya ömö'di dhorro i'i ya Masala afe'de.

Sorne ala angnga a'da Yasu ya tumma tanno Masala nja tumma ma tö'dö ka 'büdhülü. Yühanna ya tatambeese ya ümmünü i'i a'da dhünggü ma Masala, ala angnga a'da inde niini kara tatiirri tanno ara ta'duga tatoroko ma 'büdhülü. Yasu i'i ya Almasiihi ya nagane'bı ma 'billi kadageemea tumma tö'dö ma 'billi tanno iini. Yühanna eema tumma ma tasaasa tanno Yasu ka kadu tanno iini nja tumma ma ta'baga eege ka nanggeedi taamu kungno a'da üfürü tümmü adene (Yühanna 13—17). Abünnünja ku'bu afiki'dö ka inde aala oona niini a kadu tanno iini a naguuru kadhabbu (Yühanna 18—21).

### *Tumma na Masala ka tuu'da*

<sup>1</sup> Ka dhidha kaganna tumma kide, a tumma taganna ka Masala, a tumma eege ka Masala.

<sup>2</sup> I'i ka dhidha aganeene nja Masala.

<sup>3</sup> Eema nye'd'e ö'dö ndama iini, üürü taalo i'i taalo eema adaganna kide.

<sup>4</sup> Tefe ka 'dī kungno iini, a tefe ka 'dī niini tamana töyeene a kadu nye'd'e.

<sup>5</sup> A töyeene ada ka talüllü, a talüllü taalo kambaanya türü na töyeene.

<sup>6</sup> Ömö'di inggide adele oona ana eere a'da Yühanna, a Masala ka kürünü i'i.

<sup>7</sup> I'i ö'dö teema tumma ma töyeene tammo iini ka tadınö kide no co kadu amang kene tamma ka Masala in'dili ndama tumma tanno iini.

<sup>8</sup> I'i ka eyi tiya iini taalo a töyeene, i'i ö'dö teema tumma ma töyeene sugi.

<sup>9</sup> I'i ya töyeene tanno dhorro no, kö'dö ka 'büdhülü ma tanangna töyeene ka kadu ka oona.

<sup>10</sup> Aganna ka 'büdhülü, a Masala tarü'bü 'büdhülü ana i'i, a kadu ma 'büdhülü taalo kussu i'i.

<sup>11</sup> Ö'dö ka kadu ma anya tammo iini, lakiini kadu niini taalo kamma kini.

<sup>12</sup> Lakiini kadu na amma kini no, nja tanno kamma ka eere tiya iini no,

anangnga tauugaara eene kada laala ma Masala.

<sup>13</sup> Eege no taalo kageenedene ndama tuu'da nja eriidö kitaalo kageenedene ndama miide lakiini kageenedene ndama Masala.

<sup>14</sup> A tumma ta ömö'di adaganeene nja angnga, angnga tadinö ka tidihindih tanno iini, tidihindih na 'Bii'bala ya unggodho ya, ya ö'dö ndama Pupa adigine a türü nja timin'da.

<sup>15</sup> Yühanna ijöögö, adageema ko'd'o iki a'da, "Ömö'di yeede ka takiki a'da ara tö'dö kede keere ya i'i yungngo, i'i idhindih adagii'bı a'a kudumma iini ka taganeene a'da naleefe a'a takitaalo."

<sup>16</sup> Adigi baraka ma türü tanno iini kaja ka oona, adadigine türü kaja kide turi.

<sup>17</sup> Kudumma Masala manangnga seriye a Müüsa ö'dö iini angnga, lakiini türü nja timin'da tanno dhorro no kö'dönja angnga ndama Yasu Almasiihi.

<sup>18</sup> Taalo ömö'di ma tadınö ka Masala, lakiini Masala ma unggodho ma 'Bii'bala ya unggodho ya, ya ka Pupa ka tüğüle ya i'i yungngo anangnga ooogo ka tussu adene.

### *Tumma na Yühanna ya tatambeese ya (Matta 3.1-12; Murkus 1.2-8; Lüüka 3.15-17)*

<sup>19</sup> A tumma na Yühanna ka tiraana no eege kungno a Yahüüdü kagürünü ka'boge nja Lawiin ndama Örsaliim ma co tindini i'i, "O'o na mada?"

<sup>20</sup> Ütü ka tamma itaalo a'düsünigü, iki a'da, "Taalo a'a na Almasiihi."

<sup>21</sup> Kikiri ka tiki iini, "O'o na mada ma? O'o na İliya?"

Iki, "Taalo a'a na İliya."

Kiki iini, "O'o na ne'bı?"

Iki eene, "Kaw."

<sup>22</sup> Keere kungno kikiri ka tiki iini, "O'o na mada, amang kiđi tapadaga tumma co ka kadu tanno kürünü ungngo no. Niki o'o ka eyi tiya yüüdü nya?"

<sup>23</sup> A Yühanna tiki,  
"Abbü ömö'di takeere ka dhiile,  
'Aaga indinaana fiin'i ka Uugaara ku'bu, ka  
tadhidho,' " afa ma tiya ne'bı Asaiya  
ka tiki ya kungno.

<sup>24</sup> A naFariisi eege kungno kagürünüdene.

<sup>25</sup> Kikiri ka tindini Yühanna kiki iini,  
"Üürü taalo o'o na Almasiihi, nitaalo na  
İliya, nitaalo na ne'bı o'o nambeese kadu  
amanan?"

<sup>26</sup> A Yühanna tiki eene, "Ara a'a tambeese a 'bündi, lakiini ömö'di ungngo ada ka söödö ada katitaalo kussu i'i.

27 I'i yungngo a tö'dö kede keere taalo a'a natambaanya tinggili meena ma egüide tiya iini."

28 Tumma no kalinggo adene ka Beet Aniya ka nda'da ma Ri ma Ürdün kita Yühanna ka takambeese kide ya.

### *Yasu i'i ya dhünggü ma Masala*

29 Ka taka tököönö a Yühanna taasala Yasu ka tunggunu kini, ikirü ka tiki, "Aaga assa ka dhünggü tiya Masala ya ara ta'duga tatoroko ka 'büdhülü ya i'i yungngo.

30 I'i yungngo eede ka tageema tumma miini a'da, 'Ömö'dü inggide atö'dö kede keere kudumma iini aganna eede kidha adhabbu a'a.'

31 Taalo a'a nakussu i'i, illi a'a nö'dö tambeese a 'büdü amang kini tatele oona a kadu ma Israyil."

32 İkirü Yühanna ka adinö kide iki, "Niji a'a Koronggore ka öö'dö ku'bu ndama 'dotombo'do afeene nja ndalambo idhi kini ka oona.

33 Taalo a'a nara tagussu i'i, illi ömö'dü ya kürünü a'a ka öö'dö tambeese a 'büdü ya, iki a'a a'da, 'Ömö'dü yüüdü ka tasala Koronggore ya ka tidhi kini ka oona ütü kide ya, i'i yungngo ara tambeese a Koronggore tiya Insili ya.'

34 A'nadönö kini nussu a'da 'Bii'bala ma Masala i'i ya miini."

### *Kadalaadene na Yasu na dhidha no*

35 Ka taka tököönö a Yühanna ta'dingnge afe'e de nja kadalaadene tanno iini na eera no.

36 Kini ka tasala Yasu ka öö'dö adigaala, a Yühanna tasala i'i iki, "Aaga assa ka dhünggü ma Masala."

37 A kadalaadene na eera no taföönyö iini ka teema, kikirü ka turna Yasu keere.

38 A Yasu tassa keere, asala eege kato'd'o kini keere, ikirü ka tiki eene, "Kasaasa aaga minna?"

Kiki, "Rabi" (a'da Tatalaana), "'dü yüüdü inggiga?"

39 İkirü ka tiki eene, "Aaga ö'dö aaga co tassa co." Kikirü ka co kateefe tassa kita iini ka tanna kide kita, kadaganeene nja iini ka uuru tanno miini no, amuru ma siiya.

40 A köönö ana ka kadalaadene tanno eera no kaföönyö tumma na Yühanna kuurna Yasu keere no, ana eere a'da Andraws örre ya Samaan Bütrüs.

41 Niimö ya Andraws ka talingga ka dhidha ya i'i aduna örre yiini Samaan iki iini, "Kaduna ungngo Almasiya" (a'da Almasiihi).

42 Öö'dö ana i'i a Yasu, ikirü Yasu ka tassa kini iki, "O'o na Samaan 'bii'bala ya Yühanna, ara o'o tana eere a'da Kifa" (a'da 'dokon'da).

### *Yasu ümmünü Filibüs nja Nasanayiil*

43 Aga taka ka ndaadha ya a Yasu tasaasa co Jaliil, ikirü ka tuna Filibüs, iki iini, "Ayau kede keere."

44 A Filibüs, i'i ya ma Beet Sayida, anya ma Andraws nja Bütrüs.

45 A Filibüs taduna Nasanayiil, iki iini, "Kaduna ungngo ömö'dü ya Müüsa ka tarigiri ada ka sorne ma Masala nja sorne ma nagane'bi ya, Yasu 'bii'bala ya Yüüsif ya ma Nasira ya."

46 A Nasanayiil tiki iini, "Niimö ya a'diila inggide atö'dö ndama Nasira?"

A Filibüs tiki iini, "Ayau kolo tassa kide."

47 Ka Yasu ka taasala Nasanayiil ka tunggunu kini ya, ikirü ka tiki iini, "Taga Israyil ya dhorro ya i'i yungngo taalo korokoro kide."

48 A Nasanayiil tiki iini, "Nussu a'a nya?"

A Yasu tiki iini, "Nasala a'a o'o ka tüm'bü ma indiyye a'da üfürü Filibüs tagümmünen o'o."

49 İkirü Nasanayiil ka tiki, "Tatalaana, o'o na 'Bii'bala ma Masala. O'o na Uugaara ma Israyil."

50 İkirü Yasu ka tiki iini, "Namma o'o kudumma eede ka tiki a'da a'a nasala o'o ka tüm'bü ma indiyye. Ara o'o sa adinö ka eema adhabbu a tiya."

51 İkirü ka tiki iini, "Tumma dhorro, ara a'a tadirina aaga, ara tiji 'dotombo'do ka tatafa'da, a kadhangga ma Masala tasirigö coo'do ka'dünggö ku'bu ka 'Bii'bala ma Tadü'dü ka oona."

## 2

### *Yasu a'bele 'büdü kada ngeeli*

1 Ka füngngö kanda iidoonaya, a tarna taganna ka Kaana ka Jaliil, a niimö ma Yasu taganna kide,

2 a kadu tagümmünenü Yasu nja kadalaadene kaco ka tarna.

3 Ka kadu kanda 'duuru ngeeli ya, ikirü niimö ma Yasu ka tiki iini, "Taalo ngeeli köreeene kene."

4 A Yasu tiki oono, "Ka aka mo, minna yüüdü nja a'a. Küfürü uuru neede tö'dö."

5 A niimö ma Yasu tiki a kadu tanno alingga no, "Niimö yiini ka tiki aaga a'da aaga talingga ya aaga linggo."

6 A nadhafala kinggide ka iidümmü kafünü unggodho, kagalinggo adene a misi, kadu ma Yahüüdü ka tadaada kagodenae a nadhafala, aya tadigine a 'büdü dhabbu.

<sup>7</sup> İkiri Yasu ka tiki a kadu tanno alinggo no, "Aaga tigi nadhafala a 'büdü," kikiri ka tigaana ö'dö ka nüünö miini.

<sup>8</sup> İkiri ka tiki eene, "Bitüngngö aaga indi ököönö aaga tunggo co uugaara ma linggo." Kikiri ka tinya iini.

<sup>9</sup> Kini ka tagolo 'büdü ata'bele kada ngeeli ya, a'da taalo ussu a'da kö'dö ndama kiga, lakiini kasaga na amana ngeeli a kadu no, eege kungngo kussu, adagümmüñü tatarna yeene.

<sup>10</sup> Iki iini, "Kadu 'do kamana ngeeli na itoto no a kadu ka dhidha, a kadu kandaaya kide ya, kikiri kamana na 'büdü no eene. Lakiini nagala o'o ka afa ka ngeeli tanno itoto no, na o'o sa ka öö'dö iini 'bitüngngö adha."

<sup>11</sup> Yasu ala eema keefe nja türü nja tidihindhi tanno iini a kadu ka Kaana ka Jalil ka dhidha a kadalaadene niini tadinö kide kamma kini.

<sup>12</sup> Ndama kannaa a Yasu tasülü ku'bu nya nüümö tammo iini nja nagöre tanno iini nja kadalaadene tanno iini kaco Kafarnahööm, kagünü kide a fungngö idhilli.

*Yasu asoro kadu na anadene no ka la masala*

(Matta 21.12-13; Murkus 11.15-17; Lüüka 19.45-46)

<sup>13</sup> Aga Taanyara ma Tada'da ka Erüidö ma Yahüüdü kanda kete ya, ikiri Yasu ka siriğı co Örsaliim.

<sup>14</sup> Aduna kadu ka la ma Masala, kanadene ana eefo nja kidheefe nja alambo, a'da kadu na aregere gürüsü no kungngo kemmi ka naterbeesa.

<sup>15</sup> İkiri ka takaaaya feeri ma naaru adagasoro eege ka 'booro ma la ma Masala nye'd'e kungngo, nja kidheefe nja eefo apudu naterbeesa ku'bu asanaana gürüsü ya kadu tanno aregere no.

<sup>16</sup> İkiri ka tiki a kadu tanno kanadene ana alambo no, "Aaga 'duga eema ya kita, aaga fa tanangngä 'di ya Pupa tiya eede ka ta'būugu ma tanadene."

<sup>17</sup> A kadalaadene niini tagiiggi eene katiki a'da, "Ka Masala, tasaasa ma la tiya üüdü kagu'du a'a ka eedi."

<sup>18</sup> İkiri Yahüüdü ka tiki iini, "La türü ungno nüüdi ka tussu iini a'da ara o'o talingga tumma no?"

<sup>19</sup> İkiri Yasu ka tiki eene, "Aaga arüdü la ma Masala ya na a'a sa ka arü'böönö a fungngö iidoona."

<sup>20</sup> A Yahüüdü tiki, "La ma Masala ya, arü'bü adene a nagürüünü a kadu keera kafünü kide ka üidümmü afünü ungodho (46), na o'o sa ka tarü'böönö a fungngö iidoona nya?"

<sup>21</sup> Lakiini la ma Masala ya Yasu ka teema tumma miini ya, eema tumma ma tuu'da tanno iini.

<sup>22</sup> A kini ka fiki'dö ndama inde ya, a kadalaadene niini tagiiggi tumma no, kamma ka tumma ma sorne ma Masala nja tumma tanno Yasu ka tatiraana no.

<sup>23</sup> Kini ka taganna ka Taanyara ma Tada'da ka Erüidö ka Örsaliim ya, a kadu tamma ka eere tiya iini kadhabbu kene ka tadinö ka türü ma eema tiya iini ka talingga keefe ya.

<sup>24</sup> Lakiini Yasu taalo üürü kene ka oona kudumma iini ka tussu kadu nye'd'e kungngo.

<sup>25</sup> Kudumma iini taalo ama ömö'di ka tirina tumma ömö'di iini, kudumma iini ka tussu nanggeedi na kadu.

### 3

#### *Yasu alaana Niködimus*

<sup>1</sup> A 'bitüngngö taga Fariisi inggide uugaara ma Yahüüdü ana eere a'da Niködimus, i'i ya ta'ba ma naFariisi.

<sup>2</sup> Unggeene ooso kungngo aco ka Yasu iki iini, "Rabi, (a'da Tatalaana) kussu ungnjo a'da o'o na tatalaana ya ö'dö ndama Masala ya. Taalo ömö'di ma tamaanya talingga eema keefe afa ma tiya üüdü ka talingga ya itaalo illi ka Masala ka taneene nya iini."

<sup>3</sup> A Yasu tiki iini, "Ara a'a tadirina tumma o'o dhorro, taalo ömö'di ma tassa ka tauugaara ma Masala illi iini ka tageenedene afe'de."

<sup>4</sup> A Niködimus tiki iini, "Ara ömö'di teenedene nya iini ka tadhabbu? Atapadaga ka nüümö ka feelü assa ka teenedene afe'de?"

<sup>5</sup> A Yasu tiki, "Ara a'a tadirina tumma o'o dhorro, taalo ömö'di ma tara co ka tauugaara ma Masala illi kini ka teenedene ndama 'büdü nja Koronggore.

<sup>6</sup> Ömö'di ya ageenedene ndama tuu'da ya i'i ya tuu'da, lakiini ömö'di ya ageenedene ndama Koronggore ya i'i ya koronggore.

<sup>7</sup> Fa tadhere ka tumma tanno eede ka tiki o'o no a'da, 'Aaga teenedene afe'de.'

<sup>8</sup> Tanya kiisö co kita eene kasaasa, aaga taföönöy töösö miini, lakiini aaga sa katitaalo kussu kita eene köö'dö ndama iini kita, aaga taalo kussu kita eene kiisö co, nggege kafeene nja ömö'di tiya ara teenedene ndama Koronggore ya."

<sup>9</sup> A Niködimus tiki, "Tumma no katalingga adene nya?"

<sup>10</sup> A Yasu tiki iini, "O'o no tatalaana ma Israyil, na o'o sa ka titaaloo nussu tumma no?"

<sup>11</sup> Ara a'a tadirina tumma o'o dhorro, keema ungngo nüümö yüdü ka tussu ya, ungngo tadirina nüümö yüdü ka tadinö kide ya, illi aaga taalo kamma ka tumma tanno iidi.

<sup>12</sup> Nageema a'a nja aaga ma eema ma 'büdhülü aaga taalo kamma, ara aaga tamma nya kede kara teema nja aaga ana eema ma 'dotombo'do?

<sup>13</sup> Taalo ömö'dü ma tasirö 'dotombo'do illi 'Bii'bala ma Tadü'dü i'i yungngo ö'dö ku'bu ndama 'dotombo'do.

<sup>14</sup> Afa ma tiya Müüsa ka taga'dala nü ko'do ka dhüüle kungngo ya, ara 'Bii'bala ma Tadü'dü ta'dinanja ko'do nggeege,

<sup>15</sup> amang ka kadu tanno amma kini no taluna tefe ka 'dü ta'billi.

<sup>16</sup> "Kungngo Masala masaasa kadu nye'd'de, mikiiri ka kürünü 'Bii'bala yoono ya unggodho ya, amang ka kadu tanno amma kini no tafa taama, lakiini kataluna tefe ka 'dü ta'billi.

<sup>17</sup> Taalo Masala magürünü 'Bii'bala yoono ka kadu a'da ümmü eege, lakiini moono ka toolona kadu ana i'i.

<sup>18</sup> Ömö'dü ya amma ka 'Bii'bala ya, taalo ara tahükümüdene, a ömö'dü ya taalo amma kini ya, ümmü adene, kudumma iini taalo amma ka 'Bii'bala ma Masala tiya unggodho ya.

<sup>19</sup> A tahükümü no, kudumma töyeene kö'dö ka 'büdhülü, illi kadu ka asaasa talüllü ka tagii'bi töyeene, kudumma eene ka talinggo eema ya toroko ya.

<sup>20</sup> Ömö'dü ya linggo eema ya toroko ya anu ka töyeene, itaalo ara co ka 'buugu tiya öyeene ya, kudumma eene kari'ba a kadu katiji eema yiini ka talinggo ya.

<sup>21</sup> Lakiini ömö'dü ya alingga eema ya dhorro ya, anna ka 'buugu tiya öyeene ya, amang ka kadu tiji linggo niimi kussu a'da fiini ma Masala i'i ya miini."

*Yasu nja Yühanna tiya Tatambeese ya*

<sup>22</sup> İkiri Yasu ka tunggeene aco anya ma Yahüüdiya nja kadalaadene tanno iini, adaganna kide nja eene atagambeese eege.

<sup>23</sup> A Yühanna takambeese afe'de ka Een Nün, kete ma Saliim, kudumma 'büdü ka tadhabbu kide, a kadu ticci ka tambeesedene kide.

<sup>24</sup> A'da aleefe Yühanna üfürü co ka pabuuus.

<sup>25</sup> A taga Yahüüdü ta'bununjaana ku'bu ka tumma nja kadalaadene tanno Yühanna, kudumma tagunaana ma taanyara.

<sup>26</sup> Kikiri ka öö'dö ka Yühanna kiki iini, "Rabi, (a'da Tatalaana) ömö'dü ya aganna ka nda'da ma Ürdün nja o'o ya yüdü

ka tageema tumma miini ya, inni kanna ambeese, a kadu ticci kini kide."

<sup>27</sup> A Yühanna tiki eene, "Taalo ömö'dü ma ta'duga nüümö ün'dügüngngö illi ka Masala ka anangnga iini ndama 'dotombo'do.

<sup>28</sup> Aaga ka nanggeyi tanno ada kaföönyö aaga eede ka tiki a'da, 'Taalo a'a na Almasi-ihi, illi a'a nagürünüdene kini kidha.'

<sup>29</sup> Ömö'dü ya arna ya i'i yungngo a nyori ma aka. A teefe ma tatarna i'i a'dingnge atoodo ka tumma tanno iini adhodho kini ka föönyö tumma niini, a 'bitüngngö dhodho neede ka ndafaradene kudumma iini.

<sup>30</sup> T'i ama tasisigi co aadha, ara a'a ka tapapataga keere."

*Ömö'dü ya ö'dö ndama 'dotombo'do ya*

<sup>31</sup> Ömö'dü ya öö'dö ku'bu ndama oo'do ya, i'i yungngo ka kadu kidha nye'd'de, ömö'dü ya anna ka 'büdhülü ya, i'i ya ama 'büdhülü eema tumma ma kadu ma 'büdhülü. Aya ö'dö ndama 'dotombo'do ya i'i yungngo ka kadu kidha nye'd'de kungngo.

<sup>32</sup> Eema tumma niini ka tadinö kide adaföönyö no, lakiini taalo ömö'dü unggodho kungngo amma ka tumma tanno iini.

<sup>33</sup> Ömö'dü ya amma ka tumma tanno iini ussu a'da tumma na Masala ka dhorro.

<sup>34</sup> Ömö'dü ya Masala ka kürünü i'i ya, eema tumma ma Masala, kudumma Masala manangnga Koronggore a kadu a'da taalo faana kide.

<sup>35</sup> A Pupa asaasa 'Bii'bala ümmüni eema iini ka niisö nye'd'de kungngo.

<sup>36</sup> Ömö'dü ya amma ka 'Bii'bala ya ara taduna tefe ka 'dü ta'billi, ömö'dü ya taalo amma ka 'Bii'bala ya, taalo ara tassa ka tefe ka 'dü, ara tutü ka tapusu adene ma Masala.

## 4

*Yasu nja aka ma Samira*

<sup>1</sup> A naFariisi taföönyö a'da Yasu alaana kadalaadene ambeese eege kadhabbu a kadu tanno Yühanna.

<sup>2</sup> Tumma dhorro Yasu ka eyi tiya iini taalo akambeese, lakiini kadalaadene niini eege kungngo kagambeese kadu.

<sup>3</sup> Ka Yasu ka tussu tumma no ya, unggene ka Yahüüdiya afada aaco Jaliil.

<sup>4</sup> T'i ama tunggeene adho ka Samira.

<sup>5</sup> Ö'dö ka anya ma Samira mana eere a'da Sukar, makete ka 'buugu tiya Yaguub ka anangnga a 'bii'bala tiya iini Yüüsif.

<sup>6</sup> Össe ma Yaguub makete kita miini kita, aga Yasu ka tagunggeene agi'di, ikiri ka

temmi ka tinggini ma össe ka uuru ka teene.

<sup>7</sup> Aka ma Samira mö'dö ma tindi 'bïidü, ikirü Yasu ka tiki oono, "Nya 'bïidü a'a nooye."

<sup>8</sup> Kudumma kadalaadene tanno iini ka unggenee kaco tana eema ma taguri kaanya.

<sup>9</sup> Mikirü aka ma Samira ka tiki iini, "O'o na taga Yahüdü a'a na madaga Samira, o'o saga asaasa 'bïidü kede a'da nooye nya?" Kudumma Yahüdü taalo kunggunaana koona nja kadu ma Samira.

<sup>10</sup> İkirü Yasu ka tiki oono, "Küdü ka tussu eema ya Masala ka amana a kadu ya, na o'o tagussu ömö'dü ya arangnga 'bïidü küdü a'da oyoye ya, ara o'o takindini a'a ara a'a takinya 'bïidü ma tefe ka 'di o'o."

<sup>11</sup> Aka tiki iini, "Ka ömö'dü eede, taalo rembe küdü, össe tadhonggoro na o'o sa taluna 'bïidü ma tefe ka 'di kiga?"

<sup>12</sup> Pupa yiidü Yaguub anangnga össe mo ungnego adakooye 'bïidü kide i'i nya laala tiya iini nya eema ma erüdö tiya iini, o'o nagii'bi Yaguub?"

<sup>13</sup> A Yasu tiki oono, "Ömö'dü ya tooye 'bïidü ya ara tenege tagu i'i afe'de,

<sup>14</sup> lakiini ömö'dü yeede ka tinyi 'bïidü iini oyoye ya, taalo tenege ka tagu i'i afe'de turi. A 'bïidü yeede ka tinyi iini ya ara ta nduguli ma tefe ka 'di kini ka oona ta'billi."

<sup>15</sup> Aka tiki iini, "Nya 'bïidü ya a'a ömö'dü eede, amang ka tenege tafa tagu a'a nafa tö'dö tügü 'bïidü kita."

<sup>16</sup> Iki oono, "Kolo tümmünü nyuri yüyüdü na o'o sa ka tafada nöö'dö kita."

<sup>17</sup> Aka tiki, "Taalo nyuri eede."

A Yasu tiki oono, "Tumma dhorro eege kungngo üüdü ka teema a'da, 'Taalo nyuri yüyüdü,'

<sup>18</sup> kudumma naganyori kada kannä küdü küdümmü, aya küdü 'bitingngö ya taalo nyuri yüyüdü i'i ya miini a tumma nüüdü ka timin'da."

<sup>19</sup> Aka tiki, "Niji o'o kada ne'bi ömö'dü eede.

<sup>20</sup> Kafaafa ma ungnego kagümmü Masala ka 'dikinya tammo, aaga na Yahüdü no tiki a'da, Örsaliim 'buugu ma tümmü Masala kide."

<sup>21</sup> A Yasu tiki oono, "Amma ka tumma tanno eede aka, uuru kinggide aaga sa ka tümmü Pupa taalo ka 'dikinya tammo alla ka Örsaliim.

<sup>22</sup> Aaga na ma Samira no kamma aaga ka niimö tiya ada ka titaaloo kussu ya, ungnego na Yahüdü no kümmü ungnego niimö yiidü ka tussu ya, kudumma toolona ka tö'dö ndama Yahüdü.

<sup>23</sup> Lakiini uuru kinggide kara sa köö'dö eege kungngo kandö'dö 'bitingngö a kadu

na ümmü Masala timin'da no kasa ka tümmü Pupa a koronggore nja timin'da, egee kungngo ka kadu tanno ümmü Pupa ka asaasa egee no.

<sup>24</sup> Masala ma Koronggore, a kadu na ümmü oogo no, kümmönö a koronggore dhorro."

<sup>25</sup> Aka tiki iini, "Nussu a'a a'da Almasiya (ana eere a'da Almasiihi) atö'dö. Kini ka tö'dö ara tadirina eema ungnego in'dili kungngo."

<sup>26</sup> A Yasu tiki oono, "A'a ungnego neema nja o'o kungngo a'a namiimi."

<sup>27</sup> Amussu kungngo ya ikirü kadalaadene niini ka tafada, kaduna i'ka teema nja aka kadhere. Lakiini taalo ömö'dü ana kene iki iini a'da, "Nasaasa o'o minna kono?" nja iini ka tiki a'da, "Neema o'o nya oono amana?"

<sup>28</sup> Aka tinyi see'de ma 'bïidü yoono ku'bu mara tapadaga co anya miki a kadu,

<sup>29</sup> "Aaga kö'dö aaga tassa ka ömö'dü tiya adirina eema yeede ka tagalinggo ya nye'de kungngo. Taalo tanggaaga ta Almasiihi i'i ya miini?"

<sup>30</sup> Kikirü ka öö'dö kürö ndama anya köö'dö ka kini.

<sup>31</sup> Kita miini kita ya, ikirü kadalaadene ka tiki a Yasu, "Tatalaana agu eema."

<sup>32</sup> İkirü ka tiki eene, "Kuri ungnego eede ka kuri taalo aaga kussu i'i."

<sup>33</sup> Kikirü ka tindini ajeene kiki, "Ö'dö ömö'dü ana eema ma kuri iini?"

<sup>34</sup> A Yasu tiki eene, "Kuri yeede a'da nalinggo linggo na ömö'dü tiya agürünü a'a ya natüümö eege.

<sup>35</sup> Taalo aaga kiki a'da, 'A nagatereene ka egiiösö a kadu sa karaana?' Ara a'a tiki aaga, aaga afa'da iyye aaga tassa co nasigenee esa migile tarume masa ta'bassa ma tasaasa taradene.

<sup>36</sup> A tataraana ma migile ara ta'duga faana yiini, awagaana migile koona ma tefe ka 'di ta'billi, ömö'dü ma siga tadhadho nja ömö'dü tiya araana ya.

<sup>37</sup> A tumma na adiridene no tö'dö dhorro a'da, 'Ömö'dü öccö adinüögü aya taraana.'

<sup>38</sup> Nagürünü a'a aaga a'da aaga co tara migile ka siga tanno ada katitaalo kadhägüru iini no, ömö'dü könö agadhägüru iini aaga tara migile ma dhügüru tiya iini."

*Kadu ma Samira kadhabbu kamma ka Masala*

<sup>39</sup> A kadu ma anya ma Samira kadhabbu kamma kini ka tumma tanno oono ka tirina eene no, kudumma oono miki a'da, 'I'i ya tirina eema yeede ka tagalinggo ya nye'de kungngo.'

<sup>40</sup> A kadu ma Samira köö'dö kini kiki iini a'da, aneene nja eene, ikirü ka taganeene nja eene afüngngö eera.

<sup>41</sup> A kadu na amma kini no tadhabbu kudumma eene kataföönyö tumma niimi.

<sup>42</sup> Kiki aka, "Taalo ungngo kamma kudumma iidi ka taföönyö küdü sugi, lakiini ungngo kaföönyö, ungngo tadönö kide ma eyi tiya iidi unggodho ungngo, ungngo tussu a'da ömö'di ya i'i ya Tatoolona ma kadu ma 'büdhülü timin'da."

### *Yasu oolona 'bii'bala*

<sup>43</sup> Ka Yasu ka ndiyyü füngngö eera ya, ikirü ka tunggeene aco Jaliil.

<sup>44</sup> (A Yasu ka eyi tiya iini iki a'da, "Taalo ne'bi asaasadene ka anya tammo iini.")

<sup>45</sup> Kini ka ndala Jaliil ya, a kadu miini tada'a i'i kudumma eene ka taganna ka Örsaliim ka Taanyara ma Tada'da ka Eriidö ma Yahüüdü kadadinö ka eema tiya iini ka tagalinggo ya in'dili kungno.

<sup>46</sup> İkirü ka öö'dö ka Kaana ja Jaliil kita iini ka ta'bele 'büdü kada ngeeli ya. Ömö'di ma Kafarnahööm ya alinggo nja uugaara ya, a 'bii'bala tiya iini ka tamaara.

<sup>47</sup> İkirü ka föönyö a'da Yasu öö'dö ka Jaliil ndama Yahüüdiya ya, ikirü ka öö'dö kini, asaasa i'i a'da öö'dö ka Kafarnahööm olona 'bii'bala yiini kini ka ndakete ka teyi.

<sup>48</sup> İkirü Yasu ka tiki iini, "Taalo aaga ka tamma illi aaga tiji türü nja eema keefe."

<sup>49</sup> İkirü ömö'di ka tiki iini, "Ka ömö'di eede, aayu ku'bu a'da üfürü 'bii'bala yeede teyi."

<sup>50</sup> İkirü Yasu ka tiki, "Unggeene! 'Bii'bala yüüdü efe ka 'di.'" Ömö'di tamma ka tumma tanno Yasu unggeene.

<sup>51</sup> Kini ka tunggeene ka fiini ya, ikirü ka toreene nja kadu tanno alinggo nja iini no kiki iini, "'Bii'bala yüüdü adinö."

<sup>52</sup> İkirü ka tindini eege, "A'diila aada?"

Kiki iini a'da, "Ka ooso uuru ka teene, i'i yungngo a 'bürüdü ka taadha kini."

<sup>53</sup> A pupa ma 'bii'bala tagiigii a'da tamana ya Yasu ka tiki iini a'da, "Adinö 'bii'bala yüüdü." İkirü ka tamma kini nja kadu ma 'di tiya iini.

<sup>54</sup> Eema yiini ka tagalinggo a türü teera kini ka öö'dö ka Jaliil ndama Yahüüdiya.

## 5

### *Yasu oolona mügüre*

<sup>1</sup> Ka uuru tököönö, a Yasu tunggeene asürigö co Örsaliim ka taanyara ma Yahüüdü.

<sup>2</sup> Ka Örsaliim kete ma ïnye ma kidheefele dhömbö inggide napese

küidümmü, a kadu ma Yahüüdü kümmünü i'i a'da Beet Saiyda ya.

<sup>3</sup> A kadu na maara no ka tinggini ma napese no, kisinsoro nja tanno sogo'do no nja namügüre [ka'dana ka 'büdü a'da atingga'i'di.]

<sup>4</sup> Kudumma tadhingga ma Uugaara ka ta'barda ka 'büdü atingga'i'di. Ömö'di ya tafiri ka 'büdü a'da atingga'i'di ya, ömö'di ya 'bardaga ka 'büdü ya, ara toolonadene ka maara tammo agu i'i mo.]

<sup>5</sup> Ömö'di inggide akamaara a nagürüünü kukumu ömö'di kaco iisine kafünü kide iidümmü afünü iidoona.

<sup>6</sup> Aga Yasu ka tasala i'i ka füngngö nggeeye ya, ussu a'da illi ka maara, ikirü ka tiki iini, "Nasaasa o'o ta'diila?"

<sup>7</sup> Ömö'di ya maara ya tiki iini, "Ka ömö'di eede, taalo ömö'di ma ta'dinigi a'a co dhömbö a 'büdü ka tatingga'i'di na a'a tasaasa co, ömö'di öccö tadhe a'a."

<sup>8</sup> İkirü Yasu ka tiki iini, "Fiki'dö na'duga sekede yüüdü nunggeene."

<sup>9</sup> Ömö'di tarooro ka'diila ka 'buugu miini kungno a'duga sekede yiini unggene, a nüümö ya 'do agalinggo adene ka uuru ma Sa'bidi,

<sup>10</sup> İkirü Yahüüdü katiki ömö'di tiya oolonadene ya, "Uuru ma Sa'bidi seriye iki taalo o'o nama tümmü sekede yüüdü kide."

<sup>11</sup> İkirü ka tiki eene, "Ömö'di ya nangnga a'a ka'diila ya iki a'da, 'Na'duga sekede yüüdü nunggeene.'"

<sup>12</sup> Kikirü ka tindini i'i, "Mada i'i yungngo iki o'o a'da na'duga sekede yüüdü nunggeene?"

<sup>13</sup> Ömö'di taalo ussu mada i'i ya miini, kudumma Yasu ka talugu ka kadu tanno dhabbu no ka teene.

<sup>14</sup> Keere kungno ya, a Yasu taluna i'i ka la ma Masala iki iini, "O'o 'bitingngö sa o'o ta'diila, fa co talinggo eema ya toroko ya, ii'di nüümö tagu o'o dhindho."

<sup>15</sup> İkirü ömö'di ka tunggeene aco adirina eema a Yahüüdü a'da Yasu i'i yungngo anangnga i'i ka'diila.

### *Tefe ka 'di a 'Bii'bala*

<sup>16</sup> İkirü Yahüüdü ka talinggo Yasu 'do kudumma iini ka tüünü tumma no ka uuru ma Sa'bidi.

<sup>17</sup> İkirü Yasu ka tiki eene, "Pupa yeede alinggo a naganuuru na a'a talinggo afa miini kungno."

<sup>18</sup> A Yahüüdü takogona ma tasaasa tiidi Yasu, taalo kudumma iini kanu ka tumma ma Sa'bidi sugi, lakiini i'i iki afe'de a'da Masala a Pupa tiya iini ümmü eyi yiini kada köje nja Masala.

<sup>19</sup> İkirü Yasu ka tiki eene, "Ara a'a tadirina tumma aaga dhorro, taalo 'Bii'bala

ma tambaanya talingga nüümö unggodho i'i, alingga eema yiini ka adinö ka Pupa tiya iini ka talingga ya, a nüümö ya Pupa ka talingga ya ara 'Bii'bala talingga afa miini kungno.

<sup>20</sup> Yungno a Pupa ka asaasa 'Bii'bala alaala i'i ka eema tiya iini ka talingga ya in'dili. Nggege ara aaga tadhere kini kara tala eema iini dhabbu adagii'bi ya.

<sup>21</sup> Afa ma Pupa ka tinci kadu ka inde amana eege keefe ka 'dö, a 'Bii'bala tamana tefe ka 'dö ömö'dö tiya iini ka asaasa tanangngä iini ya.

<sup>22</sup> A Pupa taalo a tümmü kadu ka eyi tiya iini, kudumma iini ka tümmünü tauugaara a 'Bii'bala.

<sup>23</sup> Amang ka kadu nye'd'de tafünügü 'Bii'bala ko'do afa meene katafünügü Pupa ko'do, a ömö'dö ya taalo afünügü 'Bii'bala ko'do ya, i'i taalo atafünügü Pupa ya agürünü i'i ya.

<sup>24</sup> "Tumma dhorro eede ka tadirina aaga, ömö'dö ya föonyö tumma neede amma ka ömö'dö tiya agürünü a'a ya, ataluna tefe ka 'dö ta'billi taalo a tahükümüdene, kudumma iini ata'da ka inde aco ka tefe ka 'dö.

<sup>25</sup> Tumma dhorro eede ka tirina aaga, uru kinggide kassa ka öö'dö eege kandö'dö 'bitingngö, a kadu na aaya no kassa ka föonyö tumma na 'Bii'bala ma Masala, ömö'dö ya toodo kini ya a tefe ka 'dö.

<sup>26</sup> Afa ma Pupa ka eefe ka 'dö ka eyi tiya iini, i'i anangnga tefe ka 'dö a 'Bii'bala ka eyi tiya iini.

<sup>27</sup> Ümmünü tauugaara iini ka niisö ma tümmü kadu, kudumma iini kada 'Bii'bala ma Tadü'dü.

<sup>28</sup> "Aaga fa tadhere ka tumma tanno, uru kinggide kassa ka öö'dö a kadu no ka naala ma oofa no kassa ka föonyö tumma niini nye'd'de kungno,

<sup>29</sup> a kadu na kalinggo eema ya a'diila ya, kafiki'dö ndama inde kaco ka tefe ka 'dö, a kadu na linggo tatoroko no kafiki'dö ndama inde kaco ka hetti.

<sup>30</sup> Taalo a'a nara tambaanya tüüni nüümö ndama eyi tiya eede, a'a nüünü afa meede ka aföonyö ya, tahükümü neede ka dhorro taalo üümö ada kadu ku'bu, kudumma eede taalo nasaasa nüümö ma eyi tiya eede, lakiini tasaasa ma eyi tiya ömö'dö tiya agürünü a'a ya.

### Teema tumma ma Yasu

<sup>31</sup> "Eede ka tageema tumma ma eyi tiya eede, ara tumma neede tagotoroko.

<sup>32</sup> Ömö'dö öccö inggide eema tumma ka üüdü ma a'a, nussu a'a a'da tumma niini ka teema ma a'a no ka dhorro.

<sup>33</sup> "Kagürünü aaga kadu ka Yühanna, adagadünnü tumma na dhorro no.

<sup>34</sup> Taalo a'a namma ka tumma tanno kadu, lakiini a'a neema tumma no ada amang kada toolonadene.

<sup>35</sup> Yühanna aga lamba tammo afinne ma öyeene mo, aaga tasaasa tadhodho a töyene tanno iini ana ndanaaya ka unggodho.

<sup>36</sup> "Tumma ma a'a kadhabbu a tanno Yühanna. Kudumma linggo tanno Pupa ka tanangngä a'a a'da natüümö no, eege kungno eede ka talingga eema a'da Pupa agagürünü a'a.

<sup>37</sup> A Pupa ya agürünü a'a ya ka eyi tiya iini, ageema tumma ma a'a. Taalo aaga kaföonyö 'bugeyi yiini alla aaga tadönö ka oona tanno iini,

<sup>38</sup> a tumma niini titaalo ada ka nanggeedi, kudumma ada ka titaalo kamma ka ömö'dö tiya iini ka agürünü ya.

<sup>39</sup> Aaga tüüri kasorne kudumma ada katiki kide a'da tefe ka 'dö ta'billi kinggide, lakiini eege kungno keema tumma ma a'a,

<sup>40</sup> lakiini aaga taalo kasaasa tö'dö kede amang kada taluna tefe ka 'dö.

<sup>41</sup> "Taalo a'a narangnga tafününja ko'do ka kadu,

<sup>42</sup> kudumma eede ka tussu aaga. Nussu a'da tasaasa ma Masala kitaalo ada ka nanggeedi.

<sup>43</sup> Nö'dö a'a ana eere ma Pupa tiya eede, aaga taalo kamma kede, lakiini ka ömö'dö tököönö ka tö'dö ana eere tiya iini ya, ara aaga tamma kini.

<sup>44</sup> Ara aaga tamma nya ada ka tafünügü njaana ko'do unggodho aaga, lakiini taalo aaga kasaasa takardha ku'bu aaga taluna tafününja ko'do na ö'dö ndama Masala tammo unggodho mo?

<sup>45</sup> "Aaga fa tiki kide a'da ara a'a tasigi aaga kidha ma Pupa. Ömö'dö ya ara tasigi aaga ya inggide, Müüsä yaada ka taküki iyye iini ko'do ya a'da i'i ara tasigi aaga.

<sup>46</sup> Kada ka tagamma ka Müüsä ya, ara aaga tagamma kede, kudumma iini ka tarigiri ada ka sorne ma a'a.

<sup>47</sup> Lakiini kada katitalo kamma ka tumma tanno iini ka tarigiri no 'dee, ara aaga tamma ka tumma tanno eede nya?"

## 6

*Yasu anangnga kuri a kadu na alif ka iidümmü*

*(Matta 14.13-21; Murkus 6.30-44; Lüüka 9.10-17)*

<sup>1</sup> Ndama kanna a Yasu tadigaala ka to ma Jaliil (mana eere a'da to ma Tabariya mo),

<sup>2</sup> a kadu turna i'i keere kadhabbu, kudumma eene ka tadinö ka türü tanno iini ka tüünö oolona kadu na maara no.

<sup>3</sup> A Yasu tasirö 'ba'dakinya, emmi i'i nya kadalaadene tanno iini.

<sup>4</sup> A uuru ma Taanyara ma Tada'da ka Erriidö ma Yahüdü kanda kete.

<sup>5</sup> İkiri Yasu ka laga iyye ko'do asala kadu ka tunggunu kini kadhabbu, ikiri ka tiki a Filibüs, "Ara angnga tana kuri kiga ma tanangnga a kadu tanno kaguri?"

<sup>6</sup> I'i atiraana nggege ma ta'b'ba Filibüs ka eedi, a'da illi ka tussu nüümö yiini ka talingo ya.

<sup>7</sup> İkiri Filibüs ka tiki iini, "Kaja ka tana miteene ana miya jine keera\* taalo mara ta'dimo ka ömö'di unggodho ara taluna 'bandamiteene idhilli."

<sup>8</sup> A tatalaadene yiini öccö ya ana eere a'da Andraws örre ya Samaan Bütrüs tiki iini,

<sup>9</sup> "Bii'bala ungngo kita a miteene ma sayeer ma ungngo iini müidümmü a kilögöö keera, illi eege taalo kara ta'dimo ka kadu tanno in'dili no?"

<sup>10</sup> İkiri Yasu ka tiki eene a'da, "Aaga nangnga kadu ka temmi." A 'buugu ya miini ya ooyo inggide dhabbu a kadu temmi kide a kadu na nagiide no kö'dö na alif kiidümmü.

<sup>11</sup> İkiri Yasu ka tadhifi namiteene anangnga ta'dila a Masala adakinaana ka kadu ku'bu tamana ya ma ta'dimo kene ya a tagalinggo a kilögöö tanno eera no nggege.

<sup>12</sup> A kene ka ndüüsü ya, ikiri ka tiki a kadalaadene tanno iini, "Aaga wagaana türeene miini koona öccö tafa taama."

<sup>13</sup> Kadagawaana türeene ma miteene ma sayeer müidümmü ma kadu ka taguri, kadigi nasinggili kada'baaga kafünö eera.

<sup>14</sup> Aga kadu katassa ka türü tanno Yasu ka tagalinggo no kiki a'da, "Tumma dhorro, ne'bi ya ara tö'dö ka 'büdhülü ya i'i yungngo."

<sup>15</sup> A Yasu tussu a'da eege ka asaasa tümmü i'i kanangnga i'i ka tauugaara a rüüsü, ikiri ka taculu unggodho i'i asirö anya.

#### *Yasu unggene ka 'büdi'*

(Matta 14.22-27; Murkus 6.45-52)

<sup>16</sup> Ka 'buugu kanda siiya, a kadalaadene niini ta'barda ka to ma Jaliil,

<sup>17</sup> kaka ka mürkabü kadigaala ma co Kafarnahööm a 'buugu tooso a'da taalo Yasu ala eege koona.

<sup>18</sup> İkiri tanya ka tüsö dhindho a to co kamuli muli.

<sup>19</sup> Kene ka ndarmuna 'buugu tamana ma nameele kiidoona alla ka egisö kasala Yasu ka tunggeene ka 'büdi unggunu ka mürkabü ari'ba tümmü eege.

<sup>20</sup> İkiri ka tiki eene, "A'a namiini aaga fa tari'ba."

<sup>21</sup> Kikiri ka asaasa tamünüğü i'i ka mürkabü, a mürkabü tarooro ka ala 'buugu yeene ka tunggunu co ya.

<sup>22</sup> Aga taka kandaadha a kadu na kanna ka nda'da ma to no, kussu tumma mürkabü ka taganna kide ma unggodho, a Yasu taalo aka kide nya kadalaadene tanno iini, lakiini kunggeene unggodho eege.

<sup>23</sup> Lakiini namürkabü könö kö'dö ndama Tabariya köödhi ka tinggini ma to kita eene ka tagu miteene kide, ka Yasu ka tanangnga ta'dila a Masala kide ya.

<sup>24</sup> A kadu kandussu a'da Yasu taalo kanna alla kadalaadene niini kikiri ka taka ka namürkabü kaco tawwa 'buugu ma Yasu ka Kafarnahööm.

#### *Yasu a miteene ma tefe ka 'di'*

<sup>25</sup> Kene kaduna i'i ka nda'da ma to kiki iini, "Ka Tatalaana, nö'dö o'o kita aada?"

<sup>26</sup> A Yasu tapadaga tumma eene iki, "Ara a'a tadırina tumma aaga dhorro, taalo aaga Kawwa 'buugu ma a'a kudumma ada katadinö ka eema tiya eede ka tagalinggo keefe ya, lakiini kudumma ada ka tagu miteene aaga tüüsü.

<sup>27</sup> Aaga fa talingga a kuri tiya ara titaalo ya, lakiini a kuri tiya ara tüütü ka tefe ka 'di' ta'billi ya, ya 'Bii'bala ma Tadü'dü kära tanangnga aaga. Kudumma Masala ma Pupa mo mabünnü hitimi yoono kini ka oona ussudene."

<sup>28</sup> Kiki iini, "Ara ungngo talingga eema ya Masala ka asaasa ya nya?"

<sup>29</sup> A Yasu tapadaga tumma eene, "Lingga na Masala eege kungngo ömö'di ya Masala ka agürünö i'i ya, i'i yungngo Masala ka asaasa aaga tamma kini."

<sup>30</sup> Kikiri ka tindini i'i, "La türü ungngo amang kidi tassa kide ungngo tamma küdü. Ara o'o talingga minna?

<sup>31</sup> Kafaafa ma angnga kagu alman ka dhüle afa ma tiya sorne ka tiki ya kungngo, 'Ti anangnga miteene eene ndama 'dotombo'do kadaguri.'"

<sup>32</sup> A Yasu tiki eene, "Ara a'a tadırina tumma aaga dhorro, taalo Müüsa i'i yungngo amana miteene aaga ndama 'dotombo'do. Pupa yeede unggodho i'i yungngo amana miteene ma dhorro mo aaga ndama 'dotombo'do.

<sup>33</sup> Miteene ma Masala oogo mö'dö ku'bu ndama 'dotombo'do manangnga tefe ka 'di a kadu ma 'büdhülü.'

\* 6:7 6.7 Jine ya miini ya i'i ya ma linggo ma uuru unggodho.

<sup>34</sup> Kiki iini, "Tatalaana, amana miteene miini mo ungngo 'büccä kungngo."

<sup>35</sup> İkirí Yasu ka tiki eene, "A'a nungngo na miteene ma tefe ka 'dī, ömö'dī ya tö'dō kede ya taalo iire tagu i'i, aya tamma kede ya taalo tenege ka tagu i'i turi.

<sup>36</sup> Lakiini afa meede ka takiki aaga, kadinö aaga kede aaga sa kitaalo kamma.

<sup>37</sup> Ömö'dī ya Pupa ka tümmän i'i a'a ya amma kede, ömö'dī ya ö'dö kede ya taalo a'a nara tapadaga i'i ku'bu.

<sup>38</sup> Kudumma eede taalo nö'dö ku'bu ndama 'dotombo'do ma tö'dö talinggo linggo ma eyi tiya eede, lakiini a'a nö'dö talinggo linggo na ömö'dī tiya agürünü a'a ya.

<sup>39</sup> A niimö ya ömö'dī tiya agürünü a'a iini ya a'da natafa ka kadu tanno oono ka anangnga a'a no kaama, lakiini niji egee ka inde nye'd'de kungngo ka uuru ma tafiki'dö ka uuru na eere no.

<sup>40</sup> A tumma na Pupa tiya eede ka asasa no eege kamiini, ömö'dī ya tasala ka 'Bii'bala amma kini ya ataluna tefe ka 'dī ta'billi ara a'a ta'dina i'i ko'do ka uuru tanno eere no."

<sup>41</sup> A Yahüdü ta'digineene kudumma Yasu ka tiki a'da, "A'a na miteene tammo ö'dö ku'bu ndama 'dotombo'do mo."

<sup>42</sup> Kiki, "Taalo Yasu ya 'bii'bala tiya Yüüsif sa? Assa tiki 'bitüngnö a'da i'i öö'dö ndama 'dotombo'do nya?"

<sup>43</sup> A Yasu tiki eene, "Aaga fa tisaana ka oona unggodho aaga.

<sup>44</sup> Taalo ömö'dī a tö'dö kede illi Pupa ya kürünü a'a ya, ka tuurugu i'i a'a, nanangnga i'i ka fiki'dö ka uuru tanno eere no.

<sup>45</sup> Ikirinja ka sorne ma nagane'bı, 'A'da ara Masala talaana eege nye'd'de.' Ömö'dī ya föönyö tumma na Pupa ussu iini ya ö'dö kede.

<sup>46</sup> Taalo ömö'dī öccö adinö ka Pupa, illi ömö'dī ya ö'dö ndama Masala ya i'i yungngo adinö ka Pupa.

<sup>47</sup> Ara a'a tadırına tumma aaga dhorro, ömö'dī ya amma kede ya a taluna tefe ka 'dī ta'billi.

<sup>48</sup> A'a na miteene ma tefe ka 'dī.

<sup>49</sup> Kafaafa ma aaga kagu alman ka dhüile kaaya.

<sup>50</sup> Lakiini ömö'dī ya agu miteene ma ö'dö ku'bu ndama 'dotombo'do mo, taalo ara teyi.

<sup>51</sup> A'a nungngo na miteene ma tefe ka 'dī ma öö'dö ku'bu ndama 'dotombo'do mo. Ömö'dī ya tagu miteene mo ya eefe ka 'dī ta'billi. A miteene meede ka tanangnga iini mo, tuu'da neede eege kamiini, neede ka

öö'dö iini ma kadu ma 'büdhülü keefe ka 'dī iini."

<sup>52</sup> A Yahüdü tisaana ka oona unggodho eege dhindho kiki, "Ara ömö'dī ya tanangnga tuu'da niini angnga taguri nya?"

<sup>53</sup> İkirí Yasu ka tiki eene, "Ara a'a tadirina tumma aaga dhorro, kada katitaalo kagu tuu'da na 'Bii'bala ma Tadü'd'dü aaga tooye eriidö yiini ya, taalo aaga kataluna tefe ka 'dī.

<sup>54</sup> Lakiini ömö'dī ya agu tuu'da neede adakooye eriidö yeede ya ara tefe ka 'dī ta'billi, ara a'a tiji i'i ka inde ka uuru na eere no.

<sup>55</sup> Tuu'da neede eege kungngo kuri tiya dhorro ya, eriidö yeede i'i yungngo ama tooyedene dhorro.

<sup>56</sup> Ömö'dī ya agu tuu'da neede adakooye eriidö yeede ya amma'da kede a'a tamma'da kini.

<sup>57</sup> Afa ma Pupa tiya efe ka 'dī ya ka kürünü a'a na a'a tefe ka 'dī kudumma Pupa, ömö'dī ya agu a'a ya, ara tefe ka 'dī kudumma a'a.

<sup>58</sup> Miteene ma öö'dö ku'bu ndama 'dotombo'do mo oogo mungngo. Kafaafa ma aaga kagu alman kaaya, lakiini ömö'dī ya agu miteene mo ara tefe ka 'dī ta'billi."

<sup>59</sup> Yasu adiri tumma no kini ka tagalaana kadu ka la ma talaana ka Kafarnahööm.

#### *Tumma ma tefe ka 'dī ta'billi*

<sup>60</sup> A kadalaadene niini kadhabbu kaföönyö tumma no kiki, "Kiideene tumma no 'do, mada i'i yungngo a tambaanya tatoodo ka tumma tanno?"

<sup>61</sup> A Yasu tussu a'da kadalaadene niini keemaana ka oona ikirí ka tiki eene, "Kiideene tumma no ana aaga?

<sup>62</sup> Ara tafaanya ada ka tiji 'Bii'bala ma Tadü'd'dü ka tasirigö co a 'buugu tiya iini ka öö'dö ndama iini ka dhidha ya?

<sup>63</sup> Koronggore ya Masala i'i yungngo amana tefe ka 'dī a kadu illi tuu'da taalo ka talinggo niimö, tumma neede ka tirina aaga no Koronggore i'i ya miini nja tefe ka 'dī.

<sup>64</sup> Lakiini kadu könö kungngo ada ka söödö taalo kamma." Yasu iki nggeege kudumma iini ka tagilli ka tagussu ka dhidha a'da kadu kinggide taalo kamma kini, ussu a'da mada i'i yungngo atümmän i'i a kadu ngo.

<sup>65</sup> İkirí ka tiki, "I'i yungngo eede ka tiki aaga a'da taalo ömö'dī ma tö'dö kede illi a türü tanno Pupa tiya eede."

<sup>66</sup> Ndama uuru tanno miini no a kadalaadene niini kadhabbu kapadaga oona keere taalo kunggeene nja iini.

<sup>67</sup> İkiri Yasu ka tiki a kadalaadene tanno iini na ö'dö kada'baaga kafünü eera no, "Aaga tekere taalo aaga kasaasa tunggeene?"

<sup>68</sup> İkiri Samaan Bütrüs ka tiki iini, "Ka Uugaara, ara ungngo co ka mada a'da tumma ma tefe ka 'dö ta'billi kungngo üüdü?

<sup>69</sup> Kamma ungngo katussu a'da o'o na ömö'dö ma Masala ya Insili ya."

<sup>70</sup> İkiri Yasu ka tiki eene, "Taalo a'a nungngo naigesse aaga na ada'baaga kafünü eera no? Lakiini ömö'dö unggodho ana kada, Eblisi."

<sup>71</sup> (I'i eemaga ka Yahüusa 'bii'bala ya Samaan Askaryüütü ko'do, kudumma iini i'i yungngo ara atümmünü i'i a kadu a'da i'i ka eyi tiya iini ama kadalaadene tanno ö'dö kada'baaga kafünü eera no.)

## 7

### *Yasu nya nagöre tanno iini*

<sup>1</sup> Ndama tiya miini ya a Yasu takung-gunaana ku'bu ka Jaliil, i'i taalo asaasa tunggeene ka Yahüüdiya, kudumma Yahüüdü kasaasa tiidi i'i.

<sup>2</sup> Ka uuru ma Taanyara ma nagangga ma Yahüüdü ka ndakete ya,

<sup>3</sup> İkiri nagöre niini ka tiki iini, "Unggeene kita naco Yahüüdiya amang ka kadalaadene tanno üüdü tadönö ka eema tiya üüdü ka talinggo ya.

<sup>4</sup> Taalo ömö'dö ma talinggo niümö ka küdhü assa ka asaasa kadu ka tussu i'i. Üürü o'o nalinggo eema ya, la eyi yüüdü a kadu in'dili."

<sup>5</sup> Nagöre niini ka eyi tiya eene taalo kagamma kini.

<sup>6</sup> İkiri Yasu ka tiki eene, "Küfürü uuru neede tö'dö, lakiini aaga ya, naganuuru na in'dili no naada eege kamiini.

<sup>7</sup> Taalo kadu ma 'büdhülü kakirimi aaga, lakiini eege kakirimi a'a kudumma eede ka teema ka tatoroko tanno eene.

<sup>8</sup> Agolo ka taanyara, taalo a'a nara co ka taanyara tanno, kudumma uuru tanno eede küfürü tö'dö."

<sup>9</sup> Iki eene nggege ara ka tüü ka Jaliil.

<sup>10</sup> Aga nagöre tanno iini ka tunggeene ka co ka taanyara ya, ikiri ka taculu aaco eene keere taalo 'biini.

<sup>11</sup> A Yahüüdü tagawwa 'buugu miini ka taanyara kindini ajeene kiki a'da, "Inggiga sii?"

<sup>12</sup> A kadu takayaaya ajeene kini ko'do, a könö tiki, "I'i ömö'dö a'diila." Anno tiki, "Kaw i'i aga'da kadu ka nanggüüdü üüsini eege."

<sup>13</sup> Taalo ömö'dö ma teema tumma miini 'biini kungngo kudumma eene kari'ba a naguugaara ma Yahüüdü.

*Yasu alaana kadu ka uuru ma taanyara*

<sup>14</sup> Aga taanyara ka ndadhidhi miini ya, ikiri Yasu ka tunggeene aaco la ma Masala alaana kadu.

<sup>15</sup> A Yahüüdü tadhere kiki, "Ussu tumma ka kasorne nya a'da taalo akalaanadene?"

<sup>16</sup> İkiri Yasu ka tiki eene, "Talaana neede taalo ndama a'a lakiini ndama ömö'dö tiya agürünü a'a ya.

<sup>17</sup> Ömö'dö ya asaasa talinggo tumma na Masala ya, ara tussu a'da talaana neede no kö'dö ndama Masala alla a'a neema ndama eyi tiya eede.

<sup>18</sup> Ömö'dö ya eema tumma ma eyi tiya iini ya, i'i ya asaasa tümmü eyi yiini ka tidihindhi, lakiini ömö'dö ya ümmü ömö'dö ya agürünü i'i ka tidihindhi ya, i'i adünnü tumma timin'da taalo korokoro kide.

<sup>19</sup> Taalo Müüsa i'i yungngo anangna seriye aaga? Lakiini taalo ömö'dö unggodho ana kada ümmü seriye. Minna agu aaga aaga tasaasa tiidi a'a?"

<sup>20</sup> A kadu nye'd'de tiki iini, "Na'bu ungno üüdü ka oona. Mada asaasa tiidi o'o 'bitingngö?"

<sup>21</sup> İkiri Yasu ka tiki eene, "Nagalinggo a'a türü ka unggodho, aaga tadhere nye'd'de kungngo.

<sup>22</sup> Müüsa iki aaga a'da aaga taradene, a'da taalo taradene na Müüsa eege kamiini, lakiini kö'dö ndama kafaafa, aaga tara 'bii'bala ka uuru ma Sa'bidi.

<sup>23</sup> A kada kara tara laala ka uuru ma Sa'bidi amang kada tafa taga'da tumma na Müüsa, minna agu aaga aaga tagoroo'bo nja a'a a'da a'a noolona ömö'dö ka uuru ma Sa'bidi nya?

<sup>24</sup> Aaga fa tümmü niümö ndama kürö miini aaga tümmü niümö ndama teene miini ya adho ka fiini ya."

*Yasu 'dee i'i ya Almasiïhi?*

<sup>25</sup> A kadu ma Örsaliim könö tiki, "Taalo ömö'dö ya kadu kasaasa tiidi i'i ya i'i yungngo?"

<sup>26</sup> Aaga assa kini ka teema ka kadu kidha 'biini kungngo kitaalo kindini i'i. Alla naguugaara kandussu dhorro a'da Almasiïhi i'i ya miini?

<sup>27</sup> Lakiini kussu ungngo kita ömö'dö tiya ka öö'dö ndama iini kita ya, lakiini Almasiïhi kara tö'dö ya taalo ömö'dö ma tussu a'da öö'dö ndama kiga?"

<sup>28</sup> İkiri Yasu ka alneege ko'd'do kini ka talaana kadu ka la ma Masala iki, "Kussu aaga a'a aaga tussu a'da nö'dö a'a ndama kiga, taalo a'a nö'dö ndama eyi tiya

eede, lakiini ömö'dü ya agürünü a'a ya i'i yungngo adhorro. Aaga taalo kussu i'i,

<sup>29</sup> illi a'a nussu i'i kudumma eede ka öö'dö ndama iini, i'i yungngo agürünü a'a."

<sup>30</sup> Kikirï ka asaasa tümmü i'i, illi ömö'dü ma tümmünü niisö iini ka oona itaalo, kudumma uuru tanno iini ka üfürü tö'dö.

<sup>31</sup> Illi kadu kungngo kaköje ka teene kadhabbu kamma kini kiki, "Almasiihi ka tö'dö 'dee ara talingga eema kadhabbu keefe ii'bi ömö'dü ya?"

<sup>32</sup> İkiri naFariisi ka föonyö a kadu kayaaya ajeene ka Yasu ko'do ma eema tiya. İkiri naguugaara ma ka'boge nja naFariisi kagürünü nasigira ma la ma Masala ma co tümmü i'i.

<sup>33</sup> İkiri Yasu ka tiki eene, "Ara a'a tagünü nja aaga idhilli, na a'a saga tunggeene naco ka ömö'dü tiya agürünü a'a ya.

<sup>34</sup> Ara aaga sa katawwa 'buugu ma a'a aaga taalo ka taluna a'a koonaa, a 'buugu yeede kara co ya, taalo aaga katambaanya tö'dö kide."

<sup>35</sup> İkiri Yahüdü ka teemaana ka oona unggodho eege, "Ömö'dü ya asaasa co kiga angnga taalo kara taluna i'i? Ara co 'buugu tiya kadu tanno aja kadanna kide kasana njaaana ku'bu ka kadu ma Yünan ka teene alaana kadu ma Yünan?

<sup>36</sup> Minna iini ka teema a'da, 'Ara aaga tawwa a'a taalo aaga ka taluna a'a, a 'buugu yeede ka co ya taalo aaga katambaanya tö'dö kide?'

<sup>37</sup> Ka uuru ma taanyara tanno eere no na idhindhi no, ikiri Yasu ka fiki'dö alneegi ko'do iki, "Ömö'dü ya tenege kagu i'i ya öö'dö kede ooye.

<sup>38</sup> Ömö'dü ya amma kede ya afa ma Sorne ka tiki, 'Ara nduguli ma 'biidü ma tefe ka 'di tiisö kini ka eedi.'

<sup>39</sup> Nggege i'i eema tumma ma Koronggore ma kadu tanno amma kini kara sa köö'dö tamma, kudumma uuru tanno miini no taalo Koronggore aganajja eene, kudumma iini ka üfürü taga'duga tüdhindhi.

<sup>40</sup> Ka taföönyö tumma niini, a kadu könö kiki, "Ömö'dü ya i'i ya ne'bi dhorro."

<sup>41</sup> A kadu könö tiki a'da, "I'i ya Almasi-ihî."

A könö tüttü ka tindineene, "Ara Almasi-ihî tö'dö ndama Jaliil nya?

<sup>42</sup> Taalo Sorne iki a'da Almasiihi ara tö'dö ndama laala tiya Dawud, ndama Beetlaham anya ma Dawud?"

<sup>43</sup> A kadu tasümünü njaaana ku'bu kudumma Yasu.

<sup>44</sup> A kadu könö tasaasa tümmü i'i, illi ömö'dü ma taada i'i ka oona kungngo taalo.

*Naguugaara ma Yahüdü taalo kamma ka Yasu*

<sup>45</sup> A nasigira ma la ma Masala tapadaga ka naguugaara ma ka'boge nja naFariisi, a kadu na miini no tiki eene, "Minna agu aaga taalo kö'dö ana i'i?"

<sup>46</sup> İkiri nasigira ka tapadaga tumma eene kiki, "Taalo ömö'dü ma tageema tumma afa ma tanno jiddi ma 'billi."

<sup>47</sup> İkiri naFariisi ka tiki eene, "İisini aaga afe'de?

<sup>48</sup> Taalo ömö'dü inggide unggodho ana ka naguugaara nja naFariisi amma kini?

<sup>49</sup> Lakiini kadu na in'dili no taalo kussu seriye ya Müüsa ka öö'dö iini, eege kungngo linggi kagu eege."

<sup>50</sup> İkiri Niködimus ya ta'ba ma naFariisi ya, agöö'dö ka Yasu ka dhidha ya ka tindini eege,

<sup>51</sup> "Serîye yaaja 'dee ümmü ömö'dü a'da taalo ageema tumma, angnga taföönyö angnga tussu niimö yiini ka tagalinggo ya?"

<sup>52</sup> Kiki iini, "O'o no ma Jaliil afe'de sa? İri ka sorne, taalo aaga ka taluna ne'bi ma tö'dö ndama Jaliil."

<sup>53</sup> [A kadu tükirï ka tunggeene ka unggondho kaco nøö'dü tanno eene.

## 8

*Aka ma temelö mo*

<sup>1</sup> Lakiini Yasu unggenee aco Anya ma 'Dikidiyö.

<sup>2</sup> Afada ligitaka so'do kungngo öö'dö ka la ma Masala, ikiri kadu ka öö'dö kini nye'de kungngo emmi alaana eege.

<sup>3</sup> İkiri naFariisi nja katalaana ma serîye köö'dö ana aka a kadu katümmü oogo ka afüngngö nja ömö'dü, kanangnga oogo ka 'dingnge kene kidha,

<sup>4</sup> kikirï ka tiki iini, "Ka tatalaana, aka mo mümmü adene ka füngngö nja ömö'dü.

<sup>5</sup> A Müüsa iki ka serîye tiya iini a'da, aka ma fa tammo, maridene a nügisi. A 'bitingngö nikî o'o nya?"

<sup>6</sup> Eege kadiri tumma no meene kasaasa tawwa i'i ka eyi, amang kene tasigi i'i. Illi Yasu iti ku'bu arigiri ka 'büdhülü a 'banüsö.

<sup>7</sup> Kene kandakogoona ma tindini i'i 'do ya, ikiri ka fiki'dö iki eene, "Ömö'dü ya üfürü tagüünü tatoroko ya a'duga müsi iiri oogo iini ka dhidha."

<sup>8</sup> Afada iti ku'bu arigiri ada ka 'büdhülü.

<sup>9</sup> A kene kandaföönyö tumma no ya, a modolo tümmü eege karooro katanculu ka unggondho kunggeene na iifi no ka dhidha, anno idhiidhi no turna eege keere

a Yasu tüü unggodho i'i aka tüü ka 'dïngnge ana ko'do ka 'buugu tiya oono.

<sup>10</sup> İkiri Yasu ka ta'diniga oona ko'do iki oono, "Ka aka, kadu na ö'dö ana o'o no kiiye? Taalo ömö'di ma tümmü o'o ana kene?"

<sup>11</sup> Miki, "Kaw, taalo ömö'di Uugaara."

İkiri Yasu ka tiki oono, "A'a tekere taalo a'a natüüni nüümö ana o'o, unggeene nafa co tüün tatoroko no afe'de."]

*Yasu i'i ya töyeene ma 'büdhüllü*

<sup>12</sup> A Yasu tageema nja eene afe'de iki, "A'a nungngo na töyeene ma 'büdhüllü. Ömö'di ya uurna a'a keere ya, taalo atungeene ka ndüüli a taneene a töyeene ma tefe ka 'dï koonaa."

<sup>13</sup> İkiri naFariisi ka tiki iini, "Neema o'o tumma ma eyi tiya üüdü, taalo tumma nüüdü ka dhorro."

<sup>14</sup> A Yasu tiki eene, "Üürü a'a neema a'a tumma ma eyi tiya eede, tumma neede ka tatimin'da, kudumma eede nussu a'a a'da a'a no'dö ndama kiga, nussu 'buugu yeede kara co ya. Lakiini aaga taalo kussu kita eede köö'dö ndama iini ya, aaga titaaloo kussu 'buugu yeede kara co ya.

<sup>15</sup> Kiiři aaga tuu'da ma ömö'di ndama kürö ün'dügüngö illi a'a taalo nalinggo nggeene ana egee.

<sup>16</sup> Kede ka tümmü kadu ya, ara tümmü aden neede ta timin'da, kudumma eede taalo a'a nalinggo unggodho a'a, lakiini a'a na'dïngnge nja Pupa tiya agürünü a'a ya.

<sup>17</sup> Katarigirinja ka Seriye tiya ada, kadu keera ka tadinö ka nüümö a tatimin'da.

<sup>18</sup> A'a nungngo neema tumma ma eyi tiya eede, a Pupa yeede ya agürünü a'a ya, i'i ussu tumma neede afe'de."

<sup>19</sup> Kikiri ka tiki iini, "Pupa yüüdü i'i iyye?"

A Yasu tiki eene, "Taalo aaga kussu a'a alla aaga taalo kussu Pupa yeede. Kada kadussu a'a ara aaga tagussu Pupa yeede afe'de."

<sup>20</sup> Yasu adiri tumma no a'da unggongo akete ka 'buugu ma tonso gürüüsü ka la ma Masala iini ka talaana kadu. Taalo ömö'di ma tümmü i'i kudumma uuru tanno iini ka üfürü tö'dö.

*Yasu eema nja Yahüüdü*

<sup>21</sup> İkiri Yasu ka tiki eene afe'de, "Ara a'a tunggeene, aaga sa katawwa 'buugu ma a'a, aaga taaya ka tatoroko tanno ada. A 'buugu yeede kara co ya taalo aaga ka tamaanya tö'dö kide."

<sup>22</sup> İkiri Yahüüdü ka tiki, "I'i a tiidi eyi iyyi? Kudumma iini ka tiki, 'Kita eede ka co taalo aaga ka tamaanya tö'dö kide?'"

<sup>23</sup> Iki eene, "Aaga kama ta'buugu kita, lakiini a'a no'dö ndama fiïni ma ndanaaya aaga kama 'büdhüllü tiya, a'a taalo nama 'büdhüllü tiya.

<sup>24</sup> I'i yungngo eede ka tiki aaga a'da, ara aaga taaya ka tatoroko tanno ada, kada katitaalo kamma kede a'da a'a namiini."

<sup>25</sup> Kikiri ka tiki iini, "O'o na mada?"

A Yasu tiki, "Nagadirina a'a aaga ka dhidha.

<sup>26</sup> Tumma kungngo eede kadhabbu eede ka teema napusu aaga iini. Lakiini ömö'di ya agürünü a'a ya tumma niimi ka timin'da, a nüümö yeede ka taföönyö kini ya nadirina a kadu."

<sup>27</sup> Kitaalo kussu a'da Yasu eema tumma ma Pupa tiya iini.

<sup>28</sup> İkiri ka tiki eene, "Kada ka ta'diniga 'Bii'bala ma Tadü'dü coo'do, ara aaga sa ka tessu a'da a'a namiini, taalo a'a nalinggo nüümö ma eyi tiya eede nitaalo natiraana a'da taalo Pupa akalaana a'a.

<sup>29</sup> A Pupa ya agürünü a'a ya aneene nja a'a taalo afa kede unggodho a'a, kudumma eede ka talingga eema yiini ka asasa ya."

<sup>30</sup> Kini ka tiringa tumma no ya, a kadu tamma kini kadhabbu.

### *Laalo ya Abrahiim*

<sup>31</sup> İkiri Yasu ka tiki a Yahüüdü tanno amma kini no, "Üürü aaga ka tüü ka talaana tanno eede ya, ara aaga ta kadaladene tanno eede dhorro.

<sup>32</sup> Aaga tessu tumma na dhorro no a tumma na dhorro no toolona aaga."

<sup>33</sup> Kiki iini, "Ungngo ka kadaada ma Abrahiim, unggno taalo ka kasaga tanno ömö'di töccö, o'o sa ka tiki unggno a'da ara unggno sa kada kadu tanno dhorro no nya?"

<sup>34</sup> İkiri Yasu ka tiki eene, "Tumma dhorro eede ka tadirina aaga, ömö'di ya üün tatoroko ya, ara tadasaga ma eema tiya toroko ya.

<sup>35</sup> A tasaga taalo ara tanna ka 'dï turi nja kadu miini, lakiini 'bii'bala i'i yungngo a tanna ka 'dï ta'billi.

<sup>36</sup> Aga 'Bii'bala ka toolona aaga ka tadasaga ya, ara aaga toolonadene ka tadasaga ma timin'da.

<sup>37</sup> Nussu a'a a'da aaga ka kadaada ma Abrahiim. Lakiini aaga kasaasa tiidi a'a kudumma tumma tanno eede kitaalo ada ka nanggeedi.

<sup>38</sup> A'a neema tumma neede ka tadinö kide kidha ma Pupa tiya eede ya, aaga talingga eema yaada ka taföönyö ka pupa tiya ada ya."

<sup>39</sup> Kiki iini, "Pupa yiïdi a'da Abrahiim."

İkiri Yasu ka tiki eene, "Kada ka talaala tyia Abrahiim ya, ara aaga tagalinggo eema ya Abrahiim ka tagalinggo ya.

<sup>40</sup> Lakiini aaga 'bitingngö kasaasa aaga tidi a'a, a'a nungngo nadünögü tumma na dhorro no aaga afa ma tanno eede ka taföönyö ka Masala no. Abrahiim ka eyi tiya iini taalo agalinggo linggo no.

<sup>41</sup> Kalinggo aaga eema ya pupa tiya ada."

Kiki iini, "Taalo ungngo ka laala ma nyoro, Pupa ungngo iidi unggodho i'i ya Masala."

<sup>42</sup> İkiri Yasu ka tiki eene, "Üürü Pupa yaada a'da Masala ya ara aaga tasaasa a'a, kudumma eede ka öö'dö ndama Masala nöö'dö kada, taalo a'a nöö'dö ma eyi tiya eede, lakiini Masala magürünü a'a.

<sup>43</sup> Minna agu aaga taalo aaga kussu tumma neede ka teemaga co aaga no? Kudumma ada katitaalo ka asaasa tatoodo ka tumma tanno eede.

<sup>44</sup> Aaga ka laala tiya pupa tiya ada Ebliisi, aaga tasaasa tourna tumma na pupa tiya ada keere. I'i ya tatagirina kadu ka dhidha, taalo ümmü a tumma na dhorro no katitaalo kini. I'i ya korokoro, i'i ka eyi tiya iini akorokoro 'do, kudumma iini ya korokoro ada pupa tiya kadu tanno korokoro no.

<sup>45</sup> Aaga taalo kamma kede kudumma eede ka teema tumma ma timin'da na dhorro no.

<sup>46</sup> Mada ana kada ka tümmü a'a ka linggo tanno toroko no? Üürü a'a neema a'a tumma ma timin'da a minna agu aaga taalo kamma kede?

<sup>47</sup> Ömö'di ya ö'dö ndama Masala ya, ara taföönyö tumma na Masala ka teema no. Niimö ya anangnga aaga ka titaaloo kaföönyö ya kudumma aaga taalo ka kadu tanno Masala."

### *Yasu nja Abrahiim*

<sup>48</sup> İkiri Yahüüdü ka tiki, "Taalo ungngo kadiri tumma dhorro kidi ka tiki a'da o'o no taga Samira, na'bu ungngo üüdü ka oona?"

<sup>49</sup> A Yasu tiki eene, "Taalo na'bu eede ka üüdü illi a'a nindögü Pupa yeede ko'do illi aaga kamidhi a'a.

<sup>50</sup> Taalo a'a nindögü eyi yeede ko'do, lakiini ömö'di inggide asaasa, i'i yungngo atümmü kadu.

<sup>51</sup> Ara a'a tadirina tumma dhorro, ömö'di ya alinggo a tumma tanno eede no, taalo a tassa ka inde koona."

<sup>52</sup> İkiri Yahüüdü ka tiki iini, "Asa ungngo tamma 'bitingngö a'da na'bu ungngo üüdü ka üüdü, eyi Abrahiim a nagane'bi taaya, na o'o sa ka tiki a'da ömö'di ya ümmü tumma nüüdü ya taalo ara tassa ka inde ta'billi.

<sup>53</sup> O'o nagii'bi pupa yüüdi Abrahiim, ya eyi ya nja nagane'bi tanno aaya no? Nümmü o'o eyi yüüdü kada minna 'do?"

<sup>54</sup> İkiri Yasu ka tiki eene, "Kede ka tündögü eyi yeede ko'do ya, taalo ara ta'diila, Pupa yeede i'i yungngo indögü a'a ko'do, yaada ka tiki a'da Masala maada oogo miini.

<sup>55</sup> Taalo aaga kussu oogo, illi a'a nungngo nussu oogo. Kede ka tiki a'da taalo a'a nussu oogo ya, ara a'a takorokoro afa ma aaga kungngo. A'a nussu oogo nümmü tumma noonno.

<sup>56</sup> Pupa yaada Abrahiim adinigöögö ma tasaasa tassa ka uuru tanno eede ka töö'dö no, adadini kide oona ta'diila kini."

<sup>57</sup> A Yahüüdü tiki iini, "Nagürüünü nüüdü küfürü töö'dö a kadu keera kaco iisine, o'o niji Abrahiim nya!"

<sup>58</sup> A Yasu tiki eene, "Tumma dhorro eede ka tirina aaga ka Abrahiim ka tüfürü tageenedene ya a'a ninggide."

<sup>59</sup> Kikiri ka kona nüügi ma tadiidiri i'i iini, lakiini Yasu aculu amanyaga kene ka söödö unggene ka la ma Masala.

## 9

### *Yasu oolona soro*

<sup>1</sup> Uuru kinggide a Yasu ka tunggeene ka fiin'i, asala ömö'di ageenedene kada soro.

<sup>2</sup> A kadalaadene niini tindini i'i, "Ka Tatalaana, mada i'i yungngo agüün'i tatoroko, ömö'di ya alla pupa yiini nja niimö tammo iini, anangnga i'i ka tageenedene kada soro?"

<sup>3</sup> A Yasu tapadaga tumma eene iki, "Taalo i'i ya agüün'i tatoroko alla pupa nja niimö egee kungngo kagüün'i tatoroko, lakiini i'i ageenedene kada soro amang ka türü tanno Masala tijidene kini ka oona.

<sup>4</sup> Ara a'a taliggo eema ya ömö'di tiya agürünü a'a a'da a uuru 'buugu, kudumma 'buugu kada ooso ya, taalo ömö'di ma tamaanya linggo.

<sup>5</sup> Kede ka tanna ka 'büdhülü ya, a'a na töyeene ma 'büdhülü."

<sup>6</sup> Atiraana nggege assa a'binynti alaaga ka kuraaga akordhe 'bandam'bala iini asi-giaana ka soro ka iiye.

<sup>7</sup> İkiri ka tiki iini, "Unggeene, naco taagalaa iiye ka dhömbö ma Salwam" (ya ana eere a'da, Tagürünigü), ikiri kico aagala iiye aco öö'di ka jji 'buugu.

<sup>8</sup> A kadu na kete kini no nja tanno ussu a'da aga soro aatarangnga, anno tiki, "Taalo ömö'di ya agemmi aatarangnga ya i'i yungngo sa?"

<sup>9</sup> A kadu könö tiki, "İl, i'i ya miini." Anno tiki, "Kaw, afeene nja iini." Illi i'i ka eyi tiya iini iki, "A'a namiini."

<sup>10</sup> Kikirü ka tiki iini, "Katanfa'da iiye nüüdü nya?"

<sup>11</sup> İkiri ka tiki eene, "Ömö'dü ya ana eere a'da Yasu ya, oojolo tam'bala amirijaana kide ka iiye iki a'a a'da, 'Naco a dhömbö ma Salwam naco tatanggala kide,' nikirü ka co nagala nasala 'buugu."

<sup>12</sup> Kikirü ka tiki iini, "I'i iiye?"  
Iki eene, "Taalo a'a nussu."

### *NaFariisi kindini toolonadene*

<sup>13</sup> Kikirü ka a'duga ömö'dü ya aga soro ya, köö'dö ana i'i a naFariisi.

<sup>14</sup> A'da uuru ma Sa'bidi eege kungngo ka Yasu ka tagalinggo tam'bala afa'da ömö'dü ka iiye iini.

<sup>15</sup> İkiri naFariisi ka tindini i'i kiki iini a'da, iji 'buugu nya.

İkiri ka tiki eene, "Anangnga tam'bala eede ka iiye natanggala a 'bitingngö nasala 'buugu."

<sup>16</sup> A naFariisi könö tiki, "Taalo ömö'dü ya ö'dö ndama Masala, kudumma iini taalo ari'ba uuru ma Sa'bidi."

Anno tiki, "Üürü ömö'dü atoroko atambaanya talingga eema keefe afa ma tiya kungngo nya?" A tumma ta'bana ko'do kene.

<sup>17</sup> Kikirü ka tiki a soro, "Niki o'o a'da i'i afa'da o'o ka iiye, o'o niki nya ka tumma tanno?"

İkiri ka tiki eene, "I'i ya ne'bi."

<sup>18</sup> A Yahüüdü taalo kamma a'da ömö'dü ya aga soro assa ndiji 'buugu, kikirü ka kürünü ka pupa tiya iini nja nüümö köö'dö.

<sup>19</sup> Kindini eege kiki eene, "'Bii'bala yaada i'i yungngo ada katiki a'da ageenedene kada soro? A 'bitingngö i'i iji 'buugu nya?"

<sup>20</sup> A pupa yiini nja nüümö tiki, "Kussu ungngo a'da 'bii'bala yüüdi i'i yungngo, ageenedene kada soro.

<sup>21</sup> Lakiini i'i iji 'buugu 'bitingngö nya, taalo ungngo kussu mada afa'da i'i ka iiye, taalo ungngo kussu, aaga indini i'i. I'i anda dhabbu, i'i ara tadirina tumma ma iiye tiya iini aaga."

<sup>22</sup> Eege kiki nggeege kudumma eene ka ri'ba a Yahüüdü, kudumma eene ka tiki a'da ömö'dü ya amma ka Yasu a'da i'i Almasihi ya, kasoro i'i ka la ma talaana.

<sup>23</sup> I'i yungngo a pupa tiya iini nja nüümö katiki a'da, "Aaga indini i'i kudumma iini ka ndasere."

<sup>24</sup> A naFariisi tafada kadagümmünü ömö'dü ya aga soro ya afe'de, kindini i'i kiki iini, "Indhig'i Masala ko'do kussu ungngo a'da ömö'dü ya atoroko."

<sup>25</sup> İkiri ka tiki a'da, "Taalo a'a nussu a'da i'i atoroko alla taalo atoroko, nussu a'a nüümö unggodho, naga soro a'a a 'bitingngö niji a'a 'buugu."

<sup>26</sup> Kafada kindini i'i, "Agüüni minna ana o'o? Afa'da o'o ka iiye nya?"

<sup>27</sup> Iki eene, "Nilli a'a ka tagadünüğü aaga itaalo inynyo ada ka nanggüüdü, aaga kasaasa taföönyö minna afe'de? Alla aaga kasaasa ta kadalaadene tanno iini afe'de?"

<sup>28</sup> Kikirü ka teela i'i kiki iini, "O'o nungngo na tatalaadene tiya iini, illi ungnego kadalaadene tanno Müüsa.

<sup>29</sup> Kussu ungnego a'da Masala mageema nja Müüsa, lakiini ömö'dü ya taalo ungnego kussu ö'dö ndama kiga."

<sup>30</sup> İkiri ömö'dü ka tiki eene, "Kaneene tumma naada nya, ömö'dü afa'da a'a ka iiye aaga sa ka tiki a'da taalo aaga kussu a'da ö'dö ndama kiga?

<sup>31</sup> Kussu ungnego a'da Masala taalo maföönyö tumma na kadu tanno oroko no, illi oogo maföönyö tumma na ömö'dü tiya aföönyö tumma noonoo alingga iini ya.

<sup>32</sup> Taalo ömö'dü ma taföönyö jiddi ma nagürüünü 'do a da ömö'dü inggidje afa'da ömö'dü dä ka iiye ka tageenedene kada soro.

<sup>33</sup> Üürü ömö'dü ya taalo ö'dö ndama Masala ya, taalo takambaanya talingga eema afa ma tiya kungngo."

<sup>34</sup> Kikirü ka tiki iini, "O'o nama talaana ungnego üdü ka tageenedene a tatoroko 'do kungngo?" Kikirü ka tagasoro i'i kuurugu i'i co kürö.

### *Tasoro ma koronggore*

<sup>35</sup> A Yasu taföönyö a'da eege kagasoro i'i, kini ka toreneen nja iini, ikiri ka tiki iini "Namma o'o ka 'Bii'bala ma Tadü'dü?"

<sup>36</sup> Ömö'dü tiki, "I'i ya mada ömö'dü eede, amang kede tamma kini."

<sup>37</sup> A Yasu tiki, "O'o niji i'i 'bitingngö, tumma dhorro i'i yungngo eema nja o'o 'bitingngö."

<sup>38</sup> İkiri ka tiki, "Namma a'a Uugaara." Üürü ku'bu kini kidha.

<sup>39</sup> İkiri Yasu ka tiki iini, "Nö'dö a'a ka 'büd'hüü ma tümmü kadu, amang ka kadu tanno kisinsoro no tiji 'buugu, anno iji 'buugu no ta kisinsoro."

<sup>40</sup> İkiri naFariisi könö na kanna kini kete no kaföönyö kiki iini minna, "Ungngo ka kisinsoro afe'de?"

<sup>41</sup> A Yasu tiki eene, "Kada ka takisinsoro taalo tatoroko ka taganna kada koona. Lakiini kiki aaga a'da kiji aaga 'buugu ya ara tatoroko naada tüütü kada ka oona."

## 10

### *Yasu i'i ya tadasaana tiya dhorro ya*

<sup>1</sup> A Yasu tiki, "Ara a'a tadirina tumma aaga dhorro, ömö'dü ya taalo inynyo a 'booro ma kidheefele ndama iñye ma ondo ya, ara ka kilaana ndama eere miini ya i'i ya tanyooro.

<sup>2</sup> Illi ömö'dü ya inynyo ndama iñye ya, i'i ya tadasaana ya dhorro ya.

<sup>3</sup> A ömö'dü ya afa ka iñye ya tafa'da iñye iini, a kidheefele taföönyö tumma niini ümmünü kidheefele ka nagereene tanno eene kaföönyö uurugu eege kürö.

<sup>4</sup> İkiri ka tuurugu kidheefele kürö aaco kene kidha kuurna i'i keere kudumma eene ka tussu 'bugeyi yiini.

<sup>5</sup> Ömö'dü ya taalo yeene ya, kasala i'i karünö kitaalo kaco iini keere, kudumma eene ka titalo kussu 'bugeyi yiini."

<sup>6</sup> A Yasu tadirina tafeene ma tumma eene, lakiini taalo kinyño eene ka nanggiüdü.

<sup>7</sup> İkiri Yasu ka tiki eene afe'de, "Ara a'a tadirina tumma aaga dhorro, a'a nungngo na iñye ma ondo ma kidheefele.

<sup>8</sup> Kadu na öö'dö kede kidha 'do no, kanyoro eege kamiini, a kidheefele taalo kaföönyö tumma neene.

<sup>9</sup> A'a nungngo na iñye, ömö'dü ya tigaala kide ya, oolonadene aaco öö'dö kürö aduna kuri.

<sup>10</sup> Taalo tanyoro a tunggeene ün'dügüngö illi unggunu ka nyoro, aara kidheefele agirina, lakiini a'a nö'dö amang kene taluna tefe ka 'di na tigine no.

<sup>11</sup> "A'a na tadasaana tiya dhorro ya. A tadasaana ya dhorro ya ara teyi kudumma kidheefele tanno iini.

<sup>12</sup> Ömö'dü ya asaana a faana ya, taalo a tadasaana ma kidheefele. Lakiini kini ka tasala ti ka tunggunu ka kidheefele arünö iñyi kidheefele ku'bu, a ti tümmü eege maparsaana eege ku'bu.

<sup>13</sup> Ömö'dü ya asaana a kidheefele a'da taalo ka niini no, ara tarünö kudumma eene taalo ka agu'du i'i ka oona.

<sup>14</sup> "Lakiini a'a nungngo na tadasaana tiya dhorro ya, nussu a'a kidheefele neede, a kidheefele neede tussu a'a.

<sup>15</sup> Afa ma Pupa ka tussu a'a nussu Pupa, a'a teyi ka üdü ma kidheefele tanno eede.

<sup>16</sup> Kidheefele könö kungngo eede kitaalo ka 'booro tiya, ara a'a co tö'dö ana eege afe'de, ka taföönyö tumma neede nuuraana eege koona ka unggodho a tadasaana unggodho.

<sup>17</sup> Niimö ya Pupa tiya eede ka asaasa a'a ya, kudumma eede ka tüpü eyi yeede co amang kede taluna afe'de.

<sup>18</sup> Taalo ömö'dü ma ta'duga kede, lakiini a'a nara tanangnga eege ku'bu ma eyi tiya eede. A türü kungngo eede ma tanangnga eege ku'bu a türü kungngo eede ma tan'dinaga eege ko'do afe'de. Tumma no, na'duga eege ka Pupa tiya eede."

<sup>19</sup> A tumma ta'bana ko'do ka Yahüdü kasümünü njaana ku'bu kudumma tumma tanno.

<sup>20</sup> A kadu ana kene kadhabbu tiki, "Na'bu ungngo iini ka üdü atangga'da ka üdü, katodo aaga ka tumma tanno iini amana?"

<sup>21</sup> Anno tiki, "Taalo tumma ma ömö'dü tiya ana na'bu ka oona eege kungngo. Ara na'bu tambaanya tafa'da ömö'dü ya soro ya ka iiye?"

### *Yahüdü kanu ka Yasu*

<sup>22</sup> A Taanyara ma tirri ma la ma Masala tadhe ka Örsaliim a'da afeele 'buugu,

<sup>23</sup> a Yasu takunggunaana ku'bu ka fangga tammo Siliman ka la ma Masala.

<sup>24</sup> İkiri Yahüdü ka tarügü kini ka oona kiki iini, "Ara o'o talülü ungnego ka iiye taagaada? Tirina tumma ungnego dhorro o'o na Almasiihi?"

<sup>25</sup> İkiri Yasu ka tiki eene, "Nadirina a'a aaga, lakiini aaga taalo kamma ka tumma tanno eede, eema yeede ka talinggo ana eere ma Pupa tiya eede ya, i'i yungngo ada ka tussu iini.

<sup>26</sup> Lakiini taalo aaga kara tamma kede kudumma ada katitaalo ka kidheefele tanno eede.

<sup>27</sup> Kidheefele neede kaföönyö tumma neede nussu eege, ko'do kede keere.

<sup>28</sup> Namana a'a tefe ka 'dü ta'billi eene, kitaalo ka taaya 'do, ömö'dü ma tamuru eege kede ka niisö kungngo taalo.

<sup>29</sup> Pupa yeede i'i yungngo anangnga eege a'a, i'i yungngo agii'bi kadu nye'd'e kungngo, ömö'dü ma tamuru eege ka Pupa tiya eede ka niisö kungngo itaalo.

<sup>30</sup> A'a nja Pupa ka unggodho ungnego."

<sup>31</sup> Afe'de İkiri Yahüdü ka tadhifi niigisi afe'de ma tadiidiri i'i,

<sup>32</sup> İkiri Yasu ka tiki eene, "Kiji aaga eema ya a'diila yeede ka tagalinggo ya dhabbu a Pupa ka anangnga a'a, öjö i'i yungngo ada kasaasa tadiidiri a'a kudumma miini ngo?"

<sup>33</sup> A Yahüdü tiki iini, "Taalo ungnego kasaasa tadiidiri o'o kudumma eema tiya üdü ka talinggo ya a'diila ya, lakiini kudumma teela Masala nüüdü! O'o na ömö'dü ün'dügüngö na o'o sa ka tümmü eyi üyüdü kada Masala."

<sup>34</sup> İkiri Yasu ka tiki eene, "Taalo tumma no ka kirinja ka serije tiya ada, 'A Masala ka tiki, Aaga namasala'?

<sup>35</sup> A kini kara tümmünü eege a'da 'namasala,' a'da eege kungngo a tumma ma Masala ka öö'dö kene, a Sorne ma Masala taalo ara taama,

<sup>36</sup> Kiki aaga nya ma ömö'dü tiya Pupa ka tagesse i'i kada tiya oono dhorro magürünü i'i ka 'büdhülü. Minna agu aaga tümmü a'a a'da a'a neela Masala kudumma eede ka tiki a'da a'a na 'Bii'bala ma Masala?

<sup>37</sup> Kede ka titalo nalinggo linggo na Pupa ya, aaga fa tamma kede.

<sup>38</sup> Lakiini na a'sa ka talingga ya, salla aaga saga taalo kamma kede, aaga amma ka eema keefe tiya ada kara tussu a'da Pupa ungngó eede, a'a na Pupa."

<sup>39</sup> Kasaasa tarefe i'i, lakiini adulu'bí kene ku'bu.

<sup>40</sup> Afada aco ada'da to ma Ürdün kita Yühanna ka takambeese kide ka dhidha ya anna kide.

<sup>41</sup> A kadu tö'dö kini kadhabbu kiki, "Taalo Yühanna agalinggo nüümö unggodho keefe, lakiini tumma niini ka tiraana ma ömö'dü tiya ka tatimin'da."

<sup>42</sup> A kadu tamma ka Yasu kadhabbu kanna.

## 11

### *Inde na Liyasiri*

<sup>1</sup> A maara tümmü ömö'dü inggide ana eere a'da Liyasiri ama Beet Aniya, ama daara tammo Mariyom nja ïnye tammo oono Marsa.

<sup>2</sup> A Mariyom mo, oogo mungngo muuru kondho ka Yasu ka uune matakuppu ana awu tiya oono, örre yoono i'i yungngo amaara, ana eere a'da Liyasiri.

<sup>3</sup> Mikirri Mariyom nja Marsa ka kürünü ka Yasu kiki iini, "Ka Uugaara, teefe ma o'o yüdüü ka asaasa i'i ya amaara."

<sup>4</sup> Ka Yasu ka föönyö tumma no ya iki, "Taalo maara ma inde oogo miini, lakiini tidhindhi ma Masala, amang ka 'Bii'bala ma Masala tidhindhi iini."

<sup>5</sup> A Yasu tagasaasa Marsa nja ïnye tammo oono nja Liyasiri.

<sup>6</sup> Lakiini i'i ütü kanna iïyü kide naganuru keera kini ka aföönyö a'da Liyasiri amaara,

<sup>7</sup> İkiri ka tiki a kadalaadene tanno iini, "Aaga ö'dö ungngó tapadaga co Yahüüdiya."

<sup>8</sup> İkiri kadalaadene niini ka tiki iini, "Ka Tatalaana kete kungngo kasaasa Yahüüdü tiidi o'o a nüigisi ara o'o tagapadaga co kanna afe'de?"

<sup>9</sup> İkiri ka tiki a'da, "Taalo uuru ka unggodho ka ndanaya kada'baaga kafünü eera? Ömö'dü ka tunggeene uuru kungngo taalo ataseene kudumma iini ka adinö ka töyeene ma 'büdhülü nye'd'de."

<sup>10</sup> Ömö'dü ya unggeene ooso kungngo ya, ataseene kudumma töyeene ka titalo kini."

<sup>11</sup> Iki nggeege assa ka tafada iki eene, "Teefe ma angnga Liyasiri arigide, a'a tunggeene naco tiji i'i."

<sup>12</sup> İkiri kadalaadene ka tiki iini, "Uugaara, üürü i'i arigide ya ara ta'diila."

<sup>13</sup> Yasu ageema tumma inde taalo tarigide ma timin'da, kiki kide a'da füngngö ma tarigide ün'dügüngngö.

<sup>14</sup> İkiri Yasu ka tirina eene dhorro, "Liyasiri eyi,

<sup>15</sup> ka'diila oona eede kudumma aaga amang kada tamma a'da taalo a'a naganna kanna nja iini, aaga fiki'dö angnga co kini kanna."

<sup>16</sup> İkiri Tööma yeene ka tümmünü i'i a'da Miiso ya, ka tiki a köje tanno a kadalaadene no, "Kico tekere angnga co takaaya nja iini."

*Yasu uu'bu nagïnye na Liyasiri ka eedi*

<sup>17</sup> İkiri Yasu ka ala kanna aduna Liyasiri ka la ma oofo andatüümö füngngö egüsö.

<sup>18</sup> A Beet Aniya ma ku'b'ba ka Örsaliim ana nameele keera,

<sup>19</sup> a Yahüüdü kadhabbu kö'dö ka fara kuu'bu Marsa nja Mariyom egee ka eedi kidhi oona ku'bu ma örre tiya eene.

<sup>20</sup> Mikirri Marsa ka föönyö a'da Yasu inni ö'dö ya, mikirri ka öö'dö kürö marogo kini ara Mariyom ka tüütü ka 'bügöörü.

<sup>21</sup> A Marsa tikiri ka tiki a Yasu, "Ka Uugaara, üdü ka taganna kita, taalo örre yeede ara takeyi.

<sup>22</sup> Lakiini nütü a'a ka tussu a'da ara Masala tanangnga nüümö yüüdü ka asaasa kono ya o'o."

<sup>23</sup> İkiri Yasu ka tiki oono, "Ara örre yüüdü tafik'i'dö ka inde afe'de."

<sup>24</sup> Mikirri Marsa ka tiki iini, "Nussu a'a a'da atafik'i'dö ka inde ka uuru ma tafik'i'dö tanno eere no."

<sup>25</sup> İkiri Yasu ka tiki oono, "A'a nungngo na tefe ka 'dü nja tafik'i'dö. Ömö'dü ya amma keda ya ara tefe ka 'dü, munda kini kara teyi.

<sup>26</sup> Ömö'dü ya efe ka 'dü amma keda ya, taalo teyi. Namma o'o ka tumma tanno?"

<sup>27</sup> Miki iini, "İi, namma a'a Tatalaana, namma a'a a'da o'o na Almasiiji, 'Bii'bala ma Masala ya atö'dö ka 'büdhülü ya."

<sup>28</sup> Ka Marsa ka tiraana nggeege ya, mikirri ka tafada maco ka Mariyom matagüümüni oogo mayaaya oogo mikri, "Ö'dö Tatalaana asaasa 'buugu ma o'o."

<sup>29</sup> A Mariyom tikiri ka fiki'dö kono ka taföönyö tumma no, maroro ka tunggeene maco ka Yasu.

<sup>30</sup> A'da üfürü Yasu tala daara aleefe ka 'buugu tiya Marsa ka takoreene nja iini kide ya.

<sup>31</sup> Ka Yahüdü na köö'dö kafara ka Mariyom ka 'dī no, kasala oogo ka fiki'dö areere maco kürö, kuurna oogo keere, kiki kide a'da oogo ma co la ma oofo tafara kide.

<sup>32</sup> A Mariyom tö'dö ka 'buugu tiya Yasu ka taganna kide ya, kono ka tasala Yasu ya, müüri kini kidha ana kütüge miki iini, "Ka Tatalaana, küdü ka taganna kita taalo örre yeede ara takeyi."

<sup>33</sup> Aga Yasu ka iji oogo ka fara a Yahüdü na öö'dö nja oono no tafara nja oono, oona tö'dö kini ko'do angooro tümmü i'i a koronggore.

<sup>34</sup> İkiri ka tiki, "Katü'bü aaga i'i kiga?"

Kiki iini, "Aayu kolo tassa kide, Uugaara."

<sup>35</sup> A Yasu tafara.

<sup>36</sup> İkiri Yahüdü ka tiki, "Aaga assa kini agasaasa i'i nya."

<sup>37</sup> Lakiini kadu könö kiki, "T'i afa'da soro ka iïye taalo atanangnga Liyasiri keefe ka 'dī?"

### *Yasu iji Liyasiri ka inde*

<sup>38</sup> Oona tangooro ka Yasu afe'de öö'dö ka la ma oofo, a müsi mungngo ka ïnye ma tumba.

<sup>39</sup> İkiri ka tiki, "Aaga kürünögü müsi keere."

A Marsa ma ïnye tammo Liyasiri mo tiki, "Ka Tatalaana, anda unynya, ungngo iini ka la ma oofo füngngö egüsö."

<sup>40</sup> İkiri Yasu ka tiki oono, "Taalo a'a niki o'o a'da küdü ka tamma, na o'o tiji tidihindhi na Masala?"

<sup>41</sup> Kikiri ka a'dina müsi. A Yasu tassa coo'do iki, "Nanangnga a'a ta'diila o'o Pupa yeede, kudumma üüdü ka föönyö tamma neede.

<sup>42</sup> Nussu a'a a'da ara o'o tafoönyö kede a naguuru. Lakiini a'a neema nggeege amang ka kadu tanno kita nja a'a no, tamma a'da o'o nagürünü a'a."

<sup>43</sup> Kini ka tiraana nggeege, ikiri ka al-neegi ko'd'o iki, "Liyasiri, aayu kürö."

<sup>44</sup> Ömö'dö ya eyi ya, ikiri ka öö'dö kürö ka timi'didene ka uune nja iisine ana en'di adimi'didene ka iïye a ten'di, ikiri Yasu ka tiki eene, "Aaga kildhe eema iini ka oona aaga tafa kini unggeeene."

### *Ünggü ma tiidi Yasu*

<sup>45</sup> A Yahüdü könö kadhabbu na öö'dö tassa ka Mariyom no, tiji eema ya Yasu ka tagalinggo ya kamma kini.

<sup>46</sup> Lakiini kadu könö ana kene keefe tadirina eema a naFariisi ma eema tiya Yasu ka tagalinggo ya.

<sup>47</sup> A naguugaara ma ka'boge nja naFariisi temmi ka la ma kadüfi ma Yahüdü ma türi tumma no kiki, "Ara angnga

takönynyö ana ömö'dö tiya, iini ka talinggo eema dhabbu keefe.

<sup>48</sup> Kaja ka tafa kini nggeege ara kadu tamma kini nye'd'e a kadu ma Rööma tö'dö taga'da anya maaja nja la ma Masala kide aja."

<sup>49</sup> İkiri könö ana kene ana eere a'da Kiyaafa ya aga uugaara ma ka'boge ka ürüünü tiya miini ya ka tiki, "Taalo aaga kussu nüümö 'do,

<sup>50</sup> taalo aaga kussu a'da a'diila ka ömö'dö kara teyi ka üüdü ma kadu amang ka kadu tafa taaya in'dili."

<sup>51</sup> Lakiini Kiyaafa taalo adiri tumma no ndama eedi tiya iini, kudumma iini kada uugaara ma ka'boge ka ürüünü tiya miini ya, ikiri ka teema ussu a'da Yasu a teyi ka üüdü ma kadu ma Yahüdü.

<sup>52</sup> Lakiini taalo a teyi ka üüdü meene unggodho eege, lakiini ka üüdü ma kadu tanno Masala na asananjaana ku'bu ka ajeene no anangnga eege kada unggodho.

<sup>53</sup> Ndama uru tanno miini no kan-dawwa fiin'i ma tiidi i'i.

<sup>54</sup> Nggeege taalo Yasu aga unggunaana ku'bu 'biini kungngo ka söödö ma Yahüdü, agala ka tunggeene aco a riifö tiya kete ka dhiile ka anya tammo ana eere a'da Afraim mo, ada kamma kide nja kadalaadene tanno iini.

<sup>55</sup> Aga Taanyara ma Tada'da ka Eriidö ma Yahüdü ka ndakete ya, a kadu ma naanya 'do tö'dö ka Örsaliim ma tindanaana oona ku'bu a'da aleefe uru ma türi.

<sup>56</sup> Kawwa 'buugu ma Yasu kindini ajeene ka la ma Masala kiki, "Kiki aaga nya? Ara tö'dö ka taanyara alla taalo atö'dö?"

<sup>57</sup> İkiri naguugaara ma ka'boge nja naFariisi ka tiki a'da ömö'dö ya tussu 'buugu ma Yasu ya, atiraana a kadu tümmü i'i.

## 12

*Aka masanna kondho ka Yasu ka uune ka Beet Aniya*

(Matta 26.6-13; Murkus 14.3-9)

<sup>1</sup> Ka füngngö ka ndöreene üdümmü afünü unggodho ma Taanyara ma Tada'da ka Eriidö, ikiri Yasu ka öö'dö ka Beet Aniya ka 'dī tiya Liyasiri yiini ka tiji i'i ka inde ya.

<sup>2</sup> Kadagüünä ada eema ma kuri ma ooso iini, a Marsa oogo mungngo malinggo ada eene, a Liyasiri taguri nja eene.

<sup>3</sup> Mikiri Mariyom ka 'duga sügü'de ma kondho a kadu kaana kagu'daana agalinggo adene ana nardiin ya dhorro ya, masanna ka Yasu ka uune ma'bunaanago ana awu ma üüdü tiya oono a 'büggöörä tafilli a kondho.

<sup>4</sup> İkiri Yahüusa Askaryüütü, ya tatalaadene ya, assa ka tümmünü Yasu a kadu ya ka anu kide,

<sup>5</sup> "Taalo a'diila aja katenege a kondho tammo ana nakajine kö'dö na miya kiidoona kanangga a kadu tanno eema ka titaalo kene no?"

<sup>6</sup> Taalo i'i atiraana nggege a'da i'i ya ana 'bangnga meene, lakiini kudumma iini kada tanyooro i'yungngo ümmü njoko ma gürüsü, anggona kide ma eyi tiya iini.

<sup>7</sup> İkiri Yasu ka tiki, "Aaga fa kono, oogo mafa ka kondho tammo ma uuru ma tut'büdene tanno eede.

<sup>8</sup> Kadu na eema ka titaalo kene no kaneene nya aaga turi kungno, lakiini a'a taalo nara taneene nya aaga turi."

<sup>9</sup> A Yahüüdü kadhabbu taföönyö a'da Yasu ungngo ka Beet Aniya, kikiri ka co tassa kini kara kaco tassa ka Liyasiri tiya Yasu ka anangnga i'i ka fiki'dö ndama inde.

<sup>10</sup> I'i yungngo a naguugaara ma ka'bole kadimi'di tumma ma tiidi Liyasiri afe'de.

<sup>11</sup> Kudumma ma Liyasiri Yahüüdü kadhabbu ka unggene kaco ka Yasu kamma kini.

*Yasu inynyo Örsaliim  
(Matta 21.1-11; Murkus 11.1-11; Lüüka 19.28-40)*

<sup>12</sup> İkiri kadu na öö'dö ka Örsaliim ka taanyara no, kaföönyö a'da Yasu inni ara tö'dö kannna.

<sup>13</sup> Kikiri ka a'buna iisine ma naafa ma tamuru koreene nya iini kiidhe kiki, keema a'da,

"Tidhindhi."

"Aaga nangnga baraka ka ömö'di tiya ara tö'dö ana eere ma Uugaara ya."

"Aaga nangnga baraka ka Uugaara ma Israyil."

<sup>14</sup> İkiri ka tuna 'bing kisine aka kide afa ma tiya sorne ka tiki ya kungno,

<sup>15</sup> "Fa tari'ba, 'badaada ma Sahyüün, assa, uugaara yüüdü tunggunu atö'dö aka ka 'bing kisine tiya idhilli ya."

<sup>16</sup> Ka uuru tanno mini no taalo kadalaadene niini kussu niimö miini illi eene kadagïgi i'i kini ka tafününgünja ko'do, sorne ageema tumma miini, eege kagalinggo ada eema ya iini.

<sup>17</sup> Kadu na kunggeene nya iini no kini ka tagümmünü Liyasiri kürö ndama la ma

oofo iji i'i ndama inde kadünögü tumma miini co kadu.

<sup>18</sup> A kadu tö'dö kürö kadhabbu koreene nya iini kudumma eene ka taföönyö a'da i'i agalinggo eema keefe.

<sup>19</sup> İkiri naFariisi ka teemaana ka oona unggodho eege, "Taalo niimö maaja kara talingga, aaga assa ka kadu ïn'dili ka tuurna i'i keere nya."

*Yasu eema tumma ma inde tanno iini*

<sup>20</sup> A kadu ma Yünan kagöö'dö nya kadu tanno köö'dö ka Örsaliim ka uuru ma Taanyara ma Tada'da ka Erïidö.

<sup>21</sup> Köö'dö ka Filibüs ya ma Beet Sayida ka Jaliil ya kiki iini, "Ömö'di eede, kasaasa ungno tassa ka Yasu."

<sup>22</sup> İkiri Filibüs ka tirina Andraws, a Filibüs tunggeene nya Andraws ka tirina a Yasu.

<sup>23</sup> İkiri Yasu ka tiki eene, "Uuru ma 'bii'bala ma Tadü'd'dü ka ndö'dö miini ka tafününgünja ko'do.

<sup>24</sup> Ara a'a tadirina tumma aaga dhorro, üürü taalo ndanüye ma tinggile ka asuli ka 'büdhülü keyi ya, a tütü unggodho eege. Lakiini kene ka teyi ya, kara tö'dö ana iiye kadhabbu.

<sup>25</sup> Ömö'di ya asaasa eyi yiini ya ara taama, ömö'di ya a'düsünü eyi yiini ka 'büdhülü tiya, ara tafa kene ma tefe ka 'di ta'billi.

<sup>26</sup> Ömö'di ya asaasa talinggo ada a'a ya, fa kini uurna a'a keere, kita eede ka tanna kide ya, ara talinggo ada a'a, ömö'di ya alinggo ada a'a ya, ara Pupa yeede tamünögü i'i ko'do.

<sup>27</sup> "Kalullu oona eede a 'bitüngngö ara a'a tiki nya? Ara a'a tiki a'da, 'Pupa yeede, oolona a'a ka uuru tanno'? Kaw, kudumma tumma tanno, eege kungno eede ka öö'dö ka uuru tanno.

<sup>28</sup> Pupa yeede, fa ka eere tiya üüdü idhindhi."

A tumma tö'dö ndama 'dotombo'do, "Nanangnga a'a i'i ka tidhindhi nara tafa kini idhindhi afe'de."

<sup>29</sup> A kadu na kanna kide no kataföönyö kiki a'da baana ma tombo'do, anno tiki a'da tadhingga ageema nya iini.

<sup>30</sup> İkiri Yasu ka tiki, "Taalo tumma no köö'dö kudumma ma a'a, eege köö'dö kudumma aaga.

<sup>31</sup> A 'bitüngngö uuru no, uuru ma kadu ma 'büdhülü ka tagümmü adene eege kungno, a 'bitüngngö uuru no ara uu-gara ma 'büdhülü atasorodene.

<sup>32</sup> Kede ka ta'digi coo'do ndama 'büdhülü, ara a'a tagufu kadu nya a'a nye'd'de kungno."

<sup>33</sup> Atiraana nggeege ma tala eege ka inde tanno iini kara teyi no.

<sup>34</sup> A kadu nye'd'e tiki iini, "Kaföönyö ungngö ka seriyé ka tiki a'da, Almasiihi ara tüü ka 'd'i ta'billi, o'o sa köö'dö nya niki a'da ara 'Bii'bala ma Tadü'dü ara ta'digi coo'do? 'Bii'bala ma Tadü'dü ya i'i ya mada?"

<sup>35</sup> İkiri Yasu ka tiki eene, "Ara töyeene tagünü njä aaga idhilli, aaga unggenee ka töyeene ii'dü ndüüli tanggaaga tala aaga ka oona, kudumma ömö'di tiya unggenee ka ndüüli ya taalo ussu 'buugu yiini ka tunggunu co ya.

<sup>36</sup> Aaga ümmü töyeene ana eedi dhorro, kudumma eene kungngö ada 'bitüngngö amang kada ta laala tiya töyeene." Ka Yasu ka alneege nggeege ya, unggenee itaalo.

*Yahüüdü kanu ka tamma ka Yasu*

<sup>37</sup> A'da agalinggo ada eema keefe ya eene kidha 'do, kassa kitaalo kamma kini.

<sup>38</sup> Afa ma tumma tanno ne'bi Asaiya ka tiraana no ka timin'da iki,

"Ka Uugaara, mada i'i yungngo amma ka tumma tanno aja?

A mada i'i yungngo a niisö tanno Masala ka alanja iini ungngö?"

<sup>39</sup> Taalo kambaanya tamma kini kudumma Asaiya ka tiki afe'de,

<sup>40</sup> "Masala ma'binynyi eege ka iiye manangnga eege ka takidhö ka nanggeedi, amang kene tafa tiji 'buugu ana iiye tanno eene, kafa tussu eema a nanggeedi tanno eene, amang kene tafada na a'a toolona eege."

<sup>41</sup> Asaiya adiri tumma no kudumma iini ka tasala tidihindhö ma ta'dila tanno Yasu, adageema tumma miini.

<sup>42</sup> Lakiini naguugaara ma Yahüüdü kadhabbu ka eyi tiya eene kamma ka Yasu. Lakiini eege taalo kasaasa kadu ka tussu iini, kudumma eene kari'ba a naFariisi ii'dü tasoro eege ka la ma talaana.

<sup>43</sup> Eege kasaasa kadu ka tafünögü eege ko'do dhabbu kii'bi tafünögü ko'do na Masala.

<sup>44</sup> İkiri Yasu ka alneege ko'd'o iki, "Ka ömö'di ka tamma kede ya, taalo i'i ya amma kede sugi, lakiini i'i amma ka ömö'di tiya agürünü a'a ya.

<sup>45</sup> Ömö'di ya iji a'a ya, iji ömö'di ya agürünü a'a ya.

<sup>46</sup> A'a na töyeene tanno ö'dö ka 'büdhülü no, ömö'di ya amma kede ya taalo tanna ka ndüüli.

<sup>47</sup> "Ömö'di ya föönyö tumma neede assa ka titaaalo amma kide ya, taalo a'a natümmü i'i. Kudumma eede taalo a'a nö'dö tümmü kadu ma 'büdhülü, a'a nö'dö toolona kadu ka 'büdhülü.

<sup>48</sup> Ömö'di ya anu kede itaalo amma ka tumma tanno eede ya, ömö'di ma tümmü i'i inggide, a tumma neede ka tiraana no katümmü i'i ka uuru tanno eere no.

<sup>49</sup> Taalo a'a neema tumma ma eyi tiya eede, lakiini Pupa ya agürünü a'a ya, i'i yungngö anangnga tumma a'a a'da nöö'dö tatiraana neema iini.

<sup>50</sup> A'a nussu a'da tumma niini, eege ka tefe ka 'd'i ta'billi. A tumma neede ka teema no ara a'a tatiraana afa ma tiya Masala ka tiki ya kungongo."

## 13

*Yasu agunu kadalaadene niini ka uune*

<sup>1</sup> Ka Taanyara ma Tada'da ka Erüüdö ka ndakete ya, a'da ussu Yasu a'da uuru miini ka ndungeene ka 'büdhülü ma co ka Pupa tiya iini. I'i asaasa kadu niini na ka 'büdhülü no asaasa eege dhorro ta'bili.

<sup>2</sup> Ka Yasu ka ndemmi ooso kungngö ma tagu eema nya kadalaadene tanno iini, ikiri Ebliisi ka iisini Yahüüsa Askaryüüti 'bii'bala ya Samaan, ya ümmünü Yasu a naguugaara.

<sup>3</sup> A Yasu ussu a'da Pupa yiini ümmünü eema iini ka niisö nye'd'e. Ussu a'da i'i ö'dö ndama Masala ara tapadaga ka Masala afe'de.

<sup>4</sup> İkiri ka fiki'dö ka kuri akirnö ten'di miini, aramba dhiiri niini a ten'di.

<sup>5</sup> İkiri ka tuuru 'biidü ka dho agunu kadalaadene niini ka uune, uppu a ten'di tammo iini ka mi'di dhiiri iini mo.

<sup>6</sup> Kini ka ndö'dö ka Samaan Bütrüs ya, ikiri Samaan ka tiki iini, "Ka Tataalaana, ara o'o tagunu a'a ka uune?"

<sup>7</sup> İkiri Yasu ka tiki iini, "O'o 'bitüngngö ya, taalo o'o nussu niimö yeede ka talingga ya, lakiini ara o'o saga tussu taka öccö."

<sup>8</sup> İkiri Bütrüs ka tiki iini, "Taalo o'o nara tagunu a'a ka uune 'do."

A Yasu tiki iini, "Kede ka titaaalo nata-gunu o'o ka uune ya, taalo o'o nara tosse ka niimö nya a'a."

<sup>9</sup> İkiri Samaan Bütrüs ka tiki, "Ka Tataalaana, fa tagala a'a ka uune unggodho eege, agala a'a ka ii sine nya üüdü afe'de."

<sup>10</sup> İkiri Yasu ka tiki iini, "Ömö'di ya agoodene ya, a tinsili ka oona 'do, taalo ama tagoodene ka oona nye'd'e, illi

uune sugi, kinsili aaga lakiini taalo aaga nye'd'de kinsili ka nanggeedi."

<sup>11</sup> Yasu iki a'da, "Taalo aaga nye'd'de kinsili ka nanggeedi," kudumma iini ka tussu a'da mada i'i yungno atümmünü i'i a naguugaara.

<sup>12</sup> A kini ka ndagala eege ka uune agirni ten'di iini ka oona afada aco a 'buugu ma kuri, iki eene, "Kussu aaga nüümö yeede ka talinggo ana aaga ya?

<sup>13</sup> Kümmünü aaga a'a a'da 'Tatalaana' nja 'Uugaara,' a'da tumma dhorro kudumma a'a namiini.

<sup>14</sup> A 'bitingngö a'a na Uugaara nja Tatalaana nagunu a'a aaga ka uune, aaga tekere aaga kunu ajeene ka uune.

<sup>15</sup> Nala a'a aaga ka fiinii miini amang kada talinggo afa meede ka tagalinggo ada kungno.

<sup>16</sup> Ara a'a tadirina tumma aaga dhorro, taalo ömö'di ya linggo ya agii'bi ömö'di yiini ka talinggo nja iini ya, a tafiiñi taalo agii'bi ömö'di ya agürünü i'i ya.

<sup>17</sup> A 'bitingngö sa aaga tussu fiinii ya dhorro ya, ara aaga taluna baraka kada kara talinggo iini."

<sup>18</sup> "Taalo a'a neema tumma aaga nye'd'de, nussu a'a kadu neede ka tagesse eege no, lakiini tumma na Sorne ma Masala ka takiki no kara co ööye miini a'da, 'Ömö'di ya agu kuri yeede ya apadaga kede alingga a'a."

<sup>19</sup> Ara a'a tadirina aaga 'bitingngö a'da küfürü tüünidene, amang kene kara tö'dö aaga tamma a'da a'a namiini.

<sup>20</sup> Tumma dhorro ara a'a tadirina aaga, ka ömö'di tiya amma ka kadu tanno eede ka kürünü eege no, amma kede, ömö'di ya amma kede ya, i'i ya amma ka ömö'di tiya agürünü a'a ya."

*Yasu eema tumma ma tümmü adene tanno iini*

(Matta 26.20-25; Murkus 14.17-21; Lüüka 22.21-23)

<sup>21</sup> Ka Yasu ka ndageema tumma ya, oona tarooro ka ta'deedene kini, ikiri ka tiki eene, "Ara a'a tadirina tumma aaga dhorro, ömö'di ingitta ana kada atümmü a'a ümmünü a'a a kadu."

<sup>22</sup> Ikiri kadalaadene ka tasalaana ka oona unggodho eege, kadhere taalo kussu ömö'di yiini ka teema kini ka oona ya.

<sup>23</sup> A tatalaadene inggide a Yasu ka asaasa i'i, emmi kini kete.

<sup>24</sup> Ikiri Samaan Bütrüs ka tage'de i'i ana üüdü indini i'i, "Mada i'i yungno iini ka teema kini ka oona?"

<sup>25</sup> Ikiri tatalaadene ya miini ya ka tasigi ka Yasu kete indini i'i, "Tatalaana, mada i'i ya miini ungno si?"

<sup>26</sup> Ikiri Yasu ka tiki iini, "Ömö'di yeede ka tata miteene ka kala nanangnga iini ya." Ikiri Yasu ka tindi miteene ata ka kala anangnga a Yahüusa Askaryüütü 'bii'bala ya Samaan.

<sup>27</sup> Ka Yahüusa ka ndagu miteene ya, ikiri Ebliisi ka taka kini, ikiri Yasu ka tiki iini, "Üün nüümö yüüdü ka asasa talinggo ya, nafa tadoono ku'bu."

<sup>28</sup> A kadu na emmi ma tagu eema no, taalo kussu a'da i'i iki iini nggeege amana?

<sup>29</sup> A Yahüusa i'i yungno amünüögü njoko ma gürüsü eene, kikiri ka tiki kide a'da Yasu agürünü i'i a'da aaco tana eema ma taanyara nja iini kara co tagona eema a kadu tanno eema ka titalo kene no.

<sup>30</sup> Ka Yahüusa ka tamü miteene, arooro kico kürö a'da aga ooso 'buugu.

### *Tumma na issi no*

<sup>31</sup> Kini kico kürö ikiri Yasu ka tiki, "Bitingngö ara 'Bii'bala ma Tadü'dü tafünügünja ko'do, a Masala tafünüögü ko'do kini.

<sup>32</sup> Üürü tidihindhi na Masala kungngi iini ka oona, ara Masala tanangnga 'Bii'bala ka tidihindhi ana oogo, mara tanangnga i'i ka tidihindhi areere.

<sup>33</sup> Laala eede, taalo a'a nara tagünü nja aaga dhabbu. Ara aaga saga tawwa a'a taalo aaga ka taluna a'a afa ma tiya eede ka tirina a Yaühüüd ya kungngo, ara a'a tadirina aaga 'bitingngö. 'Buugu yeede kico ya, taalo aaga ka tö'dö kide.

<sup>34</sup> "Ara a'a tadirina tumma na issi no aaga, aaga asaasa ajeene afa meede ka asaasa aaga kungngo, aaga asaasa ajeene.

<sup>35</sup> Kada kasaasa ajeene ya, ara kadu nye'd'de kungngi tussu a'da aaga kadalaadene tanno eede."

*Yasu eema tumma ma ta'düsünü i'i na Bütrüs*

(Matta 26.31-35; Murkus 14.27-31; Lüüka 22.31-34)

<sup>36</sup> Ikiri Samaan Bütrüs ka tiki iini, "Ara o'o co kiga sii Uugaara?"

A Yasu tiki iini, "Buugu yeede kara co ya taalo o'o nara tambaanya co eede keere 'bitingngö, lakiini ara o'o saga co eede keere ka uuru töccö."

<sup>37</sup> Ikiri Bütrüs ka tiki iini, "Ka Uugaara, minna tagu a'a nitaalo natambaanya co üüdü keere 'bitingngö? Namma a'a ka teyi ka üüdü ma o'o."

<sup>38</sup> A Yasu tiki iini, "Ara o'o teyi ka üüdü ma a'a? Tumma dhorro eege kungngi eede ka tadirina o'o, ka dhimbü ka tufurü tafara ya, ara o'o ta'düsünü a'a tiidoona."

**14***Yasu a fiinii ma co ka Pupa*

<sup>1</sup> "Aaga fa ta'deedene ka nanggeedi. Aaga amma ka Masala aaga tamma kede afe'de.

<sup>2</sup> Naala kungngo ka 'dī tiya Pupa tiya eede dhabbu, üürü taalo nggeege, taalo a'a nagadirina aaga ara a'a co tindinaana 'buugu kada ku'bu.

<sup>3</sup> A kede kara co, naco tindinaana 'buugu ada ku'bu ya, nafada nöö'dö ta'duga aaga nja a'a, aaga co tanna ka 'buugu ya kara co tanna kide ya nja a'a.

<sup>4</sup> Kussu aaga fiinii ma 'buugu tiya eede kara co ya."

*Yasu a fiinii ma co ka Pupa*

<sup>5</sup> İkiri Tööma ka tiki iini, "Ka Tataalaana, taalo ungngo kussu kita üüdü kara co ya, ara ungngo tussu fiinii nya?"

<sup>6</sup> A Yasu tiki iini, "A'a nungngo na fiinii, a'a nungngo na dhorro nja tefe ka 'dī. Taalo ömö'di ma co ka Pupa illi ndama a'a.

<sup>7</sup> Kada kussu a'a dhorro ya, ara aaga tagussu Pupa yeede afe'de. Ndama uuru tanno kussu aaga i'i aaga tadinö kini."

<sup>8</sup> A Filibüs tiki iini, "Ka Uugaara, la ungngo ka Pupa sugi."

<sup>9</sup> İkiri Yasu ka tiki iini, "Ka Filibüs, naneene a'a nja aaga magaada 'do na o'o saga taalo nussu a'a? Ömö'di ya adinö kede ya, i'i ya adinö ka Pupa, na o'o saga tiki a'da la ungngo ka Pupa nya?

<sup>10</sup> Taalo o'o namma a'da a'a na ka Pupa a Pupa ungngo eede? Tumma neede ka teemaga co o'o no, taalo a'a neema eege ndama eyi tiya eede, lakiini Pupa ya anna kede ka oona ya, i'i yungngo alinggo linggo niini.

<sup>11</sup> "Aaga amma ka tumma tanno eede kede ka tiki aaga a'da a'a na ka Pupa a Pupa ungngo eede. Lakiini üürü aaga taalo kamma kede, aaga amma kudumma linggo ka eyi tiya iini.

<sup>12</sup> Ara a'a ta dirina tumma aaga dhorro, ömö'di ya amma kede ya a talingga eema yeede ka talingga ya, kara tüünii kii'bi i'i kudumma eede kara tunggeene naco ka Pupa tiya eede.

<sup>13</sup> A nüümö yaada ka asaasa ana eere tiya eede ya, ara a'a talingga amang ka Pupa tindhiginja ko'do ka 'Bil'bala.

<sup>14</sup> Kada kara tasaasa nüümö öccö ana eere tiya eede ara a'a talingga.

*Yasu eema tö'dö ma Koronggore tiya Insili ya*

<sup>15</sup> "Kada katasaasa a'a ara aaga tümmü tumma neede.

<sup>16</sup> Ara a'a tarangnga Pupa yeede anangnga Tatamünögü ko'do öccö aaga aneene nja aaga ta'billi,

<sup>17</sup> i'i ya Koronggore ma timin'da ya. Ya kadu ma 'büdhülü taalo ka tambaanya tamma kini ya, kudumma eene taalo kiji i'i kitaalo kussu i'i. Lakiini aaga kungngo kussu i'i, kudumma iini ara tüütü nya aaga anna kada ka oona.

<sup>18</sup> Taalo a'a nara tinyi aaga ku'bu kada nagüülö, ara a'a tafada nöö'dö kada.

<sup>19</sup> A füngngö idhilli kungngo, taalo kadu ma 'büdhülü kara tiji a'a, lakiini aaga kungngo katassa kede, kudumma eede ka eefe ka 'dī, aaga tefe ka 'dī tekere.

<sup>20</sup> Ka uuru tanno miini no, ara aaga tussu a'da a'a na ka Pupa tiya eede, aaga kungngo eede, a'a nungngo ada.

<sup>21</sup> Ömö'di ya amma ka tumma tanno eede afa kide i'i ya asaasa a'a, ömö'di ya asaasa a'a ya, a Pupa yeede tasaasa i'i, a'a tasaasa i'i nadele oona neede iini."

<sup>22</sup> İkiri Yahüüsa, (taalo Yahüüsa Askaryüüti i'i ya miini) ka tiki iini, "Ka Tataalaana, minna agu o'o nadele oona ungngo nitaalo natatale oona a kadu ka 'buugu koona 'do?"

<sup>23</sup> A Yasu tiki iini, "Ömö'di ya asaasa a'a ya, ara taföönyö talaana neede. A Pupa yeede tasaasa i'i, ungngo tö'dö kini ma taneene nja iini.

<sup>24</sup> Ömö'di ya taalo asaasa a'a ya, taalo ataföönyö talaana neede, a tumma no taalo neede, tumma na Pupa yeede ka kürünü a'a iini.

<sup>25</sup> "Nadirina tumma aaga 'bitüngngö a'da naleefe a'a nja aaga.

<sup>26</sup> Lakiini Tatamünögü ko'do, Koronggore ya Insili ya, ya Pupa tiya eede ka tagürünü i'i ana eere tiya eede, i'i yungngo ara talaana aaga, aaga tagüügi eema yeede ka tagadünögü aaga ya nye'd'e kungngo.

<sup>27</sup> "Ara a'a tinyi ta'diila kada ku'bu, nanangnga ta'diila neede aaga taalo atafeene afa ya kadu ma 'büdhülü kamana aaga kungngo, aaga fa ta'deedene ka nanggeedi aaga tafa tari'ba.

<sup>28</sup> Kaföönyö aaga eede ka tiki aaga a'da, 'Ara a'a tunggeene na saga tafada nöö'dö kada.' A kada ka tasaasa a'a ara aaga tagadhodho kudumma eede ka tiki a'da ara a'a co ka Pupa kudumma Pupa adhabbu a'a.

<sup>29</sup> Nilli a'a ka tirina aaga 'bitüngngö a'da üfürü tüünidene amang kene tara tüünidene, aaga tamma kide.

<sup>30</sup> Taalo a'a nara teema tumma nja aaga dhabbu kudumma uugaara ma 'büdhülü tö'dö, lakiini i'i taalo uugaara ma a'a,

<sup>31</sup> lakiini amang ka kadu ma 'büdhülü tussu a'da nasaasa a'a Pupa, a tumma na Pupa ka tirina a'a no nalinggo a'a iini.

"Aaga fiki'dö angnga tunggeene ndama kita.

## 15

*Yasu i'i ya taki'bim'bi tanno dhorro no*

<sup>1</sup> "A'a na taki'bim'bi tanno dhorro no, a Pupa yeede i'i ya yungngo afa ka ki'bim'bi.

<sup>2</sup> Seldhe yeede ya taalo ana iiye ya adhege i'i co, a seldhe ya ara tana iiye ya indinaanago amang kini tana iiye dhabbu.

<sup>3</sup> A 'bitingngö kinsili aaga kudumma a tumma tanno eede ka tirina aaga no.

<sup>4</sup> Aaga amma'da kede afa ma a'a nya aaga kungngo, seldhe taalo ara teene unggodho i'i illi kini ka tutü kada ki'bim'bi, aaga kafifi nggeege, kada katitalo kamma'da kede ya, taalo aaga kara tö'dö keere ana iiye.

<sup>5</sup> "A'a na taki'bim'bi aaga ka naseldhe, ömö'di ya ütü nya a'a ya a'a tutü kini, atö'dö a töyö dhabbu, lakiini kede ka titatalo ya, taalo aaga kara tüünii nüümö.

<sup>6</sup> Ömö'di ya taalo ütü nya a'a ya, i'i afeene nya seldhe tiya kadhfijinä co arume, naseldhe na miini no ka'dugadene kadhfijinä ka issi kafinne.

<sup>7</sup> Kada kara tutü nya a'a a tumma neede tutü kada, nüümö yaada ka tasaasa ya, ara aaga taluna.

<sup>8</sup> Ara Pupa yeede tidhindhi kada ka tö'dö ana iiye dhabbu, nggeege ara aaga ta kadaladaane tanno eede.

<sup>9</sup> "Nasaasa a'a aaga afa ma Pupa tiya eede ka asaasa a'a kungngo, 'bitingngö aaga tutü ka tasaasa ma a'a.

<sup>10</sup> Kada kara tafa ka tumma tanno eede, ara aaga tutü ka tasaasa tanno eede, afa meede ka afa ka tumma tanno Pupa tiya eede nütü ka tasaasa tanno iini.

<sup>11</sup> A'a nadirina aaga nggeege amang ka dhodho tanno eede tutü kada a dhodho tanno ada tatüümö.

<sup>12</sup> Tumma neede eege kungngo, a'da aaga tasaasa ajeene afa meede ka asaasa aaga kungngo.

<sup>13</sup> Taalo tasaasa ma tidhindhi afa ma tano kungngo, ma ömö'di ka tüpü eyi iini eyi ka üdü ma kateefe miini.

<sup>14</sup> Aaga ka kateefe ma a'a, kada kara talinggo a tumma tanno eede ka anangnga aaga no.

<sup>15</sup> Taalo a'a nara tümmünü aaga a'da kasaga ndama uru tanno, kudumma a tasaga taalo ussu nüümö ya ömö'di tiya iini ka talinggo ya nye'de. Lakiini ara a'a tümmünü aaga a'da kateefe ma a'a, kudumma eede ka tirina eema nye'de yeede ka taföönyö ka Pupa tiya eede ya aaga.

<sup>16</sup> Taalo aaga kungngo kagesse a'a, lakiini a'a nagesse aaga nagürünü aaga ma co tö'dö ana iiye tanno ara teene ta'billi no,

nüümö yaada ka asaasa ana eere tiya eede ya, ara Pupa tanangnga aaga.

<sup>17</sup> A tumma neede eege kungngo, aaga tasaasa ajeene dhorro.

*Kadu ma 'büdhülü taalo kasaasa kadalaaadene*

<sup>18</sup> "Ka kadu kara takirimi aaga, aaga tagügi a'da kakagirimi a'a ka dhidha.

<sup>19</sup> Kada kara ta kadu ma 'büdhülü ya, ara kadu ma 'büdhülü tasaasa aaga kada kadu tanno eene. Kudumma eede ka tagesse aaga ka 'büdhülü, aaga taalo kama iini afe'de i'i yungngo a kadu ma 'büdhülü kanu kada.

<sup>20</sup> Aaga agügi tumma neede ka tageema nya aaga no, 'Taalo ömö'di ya alingga ya agii'bi ömö'di yiini ka talinggo nya iini ya.' Kene ka takirimi a'a ya, kara takirimi aaga afe'de, a kene kara taföönyö talaana neede ya, kara taföönyö tumma naada.

<sup>21</sup> Kara talinggo ana aaga nggeege nye'de kungngo kudumma eere tiya eede, kudumma eene taalo kussu ömö'di ya agürünü a'a ya.

<sup>22</sup> Kede kara tafa tagöö'dö nadageema nya eene ya, taalo tatoroko ka tagöö'dö kene ka oona, lakiini 'bitingngö taalo nüümö ma takara kene ka oona iini afe'de, kudumma eene ka ndaföönyö.

<sup>23</sup> Ömö'di ya kirimi a'a ya, i'i ya akirimi Pupa yeede afe'de.

<sup>24</sup> Kede ka tafa tagalinggo eema kene ka söödö ya, a'da taalo ömö'di könö agalinggo nggeege, taalo tatoroko ka töö'dö kene, lakiini eege 'bitingngö ka adinö ka eema keefe, kassa ka tutü kadakirimi a'a, nya Pupa tiya eede.

<sup>25</sup> Lakiini amang ka tumma tanno kakirinja ka Sorne ma seriye tiya eene ya tö'dö timin'da, 'Eege kakirimi a'a a'da taalo nagüünii tatoroko.\*'

<sup>26</sup> "Ka Tatamünüğü ko'do ka öö'dö, yeede kara tagürünü kada ndama Pupa, Koronggore ma timin'da ya icci kürö ndama Pupa ya, i'i yungngo ateema tumma ma a'a.

<sup>27</sup> Lakiini aaga tekere ara aaga teema tumma ma a'a co a kadu kudumma ada kada kaneene nya a'a ka dhidha.

## 16

<sup>1</sup> "Nadirina a'a tumma no aaga in'dili kungngo ii'di aaga tapadaga keere ka tumma tanno eede.

<sup>2</sup> Ara aaga sa kadasorodene ka naala ma talaana, tumma dhorro uru kinggide kara sa köö'dö, a kadu na kirina aaga no tiki kide a'da eege kalinggo ada a Masala.

\* 15:25 15.25 Tüüsü ma nakaaru 35.19; Tüüsü ma nakaaru 69.4

<sup>3</sup> Eege kalinggo nggeege kudumma eene katitaalo kussu Pupa yeede kitaalo kussu a'.

<sup>4</sup> Nadirina a'a tumma no aaga, amang ka uuru tanno miini no kara tö'dö, aaga tagiigü a'da nagadirina a'a aaga, taalo a'a nagadirina aaga kaa dhidha kudumma eede ka taleefe taganeene nja aaga.

#### *Lingga na Koronggore tiya Insili ya*

<sup>5</sup> "A 'bitingngö ara a'a tunggeene naco ka ömö'dü tiya agürünü a'a ya, taalo ömö'dü öccö ana kada tindini a'a a'da, 'Ara o'o co kiga?'

<sup>6</sup> Kudumma eede ka tiri tumma no, aaga tümmü nanggeedi.

<sup>7</sup> Lakiini ara a'a tadirina tumma aaga dhorro, agala ka'diila nja aaga eede kara tunggeene adha, kede ka titalo nunggeene, taalo Tatamünügü ko'do ya afa kada ya ara tö'dö, lakiini kede kara tunggeene ara a'a tagürünü i'i kada.

<sup>8</sup> A kini kara tö'dö ya, aala tatoroko ma kadu ma 'büdhü'lü eene nja ta'diila nja tahükümü tanno Masala.

<sup>9</sup> Kudumma tatoroko, kudumma eene taalo kamma kede.

<sup>10</sup> Kudumma eene taalo kümmü tumma ma Masala ta'diila, yungno eede kara tunggeene naco ka Pupa, aaga taalo ka tiji a'a afe'de.

<sup>11</sup> Kudumma tahükümü, asa uugaara ma 'büdhü'lü tahükümüdene.

<sup>12</sup> "Tumma kungno eede kadhabbuu eede ka asasa tadirina aaga, lakiini aaga 'bitingngö ya, taalo aaga kara tambaanya eege.

<sup>13</sup> Aga Koronggore ma timin'da ya kara tö'dö, assa ka talaana aaga ka eema tiya timin'da ya nye'd'e de kungno. Kudumma iini taalo eema tumma ma eyi tiya iini, lakiini i'i ara teema tumma niini ka taföönyö no, ara teema nja aaga ma niimü tiya tö'dö ya.

<sup>14</sup> I'i ara tindhügü a'a ko'do, kudumma iini ka ama tumma neede adünügü aaga.

<sup>15</sup> Eema ya ka Pupa tiya eede ya nye'd'e yeede i'i ya miini. Yungno eede ka tiki aaga a'da Koronggore ara ta'duga tumma kede anangnga aaga ka tessu eege.

#### *Fara ara tatem'bele kada dhorro*

<sup>16</sup> "Amussu kungno ya taalo aaga kara tiji a'a, amussu kungno afe'de ara aaga tiji a'a."

<sup>17</sup> İkiri kadalaadene niini köönö ka tindini ajeene unggodho eege kiki a'da, "Minna yungno iini ka teema iki a'da, 'Amussu kungno taalo aaga kara tiji a'a, amussu kungno ara aaga tiji a'a, 'ana 'Kudumma eede kara co ka Pupa'?"

<sup>18</sup> Kindini ajeene kiki a'da, "Minna i'i yungno ana eere a'da, 'Idhilli ungngö'?

Taalo angnga kussu niimö yiini ka teema ya."

<sup>19</sup> İkiri Yasu ka tessu a'da eege kasaasa tindini i'i, ikiri ka tiki eene, "Aaga kindini ajeene ma niimö tiya eede ka teema ya, Idhilli kungno taalo aaga kara tiji a'a, idhilli kungno ara aaga tiji a'a?"

<sup>20</sup> Ara a'a tadirina tumma aaga dhorro, aaga sa kafara, aaga tüünü ngooro ara kadu ma 'büdhü'lü katadhadho. Ara aaga tadinigöögö aaga tiki iiye ku'bü, lakiini tadinigöögö naada no kassa ka ta'bele kada dhorro.

<sup>21</sup> Aka kara teene 'bii'bala a tin'd'i, kudumma uuru ma teene tanno oono ka ndö'dö, lakiini ka 'bii'bala kara teenedene ya, müürü ma tin'd'i miini kono ka tadhodho kudumma oono ka tageene ada ömö'dü ka 'büdhü'lü.

<sup>22</sup> A 'bitingngö aaga kafigi nggeege, kadinigöögö aaga 'bitingngö lakiini kede ka tafada ya, ara nanggeedi naada sa katadhadho ömö'dü ma ta'duga kada kungno itaalo.

<sup>23</sup> "Ka uuru tanno miini no, taalo aaga ka tasaasa niimö kede, ara a'a tadirina tumma aaga dhorro, niimö yaada katasaasa ka Pupa ana eere tiya eede ya, ara tanangnga aaga.

<sup>24</sup> Ta'bitingngö taalo aaga karangnga niimö öccö ana eere tiya eede, aaga arangnga ara tananja aaga amang ka dhorro tanno ada tatümö.

<sup>25</sup> "Nadiri a'a tumma aaga a tafeene ma tumma ün'düngüngö, lakiini uuru kinggide kassa ka öö'dö taalo a'a nara teema a tafeene ma tumma nja aaga, ara a'a teema tumma ma Pupa tiya eede nja aaga 'biimü kungno.

<sup>26</sup> Ka uuru tanno miini no ara aaga tarangnga ana eere ma a'a taalo a'a natiki a'da ara a'a tarangnga Pupa ka üüdü ma aaga.

<sup>27</sup> Kaw, Pupa ka eyi tiya iini kungno ya, asaasa aaga kudumma ada ka asasa a'a, aaga tamma a'da a'a nøö'dö ndama Pupa.

<sup>28</sup> A'a nøö'dö ndama Pupa nøö'dö ka 'büdhü'lü, a 'bitingngö ara a'a tinyi 'büdhü'lü ku'bü napadaga ka Pupa."

<sup>29</sup> İkiri kadalaadene niini ka tiki iini, "O'o 'bitingngö neema o'o tumma dhorro, taalo o'o neema eege a tafeene ma tumma.

<sup>30</sup> A 'bitingngö kussu ungngö a'da nussu o'o eema nye'd'e de kungno, na o'o taalo nama ömö'dü ka tindini o'o ma niimö 'do, i'yungno iidi ka tamma a'da nøö'dö o'o ndama Masala."

<sup>31</sup> İkiri Yasu ka tiki eene, "Sa aaga tamma keere kungno.

<sup>32</sup> Uuru kinggide kara tö'dö, eege ka ndö'dö 'bitingngö, aaga sa ka tanyala

njaana ku'bu, ömö'di tapadaga co 'buugu tiya iini unggodho i'i aaga tinyi a'a ku'bu unggodho a'a, lakiini taalo a'a nara taneene unggodho a'a kudumma ma Pupa tyia eede ataneene nja a'a.

<sup>33</sup> "Nadirina a'a eema ya aaga amang kada taluna ta'diila kede, ara aaga tadhägürü ka 'büdhülü tiya, lakiini aaga fa tariba, nagii'bi a'a türü ma 'büdhülü."

## 17

*Yasu afara ka Masala ma eyi tiya iini*

<sup>1</sup> Ka Yasu ka tiri tumma no ya, assa co 'dotombo'do iki,

"Pupa, asa uuru tö'dö, indhigü 'Bii'bala yüüdü ko'do amang kini tafünögü o'o ko'do.

<sup>2</sup> O'o nanangnga tauugaara ma kadu nye'de iini, amang kini tanangnga tefe ka 'di ta'billi a kadu nye'de nüüdü ka anangnga iini no.

<sup>3</sup> A tefe ka 'di ta'billi meene ka tessu a'da, o'o na Masala tammo dhorro mo unggodho mo, kussu Yasu Almasiihi yüüdü ka kürünü i'i ya.

<sup>4</sup> Nö'dö a'a a tidihindhi o'o ka 'büdhülü kita ma tatüümö linggo nüüdü ka anangnga a'a a'da nalinggo no.

<sup>5</sup> Nanangnga tidihindhi a'a 'bitingngö küdü kidha Pupa yeede a tidihindhi na kanna kede nja o'o no a'da üfürü 'büdhülü tagalinggo adene."

*Yasu afara ka Masala kudumma kadaladene tanno iini*

<sup>6</sup> "Nanangnga eere yüüdü ka tessu adene ka kadu tanno üüdü ka anangnga euge ka 'büdhülü no. Kadu nüüdü euge kamiini, nanangnga o'o euge a'a kikirii ka föönyö tumma nüüdü dhorro.

<sup>7</sup> A 'bitingngö euge kussu a'da eema yüüdü ka anangnga a'a nye'de ya, ö'dö ndama o'o.

<sup>8</sup> Nadirina tumma nüüdü ka tirina a'a no eene kamma kide. Euge kussu a'da tumma dhorro a'da nø'dö a'a ndama o'o, kamma a'da o'o nagürünü a'a.

<sup>9</sup> Ara a'a tafara ka Masala kudumma eene. Taalo a'a natafara kudumma a kadu ma 'büdhülü, lakiini kudumma a kadu tanno üüdü ka anangnga a'a no, kudumma eene kada kadu tanno üüdü.

<sup>10</sup> Eema ya inggide nye'de yüüdü i'i ya miini, aya küdü ya nye'de, yeede i'i ya miini. A'a tidihindhi ana euge.

<sup>11</sup> Taalo a'a nara tüütü ka 'büdhülü, illi euge kara tüütü kide, ara a'a tö'dö küdü, Pupa yeede ya Insili ya, afa kene a türü ma eere tiya üüdü ka anangnga a'a ya, amang kene ta unggodho, afa ma o'o nja a'a kada unggodho kungngo.

<sup>12</sup> Kede ka taganeene nja eene ka 'büdhülü ya nakafa a'a kene ana eere tiya üüdü ka anangnga a'a ya, nakafa a'a kene taalo könö ana kene aama illi ömö'di ya illi ka tagaama ya afa ma tiya Sorne ka tiki ya kungngo.

<sup>13</sup> "Bitingngö ara a'a tö'dö küdü, a'a nadiri tumma no kede ka aleefe ka 'büdhülü, amang ka dhodho tanno eede tanna kene ka oona.

<sup>14</sup> Nadirina tumma nüüdü eene, illi kadu ma 'büdhülü kanu kene kudumma eene ka titaalo kama 'büdhülü, afa ma a'a taalo nama 'büdhülü.

<sup>15</sup> Taalo a'a nikii o'o a'da na'duga euge ka 'büdhülü, lakiini na o'o tafa kene kudumma Ebliisi.

<sup>16</sup> Eege taalo kama 'büdhülü a'a taalo nama 'büdhülü afe'de.

<sup>17</sup> Nanangnga euge ka tinsili a tumma tanno üüdü na dhorro no, kudumma tumma tanno üüdü ka dhorro.

<sup>18</sup> A'a nagürünü euge ka 'büdhülü afa müüdü ka kürünü a'a ka 'büdhülü kungngo.

<sup>19</sup> Nanangnga a'a eyi yeede ka tinsili kudumma eene, amang kene tinsili tekere ka tumma tanno üüdü na dhorro no."

*Yasu afara ka Masala ma kadu tanno amma no*

<sup>20</sup> "Taalo a'a nafara kene kudumma eene unggodho euge, lakiini a'a nafara ka kadu tanno ara tamma kede no a tamma ka tumma tanno eene.

<sup>21</sup> Nanangnga euge kada unggodho nye'de kadanna kaja ka oona, afa ma o'o ka tanna kede, a'a nungngo küdü, fa kene tekere kanna kaja ka oona amang ka kadu ma 'büdhülü tessu a'da o'o nagürünü a'a.

<sup>22</sup> Nunggu a'a tidihindhi nüüdü ka anangnga a'a no nanangnga eene, amang kene ta unggodho afa ma angnga kada unggodho kungngo.

<sup>23</sup> A'a nungngo eene ka oona o'o nungngo eede ka oona amang kene ta unggodho tatüümö amang ka kadu tessu a'da o'o nagürünü a'a, o'o nasaasa euge afa müüdü ka asasa a'a kungngo.

<sup>24</sup> Ka Pupa, o'o nanangnga euge a'a nasaasa euge a'da kaneene nja a'a ka 'buugu tiya eede ka tanna kide ya, amang kene tiji tidihindhi nüüdü ka anangnga a'a no, kudumma üüdü ka asasa a'a a'da üfürü 'büdhülü tarü'bü adene.

<sup>25</sup> Ka Pupa ya a'diila ya, salla kadu ma 'büdhülü taalo kussu o'o illi a'a nungngo nussu o'o, a kadalaadene tessu a'da o'o nagürünü a'a.

<sup>26</sup> Nanangnga euge ka tessu o'o nara tala euge kide amang ka tasaasa tanno

kede no, tanna kene, a'a ka eyi tiya eede  
nanna kene."

## 18

*Tümmü adene na Yasu*  
(Matta 26.47-56; Murkus 14.43-50;  
Lüüka 22.47-53)

<sup>1</sup> Ka Yasu ka tüümö fara ka Masala ya, öö'dö kürö nja kadalaadene tanno iini kada'da Koolo ma Kitroön 'booro inggide ka 'buugu tiya miini ya, ikirü ka co nja kadalaadene tanno iini.

<sup>2</sup> A'da ussu Yahüüsä ya agüummünü i'i a kadu ya, ussu 'buugu ya, kudumma Yasu ka takicci tanna inggide nja kadalaadene tanno iini.

<sup>3</sup> Ikirü Yahüüsä ka öö'dö ka 'booro nja nasigira nja kadu tanno afa ka naguu-gaara ma ka'boge nja tanno naFariisi no kagürünü eäge a'da ka'duga lamba nja issi ma tam'bala kafinne nja eema ma koro'bo.

<sup>4</sup> Ikirü Yasu ka toreene nja eene a'da ussu nüümö ya atalinggo adene ana i'i ya, iki eene, "Kasaasa aaga mada?"

<sup>5</sup> Kiki, "Yasu ya ma Nasira ya."

A Yasu tiki eene, "A'a nungngo," a'da Yahüüsä ya ümmünü i'i a kadu yungngo a'düngnge nja eene.

<sup>6</sup> Aga Yasu ka tiki eene a'da, "A'a nungngo ya," kadagitigi keere ka'dünggö ka 'büdhülü.

<sup>7</sup> Ikirü Yasu ka tindini eäge afe'de, "Kasaasa aaga mada?"

Kiki a'da, "Yasu ya Nasira ya."

<sup>8</sup> Ikirü Yasu ka tiki eene a'da, "A'a niki aaga, a'a nungngo, üürü aaga kasaasa a'a, aaga fa ka kadu tanno kunggeene."

<sup>9</sup> A tumma niini ka tatiraana no co ööye miini, "Taalo a'a naama ömö'di öccö unggodho ana ka kadu tanno üüdü ka nanangnga a'a no."

<sup>10</sup> A'da kulu'ba ma dhonggoro mo mungngo a Samaan Bütrüs, ikirü ka fanna armuna tasigira ya uugaara ma ka'boge ka neeso ma kuri, ya ana eere a'da Malkis ya.

<sup>11</sup> Ikirü Yasu ka tiki a Bütrüs, "Apadaga kulu'ba ma dhonggoro mo müüdü co la miini, taalo a'a nara tooye ker'de ma dhügürü tiya Pupa tiya eede ka anangnga a'sa?"

### *Yasu ungngo kidha ma Hanan*

<sup>12</sup> Ikirü nasigira nja uugaara tiya eene nja nasigira ma la ma Masala ka tümmü Yasu kadimi'di i'i.

<sup>13</sup> Ka'duga Yasu kaco ka Hanan ana i'i ka dhidha, ya 'berki ma Kiyaafa ya i'i ya uugaara ma ka'boge ka ürüünü tiya miini ya.

<sup>14</sup> A Kiyaafa ya i'i yungngo akiki a Yahüüdü a'da, "A'diila ka ömö'di ungodho ka teyi ka üüdü ma kadu."

*Bütrüs a'düsünü Yasu*  
(Matta 26.69-70; Murkus 14.66-68;  
Lüüka 22.55-57)

<sup>15</sup> A Samaan Bütrüs nja tatalaadene töccö tako'd'o ka Yasu keere. Kudumma a tatalaadene tiya miini ya, tagussu ajeene nja uugaara ma ka'boge, aco nja Yasu ka 'booro tiya uugaara ma ka'boge.

<sup>16</sup> Ikirü Bütrüs ka töödhü ka inye ndama kürö, a tatalaadene öccö, ya uugaara ma ka'boge ka tussu i'i ya, tapadaga co kürö adageema nja 'badaada tammo mafa ka inye mo, oogo mungngo munggu Bütrüs co a 'büögöri.

<sup>17</sup> Ikirü 'badaada ma fa ka inye mo, ka tiki a Bütrüs, "Taalo o'o na tatalaadene tiya ömö'di tiya?"

A Bütrüs tiki, "Taalo a'a nja iini."

<sup>18</sup> Ikirü kadu ma linggo nja nasigira kafülle issi, ka'düngnge ana ko'do kille issi kudumma ma 'buugu ka tiocolo, ikirü Bütrüs ka a'düngnge ille issi nja eene.

*Uugaara ma ka'boge indini Yasu*  
(Matta 26.59-66; Murkus 14.55-64;  
Lüüka 22.66-71)

<sup>19</sup> Ikirü uugaara ma ka'boge ka tindini Yasu ma kadalaadene tanno iini nja taana tanno iini.

<sup>20</sup> A Yasu tiki iini, "Nageema a'a nja kadu ana ndanaaya ko'do nalaana kadu 'bucca ka naala ma talaana nja la ma Masala kita Yahüüdü ka tamiumi kide eäge nye'de ya, na a'a taalo nageema nüümö öccö unggodho ka küdhü.

<sup>21</sup> O'o nindini a'a amana? Indini kadu na föonyö kede no, niki a'a a'da minna, eäge kussu nüümö yeede ka tageema ya."

<sup>22</sup> Aga Yasu ka tiraana nggeege ya, ikirü tasigira ököönö aganna kini kete a abbü i'i ka tanggarama iki iini, "Neema o'o nja uugaara ma ka'boge nggeege amana?"

<sup>23</sup> Ikirü Yasu ka tiki iini, "Üürü nadiri a'a nüümö ya toroko ya, tiri i'i ka kadu kidha, üürü nadiri a'a tumma na dhorro no a minna agu o'o nabbü a'a?"

<sup>24</sup> Ikirü Hanan ka timi'di i'i uurugu i'i co Kiyaafa ya uugaara ma ka'boge ya.

*Bütrüs a'düsünü Almasiïhi teera tiidoona*

(Matta 26.71-75; Murkus 14.69-72;  
Lüüka 22.58-62)

<sup>25</sup> Ka Samaan Bütrüs ka 'düngnge ille issi ya, kikirü ka tiki iini, "Taalo o'o na tatalaadene tiya iini?"

A'düsünigï iki, "Taalo a'a nja iini."

26 İkiri könö ana ka kadu ma linggo tanno uugaara ma ka'boge ya siliga ma ömö'dü tiya Bütrüs ka rumuna i'i ka neeso ya, iki iini, "Taalo a'a nadinö küdü ka 'booro nja iini?"

27 A Bütrüs ta'düsünü i'i afe'de a'da arooro dhimbä ka tagolo fara.

*Yasu ungngo ka Bilatus kidha  
(Matta 27.1-2, 11-14; Murkus 15.1-5;  
Lütuka 23.1-5)*

28 A Yahüüdü tükirii ka a'duga Yasu ndama kita ka Kiyaafa kaco 'dü tiya uugaara ma Rööma ligitaka so'd'do, a Yahüüdü taalo kinyno 'dü tiya uugaara, kudumma eene taalo kasaasa tanyoro ka uuru ma taanyara amang kene tagu kuri ma Tada'da ka Erüidö.

29 İkiri Bilatus ka öö'dö kene kürö indini egee, "Kümmü aaga ömö'dü ya amana?"

30 Kiki, "Kini ka tafa tagüünü nüümö ya tatoroko ya, taalo ungngo kara tagöö'dö ana i'i o'o."

31 İkiri Bilatus ka tiki eene, "Aaga 'duga i'i aaga tümmü i'i a tumma ma seriye tiya ada."

Kiki iini, "Taalo ungngo kama tümmü i'i ma tiidi i'i."

32 A tumma na Yasu ka tiraana a'da inde niimi kara tatüümö timin'da.

33 İkiri Bilatus ka co la ma tauugaara atüümünü Yasu iki iini, "O'o na uugaara ma Yahüüdü?"

34 A Yasu tiki iini, "O'o natiraana ungodho o'o alla kadu könö kadirina o'o ma a'a?"

35 İkiri Bilatus ka tiki, "A'a na Yahüüdü sa? Kadu nüüdü nja naguugaara ma ka'boge kümmü o'o köö'dö ana o'o kede, nagalinggo o'o minna?"

36 İkiri Yasu ka tiki iini, "Tauugaara neede taalo kama 'büdhülü tiya, ka tauugaara tanno eede ka taga ama 'büdhülü ya, ara kadu neede tafaga Yahüüdü keere ka tümmü a'a, a tauugaara neede kitaalo kama 'büdhülü."

37 İkiri Bilatus ka tiki iini, "O'o no uugaara 'ba?"

A Yasu tiki iini, "O'o niki a'da a'a na uugaara, i'i yungno eede ka tageenedene nöö'dö ka 'büdhülü amang kede tadünnü tumma na dhorro no, ömö'dü ya adho ka fiinü ma timin'da ya, ara taföönyö tumma neede."

38 İkiri Bilatus ka tiki iini, "Minna yungno a dhorro ngo?" Kini ka tiraana nggege ikiri ka co ka Yahüüdü kürö afe'de iki eene, "Taalo a'a naduna nüümö ya toroko ya ma tümmü i'i iini.

39 Lakiini tafigi ma aaga katadaada napaapa a'a ka ömö'dü ma pabuusu ka uuru ma Taanyara ma Tada'da ka Erüidö,

kasaasa aaga a'a a'da napa ka uugaara ma Yahüüdü?"

40 Keela ka tumma ko'do nye'd'de kungngo kiki, "Kaw, fa tapa ka ömö'dü tiya, apa ka Barabas." A Barabas agosso ka taga'da 'buugu.

## 19

*Yasu ümmü adene ma teyi*

1 İkiri Bilatus ka anangnga kadu katabbü Yasu.

2 A nasigira tagu'daana tagiya ma ümme koona kanangnga kini ka üüdü kagirni ten'di ma tauugaara ma öödhe mo kini ka oona.

3 Keema kini ka oona, "A'a nööjülü uugaarda ma Yahüüdü," kabbü i'i ka karama.

4 A Bilatus tapadaga ka Yahüüdü iki eene, "Ara a'a tuurugu i'i kada kürö amang kada tussu a'da taalo a'a naluna nüümö ya toroko ya kini."

5 İkiri Yasu ka öö'dö kürö ana tagiya ma ümme ka üüdü a ten'di ma tauugaara ma öödhe mo ka oona, ikiri Bilatus ka tiki eene, "Aaga assa ka ömö'dü ungngo."

6 Aga naguugaara ma ka'boge nja nasi-gira ka tasala i'i ya, keela ka tumma kiki, "Bünnü i'i ka salii'bi! Bünnü i'i ka salii'bil!"

İkiri Bilatus ka tiki eene, "Aaga 'duga i'i aaga tabünnü ka salii'bi unggodho aaga taalo a'a naluna nüümö ya toroko ya kini ma tümmü i'i."

7 A Yahüüdü tiki iini, "Tumma ma seriye nüüdi kiki a'da, i'i ama teyi, kudumma iini ka tümmü eyi yiini kada 'Bii'bala ma Masala."

8 Ka Bilatus ka taföönyö tumma neene no ya, a ri'ba tümmü i'i dhindho.

9 Apadaga co la ma tauugaara afe'de iki a Yasu, "O'o no ma kiga 'do?" A Yasu tagin'di iini dhore kungingo.

10 İkiri Bilatus ka tiki iini, "Taalo o'o nasaasa teema nja a'a? Taalo o'o nussu a'da türü kungngo eede, ma tapa küdü, alla nabünnü o'o ka salii'bi?"

11 İkiri Yasu ka tiki iini, "Taalo o'o nana türü ma a'a, taalo Masala manangnga üüri o'o, lakiini ömö'dü ya ümmünü a'a o'o ya, tatoroko niini kadhabbu a tatoroko tanno üüdü."

12 A Bilatus taka'b'ba oona ma tasaasa tapa ka Yasu, lakiini Yahüüdü kiidhe ko'do kiki, "Küdü ka tapa kini taalo o'o na teefe ma Kayisar. Kudumma ömö'dü tiya ümmü eyi yiini kada uugaara ya i'i ya diidi tiya Kayisar."

13 Ka Bilatus ka ndaföönyö tumma no ya, ikiri ka tuurugu Yasu co kürö ara ka temmi ka kööyö ma tauugaara ka 'buugu tiya ana eere a'da 'dokon'da ya, (a kadu ma Yahüüdü ka tümmüneene a'da Kabatha).

<sup>14</sup> Uuru ma Juma eege kamiini, na kadu ka tindinaana oona ku'bu ma Taanyara ma Tada'da ka Erüüdö no, a'da asa 'buugu ta uru ka teene, ikirii ka tiki a Yahüüdü, "Uugaara yaada ungngo."

<sup>15</sup> Keela ka tumma kiki, "Aaga iidi i'i. Aaga iidi i'i. Bünnü i'i ka salii'bi."

ikirii Bilatus ka tiki eene, "Niidi uugaara yaada?"

ikirii naguugaara ma ka'boge ka tiki, "Taalo uugaara kidi illi Kayisar."

<sup>16</sup> Keere kungngó ikirii Bilatus ka anangnga i'i eene kaco tabünnü i'i ka salii'bi, kikirii ka 'duga Yasu kunggeene iini.

#### *Yasu abünnünja ka salii'bi*

(Matta 27.32–44; Murkus 15.21–32; Lüüka 23.26–43)

<sup>17</sup> Ikirii Yasu ka öö'dö kürö a'duga salii'bi yiini aco a 'buugu tiya ana eere a'da Dho ma Üüdü ya, (ya kadu ma Yahüüdü ka tümmünü i'i a'da Jüljüsä ya).

<sup>18</sup> Kabünnü i'i ka salii'bi kannna nja kadu keera, ömö'di öccö ka 'dakeyi tiya aya ka 'dakeyi tiya, a Yasu tanna kene ka söödö.

<sup>19</sup> Ikirii Bilatus ka ta'dala ndagee'di ko'do ka salii'bi adarigiri ada kide a'da, "YASU YA MA NASIRA YA I'I YA UUGAARA MA YAHÜÜDÜ."

<sup>20</sup> A Yahüüdü kadhabbu tagiirii tumma no, kudumma a 'buugu tiya miini ya akete ka anya, karigiri ada kide a tumma ma Yahüüdü nja tangga Latiini nja tangga Yünan.

<sup>21</sup> Ikirii naguugaara ma ka'boge ma Yahüüdü ka tiki a Bilatus, "Fa tarigiri a'da, 'Uugaara ma Yahüüdü,' lakiini arigiri a'da, 'Ömö'di ya iki a'da i'i ya Uugaara ma Yahüüdü.'"

<sup>22</sup> Ikirii Bilatus ka tiki eene, "Niümö yeede ka tarigiri ya, atütü nggege."

<sup>23</sup> Ka nasigira ka bünnü Yasu ka salii'bi ya, ka'duga en'di yiini kasümünaana kene ku'bu egüsö, a tasigira ya ta'duga yiini, aya ta'duga yiini, ka'duga ten'di ma oona miini mar'dadene ndama ta'doogo möö'dö ku'bu taalo mar'dadene nye'd'e.

<sup>24</sup> A nasigira tököö tiki, "Kada fa tagodho aana ten'di ma oona ku'bu, illi angnga tafanna muduru angnga taküüroönö mara ta'dingga ka mada?" Amang ka tumma ma sorne co ööye miini,

"Kasümünaana en'di yeede kene ku'bu kafanna tamuduru ma ten'di tammo eede."

I'i yungngo nasigira ka tüünü.

<sup>25</sup> A kadu na kanna ka salii'bi tiya Yasu kete no, niimö miini nja iinye tammo niimö, Mariyom aka ma Kilooaba nja Mariyom Almajdaliya.

<sup>26</sup> A Yasu tasala niimö miini ka 'dingnge nja tatalaadene tiya iini ka asaasa i'i ya, ikirii ka tiki a niimö tammo iini, "Aka mo, bii'bala yüüdü i'i yungngo,"

<sup>27</sup> ikirii ka tiki a tatalaadene, "Niümö müüdü oogo mungngo." Ndama uuru tanno miini no ikirii tatalaadene ka a'duga oogo aaco 'di tiya iini.

#### *Inde na Yasu*

(Matta 27.45–56; Murkus 15.33–41; Lüüka 23.44–49)

<sup>28</sup> Ikirii Yasu ka ndussu a'da asa eema nye'd'e tafaradene ikirii ka tiki, "Kagu tenege a'a." Afa ma tiya Sorne ka tiki ata tüümö.

<sup>29</sup> A'da maganna dho kide madigine a kembelö, kikirii ka mi'dini sifinja ka 'boola ma timerö kollo ka kembelö kunggu coo'do kümmünü kini ka niinö.

<sup>30</sup> Aga Yasu ka tagolo kembelö iki, "Asa eema tafaradene nye'd'e." Iti ku'bu eyi.

#### *Yasu üfüdene ka tügiile*

<sup>31</sup> Ka uuru tanno miini no kindinaana kadu oona ku'bu ma uuru ma Sa'bidi, ikirii Yahüüdü ka tiki a Bilatus a'da, afa kene ka'buna kadu na bünnünja ka salii'bi no ka uune kunggu eege ku'bu, kudumma Yahüüdü taalo kasaasa oofo yeene ka tüüti ka salii'bi ka uuru ma Sa'bidi, kudumma uuru ma Sa'bidi idhündhi.

<sup>32</sup> Ikirii nasigira köö'dö ka'buna uune na ömö'di tiya dhidha ya nja tiya eere ya na bünnünja ku'bu nja Yasu no.

<sup>33</sup> A kene kandö'dö ka Yasu ya, kaduna i'i ka teyi itaalo ka'buna i'i ka uune.

<sup>34</sup> Lakiini tasigira könö üfü i'i ka tügüle a kandha erüüdö tö'dö kürö nja 'büüdö.

<sup>35</sup> Ömö'di ya adinö kide ya eema tumma dhorro, i'i ussu a'da eema i'i tumma dhorro amang kada tamma.

<sup>36</sup> Amang ka tumma tanno sorne ka tiki no, co ööye miini, "Taalo ku'ba yiini ungodho kungngo ara ta'bunadene."

<sup>37</sup> A sorne tiki afe'de, "Ara kadu sa kiji ömö'di ya üfü i'i ya."

#### *Tatü'büdene na Yasu*

(Matta 27.57–61; Murkus 15.42–47; Lüüka 23.50–56)

<sup>38</sup> Ikirii Yüüsif ya ma Raama ya aga tatalaadene tiya Yasu ka küdhü, kudumma iini ka ri'ba a Yahüüdü, ödö iki a Bilatus anangnga Yasu iini, ikirii ka 'duga oofo ya Yasu.

<sup>39</sup> İkiri Niködimus ya agoo'dö ka Yasu ooso kungngo ya nja Yüüsif, ö'dö a kondho matonggoonyo a felengidhi tamana ma nakajine kukumu kadu kiidoona kaco ii-sine ana awwa.

<sup>40</sup> Kikirii ka 'duga Yasu ka'bürü i'i ka oona a ten'di nja kondho afa tatü'böönö na Yahüüdü no kungngo.

<sup>41</sup> Kita eene ka tabünnü Yasu kide ya, raaga inggide, ka raaga tiya miini ya la ma oofo inggide aleefe takii'dödene, ömö'dü tüfürü tatü'büdene kide.

<sup>42</sup> Kikirii ka tü'bü Yasu kide kudumma eene ka 'digaana, kudumma uuru ma tindinaana oona ku'bu, a la ma oofo akete kene taalo agu'b'ba.

## 20

### *Uuru ma tafiki'dö na Yasu*

<sup>1</sup> Ka uuru ma Lahada mikiiri Mariyom Almajdaliya ka tunggeene ligitaka so'd'o a'da aleefe 'buugu tirifirifi maco la ma oofo maluna dhembeliili ka a'dugadene ka iinye.

<sup>2</sup> Mikiiri ka tareere maco ka Samaan Bütrüs nja tatalaadene tiya Yasu ka asasa i'i ya, miki eene, "Ka'duga Uugaara ka la ma oofo ungngó taalo kussu kanangnga i'i kiga."

<sup>3</sup> İkiri Bütrüs nja tatalaadene töccö kaco la ma oofo.

<sup>4</sup> Kada kiiösö ateera meene ka dhidha illi tatalaadene aküpü Bütrüs aaco la ma oofo ka dhidha.

<sup>5</sup> Iti ku'bu asala co teene miini asala en'di yeene ka ta'bürü i'i ka oona iini ya, illi i'i taalo innyyo la ma oofo ka teene.

<sup>6</sup> A Samaan Bütrüs tö'dö kini keere arooro kico la ma oofo asala en'di ka 'büdhüüli.

<sup>7</sup> A mandiili ma aganna ka Yasu ka üüdü mo ta'dukunjaana ko'do, unggodho oogo, taalo makete ka en'di ma tatü'böönö.

<sup>8</sup> Keere kungngo, ikiri tatalaadene ya adhe a Bütrüs ya, kico la ma oofo asala amma kide.

<sup>9</sup> Kudumma eene ka tüfürü tagussu tumma na ka Sorne ma Masala no, iki a'da Yasu ara tafiki'dö ndama inde.

<sup>10</sup> İkiri kadalaadene ka tafada kaco 'dii tiya eene.

### *Yasu atele oona a Mariyom Almajdaliya (Matta 28.9-10; Murkus 16.9-11)*

<sup>11</sup> A Mariyom ta'dingnge ana ko'do ka la ma oofo kürö mafara, miti ku'bu ka la ma oofo mafara,

<sup>12</sup> maasala kadhangga keera ana en'di ka oona kada ka'bassa katemmi ka 'buugu tiya Yasu ka taganna kide ya, ököönö emmi ndama üüdü, aya ndama uune.

<sup>13</sup> A kadhangga na eera no tiki oono, "Ka aka mo, minna agu o'o nafara?"

Miki eene, "Ka'duga Uugaara yeede, taalo a'a nussu kanangnga i'i kiga?"

<sup>14</sup> Kono ka tiki nggeege ya, maasala keere maasala Yasu ka 'dingnge ana ko'do mitaalo mussu a'da Yasu i'i ya miini.

<sup>15</sup> İkiri Yasu ka tiki oono, "Ka aka mo, minna agu o'o nafara? O'o nasaasa mada?"

Miki kide a'da ömö'dü ma 'booro i'i ya miini, miki iini, "Ka ömö'dü eede, üürü o'o na'duga i'i 'dee, la a'a kita üüdü ka anangnga i'i kide ya amang kede co ta'duga i'i."

<sup>16</sup> İkiri Yasu ka tiki oono, "Ka Mariyom."

Mikiiri ka tassa kini mussu i'i, miki iini, "Rabbuni," Tatalaana a tangga Yahüüdü.

<sup>17</sup> İkiri Yasu ka tiki oono, "Fa tümmü a'a ka oona a niisö, kudumma eede ka tüfürü tasirigö coo'do ka Pupa, lakiini unggeene naco ka nagöre tanno eede no niki eene a'da, 'Ara a'a co ka Pupa tiya eede a'da a Pupa tiya ada, Masala meede a'da ma tammo ada afe'de."

<sup>18</sup> Mikiiri Mariyom Almajdaliya ka tafada maco madirina eema a kadalaadene a'da oogo madinö ka Uugaara, oogo madirina eene a'da i'i ya tirina tumma no oono.

*Yasu atele oona a kadalaadene tanno iini*

*(Matta 28.16-20; Murkus 16.14-18; Lüüka 24.36-49)*

<sup>19</sup> Ka uuru ma Lahada siiya kungngo ka kanna kadalaadene ka la, keere ka naginyeene eene kari'ba a Yahüüdü. İkiri ka öö'dö a'dingnge kene ka söödö, iki eene, "A'a nööjüli aaga."

<sup>20</sup> İkiri ka ala iisine eene nja tügüle, kikiiri kadalaadene ka tadhodho kene ka tasala Uugaara.

<sup>21</sup> İkiri Yasu ka tiki eene afe'de, "Nööjüli aaga, afa ma Pupa ka kürünü a'a kungngo, ar a'a tagürüü aaga."

<sup>22</sup> Kini ka tiraana nggeege ya, ikiri ka fülle ada kene ka oona iki eene, "Aaga 'duga Koronggore ya Insili ya."

<sup>23</sup> Üürü aaga kaadha ka tatoroko tanno ömö'dü kara taadha, üürü aaga taalo kaadha kene, taalo kara taadha."

### *Yasu atele oona a Tööma*

<sup>24</sup> A tatalaadene ököönö ana kene no öö'dö kada'baaga kafünü eera no ana eere a'da Tööma (a'da Miiso) akitalo, ya Yasu ka tagöö'dö kene.

<sup>25</sup> İkiri kadalaadene ka tiki iini, "Kadönö ungnö ka Uugaara."

İkiri ka tiki eene, "Taalo a'a nara tamma illi eede ka tasala kijeene ma namusmara kini ka iisine nanangnga 'banüüsö yeede ka

'buugu ma namusmara, nanangnga iisine neede kini ka tögüle."

<sup>26</sup> Ka füngngö ka ndö'dö iidümmü afünü iidoona ya, a kadalaadene kungngo ka la afe'de a'da Tööma inggide nja eene a'da kateere naginyeene, ikirü Yasu ka öö'dö a'dingnge kene ka söödö iki eene, "A'a nööjüüla aaga."

<sup>27</sup> Ikirü ka tiki a Tööma, "Aayu a 'banüsö tiya üdü kita nassa kede ka nüüsö nöö'dö, aayu a nüüsö nanangnga kede ka tögüle nafa ta'doore ka eedi, lakiini namma."

<sup>28</sup> Ikirü Tööma ka tiki, "Uugaara yeede nja Masala tammo eede."

<sup>29</sup> Ikirü Yasu ka tiki iini, "Ka Tööma, namma o'o kudumma üdü ka tadinö kede! A'diila ada a kadu tanno amma a'da taalo kijöögö no."

<sup>30</sup> Eema inggide adhabbu keefe, a Yasu ka tagalinggo ka kadalaadene kidha, illi i'i taalo ikirinja ka sorne tiya.

<sup>31</sup> Illi eema ya ikirinja kita, amang kada tamma a'da Yasu i'i ya Almasiihi 'Bii'bala ma Masala, amang kada taluna tefe ka 'dä ana eere tiya iini ada kara tamma kini.

## 21

*Yasu atele oona a kadalaadene tanno na iidümmü kafinü eera no*

<sup>1</sup> A Yasu tala oona a kadalaadene tanno iini afe'de ka tinggini ma to ma Tabariya.

<sup>2</sup> A'da kaganeene nja Samaan Bütrüs nja Tööma yeene ka tümmünü i'i a'da Miiso ya, nja Nasanayiil ya ama Kaana ma ka Jaliil mo, nja laala tiya Za'bedi, nja kadalaadene tanno Yasu könö keera.

<sup>3</sup> Ikirü Samaan Bütrüs ka tiki eene, "Ara a'co takinne kiliöögö."

Kikirü ka tiki iini, "Ara ungngo co nja o'o tekere." Kikirü ka öö'dö kürö kaka ka mürkabü, lakiini eege ka ooso tanno in'dili no taalo kümmü midigilöögö 'do.

<sup>4</sup> Ligitaka kungngo a Yasu ta'dingnge ka tinggini ma to, a kadalaadene taalo kussu a'da Yasu i'i ya miini.

<sup>5</sup> Ikirü ka tümmünü eege iki eene, "Kateeef ma a'a taalo aaga kümmü midigilöögö?"

Kiki iini a'da, "Kaw."

<sup>6</sup> Iki eene, "Aaga ra'baga sa'baka co 'büüdi ndama 'dakeyi ma nüüsö ma kuri ma mürkabü amang kada tümmü nüümö." Kikirü ka tarabaga sa'baka co kitaalo kambaanya töösü, kudumma iini ka tigine a kilöögö.

<sup>7</sup> Ikirü tatalaadene ya Yasu ka asasa i'i ya, ka tiki a Bütrüs, "Uugaara i'i ya miini!" Areere kungngo ya ka Samaan Bütrüs ka föönyö iini ka tiki a'da Uugaara ya miini, ikirü ka körni ten'di iini ka oona kudumma

iini ka taganeene ana oona ku'bu afiri co 'büüdi.

<sup>8</sup> Ikirü kadalaadene ökönö ka öö'dö a mürkabü köösü sa'baka adigine a kilöögö kide, kudumma eene kitaalo ka ku'b'ba ka tinggini ma to illi namitiri kö'dö miya.

<sup>9</sup> A kene ka ndöö'dö ko'do ka 'dukundaala ya, kasala issi ma kiya ka finne a kilöögö kide nja miteene.

<sup>10</sup> Ikirü Yasu ka tiki eene, "Aaga öö'dö a kilöögö tanno ada ka tümmöönö 'bitüngngö no."

<sup>11</sup> Ikirü Samaan Bütrüs ka öö'dö ko'do asirö mürkabü asisigi sa'baka ka 'büdhü'lü kadigine a kilöögö kadhabbu köö'dö 153, lakiini sulla kada dhabbu tanno eene no taalo sa'baka öörese.

<sup>12</sup> Ikirü Yasu ka tiki eene, "Aaga öö'dö aaga tagu eema." Taalo öccö ana kene a'buna eedi ma tindini i'i a'da, "O'o na mada?" Kudumma eene katussu a'da i'i ya Uugaara.

<sup>13</sup> Ikirü Yasu ka öö'dö a'duga miteene anangna eene nja kilöögö afe'de.

<sup>14</sup> Anda iidoona ka Yasu ka tatele oona a kadalaadene tanno iini jiddi miini ka takafiki'dö ndama inde.

*Yasu nya Bütrüs*

<sup>15</sup> Kene kandaguri ya, ikirü Yasu ka tiki a Samaan Bütrüs, "Samaan 'bii'bala ya Yühanna nasaasa o'o a'a natagii'bi tasaasa na kadu tanno nye'd'de kungngo?"

Iki iini a'da, "İi, Uugaara, nussu o'o a'da nasaasa a'a o'o."

Ikirü Yasu ka tiki iini, "Asaana a kidheefele tanno eede."

<sup>16</sup> Afada indini i'i afe'de, "Ka Samaan 'bii'bala ya Yühanna, nasaasa o'o a'a dhorro?"

A Samaan tiki iini, "İi, Uugaara nussu o'o a'da a'a nasaasa o'o."

Ikirü Yasu ka tiki iini, "Asaana a kidheefele tanno eede."

<sup>17</sup> Afada indini i'i tiidoona afe'de, "Ka Samaan 'bii'bala ya Yühanna, nasaasa o'o a'a?"

Ikirü Bütrüs ka koroo'bo kudumma Yasu ka tindini i'i tiidoona a'da, "Nasaasa o'o a'a." Ikirü ka tiki, "Ka Uugaara, nussu o'o eema nye'd'de kungngo, nussu a'da nasaasa a'a o'o."

A Yasu tiki iini, "Asaana a ki'biini tanno eede.

<sup>18</sup> Ara a'a tadirina tumma o'o dhorro, küdü ka takaleefe takadhilli ya, naga körni en'di küdü ka oona unggodho o'o nunggu-naana ku'bu kita üdü ka asaasa co kita, lakiini küdü kanda dhabbu ya ara o'o ta'diniga iisine nüüdü coo'do ara ömö'di ökönö ka körni ten'di ümmünü o'o ka tino

matara co a 'buugu tiya üüdü ka titaalo  
nasaasa co ya."

<sup>19</sup> A Yasu atiraana nggeege kudumma  
iini ka pussu inde na Bütrüs kara teyi,  
indhigü Masala ko'do iini no, ikiri ka tiki  
iini, "Uurna a'a keere."

<sup>20</sup> A Bütrüs tasala keere asala tataadene  
ya Yasu ka asaasa i'i ya, ka  
to'd'do kene keere, i'i yungngo agöö'dö ka  
Yasu kita eene kagu eema ooso kungngo,  
a'dangnga 'dugeere ka Yasu iki iini, "Ka  
Uugaara, mada i'i yungngo ara tümmünü  
o'o a kadu ngo?"

<sup>21</sup> Aga Bütrüs ka tasala i'i ya, iki a Yasu,  
"Ka Uugaara, niki o'o nya ka taya?"

<sup>22</sup> A Yasu tiki iini, "Üürü kede ka asaasa  
i'i ka eefe ka 'dö ara a'a ka öö'dö, aminna  
yüüdü inggide? Aayu kede keere."

<sup>23</sup> A tumma no tanyala ku'bu ka kadu 'do  
a'da tatallaadene ya taalo ara teyi, lakiini  
Yasu taalo iki a Bütrüs a'da i'i taalo a teyi,  
lakiini iki iini, "Kede kara tasaasa a'da  
eefe ka 'dö ara a'a köö'dö, aminna yüüdü  
inggide?"

<sup>24</sup> Tatallaadene ya miini ya i'i yungngo  
adönö ka eema tiya adarigiri ada ka  
sorne, ungngo pussu a'da tumma niini ka  
timin'da.

<sup>25</sup> Eema inggide adhabbu a Yasu ka  
talinggo üürü arigiridene nye'd'de ya, niki  
a'a a'da taalo kasorne miini na arigiridene  
no kara ta'dimo ka 'büdhülü nye'd'de.

## Lingga na Kadafiiñi Tafa'da tumma

Ömö'di ya arigiri sorne ya, i'i ya Lüüka, sorne ya ütü ka teema tumma na Lüüka ka tarigiri ada ka İnjilli tamma Lüüka. Sorne ya eema tumma ma kadu tanno Yasu ka tanyalaana tumma ma İnjilli ma Yasu ku'bu a türü tanno Koronggore tiya Insili ka Örsaliim nja Yahüüdiya nja Samira nja tököönö ka na'būugu töccö. Tamma ka Yasu kaganna ka kadu ma Yahüüdü kadhadha assa ka tanyala ka na'būugu koona in'dili.

Koronggore ya Insili ya ö'dö a türü ka a kadu tanno Yasu ka oona ka Örsaliim ka uuru tanno ö'dö a kadu keera kaco iiwine no (Taanyara ma Koronggore). Türü niini kalaala eema eene kamana türü a naguugaara tanno eene ka oona. Tumma na kadu tanno adünnü tumma ma İnjilli kakirinja ka sorne tiya, talaana na kalaala angnga kiji talaana ma İnjilli ma Yasu a kadu ka naanya kadhoonyo.

<sup>1</sup> Ka Tiyafilos, nagarigiri a'a ka sorne tiya eede ya dhidha ya, ma Yasu ka tafü'dü linggo ka dhidha adagalaana kadu iini nye'd'de,

<sup>2</sup> kadara ka uuru tanno iini ka co a 'dotombo'do no. A'da anangnga türü ma Koronggore ya Insili ya eene adadünüğü tumma a kadafiiñi tanno niini ka tagesse egee no.

<sup>3</sup> Agalaala oona eene ka adinö kini ka fiki'dö ka inde adagalaala eema eene dhabbu adaganeene nja eene a fungngö ukumu kadu keera adageema tumma ma tauugaara ma Masala nja eene.

<sup>4</sup> Kini ka agu eema nja eene ikirii ka tiki eene, "Aaga fa tunggeene ka Örsaliim, aaga öödhügi nüümö ya Pupa ka takiki aaga aaga taföönyö kede ya.

<sup>5</sup> Yühanna akambeese kadu a 'büüdi, aaga 'bitüngngö ara aaga tambeesedene a Koronggore tiya Insili ya a fungngö miini anda öreeene idhilli."

*Yasu innyyo a 'dotombo'do  
(Murkus 16.19–20; Lüüka 24.50–53)*

<sup>6</sup> A kadafiiñi tarügü kini ka oona kindini i'i kiki iini, "Uugaara uuru no 'dee ara o'o tapadaga tauugaara a kadu ma Israyil?"

<sup>7</sup> A Yasu tapadaga tumma eene iki, "Taalo aaga kama tussu nagürünü na Masala ka takindinaana ku'bu a türü tanno oono no.

<sup>8</sup> Lakiini Koronggore ya Insili ya a ta'dinggö kada ka oona anangnga türü aaga, aaga tadünnü tumma na tüünidene ana a'a ka Örsaliim nja Yahüüdiya nja Samira nja 'büdhülu ka oona nye'd'de kungngo."

<sup>9</sup> Ka Yasu ka tiri tumma no ya, assa ka ta'diniginja co 'dotombo'do kadinö kini keere a tülüögü taküdhü i'i ka oona kitaalo kiji i'i afe'de.

<sup>10</sup> Kene ka adinö kini keere ka tunggunu co 'dotombo'do, kadhimi kadu keera ana en'di ka oona kada ka'bassa.

<sup>11</sup> Kiki eene, "Ka kadu ma Jaliil, minna agu aaga, aaga ta'dingnge ko'do aaga tadinö co 'dotombo'do? Yasu ya inyi aaga ku'bu ya, a'diniginja co 'dotombo'do, assa ka tafada afa ma tiya ada kiji i'i ka tunggunu co ya kungngo."

*Matiyas akarna ka 'buugu tiya Yahüüsa*

<sup>12</sup> İkirii kadalaadene ka tapadaga co Örsaliim ndama anya minggide mana eere a'da Anya ma 'Dikidiyö, makete ka Örsaliim.

<sup>13</sup> Kene ka tö'dö ka Örsaliim ya kasürigö co 'dasala ko'do kita eene ka fungngö kide ya, egee na Bütrüs nja Yühanna, nja Yaguub nja Andraws, nja Filibüs nja Tööma, nja Bartülmaws nja Matta, nja Yaguub 'bii'bala ya Halfa, nja Samaan ya tatagu'daana ka eedi ya, nja Yahüüsa 'bii'bala ya Yaguub.

<sup>14</sup> Egee nye'd'de kungngo kafara ka Masala turi ana eedi unggodho, nja iiya töccö nja Mariyom nüümö ma Yasu nja nagöre tanno iini.

<sup>15</sup> Ka uuru tanno miini no a Bütrüs afiki'dö ma teema, nja kadu tanno amma ka Yasu no, a kadu na kanna kide nja eene no, kukumu kadu ka iidümmü ukumu ömö'di (120) iki,

<sup>16</sup> "Nagöre eede, tumma na Koronggore tiya Insili ya na Dawud ka tagadünnü ka sorne 'billi no, kinnyyo ööye miini a'da Yahüüsa ya ka alaala kadu ka Yasu kümmü i'i ya.

<sup>17</sup> T'i agosso ka linggo tanno nja angnga."

<sup>18</sup> Gürüüsü yiini ka 'duga ka kadu tanno ümmü Yasu ya, eenege siga iini, a'dünggö a'buna üüdü ku'bu adhösönjaana ku'bu, eema ma eedi tö'dö kürö nye'd'de kungngo.

<sup>19</sup> A tumma no tussu adene ka Örsaliim koona nye'd'de kungngo, kidhi kanangnga eere a 'buugu tiya müni ya a'da Hakil Dama (Lodho ma Eriiidö.)

<sup>20</sup> A Bütrüs tiki, "Sorne ma Tüüsü ma nakaaru tiki,  
Ara 'diiyiini ta'döngngönyö,

a tööyö niini titaalo.'  
 Iki afe'de,  
 'Ara ömö'di öccö tagala ka 'buugu tiya iini.'  
<sup>21</sup> Kadu kungngö aja 'bütüngngö kaneene nya angnga, ndama uuru tanno Uugaara Yasu ka takafiki'dö a linggo,  
<sup>22</sup> ma uuru tanno Yühanna ka takambeese i'i no, idhi aaco a 'dotombo'do, ikiri angnga ka asaasa tümmü ömö'di öccö ana kene ya tadinö kide nja angnga ka tafiki'dö ka inde tanno Yasu."

<sup>23</sup> Kikiri kagona kadu keera, Yüüsif ya ana eere a'da Barsaba ya, eere ma töögöje yiini a'da Yustus, nja tiya ana eere a'da Matiyas ya.

<sup>24</sup> Kikiri ka tageema nja Masala kiki, "Ka Masala, o'o nussu nanggeedi na kadu nye'd'de, la ungngo ka ömö'di tiya üdü ka asaasa ana ka kadu tanno eera no.

<sup>25</sup> Amang kini tafiki'dö a linggo ma tafünni na Yahüüsa ka tinyi ku'bu no, ungneeme ateefe taluna inde niini."

<sup>26</sup> Kafanna muduru, a tameerö ta'dingga ka Matiyas, akoonyo oonana ka kadafünni tanno ada'baaga kafünü unggodho no.

## 2

*Tö'dö ma Koronggore tiya Insili ya*

<sup>1</sup> Ka Taanyara ma Koronggore ka ndö'dö ya, a kadalaadene tarügü ka 'buugu unggodho kanna kide.

<sup>2</sup> Kadhimä ka tumma ko'do ndama 'dotombo'do, afa tanya no iisö dhindho no, ka tigi ka 'büggööri tiya eene ka tanna kide ya.

<sup>3</sup> Kadhimä ka nagonggo'do kafeene nja issi. Kasümünü njaana kene ka nanggüdü ka 'dängnge kide.

<sup>4</sup> A Koronggore ya Insili ya tö'dö kene ka oona nye'd'de, keema tumma öccö a'da taalo neene, a Koronggore tanangnga türü kene ka oona keema.

<sup>5</sup> Ka uuru tanno miini no a'da sa Yahüüdü na ümmü tumma ma Masala no, tö'dö ka Örsaliim ndama na'buugu koono nye'd'de kungngo.

<sup>6</sup> Kene kandaföönyö tumma no ya, kawaagaana oona kadhere, kudumma ömö'di kaföönyö tumma niini ka teenmadene no.

<sup>7</sup> Kadhere kiki, "Ma kadu na eema no 'dee taalo kadu ma Jaliil egee kamiini sa?"

<sup>8</sup> Angnga sa ka tö'dö nya ndaföönyö tumma ma anya tammo aja eene ka teema?

<sup>9</sup> Kadu no kö'dö ndama Parsiya nja Madiya nja Alam nja naaya ma Naato Keera nja Yahüüdiya nja Kabadökiya nja Büntüs nja Asiya,

<sup>10</sup> nja Frajya nja Bamfiliya nja Misiri nja riifö ma Libya ka Keriwan nja kadu ma Rööma na anna kita no.

<sup>11</sup> Nja kadu ma Kireet nja Piirigide nja Yahüüdü nja kajeene tanno amma ka Masala tammo Yahüüdü no, angnga sa kaföönyö kene kadeema tumma naaja keema tumma ma Masala na 'diila no."

<sup>12</sup> A kadu tadhere nye'd'de keema kiki, "Minna yungngo 'bitingngö?"

<sup>13</sup> A kadu öccö türü egee kadamidhi ka oona kiki a'da, "Egee kaaya ka ngeelei."

*Bütrüs ageema nja a kadu*

<sup>14</sup> İkiri Bütrüs ka fiki'dö nja kadafünni tanno ö'dö kada'baaga kafünü unggodho no alnege ko'd'do iki eene, "Aaga Yahüüdü nja kadu ma Örsaliim 'do, akatoodo ka tumma tanno eede no kara teeme no.

<sup>15</sup> Aaga keema a'da kadu na kaaya ka ngeeli kaleefe ndanaaya ta iidümüü kafünü egüsö ligitaka kungngo, a tumma no taalo ka timin'da.

<sup>16</sup> Tumma no na ne'bi Jüwiil ka tageema egee kungngo,

<sup>17</sup> 'Masala makiki a'da,  
 Ka naguuru tanno eere no  
 na a'a sa ka tuuru Koronggore yeede  
 ka kadu ka oona in'dili kungngo.

A laala yaada ya nagiide ya nja tanno iiya no teema tumma a kümböödö.

A kadimöögö tiji tumma neede,  
 a kümböödö tagu kadu na iiffi no.

<sup>18</sup> Nuuru Koronggore yeede  
 ka iiya ka oona nja nagiide no ümmü tumma ma a'a  
 ka uuru tanno miini no,  
 keema tumma neede.

<sup>19</sup> Nalinggo eema ka 'dotombo'do keefe,  
 nalinggo ya ka 'büdhülü keefe,  
 a 'buugu ta eriidö nja issi nja ndhiigö dhabbu.

<sup>20</sup> A ndanaaya talifi  
 a tere ta eriidö  
 a'da küfürü uuru na Uugaara na öyeene kidhindhi no tö'dö.

<sup>21</sup> Ömö'di ya amma ka eere ma Uugaara ya ara toolonadene.'

<sup>22</sup> 'Kadu ma Israyil aaga föönyö tumma no, Yasu ya ma Nasira ya Masala manangnga türü iini adagalinggo eema keefe kada ka söödö aaga tessu i'i, adagalinggo eema dhabbu keefe adale'bele eema a türü tanno Masala, aaga tessu iini.

<sup>23</sup> Kini ka tümmününja aaga ya, a'da milli Masala ka tagussu iini, aaga tümmü i'i aaga tabünnü ka salii'bi aaga tafa ka kadu tanno oroko no ka tagiidi i'i.

24 I'i yungngo a Masala ka tagildhe türü ma inde kini ka oona afiki'dö, inde taalo ka tümmü i'i.

25 Kudumma Dawud ka tadiri tumma miini iki,  
'Niji a'a Uugaara kede kidha turi kungngo, kudumma iini anna kede ka nüüsö ma kuri  
amang ka ri'ba tafa tagu a'a.

26 İkiri eedi yeede ka'diila, a onggo'do meede tadhodho nawe tüüsü nindhigü Masala kudumma tuu'da tanno eede afe'de kara tindhigü Masala.

27 Kudumma o'o taalo o'o natafa kede nütü ka 'buugu ma inde taalo o'o natafa ka ömö'di tiya üüdü ya insili ya anna ka 'buugu tiya tasürdö ya.

28 Nalaala a'a ka fiinii ma tefe ka 'di, aro o'o saga tadigi a'a a dhodho kidha ma o'o.'

29 A Bütrüs tiki, "Nagöre eede, aaga afa kede nadirina tumma aaga dhorro, eyi pupa yaaja Dawud atatü'büdene a la ma oofo yiini ungngo aja kita ta'bitingngö.

30 I'i aga ne'bi, ussu a'da Masala maküdöönö ada iini mikii iini a'da ara oogo masa anangnga 'bandaada miini könö ka kööyö tiya iini.

31 A Dawud illi ka tasala tumma na Masala ka talingga adageema a'da Almasihi a tafiki'dö ka inde iki,  
'Taalo Masala matafa kini ka 'buugu ma inde a tuu'da niini taalo ka tasürdö.'

32 Yasu afiki'dö ka inde a türü tanno Masala, angnga tijöögö angnga in'dilii kungngo.

33 Aga Masala ka ta'dina i'i ko'do manangnga i'i kono ka nüüsö ma kuri, i'i a'duga ka Pupa Koronggore ya Insili ya kada tiraana ya, uuru kaja ka oona i'i yungngo ada ka adinö kide 'bitingngö aaga taföönyö.

34 "A Dawud taalo asirö 'dotombo'do, i'i ka eyi tiya iini iki,  
'Iki Uugaara a Uugaara tiya eede, Emmi kede ka nüüsö ma kuri,

35 ara a'a ka anangnga o'o ka siri ka diidi tiya üüdü ana uune.'

36 "Amang ka kadu ma Israyil tussu dhorro a'da Yasu yaada ka tagiidaana ya, Masala manangnga i'i kada Uugaara ada Almasihi."

37 A kadu ka taföönyö tumma na Bütrüs, a tumma no tala eege ka nanggeedi, kindini Bütrüs nya kadafiini könö kiki, "Ungno 'bitingngö ara ungngo tönynyö, nagöre iidi?"

38 A Bütrüs tiki eene, "Aaga aadha ka eema tiya toroko ya, aaga tambeesedene ka unggondho ana eere ma Yasu Almasihi a'duga tumma na toroko no kada ka oona, a Koronggore tiya Insili ya tananja aaga.

39 Tumma na Masala ka teema a'da aaga tindhigü oogo nya laala tiya ada nya kadu tanno ku'b'ba no na ümmünü Uugaara a'da Masala maaja mo."

40 Agadümügü eema eene ma eema adhabbu iki eene, "Aaga oolonadene aaga taadha ka sere tiya toroko ya ka oona."

41 A kadu na amma ka tumma tanno iini no kakambeesedene, a kadu öccö tö'dö kene na alif ka iidoona.

### *Taneene na kadu ma kaniisa*

42 Kada kümmünü nanggeyi neene ka talaana tanno kadafiini kagu eema ka 'buugu tiya unggodho ya kafara ka Masala eege nye'd'e de.

43 A kadafiini tagalinggo eema dhabbu keefe a türü tanno Masala ari'ba tümmü kadu nye'd'e de kungngo.

44 A kadu na amma ka Yasu no, tumma neene ka unggodho kafaana ka oona, kosso ka eema.

45 Kanadene ana ana almaala tiya eene nya eema ma nasigeene tiya eene kosso ka gürüüsü nya kadu tanno iini na eema ka titaaloo kene no ku'b'u.

46 Kicci toreene turi ka la ma Masala ka Örsalim ana eedi unggodho, kagoreene ka nöö'di tanno eene kagu eema ka'deema.

47 Küüwe tüüsü ka dhodho ada a Masala a kadu tamma ka tumma tanno eene nye'd'e de, a Uugaara tagusu kadu tanno oolonadene no ka köje 'bücca kungngo.

## 3

### *Tafiki'dö ma mügüre*

1 Uuru kinggide Bütrüs nya Yühanna co la ma Masala ana ndanaaya kiidoona amuru ma siyya ma taco tafara ka Masala.

2 A kadu tadhe ana ömö'di ka tageenedene kada mügüre. Kamanaga i'i ka inye ma la ma Masala ya ana eere a'da inye na 'Diila a naguru no arangnga kadu na icci no.

3 Kini ka tasala Bütrüs nya Yühanna kata unggunugu co ya, ikiri ka ranganga eege a'da kanangnga nüümö iini.

4 Kikiri ka tasala kini ko'do, a Bütrüs tiki iini, "Assa kidi!"

5 İkiri ka adinö eege iki kide a'da ka tanangnga nüümö iini.

6 A Bütrüs tiki iini, "Taalo gürüüsü kede, a dahabaa titaaloo kede lakiini yungngo eede ara tanangnga o'o, ana eere ma

Yasu Almasiihi ya ma Nasira ya, fiki'dö nunggeene."

<sup>7</sup> Ümmü i'i ka nüösö ma kuri a'dina i'i ko'do, uune tarooro ka takidhö ka uuru miini,

<sup>8</sup> Afiki'dö imbiiri unggunaana ku'bu, aaco la ma Masala ka teene nya eene, unggenee imbiiri indhig'i Masala ko'do.

<sup>9</sup> A kadu tadinö i'i nye'd'de ka tunggeene indhig'i Masala ko'do.

<sup>10</sup> Kussu a'da ömö'di ya kanna ka inye ma la ma Masala tiya ana eere a'da A'diila ya atarangnga ya, i'i ya miini kurugu oona ku'bu kadhere ka nüümö tiya kününidene ya.

#### *Tumma na Bütrüs ka la ma Masala*

<sup>11</sup> Aga ömö'di tiya arangnga ya tama'da ka Bütrüs nja Yühanna ka fangga tammo Siliman mo, a kadu nye'd'de tadhore kisi keere.

<sup>12</sup> Ka Bütrüs ka tasala eege nggeege ya iki eene, "Ka kadu ma Israyil minna agu aaga, aaga tadhore ka eema tiya agalinggo adene ya? Minna agu aaga tadinö ungngo afa ungngo ka anangnga ömö'di ya ka fiki'dö a türü tanno üdi a ta'diila tanno üdi?

<sup>13</sup> Masala ma kadaada ma angnga, Masala ma Abrahiim nja Ishak nja Yaguub. Oogo mungno manangnga türü ka tatasaga tiya oono Yasu yaada ka ta'düsünü i'i ka Bilatus kidha, aaga tümmünü i'i a kadu tanno diidi i'i no kada kiidi i'i. A Bilatus ta kasaasa tapa kini illi aaga kanu.

<sup>14</sup> Kanu aaga ka ömö'di tiya a'diila insili ya ara aaga ka tapa ka tatagirina kadu.

<sup>15</sup> Kagiidi aaga nduguli ma tefe ka 'd'i illi Masala miji i'i ka inde ungngo tadinö kide.

<sup>16</sup> Tamma ana eere tiya Yasu, ömö'di yaada kiji, aaga tussu a'da kapadaga türü kini ya, eere ya Yasu nja tamma na öö'dö ndama iini no ka anangnga i'i ka oolon-adene 'do yaada kijöögö aaga in'dili ya.

<sup>17</sup> "A 'bitingngö nagöre eede, nussu a'a aaga ka linggo a'da taalo aaga kussu afa ma nuguugaara tanno ada ka tagüüni.

<sup>18</sup> A Masala tattümö ada kide ka tumma tanno oono ka tageema a nagane'bi nye'd'de a'da Almasiihi a tadhügürü.

<sup>19</sup> Aaga aadha ka eema tiya toroko ya aaga tamma ka Masala amang kono toolona tatoroko naada ka oona no.

<sup>20</sup> Amang ka Uugaara tafa'da fiin'i ya a'diila ya aaga ka Yasu Almasiihi afa moono ka tageema.

<sup>21</sup> Ara töödhö ka 'dotombo'do ara uuru ka öö'dö ma Masala ka anangnga eema

in'dili ka issi afa moono ka tageemaga co nagane'bi tanno oono na insili no 'billi.

<sup>22</sup> Müüsa iki a'da, 'Masala Uugaara müüdü massa ka kürünü ne'bi afa ma a'a kungno aaga taföönyö tumma niini ka teema nya aaga no.

<sup>23</sup> Ömö'di ya taalo taföönyö tumma na ne'bi tiya miini ya, atakedhekanja keere ndama ka söödö.'

<sup>24</sup> "A nagane'bi nye'd'de ndama Samwil nja tanno öö'dö kini keere no, kageema tumma töö'dö ma uuru tanno.

<sup>25</sup> Aaga kungno kakarna ka nagane'bi nya timi'di tumma tanno Masala nya kafaafa ma aaga mikri Abrahiim, 'Laala yüüdü tanangnga kadu ka aduna baraka ka 'büdhülü nye'd'de.'

<sup>26</sup> A Masala manangnga tasaga yoono ka fiki'dö ndama inde magürünü i'i kada ana baraka ka dhidha amang kada taadha ka tatoroko."

## 4

#### *Tahükümü na Bütrüs nja Yühanna*

<sup>1</sup> Ka Bütrüs nja Yühanna tadünügü eema a kadu ya, a ka'boge nya uugaara ma kadu tanno afa ka la ma Masala no nya Sadügiin tadhe ko'do kene ka oona.

<sup>2</sup> Kagoroo'bo a'da eege kalaana kadu a'da kadu kara tafiki'dö ka inde ana Yasu.

<sup>3</sup> Kümmü eege kanangnga ka pabuuusu kudumma 'buugu kanda siiya ara tako kataadha.

<sup>4</sup> A kadu kadhabbu kaföönyö Bütrüs nja Yühanna kadeema kamma ka Yasu, kadu na nagiide no köö'dö na alif kiidümmü.

<sup>5</sup> Ka tako ka taadha ya a nuguugaara ma Yahüüdü nya katalaana ma seriye nya kadiiffi temmi ka 'buugu tiya unggodho ya ka Örsalimi.

<sup>6</sup> Nja Hanan uugaara ma ka'boge nya Kiyaafa nya Yühanna nja Askander nya siliga ma uugaara ma ka'boge in'dili.

<sup>7</sup> Kikiri ka tagümmü Bütrüs nja Yühanna kanangnga eege ka 'dingnge kene kidha kindini eege, "Kagalinggo aaga eema ya ana eere töccö nya türü töccö?"

<sup>8</sup> A Koronggore tiya Insili ya tuurunja ka Bütrüs ka oona iki eene, "Ka nuguugaara ma anya nya kadiiffi ma anya,

<sup>9</sup> katindini ungngo 'bitingngö ma ömö'di tiya maara ya a'da a'diila nya?

<sup>10</sup> Amang kada tussu iini aaga kadu ma Israyil nye'd'de kungno a'da ömö'di ya 'dingnge kada kidha ya a'diila ana eere tiya Yasu Almasiihi ya ma Nasira ya, yaada ka tagiidi i'i ya, aaga tabünnü i'i ka salii'bi ya, a Masala tiji i'i afiki'dö ka inde.

<sup>11</sup> I'i ya

'Misi ma katarü'böönö yaada kanu kide mo,

oogo mungngo ma misi ma kadese.'

<sup>12</sup> Taalo toolona illi ana eere tiya Yasu, eere titaalo ma toolona kadu ka 'büdhülü, i'i yungngo Masala ka kürünü i'i ma toolona angnga.'

<sup>13</sup> Ka kadu ma la ma kadifii kiji rüsu na Bütrüs nja Yühanna, oona tadhere kene kuurunja ku'bu kene kaföönyö a'da eege taalo ka kalaanadene illi eege kandussu a'da eege kaganeene nja Yasu.

<sup>14</sup> Kiji ömö'dü ya oolonadene ka 'dängnge kene kete, kikiri ka titaalo kiji niimö ma ta'bununjaana ku'bu miini.

<sup>15</sup> Kikiri ka tiki eene a'da kunggeene ka la ma kadifii kikiri ka teema ana ka oona.

<sup>16</sup> Kiki, "Ara angnga tönynyö a kadu tanno eera no 'bitingngö?' Kudumma kadu ma Örsaliim nye'de kussu a'da kadu no eema keefe angnga taalo ka tussu ka 'düsüniggi.

<sup>17</sup> Kudumma ma tumma ka tanyalanjaana ku'bu, angnga tiki eene, kafa teema ana eere ma Yasu ka kadu kidha taalo kasaasa eege ka tanyala ku'bu."

<sup>18</sup> Kikiri ka tagümmünü eege kiki eene a'da, kafa talaana kadu, kafa teema ana eere ma Yasu.

<sup>19</sup> Lakiini Bütrüs nja Yühanna kiki, "Aaga iiröönö ka nanggeyi tanno ada öjö i'i yungngo adhorro ka Masala, unggno taföönyö tumma naada alla na Masala.

<sup>20</sup> Ungngo teema tumma ma eema tiya iidii ka tadinö kide yungngo taföönyö ya."

<sup>21</sup> Kene kanda kuuru ri'ba eene ka nanggeedi ya kapa kene kunggeene, kitaalo kaluna fiinii ma tapusu eege, kudumma kadu nye'de ka tafünügü Masala ko'do ka eema tiya agalinggo adene ya.

<sup>22</sup> Kudumma ömö'di tiya oolonadene ya, nagürüünü niini ko'do a kadu keera.

### Kadu ma kaniisa kafara ka Masala

<sup>23</sup> Ka naguugaara ka tapa ka Bütrüs nja Yühanna, kafada kaco ka kadu tanno eene kadirina eema ya naguugaara ma ka'boge nja kadiifii kadirina eene ya.

<sup>24</sup> Kene ka taföönyö tumma no ya, kafara ka Masala ana eedi unggodho, kiki, "Ka Uugaara, o'o narü'bü 'dotombo'do nja 'büdhülü nja to ana eema tiya kide ya nye'de.

<sup>25</sup> Dawud ageema tumma nüüdü a Koronggore tiya üüdü ya Insili ya iki, 'Minna agu ajeene kafiki'dö ka linggo

ajeene,

a kadu ana eema tiya atoroko ya?

<sup>26</sup> Kafiki'dö naguugaara ma 'büdhülü ka timi'di tumma

nja naguugaara ka 'buugu nye'de kungngo  
ma takirimi Masala Uugaara nja Almasihi.'

<sup>27</sup> Hirüdüs nja Bilatus Albunti ya nja kadu ma Israyil nja kadu ma kajeene ka anya tammo kümmü tumma ka kirimi Yasu tatalingga yüüdü ya insili ya yüüdü ka tümmünü i'i kada Almasihi ya.

<sup>28</sup> Kagalinggo tatoroko nüüdü killi kadgeeme a türü tanno üüdü a'da kara tüünidene.

<sup>29</sup> A 'bitingngö Uugaara, iiri rüsu neene nja unggno no, nanangnga türü a kasaga tanno üüdü ka eema tumma nüüdü a'da kitaalo unggno kari'ba.

<sup>30</sup> Kilina niisö nüüdü noolona kadu na maara no nüüni eema keefe ana eere ma tasaga tiya yüüdü Yasu ya Insili ya."

<sup>31</sup> Kene ka teema nja Masala ya, a 'buugu tatinggi'di, a Koronggore ya Insili ya taka ka kadu nye'de, kadünnü tumma ma Masala ari'ba titaalo.

### Kadu ma kaniisa koso ka eema

<sup>32</sup> A kadu ma kaniisa taganna ana eedi unggodho koso ka eema, taalo ömö'di ma tiki a'da eema yiini yungngo.

<sup>33</sup> A kadafiiñi talaana kadu keema iini a'da Yasu Uugaara afiki'dö ndama inde, a türü na Masala tu'bu eege ka nanggeedi in'dili,

<sup>34</sup> Taalo ömö'di ma tasaasa niimö, kudumma kadu kanadene a nöö'dü nja nasigeene kaamana eema miini ka 'buugu tiya unggodho ya,

<sup>35</sup> kasümünaana ku'bu a ömö'dü ya ta'duga tamana yiini ka asaasa ya.

<sup>36</sup> Afe'de a Yüüsif taga Lawi ya ma Kuburus, ya kadafiiñi kanangnga eere iini a'da, Barnaba tafreeri.

<sup>37</sup> Adanege a siga tanno iini a'duga gürüüsü miini ö'dö iini a kadafiiñi.

## 5

### Hananiya nja aka tammo iini Safira

<sup>1</sup> 'Bitingngö ömö'dü inggide ana eere a'da Hananiya, agatanege a siga tanno iini nja aka tammo iini mana eere a'da Safira.

<sup>2</sup> Karmuna türeene ma gürüüsü ku'bu ma eyi tiya iini a'da mussu, ara ka öö'dö a türeene mini anangga a kadafiiñi kidha.

<sup>3</sup> A Bütrüs tiki iini, "Ka Hananiya, minna agu o'o nafa ka Ebliisi aaco küdü ka eedi niisini Koronggore ya Insili ya? Narmuna türeene ma gürüüsü ma siga?

<sup>4</sup> Taalo siga nüüdü eege kamiini a'da nafürü o'o tagatenege iini? A kene kanda tennege taalo o'o nama tafa ka gürüüsü ma eyi tiya üüdü? Minna agu o'o nalinggo

tumma afa ma tanno kungngo. O'o nüüsini Masala taalo o'o nüüsini kadu."

<sup>5</sup> Aga Hananiya ka föönyö tumma no ya, a'dingga eyi, ari'ba tümmü kadu na föönyö tumma no.

<sup>6</sup> A kadimöögö kö'dö ka'bürü i'i ka oona a ten'di, ka'dina i'i katü'bü i'i.

<sup>7</sup> Ka ndanaaya ka öö'dö kidoona ya, aka miini töö'dö a'da taalo mussu nüümö ya agüüni adene ya.

<sup>8</sup> A Bütrüs tindini oogo iki oono, "Tirina tumma a'a dhorro ma eema ma siga tiya ada ka tanadene iini ya, i'i yungngo?"

Miki, "İi, i'i ya miini."

<sup>9</sup> A Bütrüs tiki oono, "Kimi'di aaga tumma nja nyuri yüdü aaga ta'b'ba Koronggore ya Uugaara amana? Assa! Ka ton'do ma uune tanno kadu tanno a'duga nyuri yüdü katü'böönö ka inye, kara ta'duga o'o afe'de!"

<sup>10</sup> Marooro ka 'dinggö ka Bütrüs kidha meyi. A kadimöögö töö'dö kaduna oogo ka teyi, ka'dina oogo katü'böönö ka nyuri kete.

<sup>11</sup> A ari'ba tümmü kadu ka kaniisa nye'd'e nja kadu tanno föönyö no nye'd'e.

#### *Toolona kadu a türü tanno Masala*

<sup>12</sup> A kadafiiñi tagalinggo eema keefe kadhabbu nja türü kidha ma kadu. A kadu na amma no in'dili kicci toreene turi ka fangga tammo Siliman.

<sup>13</sup> Taalo ömö'di unggodho kungngo ma taga'da tumma neene, lakiini kadu nye'd'e kamma kene kafünügü eege ko'do.

<sup>14</sup> A kadu na amma ka Masala no tamanya kadhabbu nagiide nja iiya.

<sup>15</sup> A kadu tama kadu na maara no kamana eege ka naffin'i ka'düürü eege ka kere nja akede, ka Bütrüs ka tunggeene ya, a tallappa niimi tagilaana kene ka oona ka'diila.

<sup>16</sup> A kadu takicci ka Örsaliim ndama na'buugu tanno akete no, a kadu tanno maara no nja kadu tanno indima no koolonadene nye'd'e.

#### *Kadafiiñi kananja ka pabuusu*

<sup>17</sup> Uugaara ma ka'boge nja kadu tanno iini na Sadügiin no kadigine akirimi.

<sup>18</sup> Kümmü kadafiiñi kuuru eege ka pabuusu.

<sup>19</sup> İkiri tadhangga ma Uugaara ka öö'dö ooso kungngo, aafa'da inye ma pabuusu urugru kadafiiñi kürö iki eene,

<sup>20</sup> "Aaga unngeene, aaga co la ma Masala, talaana kadu ka tumma ma tefe ka 'dii na Masala ka öö'dö iini no."

<sup>21</sup> Kamma ka tumma kaco la ma Masala litikata so'd'o kalaana kadu.

Uugaara ma ka'boge nja kadu tanno iini nja la ma kadiifi ma Yahüüdü tagürünü kadu kaco töö'dö a kadafiiñi ndama pabuusu.

<sup>22</sup> A nasigira co pabuusu taalo kaduna ömö'di kide, kafada köö'dö ka naguugaara.

<sup>23</sup> "Kaduna ungngo pabuusu kada teere a kadu na afa kide no ka'düngne ana ko'do ka naginyeeene, lakiini kidi ka tafa'da eege, ungngo taalo kaduna ömö'di ka teene miini."

<sup>24</sup> Uugaara ma nasigira tanno afa ka la ma Masala no nja naguugaara ma ka'boge, kene ka taföönyö tumma no ya, oona tadhene kene kuurunja ku'bu, kiki, "Kaneene tumma no nya?"

<sup>25</sup> İkiri ömö'di öccö ka öö'dö iki eene, "Kadu naada ka tadhifi eege ka pabuusu no, kinni ka la ma Masala kalaanaka kadu!"

<sup>26</sup> Uugaara ma nasigira ma la ma Masala nja kadu tanno iini ta üügü kadafiiñi ta'diila kungngo, kudumma eene kari'ba ii'di kadu tadiidirii eege.

<sup>27</sup> A kene ka öö'dö a kadafiiñi ka naguugaara kidha, ikiri uugaara ma ka'boge ka tiki eene,

<sup>28</sup> "Kageema ungngo nja aaga dhabbu a'da aaga tafa talaana kadu ana eere tiya talaana naada kadhala ka Örsaliim ka oona nye'd'e, kasaasa aaga tagirin'i inde ma ömö'di tiya kidi ko'do?"

<sup>29</sup> A Bütrüs nja kadafiiñi tiki, "Ara ungngo taföönyö tumma na Masala taalo ungngo kataföönyö tumma na kadu.

<sup>30</sup> Masala ma kupupa tanno aja, miji Yasu ka inde yaada ka tagiidi i'i aaga kabünñi i'i ka salii'bi ya.

<sup>31</sup> Masala oogo mungngo ma'dinigi i'i ko'do ka nüösö ma kuri tanno oono, manangnga i'i kada Uugaara nja tatoolona ma kadu ma Israyil amang kene taadha ka tatoroko a Masala tafa kene.

<sup>32</sup> Ungngo ya kadinö ungngo ka eema tiya nye'd'e, a Koronggore ya Insili ya Masala ka anangnga i'i a kadu tanno aföönyö tumma niini no."

<sup>33</sup> Aga naguugaara taföönyö tumma no, kagorob'o kasaasa tagirina eege.

<sup>34</sup> Illi ömö'di inggide ana eere a'da Gamalayiil taga Fariisi, i'i a tatalaana ma seriye, a kadu nye'd'e tindhig'i i'i ko'do, afiki'dö ka la ma kadiifi ma Yahüüdü, ikiri ka tiki a kadafiiñi kuurugu kadu co küröttinggi.

<sup>35</sup> İkiri ka tiki eene, "Kadu ma Israyil, aaga aadha ka tumma tanno ada ka asaasa talingga a kadu tanno no."

<sup>36</sup> Afiki'dö ömö'di inggide ana eere a'da Südä, kete kungngo ümmü eyi yiini kada dhabbu, a kadu tuurna i'i keere miya ka

egüösö. Adagiidiidene a kadu tanyalanjaana ku'bu a tumma miini titaalo.

<sup>37</sup> Afe'de a Yahüusa ya ma Jaliil ya adele oona ka uuru tanno kadu kadaginni kadu no, a kadu tisi kini keere kadhabbu. Eyi afe'de, a kadu na isi kini keere no, tanyalanjaana ku'bu.

<sup>38</sup> A 'bitingngö ya ara a'a tiki aaga, kadu afa ma tanno aaga fa talinggo a tumma tanno eene, tumma neene ka talaana kadu iini no, kassa ka titalo kene kada tumma ün'dügüngngö.

<sup>39</sup> A kene kada tumma ma Masala eege kamiini, taalo aaga ka tarigi eege, ii'di aaga tünni ada tagoroo'bo ada ku'bu nja Masala."

<sup>40</sup> A kadu tamma ka tumma tanno iini. Kadagümminü kadafiiñi, katabbü eege kuuru eege ka tino kiki eene, kafa talaana kadu ana eere tiya Yasu.

<sup>41</sup> A kadafiiñi tunggeene kadhodho, kudumma Masala manangnga eege ka tambaanya dhügürü kudumma eere tiya Yasu.

<sup>42</sup> A kadafiiñi taalo kaadha ka talaana kadu 'bucca kungno, ka la ma Masala nja nöö'di kalaana kadu kadünögü tumma ma İnjilli a'da Yasu i'i ya Almasiihi.

## 6

*Kadu ma linggo no üdümmü kafünü era no*

<sup>1</sup> Ka naguuru tanno miini no, asa kadalaadene tadhabbu kagusaana ka köje. A Yahüüdü na eema tangga Yünan no, ta'digineene keema a'da Yahüüdü na eema tangga Ebraniin no künün tö'bö ana iiya ma nagüüme tanno eene ku'bu taalo kamana eema ma takuri eene 'bucca kungno.

<sup>2</sup> İkiri kadafiiñi na ada'baaga kafünü era no ka tagümmünü kadalaadene öccö kiki eene, "Taalo a'dila ungno a kadüün tö'bö a tumma ma Masala ara ungno katöödhi kasümünaana eema ma kuri ku'bu ün'dügüngngö.

<sup>3</sup> Nagöre eede akö'dö a kadu ka üdümmü kafünü era na ussudene no na adigine a Koronggore tiya Insili ya nja tussu eema, angnga tanangnga linggo no eene.

<sup>4</sup> Ara ungno kadafara ka Masala ungno tagalaana kadu ka tumma tanno oono."

<sup>5</sup> A tumma na ta'dila ka kadalaadene ka oona kümmü Istifanüüs, ya amma ka Masala dhorro ana eedi ya, adigine a Koronggore tiya Insili ya, nja Filibüs nja Brokoros nja Nikanors nja Temon nja

Braminas, nja Nikola ya ma Antakiya ya amma ka tumma ma Yahüüdü ya.

<sup>6</sup> Kö'dö ana eege kidha ma kadafiiñi kümmünü iisine kene ka nanggüüdü kafara ka Masala.

<sup>7</sup> A tumma na Masala takanyala ku'bu, a kadalaadene tö'dö kadhabbu ka Örsalim a ka'boge tamma ka Yasu kadhabbu.

## Tümmü adene na Istifanüüs

<sup>8</sup> A türü na Masala tadigi ka Istifanüüs ka oona alingga eema kefe ale'bele eema a kadu tadhere.

<sup>9</sup> A kadu ma la ma talaana tiya ana eere a'da La ma kasaga na apa kene no, nja kadu ma Keriwan nja kadu ma Iskandariya, nja kadu ma Kilikiya nja kadu ma Asiya 'do, ka'bununjaana ku'bu nja iini a tumma.

<sup>10</sup> A Masala tanangnga türü ma tumma Istifanüüs, a tumma niini tiligi kene kadagii'bi eege.

<sup>11</sup> Kafünü kadu öccö kanangnga nüümö eene a'da kiki, "Kaföönyö angnga i'i eela Müüsa nja Masala!"

<sup>12</sup> Kagirnaana ka kadu ka oona nja kadiifi nja katalaana ma seriye, kümmü Istifanüüs kaco la ma kadiifi ma Yahüüdü iini.

<sup>13</sup> Kö'dö a kadu kafünü korokoro ka Istifanüüs ka oona kiki, "Ömö'di ya öödhi ka teela la ma Masala nja tumma seriye tiya Müüsa turi kungno.

<sup>14</sup> Kaföönyö ungno iini ka tiki a'da, Yasu ya ma Nasira ya, ara tagü'dügü la ma Masala ya co, aadha kadu ka tumma tanno Masala na Müüsa ka öö'dö iini angnga no."

<sup>15</sup> A kadu na emmi nye'd'e de ka la ma kadiifi ma Yahüüdü, tassa ka Istifanüüs ko'do kasala dhugudha yiini kafeene nja dhugudha ma tadhingga.

## 7

*Tumma na Istifanüüs nja naguugaara ma Yahüüdü*

<sup>1</sup> İkiri uugaara ma ka'boge ka tiki Istifanüüs, "Tumma no 'dee ka timin'da?"

<sup>2</sup> Istifanüüs tapadaga tumma eene iki, "Nagöre eede nja kafaafa ma a'a, aaga toodo kede! Masala ma idhindü mo matele oona a pupa tiya aja Abrahiim kini ka takaleefe ka anya ma Naato Keera a'da üfürü co Haran.

<sup>3</sup> Miki iini, 'Ninyi anya müüdü ku'bu nja siliga ma o'o ara o'o ka tunggeene naco anya tammo meede kara tala o'o kide mo.'

<sup>4</sup> İkiri Abrahiim ka tini anya ma Kaldan ku'bu ara kico Haran emmi kide. A pupa tiya iini ka teyi, a Masala ta'duga i'i

manangnga ka 'büdhülü tiya ada ka tanna kide 'bittingngö ya.

<sup>5</sup> Ka uuru tanno miini no, taalo Masala manangnga nüümö iini ma 'büdhülü tiya taalo makara tarmuna 'bam'buugu iini. A Masala tiki iini a'da oogo matanangnga 'büdhülü a kadaada ma iini kakarna kide, kudumma Abrahiim üfürü 'bii'bala taganna kini.

<sup>6</sup> A Masala tiki iini, 'Laala yüdüdü kara ta kölöge ka anya tammo taalo tanno eene. Eege kara ta kasaga küüni midhi ku'bu ana eege a nagürüünü na miya ka egüsö.

<sup>7</sup> Lakiini ara a'tapusu anya ma üünii eege kada kasaga mo, kassa ta tunggeene ka anya tammo iini mo, köö'dö tafara kede ka 'buugu tiya.'

<sup>8</sup> A Masala tükirü ka timi'di tumma nya Abrahiim, ma taradene meene ka tussu adene iini. İkiri Abrahiim ka teene Ishak atiümö füngngö iüdümü afünü iidoona, eedhe i'i. Ishak tara 'bii'bala yiini Yaguub, a Yaguub tara kafaafa ma angnga na ada'baaga kafünü eera no.

<sup>9</sup> "A kafaafa ma angnga tagagirimü Yüüsif ka tanege ana i'i kaco Misiri iini, a Masala taganeene ma taafa kini.

<sup>10</sup> A Masala toolona i'i ka dhügürü tiya iñ'dili ya, manangnga tussu eema iini tumma tanno a'diila niini, a Faröön ya uugaara ma Misiri ya, tasaasa i'i ümmünü eema iini nye'd'de ada uugaara.

<sup>11</sup> "A iire tümmü Misiri nye'd'de nya anya ma Kanaan, a kuri titalo a migile taga taalo a kafaafa ma angnga.

<sup>12</sup> İkiri Yaguub ka föönyö a'da migile mungno ka Misiri ya, i'i agürüünü kafaafa ma angnga ka tino neene na dhidha no.

<sup>13</sup> A kini ka kürünü eege afe'de, a Yüüsif tala eyi yiini a nagöre tanno niini, a Faröön tussu kadu na Yüüsif.

<sup>14</sup> A Yüüsif tagürünü ka pupa tiya iini nya kadu tanno iini nye'd'de, na öö'dö kadu kiidoona kada'baaga ana awwa no.

<sup>15</sup> A Yaguub tö'dö ka Misiri, eyi kide nya kafaafa ma angnga nye'd'de.

<sup>16</sup> Ka'duga eege kaco Shakiim katatü'bü eege ka la ma oofo tiya Abrahiim ka taana ka laala tiya Hamüür ka Shakiim ana gürüüsii ya.

<sup>17</sup> "Ka uuru ma tafi'di tumma na Masala nya Abrahiim, a kadu naaja kakogoona kadhabbu ka Misiri.

<sup>18</sup> A kadu tümmü uugaara öccö ka Misiri taalo ussu Yüüsif.

<sup>19</sup> Adagüünii ada kadu naaja ku'bu ada kapusu kafaafa ma angnga no ma ta'bunu eege ka tapüpü laala ya aleefe tageenede co, amang kene tafa tefe ka 'di.

<sup>20</sup> Ka naguuru tanno miini no ageenede Müüsa a 'diila 'do atiümö nagatereene kiidoona ka 'di tiya pupa tiya iini.

<sup>21</sup> Ka kadu ka taanu kini, a 'badaada ma Faröön ta'duga i'i ma tinggiri i'i kada 'bii'bala tiya oono.

<sup>22</sup> A Müüsa takalaadene ka tussu eema Misiri. Ana türü ma teema tumma nya alingo.

<sup>23</sup> "Kini ka ndagu'du nagürüünü a kadu keera ya, ikiri ka tunggeene aaco tosse kadu niini ma Israyil.

<sup>24</sup> İkiri ka tasala taga Misiri ka abbü taga Israyil akaraka i'i keere adagiidi taga Misiri.

<sup>25</sup> A Müüsa takiki a'da ara nagöre niini tussu a'da Masala ma toolona eege, ndama nüösö tanno iini, lakiini eege taalo kussu.

<sup>26</sup> Ka uuru töccö kadu ma Israyil keera kabbü ajeene, adagümmünü eege ma tindinaa eege ku'bu. Iki cene, 'Aaga 'dee, a'da aaga ka nagöre sa kasaasa tili ajeene amana?

<sup>27</sup> "Ömö'di öccö tagürünüğü i'i keere kini ka oona iki. 'Mada anangnga o'o kada uugaara tiya iidi?

<sup>28</sup> Nasaasa o'o iidi a'a afa müüdü ka tagiidi ta Misiri ka ooso kungno?

<sup>29</sup> Ka Müüsa ka föönyö tumma no ya, ikiri ka rünö aaco anya ma Midian, adaganna kide kada tajeene adageene laala eera kide.

<sup>30</sup> "Kini ka atiümö nagürüünü a kadu keera ya, a tadhangga ma Masala tatele oona iini ka 'dikinya ka dhüle ma Siina ka issi ka finne ka ndhaaru.

<sup>31</sup> A Müüsa tadhere kini ka tasala issi ka finne ka ndhaaru, asigi kide kete amang kini tijöögö, a Masala tümmünü i'i ndama issi ka teene,

<sup>32</sup> 'A'a na Masala ma kafaafa ma o'o, Masala ma Abrahiim nya Ishak nya Yaguub.' Ari'ba tümmü Müüsa taalo a'duga rüsü ana eedi ma tassa co.

<sup>33</sup> "A Masala tiki iini, 'Kirnö egüde ku'bu küdü kuune, kudumma 'büdhülü tiya üüdü ka 'dingnge kide ya 'büdhülü ya insili ya i'i ya miini.

<sup>34</sup> A'a nijj dhügürü ya kadu tanno eede ka Misiri na föönyö fara yeene, nükirü a'a ka öö'dö ku'bu ma toolona eege. Aayu nagürüünü o'o ka Misiri.'

<sup>35</sup> "A Müüsa ya kadu tanno iini ka tagaanu kini kiki iini, 'Mada anangnga o'o kada uugaara tiya iidi?' I'i yungno Masala ka kürünü i'i ada uugaara atoolona a türü tanno tadhangga na alanja iini ka ndhaaru no.

<sup>36</sup> Unggu kadu kürö ndama Misiri a türü tanno Masala niini ka talingga eema keefe a kadu ka Misiri nja tada'da ma to ma Dhöyö mo nja dhüile a nagürünü a kadu keera.

<sup>37</sup> A Müüsa ka eyi tiya iini iki a kadu ma Israyil, 'Ara Masala sa nangnga ne'bi aaga a tö'dö ndama aaga afa ma a'a kungngo.'

<sup>38</sup> A Müüsa i'i yungngo nja kadu ma Israyil ka dhüile ungngo ka söödö ma kafaafa ma angnga, nja tadhangga ya ageema nja iini ka 'dikinya ma Siina, anangnga tumma ma tefe ka 'di iini öö'dö iini angnga.

<sup>39</sup> "Lakiini kafaafa ma angnga kanu kini kitailo kaföönyö tumma niini, a nanggeedi neene kasaasa tapadaga co Misiri.

<sup>40</sup> Kiki a Hariüün, 'Adina namasala kunggeene kaja kidha mo, kudumma ungngo taalo kussu nüümö ya ümmü Müüsa ya a'da i'i yungngo öö'dö ana angnga ndama Misiri.'

<sup>41</sup> Kadadina masala kafeene nja 'bileefo kataraana eema iini kadhodho a nüümö kadadina a nüösö meene ya.

<sup>42</sup> A Masala tümmü eyi yoono eene ka oona mafa kene kafara ka midigi, afa ma tiya ka takirinja ka sorne ma nagane'bi, 'Ka laala ya Israyil! Aaga 'dee kara aaga eema a'a ka dhüile kannaa

ka nagürünü tanno kukumu kadu keera no?

<sup>43</sup> U'u, lakiini ka'duga aaga fangga ma Muluk

a timidigi ma masala tammo Romfan, namasala yaada kadadina ma tafara kono.

Ara a'a tuurugu aaga co kajeene keere ma Babil.'

<sup>44</sup> "A kafaafa ma angnga kaganna fangga eene a tumma ma teema tumma ma Masala kide nja eene ka dhüile. Afa ma tiya Masala ka tiki iini, a'da üünä afa miini ka ijöögö kungngo.

<sup>45</sup> A kafaafa ma angnga ta'duga fangga ka nüösö ma Yashu ka öö'dö iini nja eene kene ka tamuru 'büdhüllü ya kajeene a Masala ka tagasoro eege kene kidha. Fangga maganna kannaa ka 'büdhüllü idhi uruu na Dawud ka öö'dö.

<sup>46</sup> A Masala tasaasa Dawud ma 'diila nja iini, a Dawud tiki oono a'da ara i'i tarü'bünü la a Masala tammo Yaguub.

<sup>47</sup> Lakiini Siliman i'i yungngo arü'bü la oono.

<sup>48</sup> "Lakiini Masala taalo manna ka naala na arü'bü adene ana iisine no, afa ma tiya ne'bi ka tiraana ya kungngo,

<sup>49</sup> 'Uugaara iki, 'Buugu ma temmi tiya eede ka 'dotombo'do, a 'büdhüllü 'buugu ma uune tiya eede. 'Dii ya faanya i'i yungngo ada ka tarü'bünü a'a?

'Buugu ma taneene yeede i'i iifye?

<sup>50</sup> Taalo iisine neede eege kungngo kagalingga eema ya nye'd'e kungngo?'

<sup>51</sup> "Aaga takidhö ka nanggüdü a nanggeedi aaga nakünggiri no! Kafeene aaga nja kafaafa ma aaga, kaleefe aaga tanu ka Koronggore tiya Masala ya Insili ya.

<sup>52</sup> Kafaafa ma aaga ka küünä tatoroko ana nagane'bi kagirina kadu na keema tumma ma tö'dö na ömö'd'i tiya adho ka fiini yaada ka tümmü i'i, aaga tagiidii i'i ya.

<sup>53</sup> Ka'duga aaga tumma na Masala ka kadhangga ka nüösö aaga sa katitaalo kalinggo iini."

<sup>54</sup> Ka kadu ka föönyö tumma no Istifanüüs no, kagoroo'bo kadiginigo ka nanggeedi kabbünaana igini neene kini.

<sup>55</sup> Lakiini Koronggore ya Insili ya tadigi ka Istifanüüs ka oona, assa co a 'dotombo'do asala tüdhündü ma Masala, a Yasu ka 'dingnge ka Masala ka nüösö ma kuri.

<sup>56</sup> Istifanüüs tiki, "Niji a'a 'dotombo'do ka tatanfa'da a 'Bii'bala ma Tadü'dü ta'dingnge ka nüösö ma kuri tanno Masala!"

<sup>57</sup> Kafiri ko'do keela ka tumma ko'd'o, kaküdhü iisine, kako'do kini eege in'dili.

<sup>58</sup> Kasisigi i'i co kürö ndama anya ma Örsaliim ma tadiidir i'i a nüügsi. A kadu na adinä kide no takirnö en'di eene ka oona, kümmünü ömö'd'i tiya ana eere a'da Sawl ya.

<sup>59</sup> Katidir İstifanüüs a nüügsi, ikirü ka tümmüneene iki, "Ka Uugaara Yasu, 'duga koronggore yeede!"

<sup>60</sup> Üürü ku'bu adhiya ko'd'o iki, "Uugaara, fa tümmü eege ka tatoroko tanno kene no." Kini ka tiraana nggeege ya eyi.

## 8

*Sawl alingga kadu na amma ka Yasu no*

<sup>1</sup> A Sawl tagamma ka tiididene tanno Istifanüüs. A kadu ka naguuru tanno miini no, kagalinggo kadu na amma ka Yasu no kakirimi eege ka Örsaliim. A kadu na amma ka Yasu no, tarünö kanyalanjaana ku'bu nye'd'e kungngo, kapadaga co fiini ma Yahüüdiya nja Samira. Illi kadafiiñi, eege kungngo kütü ka Örsaliim.

<sup>2</sup> A kadu könö na amma ka Masala no, tatü'bü Istifanüüs, kadafara i'i dhorro.

<sup>3</sup> A Sawl tagunggeene ma taga'da kaniisa, öleele ka nöö'dü ümmü kadu na nagide no nya iiya amanaga egee ka pabuus.

### Lingga na Yasu kala Samira

<sup>4</sup> A kadu na kanyalagaago no, takoleele kadünögü tumma ma Masala co kadu.

<sup>5</sup> A Filibüs ta'barda aaco anya ma Samira adünögü tumma na Almasiihi co kadu kide.

<sup>6</sup> A kadu tagatoodo ka tumma tanno iini ana eedi unggodho, kudumma eene ka taföönyö tumma ma eema keefe yiini ka talinggo a türü tanno Masala ya.

<sup>7</sup> Kudumma nagoronggore tanno oroko no ka tam'biri kürö ka kadu ka oona dhabbu kiidhe dhindho. A kadu toolon-adene, namügüre dhabbu nya tanno sogo'do no.

<sup>8</sup> A kadu ka anya ka oona nye'de tadhodho ka'deema.

<sup>9</sup> A tadegeene inggide ana eere a'da Samaan, i'i agalinggo eema ya idhindhü ya dhabbu anangnga kadu ma Samira tadhere kini nye'de kungno. A'diniga oona coo'do a'da ya i'i ya ömö'dü tiya idhindhü ya.

<sup>10</sup> A kadu nye'de tisi kini keere, na iñfi no nya tanno dhiidhi no kiki, "Ömö'dü ya türü na Masala, egee kamiini naaja ka tümmünü egee a'da tidhindhi no."

<sup>11</sup> A kadu tisi kini keere kudumma iini ka amana egee ka tadhere nggege 'bücca a tageene tanno iini no.

<sup>12</sup> Kene ka tamma ka tumma tanno Filibüs ka teema tumma ma İnjilli ma Tauugaara ma Masala nya eere tiya Yasu Almasiihi ya, a kadu na nagide no nya iiya tagambeesedene.

<sup>13</sup> A Samaan tamma ka tumma tanno Yasu adakambeesedene öleele nya Filibüs, adinö ka eema yiini ka tagalinggo a türü tanno Masala no adhere.

<sup>14</sup> A kadafüni na kanna ka Örsaliim no taföönyö a'da kadu ma Samira tamma ka tumma tanno Yasu. Kikirü ka kürünü Bütrüs nya Yühanna kene.

<sup>15</sup> A kene ka ndala Samira ya, kadageema nya Masala amang kene ta'duga Koronggore ya Insili ya.

<sup>16</sup> Kudumma iini taalo ö'dö ka ömö'dü töccö ka oona illi egee kakambeesedene ana eere tiya Uugaara Yasu.

<sup>17</sup> Bütrüs nya Yühanna kümmünü iisine eene ka nanggüdü a Koronggore ya Insili ya tö'dö kene ka oona.

<sup>18</sup> A Samaan taasala Masala ka anangnga Koronggore ya Insili ya ana Bütrüs nya

Yühanna kümmünü iisine a kadu ka oona ya, ikirü ka 'duga gürüüsü amana eene.

<sup>19</sup> Iki eene, "Aaga anangnga türü no a'a meede ka tümmünü iisine neede ka ömö'dü ka oona a Koronggore ya Insili tö'dö kini ka oona!"

<sup>20</sup> A Bütrüs tiki iini, "O'o nya gürüüsü tiya yüdü ny'e'de agolo ka issi, o'o niki kide a'da o'o natana eema ya Masala ka amana a kadu ya ana gürüüsü.

<sup>21</sup> Linggo niidi nitaalo nara tosso kide ka linggo tanno nya ungngo, kudumma eedi tiya yüdü taalo a 'dila nya Masala.

<sup>22</sup> Aadha ka tatoroko tanno üdü no, ara o'o ka fara ka Masala amang kono ta'duga tumma na toroko no küdü ka eedi.

<sup>23</sup> Niji o'o ka 'diiri afa tokotente a tatoroko timi'di o'o dhindho."

<sup>24</sup> A Samaan tapadaga tumma eene iki, "Aaga eema nya Uugaara amang ka tumma tanno tafa tili a'ka oona."

<sup>25</sup> Ka Bütrüs nya Yühanna ka tageema tumma ma Uugaara, kikirü ka tafada kaco Örsaliim kadününü tumma ma İnjilli co kadu ka nadaara ma Samira dhabbu.

### Filibüs akambeese taga Habese

<sup>26</sup> A tadhangga ma Masala tiki a Filibüs, "Fik'i'dö unggeene nasülügi caa'bu ka fiimi tiya ö'dö ndama Örsaliim ma co Kaza ka dhüle."

<sup>27</sup> A Filibüs tafiki'dö unggeene, aduna taga Habese adheemu, afa ka almaala tiya uugaara ma Habese in'dili oogo mana eere a'da Kantaka mo. I'i agöö'dö ka Örsaliim ma tafara ka Masala.

<sup>28</sup> Kini ka tafada ya, akaka ka karru tammo iini iñri ka sorne ma ne'bi Asaiya.

<sup>29</sup> A Koronggore ya Insili ya tiki a Filibüs, "Unggeene naco ka carro tammo kete mo."

<sup>30</sup> A Filibüs tisi kono keere aföönyö ömö'dü ka tiiri sorne ma ne'bi Asaiya iki iini, "Nussu niimö yüdü ka taföönyö kide ya?"

<sup>31</sup> Iki iini, "Ara a'a tussu nya a'da taalo ömö'dü ma tadünögü a'a?" İkirü ka tiki a Filibüs a'da, "Aaga emmi nya a'a."

<sup>32</sup> A tumma niini ka tiiri ka sorne no, "Egee kungno afa dheeple ma tatendhe mo,

afa dhünggü kï'döönö a kadu kateppe musa kono ka oona taalo akara taafa'da niinö.

<sup>33</sup> Taalo küünü eema ya a'dilla ana i'i kanyoro eema yiini kadagüünü midhi ku'bu ana i'i, tefe ka 'dö niini ka'dugadene ka 'büdhülü, taalo ömö'dü ma tambaanya teema tumma ma kadaada miini."

<sup>34</sup> Ömö'di tiki a Filibüs, "Tirina a'a 'ba ne'bi 'dee iki a'da minna a tumma tanno eema tumma ma eyi tiya iini alla tumma ma ömö'di tököönö?"

<sup>35</sup> İkiri Filibüs ka tagadünüğü tumma ma İnjjili ma Yasu no iini alaana i'i ka tumma tanno ka sorne no.

<sup>36</sup> A kene ka tagunggeene kaala 'buugu ma 'büdü, ömö'di tiki iini ka tindini Filibüs iki iini, "'Büdü yungngo, amana i'i yungngo ara tafaga a'keere ka tambeesedene?"

<sup>37</sup> [A Filibüs tiki iini, "Taalo nüümö ma tafaga o'o keere ka tambeesedene üürü namma o'o ana eedi ka teene dhorro." Ömö'di tiki, "Namma a'a a'da Yasu Almasiiji ya 'Bii'bala ma Masala.]

<sup>38</sup> İkiri ka tarigi karro ka'barda co 'büdü nya Filibüs, a Filibüs takambeese i'i.

<sup>39</sup> Kene köö'dö ko'do ndama 'büdü ya, a Koronggore ma Masala Uugaara ta'duga Filibüs, a dheeemu taalo asala i'i afe'de, lakiini unggenee adhodho ka fiinii.

<sup>40</sup> A Filibüs taluna eyi yiini ka Ashdüd, unggenee eema tumma ma İnjjili co kadu ka na'buugu nye'de idhi aala Kaiysariya.

## 9

### Saul amma ka fiinii tiya Yasu

<sup>1</sup> A Sawl tüütü ka talinggo kadalaadene na Uugaara Yasu ma tagirina eäge, unggenee aaco ka uugaara ma ka'boge.

<sup>2</sup> Asaasa waraga kini ma co naala ma talaana ka Demasak, ma co tümmü kadu na nagiide no nja iiya na amma ka fiinii tiya Yasu öö'dö ana eäge ka Örsaliim.

<sup>3</sup> A kini ka tunggeene asa takete ka Demasak ya, ikiri 'dotombo'do karooro ka talimi ka oyeeene ada kini ka oona.

<sup>4</sup> İkiri ka 'dinggö ka 'büdhülü, aföönyö ömö'di ka tümmüneene iki iini, "Sawl, Sawl, minna agu o'o nalinggo tatoroko ana a'a?"

<sup>5</sup> A Sawl tiki, "O'o na mada Uugaara?"

A Yasu tapadaga tumma iini iki, "A'a na Yasu yüdüü ka talinggo tatoroko ana i'i ya.

<sup>6</sup> Fiki'dö 'bitüngögö naco anya kara saga tririna nüümö yüdüü kara tüünii ya."

<sup>7</sup> A kadu na kunggeene nja Sawl no töödhü, taalo keema, kaffönyö tumma, lakiini taalo kiji ömö'di.

<sup>8</sup> A Sawl taffiki'dö ndama 'büdhülü afa'da iïye asa taalo iji nüümö. A kadu tümmü i'i ka nüüsö kümmünü i'i ka tino kaco a Demasak iini.

<sup>9</sup> Adaganeene a füngögö iidoona taalo iji 'buugu itaalo agu eema itaalo oyoye 'büdü.

<sup>10</sup> A tatalaadene ka Demasak ana eere a'da Hananiya. A Uugaara Yasu tageema nja iini a kümböödö miki iini, "Hananiya."

Apadaga tumma iini iki, "İi, Uugaara."

<sup>11</sup> Uugaara Yasu tiki iini, "Fiki'dö naco a fiinii tiya ana eere a'da Dhidho ya, naco tindini ömö'di inggide ama Tarsuuus ana eere a'da Sawl. Ka 'dü tiya Yahüüsa inni kide eema nja Masala.

<sup>12</sup> Asala ömö'di a kümböödö ana eere a'da Hananiya öö'dö ümmünü iisine iini ka oona jji 'buugu."

<sup>13</sup> A Hananiya tiki, "Uugaara Yasu, kadu dhabbu kiki a'a a'da ömö'di agüünü tatoroko a kadu tanno tüdü ka Örsaliim.

<sup>14</sup> I'i a'duga waraga ka naguugaara ma ka'boge, ma tö'dö kümmü kadu na amma küdü no anangnga eäge ka pabuusu."

<sup>15</sup> Uugaara Yasu tiki iini, "Kolo kini kudumma eede ka tagesse i'i aaco teema ka tumma neede co kadu tanno kitaalo ka Yahüüdü no nja naguugaara nja kadu ma Israyil.

<sup>16</sup> Ara a'a tala kini ka ööye, ara tambaanya dhügürü ma linggo ma eere tiya eede."

<sup>17</sup> A Hananiya co 'dü anangnga iisine ka Sawl ka tüdü iki, "Örre yeede Sawl, Uugaara Yasu ya adele oona o'o ka fiinii tiya tüdü ka öö'dö ndama iini ya i'i agürünü a'a küdü amang küdü taafa'da iïye natiji 'buugu na'duga Koronggore ya Insili ya."

<sup>18</sup> Eema tarooro ka tasuli ndama iini ka iïye afa mudhangga asala 'buugu adakambeesedene.

<sup>19</sup> İkiri ka tagu eema a türü niini tapadaga kini. A Sawl taganna ka Demasak nja kadalaadene füngögö idhilli.

### Sawl alaana kadu ka Demasak

<sup>20</sup> A Bölis tarooro ka tadünüğü eema a kadu ka naala ma talaana a'da Yasu ya 'Bii'bala ma Masala.

<sup>21</sup> A kadu na föonyö no tadhere kiki, "Taalo ömö'di ya kalinggo kadu ka Örsaliim kudumma eere tiya Yasu? I'i ya öö'dö kita ma tümmü kadu na amma ka Yasu ma tunggu eäge co naguugaara ma ka'boge?"

<sup>22</sup> Lakiini Sawl akogona ma tana türü, anangnga Yahüüdü no kanna ka Demasak no ka tadhere kini ka teema dhorro a'da Yasu i'i ya Almasiiji.

<sup>23</sup> Ka füngögö ka tafijo dhabbu ya ikiri Yühanna ka timi'di tumma ma tidi i'i.

<sup>24</sup> A tumma no tala i'i kafünü ku'bu ana i'i ka iñye ma anya ooso kungngo ana uuru meene ka tidi i'i kini kaco kürö.

<sup>25</sup> Lakiini kadu niini ka a'duga i'i ooso kungngo ka'dinigi i'i caa'bu ndama ööye ma ar'da.

<sup>26</sup> Aga Sawl ka öö'dö ka Örsaliim, asaasa taneene nja kadalaadene ya kari'ba iini kitaalo kamma kini a'da i'i ya tatalaadene.

<sup>27</sup> Lakiini Barnaba a'duga i'i öö'dö ana i'i a kadafiiñi. Adagadünüğü tumma eene

iki, Sawl ka tino tanno iini iji Uugaara nya, Uugaara tageema nja iini. Adirina eema eene a'da Sawl agadünögü tumma co kadu ma Demasak ana eere tiya Uugaara a'da taalo ri'ba kini ka eedi.

<sup>28</sup> İkiri Sawl ka tunggunaana ku'bu nja kadafiiñi ka Örsalim, eema tumma na Uugaara Yasu a'da taalo ri'ba kini ka eedi.

<sup>29</sup> Adageema nja Yahüdü na eema tangga Yünan no, a'bununjaana ku'bu nja eene lakiini eege kasaasa tiidi i'i.

<sup>30</sup> A kadalaadene ka ndussu ya, ka'duga i'i kunggu co Kaiysariya ndama kanna kurugu i'i co Tarsuu.

<sup>31</sup> A kaniisa ma Yahüüdiya nja Jaliil nja Samira teema ta'diila. Midhi oona ku'bu a kadu tadhabbu ka anya a türü tanno Koronggore tiya Insili ya kaneene a ri'ba ma Uugaara.

### *Bütrüs ungngo ka Lidda*

<sup>32</sup> A Bütrüs ta kunggeene ka na'buugu nye'd'de, alla öö'dö ka kadu tanno Masala ka Lidda.

<sup>33</sup> Aluna ömö'dü inggide a mügüre ana eere a'da Inas, ungngo iini ka 'büdhü'lü nagürüünü ka iidümmü kafünü iidoona.

<sup>34</sup> A Bütrüs tiki iini, "Inas, Yasu Almasi-ihı oolona o'o. Fiki'dö na nindinaana eema ma füngögü yüdü ku'bu a niisö ma o'o." Arooro ka fiki'dö.

<sup>35</sup> A kadu ma Lidda nja kadu ma Saroon tadönö ka eema tiya nye'd'de kamma ka Uugaara Yasu.

<sup>36</sup> Madatalaadene maganna ka Yaafa mana eere a'da Tabiita mana eere tangga Yünan a'da Dorkas (a'da kosala) mamana eema a kadu tanno eema kitatalo kene no, ma linggo eema ya a'diila ya.

<sup>37</sup> Ka uuru tanno miini no mümmü maara oogo meyi. Kagala oogo ka oona kunggu co la tiya ta'doogo ya.

<sup>38</sup> A Lidda makete ka Yaafa, a kadalaadene taföonyö a'da Bütrüs ungngo ka Lidda kagürüünü kadu kini keera kiki iini a'da, Öö'dö areere afa tadoono ku'bu.

<sup>39</sup> A Bütrüs tükiri ka fiki'dö areere afada nja eene kaco Yaafa, a kene ka ndalaana ya, küküri ka 'duga i'i kaco la tiya 'doogo ya. Liya ma nagüüme toreene nja iini kafara kalaala en'di ya Dorkas ka tar'daana yeene kono ka takaleefe ka 'dö.

<sup>40</sup> A Bütrüs tuurugu kadu kürö ndama la nye'd'de, ara katüürü ku'bu afara ka Masala. İkiri ka tasala ka oofo ma ko'do iki oono, "Tabiita, fiki'dö." Müküri ka tafa'da iiye, masala Bütrüs mafiki'dö memmi.

<sup>41</sup> Ümmü oogo ka niisö mafiki'dö. Adagümmünü kadu ma Masala nye'd'de nja iiya ma nagüüme anangnga oogo eene ka adinö.

<sup>42</sup> A tumma no tadhala ka Yaafa nye'd'de, a kadu tamma ka Uugaara Yasu kadhabbu.

<sup>43</sup> A Bütrüs tagünü a fungngö dhabbu ka Yaafa ka 'dö tiya ömö'dö tiya linggo ödeene ya ana eere a'da Samaan ya.

## 10

### *Kornolius agümmünü Bütrüs*

<sup>1</sup> Ömö'dü inggide aganna ka Kaiysariya ana eere a'da Kornolius, aga uugaara ma nasigira na ö'dö miya no ma Rööma tanno ana eere a'da Tiliyani no.

<sup>2</sup> Ari'ba a Masala nja kadu ma 'dö tiya iini, asaasa kadu nye'd'de amana eema a kadu na eema katitalo kene no, afara ka Masala turi.

<sup>3</sup> İkiri ka tasala a kümbböödö tadhingga ma Masala ana ndanaaya kiidoona amuru ma siyya ka tunggunu kini atümmünü i'i, "Ka Kornolius!"

<sup>4</sup> Assa kini ko'do ka tariba ka oona iki iini, "Niki o'o nya ömö'dü eede?"

A tadhingga tiki iini, "Ta fara ka Masala nüüdü no nja linggo tanno üüdü na 'diila no, Masala mussu tumma miini.

<sup>5</sup> 'Bütingngö agürünü kadu ka Yaafa a'da köö'dö ana ömö'dü tiya ana eere a'da Samaan yeene ka tümmünü i'i a'da Bütrüs ya.

<sup>6</sup> I'i yungngo ka 'dö tiya ömö'dü tiya linggo ka ödeene ana eere a'da Samaan, 'dö yiini ka tinggini ma to."

<sup>7</sup> Ka tadhingga tiya ageema nja iini ya ka tunggeene, ikiri ka tagümmünü kadu na linggo nja iini no keera nja tasigira tiya amma ka Masala ya unggodho.

<sup>8</sup> Adirina eema tiya agüünü adene ya nye'd'de agürünü eege ka Yaafa.

<sup>9</sup> Kene ka tunggeene lititaka kungngo kasa ndö'dö kete ka anya ma Yaafa ya. A Bütrüs tasirigi co la ko'do ma teema nja Masala uuru ka teene.

<sup>10</sup> İkiri iire ka tümmü i'i asaasa tagu eema. Kene ka tüünü ada eema ma taguri iini ya, eyigi ko'do,

<sup>11</sup> asala a kümbböödö 'dotombo'do ka tatafa'da, asala niimö afeene nja ten'di adhabbu afi'dadene ka karama ada egnösö miini unggunu ku'bu ka 'büdhü'lü.

<sup>12</sup> Madigine ana eema ma 'büdhü'lü ana eema ma eriidö, nja eema tiya ürneene ya nja uyi ma 'dotombo'do.

<sup>13</sup> Aföönyö tumma kiki, "Bütrüs, fiki'dö naraana naguri."

<sup>14</sup> A Bütrüs tiki, "Uugaara, taalo a'a nagu eema ya toroko ya nja tiya nyoro ya."

<sup>15</sup> A tumma tiki iini afe'de, "Niimö ya Masala ka talingga ka'diila ya, fa tiki a'da atoroko."

<sup>16</sup> A tumma no tüünidene tiidoona, a ten'di tarooro ka a'dugadene mapadaga 'dotombo'do.

<sup>17</sup> A Bütrüs tabbü falandaana asanaana eedi ku'bu ma eema tiya iini ka tijöögö ya, a kadu na Kornolius ka agürünü euge no kaduna 'di kada 'dingnge ana ko'do ka ihye.

<sup>18</sup> Kümmünü kadu kindineene kiki a'da, "Samaan ya ana eere a'da Bütrüs ya 'dee ö'dö kita?"

<sup>19</sup> A Bütrüs tüütü ka tesenana eedi ku'bu ma eema tiya iini ka tijöögö ya, a Koronggore ya Insili ya tiki iini, "Kadu kungngo kürö ka iidoona kasaasa o'o,

<sup>20</sup> fiki'dö na caa'bu nunggeene nja eene nafa tari'ba kudumma eede, a'a nungngo nagürünü euge."

<sup>21</sup> A Bütrüs tö'dö ku'bu iki a kadu, "A'a nungngo ada katawwa 'buugu ma a'a, kö'dö aaga tiki nya?"

<sup>22</sup> A ömö'di tiki, "Kö'dö ungngo ndama Kornolius ya uugaara ma nasigira. I'i ya ömö'di a'diila ari'ba a Masala, kadu ma Yahüüdü in'dili ka'diila nja iini. Tadhangga ya insili ya tiki iini a'da nöö'dö ka 'di kita iini, amang kini taföönyö niimö yüüdü kara teema ya."

<sup>23</sup> İkiri Bütrüs ka tagümmüni kadu köö'dö kada kafala tiya iini.

<sup>24</sup> İkiri Bütrüs ka öö'dö kita Kornolius ka Kaiysariya, ka taka ka ndaadha. Kaduna Kornolius ka tindhiği euge nja kadu tanno iini nja kateefe miini.

<sup>25</sup> Aga Bütrüs kaco a 'büggöör, a Kornolius toreene nja iini üürü ku'bu kini kidha.

<sup>26</sup> A Bütrüs ta'diniga i'i ko'do iki iini, "Tiki'dö, a'a na ömö'di afa o'o!"

<sup>27</sup> Aaco 'büggöör eema nja iini, aduna kadu kadhabbu.

<sup>28</sup> A Bütrüs iki eene, "Kussu aaga a'da ungngo na Yahüüdü no, taalo ungngo kongoonyo ajeene nja kadu tanno taalo ka Yahüüdü no, ungngo taalo kaco nöö'di tanno eene, lakiini Masala mala a'a a'da nafa tümmü kadu öccö katoroko kanyoro.

<sup>29</sup> A kadu kada kümmünü a'a ya nadheedhe ko'do, nükirü ka tindini aaga, aaga kümmünü a'a amana?"

<sup>30</sup> A Kornolius tiki, "Nafara a'a ka Masala ka 'di tiya eede, a füngngö ka egiisö, niimmü tenege ana ndanaaya kiidoona amuru ma siiya, nasala ömö'di kede kidha ana en'di ka oona kada 'bassa.

<sup>31</sup> Iki a'a, 'Kornolius, mafoonyö Masala fara yüüdü mussu eema ya a'diila yüüdü ka talinggo ya.

<sup>32</sup> Agürünü kadu ka Yaafa ka ömö'di inggide ana eere a'da Samaan ya ana eere a'da Bütrüs. I'i yungngo ka 'di tiya

ömö'di tiya linggo ka ödeene ana eere a'da Samaan, 'di yiini ka tinggini ma to.'

<sup>33</sup> Nükirü a'a ka kürünü kadu areere, a tö'dö nüüdü ka'diila. Angnga kungngo ka Masala kidha, 'bitingngö nye'd'e de ma aja ka taföönyö niimö ya Uugaara ka tiki o'o ya."

<sup>34</sup> İkiri Bütrüs ka tiki a'da, "Bitingngö sa a'a tessu a'da Masala dhorro ya taalo mümmü ka ömö'di öccö, taalo mambaraana kadu ku'bu.

<sup>35</sup> Ömö'di ya ri'ba oono ya, üünü eema ya a'diila ya, mamma kini.

<sup>36</sup> Kussu aaga a'da Masala magürünii a tumma tanno oono möö'dö iini a kadu ma Israyil a'da keema tumma ma İnjiili na'diila ma Yasu Almasiili ma Uugaara ma kadu in'dili ya.

<sup>37</sup> Kussu aaga eema ya agalinggo adene ka Yahüüdiya, tata tüm'bü ka Jaliil ndama tambeese tanno Yühanna ka tagümmüneene iini.

<sup>38</sup> Yasu ya ma Nasira ya, Masala manangga türü ma Koronggore ya Insili ya iini, adaköleele ka na'buugu üünü eema ya a'diila ya, oolona kadu in'dili na türü ma Eblisi ka turunja kene ka oona oona, kudumma Masala ka taganeene nja iini.

<sup>39</sup> "Ungngo kadinö ka eema tiya iini ka tagalinggo ya a'diila ya kanaanya ma Yahüüdiya nja Örsalim kabünnü i'i ka salii'bi kada kiidaana.

<sup>40</sup> Lakiini Masala manangnga i'i ka fiki'dö ka la ma oofa a füngngö iidoona manangnga i'i ka takalaala oona a kadu,

<sup>41</sup> taalo adele oona a kadu nye'd'e, illi kadu na Masala ka tagesse euge kadhadhona, Ungngo kadinö kini ungngo taguri nja iini ungngo tagooye nja iini kini ka afiki'dö ka inde.

<sup>42</sup> Anangnga tumma ungngo iki a'da ungngo tadünügü eema a kadu a'da Masala manangnga i'i kara tümümü kadu na aaya no nja tanno adinö no.

<sup>43</sup> A nagane'bi nye'd'e tageema a tumma miini kiki a'da, ömö'di ya amma kini ya ara Masala toolona tatoroko kini ana eere tiya iini."

<sup>44</sup> Ka Bütrüs ka aleefe teema kungngo ya ikiri Koronggore ya Insili ya ka ö'dö ka kadu tanno katoodo kini no ka oona nye'd'e de kungngo.

<sup>45</sup> A Yahüüdü na amma ka Yasu no kunggeene nja Bütrüs no tadhere kene kiji Masala ka anangnga Koronggore ya Insili ya a kadu tanno taalo ka Yahüüdü no ka oona afe'de.

<sup>46</sup> Kudumma eene ka föönyö kene kageema tumma taalo neene kündhiği Masala ko'do. A Bütrüs tiki,

<sup>47</sup> "Koronggore ya Insili ya ö'dö ka kadu tanno ka oona, afa ma angnga, amada i'i yungngo tafaga eege keere ka tambeesedene?"

<sup>48</sup> Anangnga eege ka tambeesedene ana eere tiya Yasu Almasiihi, kasaasa i'i a'da agünü nja eene a füngngö idhilli.

## 11

### Tumma na Bütrüs ka Örsaliim

<sup>1</sup> A kadafiiñi nja kadu tanno amma ka Yasu ka Yahüüdiya no tafoönyö a'da kadu na taalo ka Yahüüdü no kamma ka tumma tanno Masala.

<sup>2</sup> Aga Bütrüs ka öö'dö ka Örsaliim ya, a Yahüüdü na kamma ka Yasu no teema tatoroko iini kiki iini,

<sup>3</sup> "Ninynyo o'o ka dïi tiya kadu na taalo karadene no natagu eema nja eene."

<sup>4</sup> A Bütrüs tadirina eema ya agüünï adene ana i'i ya iki,

<sup>5</sup> "Nageema a'a nja Masala ka anya ma Yaafa, nasala eema a kümböödö, niimö afeene nja ten'di adhabbu imi'didene ka na'dugugini iini ada egüsö miimi, a'bardaga ku'bu ndama 'dotombo'do idhi öö'dö kete.

<sup>6</sup> Nasala co niji eema ma eriidö kide nja eema ma toroko ma dhüile nja tiya ürneene ya nja uyi.

<sup>7</sup> Naföönyö a'a tumma ka tiki a'a, 'Ka Bütrüs, fiki'dö naara eema ya naguri.'

<sup>8</sup> "Na a'a tiki, Taalo a'a nasaasa, Uugaara! Kede ka taneene 'do ma 'billi taalo a'a nagu niimö ya toroko ya nja tiya nyoro ya kede ka niinö.'

<sup>9</sup> "A tumma tö'dönja a'a ndama 'dotombo'do afe'de kiki, 'Niimö ya Masala kadagalinggo ka'diila ya, fa tiki a'da atoroko.'

<sup>10</sup> Adiridene tiidoona, ikirü eema ka tapadaga co 'dotombo'do nye'd'e.

<sup>11</sup> "Ka uuru tanno miini no kö'dö kadu kiidoona ka'dingnge ana ko'do ka inye ma ondo ma 'dï tiya eede ka tanna kide ya, kagürünüdene ndama Kaiysariya.

<sup>12</sup> A Koronggore ya Insili ya tiki a'a nunggeene nja eene nafa tümüm rümü. A nagöre na iïdümmü ka afünü unggodho no tunggeene nja a'a ma co Kaiysariya, ungnco co 'bügööri tiya Kornolius.

<sup>13</sup> Iki ungnco a'da iji i'i tadhangga ka 'dï kita iini ka 'dingnge iki iini, 'Kürünü kadu ka Yaafa kaco tö'dö ana Samaan, ya kadu ka tümümü i'i a'da Bütrüs ya.

<sup>14</sup> Adünögü tumma müüdü ka toolon-adene nja kadu ma 'dï tiya üüdü nye'd'e kungno.'

<sup>15</sup> "A kede ka ndeema ya, a Koronggore ya Insili ya tö'dö kene ka oona afa ma tiya iini ka tagöö'dö kaja ka oona ka dhidha ya.

<sup>16</sup> Nagiigü a'a tumma na Uugaara Yasu ka tatiraana no, 'Yühanna akambeese a 'biidi illi aaga ara tambeesedene a Koronggore tiya Insili ya.'

<sup>17</sup> Masala 'dee kono ka anangnga eema a kadu tanno afa moono ka anangnga angnga kaja ka tamma ka Uugaara Yasu Almasiihi, nggeege 'dee a'a na mada natakara ka tumma tanno Masala?"

<sup>18</sup> Ka kadu ka ndaföönyö tumma na Bütrüs ka tageema no kidhi oona ku'bu kïndhiigü Masala ko'do kiki, "Bitïngngö kussu ungnco a'da Masala mafa ka kadu na taalo ka Yahüüdü no a'da kaadha ka tatoroko tanno eene köö'dö ka fiinü tiya dhorro ya nja fiinü ma tefe ka 'dï."

### Kaniisa ma ka Antakiya mo

<sup>19</sup> A kadu na amma ka Yasu kanyalaaga go kudumma inde tanno Istifanüüs kunggeene kalla kaco Finikiya nja Kuburus nja Antakiya kitaalo keema tumma ma Yasu co kadu nye'd'e illi Yahüüdü unggodho eege.

<sup>20</sup> Lakiini kadu könö kungngö eene kama Kuburus nja Keriwan kö'dö ka Antakiya kadünögü eema a kadu tanno taalo ka Yahüüdü no, keema ka tumma ma Uugaara Yasu na 'diila no co eene.

<sup>21</sup> A Masala taganeene nja eene a kadu dhabbu tamma ka Uugaara Yasu.

<sup>22</sup> A kadu ma kaniisa ka Örsaliim no tafoönyö tumma no, kikirü ka kürünü Barnaba ka Antakiya.

<sup>23</sup> A kini kinco asala ta'diila ma Masala, a dhodho uu'bu eege ka nanggeedi nye'd'e ma tidhi oona ku'bu ka Uugaara ana eedi dhorro.

<sup>24</sup> A Barnaba ömö'dï a'diila a adigine a Koronggore tiya Insili ya nja tamma ka Yasu dhorro, a kadu kadhabbu tamma ka Uugaara Yasu.

<sup>25</sup> A Barnaba co Tarsuus ma co ndawwa Sawl.

<sup>26</sup> A kini ka aluna i'i öö'dö ka Antakiya iini kagu'du ürünen unggodho kadagalaana kadu na amma ka Yasu kadhabbu. Eere tananja a kadalaaadene ka Antakiya ka dhidha a'da na masihiin.

<sup>27</sup> Ka naguuru tanno miini no, kö'dö nagane 'bi ndama Örsaliim kaco Antakiya.

<sup>28</sup> A könö tafiki'dö ana kene ana eere a'da Akabüs, a Koronggore ya Insili ya tanangnga türü kini ka oona adageema iki, a'da iire inggide atoroko, ara ta'duga 'buugu ka oona nye'd'e. iire ya miini ya agöö'dö ka ürünen tiya Kayisar Kalödiyös.

<sup>29</sup> A kadalaadene tiki a'da ara eege tonssoona eema ka oona ömö'di ya asaasa tanangnga ku'bu tamana ma türü tanno iini kagürünigü kunggu co nagöre no ka Yahüüdiya.

<sup>30</sup> Kadagüünü nggeege, kagürünigü ana eema co kadiifi ma kaniisa nja Sawl nja Barnaba.

## 12

### *Bütrüs ö'dö kürö ndama pabuuus*

<sup>1</sup> Afiki'dö Uugaara Hirüdüs ka uuru tanno miini no ma talinggo kadu ma kaniisa 'do.

<sup>2</sup> Adagiidi Yaguub ya örre tiya Yühanna ya anangnga kadu ka teedhe i'i ka eyi a kulu'ba.

<sup>3</sup> A kini ka tassa ka oona ka'diila ka Yahüüdü, iini ka tagiidi Yaguub ya, ümmü Bütrüs ka uuru ma Taanyara ma Dheed-hifi.

<sup>4</sup> Kini ka tümmü i'i anangnga i'i ka pabuusu anangnga nasigira kafa kini kanggiüsö, asaasa tapusu i'i kidha ma kadu ka Taanyara ma Tada'da ka Eriidö kara co kürö.

<sup>5</sup> Kini ka tanangnga i'i ka pabuusu ya, a kadu ma kaniisa tafara ka Masala turi kudumma iini.

<sup>6</sup> Ka ooso tanno Hirüdüs ka asaasa tala i'i a kadu no, a Bütrüs tagarigide ka söödö ma nasigira keera adimi'didene ana killi keera a'da nasigira könö kanangnga ka inye ma pabuusu kafa kide.

<sup>7</sup> Amussu kungngo a tadhangga ma Masala tadhe, a 'buugu ta'dara öyeene ka pabuusu ka teene. İkiri tadhangga ka abbü Bütrüs ka oona iji i'i iki iini, "Fiki'dö areere!" A anakilli tasuli kini ka iisine.

<sup>8</sup> A tadhangga tiki iini, "Mi'di jönnö yüüdü nimi'di egiiüde yüüdü." A Bütrüs tagalinggo nggeege, assa ka tiki iini, "Kirñ ten'di yüüdü ma kürö mo küdü ka oona nuurna a'keere."

<sup>9</sup> İkiri ka tuurna i'i keere kaco kürö, itaalo ussu a'da tumma dhorro eege kungngo a tadhangga ka tagüünii, iki kide a'da kümböödö.

<sup>10</sup> Ata'da ka nasigira tanno dhidha no a tanno asigi kide no kö'dö ka inye ma ndaliili tanno afaga co anya no katanfa'da ungodho eege köö'dö kürö kada kunggeene ka fiüni a tadhangga tarooro kadheene nja Bütrüs.

<sup>11</sup> A Bütrüs tajeene iiye ta'dara kini iki, "Sa a'a tussu a'da Masala magürünü tadhangga, öö'dö ta'duga ka Hirüdüs ka iisine nja tatoroko tanno Yahüüdü ka asaasa tüüni ana a'a."

<sup>12</sup> Adakikii iiye ku'bu, amussu kungngo unggenee aaco kita Mariyom nüümö ma

Yühanna ya kadu ka tümmünü i'i a'da Murkus ya, a'da kadu kungngo ka 'bügööri kadhabbu ka kafara ka Masala.

<sup>13</sup> İkiri Bütrüs ka tadhogo ka inye na eera no, a 'badaada ma linggo nja eene mo, mana eere a'da Rawda ma öö'dö tassa kide.

<sup>14</sup> Kono ka tussu a'da 'bugeyi ya Bütrüs i'i ya miini, mafanna üüdü areere maco a 'bügööri taalo mafa'da inye oona ka'diila kono miki eene a'da, "Bütrüs ungngo ka inye."

<sup>15</sup> Kiki oono, "Ta'bala ün'dügüngnö." Mütü ka teema tumma noono kiki oono a'da, "Tadhangga yiini i'i ya miini."

<sup>16</sup> A Bütrüs tüü ka abbü inye kidhi kaafa'da iini, kene ka taasala i'i kadhere.

<sup>17</sup> Alaga nüüsö coo'do iki eene a'da ka ki'döönö adagadünögü tumma na Masala ka tunggu i'i kürö ndama pabuuus no iki eene, "Aaga tirina tumma no a Yaguub nja kadu tanno aja," ikiri ka öö'dö kürö aaco a 'buugu töccö.

<sup>18</sup> Ka taka ka ndaadha a ri'ba tümmü nasigira kindini ajeene a'da, minna agüünü adene ana Bütrüs?

<sup>19</sup> İkiri Hirüdüs ka kürünigü a'da köö'dö ana i'i kitaalo kaluna i'i, adakindini nasigira anangnga kada kagirina eege.

İkiri Hirüdüs ka tunggeene ndama Yahüüdiya aco tanna ka Kaiysariya.

### *Inde na Hirüdüs*

<sup>20</sup> A Hirüdüs tagoroo'bo nja kadu ma Suur nja kadu ma Saiyda. Eege 'bitüngnö kimi'di tumma ka unggodho, kö'dö ka Hirüdüs. Kadhadha kadakilli Bilastos ya alinggo ada Hirüdüs ya, kasaasa ta'diila kudumma kuri tiya eene ka ticti tö'dö ndama anya tammo Uugaara Hirüdüs.

<sup>21</sup> Ka uuru tanno iini ka teema nja eene no, ikiri ka kirmi ten'di ma tauugaara iini ka oona emmi ka kööyö ma tauugaara eema nja kadu.

<sup>22</sup> A kadu tafisi kiki, "Tumma na Masala eege kungngo taalo tumma ma ömö'di eege kamiiñi."

<sup>23</sup> İkiri tadhangga ma Masala ka abbü i'i kudumma iini taalo anangnga ta'diila a Masala, ikiri a'diino ka tatamü i'i eyi.

<sup>24</sup> A tumma ma Masala tadhala ku'bu kadhabbu.

<sup>25</sup> Ka Barnaba nja Sawl ka ndatüümö linggo kafada ndama Örsaliim ya, a Yühanna ya ana eere a'da Murkus ya turna eege keere.

## 13

### *Barnaba nja Sawl kümmününja ka linggo*

<sup>1</sup> Akaganna nagane'bi ka kaniisa ma Antakiya nja katalaana, Barnaba, nja Shamön ya ana eere a'da Nijer, nja Lokios ya ma Keriwan ya, nja Manayiin ya teepe ma Hirüdüs tiya uugaara ya miini ka takadhilli, nja Sawl.

<sup>2</sup> Kene ka talinggo ada a Masala kafara kümümü tenege, a Koronggore ya Insili ya tiki eene, "Aaga apa kede ka Barnaba nja Sawl kalinggo linggo neede ka tagümmünü eege iini no."

<sup>3</sup> Kene ka tümmü tenege kafara ka Masala ya. Kümmünü iisine neene eene ka nanggüdü kuuru eege ka tino.

*Barnaba nja Sawl kalaana kadu ka Kuburus*

<sup>4</sup> A Koronggore ya Insili ya tagürünü eege ka Salükiya ndama kita miini kita kunggeene a mürkabü kaco Kuburus.

<sup>5</sup> A kene kaala Salamis ya kadünüğü tumma ma Masala a kadu ka naala ma talaana ma Yahüdü, a Yühanna Murkus takinyi linggo eene ka uuru tanno miini no.

<sup>6</sup> Katunggeene kada'da jazeera ma Kuburus nye'd'de munda anya ma Bafos, kaduna tadegeene ma Yahüdü, ümmü eyi yiini kada na'bi akorokoro ana eere a'da Bara-Yasu.

<sup>7</sup> I'i ya teepe ma ömö'dü tiya uugaara ma Rööma ya ma Kuburus ya ana eere a'da Sercius Bölis, ömö'dü ya miini ya a'dara adagümmünü Barnaba nja Bölis iki eene a'da keemaga tumma ma Masala co iini.

<sup>8</sup> Lakiini tadegeene ya ana eere a'da Elimas, afaga eege keere asasa tafünü i'i a'da afa tamma ka tumma tanno Yasu.

<sup>9</sup> A Koronggore ya Insili ya tö'dö ka Sawl, ya ana eere afe'de a'da Bölis ya, assa ka tadegeene ko'do.

<sup>10</sup> Iki iini, "Ma o'o 'bii'bala ma Ebliisi no, nanu o'o ka eema tiya a'diila ya, eedi yüüdü adigine ana eema tiya toroko nja korokoro! Taalo o'o nasaasa taadha ka taga'da fiini ma Uugaara ya dhorro ya?

<sup>11</sup> Ara nüsö na Masala sa ka abbü o'o, ara takisinsoro taalo o'o nara tiji ndanaaya a naguuru." Eema tarooro ka tarifirifi kini ka iyye a'baana 'buugu, asasa ömö'dü ma tümmünü i'i ka tino.

<sup>12</sup> Ka uugaara ka tasala eema ya agal-linggo adene ya, amma adakadhere ka talaana tanno.

*Bölis nja Barnaba ko'do ka Antakiya ka Besidiya*

<sup>13</sup> A Bölis taka ka mürkabü nja köje ndama Bafos kaco Barga ka Bamfiliya, a Yühanna Murkus tadheene nja eene aco Örsalimi.

<sup>14</sup> Illi eege kunggeene ndama Barga ka co Antakiya ka Besidiya, kaco la ma talaana ka uuru ma Sa'bidi kemmi.

<sup>15</sup> Ka ömö'dü kanda kiiri sorne ma seriye nja sorne ma nagane'bi ya, a naguugaara ma la ma talaana tagürünü kene kiki, "Nagöre ma unngo, üürü tumma ma tafünügi ko'do kungngo ada, aaga tadirina a kadu."

<sup>16</sup> A Bölis tafiki'dö alaga nüsö coo'do iki, "Kadu ma Israyil nja kajeene tanno ümmü Masala no, aaga toodo kede.

<sup>17</sup> Masala ma kadu ma Israyil magona kafaafa manangnga eege kada dhabbu yeene kadaganna ka Misiri munggu eege kürö ndama anya tammo a türü ma nüsö tanno oono.

<sup>18</sup> I'i aganeene nja eene ka dhüle adakidhi oona ku'bu nja eene a nagürüünü a kadu keera.

<sup>19</sup> Magirina kadu ka naanya ka iidümmü kafünü eera ka Kanaan manangnga 'büdöhüly yeene a kadu tanno oono kakarna kide.

<sup>20</sup> Eema ya 'do agalinggo adene a nagürüünü kö'dö namiya ka egüüsö ada'baaga ka iidümmü (450).

"Masala massa kanangnga eege kada naguugaara ma tahükümü eege idhdhi ürüünü tiya ne'bi Samwiil tö'dö.

<sup>21</sup> Kadarangnga Masala a'da mümmünü uugaara ya dhabbu yeene, a Masala tümmünü Sawl 'bii'bala ya Kaise eene kada uugaara i'i ya siliga tiya Binyamiin, adaganna kada uugaara a nagürüünü kadu keera.

<sup>22</sup> Mikirü ka tuurugu i'i keere ka tauu-gaara mara kanangnga Dawud kide, miki, 'Eedi yeede amma ka Dawud 'bii'bala ya Yessi dhorro, i'i ara talinggo eema yeede ka asasa ya.'

<sup>23</sup> "A Masala tanangnga Yasu ka tageenede kada 'bandaada ma Dawud tatoolona ma kadu ma Israyil afa ma tiya oono ka tageema ya kungngo.

<sup>24</sup> Ka Yasu ka tufürü tö'dö ya, a Yühanna tageema tumma ma taadha ka tatoroko nja tambeese ma kadu ma Israyil nye'd'de.

<sup>25</sup> Aga Yühanna ka ndakete ka tatüümö linggo niini ya ikiri ka tiki eene, 'Kiki aaga kide a'da a'a unngo na tö'dö sa? Taalo a'a na ömö'dü tiya ada ka tündhigü ya. Kaw, i'i yungno ara tö'dö kede keere, taalo a'a natambaanya tinggili meena ma egüide tiya iini.'

<sup>26</sup> "Kadu eede ka laala ya Abrahiim nja kajeene tanno ümmü tumma ma Masala no, magürünügi a tumma ma toolona ma angngä.

<sup>27</sup> Lakiini kadu ma Örsaliim nja naguugaara tanno eene taalo kussu Yasu, kitaaalo kussu tumma ma nagane'bi neene kadüüröönö a naguuru ma Sa'bidi. Kene ka tahükümü Yasu ya, kanangnga tumma na nagane'bi ka co ööye miini.

<sup>28</sup> A'da taalo kaduna niimö ma tiidi i'i, kiki a Bilatus ya uugaara ma Rööma ya a'da iidi i'i.

<sup>29</sup> Kene ka ndatiimö tumma na arigirinja ka nakasorne miini no, ka'dinigi i'i ku'bu ndama salii'bi kunggu i'i co la ma oofo.

<sup>30</sup> Lakiini Masala miji i'i ndama inde.

<sup>31</sup> I'i adele oona a kadu a füngngö dhabbu, a kadu tanno öö'dö nja iini ndama Jaliil kaco Örsaliim no, a 'bitingngö eege kungngö keema tumma niini.

<sup>32</sup> "Ungngö kadünögü tumma ma İnjilli aaga na Masala ka takatirna a kafaafa ma angnga no.

<sup>33</sup> Masala magalinggo ada angnga no laala tiya eene ya kono ka anangnga Yasu ka tafiki'dö ka inde. Afa ma sorne ma Tüüsü ma nakaaru ma eera mo katiki, 'O'o na 'bii'bala tiya eede,

ka uuru tanno nageene a'a o'o.'

<sup>34</sup> Masala mafiki'dö i'i ka inde, i'i taalo astürdö ka la ma oofo afa moono ka takiki a'da,

'Ara a'a tanangnga baraka ya insili ya ma timin'da aaga yeede ka adirina a Dawud ya.'

<sup>35</sup> Miki ka sorne ma Tüüsü ma Nakaaru, 'Taalo o'o na tafa ka tata'diila tiya üüdü assa ka tasürdö.'

<sup>36</sup> "Lakiini Dawud kini ka ndalinggo tumma na Masala kini ka aleefe ka 'dii nye'd'de eyi ada tü'büdene ka kafaafa miini kete a tuu'da niini tasürdö.

<sup>37</sup> Illi ömö'dü ya Masala ka filik'dö i'i ka inde ya taalo tuu'da niini ka sürdö.

<sup>38</sup> "Kadu eede, keemaga ungngö tumma na Masala co aaga ana eere ma Yasu, ara tatoroko naada ta'dugadene.

<sup>39</sup> Ömö'dü ya amma ka Yasu ya a toolanadene ka eema tiya tumma tanno Müüsa taalo kambaanya talinggo ya.

<sup>40</sup> Aaga adinö ko'do ii'dü tumma na nagane'bi kadarigiri no tö'dö kada.

<sup>41</sup> 'Aaga adinö kide, aaga no midhi eema no,

aaga dhore aaga taaya, ara a'a talinggo eema ka nagürüünü tanno ada

ya ömö'dü sa ka tirina aaga ya taalo aaga katamma kide.'

<sup>42</sup> Aga Bölis nja Barnaba ka ndö'dö kürö ndama la ma talaana ya, a kadu tasaasa

a'da köö'dö teema tumma ma eema tiya ka uuru ma Sa'bidi tiya unggunu tö'dö ya.

<sup>43</sup> Ka kadu ka ndanyalaga, a Yahüüdü dhabbu nja tanno öö'dö kada Yahüüdü no turuna Bölis keere nja Barnaba kadgeema nja eene kuu'bu eege ka nanggeedi a'da kütü ka türü ma Masala.

<sup>44</sup> Aga uuru ma Sa'bidi ka ndö'dö ya, a kadu maanya tagawaana oona ma taföönyö tumma ma Uugaara Yasu.

<sup>45</sup> Aga Yahüüdü ka tasala kadu kadhappu ya, oona takirimi kene keela i'i kafaga i'i keere ka teema tumma niini.

<sup>46</sup> A Bölis nja Barnaba takuru rüüsü kapadaga tumma eene, "Ungngö kama tageemaga tumma na Masala co aaga ka dhdha. Lakiini kanu aaga kide aaga tümmü nanggeyi naada a'da aaga taalo ka tefe ka 'dii ta'billi, ungngö 'bitingngö ara ungngö co ka kajeene.

<sup>47</sup> Kudumma Uugaara ka tiki angnga, 'A'a nanangnga o'o ka öyeene ada kajeene, ma toolona kadu ka 'büdhülü nye'd'de kungngö.'

<sup>48</sup> A kadu ma kajeene taföönyö tumma na Bölis, eege kadhodho kündhigü tumma na Uugaara. A kadu na amma ka Masala no nye'd'de, kagessedene ma co ka tefe ka 'dii ta'billi.

<sup>49</sup> A tumma na Masala kanyala ka ha'buugu koona nye'd'de.

<sup>50</sup> Illi Yahüüdü kagafünaana naguugaara maanya küüfunü iiya tammo iifi na ari'ba a Masala no nja kadüüfi ma anya. Kagalingga Bölis nja Barnaba, kakirimi eege kasoro eege ka anya tammo eene.

<sup>51</sup> İkiri Bölis nja Barnaba ka tafidhe ndhunggürü eene ka uune kagoroo'bo nja kadu ma anya kunggeene kaco Ikoniyä.

<sup>52</sup> A kadu na amma ka Masala no, tadiginigo adhodho nja Koronggore tiya Insili ya.

## 14

*Bölis nja Barnaba köö'dö ka Ikoniyä*

<sup>1</sup> A Bölis nja Barnaba co la ma talaana ma Yahüüdü katadaada ka Ikoniyä, kadgeema ka tumma a Yahüüdü nja kadu taalo ka Yahüüdü no kadhappu, kamma ka tumma ma Uugaara Yasu.

<sup>2</sup> A Yahüüdü no anu ka tamma no, takafünü kadu na taalo ka Yahüüdü no, kaga'da eege ka nanggüüdü kada diidi ma nagöre tanno eene na amma ka Yasu no.

<sup>3</sup> Lakiini Bölis nja Barnaba kütü ka anya kadünögü tumma ma Uugaara Yasu a kadu a rüüsü. Uugaara ya miki a'da tumma neene katimin'da manangnga türü eene

ma talingga eema ma türü nja tale'bele eema keefe.

<sup>4</sup> A kadu ma anya tasümünü njaana ku'bu, kadu no nja Yahüdü, anno nja na Bölis nja Barnaba kadafiiñi.

<sup>5</sup> Yahüdü nja kadu tanno taalo ka Yahüdü no nja naguugaara tanno eene, kasaasa tüüni tatoroko ana eege ma tadüdiri egee a nügisi.

<sup>6</sup> Ka tumma tanno ka tasurugu kene ka iisine ya kikiri ka rünö kaco Lestra nja Derba nja na'buugu tiya kete kene ya ka anya ma Ligööniya.

<sup>7</sup> Keemaga tumma ma İnjilli a kadu kanna.

#### *Bölis ö'dö ka Lestra nja Derba*

<sup>8</sup> Ömö'di inggide ka Lestra aageenedene kada mügüre, taalo unggeene 'do.

<sup>9</sup> Kini ka tatoodo ka Bölis ka teema ya, ikiri Bölis ka tagiirii i'i aduna i'i amma ana eedi ma toolonadene.

<sup>10</sup> A Bölis tiki iimi, "Fiki'dö nümmü 'buugu ana uune tanno üüdü nunggeene!" İkiri kafiri ko'do unggeene.

<sup>11</sup> Ka kadu ka ndasala eema ya Bölis ka tagünni ya, kiidhe a tumma ma Ligööniya, "Namasala kö'dö kaja ku'bu kafeene nja ömö'di."

<sup>12</sup> Kagona eere a Barnaba a'da Masala Siyus, kanangnga eere a Bölis a'da Masala Hürmüüs kudumma iini ana tumma.

<sup>13</sup> A ta'boge ma Siyus, la ma masala mungingo iini kürö ma anya, ö'dö a tulı ma naafa nja nagodha anna ka inye ma anya asaasa tirri eege nja kadu.

<sup>14</sup> Ka Barnaba nja Bölis ka taföönyö tumma no ya, köörrese en'di ku'bu eene ka oona, ka'digaana ka kadu kiidhe kene,

<sup>15</sup> "Hööy kadu, minna i'i yungngo ada ka talingga? Ungngo ka kadu aaga, kö'dö unngno teema ka tumma na 'diila no aaga taadha ka tatoroko tanno, aaga tamma ka Masala ma efe ka 'di mo marü'bü 'dotombo'do nja 'büdhülü nja to nja eema tiya inggide ya nye'd'de.

<sup>16</sup> Mafa kadu ka nagürüünü ma 'billi ka tagalinggo a fiinii tiya eene ün'dügüngngö.

<sup>17</sup> Illi oogo madinii ka eema yoono ka tagalinggo ka'diila ya, manangnga tombo'do ka ede ada aaga, manangnga eema ka'diila ka uuru miini manangnga eema ma kuri aaga dhabbu a nanggeedi ta'diila kada."

<sup>18</sup> A Bölis nja Barnaba ka'buna njaana ku'bu nja kadu ma tafaga eege keere ka tirri eege kidhi kaadha.

<sup>19</sup> A Yahüdü könö tö'dö ndama Antakiya nja İkoniya kada kafünaana kadu ka Bölis, katüdiri i'i kapügü i'i kürö ndama anya kiki kide a'da eyi.

<sup>20</sup> A kadu na amma ka Yasu no tarügi kini ka oona, afilik'i dö aaco anya. Aga taka ka ndaadhya ya, köö'dö kürö nja Barnaba kaco Derba.

#### *Tapadaga co Antakiya ka Süüriya*

<sup>21</sup> A Bölis nja Barnaba tagadünüğü tumma na Yasu a kadu ka Derba a kadu tamma kadhabbu kafada kapadaga co Lestra. Ndama Lestra kunggeene kaco İkoniya nja Antakiya ka Besidiya.

<sup>22</sup> Kütü kadünüğü tumma ma Masala eene kuu'bu eege ka nanggeedi a'da kümmü tumma ma Yasu ana eedi dhorro kiki eene, "Angnga ama co ka tadhügürü na dhabbu no amang kaja co ka tauugaara ma 'dotombo'do ma Masala."

<sup>23</sup> 'Buugu yeene kaco ya kümmüñü kadüffü ka linggo ma kaniisa, kassa ndafara ka Masala kümmü tenege kassa tümmüñü eege ka niisö tanno Uugaara Yasu yeene ka tamma kini ya.

<sup>24</sup> Kunggeene ateera meene kadhe ka anya ma Besidiya ko'do köö'dö ka Bamfiliya.

<sup>25</sup> Kadageema tumma ma Masala ka Barga kassa ka tunggeene kaco Atalia.

<sup>26</sup> Ndama kanna kunggeene kadigala ka to kapadaga co Antakiya ka Süüriya meene ka tagümmüñü eege ka niisö ma Masala kudumma linggo tanno eene ka tagalinggo 'bitüngngö no, ka tiimö.

<sup>27</sup> Kene kala Antakiya ya, kawagaana kadu ma kaniisa ka oona, eema ya Masala ka tagalinggo nja eene mafa'da fiinii a kadu na taalo ka Yahüdü no kamma kono.

<sup>28</sup> Kagünü dhabbu nja kadalaadene.

## 15

#### *Temmi ma kadafiiñi nja kadüffü ka Örsaliim*

<sup>1</sup> A kadu tö'dö ndama Yahüüdiya kalaana kadu ma kaniisa kiki eene, "Toolonadene kitaalo illi aaga taradene afa ma tiya Müüsa ya kungngo."

<sup>2</sup> A Bölis nja Barnaba ta'bununjaana ku'bu nja eene kisaana ka oona. Kikiri ka tiki a Bölis nja Barnaba nja kadu töccö tindini kadafiiñi nja kadüffü ka Örsaliim.

<sup>3</sup> Aga kadu ma kaniisa ka kürünü eege ya, kadigaala ka Finikiya nja Samira kadünüğü tumma ma kadu tanno taalo ka Yahüdü no katamma ka Yasu, oona ta'diila kadu kadhogdu.

<sup>4</sup> A kene ka ndala Örsaliim, a kadu ma kaniisa kadadda'da eege, kadafiiñi nja kadüffü kene ka tagadünüğü eema ya Masala ka tagalinggo ana eege nye'd'de.

<sup>5</sup> A kadu na amma ka tumma tanno Yasu no naFariisi no tiki a'da, "Kadu na taalo

ka Yahüüdü no fa kene karadene kümmü tumma ma seriye tiya Müüsa."

<sup>6</sup> A kadafiiñi nja kadiffi temmi ma tassa ka tumma tanno.

<sup>7</sup> Kene ka ta'bununjaana ku'bu a tumma dhabbu ya, a Bütrüs tafiki'dö iki eene, "Nagöre eede, kussu aaga a'da 'billi Masala magesse a'a kada ka söödö amang ka kadu na taalo ka Yahüüdü no taföönyö tumma ma İnjüili kamma kide.

<sup>8</sup> Masala oogo mussu nanggeedi, mamma kene manangnga Koronggore ya Insili eene afa moono ka anangnga angnga.

<sup>9</sup> Taalo kambanjaana ku'bu nja angnga. Oogo magala eege ka nanggeedi kene ka tamma kono.

<sup>10</sup> Ka'b'ba aaga Masala ka eedi amana aaga tanangnga linggo na İndhi no a kadalaadene, kafaafa ma angnga nja angnga taalo angnga kambaanya tümmöönö?

<sup>11</sup> Kamma angnga a'da ara angnga toolonadene a türü tanno Yasu, eege afe'de katoolonadene nggeege.

<sup>12</sup> A kadu nye'd'e takü'döönö dhore katoodo ka Barnaba nja Bölis kadünüğü eema ma türü ya Masala ka tanangnga eege ka talingga ya ka söödö ma kadu tanno taalo ka Yahüüdü no.

<sup>13</sup> Kene ka ndaadha ka tumma ya, Yaguub tiki eene, "Nagöre eede, aaga toodo ka tumma tanno eede.

<sup>14</sup> Iki Samaan aaga a'da Masala masaasa kadu na taalo ka Yahüüdü no ma kona kadu kene ka söödö kada tanno oono.

<sup>15</sup> Tumma no kagoreene nja tumma tanno nagane'bi ka sorne ma Masala tiya,

<sup>16</sup> 'Afe'de, ara a'a tafada nöö'dö tarü'bü la ya Dawud ya arüdü ya afe'de.

Ara a'a tarü'bünü ka naguudhu miini na'diniga i'i coo'do.

<sup>17</sup> A kadu nye'd'e co ka Masala nja kadu na taalo ka Yahüüdü no nye'd'e no eede ka tagümmünü eege kada kadu tanno eede no.

A Masala marü'bü eema nye'd'e oogo mungngo ma eema 'do.

<sup>18</sup> Masala manangnga eema ka tussu adene ma 'billi.'

<sup>19</sup> "Tumma neede a'da angnga tafa tanangnga i'i ka tindhi a kajeene tanno ö'dö ka Masala no.

<sup>20</sup> Lakiini angnga kara tarigiri ada waraga co eene, angnga tiki eene a'da kafa tagu kuri ma tirri ma eema ma namasala ya nyoro ya nja füngnögö kadhoonyo nja tuu'da ma eema tiya amiri'didene ya nja eriïdö.

<sup>21</sup> Tumma na Müüsa ka tiki a kadu ma 'billi ka naanya kürri ka naala ma talaana ka naguuru ma Sa'bidi ka anya ka oona in'dili."

*Waraga ma co ka kajeene tanno amma ka Masala no*

<sup>22</sup> İkiri kadafiiñi nja kadiffi nja kadu ma kaniisa 'do timi'di tumma ma tümmü kadu keera ma tagürünü eege ka Antakiya nja Barnaba nja Bölis, kikiri ka tümmü Yahüüsa yeene ka tümmünü i'i a'da Barsaba ya nja Siila, kadu na ussudene a kadu tasaasa eege no.

<sup>23</sup> Katarigiri waraga kanangnga eene iki,

Kadafiiñi nja kadiffi nja nagöre tanno ada kunggu ungngo waraga ya co a kadu na taalo ka Yahüüdü na amma ka fiinii tiya Yasu no ka Antakiya nja Süüriya nja Kilikiya.

Kafaanya aaga.

<sup>24</sup> Kaföönyö ungngo a'da kadu kingide kö'dö kanna a'da taalo ungngo ka kürünü eege, kaga'da aaga ka nanggüdü.

<sup>25</sup> Ungngo in'dili kimi'di tumma ma tagesesi kadu ungngo tagürünü eege kada nja örre ma angnga tiya Barnaba nja Bölis,

<sup>26</sup> kadu na üpü nanggeyi neene co kudumma eere tiya Uugaara tiya aja Yasu Almasiiji.

<sup>27</sup> Ungngo tüküri ka kürünü Yahüüsa nja Siila a'da kadirina aaga a tumma ma riinö ma eema tiya iidi ka rigiri ya.

<sup>28</sup> Ijidene ka'diila a Koronggore tiya Insili nja ungngo a'da ungngo tafa tudhu aaga ka oona ana eema tiya İndhi ya, ma eema ya asaasadene ya.

<sup>29</sup> Aaga fa taadha ka kuri ma tirri ma eema ma namasala nja eriïdö nja uu'da ma nüümö tiya kamir'didene ya nja taneene ma temelö. A'diila nja aaga kada kara taadha ka eema tiya. A Masala taneene nja aaga.

<sup>30</sup> Kunggeene kaco Antakiya, kadagümmünü kadu na ka kaniisa no kanangnga waraga eene.

<sup>31</sup> A kadu takürröönö kadhodho ka tafünügenja tanno iini.

<sup>32</sup> A Siila nja Yahüüsa eege ka eyi tiya eene ka nagane'bi kagadünüğü eema a kadu ma kaniisa dhabbu ma tuu'bü eege ka nanggeedi ka tamma ka Masala.

<sup>33</sup> Kene ka tagünü ka Antakiya a kadu tattoğe eege ana baraka ma ta'diila kaco ka kadu tanno kagürünü eege no.

<sup>34</sup> [A Siila tüü kannaa, ara Yahüüsa ka tafada unggodho i'i.]

<sup>35</sup> A Bölis nja Barnaba tüütü ka Antakiya, kalaana kadu ka tumma ma Uugaara Yasu nja kadu kungngo eene dhabbu.

### *Bölis adheene nja Barnaba*

<sup>36</sup> Kene ka tatüümö naganuuru kadhilli a Bölis tiki kungngo a Barnaba, "Aayu angnga ndapadaga keere ka naanya tanno aja ka tagalinggo tumma ma Uugaara Yasu kide no angnga türi taneene ma kadu tanno aja kide."

<sup>37</sup> A Barnaba tasaasa Yühanna ya ana eere a'da Murkus ya ka tunggeene nja eene,

<sup>38</sup> illi Bölis anu kini kico nja eene kudumma iini ka adheene nja eene ka Bamfiliya itaalo agalinggo nja eene.

<sup>39</sup> Ka'digineene kadheene, Barnaba ta'duga Murkus kunggeene a tigaala ka to kaco Kuburus.

<sup>40</sup> İkiri Bölis ka a'duga Siila kunggeene ka Antakiya a kadu ma kaniisa tattoog euge a ta'dila tanno Uugaara Yasu.

<sup>41</sup> Kadigaala ka Süüriya nja Kilikiya, keema tumma ma Yasu a kadu ka nakaniisa a'da kaneene a türü tanno Yasu dhorro.

## 16

### *Timosaws unggenee nja Bölis nja Siila*

<sup>1</sup> A Bölis tö'dö ka Derba nja Lestra. A tatalaadene inggide kanna ka Lestra ana eere a'da Timosaws, a niimö miini ma mada Yahüüdü mümmü tumma ma Yasu dhorro, a pupa yiini taga Yünan.

<sup>2</sup> A kadu ma kaniisa ma Lestra nja Ikoniya teema tumma ta'dila tanno iini.

<sup>3</sup> A Bölis tasaasa ta'duga i'i nja iini, ikiri ka teedhe i'i kudumma 'buugu tiya eene kaco ya, kadu ma Yahüüdü kussu a'da pupa yiini ataga Yünan.

<sup>4</sup> Kene ka tunggeene kosso naanya keema ka tumma na kadu ma kaniisa a'da kaföönyö tumma na kadaifii nja kadiifi no ka Örsaliim amang kene talingga iini.

<sup>5</sup> A kadu ma kaniisa tümmü tumma na Yasu dhorro ana eedi kafa kide, a kadu tagusunja ka köje a naganuuru.

### *Tumma na ö'dönja Bölis ka Tarwas*

<sup>6</sup> Kadigaala ka anya ma Frajya nja Galatiya, kudumma Koronggore tiya Insili ya kafaga euge keere ka tadünnü tumma ma Yasu ka Asiya.

<sup>7</sup> Kene ka ndakete ka Miisiya ya kasaasa co Basiiniya, a Koronggore ya Yasu tafaga euge keere kaco.

<sup>8</sup> Kagilaana ka Miisiya köö'dö ka Tarwas.

<sup>9</sup> Aga 'buugu ka ndooso kungngo ya, a Bölis tasala ömö'di a kümböödö i'i taga Makadoniya ka a'düngnge ana ko'do ümmünü i'i iki, "Aayu ka Makadoniya noolona ungngo!"

<sup>10</sup> Aga Bölis ka tasala tumma no ya, ungngo tarooro ka tunggeene ma taco Makadoniya kudumma iidi ka tussu a'da Masala mümmünü a'da ungngo co talaana kadu ka tumma noono kide.

### *Lidiya mamma ka Yasu*

<sup>11</sup> Ungngo taka ka mürkabü ka Tarwas ma co Samotrakiya, a taka taadha ungngo co a Niyabulis.

<sup>12</sup> Ndama kita miini kita ungngo co Filippi, ka anya ma dhabbu mo ka Makadoniya, ma kadu ma Rööma katümmöönö. Ungngo taganna kide naguuru kadhabbu.

<sup>13</sup> A ka uuru ma Sa'bidi ungngo tö'dö kürö ungngo co a tinggini ma ri, ungngo tiki kide a'da ungngo taduna 'buugu ma Yahüüdü kadeema nja Masala kide, ungngo taduna iiya kemmi, ungngo temmi kene ka oona ungngo tageema nja eene.

<sup>14</sup> Aka minggide matoodo kiid ka tumma, mana eere a'da Lidiya ma ma anya Tiyatira, manadene ana en'di ma öödhe mümmü tumma na Masala ana eedi, Uugaara Yasu tafa'da oogo ka üdü ma toodo ka Bölis ka teema.

<sup>15</sup> Kono ka tagambeesedene nja kadu ma 'di tiya oono ya, miki ungngo, "Kada ka tussu a'da a'a namma ka Yasu dhorro ya, aaga öödö ka 'di tiya eede aaga tanna kide." Matakuu'buna ungngo ka nanggeedi ungngo tamma kono kide.

### *Bölis nja Siila kungngo ka pabuusu ka Filippi*

<sup>16</sup> Uuru kinggide kiid ka tunggunu kafara ka Masala ya, ungngo tikiri ka toreene nja aka madasaga ma hatta. Oogo magawaana gürüüsi koona dhabbu, mada hatta mamana ömö'di tiya oono kada tasaga tiya oono ya.

<sup>17</sup> Mikiri ka to'd'o ka Bölis keere nja ungngo, meema ko'd'o miki a'da, "Kadu ma Masala ma ko'do mo, euge kungngo kalaala aaga ka fiini ma toolonadene."

<sup>18</sup> Malinggo nggeege turi kungngo a'dooko atoroko ka Bölis ka oona, ikiri ka tassa kono ko'do iki a koronggore tiya toroko ya, "A'a nikli o'ana eere tiya Yasu Almasihi a'da öödö kürö kono ka oona." İkiri ka arooro ka öödö kürö.

<sup>19</sup> A kadu tanno oono ka tassa ka almaala kata arumeene itaalo ya, kükiri ka tümmü Bölis nja Siila kaco 'dadillö ma seriye ana euge.

<sup>20</sup> Kümmünü euge a naguugaara ma anya kiki eene, "Kadu na eera no ka Yahüüdü kassa öödö taga'da anya maaja.

<sup>21</sup> Kalaana kadu a tumma kefe taalo kunggeene nja tumma tanno aja ungngo taalo kalinggo iini ungngo no ma Rööma."

<sup>22</sup> A kadu co kamuli muli ka linggo eege. A naguugaara ma anya tarisinana en'di ka Bölis ku'bu nja Siila kanangnga kadu kada abbü eege.

<sup>23</sup> Kada abbü eege 'do kanangnga eege ka pabuusu, kikirī ka tiki a tasigira ma pabuusu a'da afa kene dhorro.

<sup>24</sup> Ka ömö'di ma pabuusu ka taföönyö tumma no ya, ikirī ka tuuru eege co pabuusu ka teene afin'da eege ka ndagee'di amang kene tafa tarünö.

<sup>25</sup> A Bölis nja Siila ka ooso ka teene kafara ka Masala, küüwe tüüsü, a kadu na ka pabuusu no tatoodo kene kide.

<sup>26</sup> A 'buugu taroro ka tatinggi'di dhindho a naginyeene ka tatafa'da, a nakilli tatinggildhe ka kadu tanno ka pabuusu no nye'de kungngo.

<sup>27</sup> Ömö'di ma pabuusu tajeene ka tarigide asala naginyeene ka tafa'danja ku'bu, iki kide a'da karünö kadu na anna ka pabuusu, ikirī ka afanna kulu'ba asaasa tidi eyi yiini.

<sup>28</sup> A Bölis tiidhe ya ko'do iki iini, "Fa tiidi eyi yüdü. Ungngo ka inggitta nye'de.".

<sup>29</sup> Ikirī ömö'di ma pabuusu ka agürünü ka issi arünö aco co pabuusu ka teene ikirī ka tüürü ku'bu ana küüge ka Bölis kidha nja Siila a'deedene ka oona.

<sup>30</sup> Ikirī ka tuurugu eege kürö iki eene, "Ka kadu eede, ara a'a tönynyö amang kede toolonadene?"

<sup>31</sup> Kikirī ka tiki iini, "Amma ka Uugaara Yasu amang küdü toolonadene nja kadu ma 'di tiya üdü."

<sup>32</sup> Kada kadünögü tumma ma Uugaara Yasu co iini nja kadu ma 'di tiya iini.

<sup>33</sup> A'duga eege ka ooso tanno miini aagala nagoola na in'di no, arooro ka tambeesedene nja kadu ma 'di tiya iini.

<sup>34</sup> A'duga eege aco öö'di nja eene anangnga kuri eene adhodho nja kadu ma öö'di tiya iini, kudumma eene ka tamma ka Masala.

<sup>35</sup> A taka ka ndaadha ya a naguugaara ma anya tagürünü nasigira kiki eene a'da, "Kapa ka kadu tanno eere no."

<sup>36</sup> A ömö'di ma pabuusu tadirina tumma no a Bölis, iki iini a'da, "Naguugaara kiki a'da, a kadu tapa kada aaga tunggeene, a 'bitüngögö aaga unggeene a ta'diila."

<sup>37</sup> A Bölis tiki, "Kabbü ungngo ka kadu kidha a'da taalo kageema seriye a'da ungngo ka kadu ma Rööma kanangnga ungngo ka pabuusu. A 'bitüngögö kasaasa tapa kide kume kume ün'düngögö, taalo ungngo katunggeene. Fa kene köö'dö tuurugu ungngo kürö."

<sup>38</sup> A nasigira ta'duga tumma no, kunggu co naguugaara. Kene ka ndussu a'da Bölis

nja Siila ka ma Rööma, a ri'ba tümmü eege.

<sup>39</sup> Kikirī ka öö'dö kene kiki eene, "Aaga fa kidü, kussu ungngo a'da tatoroko nüüdii eege kamiini." Kuurugu eege kürö kiki eene a'da kunggeene kacoanya tököön.

<sup>40</sup> Kene köö'dö kürö ndama pabuusu kunggeene kaco kita Lidiya, kagoreene nja kadu ma kaniisa kuu'bu eege ka nanggeedi kikirī ka tunggeene.

## 17

### *Bölis nja Siila ka Tasalanükü*

<sup>1</sup> Ka kilaana ka Amifibulis nja Apolinia köö'dö ka Tasalanükü, Tasalanükü la ma talaana ma Yahüüdü minggide.

<sup>2</sup> Ikirī Bölis ka co la ma talaana afa ma tiya iini ka tüünii katadaada ya alaala eege ka sorne ma Masala adageema a naganuuru ma Sa'bidi kiidoona.

<sup>3</sup> Adünögü co eene a'da Almasihiya Masala ka kürünü i'i a töö'dö öö'dö tadhügürü idhi eyi afiki'dö ka inde iki eene a'da, "Yasu i'i yungngo eede ka teema ka tumma miini co aaga yungngo Almasihi."

<sup>4</sup> A kadu na Yahüüdü könö tamma kurna tumma na Bölis keere nja Siila, nja kadu ma Yünan dhabbu na ümmü tumma ma Masala dhorro no, nja iiya ma anya tanno iifi no.

<sup>5</sup> A Yahüüdü tadigine a kirimü, kateefe tawagaana nagaaga ka oona nja kadu ma weerö nja tanno orro tino ün'düngögö no, kiidhe kalinggo weerö, kacoanya köö'dö ka 'di kita Yason köö'dö tümmü Bölis nja Siila, ma tümmünü eege a kadu.

<sup>6</sup> Kitaalo kaduna eege, kikirī ka tükkü Yason nja kadu könö na amma ka Yasu no, ma tunggu eege co naguugaara ma anya kiidhe kiki a'da, "Kadu kagirnaana kadu ka oona ka na'būugu nye'de kungngo eege kungngo kita."

<sup>7</sup> Eege kafala tanna Yason, eege 'do kanuka tumma tanno Kayisar, kiki a'da, 'Uugaara öccö inggide ana eere a'da Yasu.'

<sup>8</sup> A tumma no tagu'du eege ka oona 'do nja naguugaara ma anya.

<sup>9</sup> Kikirī kanangnga Yason nja kadu töccö ka taafa nanggeyi neene kassa ka tapa eene kunggeene.

### *Bölis nja Siila kungngo ka Beeriya*

<sup>10</sup> A kadu ma kaniisa tuurugu Bölis nja Siila co Beeriya ooso kungngo. Kene ka aala ya, kaco la ma talaana ma Yahüüdü.

<sup>11</sup> A kadu ma Beeriya ka'diila kadagi'i bi kadu ma Tasalanükü, kudumma eene ka tagatoodo ka tumma ma Masala a tasaasa ma eedi dhorro kürri Sorne a naguuru ma türri eema ya Bölis ka tiki ya a timin'da.

<sup>12</sup> A Yahüüdü tamma ka tumma tanno eene kadhabbu a nagiide ma Yünan nja iyi tanno iifi no kadhabbu.

<sup>13</sup> A Yahüüdü ma Tasalanüki tessu a'da Bölis anna ka Beeriya alaana kadu ka tumma ma Masala kuurna i'i keere kaco taga'da tumma kafüunaana kadu kini.

<sup>14</sup> A kadu ma kaniisa tikiři ka tuurugu Bölis co fiin'i ma to, lakiini Siila nja Timosaws kütü ka Beeriya.

<sup>15</sup> A kadu na kunggeene nja Bölis no teefe tatto go i'i co Asiina, kikiři ka tafada kaco Beeriya, a Bölis tagürünü eege a tumma ka Siila nja Timosaws a'da köö'dö kini keere areere.

### Bölis aganna ka Asiina

<sup>16</sup> Ka Bölis ka tindhigü Siila nja Timosaws ka Asiina ya, agoroo'bo kini ka tasala ka eema ma namasala kaanya kadhabbu.

<sup>17</sup> İkiri ka ta'bununjaana ku'bu ka la ma talaana nja Yahüüdü nja kadu ma Yünan tanno ari'ba a Masala no nja kadu tanno iini ka taduna eege ka mansala a naguuru no.

<sup>18</sup> A kadu na ussu eema no kinggide kana eere a'da Abikooriin nja Rwaakiin ka'bununjaana ku'bu a tumma nja iini, a kadu könö kungngo eene tiki, "Minna ada tar'daan eema tiya ka asaasa tatiraana?"

A kadu öccö tiki, "I'i eema tumma namasala keefe." Eege kiki nggege kudumma Bölis ka teema tumma ma Yasu nja tafiki'dö ka inde.

<sup>19</sup> Kikiři ka 'duga Bölis kaco a 'banya ka 'buugu tiya ana eere a'da Ariusbaküüs, kiki iini, "Kasaasa unngno tessu talaana na issi no üüdü ka öö'dö iini no?

<sup>20</sup> Kudumma talaana tanno üüdü kefe, unngno taalo kassumunaana kide, unngno tasaasa tessu minna i'i ya miini unngno."

<sup>21</sup> A kadu ma Asiina nja kajeene tanno kanna kanna no, koraana tino ku'bu ün'dügüngögö taalo kalinggo niimö, lakin'i kaana tumma katoodo ku'bu ma tumma tanno aleefe tabbü 'dala no.

<sup>22</sup> A Bölis tafiki'dö a'dingnge ana ko'do ka kadu ka söödö iki eene, "Ka kadu ma Asiina! Niji aaga ka tümmü namasala naada a nanggeedi dhorro.

<sup>23</sup> Nakunggunaana a'a ku'bu kaanya tammo ada niiri naala ma masala naada, naduna 'buugu ma türri kömö ada kadakiri kide a'da taalo aaga kussu oogo. Oogo mungingo eede ka teema tumma moono aaga.

<sup>24</sup> Masala magalinggo 'buugu nye'd'e ana eema tiya inggide ya 'do oogo ma Uugaara ma 'büdhüüli nja 'dotombo'do taalo manna ka naala tanno kadu ka türböönö ana iisine no.

<sup>25</sup> Taalo angnga kama tamana eema oono, angnga taalo talingga ada oono ana iisine mitaalo masaasa eema kudumma oono mungingo mamana eema a kadu manangnga tefe ka 'dii eene nja teela tanya ana eema nye'd'e.

<sup>26</sup> Marü'bü kadu nye'd'e ka 'büdhüüli ndama ömö'di unggodho, manangnga 'büdhüüli eene nye'd'e, madagalinggo ada naganuuru eene, madagalaala eege ka na'buugu meene ka tanna kide.

<sup>27</sup> Nggege ya, kene ka aduna 'buugu moono käduna oogo, oogo taalo magu'b'ba kaja ku'bu.

<sup>28</sup> Kefe angnga ka 'dii ana oogo, angnga takunggunaana ku'bu angnga tefe 'di.' Afa ma katüüfü tüüsü tiya ada ka takiki, 'Angnga ka laala tiya oono.'

<sup>29</sup> "Kaja kada laala tiya Masala, taalo angnga kama tiki a'da Masala magalinggo adene dahaba nja fudda nja niigisi ya adinadene a niisö ma ömö'di nja ta'dara miini.

<sup>30</sup> A Masala mafa ka kadu kene ka titalo kussu oogo mümmünü kadu ka na'buugu ka oona nye'd'e a'da kaadha ka tatoroko kapadaga kono.

<sup>31</sup> Uuru kinggide kono ka tagümmü kadu ka 'buugu ka oona nye'd'e ana ömö'di tiya oono ka tümmünü i'i a'da öö'dö tümmü kadu ya, maala a kadu kono ka fiki'dö i'i ka inde."

<sup>32</sup> Kene ka föönyö tumma ma tafiki'dö ka inde, a kadu könö kamidhi i'i, a könö tiki iini, "Kasaasa unngno taföönyö tumma ma tafiki'dö ka inde no afe'de."

<sup>33</sup> İkiri Bölis ka öö'dö kürö unggene.

<sup>34</sup> A kadu könö kamma ka tumma tanno iini kaco iini keere, ömö'di öccö ana eere a'da Diyanisos i'i ya taga adaya ma Ariusbaküüs, aka ma minggide mana eere a'da Damariis a kadu töccö nja eene.

## 18

### Bölis ka Kürünsüs

<sup>1</sup> Ndama tiya, ikiri Bölis ka tinyi Asiina ku'bu aco Kürünsüs.

<sup>2</sup> Aduna taga Yahüüdü kide ama Büntüs ana eere a'da Akilla aleefe tagunggeene ndama Italiya nja aka tammo iini mana eere a'da Berskilla, kudumma Kayisar Kalödiyös ya uugaara ma Rööma ya agasoro Yahüüdü nye'd'e a'da kunggeene ka Rööma. A Bölis tunggeene ma tassa kene.

<sup>3</sup> Adaganeene nja eene adagalinggo nja eene kudumma iini ka talingga naheema afa meene kungingo.

<sup>4</sup> Adaga'bununjaana ku'bu nja Yahüüdü nja kadu ma Yünan ka naguuru ma Sa'bidi ka la ma talaana, ma tasaasa eege a'da kamma ka tumma tanno iini.

<sup>5</sup> Ka Siila nja Timosaws ka öö'dö ndama Makadoniya ya, a Bölis taadha ka eema nye'd'de ara kanaana iïye ka tagadünnü tumma ma Masala eemaga co a Yahüüdü a'da Yasu i'i ya Almasiihi.

<sup>6</sup> Kanu ka tumma tanno iini keela i'i, ikiri ka tafidhi ten'di miini eene, iki eene, "Erüüdö yaada kada ka nanggüüdü, nagu'b'ba kada ara a'a kunggeene ndama uru tanno naco kajeene könö."

<sup>7</sup> Unggeene ndama kanna aco 'dî tiya ömö'dî ya tajeene akete ka la ma talaana ana eere a'da Tito Yustus ümmü Masala ana eedi dhorro.

<sup>8</sup> A Krisbus ya uugaara ma la ma talaana ya tamma ka Uugaara Yasu, i'i nja kadu tiya iini nye'd'e de kungngo. A kadu ma Kürünsüs kadhabbu taföönyö tumma na Bölis, kamma ka Yasu kakambeesedene.

<sup>9</sup> Uugaara tageema nja Bölis ooso kungngo a kümböödö iki iini, "Fa tari'ba eema! Fa takî dööönö."

<sup>10</sup> A'a nja o'o, taalo ömö'dî a tüünii nüümö ana o'o. Kudumma kadu kungngo eede ka anya tammo kadhabbu."

<sup>11</sup> Adaganna kide ana ürüünü unggodho a nagatereene ka iidümmü kafünü unggodho alaana kadu ka tumma ma Masala.

<sup>12</sup> A kadu ma Rööma tümmüñü Kalion ka tümmü tauugaara ma Akaiya, a Yahüüdü tawagaana ka 'büdhüüli kümmü Bölis kaco ka naguugaara iini.

<sup>13</sup> Kiki, "Ömö'dî ya aga'da kadu ka nanggüüdü asasa eäge katümmü tumma ma Masala ka fiinii tiya diidi ma seriye."

<sup>14</sup> İkiri Bölis ka asaasa teema, a Kalion tiki a Yahüüdü, "Kini ka tatumma tanno toroko no nja eema ma taga'da 'buugu eäge kamiiñi ya ara tagatoodo ka tumma tanno ada natakindinaana ku'bu.

<sup>15</sup> Üürü tumma eema ma ker'de ker'de nja tindiri nja nagereene nja tumma ma seriye tanno ada, aaga indinanago unggodho aaga kudumma eede taalo a'a nasaasa ta uugaara ma tumma tanno."

<sup>16</sup> İkiri ka tagasoro eäge kunggeene.

<sup>17</sup> Kümmü Sustanis ya uugaara ma la ma talaana ya eäge in'dili kungngo katabbü i'i ka Kalion kidha a Kalion tanangnga iïye eene taalo indineene.

### *Tapadaga co Antakiya*

<sup>18</sup> A Bölis taganna ka Kürünsüs dhabbu, a kadu ma kaniisa tatto. I'i adigaala ka to nja Berskillia nja Akilla ma taco Süüriya. Adagemmedene ka Kankariya, kudumma iini ka timi'di tumma ma Masala.

<sup>19</sup> Kene köö'dö ka Afosus ka 'buugu ya Bölis ka adheene nja Berskillia Akilla aco la ma talaana eema tumma ma Masala nja Yahüüdü.

<sup>20</sup> Kikiri ka tiki iini a'da agünü nja eene dhabbu, illi i'i anu.

<sup>21</sup> Lakiini kini ka tunggeene iki eene, "Ka Masala ka tafa kede ara a'a tafada." İkiri ka tunggeene ka Afosus adigaala ka to.

<sup>22</sup> İkiri ka ta'barda ka Kaiysariya, ndama kanna asirigö co Örsaliim ööjülu kadu ma kaniisa, a'barda aco Antakiya.

<sup>23</sup> Kini ka tagünü kide idhilli ya, ikiri ka tunggeene aco Galatiya nja Frajya öö'dö a kadu ma kaniisa ka nanggeedi a'da kakardha ku'bu dhorro.

### *Apölös innyo Afosus innyo Kürünsüs*

<sup>24</sup> A taga Yahüüdü inggide ama Iskandariya ana eere a'da Apölös, ö'dö ka Afosus ussu ka tadiünnü eema, ussu tumma ma sorne ma Masala dhorro.

<sup>25</sup> Akalaana kadu i'i ka fiinii tiya Uugaara adageema tumma kadhabbu dhorro, adageema ma Yasu ka'diila a'da ussu tambiese na Yühanna sugi.

<sup>26</sup> Kini ka teema ka la ma talaana a rüsü, ikiri Berskillia nja Akilla ka föönyö, kikiri ka 'duga i'i kaco öö'dî kita eene iini kadagalaana i'i ka fiinii ma Masala tiya dhorro ya.

<sup>27</sup> Apölös tasaasa tunggeene aco Akaiya, a kadu ma kaniisa ma Afosus taguu'bu i'i ka eedi kagürünü i'i a waraga ma co tunggu a kadu ma kaniisa ka Akaiya iini a'da kamma kini aneene nja eene. A kini ka ndala Akaiya, a ta'diila nja kadu tanno amma ka Masala no.

<sup>28</sup> Kudumma iini ka tagii'bi Yahüüdü ka kadu kidha a tumma, alaala tumma ka kasorne ma Masala a'da Yasu i'i Almasiihi.

## 19

### *Bölis ungno ka Afosus*

<sup>1</sup> Ka Apölös ka taganna ka Kürünsüs ya, a Bölis tunggeene atigaala ka naanya ka söödö öö'dö ka Afosus aduna kadalaadene könö kide.

<sup>2</sup> İkiri ka tiki eene, "Kada katamma ka Yasu 'dee ka'duga aaga Koronggore ya Insili ya?"

Kiki iini, "Taalo ungno kussu a'da Koronggore ya Insili ya inggide."

<sup>3</sup> İkiri ka tiki, "A tambeeze na mada eäge kungngo ada?"

Iki iini, "Tambeeze na Yühanna."

<sup>4</sup> A Bölis tiki, "Akambeese Yühanna tambiese ma taadha ka linggo ma eema tiya toroko ya, ageema nja kadu a'da kamma ka ömö'dî ya tö'dö kini keere ya i'i ya Yasu."

<sup>5</sup> A kene ka taföönyö tumma no ya, kadakambeesedene ana eere tiya Uugaara Yasu.

<sup>6</sup> Ka Bölis ka tümmünü iisine kene ka oona ya, a Koronggore ya Insili ya tö'dö kene ka oona, karooro ka teema tumma taalo neene, keema tumma ma Masala.

<sup>7</sup> A kadu kinggide kö'dö kada'baaga kafünü eera.

<sup>8</sup> A Bölis tikirii ka co la ma talaana eema tumma kanna a'da taalo ri'ba kini ka eedi, asaasa a'da kamma ka tauugaara ma Masala.

<sup>9</sup> A kadu öccö tanu kide kamidhi tumma niini keema tatoroko kanu ka fiinii tiya Yasu kidha ma kadu könö. A Bölis taadha kene ka oona a'duga kadalaadene nja iini, adünögü tumma eene turi ka 'buugu ma talaana ya Tiranus.

<sup>10</sup> Ütü kadagalinggo nggege a nagürüünü keera idhi iki a Yahüüdü ma Asiya nja kadu ma Yünan taföönyö tumma na Uugaara Yasu.

### *Laala ya Sakawa*

<sup>11</sup> A Masala tanangnga Bölis ka talinggo eema ya idhindhi keefe.

<sup>12</sup> A kadu tama namendeeli nja en'di tiya iini kamana a kadu tanno maara no ka oona. A maara talimi kene, a nagoronggore na oroko no taadha kene ka oona.

<sup>13</sup> A Yahüüdü könö kunggunaana ku'bu kasoro nagoronggore na oroko no, kikirii ka asaasa tasoro nagana'bu kürö ana eere tiya Uugaara Yasu. Kiki a'da, "Ana eere tiya Yasu afa Bölis ka teema iini ya, a'a nikii aayu kürö."

<sup>14</sup> Uugaara ma ka'boge ma Yahüüdü ing-gide, ana eere a'da Sakawa, laala ungngo iini iidümü afünü eera kalinggo eema ya miini ya.

<sup>15</sup> A koronggore ya toroko ya tiki eene, "Nussu a'a Yasu nussu Bölis aaga ka mada?"

<sup>16</sup> Ömö'di ya ana koronggore ya toroko ya tako'do kene atabbü eege adagii'bi eege kikirii ka rünö ana oona kada 'döngngönyö a nagööla ka oona.

<sup>17</sup> A kadu ma Afosus, Yahüüdü nja kadu ma Yünan taföönyö tumma no nye'd'de a ri'ba tümmü eege, eere ya Uugaara Yasu tidhindhi.

<sup>18</sup> A kadu na amma ka Yasu no tö'dö kadhabbu kamma ka kadu kidha a'da eege kagalinggo eema ya toroko ya.

<sup>19</sup> A kadegeene takawagaana ka sorne ka kadu kidha nye'd'de kungngo küfü issü kide, kadakineene tamana miini kaduna i'i ö'dö nakajine hamsiin alif.\*

<sup>20</sup> Nggege tumma na Uugaara Yasu tanyala ka na'buugu kadhabbu, kinggire-dene a türü.

<sup>21</sup> Ka eema tiya agüünü adene ka ndatiümö ya, ikirii Bölis ka asaasa tunggeene aco Makadoniya nja Akaiya assa ka tunggeene aco Örsaliim, ikirii ka tiki, "Kede ka taala kanna ya ara a'a co tassa co Rööma."

<sup>22</sup> Agürünü kadu na akinyi linggo iini no keera, Timosaws nja Arastus ka Makadoniya ara kütü ka Asiya agünü kide.

### *Taga'da 'buugu ka Afosus*

<sup>23</sup> A kadu taga'da ajeene ka Afosus ka uuru tanno miini no kudumma fiinii tiya Uugaara Yasu.

<sup>24</sup> Tamodoo'do inggide ana eere a'da Dimitrios adina eema ma masala ma Artamis ana fudda ma kadu tafara kono. I'i nja kadu tanno iini kanadene nja kadu ana gürüüsü dhabbu.

<sup>25</sup> İkiri ka tawagaana kadu na linggo eema nja iini no koona iki eene, "Kussu aaga a'da almaala yaaja kö'dö ndama linggo tanno.

<sup>26</sup> Aaga adinö kide aaga taföönyö ömö'di ya ana eere a'da Bölis ya, i'i anangnga kadu kadhabbu ka föönyö tumma niini atafaga eege keere kafara ka masala, kalinggo tanno ka Afosus nja Asiya. Iki a'da namasala na alinggo adene ana iisine no, taalo Masala dhorro oogo miini.

<sup>27</sup> A tumma no ka toroko 'do kara tanangnga kadu ka teema diidi ma angnga. Kara tamidhi la ma masala ma Artamis ma dhabbu mo. Kara tanangnga oogo ka titaaloo, oogo mungngo a kadu kafara kono ka Asiya nja 'buugu ka oona nye'd'de."

<sup>28</sup> A kadu ka taföönyö tumma no ya, ikirii kagoroo'bo kiidhe, "Artamis ma Afosus idhindhi!"

<sup>29</sup> Amussu kungngo ya, anya nye'd'de co kalumuli. A kadu tarefe Kayos nja Arestarkos, eege kama Makadoniya, kungeene nja Bölis küügü eege kaco 'dadillö ma ta'bala.

<sup>30</sup> A Bölis tasaasa co ka kadu ka teene ka 'dadillö, a kadu ma kaniisa sa faga i'i keere ka co.

<sup>31</sup> A kadu ma Asiya na iifi no eege ka kateefe ma Bölis tagürüünü tumma iini a'da afa co tarigii eyi yiini ka tumma tanno, aaco 'dadillö.

<sup>32</sup> A kadu nye'd'de teema tumma kadhoonyo, aya teema tumma niini kefe aya teema niini unggodho i'i, könö taalo kussu niimö yeene ka öö'dö kide ya.

<sup>33</sup> A Yahüüdü tikirii ka tuurugu ka Askan-der ka kadu kidha kiki a'da i'i ya kalinggo tumma no, ikirii ka alaga niisö coo'do asaasa teema.

\* **19:19 19.19** Jine ya miini ya i'i ya ma linggo ma uuru unggodho.

<sup>34</sup> Kene ka ndussu a'da i'i ya taga Yahüdü ya, eege in'dili kungngō kiidhe a tumma ka unggodho kabbü tageere 'do idhi katafara ndanaaya keera, kene katiidhe kiki a'da, "Artamis, Masala ma Afosus! Magu'dana ma idhindhi."

<sup>35</sup> Ömö'di maanya ya arigiri ya, tanangnga kadu kada mudhudhuli iki, "Ka kadu ma Afosus, kadu ka 'buugu koona in'dili kussu a'da anya maaja Afosus oogo mafa ka la ma masala ma dhabbu mo Artamis nja koronggore tiya oono ya a'dinggö ku'bu ndama 'dotombo' do mo?

<sup>36</sup> Taalo ömö'di ma tiki a'da katoroko tumma no, aaga idhi oona ku'bu aaga taadha ka tatoroko.

<sup>37</sup> Aaga kö'dö a kadu no kita, lakiini eege taalo kanyooro eema ka la ma masala alla keela masala tammo aja.

<sup>38</sup> Üürü Dimitrios nja kadu tanno linggo nja iini no, tumma kungngō eene nja kadu, fa kene kaco teema seriye ka naguugaara kidha, ka uuru miini na dhorro no.

<sup>39</sup> Üürü tumma kungngō ada afe'de, kateemadene ka fiinī tiya dhorro ya kidha ma naguugaara.

<sup>40</sup> A'a niki, ii'dü kadu tapügü tumma kaja ka oona ma tagirnaana kadu koona kalinggo adene ka uuru tanno. A fiinī ma aja ka'düsünigü titaaloo."

<sup>41</sup> A kini ka ndageema nggeege ya uuru kadu ka tino.

## 20

### *Bölis inynyo Makadoniya nja Akaiya*

<sup>1</sup> Ka kadu ka ndaadha ka tiidhe a 'buugu tamudhudhuli ka Afosus ya, ikiri Bölis ka tagümmünü kadu ma kaniisa adageema nja eene uu'bu eege ka eedi ikiri ka tattoogee ungegene aco Makadoniya.

<sup>2</sup> İkiri ka tunggeene ka na'buugu eema tumma ma Masala dhabbu nja kadu tanno amma ka Masala no, uu'bu eege ka nanggeedi. İkiri ka öö'dö ka Akaiya.

<sup>3</sup> Adaganna kide a nagatereene kidoona, a kini ka ndasaasa tadigaala ka to ma taco Süüriya ya, ikiri Yahüdü ka üüni ünggü ma tiidi i'i, ikiri ka tussu tumma no asasa tunggeene a fiinī ma Makadoniya.

<sup>4</sup> I'i unggeene nja Subatros 'bii'bala ya Berus ya ma Beeriya ya, nja Arestarkos nja Skontos ya ma Tasalanükü ya, nja Kayos ya ma Derba ya, nja Timosaws, nja Tikikos nja Trifimöös ya maanya ma Asiya.

<sup>5</sup> Kadhe ungngō kaco Tarwas ka takindhigü inggide.

<sup>6</sup> Ungngō tunggeene ungngō tadho ka to ndama Filippi ka Taanyara ma Dheedhifi kinynyo kürö, ungngō tagureene nja eene ka Tarwas a fungngö kiidümmü, ungngō

taganna kide a fungngö ka iidümmü kafünü eera.

### *Bölis inynyo Tarwas*

<sup>7</sup> A ka uuru ma Lahada ooso kungngō ungnego temmi ma takoreene ma kaniisa ikiri Bölis ka adünögü tumma ma Masala a kadu, idhi a 'buugu tooso ka teene kudumma iini ka asaasa tunggeene ligata kungngō.

<sup>8</sup> Kaganna galalamba ka la ka ta'doogo kadhappu kita iidi katemmi kide kita.

<sup>9</sup> A tadimöögö inggide emmi ka ka tinggini ma subaga ma la, ana eere a'da Aftikös, ka Bölis ka leefe teema ya, a tarigide ta'duga i'i anyege'de ku'bu a'dinggö caa'bu ndama kürö ndama la ko'do ka'dina i'i ka teyi.

<sup>10</sup> A Bölis ta'barda ku'bu iti i'i kini ka oona, iki eene, "Aaga afa ta'deedene ka oona. I'i adinö!"

<sup>11</sup> A Bölis tasirigü co la a'duga miteene a'düsünü adaguri. Adageema nja kadu a taka taadha ikiri ka tunggeene.

<sup>12</sup> A kadu tö'dö a 'bii'bala ka adinö, a nanggeedi neene ta'barda ku'bu.

### *Bölis inynyo Miletos*

<sup>13</sup> Ungngō tunggeene, ungngō co mürkabü, ungngō tunggeene ma co Asos ma co a'duga Bölis nja ungngō ndama kanna kudumma iini ka tadirina ungngō no a'da i'i asaasa tunggeene ana awwa aaco.

<sup>14</sup> A kini ka ala ungngō ka Asos ya, ungngō tanangnga i'i ka mürkabü ungngō tunggeene ma co Metilina.

<sup>15</sup> Ka taka ka taadha, ungngō tunggeene a mürkabü, ungngō tö'dö ka Kios. A fungngö kanda iidoona ya, ungngō tala kete ma Samos, ungngō tö'dö ka Miliits a fungngö tiya egüsö ya.

<sup>16</sup> Kudumma Bölis ka asaasa tadheedhe ka Afosus ko'do kudumma iini taalo asaasa tatoodo ku'bu ka Asiya kini ka 'digaana ma taco Örsaliim a'da üfürü uuru ma Taanyara ma Koronggore.

### *Tumma na Bölis nja kadüfi ma Afosus*

<sup>17</sup> Ka Bölis ka taganna ka Miliits i'i agürünü tumma co kadüfi ma kaniisa ma Afosus.

<sup>18</sup> Kene ka öö'dö a tumma iini, iki eene, "Kussu aaga a'da nakan'deene a'nja aaga ka naganuuru tanno in'dili no, ka uuru tanno eede ka öö'dö ka Asiya ta'bütengngö.

<sup>19</sup> Nagalinggo a'la linggo na Uugaara Yasu ana eedi ka tinsili, taalo nümmü eyi yeede kada nüümö, nalinggo ada Uugaara Yasu a 'büdi ka iiyé, ana eema tiya toroko ya Yahüdü ka tagüünü ana a'a ya.

<sup>20</sup> Taalo a'a nüürü nüümö öccö keere ma tö'dö keere a nüümö aaga, nagalaana aaga

ka na'buugu nye'd'de kadara co nöö'd'i tanno ada.

<sup>21</sup> Nadagadünögü eema a Yahüüdü nya kadu ma Yünan a'da kaadha ka eema tiya toroko kamma ka Uugaara yaaja Yasu.

<sup>22</sup> "Ka uuru tanno ara co Örsaliim, a Koronggore ya Insili ya ka tuurugu a'a co, nitaalo nussu a'da ara a'a co aduna minna kide.

<sup>23</sup> Kudumma Koronggore tiya Insili ya eema nya a'a ka na'buugu neede ka taco no a'da dhügürü nya naaru ma timi'di a'a kindhig'i a'a.

<sup>24</sup> Lakiini a'a taalo nümmü eyi yeede kada nüümö tiya agu'daana iindhi ya, kudumma eede ka asaasa tattümö linggo na Uugaara Yasu ka tümmünü a'no, nalaana a'a kadu ka tumma ma İnjilli ma türü tanno Masala.

<sup>25</sup> "Nussu a'a a'da taalo aaga kataasala ka dhugudha tiya eede ndama uuru tanno, aaga neede ka taganeene nya aaga nadageema tumma ma tauugaara ma Masala nya aaga no.

<sup>26</sup> Nageema a'a tumma nya aaga uuru tanno a'da, nagu'b'ba a'a ka eriidö ma kadu nye'd'de.

<sup>27</sup> Nageema tumma ma Masala nya aaga dhabbu nitaalo nüürü nüümö öccö keere.

<sup>28</sup> Aaga adinö ko'do ma nangnga eyi tanno ada, nya kadu tanno a Koronggore tiya Insili ya ka anangnga aaga kafa kene no. Aaga ka katasaana ma kaniisa tammo Masala moono ka taana ana eriidö tiya oono mo.

<sup>29</sup> Nussu a'a a'da kede ka tunggeene, a kadu öccö tafiri kada ka teeme afa needi na taalo kana 'bangna ma kadu no kungngo.

<sup>30</sup> A kadu köön kungngo ada ka söödö kadaga'da kadu ma kaniisa ka nanggüüdü küüsini egee ka uurna egee keere.

<sup>31</sup> Aaga adinö ko'do, aaga agiig'i nagürüünü na iidoona no taalo a'a naadha ka teeme nya aaga osooso a naguuru a 'biidi ka iiye.

<sup>32</sup> "A'a 'bitüngögü nümmünü aaga ku'bu a Masala nya tumma ma türü tanno Masala, ma tanangnga türü aaga manangnga takarna ka eema ka kadu tanno oolonadene no.

<sup>33</sup> Kede ka taneene nya aaga, taalo a'a nasaasa gürüüsü nya en'di ka ömö'd'i ma eyi tiya eede.

<sup>34</sup> Kussu aaga tumma meede ka talingga ana iisine tanno eede nöö'dö ana eema ma eyi tiya eede nya kadu tanno linggo nya a'a no.

<sup>35</sup> Turi nageema a'a tumma aaga a'da angnga takinyi kadu na eema ka titalo kene no, aaga agiig'i tumma na Uugaara

Yasu ka eyi tiya iini ka tiraana a'da, 'A'diila tamana eema a kadu adagii'bi a tamaana ka kadu.'

<sup>36</sup> Aga Bölis ka ndatümö tumma niini ya, üürü ku'bu nya kadu nye'd'de kafara ka Masala.

<sup>37</sup> İkiri egee ka tattoog Bölis, kafara egee in'dili a 'biidi ka iiye.

<sup>38</sup> Niümö ya dhorro tanangnga nanggeedi ka toroko kene kagoroo'bo ya, tumma iimi ka tiki eene a'da, "Taalo aaga ka tasala ka dhugudha tiya eede afe'de." Kikiri ka tattoog i'i co mürkabü ka to.

## 21

### Bölis ungngo ka Örsaliim

<sup>1</sup> A kidi ka adheene nya eene, ungngo tapadaga co fiini ma Kos ya, a taka taadha ungngo co Rodes ndama kanna ungngo co Batra.

<sup>2</sup> Ungngo taluna mürkabü kanna ma tunggeene ma co Finikiya, ungngo taka kide ungngo tunggeene.

<sup>3</sup> Küdi ka ndasala Kuburus ya, ungngo tinyi oogo ndama nüüsö ma küüle, ungngo tapadaga co fiini ma Süüriya. Ungngo tapadaga ka Suur, ara kadu kadadhifigi eema ku'bu ndama mürkabü.

<sup>4</sup> Ungngo taluna kadu na Yasu kanna, ungngo tagönü nya eene fungnöö iidümmü afünü eera. A Koronggore ya Insili ya tanangnga egee ka tiki a Bölis a'da afa tasirigi co Örsaliim.

<sup>5</sup> Kede ka ndatümö taneene nya eene kanna ya, ungngo tö'dö kürö ungngo tunggeene. Kattogo ungngo egee nye'd'de kungngo nya iiya tanno eene nya laala tiya eene, ungngo tüürü ku'bu ka tinggini ma to ungngo tafara ka Masala.

<sup>6</sup> Kikiri ka tattoog ungngo, ungngo taka ka mürkabü kara ka tafada kaco nöö'd'i tanno eene.

<sup>7</sup> Ndama Suur ungngo tala Butlmaws, ungngo töjüli kadu ma kaniisa kide ungngo tiyyü nya eene fungnöö unggodho.

<sup>8</sup> A taka taadha ungngo tunggeene ungngo co Kaiysariya, ungngo co 'di tiya Filibüs ya alaana kadu ka tumma ma İnjilli ya i'i yungngo a kadu ka tagümmünü egee ka iidümmü kafünü eera ma linggo ma kaniisa. Ungngo taganeene nya iini.

<sup>9</sup> A laala ya lömü ya ungngo iini egüsö, kiji tumma ma Masala. Keemaga tumma ma Masala co a kadu.

<sup>10</sup> Kidi ka ndatümö fungnöö dhabbu nya eene ya, a ne'bi inggide ana eere a'da Akabüs ö'dö ndama Yahüüdiya.

<sup>11</sup> Ö'dö ka 'dī a'duga jönnö ya Bölis afin'di uune niimi nja iisine iki, "Korongore ya Insili ya iki a'da, 'Ömö'dü ma jönnö tiya, ara Yahüdü timü'di i'i nggeege ka Örsaliim kümümüñü i'i a kajeene."

<sup>12</sup> Kidi ka taföönyö tumma no ya, ungngo nja kadu tanno iidi kete no ungngo tageema nja Bölis a'da afa tasirigü co Örsaliim.

<sup>13</sup> İkiri Bölis ka tiki, "Minna agu aaga, aaga tafara aaga taga'da a'a ka eedi? A'a taalo namma ma timi'didene sugi, nagala a'a kindinaana eyi yeede co teyi ka Örsaliim kudumma eere tiya Uugaara Yasu."

<sup>14</sup> A kidi ka ndagi'di kini keere ka tumma ya, ikiri ungngo ka tiki, "Fa ka tumma tanno Uugaara Yasu kalinggo adene."

<sup>15</sup> Ka naganuuru ka ndatümö ya, ungngo tindinaana oona ku'bu ungngo tunggeene ma co Örsaliim.

<sup>16</sup> A kadu könö ma kaniisa tunggeene nja ungngo ndama Kaiysariya, kateefe tattoogco 'diiya Manason ya ma Kuburus ya, i'i tatalaadene ya Yasu ma 'billi.

<sup>17</sup> Kidi kaala Örsaliim ya, a kadu ma kaniisa takoreene nja ungngo kadhogdu.

<sup>18</sup> Ka taka ka ndaadha a Bölis tunggeene nja ungngo ma co kita Yaguub, a kadüifi ma kaniisa tö'dö kide nye'd'e kungngo.

<sup>19</sup> İkiri Bölis ka tööjülu euge ada-gadünögü eema ya Masala ka anangnga i'i ka tagalinggo ada kajeene no.

<sup>20</sup> Kene ka taföönyö tumma niini no, kindhgü Masala ko'do. Kikiri ka a Bölis, "Nijöögö o'o örre ma angnga, Yahüdü na alif kadhabbu kamma ka tumma tanno Yasu illi euge in'dili kagu'daana ka nanggeedi ma seriye.

<sup>21</sup> Eege kaföönyö a'da o'o nalaana Yahüdü na anna ka kajeene ka teene no a'da kaadha ka seriye tiya Müüsa. O'o tadünögü eema eene a'da kafa tara laala yeene, kafa talinggo ana eema tiya kadaada ma angnga ma 'billi ya.

<sup>22</sup> Angnga 'bitüngö ara ta könnyö? Kudumma eene ka taföönyö a'da o'o no'dö.

<sup>23</sup> Niimö yündi ka tiki o'o a'da nalinggo, kadu kungngo iidi ka egiisö kimi'di tumma ma Masala.

<sup>24</sup> 'Duga eege aaga co taagala oona ka la ma Masala nja eene nanangnga faana ma temme nanggüüdü neene ku'bu amang ka kadu tessu nye'd'e a'da tumma ma o'o neene ka taföönyö no taalo katimin'da, nunggeene o'o ka fiin'i tiya seriye tiya Müüsa afa meenee kungngo.

<sup>25</sup> A kadu na amma ka Yasu a'da taalo ka Yahüdü no, kunggugu ungngo tumma eene a'da kümümü eyi yeene ka kuri ma

türri ma eema ma namasala nja eriidö nja eema tiya kadu kamir'daana ya nja füngngö kadhoonyo."

<sup>26</sup> A Bölis ta'duga kadu na egiisö no a taka ka ndaadha, kanangnga nanggeyi neene ka tinsili. İkiri kaco la ma Masala ma tadiri tumma a ta'boge ma naguuru ma tatümö tinsili, amang kene tara eema yeene.

### *Bölis ümmü adene ka la ma Masala*

<sup>27</sup> A füngngö ya iidümmü afinü eera ya ka ndakete ka tatümö ya, a Yahüdü ma Asiya tasala Bölis ka la ma Masala. Kadagafunaana kadu kini kümümü i'i.

<sup>28</sup> Kidhe kiki, "Ka kadu ma Israyil! Aaga akinyi ungngo, ömö'dü ya i'i ungngo alaana kadu nye'd'e ka na'buugu eela kadu ma Israyil nja seriye ya Müüsa nja 'buugu tiya. Nja iini ka öö'dö a kadu ma Yünan ka la ma Masala kanyoro 'buugu ya insili ya."

<sup>29</sup> Eege kiki nggeege kudumma eene ka tiji Trifimöös ya ma Afosus ya ka tunggeene nja Bölis kaanya, kiki kide a'da Bölis a'duga i'i aco la ma Masala nja iini.

<sup>30</sup> Anya co kamuli muli nye'd'e, a kadu tagedhe Bölis kümümü i'i kasisigi i'i co kürüö ndama inye ma la ma Masala karooro ka teere kide.

<sup>31</sup> Kene ka ndasaasa tiidi Bölis ya, ikiri uugaara ma nasigira ya dhabbu ya ma Rööma ka taföönyö a'da Örsaliim nye'd'e kungngo minynyo kamuli muli.

<sup>32</sup> İkiri ka kürünü nasigira köö'dö kene areere. A kene ka ndasala nasigira nja uugaara tiya eene ya, kikiri ka taadha ka baana ma Bölis.

<sup>33</sup> Uugaara ma nasigira ya dhabbu ya tö'dö kini kete iki eene a'da kimi'di i'i ana killi keera, ikiri ka tindini kadu miini a'da, "Mada i'i ya miini, i'i agalinggo minna?"

<sup>34</sup> A kadu tambananjaana ku'bu a tumma niini, uugaara ma nasigira ya dhabbu ya itaalo ussu tumma niini dhorro, ikiri ka tiki a nasigira a'da ka üügü Bölis kaco 'buugu tiya eene iini.

<sup>35</sup> A kene ka ndala kadhiki, ikiri nasigira ka ta'diniga i'i ko'do kudumma kadu katili i'i ka oona.

<sup>36</sup> Kudumma eene ka tagöö'dö kene keere kidhe a'da, "Aaga iidi i'i!"

### *Bölis ümmü ka eyi tiya iini*

<sup>37</sup> Ka Bölis ka ndakete kaco a 'buugu ma nasigira ya, ikiri ka tiki uugaara ma nasigira ya dhabbu ya, "Bandumma ungngo eede ka asaasa tadirina o'o?"

Uugaara ma nasigira ya dhabbu ya tiki iini, "Tara a'da nussu o'o tangga Yünan?

<sup>38</sup> Taalo o'o na taga Misiri ya kirnaana ka kadu ka oona kambele, üögü kadu na alif ka egiisö ma koro'bo aco a dhile iini?"

<sup>39</sup> İkiri Bölis ka tiki, "A'a na taga Yahüdü nanna a'a ka Tarsuus ka Kilikiya anya ma dhabbu mo. Fa kede neema njaka."'

<sup>40</sup> İkiri ka tapa kini a'da eema, ikiri Bölis ka 'dingnge ka kadhiki alaga nüsö ko'do a kadu. A 'buugu tamudhudhuli, adageema nja eene a tumma ma Yahüdü iki eene.

## 22

<sup>1</sup> "Aaga föönyö aaga na kafaafa ma a'a no njä nagöre tanno eede, tumma neede ka tadirina aaga 'bitingngö meede ka tümmöönö ka eyi tiya eede."

<sup>2</sup> Kene ka föönyö iini ka teema tangga Yahüdü ya, kamusuli ku'bu.

İkiri Bölis ka tiki,

<sup>3</sup> "A'a na taga Yahüdü nageenedene a'a ka Tarsuus ma Kilikiya, illi a'a nasere ka anya tammo. A Gamalayiil akalaana a'a ka tumma ma seriye ma kadaada ma angnga ana eedi dhorro nasaasa linggo ma Masala afa tiya ada ka talingga 'bitingngö ya.

<sup>4</sup> Nadagalinggo kadu na ümmü fiin'i ya na amanaga eege ka inde, kanangnga kadu na nagide no nja iiya ka pabuuso.

<sup>5</sup> Uugaara ma ka'boge nja naguugaara ma Yahüdü nye'de kadinö kede. Nama a'a tumma kene co nagöre tanno aja ka Demasak, nafada naco kannna ma tö'dö a kadu ka Örsaliim ma tapusu adene."

*Bölis eema tumma müni ka tamma ka Yasu*

(Kadafinī 9.1-19; 26.12-18)

<sup>6</sup> "Kede ka ndakete ka Demasak, uuru ka teene a 'buugu ta'dara öyeene kede ka oona a 'dotombo' do talimi.

<sup>7</sup> Na'dingga 'ka 'büdhülü, naföönyö ömö'dü ka tümmünü a'a, 'Sawl, Sawl, minna agu o'o nalinggo a'a?"

<sup>8</sup> "Niki, 'O'o na mada, Uugaara?"

"Iki, 'A'a na Yasu ya ma Nasira yüüdü ka talingga i'i ya.'

<sup>9</sup> A kadu na kunggeene nja a'a no, kiji töyeene kassa kitaalo kaföönyö tumma na ömö'dü ya eema nja a'a ya.

<sup>10</sup> "İkiri a'a ka tiki, 'Nasaasa a'a ka tönyöö 'bitingngö, Uugaara?'

"İkiri ka tiki a'a, 'Fiki'dö naco Demasak, ara kadu sa kadirina eema o'o ma nüümö tiya yüüdü ka talingga ya.'

<sup>11</sup> Töyeene na limi no kakafa a'a ka iiye taalo niji 'buugu, a kadu na unggeene nja a'a no tagümmünü a'a ka tino ungngo co Demasak.

<sup>12</sup> "Ömö'dü inggide ana eere a'da Hananiya akümmü tumma ma Masala ana eedi dhorro, a Yahüdü na kanna ka

Demasak no nye'd'e kungngo kadinö ka taneene tanno iini.

<sup>13</sup> İkiri ka öö'dö a 'dingnge kede kete iki, 'Örre yeede Sawl, asala 'buugu.' İkiri a'a ka arooro ka tasala 'buugu.

<sup>14</sup> "İkiri ka tiki, 'Masala ma kafaafa ma angnga magesse o'o manangnga o'o ka tussu fiin'i yoono, nasala ta'dila niini, naföönyö tumma niini.'

<sup>15</sup> Ara o'o tadünögü eema yüüdü ka tadinö kide na o'o taföönyö ya co a kadu nye'd'e.

<sup>16</sup> Minna agu o'o 'bitingngö nadoono ku'bu? Fiki'dö nambeesedene, a tatoroko tatanggala küdü ka oona ninsili ana eere tiya iini.'

## Masala magürünü Bölis ka kajeene

<sup>17</sup> "Nikiri a'a ka tafada naco Örsaliim. A kede ka ndafara ka Masala ka la ma Masala ya, neyigi ko'do.

<sup>18</sup> Nikiri a'a ka tasala Uugaara ka tiki a'a, 'Areeere nöö'dö kürö ndama Örsaliim, kudumma eene taalo kara tamma ka tumma tanno yüüdü ka teema ma a'a no.'

<sup>19</sup> "Nikiri a'a ka tiki, 'Ka Uugaara, eege kussu tumma no dhorro, kadakicci co naala ma talaana nümmü kadu na amma ka fiin'i tiya namanaga a'a eege ka pabuusu nabbü eege.

<sup>20</sup> Ka uuru tanno kadu ka tagiidi Istifanüs no a'da a'a ninggide, namma ka inde tanno iini nataafa ka en'di tiya kadu tanno kiidi i'i no.'

<sup>21</sup> "İkiri Uugaara Yasu ka tiki a'a, 'Ayau ara a'a tagürünü o'o naco co 'buugu ya a ku'b'ba, a kadu tanno taalo ka Yahüdü no.'

<sup>22</sup> A kadu tagatoodo ka Bölis kini ka ndiri tumma no ya, kikiri ka teele ka tumma ko'd'o, "Aaga kiidi ömö'dü ya apa ka anya. Kudumma iini taalo ama tefe ka 'd'i 'do."

<sup>23</sup> Kikiri ka ndiidhe, kapüpügü en'di yeene kasanaana kuraaga co'o do.

<sup>24</sup> Uugaara ma nasigira ya dhabbu ya tanangnga nasigira ka a'duga Bölis kaco 'buugu ma nasigira ka teene ana i'i kabbü i'i kindini i'i a'da minna agu Yahüdü kiidhe kini ka oona afa ma tiya kungngo.

<sup>25</sup> Kene kafin'di i'i ku'bu ma tabbü i'i, ikiri Bölis ka tiki uugaara ma nasigira ya a 'dingnge kini kete ya, "A'dila kada nggeege maada ka tabbü ömö'dü ya taga Rööma a'da taalo aaga kageema seriye, aaga taalo tussu nüümö ya agu i'i ya?"

<sup>26</sup> Uugaara ma nasigira ka taföönyö tumma no ya, areere aco ka uugaara ma nasigira ya dhabbu ya iki iini, "Ara o'o talingga minna? Ömö'dü ya a taga Rööma."

<sup>27</sup> İkiri uugaara ma nasigira ya dhabbu ya ka öö'dö ka Bölis iki iini, "Eema nja a'a dhorro, o'o na taga Rööma?"

A Bölis tiki iini a'da, "İi."

<sup>28</sup> Uugaara ma nasigira ya dhabbu ya tiki iini, "Nafaana a'a ana almaala dhabbu amang kede tataga Rööma."

İkiri Bölis ka tiki iini, "A'a ya, nageene-dene a'a kide."

<sup>29</sup> A kadu na asaasa takindini i'i no, karooro kaadha kini ka oona. A ri'ba tümmü uugaara ma nasigira ya dhabbu ya kini ka ndussu a'da i'i imi'di Bölis ya taga Rööma ya a nakilli.

### *Bölis ka kadiüfi ma Yahüüdü kidha*

<sup>30</sup> Ka taka ka ndaadha a uugaara ma nasigira ya dhabbu ya tasaasa tussu niimö ya anangnga Yahüüdü ka tümmü Bölis ka tumma iini ya, agildhe nakilli iini ka oona, iki a naguugaara ma ka'boge nja kadiüfi ma la ma Yahüüdü nye'de a'da köö'dö temmi. İkiri ka tapa ka Bölis öö'dö kene ka teene.

## 23

<sup>1</sup> A Bölis tassa ka kadu tanno emmi ka la ma kadiüfi ma Yahüüdü iki, "Nagöre eede, naga 'diila a'a nja tumma ma Masala ana eedi ka tinsili ta'bitingngö."

<sup>2</sup> A Hananiya ya uugaara ma ka'boge ya, ka tiki a kadu na a'dingnge ka Bölis kete no, kabbü Bölis ka niinö.

<sup>3</sup> İkiri Bölis ka tiki iini, "Ara Masala tabbü o'o, o'o na 'dakala tiya lokoladene kata'bassa ya. Nemmi kannu nümmü a'a afä ma seriye ka tiki no, namana o'o ka abbü adene ka'bana ko'do nja tumma ma seriye tiya Masala?"

<sup>4</sup> A kadu na a'dingnge ka Bölis kete no kiki, "Neela o'o uugaara ma ka'boge tiya Masala?"

<sup>5</sup> İkiri Bölis ka tiki, "Ka kadu eede, taalo a'a nakussu a'da i'i ya uugaara ma ka'boge ma Masala, kudumma Sorne ma Masala ka tiki a'da, 'Aaga tafa teela uugaara ma kadu tanno üüdü."

<sup>6</sup> A Bölis tussu a'da kadu könö ka na-Fariisi öccö ta Sadügiin, ikiri ka alneegi ka kadu ka teene iki, "Ka kadu, a'a na Fariisi 'bii'bala ma Fariisi, nümmü adene a'a 'bitingngö' kudumma eede ka tamma nussu a'da tafiki'dö ma inde ka inggide."

<sup>7</sup> Iki iini ka tirina tumma no, a tumma ta'bana ko'do kene, naFariisi nja Sadügiin kasümünjaana ku'bu.

<sup>8</sup> Kudumma Sadügiin taalo kamma a'da ara kadu tafiki'dö ka inde, kitaalo kamma a'da kadhangga kinggide nja nagorongore, a naFariisi kamma kide nye'de.

<sup>9</sup> A kadu tiidhe ko'do, a naFariisi könö na alaana kadu ka tumma ma seriye tiya Masala ka'dingnge ko'do kam'bana ka tumma kiki, "Taalo ungngo kaduna niimö ya toroko ya ka ömö'di tiya. Aminna üürü korongore alla tadhangga ageema nja iini."

<sup>10</sup> A kadu takardha ku'bu ta'bununjaana ku'bu a tumma ko'do a ri'ba tümmü uugaara ma nasigira ya dhabbu ya, i'i'di kadu taresana Bölis ku'bu, ikiri ka kürünü nasigira a'da ka'barda kaco tamuru i'i kene ka söödö kunggu i'i co 'buugu ma nasigira.

<sup>11</sup> Ka ooso töccö Uugaara Yasu ka tatele oona a Bölis, iki iini, "Kardha ku'bu! Afa müüdü ka tageema tumma neede ka Örsalim ya, ara o'o teema tumma neede nggeege ka Rööma."

### *Ünggü ma tara tiidi Bölis*

<sup>12</sup> Ka taka ka ndaadha a Yahüüdü timi'di tumma, kanu kagu eema kanu katooye ara eege katidi Bölis.

<sup>13</sup> A kadu na mi'di tumma no kadhabbu köö'dö ukumu kudu keera (40).

<sup>14</sup> İkiri ka öö'dö ka naguugaara ma ka'boge nja naguugaara maanya kiki eene, "Kümmü ungngo eedi taalo ungngo katagu eema illi ungngo tiidi Bölis.

<sup>15</sup> Aaga kürünü ka uugaara ma nasigira ya dhabbu ya aaga na naguugaara no aaga tiki a'da uurugu Bölis aaga, a'da aaga asaasa tassa ka niimö tiya inggide ya, ara ungngo takadho ka fiinü ungngo tindinaana oona ku'bu ma tiidi i'i ka fiinü ma ta unggunu kada kita."

<sup>16</sup> A moole ma Bölis taföönyö ünggü ma tumma no, ikiri ka co ka Bölis ka 'buugu ma nasigira adirina eema iini.

<sup>17</sup> İkiri Bölis ka tümmünü uugaara ma nasigira iki iini, "'Duga 'bii'bala ya naco tunggu i'i co uugaara ma nasigira ya dhabbu ya, kudumma tumma kungngö iini ma co tadırina iini."

<sup>18</sup> A uugaara ma nasigira ta'duga i'i ateefe tunggu i'i co uugaara ma nasigira ya dhabbu ya iki iini, "Ömö'di ya ka pabuuus ya, ya ana eere a'da Bölis ya agümmünü a'a iki a'da nöö'dö a 'bii'bala tiya o'o, kudumma tumma kungngö iini ma tadırina o'o."

<sup>19</sup> Uugaara ma nasigira ya dhabbu ya tümmü i'i ka niisö kasigi keere, ikiri ka tindini i'i, "Minna inggide, tirina a'a?"

<sup>20</sup> Iki, "Yahüüdü kimi'di tumma ma tasaasa tiki o'o a'da nuurugu Bölis kadha ma naguugaara taka kudumma eene ka asaasa tussu niimö ya kini ya dhorro.

<sup>21</sup> O'o fa tamma kene kide, kudumma kadu kinggide kö'dö kukumu kadu keera kafunnügü ku'bu ana i'i, egee kanu kagu eema kanu ka 'biidi ara egee katiidi Bölis, egee 'bitüngngö kindinaana oona ku'bu, kindhiqü o'o."

<sup>22</sup> Uugaara ma nasigira ya dhabbu ya tuuru 'bii'bala ka tino iki iini, "Fa tiki ömö'di a'da nadirina eema a'a."

### Bölis ö'dö ka Uugaara Fileks

<sup>23</sup> Uugaara ma nasigira ya dhabbu ya tagümminü naguugaara ma nasigira keera iki eene, "Aaga ümmünü nasigira na ö'dö ukumu kadu kada'baaga (200), a kadu ma naguttu kö'dö a kukumu kadu kiidoona kaco iisine (70), a kadu ma nakandha tö'dö a ukumu kadu kada'baaga (200) ma co Kaiysariya ana ndanaaya ka iidümmü kafünü egüsö ooso kungno.

<sup>24</sup> Aaga tagona muttu a Bölis aka kide aco ka Uugaara Fileks."

<sup>25</sup> Adarigiri waraga ungu co Uugaara Fileks iki iini kide,

<sup>26</sup> "A'a na Kalödiyös Lisias nagarigiri waraga a Fileks, ya uugaara ya, nafaanya o'o.

<sup>27</sup> Yahüdü kümmü ömö'di ya kasaasa tidi i'i. A kede ka tussu a'da i'i ya taga Rööma ya, niküri a'a ka tareere nja nasigira tanno eede noolona i'i.

<sup>28</sup> Nasaasa a'a tussu niimö yeene ka asaasa tümmü i'i ka tumma iini ya, niküri a'a ka öö'dö ana i'i ka la ma kadiifi ma Yahüdü tiya eeme.

<sup>29</sup> Nussu a'da egee kümmü i'i ka tumma ma seriye tiya eene, lakiini tumma no taalo kama tadiidi müni, taalo ama tanangnga i'i ka teyi alla Anna ka pabuuus.

<sup>30</sup> Niküri a'a ka fiönyö a'da egee kiiyü ku'bu ana i'i ma tiidaana, i'i yungno eede ka tunggugu i'i o'o 'bitüngngö. A'a tekere niküri ka tiki a kadu tanno ümmü i'i no, a'da kasigi i'i küdü ma tumma tiya eene kadiidi i'i kide ya."

<sup>31</sup> A nasigira tagalinggo a tumma tanno uugaara tiya eene, ka'duga Bölis ooso kungno kaco Antibtris.

<sup>32</sup> A taka ka ndaadha ya, iküri nasigira na unggeene no ka tafada kaco 'booro, ara kadu ma naguttu kico tatto go i'i.

<sup>33</sup> A kadu ma naguttu ka ndala Kaiysariya ya, kunggu Bölis co Uugaara Fileks kanangnga waraga iini.

<sup>34</sup> İküri ka takirroönö indini Bölis ma anya tammo iini ka öö'dö ndama iini mo. A kini ka ndussu a'da i'i ama Kilikiya ya,

<sup>35</sup> iki iini, "Ara a'a sa kafönyö tumma a kadu tanno ümmü o'o no kene ka tö'dö." İküri ka tiki a nasigira a'da kaafa ka Bölis ka 'di tiya Hirüdüs.

## 24

### Yahüdü kasigi Bölis

<sup>1</sup> A füngngö ka ndö'dö iidümmü ya iküri uugaara ma ka'boge Hananiya ka co Kaiysariya nja naguugaara ma anya ököön, nja ömö'di tiya ümmöönö ka kadu ya ana eere a'da Tartullos, kadakasigi Bölis ka Uugaara Fileks.

<sup>2</sup> Ka uugaara ka tagümmünü Bölis, iküri Tartullos ka tiki, "Uugaara Fileks, kadu niidi kaneene ta'diila kudumma o'o, nja eema tiya a'diila ya adhabbu ya, kudumma üdü ka ta'dara nja tamünügü ungngo ko'do.

<sup>3</sup> Ungngo ya kamma ungngo ka eema tiya turi nja 'buugu ka oona nye'd'de kungngo a tamana ta'diila.

<sup>4</sup> A'a taalo nasaasa teema tumma kadhabbu, ungngo kasaasa o'o a'da natoodo kide a 'bandumma idhilli kungno.

<sup>5</sup> "Kaduna ungngo ömö'di ya ka aga'da 'buugu, afünaana Yahüdü ka oona ka na'buugu nye'd'de, i'i ya uugaara ma kadu tanno uruna Yasu ya ma Nasira ya keere.

<sup>6</sup> I'i asaasa tanyoro la ma Masala, yungngo iidü ka tagümmü i'i. [Ungngo kasaasa tahükümü i'i tamana ma seriye tanno aja

<sup>7</sup> lakiini uugaara ma nasigira ya dhabbu ya Lisias tamuru i'i kidü ka iisine a rüsü kungno.

<sup>8</sup> İküri ka tiki a nadiidi tiya iini a'da köö'dö a tumma tanno eene kasigi iini no o'o.] Küdü kara tindini i'i ma eema nye'd'de ya, ara o'o tussu eema yündi ka tümmü i'i ya nye'd'de."

<sup>9</sup> A Yahüdü tafünögü sigürü, anno tö'dö kiki a'da tumma no katimin'da.

### Bölis ümmünü ka eyi tiya iini ka Fileks kidha

<sup>10</sup> İküri Fileks ka tage'de Bölis a'da öö'dö teema, iküri Bölis ka tiki, "Nussu a'a a'da o'o na uugaara ma anya tammo a nagürünü kadhabbu, iküri ri'ba taalo kagu a'a eede kara tümmöönö ka eyi tiya eede.

<sup>11</sup> Afa müüdü ka tussu eema ya 'do, ninyo a'a Örsaliim ka linggo ma Masala a füngngö ada'baaga kafünü eera.

<sup>12</sup> A Yahüdü taalo kaduna a'a ka na'buugu ka ta'bununjaana ku'bu nja ömö'di ka la ma Masala taalo nagirnaana kadu ka oona ka anya nja naala ma ta-laana.

<sup>13</sup> Eege ya taalo ka takara tadiri niimö yeede ka tagalinggo dhorro ya.

<sup>14</sup> Lakiini a'a namma a'da a'a nümmü tumma ma Masala tammo kupupa tanno aja ka fiin'i tiya eene ka tümmüneene a'da korokoro ya. A'a namma ka tumma

ma seriye nja tumma tanno nagane'bi ka tageema no ka nakasorne ma Masala no,

<sup>15</sup> nindhiigii Masala afa meene ka tindhiigii oogo kungngo, kadu nye'de ka tafiki'dö ka inde nja tanno oroko no nja tanno 'diila no.

<sup>16</sup> A'a nindinaana oona neede ku'bu na insili ka eedi nja Masala nja kadu.

<sup>17</sup> "Naleefe a'a tö'dö eede ka takitaalo a nagürüünü kadhabbu, nöö'dö ana eema ma tonsoona a kadu tanno eede kita, ara ka öö'dö tirri.

<sup>18</sup> Nagalinggo a'a eema ya, kaduna a'a ka la ma Masala natüümö a'a linggo ma tanangnga tuu'da ka tinsili. A'da kitaalo kadu kadhabbu kide nja a'a nitaalo nagir-naana kadu ka oona.

<sup>19</sup> Lakiini Yahüüdü könö kö'dö ndama anya ma Asiya, kene kara taganna kita kidha ma o'o ka tagöö'dö küdü ka tadiri nüümö yeene ka tasigi a'ka tumma iini ya, üürü eäge kussu nüümö miini.

<sup>20</sup> A'büttingngö ya fa kene kadirina nüümö yeene ka aduna a'ka tagalinggo ya, eede ka ta'düngnge ka 'buugu ma temmi ma Yahüüdü.

<sup>21</sup> Lakiini tumma neede ka tageema kene kidha eede ka 'düngnge, 'Aaga ümmü a'a ka uuru tanno kudumma eede ka tamma a'da kadu kara tafiki'dö ka inde.'

<sup>22</sup> A Fileks illi ka tagussu fiinii ya Yasu, ikirii ka tanyalaana kadu ku'bu iki, 'Ka Lisiya uugaara ma nasigira ya dhabbu ya ka tö'dö kita ya a'a sa öö'dö tassa ka tumma tanno ada no.'

<sup>23</sup> Ikirii ka tiki a uugaara ma nasigira a'da kafa ka Bölis, afa tafaga i'i keere ka teema nja kadu tanno ticci tassa kini no nja kateefe miini ma takinyi linggo iini no.

### *Bölis öö'dö ka Uugaara Fileks kidha nja Trusilla*

<sup>24</sup> Kene ka tagünü a fungngö idhilli kungngo ya, ikirii Fileks ka öö'dö nja aka tammo iini madaga Yahüüdü mo, mana eere a'da Trusilla, atümmünü Bölis atoodo ka tumma tanno iini no ma tamma ka Yasu Almasiiji no.

<sup>25</sup> Aga Bölis ka ndageema tumma ma ta'diila ma nanggeedi nja tümmü eyi nja tahükümü ma Masala kara tö'dö no, a ri'ba tümmü Fileks iki iini, "Unggeene 'bitüngngö ya ara sa ka tümmünü o'o tako öccö afé de kede ka tasaasa."

<sup>26</sup> A Fileks tindhiigii Bölis a'da agona gürüsii iini, ümmünaana i'i 'bucca kungngo eema nja iini.

<sup>27</sup> Aga nagürüünü ka ndö'dö keera ya a Borkios Fistös tagala ka 'buugu tiya iini. A Fileks tasaasa Yahüüdü a'da ka'diila nja iini, ikirii ka afa ka Bölis ütü ka pabuusu.

## 25

### *Bölis ungu tumma niini co Kayisar*

<sup>1</sup> Aga Fistös ka öö'dö ka anya ma Yahüüdüya ya atüümö fungngö iidoona ka Kaiysariya, unggeene ndama Kaiysariya asirigö co Örsaliim.

<sup>2</sup> A naguugaara ma ka'boge nja naguugaara ma Yahüüdü tagadünögü eema ya Bölis ka tagalinggo ya. Kindini Fistös

<sup>3</sup> a'da a'duga Bölis ungu i'i co Örsaliim, kudumma eene kasaasa tiyyü ku'bu ana i'i ka fiinii ma tiidi i'i.

<sup>4</sup> A Fistös tiki, "Ara Bölis tüü ka pabuusu ka Kaiysariya, kudumma eede ka co kanna ereere.

<sup>5</sup> Aaga fa ka naguugaara tanno ada kaco ka Kaiysariya nja a'a, ümmü ömö'di ya agalinggo nüümö ya toroko ya, ka tiraana."

<sup>6</sup> Ka Fistös taganeene a fungngö idüümü afünü iidoona alla fungngö ada'baaga, unggeene asülügö co Kaiysariya, ka taka ka taadha ikirii ka temmi ka 'buugu ma seriye, iki a'da agöö'dö ana Bölis.

<sup>7</sup> Aga Bölis ka ndö'dö ya, a Yahüüdü no öö'dö ndama Örsaliim no tarüögü kini ka oona, kafunaana kini ana eema dhabbu kitaalo kaduna nüümö kini atoroko iini ka tagalinggo.

<sup>8</sup> A Bölis tinggili tumma no kini ka eyi iki, "Taalo a'a nagalinggo nüümö ya toroko ya ana Seriye tiya Yahüüdü nitaalo a'a nagüünii nüümö ya toroko ya ka la ma Masala nitaalo nadirina tumma na toroko no ka uugaara ma Rööma ya ka oona 'do.'

<sup>9</sup> A Fistös tasaasa ta'diila nja Yahüüdü, ikirii ka tiki a Bölis, "Nasaasa o'o co Örsaliim naco teema seriye kide kidha ma tumma tanno?"

<sup>10</sup> A Bölis tiki, "A'a na'düngnge ka 'buugu ma seriye tiya uugaara ma Rööma Kayisar, nara tahükümüdene ka seriye tiya kita. Nussu o'o tumma nye'de a'da a'a taalo nagalinggo nüümö ya toroko ya ana Yahüüdü.

<sup>11</sup> Üürü nagalinggo a'a nüümö ya toroko ya ma tiidi a'a, taalo a'a nanu ka teyi. Üürü tumma neene ka teema taalo ka timin'da ya, taalo ömö'di ma tümmü a'a ümmünü a Yahüüdü. Ara a'a tunggu seriye yeede co uugaara ma Rööma."

<sup>12</sup> A Fistös tageema nja kadu tanno iini unggodho eäge ikirii ka tapadaga tumma a Bölis, "Nunggu seriye yüüdü co uugaara ma Rööma."

### *Bölis innyyo ka Uugaara Agriiba kidha nja Barniki*

<sup>13</sup> A fungngö kinco aküro idhilli kungngo ya, Uugaara Agriiba nja Barniki tö'dö ka Kaiysariya kö'dö tööjülu Fistös.

<sup>14</sup> Kene ka tagünü nja eene dhabbu ya, ikirii Fistös ka tirina tumma seriye ya Bölis Uugaara Agriiba iki iini, "Ömö'dii inggide a Fileks ka tinyi i'i ka pabuusu.

<sup>15</sup> Kede ka öö'dö ka Örsaliim a naguugaara ma ka'boge nja naguugaara ma Yahüdü tasigi i'i kede kiki a'da nümmünü i'i ka inde.

<sup>16</sup> Nikirii a'a ka tiki eene, 'Tafiigi mungingo kada kadu ma Rööma taalo angnga kümmü ömö'dii ün'düngngö a'da taalo öö'dö ka kadu tanno asigi i'i no kidha, illi kaföönyö nüümö yiini ka tagalinggo kussu iini ya.'

<sup>17</sup> A kene ka öö'dö kita nja a'a narooro kaco a 'buugu ma seriye nitaalo nadoono ku'bu a tumma ma tasigi, ka taka ka ndaadha nikirii ka tiki a kadu a'da köö'dö ana i'i.

<sup>18</sup> A kadu na ümmü i'i no tageema tumma neene kitaalo kadiri nüümö ya toroko ya ma tahükümü i'i iini ya, na a'a tiki kide a'da kadiri nüümö yeede ka asaasa ya.

<sup>19</sup> Tumma kungngo eene nja iini ka'bununjaana ku'bu ma Masala tammo eene, ma ömö'dii inggide ana eere a'da Yasu akeyi, illi Bölis iki a'da adinö.

<sup>20</sup> Nikirii a'a ka ndabbü falandaana, nikirii ka tindini Bölis niki iini, üürü asaasa co teema seriye yiini ka Örsaliim.

<sup>21</sup> Lakiini Bölis unguu tumma niini co uugaara ya dhabbu ya Kayisar, a'da assa kide. Yungngo eede ka tiki a'da ütü ka pabuusu kita nassa ka tuurugu i'i co Kayisar."

<sup>22</sup> İkirii Agriiba ka tiki a Fistös, "Nasaasa a'a taföönyö tumma na ömö'di tiya."

İkirii Fistös ka tiki iini, "Ara o'o sa föönyö taka."

<sup>23</sup> A taka ka ndaadha, Agriiba töö'dö nja Barniki ka 'buugu ma seriye. Adigine a kadu ma anya tanno iifi no a naguuagaara ma nasigira, ikirii Fistös ka kürünigö a'da köö'dö ana Bölis, ikirii ka öö'dö.

<sup>24</sup> A Fistös tiki, "Ka Uugaara Agriiba nja kadu tanno emmi kita no nye'd'e kungngo, ömö'di yaada kidha ya agasigi kadu ma Yahüdü i'i kede nye'd'e kungngo, ka Örsaliim nja kita ka Kaiysariya, kiidhe keema a'da afa tefe ka 'dii.

<sup>25</sup> Illi a'a taalo naduna nüümö kini ya toroko ya ma tiidi i'i, illi i'i ya unguu seriye yiini co Kayisar. Yungngo eede ka asaasa tuurugu i'i co iini.

<sup>26</sup> Illi a'a taalo naduna nüümö ya dhorro ya ma tarigiri ada a Kayisar, yungngo eede ka öö'dö ana i'i aaga, nja o'o ka eyi tiya üdü, o'o na Uugaara Agriiba no, aaga tindini i'i ma tumma tanno ka linggodene

no, ara a'a tessu nüümö meede ka tarigiri ada a Kayisar.

<sup>27</sup> Taa'baga eege kungngo eede, meede ka tuurugu ömö'dii co pabuusu a'da taalo a'a nadiri nüümö yiini ka tagalinggo ya."

## 26

*Bölis ümmöönö ka eyi tiya iini*

<sup>1</sup> İkirii Agriiba ka tiki a Bölis, "Nasaasa o'o a'da na kildhe tumma no küdü ka eyi."

İkirii Bölis ka alaga nüsö coo'do ma tara tümmöönö ka eyi tiya iini iki,

<sup>2</sup> "Ka Uugaara Agriiba, ka'diila oona eede kede ka a'dingnge küdü kadha ka uru tanno ma tinggili tumma no kede ka eyi, napadaga tumma na Yahüdü na Yahüdü kafünü kede ka oona no nye'd'e.

<sup>3</sup> O'o nussu tumma na Yahüdü ana eema tiya eene ka ta'bununjaana ku'bu iini ya, nasaasa eedi yüüdü adhonggoro ma nüümö tiya eede ka teema ya.

<sup>4</sup> "Yahüdü nye'd'e kussu jiddi ma taneene tanno eede yeede ka taleefe ta kidhilli nakinggiridene a'a ka anya tammo eede nja kadu ka Örsaliim afe'de.

<sup>5</sup> Eege kussu a'a ma 'billi, kussu a'da a'a nafa ka tumma ma Masala tanno eede, na a'a taganeene kada taga Fariisi üürü eege kasaasa tadiri tumma a'da nuuruna na nañimü ma Masala keere nadagümmöönö dhorro.

<sup>6</sup> A 'bitüngngö nümmü adene a'a, kudumma eede ka tindhügi tumma na Masala ka tageemaga a kafaafa ma angnga no.

<sup>7</sup> I'i yungngo siliga ma Israyil na ada'baaga kafünü eera no katindhügi töö'dö niini kümmü Masala oooso a naguru, nggeege Uugaara yungngo Yahüdü katüfunü tumma eede ka oona.

<sup>8</sup> Amana i'i yungngo aaga taalo kamma a'da Masala minci kadu ka inde?

<sup>9</sup> "A'a tekere nakiki kide a'da ara a'a tadiidi ma eere tiya Yasu ya ma Nasira ya a türü tanno eede in'dili.

<sup>10</sup> Nagalinggo a'a nggeege ka Örsaliim, na a'a tamana kadu kadhabbu na amma ka Yasu no ka pabuusu, a türü ma naguugaara ma ka'boge tagafünü tumma ma korokoro kede ka oona, a kene ka tagirinadene ya, nadagamma kene ka take.

<sup>11</sup> Nadagapusu eege ka naala ma taalaana, na'bunu eege ka'düsünü tumma Yasu, nagakardha ku'bu nakirimü eege, naco naanya ma kajeene nalinggo eege kide.

*Bölis eema tumma ma tamma ka Yasu  
(Kadafiiñi 9.1-19; 22.6-16)*

<sup>13</sup> "Nunggeene ma co Demasak a naguu-gara ma ka'boge kagürünü a'a a türü ma tauugaara tanno eene.

<sup>13</sup> A kede ka tunggeene ka fiini ma co Demasak uuru ka teene ya, ka uugaara, nasala a'a öyeene ka 'dotombo'do, alimaana adagii'bi ndanaaya, öyeene kede keere njä kadu tanno unggeene nja a'a no.

<sup>14</sup> Ungngo ta'dinggö ka 'büdhü'lü ungnogo nye'd'e de nafoönyö tumma neene a tangga Yahüüdü, 'Sawl, Sawl, minna agu o'o nalinggo a'a? Taalo o'o namma talinggo a'a, ara tiideene nja o'o küdü kara tüünü midhi ku'bu ana a'a.'

<sup>15</sup> "Nikirī a'a ka tiki, 'O'o na mada, ömö'di eede?"

"A Yasu tiki, 'A'a na Yasu tiya üdü ka talinggo ajeene ana i'i ya.

<sup>16</sup> Fiki'dö na'dingnge ana ko'do ana uune tanno üdü, a'a nala oona o'o nanangngä o'o kada ömö'di ma linggo, neema tumma ma eema tiya üdü ka tadünö kide ma a'a ya nja eede kara tala o'o ya.

<sup>17</sup> Ara a toolona o'o ka kadu ma Israyil nja kajeene tanno eede ka tagürünü o'o kene no.

<sup>18</sup> Amang küdü tafa'da eege ka iiye kafada ndama 'buugu tiya lüllü ya kara koo'dö ka töyeene, kinyi türü na Eblisi ku'bu kara kico ka türü tanno Masala, amang katamma kede tanno eene ara a'a toolona eege ka tatoroko tanno eene, ara a'a tamma kene kada kadu tanno iini kudumma eene ka tamma kede.'

### *Bölis eema tumma ma linggo tanno iini*

<sup>19</sup> "A ndama uuru tanno, o'o no Uugaara Agriiba, nitaalo a'a nanu ka tumma tanno ö'dö ndama 'dotombo'do no.

<sup>20</sup> Na a'a tagadünögü tumma a kadu ma Demasak ka dhidha, nja kadu ma Örsaliim nja naanya ma Yahüüdiya nye'd'e de, nassa co ka kajeene in'dilli, nadünögü eema eene a'da kaadha ka tatoroko kara ka tapadaga ka Masala, kalinggo linggo na ussu a'da kaadha ka tatoroko no.

<sup>21</sup> Yungno Yahüüdü ka tümmü a'a ka la ma Masala, kasaasa tiidi a'a.

<sup>22</sup> Lakiini Masala mafa kede ta'bütängögö amang kede teema tumma noono co kadu tanno dhiidhi no nja tanno iifi no. Nitaalo neema nüümö öccö illi tumma na Müüsa ka tageema nja nagane'bi no.

<sup>23</sup> A'da Almasiihi a tadhügürü üünü muuyu, afiki'dö ka inde ka dhidha, adadünögü eema ya Yahüüdü nja kajeene nye'd'e de atöyeene ma toolonadene."

<sup>24</sup> Aga Bölis ka aleefe tinggili tumma iini ka eyi ya, ikirī Fistös ka alneege a tumma ko'do iki, "Ka Bölis, nindima o'o! Talaana na dhabbu no kanangngä o'o ka tindima!"

<sup>25</sup> İkiri Bölis ka tapadaga tumma iini iki, "Taalo a'a nindima nya ömö'di eede, a'da a'a neema tumma na dhorro na adho ka fiini no.

<sup>26</sup> Uugaara ussu eema ya, ara teema nja iini a'da taalo ri'ba eede ka eedi. Nussu a'a taalo nüümö ma ta'düsünü ada iini, kudumma meene taalo kagalinggo adene ka küdhu.

<sup>27</sup> Ka Uugaara Agriiba, namma o'o ka tumma ma nagane'bi? Nussu a'a a'da namma o'o kide."

<sup>28</sup> İkiri Agriiba ka tiki a Bölis, "Nasaasa o'o tanangngä a'a kada Almasiihi ka bandaneene tiya idhilli kungngo ya?"

<sup>29</sup> A Bölis tiki iini, "Üürü idhilli üürü adhabbu, nasaasa a'a Masala a nangngä o'o nja kadu tanno föönyö 'bitängögö no a'da aaga tafeene nja a'a illi ka nakilli neede no eege kungngo katitalo kada."

<sup>30</sup> İkiri Uugaara Agriiba nja Fistös nja Barniki ka fiki'dö nja kadu tanno emmi nja eene no.

<sup>31</sup> A kadu tanyalagaago keema a'da, "Ömö'di ya taalo agüünü nüümö ma tiidi i'i itaalama tunggu i'i ka pabuusu."

<sup>32</sup> A Agriiba tiki a Fistös, "Ömö'di ya amakadu ka tapa kini, kini kara tafa tunggu tumma niini co uugaara ma Rööma."

## 27

### *Bölis aco Rööma a mürkabü*

<sup>1</sup> A kudumma ka tatüümö ma iidi katunggeene ungnogo tadigaala ka to ma co Italiya ya, a kadu tanangngä Bölis uugaara ma nasigira tanno uugaara ma Rööma ana eere a'da Yüliyos no nja kadu töccö na ka pabuusu no.

<sup>2</sup> Ungngo taka ka mürkabü ma öö'dö ndama Atramiit, ungnogo tapadaga co naanya ma Asiya, ungnogo tagiisö ka to ungnogo tiisönögö nja Arestarkos ya ma Makadoniya ya ö'dö ndama Tasalanüki.

<sup>3</sup> Ungngo tala Saiyda a taka ka ndaadha, a Yüliyos tanangngä ta'diila a Bölis, afa kini aco ka kateefi miini ka inynya eema yiini ka asaasa ya.

<sup>4</sup> A kiidü ka tunggeene ka to kete ma Kuburus kudumma tanya ka talinggo ungnogo.

<sup>5</sup> A kiidü ka tigaala ka to kete ka tinggini ma Kilikiya nja Bamfiliya, ungnogo ta'barda ka Mira ma Likiyya mo kanna.

<sup>6</sup> Uugaara ma nasigira taluna mürkabü ma ö'dö ndama Iskandariya ma unggunu co Italiya anangnga ungnogo taka kide.

<sup>7</sup> A mürkabü tagiisö ana ungnogo amussu a fungnögö dhabbu, a tanya tagalinggo ungnogo kafaga ungnogo keere kaala Kaniitos. Ka tanya ka faga ungnogo keere ma tadheedhe ko'do, ungnogo tafada ta'barda

kide, ungngo takete ka Kireet ndama üüdü ma Salmon.

<sup>8</sup> Ungngo tagunggeene kete ka tinggini ma to a dhügürü, ungngo tala 'buugu ya ana eere a'da Mawani ya a'diila ya kada kete maanya ma Lisiila.

<sup>9</sup> Ungngo taganeene dhabbu, a kadu tüpü tenege co, a tino tiideene. İkiri Bölis ka teema nja kadu a'da kindinaana oona ku'bu kadiinö ko'do.

<sup>10</sup> Iki, "Ka kadu, niji a'a tino no taalo ka'diila tatoroko kungngo aja kidha kadhabbu taalo ka mürkabü nja eema tiya inggide ya unggodho i'i, nja nanggeyi tanno aja afe'de."

<sup>11</sup> Lakiini uugaara ma nasigira amma ka tumma tanno ömö'di ma mürkabü nja taloglaana ko'do ara kitaalo amma ka tumma tanno Bölis.

<sup>12</sup> A 'buugu yeene ka öö'dö kide ya taalo a'diila meene ka tanna kide feele kungngo, adhabbu ma a kadu töccö tükirii ka tiki a'da kunggeene a mürkabü kaco a Finikis, ka anya ma Kireet kanna kide ara feele kico kürö Finikis kudumma tanya taalo iiösö kanna.

### Tanya ka linggo to

<sup>13</sup> Ka tanya ka ndaılısö ndama küülü amussu ya, kiki kide a'da eege kicco a 'buugu tiya eene ka asaasa ya, kikirii ka fanna ndalili ma afi'danja ku'bu ka aru ma mürkabü mo, kara ka tunggeene ka tinggini ma to ma Kireet.

<sup>14</sup> Lakiini a tanya karooro tö'dö a türü ndama fiini ma Kireet ana eere a'da Orokilion.

<sup>15</sup> A tanya tagürü mürkabü, a mürkabü taalo mambaanya türü ma tanya. İkiri tanya ka arünö ana oogo küsö co 'buugu tiya eene küsö co yiini.

<sup>16</sup> Ungngo tagunggeene ka 'dakeyi ma 'banya minggide mana eere a'da Kawda, ungngo ta'beene nja tanya ungngo tidhi, ungngo taluna 'bamürkabü ma idhilli mo ma ka mürkabü ma dhabbu mo keere.

<sup>17</sup> Kene ka ta'diniga oogo co mürkabü tammo dhabbu mo ka teene ya, kikirii ka afin'da mürkabü ma dhabbu mo ku'bu a naaru ka tüm'bü miini ma timi'dinaana oogo ka oona ka söödö. Kari'ba kudumma mürkabü ka tarünö mafiri ka ndüdüürü kete ma Libya, kagildhe naaru, kapa ka mürkabü a tanya tagürüni oogo ko'do.

<sup>18</sup> Ka taka ka ndaadha a tanya takogoona ma tiisö dhindho, kikirii kama eema ka mürkabü kapiğü ka 'biidü ka to.

<sup>19</sup> Ka füngngö kanda iidoona ya kikirii ka a'duga eema ya indhi ya ka mürkabü nye'd'de kungngo kadhifi ka 'biidü ka to.

<sup>20</sup> Ungngo tiy়ü füngngö a dhabbu a'da taalo ungngo kasala ndanaaya nja midigi,

a tanya tüütü ka tüüsö a naguuru, ungngo titalo kamma a'da ara ungngo toolonadene afe'de.

<sup>21</sup> A kadu ma mürkabü taganeene ana iiire a füngngö dhabbu, eene taalo kagolo nüümö, ikiri Bölis ka fiki'dö iki eene, "Kadu eede, aaga föönyö tumma neede, aaga tafa tunggeene ka Kireet a tatoroko no tafa taduna aaga taga'da eema kaja.

<sup>22</sup> A'a 'bitingngö nuu'bu aaga ka nanggeedi, a'da aaga tidhi oona ku'bu kudumma taalo ömö'di unggodho kungngo ana kada ataama, illi mürkabü unggodho oogo ma tatangga'da.

<sup>23</sup> Tadhangga ma Masala tammo eede ka tümmü oogo ana eedi dhorro nja eede ka talinggo ada oono mo, mö'dö kete koosoki.

<sup>24</sup> Iki a'a, 'Ka Bölis, fa tar'i'ba, nütü o'o ka aco ka uugaara ma Rööma, Masala manangnga kadu na unggeene nja o'o no ka nüüsö ma o'o.'

<sup>25</sup> Aaga idhi oona ku'bu dhorro, namma a'a ka Masala tumma na adirina nja a'a no kaco ööye miini.

<sup>26</sup> "Biidü ya tanya ka talinggo i'i ya tagürünögü angngä co jazeera tököönö."

### Mürkabü ma'bunanjaana ku'bu

<sup>27</sup> Kidü ka ndatüümö füngngö ada'baaga kafünü egüsö, kaleefe unggido talöölle ka To ma Adriya, ooso ka teene a kadu ma mürkabü tiki kide a'da eege ka ndakete ka tinggini ma to.

<sup>28</sup> Kene ka ineene ta'buugu ma to ya, kalaga co afe'de kaduna namitiri kö'dö ukumu kadu keera (40) kasigi co idhilli kungngo kalaga co afe'de kaduna namitiri ukumu ömö'di aco iiisine ya (30).

<sup>29</sup> A ri'ba tümmü eege eene katiki kide a'da mürkabü madirini oona ka 'buugu tiya niigisi ya, kikirii ka kadhifi elili na afi'dadene ka naaru no keere ma mürkabü ka egüsö, kara kafara ka Masala a'da a taka taadha.

<sup>30</sup> A kadu ma mürkabü ta'b'baana oona ku'bu ma tasaasa tartönü ndama kunggu mürkabü ma idhilli mo co 'biidü, kümüm nanggeyi niini a'da eege kasaasa tunggugu ndalili na afi'danja ka naaru no ka mürkabü kidha.

<sup>31</sup> İkiri Bölis kita iki a uugaara ma nasigira nja nasigira tanno iini, "Üürü kadu ma mürkabü taalo kütü ka teene miini ya taalo tefe kide ata."

<sup>32</sup> A nasigira tükirii ka rumuna naaru ma mürkabü ta ma idhilli mo kafa kene ka'dingga ka 'biidü.

<sup>33</sup> Ligitaka so'd'do, a Bölis tiki eene in'dili a'da kagu eema, iki eene, "Ka füngngö ada'baaga afünü egüsö na eere no, taalo aaga kagolo nüümö ma taguri.

<sup>34</sup> Nikirri a'a ka asaasa a'da aaga tagu eema, amang kada tefe ka 'dii, andanaw kungngo unggodho kungngo taalo kara tasuli kata ka nanggüüdü."

<sup>35</sup> Kini ka tiki nggeege ya, ikirri ka a'duga meteene anangnga ta'diila a Masala kene kidha nye'de de kungngo, ikirri ka 'düsünü arooro ka taguri.

<sup>36</sup> Kikirri ka tidhi oona ku'bu eege in'dili katagu eema.

<sup>37</sup> Ungngo no ka mürkabü kö'dö miya-teene ana sita sabiini (276).

<sup>38</sup> Kene ka ndüüsü ya, kikirri ka rara'baga migile co to amang ka mürkabü ta i'balapala.

<sup>39</sup> Ka taka ka taadha a kadu ma mürkabü taalo kussu 'buugu yeene köö'dö kide ya, lakiini eege kasala tinggini ma to ana ndamugu, kikirri ka asaasa tüügü mürkabü co 'buugu tiya miini ya.

<sup>40</sup> Karumuna eliili ya afi'dadene ka naaru ya ma mürkabü kafa kene ka'dinggö co to. Kakildhe naaru na ma ta'diniga ten'di coo'do ka mürkabü amang ka tanya ta'duga oogo kapadaga co tinggini ma to iini.

<sup>41</sup> Lakiini mürkabü mirri ana oona ka ndamugu ka 'biidü ka teene üdü miini töö'dü, taalo agasigi oona, eere miini ta'bununjaana ku'bu a türü ma tanya nya 'biidü.

<sup>42</sup> A nasigira tasaasa tagirina kadu na ka pabuuus no amang kene tafa kabbü 'biidü kaco a tinggini ma to karünö.

<sup>43</sup> Lakiini uugaara ma nasigira asaasa toolona Bölis, ikirri ka faga eege keere. Iki a kadu na ussu ka abbü 'biidü no kaco ka tinggini ma to ka ndanda ka dhidha,

<sup>44</sup> ikirri a kadu könö saga tuurna eege keere anno karefe kee'di anno taka ka türeene ma mürkabü ma tangga'da mo ka idhi kala tinggini ma to ka'diila.

## 28

### *Bölis ungngo ka to ma Malta*

<sup>1</sup> Kidü ka öö'dö ko'do ndama 'biidü ya, ungngo tikirri ka tessu a'da 'buugu ya ana eere a'da Malta.

<sup>2</sup> A kadu miini tamma kidü kadagüünü tataafala ana ungngo ka'diila, kafüllé ada issi ungngo ma tille kudumma 'buugu ka ticolo a tombo'do ka teede.

<sup>3</sup> Aga Bölis ka awaana kee'di koona anangnga ka issi ya, talili a tagu'daana ma issi tala ni, afiri akürö ndama ndagee'di a'dukunjaana ka Bölis ka niisö.

<sup>4</sup> A kadu ma naanya tikirri ka tassa kini ka ta'dukunjaana, kikirri ka temaana ka oona unggodho eege kiki a'da, "Ömö'dü ya agirina kadu, asa ka toolonadene ka to illi Masala taalo ma tafa kini efe ka 'dii."

<sup>5</sup> Lakiini Bölis asanaga ni ka issi, i'i taalo ili adene ka oona.

<sup>6</sup> Katoodo ku'bu miini ka tüüfü ka niisö nya iini ka'dinggö eyi. Kene kanda katoodo ku'bu dhabbu, a niimö ya toroko ya taalo agu i'i ya, kafada a tumma kiki, "Masala oogo mungno?"

<sup>7</sup> Kete ma 'buugu tiya Bölis ka tanna kide ya siga no uugaara maanya kungngo ana eere a'da Böbliös, kide anangnga ungngo ka 'dii taganeene nya iini a fungngö iidoona ataaifa kide 'do.

<sup>8</sup> A pupa tiya Böbliös tagamaara a 'bürüdü nya 'booyo, ikirri Bölis ka co iini ka la ümmünü niisö kini ka oona adageema nya Masala moolona i'i.

<sup>9</sup> Kini ka tagüünü adene nggeege ya, ikirri kadu na amaara no köö'dö ka iini nye'de anangnga eege ka'diila.

<sup>10</sup> A kadu tagüünü tateefe na 'diila ana ungngo, ka inya eema ma taguri ka fiini ungngo.

### *Tino na Bölis ma tara co Rööma*

<sup>11</sup> Ungngo tafara nagatereene kanda iidoona ya, ungngo tikirri ka taka ka mürkabü ma öö'dö ndama Iskandariya, mana koronggore ma nagiiso ma na-masala keera kungngo oono ka üdü, oogo matümö feele kita miini kita.

<sup>12</sup> Ungngo ta'barda kaanya ma Si-irakoos, ungngo tagünü kide fungngö iidoona.

<sup>13</sup> Ungngo tikirri ka tunggeene ka 'dii, ungngo tarooro a 'dakeyi ma to, ungngo talaanya ma ana eere a'da Rikion kene ka ndiyü fungngö eera ya, ikirri tanya ka öö'dö ndama küülü, ligitaka kungngo tala Batyüli a fungngö tiya anda iidoona ya.

<sup>14</sup> Ungngo taluna kadu ma kaniisa kide, kiki ungngo a'da ungngo tagünü nya eene a fungngö tiidümmü afünü eera. Nggeege ungngo tala Rööma.

<sup>15</sup> A nagöre ma angnga taföönyö a'da kunggunu ungngo töö'dö, kunggeene kalla köö'dö ka Mansala ma Abüös nya Nalokonda tanno iidoona no ma toteene nya ungngo. Ka Bölis ka asala kadu no, anangnga ta'diila a Masala idhi oona ku'bu.

### *Bölis ungngo ka Rööma*

<sup>16</sup> Kidü kico Rööma ya, a nasigira tanangnga Bölis ka 'buugu tiya iini unggodho i'i nya tasigira tiya afa kini ya.

<sup>17</sup> Kene ka ndiyü tiidoona ya, ikirri Bölis ka tagümmünü kadiifi ma Yahüüdü na anna ka Rööma no a'da köö'dö tamma iini. Kene ka ndemmi nya iini ya, ikirri ka tiki eene, "Kadu eede, taalo a'a nagalinggo niimö ya toroko a kadu tanno aja nitaalo nadiri tumma no toroko ka eema ma kadaada ma angnga ma 'billi no ka oona,

lakiini Yahüüdü kümmü a'a ka Örsaliim kümmünü a'a a kadu ma Rööma.

<sup>18</sup> A kadu ma Rööma tagindini a'a, kasaasa tapa kudumma eede taalo a'a nagüünü tumma na tatoroko no, ma tanangnga a'a ka teyi.

<sup>19</sup> Lakiini Yahüüdü kanu, nükirü a'a ka tunggu seriye yeede co uugaara ma Rööma, lakiini a'a taalo nasaasa teema nüümö ya toroko ya a kadu tanno eede ka oona.

<sup>20</sup> I'i yungngo eede ka tümmünü aaga a'da tö'dö, tumma nadirina aaga. Nakilli na a'bununja kede ka iisine no, kudumma ömö'dii ya kadu ma Israyil ka tündhigü i'i ya."

<sup>21</sup> Kikirü ka tiki iini, "Taalo waraga ö'dönja ungngo ndama Yahüüdiya ma tumma o'o, ömö'dii taalo ö'dö ndama nagöre ma angnga kanna adirina nüümö ungngo ma o'o a tumma taalo kadirinja ungngo ma üüdü ka tatoroko.

<sup>22</sup> Lakiini ungngo kasaasa taföönyö tumma nüüdü, kudumma ungngo ka tussu kadu ka na'buugu kadhabbu eene kanu ka tumma tanno."

<sup>23</sup> Kikirü ka timi'di tumma köö'dö ka Bölis ka 'dii, eege kadhabbu ka uuru töccö. İkiri Bölis ka ndeema nja eene, kadara ma legitaka kungngo, a 'buugu ta siiya, eema tumma ma tauugaara ma Masala asaasa eege katussu Yasu ndama tumma ma seriye tiya Müüsa nja kasorne ma nagane'bi.

<sup>24</sup> A kadu könö tamma ka tumma tanno iini anno tanu kide.

<sup>25</sup> A kene ka tüfürü tanyalagaago kita iini, kudumma tumma tanno eene taalo kinynyo ka oona, a Bölis tiki eene, "Tumma na Koronggore tiya Insili ya ka timin'da a ne'bi Asaiya ka tirina a kadaada ma aaga no,

<sup>26</sup> 'Kolo ka kadu tanno niki eene,

Aaga sa föönyö taalo aaga ka tussu,

aaga sa kadünö kide taalo aaga ka tijöögö.

<sup>27</sup> Nanggeedi na kadu tanno kakidhö afa niigisi,

köödhi iisine neene, ka'bürü iiye neene,

amang kene tafa taföönyö ana iisine tanno eene,

nja eene kafa tiji 'buugu ana iiye tanno eene,

kussu a nanggeedi tanno eene kaadha ka tatoroko na a'a toolona eege.'

<sup>28</sup> "Nggeege nasaasa a'a a'da aaga tussu toolona na Masala kagürünüdene co kadu ma kajeene, kara tatoodo kide."

<sup>29</sup> [Kini ka ndageema tumma no ya, ikiri Yahüüdü tö'dö kürö ka'digineene kisaana ka oona.]

<sup>30</sup> A Bölis taganna ka Rööma a nagürüünü keera ka 'dii tiya iini kada afaaana ya, amma ka kadu tanno icci tassaasa kini ka 'dii no nye'd'de.

<sup>31</sup> Adünügü tumma ma tauugaara ma Masala co kadu, alaana eege ka tumma tanno Uugaara Yasu Almasihi a'da taalo ri'ba kini ka eedi.

## Waraga ya Bölis ma co Rööma Tafa'da tumma

Bölis ya tafiiñi ya arigiri ada aaga waraga ma co ka kadu ma kaniisa ka anya ma Rööma kudumma iini ka asasa tadiünügü eema ma tumma tanno adünnüdene ka na'buugu töököö ya, i'i asasa co tassa ka kadu ma kaniisa ka Rööma na linggo nja eene idhilli, assa ka tunggeene aco Aspaniya. I'i iki a'da tumma ma İnjiüli na Yasu ka anangngä kadu katuss a'da Masala manangngä kadu nye'd'de ka 'diila nja oono ka tamma tanno eene ka eema tiya Yasu ka talinggo ya. Bölis iki a'da Abrahiim aga unggodho nja Masala atamma kono, taalo kudumma eema tiya iini ka talinggo ya. Kudumma aja kasaasa Masala, kafa angngä ka Koronggore tiya Insili ya alaala angngä ka taneene amang kaja taganeene afa ma tiya Masala anangngä kataneene ya kungngo.

Bölis adiri tumma ma kadu ma kaniisa kara taneene kada kadu ka unggodho (Rööma 12.15) i'i ya ageema tumma ma tasaasa kadu köön kadara ka kadu tanno taalo kamma kaja kakirüü angngä no, angngä taföönyö tumma na naguugaara tanno aja. I'i ööjüü kateefe miini ka Rööma a nagereene tanno eene (Rööma 16).

### Tööjüü

<sup>1</sup> Tumma no kö'dö ndama Bölis ömö'dü ma linggo ya Yasu Almasihi Masala magesse i'i a'da ada tafiiñi eema tumma ma Masala tanno 'diila no.

<sup>2</sup> Yoono ka taf'i di yoono ka tiri tumma miini 'billi, a nagane'bi tatiraana ka sorne ma Masala.

<sup>3</sup> A'da tumma na 'diila no egee kamiini, ma 'Bii'bala tiya oono Yasu Almasihi Uugaara yaaja i'i aageenedene kada tadü'd'dü ama 'bügüörü tiya Uugaara Dawud.

<sup>4</sup> Ussudene a'da i'i ya 'bii'bala ma Masala kini ka fiki'dö ka inde a türü ma Koronggore tiya Insili ya, i'i ya Uugaara tiya yaaja Yasu Almasihi.

<sup>5</sup> Yasu anangngä türü a'a meede kada tafiiñi ana eere tiya iini, nümmünü kadu ma kajeene nye'd'de kamma kini kaföönyö tumma niini.

<sup>6</sup> Nja aaga afe'de, Masala magümmünü aaga a'da aaga ka kadu tanno Yasu Almasihi.

<sup>7</sup> Waraga ya, a'a nunggu aaga ka Rööma nye'd'de kungngo, Masala masaasa aaga

madagesse aaga ka kadu tanno oono na insili no fa ka Masala Pupa yaaja nja Uugaara Yasu Almasihi tanangnga türü aaga nja ta'diila.

### Bölis asaasa co Rööma

<sup>8</sup> Ka dhidha, namana a'a ta'diila a Masala tammo eede ana eere tiya Yasu Almasihi kudumma aaga nye'd'de kungngo, a'a nüünü nggeege kudumma kadu ka 'buugu koona nye'd'de kungngo keema tumma ma tamma ka Masala tanno ada.

<sup>9</sup> A Masala meede ka tamma kono a koronggore neema tumma noonno na 'diila no ana eere ma 'bii'bala tiya oono ya adinö kede ka tagügi tumma ma aaga a naguuru.

<sup>10</sup> Ka fara tiya eede 'bucca ya, nafara a'a ka Masala a'da makara tafa'da fiini a'a a'da nöö'dö tassa kada.

<sup>11</sup> Nasaasa a'a töö'dö tassa kada amang kaja tosse ka tumma koronggore tanno ananja a'a no anangngä aaga kana türü.

<sup>12</sup> Tumma no a'da tafünügü aaga ko'do anangngä tosse ka tafünügü njaana ko'do ka tamma ma Masala tanno aja ka nanggeedi no.

<sup>13</sup> Nagöre eede, taalo a'a nasaasa a'da aaga tüürü, kudumma eede nasaasa a'a töö'dö kada kanna 'bucca kungngo a nüümö miini sa ka faga a'a keere nasaasa a'a tamanaaga kadu a Yasu afa ma tiya eede ka tüüni nja kajeene ya kungngo.

<sup>14</sup> Kudumma kömüsü tammo kadu nye'd'de kungngo mungngo eede ka eyi, kadu ma Yünan nja kadu tanno taalo ka Yünan nja kadu tanno 'dara no nja tanno nagaaga no.

<sup>15</sup> Tumma no kanangngä a'a ka asaasa töö'dö tadiünügü tumma na 'diila no co aaga no ka Rööma no.

<sup>16</sup> Taalo modolo magu a'a ma tumma ma Masala tanno 'diila no, kudumma meene ka tätürü ma Masala ma toolona kadu na amma nye'd'de ka kadu ma Yahüdü ka dhidha nja kajeene afe'de.

<sup>17</sup> Tumma na Masala na 'diila no kiki a'da Masala manangngä kadu ka'diila nja oono ndama tamma nja tamma afa ma sorne ka tiki, "Ömö'dü ya a'diila ka eedi ya efe ka 'dii a tamma."

### Tagoroo'bo na Masala

<sup>18</sup> Kudumma tagoroo'bo tanno Masala ka ö'dö ndama 'dotombo'do ma kadu tanno oroko no, na üünü tatoroko no, kadu na küdhu tumma ma timin'da ana eema tiya toroko ya.

<sup>19</sup> Tussu ma Masala kussu adene kene ka oona kudumma Masala ka ala kene ka ööye.

## 2

*Tapsu adene ma Masala*

<sup>1</sup> Nggeege taalo o'o nara tümmöönö ka eyi tiya üüdü, na o'o saga faanya nümmü kadu a'da eege ka oroko, a'da nalinggo o'o eema yeene ka talinggo ya, kudumma üüdü ka teema nggeege ya, o'o nümmöönö ka eyi tiya üüdü.

<sup>2</sup> Kussu angnga a'da Masala mümmü kadu kada timin'da, ömö'dü ya linggo eema afa ma tiya miini ya.

<sup>3</sup> Ömö'di eede, nakiki kide üüdü ka teema a'da kadu na küünii eema ya toroko ya, a'da nüünii o'o ma eyi tiya üüdü ara o'o tö'dö kürö ka tapsu adene tanno Masala?

<sup>4</sup> Alla o'o namidhi 'bangnga moono nja tidhi oona ku'bu tanno oono nja muuyu tammo oono, taalo ussu a'da tiicolo na Masala ka künanaa o'o ka taadha ka tatoroko.

<sup>5</sup> Lakiini a tatoroko tanno üüdü nja takidhö ka eedi tanno nüüdü no, nawaana o'o tagoroo'bo üüdü ka oona ma uuru ma tagoroo'bo a tapsu adene na Masala na dhorro no a tussu adene.

<sup>6</sup> Masala mara tapsu ömö'dü kada köje nja linggo tanno iini.

<sup>7</sup> Kadu no üünii eema ya a'diila ya, kawwa tidhindhii nja tinsili ma eedi a tutü ka 'dii ara Masala tanangnga tefe ka 'dii ta'billi eene.

<sup>8</sup> Kadu könö kadhegedhe nanggeyi neene, taalo kaföönyö eema ya dhorro ya, lakiini kaföönyö eema ma tatoroko ara Masala tagoroo'bo nja eene.

<sup>9</sup> Am'ba ka kadu tanno alinggo tatoroko no, Yahüüdü ka dhidha nja kadu na taalo ka Yahüüdü no.

<sup>10</sup> Tidhindhii nja tiicolo nja ta'diila kara tananja ömö'dü tiya üünii eema ya a'diila ya, Yahüüdü ka dhidha nja kadu na taalo ka Yahüüdü no.

<sup>11</sup> Kudumma Masala taalo müünii ada ömö'dü könö ku'bu.

<sup>12</sup> Kadu na üünii tatoroko a'da kitaalo kussu seriye no eege kara taaya a'da taalo kussu seriye afe'de. A kadu na ussu seriye kassa tüünii tatoroko no kara tahükümüdene ana seriye.

<sup>13</sup> Taalo kadu na föönyö tumma ma seriye eege kungngo ka'diila kidha ma Masala, lakiini kadu na linggo tumma ma seriye no, eege kungngo ka'diila.

<sup>14</sup> Kadu no ajeene no taalo ka Yahüüdü no, kadu na seriye katitaalo kene no kene ka talinggo a tumma ma seriye a'da taalo seriye ya Müüsa kene.

<sup>15</sup> Kiki a'da tumma na seriye köö'dö iini no, karigirinja kene ka nanggeedi, a nanggeedi neene nja nanggüüdü tussu

<sup>20</sup> Jiddi ma Masala ka tarü'bü 'büdhüü, a tanenee noonoo taküdhu türü noonoo ta'billi nja ta Masala tanno oono, kussu adene ka eema tiya Masala ka tagalinggo ya, taalo ömö'dü ma tiki a'da taalo i'i ussu.

<sup>21</sup> Kussu Masala kassa ka taalo kafünügü oogo ko'do kitaalo kanangnga ta'diila oono kada Masala, nanggüüdü neene koroko a nanggeedi neene tadigine ana ndüüli kanagaaga.

<sup>22</sup> Kümmü nanggeyi neene kada 'dara, kagala kada nagaaga.

<sup>23</sup> Kagere tidhindhii ma Masala mara tutü ka 'dii ta'billi mo kara kafara ka eema tiya eene ka tagalinggo ana iisine ya, ömö'dü ya ara titaalo nja uyi nja eema ma erüüdö nja eema tiya ürneeene ya.

<sup>24</sup> Nggeege yungngo a Masala ka tümmünü eege a tallogo ma nanggeedi tanno eene tümmünü eege a tatoroko, ma tüünii midhi ku'bu a tuu'da tanno eene eege ka unggodho eege.

<sup>25</sup> Kagere tumma ma Masala na dhorro no a korokoro. Kamma kafara ka eema tiya Masala ka tarü'böönö ya kafa ka Masala tammo agalinggo eema mo, müdhindhii ta'billi mo. Amiin.

<sup>26</sup> Nggeege yungngo a Masala ka anangnga eege a tatoroko ma midhi, iiya neene tagere füngngö ya dhorro ya a tiya taalo a dhorro ya.

<sup>27</sup> A nagiide afe'de kaadha ka füngngö tiya dhorro ya nja iiya, kara kalüüli ajeene a temelö ma nagiide unggodho eege, a nagiide tüünii modolo nja nagiide könö a tapsu adene kene ka nanggeyi tanno eene ka tatoroko tanno eene kadüüni no.

<sup>28</sup> Kudumma eene taalo kasaasa tafa ka tussu eema ma Masala, iküüri Masala ka tümmünü eege a tatoroko ma nanggüüdü tanno eene muuru eege ka talinggo ya taalo ama talinggo adene ya.

<sup>29</sup> Kadigine a tatoroko, a taga'da 'buugu, a tallogo ma iiya nja nagiide nja tallogo ma eema, a'bugu'buugu ün'dügüngngö. Kadigine a kirimi, a tagirina kadu nja tadiidi, ana ünggü, a tadhe kadu.

<sup>30</sup> Keema ka kadu ko'do, kadiidi ma Masala. Keela kadu, ka'diniga oona coo'do, kawwa tatoroko, taalo kaföönyö tumma na kafaafaa meene.

<sup>31</sup> Taalo ka'dara, taalo kafa ka timi'di tumma. Taalo kana 'bangnga, taalo kana muuyu.

<sup>32</sup> A'da kussu a'da ömö'dü ya üünii tatoroko nggeege ya ara teyi, taalo kalinggo sugi, kagala kada dhodho a kadu tanno üünii nggeege no.

taka öccö ka'buna tumma eene ka oona  
taka no kümmöönökene.

<sup>16</sup> Ka uuru tanno Masala kara tümmü  
kadu na küdhü nanggeedi neene no afa  
ma tumma tanno Yasu Almasihi neede ka  
teemaga co aaga no.

<sup>17</sup> Nümmü o'o eyi yüdüü a'da o'o no  
taga Yahüdüü namma'da ka seriye nabbü  
'danüsö a Masala.

<sup>18</sup> Üürü o'o nussu fiinü yoono nasana  
eema ya a'diila yüdüü ka kalaadene kide  
ya ndama seriye ya.

<sup>19</sup> Nussu a'a a'da o'o nalaala kisinsoro  
ka fiinü, na o'o tatöyeene ma kadu tanno  
anna ka talüllü no.

<sup>20</sup> O'o na tatalaana ma nagaaga, o'o  
na tatalaana ma laala tiya dhiidhi ya,  
kudumma üdüü ka tussu eema ma seriye  
timin'da nye'd'e kungno.

<sup>21</sup> A küdü ka ndalaana kadu, taalo o'o  
nara talaana eyi yüdüü? O'o niki a'da kafa  
tanyoro ara o'o ka tanyoro?

<sup>22</sup> O'o nakiki a'da kadu tafa tatemelö,  
na o'o tatemelö? O'o na'düsünü eema na-  
masala na o'o saga tanyoro naala miini?

<sup>23</sup> O'o na'diniga oona ko'do a'da o'o  
nana seriye ya Masala, ara o'o ka tamidhi  
Masala naga'da seriye yoono?

<sup>24</sup> Sorne iki a'da, "Aaga kanangnga ka-  
jeene kateela eere ya Masala."

<sup>25</sup> Tatendhe ka'diila kene katümmü  
tumma ma seriye, lakiini küdü kara tanu  
ka seriye ara o'o tafeene nya kadu tanno  
taalo katendhe no.

<sup>26</sup> Üürü ömö'di ya taalo atendhe ya  
ümmü tumma ma seriye, taalo ara tümmü  
adene afa ömö'di ya tendhe ya?

<sup>27</sup> Ömö'di ya taalo atendhe ka tuu'da  
assa ka tümmü tumma ma seriye ya, taalo  
ara tümmü kadu na atendhe no a'da seriye  
ungngo eene kassa aga'da.

<sup>28</sup> Taalo ömö'di ya tendhe ka tuu'da ya  
i'i ya taga Yahüdüü dhorro, taalo tatendhe  
ma tuu'da euge kungno kasaasadene.

<sup>29</sup> Lakiini taga Yahüdüü ya küdhü ya i'i  
yungngo ataga Yahüdüü, taradene ma eedi  
a Koronggore taalo a sorne i'i yungngo  
a taradene, i'i yungngo a Masala ka  
tafünügü i'i ko'do taalo kadu.

### 3

<sup>1</sup> A 'bitingngö 'dee nüümö ya Yahüdüü  
kö'dö keere iini i'i ya iiye? A taradene  
kö'dö keere aminna?

<sup>2</sup> Kadhabbu nafiiñi, ka dhidha Masala  
magümmüñi Yahüdüü ka tumma tanno  
oono.

<sup>3</sup> Üürü ömö'di inggide taalo amma? Ara  
tanu ka tamma tanno eene tanangnga  
Masala ka aadha ka tamma tanno eene?

<sup>4</sup> U'u, tumma na Masala ka timin'da  
anangnga ömö'di ka korokoro nye'd'e.  
Sorne iki,

"Tumma nüüdü kara tussu adene afe'e  
ka 'buugu ma seriye ara tumma  
nüüdü tii'baana."

<sup>5</sup> Üürü tatoroko naaja kala ta'diila 'biinü  
kungno ara angnga tiki nya? Masala oogo  
müüni ada kadu ku'bu, kono ka öö'dö a  
tagoroo'bo tanno oono angnga? A'a neema  
'bitingngö ka tamö'di.

<sup>6</sup> U'u, üürü taalo nggeege ara Masala  
tasigi kadu nya?

<sup>7</sup> Üürü korokoro yeede anangnga tumma  
na Masala ka tadhorro a tidhindhi tanno  
oono, na a'a sa tasigidene ka tamö'di tiya  
toroko ya amana?

<sup>8</sup> Aminna agu angnga taalo kiki a'da,  
"Kada küüni tatoroko amang ka ta'diila  
tö'dö"? Kadu köön kakeela a'a kasigi a'a  
a'da a'a nadiri tumma na miini no, euge ka  
saga tahükümüdene kada adho ka fiinü.

#### Kadu nye'd'e koroko

<sup>9</sup> İkiri angnga kara tiki a'da minna?  
Angnga kagi'bi kajeene? Taalo nggeege  
'do, assa ungno takiki a'da Yahüdüü nya  
kajeene 'do kungno ka tauugaara ma  
tatoroko.

<sup>10</sup> Sorne iki,  
"Taalo ömö'di ma ta'diila, salla unggodho  
kungno taalo.

<sup>11</sup> Taalo ömö'di ma tussu,  
taalo ömö'di ma tasaasa Masala.

<sup>12</sup> Kadu nye'd'e kaama  
kadagüüni tatoroko euge in'dili,  
taalo ömö'di unggodho üünü nüümö ya  
a'diila ya,  
taalo unggodho kungno."

<sup>13</sup> "Na'bugeyi neene ka naala ma oofo na  
tanfa'da no,  
nagongo'do neene kama korokoro."  
Tümmü ma nöönökene kungno eene ka  
nanünnö.

<sup>14</sup> "Nanünnö neene kadigine ana linggi  
nya ta'diiri."

<sup>15</sup> "Uune neene kiisö ka tüüfü eriidö.

<sup>16</sup> Kaga'da 'buugu küünö eema ya  
toroko ya kita eene kara co kide ya.

<sup>17</sup> Fiinü ma ta'diila taalo kussu."

<sup>18</sup> "Taalo ri'ba ma Masala eene ka  
ööye."

<sup>19</sup> Kussu angnga nüümö ya seriye ka  
teema ya, i'i adünögü co kadu tanno ka  
nüsö ma seriye no, amang ka nanünnö

tak'i'döönö, a kadu nye'de ka 'büdhü'lü tö'dö kidha ma Masala.

<sup>20</sup> Kudumma linggo ma seriye taalo ka tanangnga ömö'di ka 'diila ka Masala kidha, kudumma seriye amana angnga ka tussu tatoroko.

#### Tadho ka fiinii nja Tamma

<sup>21</sup> Lakiini 'bitüngngö kö'dö ta'diila na Masala a'da taalo seriye a'da seriye nja tumma ma nagane'bi kadinö kini.

<sup>22</sup> Oogo mö'dö a tinsili a tamma ka Yasu Almasiili kudumma taalo tambananjaana ku'bu nja ömö'di tiya amma ya.

<sup>23</sup> Kudumma kadu nye'de de kungngo ka oroko, taalo kussu fiinii ma Masala.

<sup>24</sup> Lakiini Masala manangnga eege ka 'diila a'da taalo faana kide afaaana ana eere ma Yasu Almasiili ya oolona eege ya.

<sup>25</sup> Masala manangnga i'i kada nüümö ma türri, ma tamma ka eriidö tiya iini, oogo magüünii nggeege ma tala ta'diila noono, kudumma ka tidhi oona ku'bu tanno oono afa ka tatoroko kadagüünii adene ka dhidha.

<sup>26</sup> Mala ta'diila noono ka ürüünü ma 'bitüngngö amang kono tanangnga kadu na amma ka Yasu no ka tinsili.

<sup>27</sup> Nüümö ya amana angnga ka ta'diniga oona coo'do i'i ya iiye? Ara angnga ta'diniga oona coo'do aminna? A lingngo? U'u lakiini a tamma.

<sup>28</sup> Kiki inggide a'da ömö'di ara tinsili a tamma ka Masala a'da taalo alinggo a tumma ma seriye.

<sup>29</sup> Ara Masala ta Masala tammo Yahüüdü unggodho eege? Alla oogo ma kajeene nye'de afe'de, ii oogo ma Masala ma tammo kajeene afe'de.

<sup>30</sup> Kudumma Masala ma unggodho, manangnga Yahüüdü ka 'diila a tamma kono afa moono ka amana kajeene ka 'diila a tamma.

<sup>31</sup> Nggeege ara angnga ta kaadha ka seriye a tamma? U'u ara angnga tagümmünni seriye ku'bu.

## 4

### Abrahiim amma ka Masala ana eedi

<sup>1</sup> Ara angnga tiki a'da faafa ma angnga Abrahiim aduna minna?

<sup>2</sup> Üürü Masala manangnga i'i ka tinsili kudumma linggo tanno iini, ara tabbü 'daniisö, lakiini taalo kidha ma Masala.

<sup>3</sup> Sorne iki nya? "Amma Abrahiim ka Masala, a Masala tanangnga ta'diila ka tamma tanno iini."

<sup>4</sup> Ömö'di ya linggo ya ara ta'duga faana yiini, taalo faana yiini ananja iini

ün'dügüngngö, lakiini taalo a kömüsü linggo niini eege kamiini.

<sup>5</sup> Lakiini taalo o'o nara tanangnga Masala ka tamma küdü kudumma linggo tanno üüdü ka tüüni no, Masala mamma ka kadu tanno oroko no kudumma eene ka tamma kono.

<sup>6</sup> Dawud adiri tumma na miini no kini ka tageema ma baraka ma ömö'di tiya Masala ka a'duga tatoroko miini a'da taalo agüüni nüümö.

<sup>7</sup> "A'diila nja kadu tanno a tatoroko no a tatoroko tanno eene ka'dugadene a tatoroko neene tadünggüdöhü.

<sup>8</sup> A'diila nja ömö'di tiya Masala taalo minni tatoroko niini ya."

<sup>9</sup> Dhodho 'dee eege kama taradene sugi, alla titaalo katendhe? Angnga tiki a'da Masala manangnga ta'diila Abrahiim kudumma iini ka tamma.

<sup>10</sup> Lakiini agalinggo adene nya? Kini ka ndatendhe alla iini ka takaleefe? Taalo karadene lakiini ka dhidha taalo keere.

<sup>11</sup> I'i a'duga tatendhe kada kala ma tala tamma tanno iini ka Masala mamma kini ka ta'diila a'da üfürü tatendhe. Abrahiim ya pupa ma kadu nye'de ya amma lakiini taalo akatendhe amang ka ta'diila tananja eene.

<sup>12</sup> Ada pupa tiya kadu tanno tendhe no, nunggunu ka fiinii ma tamma tiya Abrahiim ya, taalo akatendhe, assa katamma ka Masala ya.

<sup>13</sup> Taalo seriye yungngo a Masala ka timi'di tumma nja Abrahiim nja laala tiya iini miini katakarna ka 'büdhü'lü, lakiini a ta'diila ma tamma ka Masala.

<sup>14</sup> Kene kara taga kadu ma seriye eege kungngo kara takarna ka 'buugu, ara tamma ma Masala taga'dadene a timi'di tumma tatangga'da.

<sup>15</sup> Kudumma seriye amana Masala ka koroo'bo, ka seriye kara titaalo ya, taalo nüümö ya toroko ya a tanna kide.

<sup>16</sup> Timi'di tumma kama tamma a'da taalo faana kide amang kini tüü ka laala tiya Abrahiim nye'de kungngo, taalo seriye unggodho i'i, lakiini ma kadu tanno amma afa ma Abrahiim no kungngo, kudumma iini kada pupa tiya aja angnga in'dilli kungngo.

<sup>17</sup> Afa ma sorne ka tiki, "Nanangnga o'o kada pupa ma kadu kadhabbu." I'i ya pupa tiya aja kidha ma Masala tammo iini ka tamma kono mo, Masala mamana tefe ka 'dii ka kadu tanno ake no, mafada a kadu manangnga eege keefe ka 'dii.

<sup>18</sup> Taalo tindhügi kaganna ka Abrahiim miini kara tana laala, lakiini Abrahiim

amma ka Masala ütü ka tündhigü ada Pupa, afa ma Masala ka tadirina iini, "Ara kadaada ma o'o tadhabbu afa midigi."

<sup>19</sup> A nagürüünü na Abrahiim ka ndö'dö kukumu kadu ka üidümmü taalo agi'di ka fiinü ma Masala, a'da iji tuu'da niini ka nda inde a feelü ma aka tammo iini manda eyi afe'de.

<sup>20</sup> Taalo a'doore ka eedi ma tumma tanno Masala ka takiki iini no, tamma kanangnga türü iini ka oona afünügä Masala ko'do.

<sup>21</sup> Ussu dhorro a'da Masala mara tüü ka tumma tanno oono ka takiki no.

<sup>22</sup> Kudumma tamma ka Masala tanno Abrahiim no ikiri Masala ka tamma kini manangnga i'i ka ta'dila.

<sup>23</sup> Taalo sorne iki a'da Masala manangnga i'i ka tinsili kudumma iini ungodho i'i.

<sup>24</sup> Lakiini kudumma angnga afe'de, angnga na Masala ka anangnga angnga ka ta'dila kaco ka tamma kono manangnga Uugaara yaaja Yasu ka fiki'dö ka inde.

<sup>25</sup> Ümmününja ka inde kudumma tatoroko tanno aja, afiki'dö efe ka 'di miini, amang kini tanangnga angnga ka a'diila nja Masala.

## 5

### *Ta'diila nja dhodho*

<sup>1</sup> Ka Masala ka tanangnga angnga ka tinsili ya ka tamma tanno aja no, a taneene ta'dila kaja oono ana eere tiya Uugaara Yasu Almasiihi.

<sup>2</sup> I'i ö'dö ana angnga a tamma ka türü tanno aja ka tanna kide no, angnga tadhodho a tindhigü ma tidihindhi ma Masala.

<sup>3</sup> Taalo nggeege sugi, lakiini angnga tadhodho afe'de ka dhügürü, angnga tussu a'da dhügürü ara tö'dö a tidhi oona ku'bu,

<sup>4</sup> tidhi oona ku'bu ta'b'badene eege kamiini, a ta'b'badene tindhigü eege kamiini.

<sup>5</sup> A tindhigü naaja no taalo kara taama, kudumma Masala ka tuuru tasaasa aja ka nanggeedi a Koronggore tiya Insili ya Masala ka anangnga angnga ya.

<sup>6</sup> Ka tagi'di tanno aja no, eyi Almasiihi ka üdü ma kadu tanno oroko no, ka uuru tanno Masala ka takiki no.

<sup>7</sup> Minna agu ömö'di eyi ka üdü ma ömö'di tiya a'diila ya üürü ma ömö'di tiya adho ka fiinü ya, ara ömö'di takardha ku'bu eyi afe'de.

<sup>8</sup> Lakiini Masala mala angnga a'da tasaasa noono ka anangnga Almasiihi ka teyi ka üdü ma angnga a'da koroko angnga.

<sup>9</sup> Ka inde tanno iini, ma'diila Masala nja angnga, ara tafaanya aja kara tagoolonadene ka tapusu adene tanno Masala.

<sup>10</sup> Üürü Masala ma'diila nja angnga ka inde ma 'bii'bala tiya oono a'da ka diidi ma oono, ara tafaanya kaja kara toolonadene a tefe ka 'dii tanno iini a'da muuraana angnga koona.

<sup>11</sup> Afe'de angnga tagadhodho a Masala ana eere ma Uugaara tiya aja Yasu Almasiihi ya aja kaluna ta'diila kini ya.

### *Adam nja Almasiihi*

<sup>12</sup> Tatoroko kö'dö ka 'büdhüülü ana ömö'di unggodho a tatoroko eege kö'dö ana inde, inde sa ka co ka kadu nye'de kudumma kadu ka toroko.

<sup>13</sup> Tatoroko ka kanna ka 'büdhüülü a'da a leefe seriye ya Müüsa takitaalo, lakiini, kita seriye ka titaalo kide ya taalo tatoroko kinnidene.

<sup>14</sup> Lakiini kaganna inde ka 'büdhüülü ka Adam kadara ka uuru tanno Müüsa, salla kadu na taalo kagüüni no afa tatoroko no Adam. Adam i'i yungingo aga koronggore ma ömö'di tiya ara tö'dö ya.

<sup>15</sup> Lakiini türü ya ananja angnga, taalo afeene nya tatoroko, üürü inde kö'dö ka 'büdhüülü ana ömö'di unggodho, a faaya ma türü tanno Masala nja türü tiya oono ya ö'dö a türü tanno ömö'di unggodho Yasu Almasiihi.

<sup>16</sup> Afe'de kambananjaana tumma tiya amanaja angnga ya nya tatoroko ma ömö'di unggodho. Tasigi kö'dö a tatoroko ka unggodho köö'dö a tahükümüdene, lakiini eema ya Masala ka amana angnga ya asoro tatoroko kadhabbu ka angnga kadu ka'diila.

<sup>17</sup> Üürü inde kö'dö a tatoroko ma ömö'di unggodho, ara tafaanya a tefe ka 'dii ana ömö'di unggodho Yasu Almasiihi, kadu na aluna türü nya nüümö tiya Masala ka anangnga ta'diila a kadu ya.

<sup>18</sup> Afa ma tatoroko ma ömö'di unggodho ka tuuru kadu ka tasigidene, nggeege tekere ta'diila ma ömö'di unggodho anangnga kadu ka 'diila nye'de kaluna tefe ka 'dii.

<sup>19</sup> Kudumma tasilli eema tanno ömö'di unggodho kanangnga kadu katoroko, nggeege afe'de kataföönyö tanno ömö'di unggodho kanangnga kadu kadhabbu ka 'diila.

<sup>20</sup> A seriye ö'dö a tatoroko tadigi ku'bu, a 'buugu ya tatoroko kada dhabbu kide ya, a türü ma Masala tadhabbu 'do.

<sup>21</sup> Salla a tatoroko saga tümmününja ka inde ya, nggeege tekere ara türü tümmününja ka ta'diila ma tefe ka 'dii ta'billi ana Uugaara tiya aja Yasu Almasiihi.

**6***Tefe ka 'dī nja Almasiihi*

<sup>1</sup> Ara angnga tiki a'da minna, ara angnga takütü kadüün'i tam'baga amang kaja taduna türü kadhabbu?

<sup>2</sup> Kaw, angnga no aaya ka tatoroko no, ara angnga taganna kide nya afe'de?

<sup>3</sup> Taalo aaga kussu a'da kaja ka tagambeesedene ana eere tiya Yasu Almasiihi ka kambeesedene angnga ma taaya nja iini?

<sup>4</sup> Angnga tatu'büdene nja iini, angnga takaaya nja iini a tambeese. Aga Pupa ka anangnga i'i ka fiki'dö ka inde a türü ma tüdihindü tanno oono ara angnga taganna ka tefe ka 'dī tanno issi no.

<sup>5</sup> Akaja kara ta unggodho nja iini ka tafeene ma inde tanno iini ara angnga tafeene nja iini ka tefe ka 'dī tanno iini.

<sup>6</sup> Kussu ungngö a'da ömö'dī yaaja ya illi ya agabünnünja ka salii'bi nja iini amang ka tuu'da ma tatoroko titaalo nja iini, amang kaja tafa taga kasaga ma tatoroko.

<sup>7</sup> Kudumma ömö'dī tiya eyi ya ö'dö kürö ndama tatoroko.

<sup>8</sup> A kaja kara takaaya nja Almasiihi, angnga tagamma a'da ara angnga tefe ka 'dī nja iini.

<sup>9</sup> Kussu angnga a'da Masala mafiki'dö Almasiihi ka inde itaalo ara teyi afe'de, inde taalo kara ta uugaara miini afe'de.

<sup>10</sup> Kudumma iini eyi ka üüdü ma tatoroko ta unggodho ta'billi a tefe ka 'dī iini tefe ka 'dī ma Masala eege kamiimi.

<sup>11</sup> Aaga tekere aaga ümmü nanggeyi naada ka taaya kudumma tatoroko, lakiini aaga tefe ka 'dī nja Masala, aaga tefe ka 'dī nja Masala nja Uugaara tiya aja Yasu Almasiihi.

<sup>12</sup> Aaga tafa ka tatoroko kanna kada ka tuu'da tanno ada na aaya no, amang kada tafa tisi ka tatoroko ma eema ma tuu'da keere.

<sup>13</sup> Aaga fa tümmünü nanggeyi naada a tatoroko afa eema ma tam'baga, lakiini aaga ümmünü nanggeyi naada a Masala adha, afa kadu na öö'dö ndama inde köö'dö ka tefe ka 'dī no, ümmü tuu'da naada iini afa eema ma ta'diila.

<sup>14</sup> A tatoroko taalo kara ta uugaara ma aaga afe'de, kudumma ada ka titaalo ka tauugaara ma seriye afe'de aaga kungngö ka türü ma Masala.

*Kasaga na ta'diila no*

<sup>15</sup> A 'bitingngö 'dee nya? Ara angnga tagüün'i tatoroko kudumma aja ka titaalo ta tauugaara tanno seriye, lakiini ka tauugaara tanno türü? Kaw.

<sup>16</sup> Naföönyö eema yiini afa ma tasaga, üürü o'o na tasaga ma tatoroko nara tuurugu o'o ka inde, üürü taföönyö nara tuurugu o'o ka ta'diila.

<sup>17</sup> Angnga tanangnga ta'diila a Masala kudumma ada kada kagasa ma tatoroko, lakiini aaga ka kuurna fiin'i ma eedi ma talaana tanno ada ka tagümmönö no.

<sup>18</sup> Aaga tagildhe nanggeyi naada ka eema ma tam'baga koona a kada kasaga ma ta'diila.

<sup>19</sup> A'a neema tumma ma tadiü'd'dü, kudumma tuu'da ka tagi'di kudumma ada ka anangnga nanggeyi naada ka tadasaga ma eema ma nyoro 'bitingngö agümmünü nanggeyi naada ka ta'diila nja talingga ma tinsili ma eedi.

<sup>20</sup> Yaada kataleefe taga kasaga ma eema ma tatoroko ya, ka ku'b'ba aaga ka ta'diila ma Masala ku'bu.

<sup>21</sup> Kö'dö aaga keere aminna ka eema tiya ada kana modolo miini 'bitingngö ya, eema ya miini ya ö'dö ana inde.

<sup>22</sup> A 'bitingngö kada köö'dö kürö ka eema ma tatoroko ya aaga ta kasaga ma Masala ara aaga töö'dö keere a tinsili nja tefe ka 'dī ta'billi.

<sup>23</sup> Kudumma faana ma tatoroko inde eege kamiini a türü na Masala eege ka tefe ka 'dī ta'billi ana Uugaara tiya aja Yasu Almasiihi.

**7***Tö'dö kürö ndama Seriye*

<sup>1</sup> Aaga fa tüürü nagöre eede, neema a'a nja aaga na ussu seriye no, taalo seriye ta uugaara ma ömö'dī illi kini ka tefe ka 'dī.

<sup>2</sup> Aka marnadene mo, mungngö ka niisö ma seriye ma nyuri tiya oono kini ka leefe ka 'dī, lakiini kini ka teyi taalo mara tanna ka seriye afe'de.

<sup>3</sup> A kono kara tagona nyuri könö a'da aleefe nyuri yoono ka 'dī ya, mana eere a'da madatamelö lakiini nyuri ka teyi, taalo mara tanna ka seriye mitaalo mada temelö afe'de kono kata aka tammo ömö'dī könö.

<sup>4</sup> Nggeege nagöre eede, kaaya aaga ka seriye a tuu'da tanno Almasiihi, amang kada ta tanno ömö'dī ya fiki'dö ka inde ya amang kada töö'dö keere a tööyö a Masala.

<sup>5</sup> Yaaja kataleefe a teene ma tuu'da ma tatoroko, a tatoroko tagüün'i adene ana seriye kaja ka tuu'da amang kaja töö'dö a tööyö ma inde.

<sup>6</sup> Lakiini 'bitingngö ka kaaya angnga ka niimö tiya imi'di angnga ku'bu ya, köö'dö angnga kürö ndama seriye amang kidi talingga ada Masala a fiin'i na issi no ma Koronggore ma 'bitingngö taalo ka fiin'i ma 'billi, ya agakirinja ka sorne ma seriye ya.

<sup>7</sup> Ara angnga tiki nya? Ara seriye tatoroko? Taalo nggeege, taalo a'a nakussu

a'da minna yungngó a talogo, üürü taalo seriye iki a'da, "Fa talogo."

<sup>8</sup> Lakiini tatoroko kaduna fiinii kükki talogo ko'do eede ka oona, kudumma seriye katitaalo a tatoroko teyi.

<sup>9</sup> Nageefe a'a ka 'dī ka dhidha a'da taalo seriye, ka tö'dō a tatoroko tefē 'dī ara a'a ka teyi.

<sup>10</sup> A kanüün ya ama ma tefē ka 'dī kuuru a'a ka inde.

<sup>11</sup> Kudumma tatoroko karuna fiinii ma seriye. Küüsini a'a iini ka tagiidi a'a.

<sup>12</sup> Seriye ka eyi tiya iini ya insili nja kanüün insili adho ka fiinii ya a'diila ya.

<sup>13</sup> A nüümö ya a'diila ya ara tanangngá a'a ka teyi? Kaw, taalo nggege, lakiini tatoroko kō'dō ana inde a'a ma tagüünii nüümö ya a'diila ya amang kene tussu adene a'da ka tatoroko, atagalinggo ana seriye amang kene tala tatoroko na dhorro no.

<sup>14</sup> Kussu angngá a'da seriye ama koronggore, lakiini a'a taalo nama koronggore natennege a'a afa tasaga ma tatoroko.

<sup>15</sup> Taalo a'a nussu nüümö yeede ka talinggo ya, kudumma nüümö eede kasaasa talinggo ya, taalo a'a nalinggo, nüümö yeede kaanu kide ya i'i yungngó eede ka talinggo i'i.

<sup>16</sup> A kede ka talinggo nüümö yeede kaanu kide ya, namma a'da seriye a dhorro.

<sup>17</sup> Taalo a'a nungngó nalinggo nüümö yeede kitaalo nasaasa ya. Lakiini tatoroko neede ka oona no.

<sup>18</sup> Nussu a'a a'da taalo nüümö ya a'diila ya eede ka oona, anna ka tuu'da ma ta ömō'dī, nümmü a'a tumma ma tasaasa tüünii nüümö ya a'diila ya, lakiini taalo a'a naambaanya.

<sup>19</sup> Ta'diila neede kasaasa no taalo a'a nalinggo eege lakiini tatoroko neede kaanu kide no eege kungngó eede ka talinggo egee.

<sup>20</sup> A kede ka talinggo nüümö yeede kaanu kide ya, taalo a'a nungngó nalinggo, lakiini tatoroko neede ka oona no, eege kungngó kalinggo.

<sup>21</sup> A seriye ala a'a ka nüümö tiya afaga a'a keere ka talinggo nüümö yeede ka asaasa ka'diila ya, lakiini tatoroko eege kungngó eede ka oona.

<sup>22</sup> Ka eedi tiya eede ka teene, nadhodho a'a kudumma seriye ma Masala.

<sup>23</sup> Lakiini a'a niji seriye könö kede ka oona alinggo ajeene ana seriye tiya kede ya, yeede ka tamma kide, ya uurugu a'a ka seriye ma tatoroko yeede ka tuu'da ya.

<sup>24</sup> A'a na ömō'dī taalo a'deema! Mada ara toolona a'a ka tuu'da ma inde tanno?

<sup>25</sup> Nanangngá ta'diila a Masala a Yasu Almasiihi Uugaara yaaja. Ndama üüdü tiya eede nalinggo ana seriye ma Masala, nalinggo ana seriye ma tatoroko a tuu'da tanno eede.

## 8

*Tefē ka 'dī ma Koronggore*

<sup>1</sup> Nggege 'bütängngö taalo tahükümü ka kadu tanno Almasiihi Yasu no.

<sup>2</sup> Kudumma seriye ma Koronggore ma tefē ka 'dī ana eere ma Almasiihi Yasu anangngá ka tähürra ndama seriye ma tatoroko nja inde.

<sup>3</sup> Nüümö ya seriye ka tagi'di ka linggo miini ya, tuu'da ma tatoroko kanangngá eege ka tagi'di. Masala magürünü 'Bii'bala yoono afa ömō'dī ya toroko ya, ada kümmü tatoroko ka tuu'da.

<sup>4</sup> Amang ka eema tiya seriye kasaasa kaja ya co ööye miini angngá na unggeene ka fiinii ma Koronggore no taalo ka fiinii ma tuu'da.

<sup>5</sup> Kadu na linggo ana eema ma tuu'da no, kanaana iïye ka eema ma tuu'da, a kadu no alinggo ana eema ma Koronggore no kanaana iïye ka eema ma Koronggore.

<sup>6</sup> Kudumma linggo ma eema ma tuu'da, inde eege kamiini, lakiini tanaana iïye ka eema ma Koronggore tefē ka 'dī nja ta'diila, eege kamiini.

<sup>7</sup> Kudumma tanaana iïye ka eema ma tuu'da ya tadiidi ma Masala eege kamiini, taalo ümmü tumma ma seriye tiya Masala, taalo a tana türü ma tümmöönö.

<sup>8</sup> A kadu no ümmü fiinii ma eema ma tuu'da no, taalo kara tanangngá Masala ka asaasa eege.

<sup>9</sup> Lakiini aaga taalo kunggeene ka fiinii ma eema ma tuu'da, lakiini ka fiinii ma Koronggore ma Masala unngngó ada ka oona, lakiini ömō'dī ya Koronggore tiya Almasiihi ka titaaloo kini ya i'i taalo ömō'dī yiini.

<sup>10</sup> Üürü Almasiihi aneene nja aaga ara tuu'da naada taaya kudumma tatoroko, a koronggore ya tefē ka 'dī naada kudumma ta'diila.

<sup>11</sup> Üürü Koronggore ya Masala anangngá Yasu ka fiki'dō ka inde ya aneene nja aaga, ömō'dī ya afiki'dō Almasiihi ka inde ya, ara tanangngá tuu'da naada na aaya no kefe ka 'dī a Koronggore tiya oono ya aneene nja aaga ya.

<sup>12</sup> Nagöre eede, linggo dhorro eege kungngó aja, lakiini taalo angngá kama taneene taneene ma tuu'da.

<sup>13</sup> Üürü kaneene aaga taneene ma tatoroko ya, ara aaga taaya, lakiini kada

kara taaya ka Koronggore ma eema tiya toroko ma tuu'da ya, ara aaga tefe ka 'dī.

<sup>14</sup> Kudumma kadu tanno aneene a Koronggore ma Masala no eege ka laala ma Masala.

<sup>15</sup> A koronggore yaada ka 'duga ya taalo üün'i tadasaga ana aaga afe'de anangnga aaga ka ri'ba, lakiini anangnga aaga kada laala ma Masala, anangnga tagümmünü, "Abba," a'da Pupa yeede.

<sup>16</sup> A Koronggore ya ussu tumma ma nagoronggore tanno aja a'da angnga ka laala ma Masala.

<sup>17</sup> Üürü angnga ka laala ma Masala ara anangnga ta'duga baraka yoono ka takindinaana ku'bu ya, ara angnga takarna ka eema ma Masala, angnga nja Almasiihi, a kaja kara tagosso ka dhügürü nja iini ya, ara angnga tagosso ka türü tanno iini.

#### *Tidhindhi na tö'dö no*

<sup>18</sup> Niji a'a dhügürü ya ka 'büdhülü 'bitingngö ya, taalo ara taköje nja tidhindhi tanno ara tö'dö kaja ka oona no.

<sup>19</sup> Kudumma eema tiya Masala ka tarü'böönö nye'd'e indhig'i Masala a'da aala laala tiya oono.

<sup>20</sup> Nggeege eema ya Masala ka tina atangga'da ka nanggüdü, lakiini taalo kudumma ma tasaasa tatangga'da ka nanggüdü. Masala magalinggo nggeege ka tindhig'i.

<sup>21</sup> Eema ya Masala ka tadina ka eyi tiya eene kara tö'dö kürö ndama tatoroko tanno eene köö'dö ka tidhindhi ma tahürra ma laala tiya Masala.

<sup>22</sup> Kussu angnga a'da eema ya Masala ka tagalinggo ya nye'd'e de kungngo ya, kafara 'bitingngö afä tin'di ma teene.

<sup>23</sup> Lakiini taalo eema ya miini ya ungodho i'lakiini angnga na ana Koronggore ka dhidha no kadhügürü angnga afe'de ka tuu'da angnga takindhig'i Masala ma'duga angnga moolona tuu'da naaja.

<sup>24</sup> Kudumma aja kara takindhig'i Masala angnga toolonadene, lakiini tindhig'i na ijidene no taalo tindhig'i eege kamiini, ara ömö'di tindhig'i niimö yiini kijöögö ya nya?

<sup>25</sup> A kaja kara tagandhig'i niimö yaaja ka titaalo kijöögö ya, ara angnga tindhig'i i'i a tidhi oona ku'bu.

<sup>26</sup> A Koronggore tö'dö afe'de ma takinyi tagi'di naaja, angnga taalo kakussu kafara ka Masala afa ma tiya oono ka asaasa ya illi Koronggore ka eyi tiya iini eema tumma ma angnga ka Masala kidha tumma miini ka iideene.

<sup>27</sup> Masala miji nanggeedi mussu niimö ya Koronggore ka asaasa ya, i'i ümmöönö

ka kadu ma Masala afa ma tiya oono ka asaasa ya.

<sup>28</sup> Kussu angnga a'da eema nye'd'e de alingga a ta'diila ma kadu tanno asaasa Masala no, eege kungngo a Masala ka tümmünü eege ndama eedi tiya oono.

<sup>29</sup> A kadu noono ka tagesse eege no kadhadha, magümmünü eege ka dhidha no anangnga eege kafeene nja 'bii'bala tiya oono Yasu ya dhidha ka nagöre tanno kadhabbu no.

<sup>30</sup> A kadu noono ka tagesse ka dhidha magümmünü eege, manangnga eege ka'diila ka nanggeedi nja oono, oogo afe'de de manangnga eege ka tidhindhi.

<sup>31</sup> Ara angnga takiki nya ka tumma tanno, üürü Masala nja angnga 'dee mada i'i yungngo ara tadiidi ma angnga afe'de?

<sup>32</sup> Masala taalo mana 'bangnga ma 'bii'bala tiya oono, lakiini mümmü i'i ka inde ka üüdü ma angnga nye'd'e, assa ka titalo ara tanangnga eema angnga iini nye'd'e nya?

<sup>33</sup> Mada i'i yungngo ara tümmü kadu na Masala ka tagesse eege no? A'da oogo mungno moolona eege.

<sup>34</sup> A mada yungngo a tümmü kadu? A'da Almasiihi eyi, afiki'dö afe'de anna ka nüsö ma kuri ma Masala eema tumma angnga.

<sup>35</sup> Mada i'i yungngo ara tadhagaana angnga ku'bu nja tasaasa tanno Almasiihi, tagoro'o'bo ma 'buugu, tüün'i nja ku'bu, kürimi, iire, alla taneene ana oona ku'bu alla inde?

<sup>36</sup> Sorne iki,  
"Kadhügürü angnga ka üüdü ma o'o a nagürüünü,  
ungngo tafeene nja ki'biini ma taraana."

<sup>37</sup> Lakiini angnga kadhügürü tiya nye'd'e de kungngo ya, kagii'bi angnga eege a türü ma ömö'di tiya asaasa angnga ya.

<sup>38</sup> Nussu a'a dhorro a'da kitaalo inde, a tefe ka 'di titalo alla kadhanga, alla naguugaara ma kadhanga, alla türü ma eema ma 'bitingngö ya ara tö'dö taka öccö ya,

<sup>39</sup> alla türü ma 'büdhülü alla türü ma 'dotombo'do alla eema öccö ya Masala ka tadina ya ara tambaanya tadhagaana angnga ku'bu nja tasaasa ma Masala tanno Uugaara Yasu Almasiihi.

## 9

### *Masala nja kadu ma Israyil*

<sup>1</sup> Ara a'a tadirina tumma aaga dhorro ana eere ma Almasiihi taalo a'a nakorokoro eedi yeede ussu a'a a Koronggore tiya Insili ya.

<sup>2</sup> Namüürü a'a 'do, tin'di kungngo eede ka eedi taalo kaadha.

<sup>3</sup> Nagala a'a ka tasaasa ka eyi tiya eede a'da a linggi tagu na a'a takaadha ka fiinü tiya Almasihi kudumma siliga ma a'a nja nagöre tanno neede.

<sup>4</sup> Eege ka laala tiya Israyil na Masala ka tümmü egee kada laala tiya oono no, nja tidihindhi nya timi'di tumma nya seriye nya tümmü Masala nya tindihiigü.

<sup>5</sup> Kafaafa kungngo eene, Almasihi ö'dö ka tuu'da, i'i yungngo a Masala ma eema nye'd'de. Masala mafünögü nya ko'do ta'billi. Amiin.

<sup>6</sup> Taalo a'a niki a'da, tumma na Masala ka tami'daana no kaama. Taalo kadaada ma Israyil ka Israyil nye'd'de.

<sup>7</sup> Taalo laala ya Abrahiim ka laala tiya Abrahiim nye'd'de. Masala miki Abrahiim, "Ara laala tanna küdü ana Ishak."

<sup>8</sup> Taalo laala ma tuu'da ya, laala ma Masala, lakiini laala ma timi'di tumma eege kungngo a Masala ka tümmü egee kada laala tiya Abrahiim.

<sup>9</sup> A timi'di tumma kiki kungngo, "Ara a'a tö'dö a 'buugu kafiigi kungngo a Sara teene 'bii'bala."

<sup>10</sup> Taalo sugi ma tumma eege kungngo, lakiini Rifiqa magüröönö nya ömö'di unggodho, pupa yaaja Ishak.

<sup>11</sup> A kene ka tüfürü tageenedene, taalo küüni eema ya a'diila ya nya tiya atoroko ya, amang ka tumma tanno Masala ka tagesse no tüütü ka ööye miini,

<sup>12</sup> taalo a tumma alinggo, lakiini kudumma tümmüneene tanno iini. Miki Masala ja Rifiqa, "Ara 'bii'bala ya idhilli ya tüüni tadasaga ada ya dhabbu ya."

<sup>13</sup> Afa ma tiya sorne ka tiki a'da, "Nasaasa a'a ja Yaguub nanu ka Iiso."

<sup>14</sup> Ara angnga tiki nya? Masala müünii ada kadu könö ku'bu? Kaw.

<sup>15</sup> Kudumma Masala ka tiki a Müüsä,

"Ara a'a tana 'bangnga ma ömö'di tiya eede ka asaasa kana 'bangnga miini ya,

nana muuyu ma ömö'di tiya eede kana muuyu miini ya."

<sup>16</sup> Lakiini taalo tumma ma eedi tiya ömö'di nya niimö tiya iini ka asaasa ya, lakiini 'bangnga ma Masala unggodho oogo.

<sup>17</sup> Kudumma sorne ka tiki a Faröön, "Na'diniga a'a o'o ko'do amang ka türü tanno eede tussu adene küdü amang ka eere tiya eede tafara ka 'buugu ka oona in'dili kungngo."

<sup>18</sup> Oogo mana 'bangnga ma ömö'di tiya oono ka asaasa ya, manangnga nanggeedi na kadu töccö ka takihöö.

<sup>19</sup> Ara aaga tiki a'a a'da, "Minna agu Masala müümü angnga ana eedi? Mada i'i yungngo ara tambaanya türü noono?"

<sup>20</sup> O'o na mada napadaga tumma a Masala? Niimö ya arü'bü adene ya ara tiki ömö'di tiya arü'bü i'i ya, "Minna agu o'o natarü'bü a'a kungngo?"

<sup>21</sup> Ömö'di ya arü'bü tam'bala ya 'dee, taalo üüni ma eyi tiya iini? Arü'bü niimö ya a'diila arü'bü ya toroko ya.

<sup>22</sup> I'i yungngo a Masala ka tagütüni, oogo masaasa tala tagoroo'bo noono nya türü tanno oono, ma idhi oona ku'bu tafifinni ana eema ma tagoroo'bo ma tara taama.

<sup>23</sup> Oogo afe'de masaasa tala tüüsü ma tidihindhi noono na dhabbu no, na küüninja kaja ka oona kada niimö ma 'bangnga tammo oono angnga yoono ka tindinaana angnga ku'bu ma tidihindhi tanno oono no.

<sup>24</sup> Oogo magümmüü angnga afe'de a'da taalo angnga ka Yahüüdü angnga ka ka-jeeene afe'de.

<sup>25</sup> Afa moono ka tiki ka sorne ma Hawsha,

"Ara a'a tümmünü kadu no taalo ka kadu tanno eede no kada kadu tanno eede no,

eede ka titaalo nasaasa oogo mo ara a'a tümmü oogo kada tammo eede ka asaasa oogo mo.

<sup>26</sup> 'Buugu yeene kara tiki eene kide a'da, "Taalo aaga ka kadu tanno eede, ara aaga tana eere a'da laala ya Masala tammo efe ka 'dii mo.'

<sup>27</sup> Asaiya tageema tumma ma kadu ma Israyil,

"Sa aaga tagöje nya ndamugu ma to ara türeene miini toolonadene.

<sup>28</sup> Kudumma Uugaara mara tapusu kadu na ka 'büdhüüli no."

<sup>29</sup> Asaiya ageema iki, "Üürü taalo Uugaara ma nasigira mafa ka laala ya, ara angnga ta kafeene nya Sadöma angnga ta kafeene nya Amuura."

### Israyil nya Almasihi

<sup>30</sup> Ara angnga tiki nya? Kajeene na taalo kasi ka ta'diila keere no, kaduna ta'diila lakiini a tamma ka Masala.

<sup>31</sup> Lakiini Israyil no iisö ka seriye keere no, ka ta'diila no taalo kambaanya tala seriye ya a'diila ya koonaa.

<sup>32</sup> Amanä? Kudumma eene ka tagalinggo nggeege a'da taalo tamma kene ka eedi,

lakiini afeene afa linggo ma seriye, kikirü ka seene ka müsi tammo kara ka fiinü mo.

<sup>33</sup> Afa ma sorne ka tiki,

"A'a nungngo nara tanangnga müsi ma taseene ka Sahyüün ka kadu ka fiinü nja müsi ma ta'dinggöö, ömö'dü ya amma kini ya taalo ara tana modolo."

## 10

<sup>1</sup> Nagöre eede, nüümö yeede ka asaasa ana eedi dhorro ya a'da tafara ka Masala neede a'da ja kadu ma Israyil toolonadene.

<sup>2</sup> Niji a'a tagu'daana ka nanggeedi neene ma Masala, lakiini tagu'daana ka nanggeedi neene taalo kama tussu eema.

<sup>3</sup> Eege taalo kussu fiinü ya Masala ka amana kadu ka'diila nja oono, ka'b'ba tanangnga nanggeyi neene ka'diila unggodho eege, eege taalo kamma ka fiinü tiya Masala ka amana kadu ka'diila.

<sup>4</sup> Almasiihi i'i yungngö eere ma Seriye, amang ka ömö'dü tiya amma kini ya, ta'diila nja Masala.

### Toolona ka kadu nye'd'de

<sup>5</sup> Kudumma Müüsä ka takiki a'da, "Ara ömö'dü ta'diila ka seriye nya, ömö'dü ya ümmü tumma ma seriye ya ara tefe ka 'd'i ini."

<sup>6</sup> A ta'diila a tamma ka Masala kiki, "Fa tiki ka eedi tiya üüdü a'da, Mada i'i yungngö ara tasiröö co 'dotombo'do?" anangnga Almasiihi ka öö'dö kaja ku'bu.

<sup>7</sup> Nja, "Ömö'dü tiya ta'dinggöö co ööye?" nja iini ka anangnga Almasiihi ka öö'dö ndama inde.

<sup>8</sup> Lakiini iki a'da minna? "Tumma ka kete küdü ka nüönö nja eedi." Eege ka tumma ma tamma naaja ka tadünögü co kadu no.

<sup>9</sup> Küdü kara teema ana onggo'do tammo üüdü a'da Yasu Uugaara, namma ana eedi tiya üüdü a'da Masala manangnga i'i ka fiki'dö ndama inde ya ara o'o toolonadene.

<sup>10</sup> Tamma ana eedi kara tanangnga aaga ka'diila nja Masala a tumma a nanggo'do tanangnga ömö'dü ka toolonadene.

<sup>11</sup> Sorne ma Masala iki, "Ömö'dü ya amma kini taalo ataama."

<sup>12</sup> Taalo ta'bakala kada ka Yahüüdü nja ömö'dü tiya taalo a taga Yahüüdü ya kudumma Masala tammo eene nye'd'de, mamana eema a kadu tanno amma kono no nye'd'de kungngo.

<sup>13</sup> Kudumma, "Ömö'dü ya amma ka eere ma Uugaara ya ara toolonadene."

<sup>14</sup> Eege kara tümmüü oogo nya a'da taalo kamma kono? Kara tamma kono nya a'da taalo kaföönyö? Kara taföönyö nya a'da taalo ömö'dü ma tagadünögü eene?

<sup>15</sup> Eege kara teema nya ara taalo Masala magürünü i'i? Afa ma sorne ka tiki, "Ka'diila uune no kadu tanno adünnü tumma ma Masala no."

<sup>16</sup> Lakiini taalo eege in'dülli kamma ka tumma tanno Masala, kudumma Asaiya ka tiki a'da, "Ka Uugaara, mada i'i yungngö ara tamma ka tumma tanno aja?"

<sup>17</sup> Kamma ka tumma ma Masala aja kara taföönyö tumma na Almasiihi.

<sup>18</sup> Lakiini ara a'a tiki aaga, taalo kaföönyö? Kaföönyö sorne iki, "Tumma no ka nyala ka 'buugu koona nye'd'de kungngö nja 'büdhüüli konna in'dülli."

<sup>19</sup> Lakiini ara a'a tiki aaga a'da, kadu ma Israyil taalo kussu? Akiki Müüsä ka dhidha,

"Ka kirümi aaga kadu na taalo ka kadu tanno eede no,

ara a'a tanangnga kadu öccö na taalo kussu eema no kanangnga o'o ka koroo'bo."

<sup>20</sup> Asaiya akuru rüsü iki,

"Kaduna kadu na taalo kagawwa a'a no, a'a nussudene ka kadu tanno taalo kawwa a'a no."

<sup>21</sup> Lakiini i'i eema ka Israyil,

"Namünögü a'a nüüsö uru in'dülli ka kadu tanno oroko taalo kaföönyö eema kasilli tumma."

## 11

### Masala taalo manu ka kadu ma Israyil

<sup>1</sup> Nikirü a'a ka tiki a'da, Masala 'dee manu ka kadu tanno oono? Kaw! A'a ka eyi tiya eede a'a na taga Israyil 'bandaada ma Abrahiim ndama siliga tiya Binyamiin.

<sup>2</sup> Taalo Masala manu ka kadu tanno oono ka tagilli ka tagesse eege no. Alla taalo aaga kussu a'da miki Masala ka sorne ma İllya nya, iini ka tasigi kadu ma Israyil ka Masala,

<sup>3</sup> "Ka Masala, kagirina nagane'bi nüüdü kürrüdü nüügiisi ma türri illi a'a nungngö nöreene unggodho a'a kasaasa tiidi a'a?"

<sup>4</sup> Lakiini tumma na Masala kiki iini nya? "Türeene ma kadu kinggide kö'dö sa'ba alif taalo küürü ku'bu a nagüuge ka 'Baala kidha."

<sup>5</sup> Aga ürüünü tiya 'bitingngö ya afe'de, türeene ma kadu kinggide a Masala ka tagesse euge a türü.

<sup>6</sup> Üürü tessadene a türü, taalo ma kara tama linggo aya ma linggo ya i'i ya iiye, illi a türü takütü ka türü.

<sup>7</sup> Minna inggide afe'de? Ya Israyil katasaasa ya taalo kaduna ka kadu tanno Masala ka tagesse euge no eege kungngó kaduna. Lakiini türeene miini kakidhö ka nanggeedi.

<sup>8</sup> Afa ma sorne ka tiki,  
"Manangnga Masala koronggore ma  
taa'baga eene,  
iiye taalo kiji 'buugu,  
iisine taalo kaföönyö eema kadara ka  
uuru tanno."

<sup>9</sup> A Dawud tiki,  
"Fa ka 'buugu ma kuri tiya eene ada kühü  
ada saraka akara eene ka fiinü,  
üümü midhi ku'bu ana eege.

<sup>10</sup> Iiye neene talüdhü ku'bu amang kene  
tafa tiji 'buugu kagür'dü  
a na'dugeere neene tagür'dü kiti ku'bu  
turi."

<sup>11</sup> A'a nindineene, aser'de awwa ya  
Yahüdü ka'dingga ta'billi? Kaw, lakiini  
taser'de neene kanangnga kajeene ka  
tooladene anangnga Israyil ka takirümi  
eege.

<sup>12</sup> Üürü taser'de neene kanangnga kadu  
ka tüüsü ya a tagi'di neene kanangnga  
kajeene ka tüüsü ara tafaanya kene kara  
tadigi ku'bu.

<sup>13</sup> A'a neema nja aaga na kajeene no,  
kudumma a'a na tafinü ma kajeene, a'a na  
'dinig oona coo'do ka linggo tanno eede.

<sup>14</sup> A'a nasaasa tanangnga kadu neede  
tana kirimi amang kede toolona türeene  
meene.

<sup>15</sup> Üürü tanu neene kanangnga Masala  
ka'diila nja kadu ka 'büdhülü, aminna  
ungngó ka tamma tanno eene, illi tefe ka  
'di ka inde.

<sup>16</sup> Üürü 'dakeyi ma tigüidi ma insili kono  
ka ananja a Masala ya, ara tigüidi nye'de  
ta insili. Üürü 'bereere insili ya, ara kolelle  
tinsili tekere.

<sup>17</sup> Üürü kolelle könö ka'bunadene, o'o  
taga 'dikidiyö ma dhiile ka tendhe ma  
tammasa ka kolelle tammo ütü ka  
'dikidiyö tiya dhorro a 'bitingngö kosso  
aaga ka baraka tiya Masala ka tadirina  
Abrahiim ya.

<sup>18</sup> Fa ta'diniga eyi yüdü ko'do a kolelle,  
üürü o'o na'diniga eyi yüdü coo'do taalo  
o'o na 'bereere dhorro. Lakiini 'dikidiyö  
ya dhorro ya i'i yungngó ümmü o'o.

<sup>19</sup> Lakiini ara o'o tiki, "Katendhe kolelle  
no amang kede tamma'da kide."

<sup>20</sup> Tumma dhorro, lakiini eege  
ka'bunadene kudumma eene taalo  
kamma, o'o nütü ka tumma ma tamma  
tanno üdü, fa ta'diniga oono nütü  
coo'do, lakiini ari'ba.

<sup>21</sup> Üürü Masala taalo mana 'bangnga ma  
kolelle tanno dhorro no, taalo mara tana  
'bangnga ma o'o.

<sup>22</sup> 'Bangnga ma Masala nja tagoroo'bo,  
a tagoroo'bo ada ka kadu tanno a'dingga  
no, lakiini 'bangnga ma Masala nja o'o ka  
anangnga o'o ka tutü ka 'bangnga tammo.  
Üürü o'o taalo nütü ka 'bangnga tanno, ara  
o'o tarumeene afe'de.

<sup>23</sup> A kene kara taadha ka tatoroko tanno  
eene no, ara Masala tamana kuri eene,  
kudumma Masala mambaanya tamana  
kuri eene afe'de.

<sup>24</sup> Üürü o'o natendhe ndama fa ma  
'dikidiyö ma dhiile, kama'da ka 'dikidiyö  
tiya dhorro ya, ara ta'diila nja eene ka  
'dikidiyö tiya dhorro ya.

*Masala mana 'bangnga ma kadu  
nye'de*

<sup>25</sup> Nagöre eede, taalo a'a nasaasa a'da  
aaga tafa tussu tumma na kume no, ii'di  
aaga tümümü nanggeyi naada kada 'dara,  
takidhö ka nanggiüdü tanno kadu na  
Israyil kara saga titaalo ka kajeene dhabbu  
kara tamma ka Almasiili.

<sup>26</sup> Nggege ara kadu ma Israyil toolon  
adene in'dili afa ma sorne ka tiki kungngó,  
"Ara tatoolona tö'dö ndama Sahyüün  
agala tatoroko ka laala tiya Yaguub ka  
oona.

<sup>27</sup> A timi'di tumma neede eege kungngó  
meede kara tagala tatoroko neene."

<sup>28</sup> Kadu ma Israyil kadhabbu 'bitingngö  
kadiidi ma Masala, kudumma eene kanu  
ka tumma ma İnjilli, agala ka'diila nja  
aaga na kajeene no. Lakiini Masala  
masaasa eege magesse eege kudumma ma  
timi'di tumma noono nja kadaada meene.

<sup>29</sup> Masala taalo mara tafada ana eema  
tiya oono ka amana a kadu ya, mitaalo  
mara tüürü ma kadu tanno oono ka  
tagesse eege no.

<sup>30</sup> Afa maada ka tasilli tumma na Masala  
ka dhidha, a 'bitingngö moolona aaga  
kudumma ma tasilli eema tanno eene.

<sup>31</sup> Eege 'bitingngö ka tasilli tumma  
amang kene taluna 'bangnga afe'de afa  
'bangnga ma Masala nja aaga.

<sup>32</sup> Kudumma Masala ka anangnga kadu  
nye'de ka pabuuus ma tasilli eema

amang kono tana 'bangnga kene ka oona in'dili.

### *Tafünügü Masala ko'do*

<sup>33</sup> Kadhhonggoro tüüsü na Masala nja ta'dara tanno oono nja tussu eema tanno oono. Ka iideene tussu linggo noono nja tussu nafiini noono.

<sup>34</sup> Sorne iki,

"Mada i'i yungngo ussu tumma na Uugaara  
a mada i'i yungngo a talaala oogo ka fiini?"

<sup>35</sup> "A mada i'i yungngo anangnga nüümö oono  
amang kono tapadaga iini."

<sup>36</sup> Kudumma eema nye'de kö'dö ndama oono kada tiya oono, ara co kono. A tindhigü kungngó oono turi ta'billi. Amiin.

## 12

### *Tefe ka'di na Almasiihi*

<sup>1</sup> Nagöre eede, a'a niki aaga a 'bangnga ma Masala a'da aaga tümmünü nanggeyi naada ka eema ma tirri tiya insili ya a tefe ka 'dä tanno Masala ka tamma kide ya, tümmü Masala ma koronggore naada euge kamiini.

<sup>2</sup> Aaga tafa tafeene nja eema ma 'büdhüli ya ma 'bitingngö ya, lakiini aaga agere nanggüdü naada kada ma 'bitingngö amang kada tussu fiini ya Masala ya dhorro ya, fiini ya Masala ya a'dila ya adho ka fiini ya.

<sup>3</sup> A'a niki aaga a türü tanno ümmününja a'a no a'da ömö'di tafa tümmü eyi yiini ka tii'baana, lakiini ümmü eyi yiini ka ta'dara, ka taköje nja tiya Masala ka anangnga iini ya ka tamma ka Masala tanno iini.

<sup>4</sup> Afa ma naseldhe kungngó aja ka tuu'da tanno unggodho no kadhabbu, lakiini linggo neene taalo ka unggodho.

<sup>5</sup> Nggege kadhabbu angnga, lakiini tuu'da naaja ka unggodho ka Almasiihi, angnga ka unggodho.

<sup>6</sup> Linggo ma ta'dara kambananjaana ku'bu ma türü tanno Masala ka anangnga angnga no, ömö'di teema tumma na Masala ka anangnga iini a tamma ma eedi tiya iini.

<sup>7</sup> Ömö'di ya ussu ka talinggo ya, fa kini alinggo, aya ussu ka talaana ya fa kini alaana.

<sup>8</sup> Ömö'di ya ussu ka tafünügü kadu ko'do ya fa kini alaana kadu kide, ömö'di ya amana eema a kadu ya fa kini amana eema a ta'dila ma eedi, ömö'di ya indinaana kadu ku'bu ya fa kini alinggo dhorro,

ömö'di ya ana 'bangnga fa kini üünä ana eedi ka tinsili.

<sup>9</sup> Kasaasa tasaasa na dhorro no, aaga Aadha ka eema tiya toroko ya ara aaga ka tümmü fiini ya a'dila ya.

<sup>10</sup> Aaga asaasa ajeene kada nagöre aaga tümmü ajeene a nanggeedi dhorro.

<sup>11</sup> Aaga fa tagi'di ka linggo keere aaga alinggo a tagu'daana, aaga tümmü Masala ana eedi ka teene.

<sup>12</sup> Aaga dhodho ka tindhigü ma Masala, aaga tidhi oona ku'bu ka 'buugu ka tatoroko nja aaga, aaga tafara ka Masala turi kungngó.

<sup>13</sup> Aaga osso ka eema tiya ada nja kadu ma kaniisa yeene ka asaasa ya, aaga tamana eema eene.

<sup>14</sup> Aaga amana baraka a kadu tanno alinggo aaga no, aaga amana baraka eene aaga tafa teela eege.

<sup>15</sup> Aaga dhodho nja kadu tanno dhodho no, aaga fara nja kadu tanno fara no.

<sup>16</sup> Aaga faana ka oona, aaga fa ta'diniga oona coo'do, aaga fa tümmü nanggeyi naada a'da aaga ka'dara aaga tagi'i bi kadu köönö.

<sup>17</sup> Aaga fa ta'diinö kömüsü ana ömö'di tiya üünä tatoroko ana aaga ya, aaga kardha ku'bu aaga tüünä eema ya a'dila ya ka kadu kidha nye'de kungngó.

<sup>18</sup> Aaga alinggo eema ya a'dila ya, amang kada taneeene nja kadu nye'de a tussu kide tanno ada.

<sup>19</sup> Aaga fa ta'diinö kömüsü ma nanggeyi tanno ada, nagöre eede, aaga Aadha ka tatoroko, kudumma Masala milki ka sorne, "A'a nungngó nara ta'diinö kömüsü."

<sup>20</sup> Ka ii're kara tagu diidi ma o'o ya nya kuri iini,

a tenege kara tagu i'i nanya 'biidi iini. Kudumma üdü kara tüünä nggege ya, afeene afa o'o naraada a'dii' do iini ka üdü.

<sup>21</sup> Fa tafa ka tatoroko kii'bi o'o. Lakiini ii'bi tatoroko a ta'dila.

## 13

### *Taföönyö tumma ma naguugaara*

<sup>1</sup> Fa ka kadu nye'de kümmünü nanggeyi neene a naguugaara ma anya, kudumma tauugaara in'dili kungngó na nüüsö ma Masala, tauugaara na 'bitingngö no Masala oogo mungngó mö'dö iini.

<sup>2</sup> Ömö'di ya anu ka tauugaara ya, i'i anu ka linggo tanno Masala, kadu no anu ka tauugaara no egee kara tö'dö a pabuusu eene ka nanggeyi.

<sup>3</sup> Kadu no alinggo eema ya 'diila ya, taalo kari'ba a naguugaara, illi ömö'di ya

toroko ya. Nasaasa o'o a'da nafa tari'ba a naguugaara, alingga eema ya 'diila ya amang kene tafünügү o'o ko'do.

<sup>4</sup> Kudumma eene ka talingga ada a Masala ma tindinaana 'buugu, lakiini küdü ka tüüni tatoroko, ara o'o tari'ba kudumma iini taalo ümmü kulu'ba weerö ün'dügüngngö kudumma eene ka talingga ada a Masala, kara tapusu kadu no üünü tam'baga no.

<sup>5</sup> Nggege ya fa ka kadu kümmüü nanggeyi neene eene, taalo kudumma ma ri'ba ma tapusu adene sugi, lakiini kudumma ma eedi.

<sup>6</sup> Kudumma ata kamana tulu'ba ku'bu, ege ka kadu ma linggo tanno Masala, kalinggo a kadu turi kungngo.

<sup>7</sup> Aaga anangnga eema a ömö'di tiya asaasa kada ya, üürü ömö'di ma talu'ba nanangnga ku'bu, üürü diginiya nanangnga ku'bu, a ömö'di ya dhabbu ya, nari'ba iini, ömö'di ya adho ka fiin'i ya, nari'ba iini.

#### Aaga asaasa ajeene

<sup>8</sup> Aaga fa tama kömüsü ka kadu, illi kömüsü ma tasaasa ajeene, kudumma ömö'di tiya asaasa kadu ya i'i ya atüümö linggo ma serième.

<sup>9</sup> Masala miki ka sorne a'da, "Fa temelö," "Fa tagirina kadu," "Fa tanyoro," "Fa tallogo ma eema." A tumma könö afe'de köödhü ka niimö unggodho, "Asaasa kadu afa müüdü ka asaasa eyi yüüdü kungngo."

<sup>10</sup> A tasaasa taalo tili ömö'di ya akete kini ya, tasaasa katüümö linggo ma serième nye'd'de.

<sup>11</sup> Kussu aaga a'da ka uuru töccö assa uuru naada tõ'dö ma taceene ka tarigide tanno ada, toolona ka ndagette kaja, taalo afeene nya uuru tanno aja ka takaleefe tagümmü Masala no.

<sup>12</sup> Assa ooso takete ka taadha, a taka taadha, kada aadha linggo ma ndüüli ara angnga kada a'duga eema ma koro'bo ma töyeene.

<sup>13</sup> Kata kaneene taneeene no dhorro no, afa ma kadu no anna ka töyeene ma uuru no. Angnga tafa take ka ngeeli, angnga tafa tüüni tatoroko nya temelö nya tadiidi nya kirümi.

<sup>14</sup> Aaga kirnii Uugaara Yasu Almasiiji ada ka oona afa ten'di, aaga tafa talingga ana eema ma tuu'da, kudumma eene ka teema ma tanaana liye ma eema.

<sup>1</sup> Aaga amma ka ömö'di tiya agi'di ka tümmü Masala ka eere ya, aaga tafa talingga a tumma ma eedi tiya iini.

<sup>2</sup> Ömö'di öccö amma ka kuri ma eema nye'd'de, lakiini kadu könö kinggide taalo kamma kide kikiri kagu migile nya naafa nya ooyo sugi.

<sup>3</sup> Ömö'di ya agu eema nye'd'de afa tamidhi ömö'di ya anu kide ya, ömö'di ya anu ka kuri ya afa tamidhi ömö'di ya agu eema nye'd'de ya kudumma Masala ka tamma kide.

<sup>4</sup> O'o na mada namidhi tasaga ya ömö'di könö? A'da ömö'di yiini i'i yungngo ussu a'da i'i ar a ta'dinggö nya iini kara tambaanya, ara tambaanya kudumma Masala oogo mungno mara tanangnga i'i kaana türü.

<sup>5</sup> Kadu könö kümmü uuru öccö ka'diila, öccö tümmöönö nye'd'de, lakiini fa ka ömö'di ümmü niimö yiini ka asaasa ana eedi tiya iini.

<sup>6</sup> Ömö'di ya ümmü uuru könö kada dhorro ya, i'i ümmü Uugaara. Ömö'di ya agu uu'da ya, i'i aguri Uugaara, i'i amana ta'diila a Masala aya anu kide ya i'i alinggo ada Uugaara anangnga ta'diila a Masala.

<sup>7</sup> Taalo ömö'di öccö ana kaja efe ka 'd'i ma eyi tiya iini, ömö'di ma teyi ma eyi tiya iini taalo.

<sup>8</sup> Üürü angnga kefe ka 'd'i angnga tefe ka 'd'i ka Uugaara, üürü angnga kakaaya angnga takaaya ka Uugaara. Salla angnga sa keefe ka 'd'i alla kaaya angnga, angnga kama Uugaara.

<sup>9</sup> Kudumma Almasiiji ka teyi afiki'dö ka inde amang kini ta Uugaara ma tefe ka 'd'i nya kadu tanno aaya no.

<sup>10</sup> Aminna agu o'o namidhi örre yüüdü? Aminna agu o'o nadaaña örre yüüdü kalama? Angnga no nye'd'de ara angnga ta'dingnge ana ko'do ka Masala kidha in'dili ka uuru ma tahükümü kadu.

<sup>11</sup> Sorne iki,  
"A'a nefe ka 'd'i, Masala miki, nggege,  
Ara kadu nye'd'de saga tüürü kede kidha  
a nagonggo'do nye'd'de saga tafünügү  
Masala ko'do."

<sup>12</sup> Angnga nye'd'de kungngo ara angnga saga ta'dingnge kidha ma Masala angnga takinni eema yaaja ka tüüni co oono.

<sup>13</sup> Aaga fa tasigi ajeene kada nagöre, lakiini aaga aadha ya, aaga fa tanangnga ömö'di öccö ka tamma nya iini ka 'dinggö ka tam'baga.

<sup>14</sup> Nussu a'a namma ka tumma tanno Uugaara Yasu a'da taalo niimö a'da i'i ya nyoro. Üürü i'i iröönö kada nyoro ya, i'i anyoro ana i'i.

## 14

### Tagi'di nya tana türü

<sup>15</sup> Üürü o'o nanangnga örre yüdü ka koroo'bo kudumma eema ma taguri, nggeege taalo o'o naneene a tasaasa ka eedi dhorro. Fa taama örre yüdü kudumma kuri.

<sup>16</sup> Fa tanangnga nüümö ya a'diila ya ka eema tiya toroko ya.

<sup>17</sup> Tauugaara ma Masala taalo kama kuri nja tooye ma ngeeli, lakiini kama fiini tiya dhorro ya nja dhodho nja ta'diila ma Koronggore tiya Insili ya.

<sup>18</sup> Ömö'di ya alinggo ada Almasiihi nggeege ya ara Masala ta'diila nja iini a kadu tamma kini.

<sup>19</sup> Kada kardha ku'bu ka nüümö tiya ara tö'dö a ta'diila ya nja tiya ara tindinaana angnga ku'bu in'dili ya.

<sup>20</sup> Fa taga'da linggo na Masala kudumma kuri, eema in'dili a'diila, lakiini atoroko üdü kagu nüümö ya ara tanangnga ömö'di öccö ka 'dinggö ka tatoroko.

<sup>21</sup> A'diila üdü kara tafa tagu uu'da nafa tooye ngeeli nja nüümö tiya ara tafaga örre yüdü keere katümmü tumma ma Masala ana eedi dhorro ya.

<sup>22</sup> Afa ka tamma ka Masala tanno üdü no ma eyi tiya üdü kidha ma Masala, a'diila nja ömö'di tiya taalo amidhi eema yiini ka kuri ya jji ka'diila ana i'i.

<sup>23</sup> Lakiini ya agu eema kada ri'ba ka oona ya, ara tahükümüdene, üürü i'i aguri kudumma kuri tiya iini taalo ndama tamma. A nüümö ya taalo öö'dö ndama tamma ya, tatoroko.

## 15

### Alinggo nüümö ya kadu kasaasa ya

<sup>1</sup> Angnga na kidhö ka tamma no, kadakidhi oona ku'bu nja kadu tanno agi'di, angnga tafa kanangnga eyi tanno ada.

<sup>2</sup> Kadagüünii eema ya a'diila ya nja kadu na kete kaja no amang kene tümmü tumma ma Masala ta'diila.

<sup>3</sup> Kudumma Almasiihi taalo agasaasa nüümö ma eyi tiya iini, lakiini afa ma sorne ka tiki, "Teelaana ma kadu tanno eele o'o no, ka'dinggö kede ko'do."

<sup>4</sup> Tumma no köö'dö ka sorne ka dhidha, eege kö'dö ma talaana angnga, amang kaja tagambaanya tidhi oona ku'bu angnga takidhö ka nanggeedi.

<sup>5</sup> Fa ka Masala ma tidhi oona ku'bu nja takidhö ka nanggeedi, manangnga angnga kafaana ka oona, a tumma ta unggodho afa taneene na Yasu Almasiihi.

<sup>6</sup> Amang kada tafünögü Masala ko'do Pupa yaaja Yasu Almasiihi ana eedi unggodho a tumma ta unggodho kada.

<sup>7</sup> Aaga amma ka taneene kada unggodho afa ma Almasiihi ka tamma kada, amang kada tö'dö a tidhindhi a Masala.

<sup>8</sup> Ara a'a tiki aaga a'da Yasu Almasiihi alinggo ada Yahüdü amang kini tala a kadu a'da tumma na Masala ka timin'da, a tumma noono ka tageema nja kafaafa no aco ööye miini.

<sup>9</sup> Yungngo a kajeene kara tafünögü Masala ko'do ka 'bangnga meene, afa ma sorne ka takiki a'da,

"Ara a'a tadirina eema a kajeene ma o'o, nara tüwe tüüsü na afünögü eere yüdü ko'do."

<sup>10</sup> A sorne tiki afe'de,  
"Aaga dhodho aaga no kajeene no nja kadu tanno Masala."

<sup>11</sup> Afe'de,  
"Aaga üwe ata tüüsü a Masala aaga no kajeene no nye'de  
a kadu nye'de kungngo tindhigü oogo ko'do."

<sup>12</sup> Asaiya tiki,  
"Bereere ya Yessi ara tö'dö  
a tauugaara ma kajeene i'i yungngo a kajeene kara tindhigü i'i."

<sup>13</sup> Fa ka Masala ma tadigi dhodho nja ta'diila küdü ka oona, amang küdü tadigi a tindhigü ma türü tanno Koronggore tiya Insili ya.

### Lingga na Bölis nja kajeene

<sup>14</sup> A'a ka eyi tiya eede nagöre eede, namma a'a nussu a'da kadigine aaga, aaga ta'diila aaga tussu eema dhabbu aaga tasumunaana ka tala ajeene dhadha.

<sup>15</sup> Lakiini a'a nakuru rüsü dhorro nadarigiri ada aaga ligeema könö aaga amang kada tussu iini, ka türü tanno Masala ka anangnga a'a no.

<sup>16</sup> Amang kede talingga ada Yasu Almasiihi ka üdü ma kajeene nadünnü tumma na Masala kada ta'boge amang ka Masala tamma ka türri tanno kajeene ka tinsili a Koronggore tiya Insili ya.

<sup>17</sup> Nabbü a'a 'daniüsö kudumma eede ka talingga ada Yasu Almasiihi ana eere ma Masala.

<sup>18</sup> Taalo a'a nara takuru rüsü ma teema tumma ma nüümö, illi nüümö ya Almasiihi ka tanangnga a'a ka tagüünii, meede ka talaana kajeene ka tamma ka Masala, a tumma ma nüön nja linggo.

<sup>19</sup> A türü ma linggo keefe nja türü ma nüüsö tanno Masala nja türü ma Koronggore tiya Insili ya ndama Örsalim nja

na'buugu tanno kete kono no kara co Alirikon, nageema a'a tumma ma Ìnjìlli ma Almasiihi nye'd'de.

<sup>20</sup> Tasaasa ma eede tiya eede 'bucca a'da neema tumma ma Ìnjìlli ka na'buugu tanno Almasiihi katitalo ussudene kide no, ii'di a'a tarü'bünü ka kadese tanno ömö'di könö.

<sup>21</sup> Lakiini afa ma Sorne ka tiki,  
"Kadu na ömö'di ka titalo agadünügü tumma miini co eene no kara sa kijöögö,  
a kadu no taalo kaföönyö tumma miini no kara saga tussu."

<sup>22</sup> I'i yungngo afaga a'a keere 'bucca kungngo köö'dö kada kanna.

### Bölis asaasa co Rööma

<sup>23</sup> A 'bitingngö taalo füñi ma linggo kede ka naanya tanno afe'de, nasaasa a'a tö'dö tassa kada kanna a nagürüünü kadhabbu, <sup>24</sup> kede kara co Aspaniya ya ara a'a tadigaala kada kanna, kudumma eede ka asasaasa tassa kada, amang kada tamünügü a'a ko'do ma co kanna kede kara tagünü njia aaga idhilli.

<sup>25</sup> A'a 'bitingngö ara a'a co Örsaliim ma co talinggo ada a kadu ma kaniisa kide.

<sup>26</sup> Kudumma kadu ma Makadoniya nja Akaiya kadüünü ta'diila, kakonsaana gürüüsü koona ma tungu co kadu ma kaniisa ka Örsaliim no, eema katitalo kene no.

<sup>27</sup> Eege kagüümü ta'diila nggeege, a'diila nja eene, kudumma kajeene ka'duga baraka ma Ìnjìlli ka Yahüüdü, nggeege fa ka kajeene kamana eema ma tefe ka 'di tiya eene kene kara tasaasa.

<sup>28</sup> Kede ka ndatüümö linggo ya, nanangnga eema ya miini ya eene ya, nassa adigaala kada kanna ma tra co Aspaniya.

<sup>29</sup> Nussu a'a a'da kede kara tala aaga kanna ya, ara a'a tö'dö ka tigi ana baraka ma tumma tanno Almasiihi.

<sup>30</sup> Níkiri a'a ka tiki aaga nagöre eede ana eere ma Uugaara tiya aja Yasu Almasiihi nja tasaasa ma Korongore aaga fara ka Masala nja a'a kudumma a'a,

<sup>31</sup> Afara ka Masala kudumma ma a'a, amang kede toolonadene ka iisine ma kadu tanno anu ka tumma ma Masala ka Yahüüdiya no, afara ka Masala amang ka kadu ma kaniisa ka Örsaliim kamma ka linggo tanno eede.

<sup>32</sup> Nggeege üürü tasaasa ma eedi tiya Masala ya, ara a'a tö'dö kada kanna a dhodho angnga in'dili ta 'deema.

<sup>33</sup> A Masala ma ta'diila taneene nja aaga nye'd'de kungngo. Amiin.

### 16

#### Bölis ööjülu kateefe miini

<sup>1</sup> A'a nageema tumma ma inye ma angnga tammo Feebi mo, aka ma linggo ma kaniisa ma Kankariya.

<sup>2</sup> Aaga tamma kono ana eere ma Uugaara Yasu afa ma nagöre tanno aja no ma kaniisa no kungngo, aaga anangnga eema yoono ka tasaasa kada ya oono, kudumma oono ka takinyi kadu kadhabbu nja a'a afe'de.

<sup>3</sup> Aaga ööjülu Akilla nja Berskilla eege na linggo linggo ma Yasu Almasiihi nja a'a no.

<sup>4</sup> Kadu no ümmünü nanggeyi neene ka inde kudumma a'a, taalo a'a unggodho a'a nanangnga ta'diila eene, lakiini nakaniisa ma kajeene na amma ka Masala no nye'd'e afe'de kungngo.

<sup>5</sup> Aaga ööjülu kaniisa meene ka 'dii mo.

Aaga ööjülu tata'diila yeede Abintus, i'i ya ömö'di ya amma ka Almasiihi ka Asiya ka dhidha.

<sup>6</sup> Aaga ööjülu Maryom magadhügürü dhabbu kudumma angnga mo.

<sup>7</sup> Aaga ööjülu Antrunikos nja Yunias ya siliga ma a'a ya anna ka pabuuus nja a'a ya, na ussudene ka kadaffüni ka söödö no, na illi ka töö'dö ka Almasiihi kede kidha no.

<sup>8</sup> Aaga ööjülu Amblyatos teefe ma a'a ka linggo ma Masala ya.

<sup>9</sup> Aaga ööjülu Orbanus ya linggo nja angnga ka Almasiihi ya.

Aaga ööjülu Istakis ya teefe ma a'a ya.

<sup>10</sup> Aaga ööjülu Ablus ya kardha ku'bu ka linggo ma Almasiihi ya.

Aaga ööjülu kadu ma 'dii tiya Artibolis.

<sup>11</sup> Aaga ööjülu Herotion ya siliga ma a'a ya.

Aaga ööjülu kadu ma 'dii tiya Narikisos na amma ka Masala no.

<sup>12</sup> Aaga ööjülu Trifina nja Trifosa na dhügürü ka linggo ma Masala no.

Aaga ööjülu Bersis ma 'diila mo, madhügürü dhabbu ka linggo ma Masala.

<sup>13</sup> Aaga ööjülu Rüfas ya Masala ka tagesse i'i ma linggo tanno ya ja nüümö tammo iini a'da ma nüümö kede afe'de.

<sup>14</sup> Aaga ööjülu Asinkeritos nja Fligon nja Hürmüs nja Bitrubas nja Hermas nja nagöre tanno aja na aneene nja eene no.

<sup>15</sup> Aaga ööjülu Filolokos nja Juliya nja Nerios nja inye, nja Olimbas nja kadu ma kaniisa tanno eene.

<sup>16</sup> Aaga tööjülu tööjülu na 'diila no, nakaniisa na Almasiihi kööjülu aaga nye'd'de kungngo.

<sup>17</sup> Nagöre eede, ara a'a tadirina tumma aaga dhorro, aaga adinö ko'do ma kadu tanno aga'da taneene kaparsaana kadu

ku'bu no, a tumma kambanajaana ku'bu a talaana tanno ada ka taföönyö kede no, aaga aadha eene ka oona.

<sup>18</sup> Kadu afa ma tanno miini no taalo kalinggo ada Almasiihi Uugaara yaaja, kuri yungngo eene kasaasa sugi a tumma tanno a'diila katid'no, küsini kadu.

<sup>19</sup> Taalo ömö'di ma titalo ussu tiicolo ka nanggeedi naada ka Masala, i'i yungngo eede ka tadhodho ana aaga, lakiini a'a nasaasa a'da aaga ta'dara ma eema tiya a'diila ya, aaga tagu'b'ba ka eema tiya toroko ya ku'bu.

<sup>20</sup> A Masala ma'diila mara tanangnga aaga kasiraana ka Ebliisi ana uune, fa ka türü tanno Uugaara tiya aja Yasu Almasiihi kaneene nja aaga, Amiin.

<sup>21</sup> Timosaws ya alinggo nja a'a ya ööjülu aaga, agasiliga ma a'a no, Lokios nja Yason nja Sosibatros kööjülu aaga.

<sup>22</sup> A'a na Tertios narigiri waraga ya, a'a nööjülu aaga ana eere ma Masala.

<sup>23</sup> A Kayos ööjülu aaga, ya üüni tatafala ana a'a nja kadu ma kaniisa in'dili ya.

Arastus ööjülu aaga ya ümmü gürüüsü ma anya afa kide ya, örre ma angnga Kawartis ööjülu aaga.

<sup>24</sup> Türü na uugaara tiya aja Yasu Almasiihi kaneene nja aaga in'dili kungno, Amiin.

<sup>25</sup> Kada kafünügü Masala ko'do, mana türü ma tanangnga aaga katidhi oona ku'bu ka tumma tanno oono neede ka tadünnü nümmüneene ana eere ma Yasu Almasiihi ma tumma tanno nussudene 'bitüngngö no kaküdhü jiddi ma 'billi no.

<sup>26</sup> Lakiini kadele oona 'bitüngngö ya nagane'bi ka tarigiri a kadu nye'd'de tussu i'i, afa Masala ka takiki ma 'billi amang kene taföönyö kamma.

<sup>27</sup> Angnga tafünügü Masala mo ussu eema ma unggodho oogo mo, ana Yasu Almasiihi ta'billi. Amiin.

## Waraga ya Bölis ma co Kürünsüs ya Dhidha ya Tafa'da tumma

Bölis ya tafiiñi ya arigiri ada waraga ya a kadu ma kaniisa ka Kürünsüs anya ma dhabbu ka Yünan mo. Bölis agadünüğü eema kadu ka Kürünsüs ana ürüñü unggodho a dhüdümü miini kadu tamma ka Yasu kadhabbu (Tafiiñi 18). Lakiini ka Bölis kanda unggenee ka Kürünsüs a tagoroo'bo tabbü 'dala ka kadu ma kaniisa ka teene kanna, ikiři ka rigiri waraga ya ma kakki'di tumma no ku'bu.

Ka waraga tiya Bölis, ageema iki a'da atoroko ka kadu ma kaniisa kasümünaana oona ku'bu, aya ta'digineene nja tööje (1 Kürünsüs 1—4). Eelanaga kadu könö kudumma eene ka talinggo eema ya toroko ya afa kadu na taalo kussu Masala no (1 Kürünsüs 5—6). I'i alaana eege ka taneeene ma kadu ma kaniisa kaneene nja iiya tanno eene nya, nyuri nja kadu ma 'di tiya iini (1 Kürünsüs 7). Please translate this into Katcha: He gives them advice about living as Christians among people who worship other gods (1 Kürünsüs 8—10). Eema nja eene amang kene tümmü Masala kene kara kene temmi ka 'buugu unggodho. Eema nja eene ma Koronggore ya Insili ya ka amana eema angnga, angnga taganeene afa kadu ma kaniisa. (1 Kürünsüs 10.14). Afada adirina tumma eene kudumma Almasiihi afiki'dö ka inde, ussu a'da Masala mara tanangnga aaga kafe ka 'di afe'de (1 Kürünsüs 15).

### Tafara ka Masala nja tamana ta'diila

<sup>1</sup> A'a na Bölis, ya ana eere a'da tafiiñi ya Yasu Almasiihi a tamma ma eedi tiya Masala, a'a narigiri waraga ya nja örre tiya aja Sustanis.

<sup>2</sup> Nunggu co kadu tanno amma ka Masala no ka anya ma Kürünsüs, na Masala ka anangnga eege ka tinsili ana eere tiya Yasu Almasiihi madagümümüñü eege kada kadu tanno insili no nja kadu tanno oono ka tümmüñü eege ka na'buugu 'do ana eere ma Uugaara tiya aja Yasu Almasiihi, Uugaara yeene nja angnga.

<sup>3</sup> A türü nja ta'diila tanno Masala Pupa yaaja nja Uugaara Yasu Almasiihi taneeene nja aaga.

### Tamana ta'diila

<sup>4</sup> A'a namana ta'diila a Masala turi kudumma a türü tanno oono ka anangnga aaga ana Yasu Almasiihi no.

<sup>5</sup> Aaga tana türü miini ma eema nye'de, ka tussu ma eema nja tumma.

<sup>6</sup> Afa ma tumma tanno Yasu ka tüütü kada ka nanggeedi.

<sup>7</sup> Kudumma ada taalo aaga kütü ka teene a'da taalo tumma ma türü tanno Masala kada katindögü tö'dö na Uugaara Yasu Almasiihi.

<sup>8</sup> I'i yungngó afa kada dhindho amang kada tidhi oona ku'bu ta'billi a nüümö ya toroko ya titalo kada ka oona ka uuru tanno Uugaara tiya aja Yasu Almasiihi.

<sup>9</sup> Masala magümmünü aaga a'da aaga tosse ka tugreene nja 'Bii'bala tiya oono Yasu Almasiihi Uugaara yaaja, Masala oogo madho ka fiini.

### Kadu ma kaniisa kasümüñü njaana ku'bu

<sup>10</sup> A'a nasaasa aaga nagöre eede ana eere tiya Uugaara tiya aja Yasu Almasiihi aaga teema tumma ka unggodho aaga tafa tasümüñü njaana ku'bu, lakiini aaga ta unggodho aaga nye'de kungngo, a tumma naada ta unggodho ka üüdü nja koronggore.

<sup>11</sup> Nagöre eede, kadu ma 'di tiya Kalwa tiya ka tadünüğü tumma ma aaga a'a, a'da tagoroo'bo kungngo ada ka söödö.

<sup>12</sup> A'a nasaasa tiki a'da ömö'di könö ana kada iki a'da, "A'a nuurna Bölis," aya tiki a'da, "A'a nuurna Apölös," aya tiki, "A'a nuurna Bütrüs," aya tiki, "A'a nuurna Almasiihi."

<sup>13</sup> Almasiihi 'dee asümüñü njaana ku'bu? Bölis 'dee kabünnü kadu i'i ka salii'bi ka üüdü ma aaga? Alla kakambeesedene aaga ana eere tiya Bölis?

<sup>14</sup> Nanangnga a'a ta'diila a Masala kudumma eede taalo a'a nakambeese ömö'di ana kada illi Krisbus nja Kayos.

<sup>15</sup> Taalo ömö'di könö ara tiki a'da aaga kakambeesedene ana eere tiya eede.

<sup>16</sup> (İi, a'a nakambeese kadu ma 'di tiya Ishtifanüüs afe'de, na a'a taalo nagüñi tumma eede ka takambeese ömö'di könö afe'de.)

<sup>17</sup> Kudumma Almasiihi taalo agürünü a'a ka öö'dö tambeese, lakiini nöö'dö talaana kadu ka tumma ma İnjili, taalo a tumma ma ta'dara ma tadü'dü'dü i'i salii'bi ya Almasiihi ta nüümö ün'dügüngö.

### Almasiihi a türü nja ta'dara ma Masala

<sup>18</sup> Kudumma tumma ma salii'bi ka kadu tanno aama no taa'baga, lakiini angnga tanno ololonadene a türü ma Masala eege kamiini.

<sup>19</sup> Kudumma sorne ka tiki, "Ara a'a taga'da ta'dara na kadu tanno a'dara no,

naga'da ta'dara ma kadu tanno ussu eema no."

<sup>20</sup> Ömö'dü ya a'dara ya iïye? Ömö'dü ya ussu eema ya iïye? Ömö'dü ma tindinaana tumma ma 'bitingngö ya iïye? Taalo Masala manangnga ta'dara ma 'büdhü'lü kada nagaaga?

<sup>21</sup> Kara tussu Masala a ta'dara, Masala masaasa kadu koolonadene ka tam'baga ma teema tumma ma İnjüllü.

<sup>22</sup> Kudumma Yahüdüdü kasaasa türü ma tale'bele eema, a kadu ma Yünan tasaasa tussu eema,

<sup>23</sup> lakiini ungnogo keema tumma ma Almasiihi tiya abünnünja ka salii'bi ya, a tumma ma takara ka Yahüdüdü kidha a tam'baga a kadu ma Yünan.

<sup>24</sup> Lakiini Yahüdüdü nja kadu ma Yünan na Masala ka tagümmünü egee no, Almasiihi a türü nja ta'dara tanno Masala.

<sup>25</sup> Taa'baga na Masala ka kii'bi ta'dara ma ömö'dü, a tagi'di na Masala ka kii'bi türü ma ömö'dü.

<sup>26</sup> Nagöre eede, aaga küggi ya ada ka tagümmünüdene ya. Taalo kadu in'dili ana kada kaga'dara a tussu eema ta ömö'dü, taalo kadu kadhabbu kagaana türü, taalo kadu kadhabbu kageenedene ndama kadu tanno iïfi ka anya.

<sup>27</sup> Lakiini Masala magesse eema ya na-gaaga ma 'büdhü'lü ma tamana modolo ka kadu tanno afara ka ta'dara no ka oona, Masala tagesse kadu ma 'büdhü'lü na ki'di no, ma tamana modolo ka kadu tanno ana türü no ka oona.

<sup>28</sup> Masala magesse kadu na midhidene ka 'büdhü'lü no, nja tanno a kadu kaanu kene no, nja tanno kadu taalo kümmünü egee kada dhorro no, amang kono taga'de eema ya kadu ka tümmöönö kada eema dhorro ya.

<sup>29</sup> Amang ka ömö'dü tafa ta'diniga oona niini coo'do kidha ma Masala.

<sup>30</sup> Kudumma türü noono asa aaga ta kadu tanno Yasu Almasiihi, i'i ya tussu eema na Masala a ta'diila a tinsili miini nja toolona.

<sup>31</sup> Afa ma sorne ma Masala ka tiki, "Ömö'dü ya abbü 'daniüsö ya fa kini abbü 'daniüsö a Uugaara."

## 2

<sup>1</sup> A kede ka öö'dö kada nagöre eede, taalo a'a nagöö'dö a tumma tanno ad-habbu nja tumma ma ta'dara ma teemaga tumma ma Masala na küdhü no co aaga.

<sup>2</sup> Taalo a'a nümmü tumma ma tussu nüümö öccö kede ka taganeene nja aaga illi Yasu Almasiihi ya abünnünja ka salii'bi ya.

<sup>3</sup> Nö'dö a'a kada ka tagi'di nari'ba na'deedene ka oona.

<sup>4</sup> A tumma neede nja talaana tanno eede taalo ka tumma ma ta'dara nja tumma ta'bunu kadu kide, lakiini a talaala ma türü tanno Koronggore.

<sup>5</sup> Amang kada tamma ka Masala tanno ada taalo tumma ma ta'dara ma tadü'ddü, lakiini a türü ma Masala.

### Ta'dara na Masala

<sup>6</sup> Ungngo 'do keema ungnogo tumma ma ta'dara ka kadu tanno ussu eema no ka söödö, lakiini taalo ta'dara ma ürüünü tiya ma naguugaara ma ürüünü tiya ara titaaloya.

<sup>7</sup> Lakiini ungnogo keema ta'dara na Masala na küdhü no, ta'dara na kaküdhü tafinna ma 'billi na Masala ka takindinaana ku'bu ma 'billi ma türü tanno aja.

<sup>8</sup> Taalo naguugaara ma nagürüünü tiya kussu, kene ka tussu taalo kara takabünnü Uugaara ya idhindü ya ka salii'bi.

<sup>9</sup> Lakiini afa ma sorne ka tiki,  
"Nüümö ya ööye ka titaaloi ijöögö  
a neeso taalo kaföönyö ya, taalo eedi  
ma tussu

a tadü'ddü taalo ussu Masala  
makindinaana ka kadu tanno kasaasa  
oogo no ku'bu."

<sup>10</sup> Lakiini Masala mala angnga a Koronggore tiya oono, kudumma a Koronggore awwa eema nye'd'e de kadara co eedi tiya Masala.

<sup>11</sup> Mada i'i ya ussu eedi ya tadü'ddü nggege, illi koronggore ya tadü'ddü. Taalo ömö'dü öccö ma tussu eedi ya Masala illi Koronggore ya Masala.

<sup>12</sup> Taalo angnga ka'duga koronggore ma 'büdhü'lü tiya, lakiini ka'duga angnga Koronggore ya Masala ka kürünü i'i ya, amang kaja tussu eema ya Masala ka anangnga angnya ya a'da taalo faana kide.

<sup>13</sup> Ungngo taalo keema tumma ma talaana ma ta'dara ma kadi'ddü, lakiini tumma ma talaana na Koronggore tiya Insili ya, ungnogo tadünnü tumma ma timin'da ma Koronggore ka tumma ma koronggore.

<sup>14</sup> Ömö'dü ya taalo ana koronggore ya, taalo atamma ka tumma tanno Koronggore ma Masala, kudumma iini ka tümmöönö kada taa'baga, taalo ara tam-baanya tussu egee, kudumma eene kada tumma tanno koronggore.

<sup>15</sup> Lakiini ömö'dü ma koronggore ka oona ya, i'i yungno a tümmü kadu ka eema nye'd'e, lakiini i'i ka eyi tiya iini taalo ömö'dü ma tümmü i'i.

<sup>16</sup> Sorne iki,

"Mada i'i yungngo ussu üüdü ya Uugaara  
ma talaana i'i?"

Lakiini tümmü üüdü na Almasiihi  
kungngo aja.

### 3

#### *Kadu ma linggo na Masala*

<sup>1</sup> Lakiini nagöre eede, taalo a'a nara  
tambaanya teema nja aaga kada kadu ma  
nagoronggore, lakiini kada tadü'dü'nja  
laala tiya idhiidhi ya ka Almasiihi.

<sup>2</sup> Namana a'a siiga aaga taalo kuri  
ya kidhö ya, kudumma ada taalo  
kakam'baanya kuri miini, a 'bitüngngö  
taalo aaga kam'baanya.

<sup>3</sup> Kaleefe aaga ta kadu ma 'büdhüü,  
aaga takirimi' nja tanu oona ka oona  
nja tasümünü njanaa ku'bu tanno kadu  
ka söödö, taalo aaga ka kadu ma  
'büdhüü? Aaga taalo kaneene taneene  
ma kadü'dü?

<sup>4</sup> Ka ömö'dü töccö ana kada ka tiki  
a'da, "A'a tuurna Bölis," aya tiki, "A'a  
tuurna Apölös," taalo aaga ka kadu  
ün'dügüngngö?

<sup>5</sup> Mada i'i yungngo Apölös? A mada  
i'i yungngo a Bölis? Kadu ma linggo  
no nangnga aaga ka tümmü tumma ma  
Masala eege kamiini afa ma Uugaara ka  
tasümünaana linggo eene ku'bu.

<sup>6</sup> A'a nakodho oogo, Apölös tagünü 'bïidü  
kide, lakiini Masala oogo mungngo minggi-  
raana.

<sup>7</sup> Ömö'dü ya akodho oogo ya nja tiya  
agünü 'bïidü kide ya taalo a nüümö, Masala  
oogo minggiraana.

<sup>8</sup> Ömö'dü ya akodho oogo ya nja tiya  
agünü 'bïidü kide ya ka unggodho, lakiini  
eege kama faana ma dhügürü tiya eene.

<sup>9</sup> Ungngo kosso ka linggo nja Masala,  
aaga ka siga tanno Masala nja tarü'böönö  
tanno oono.

<sup>10</sup> Afa ma türü tanna Masala ka  
anangnga no kungngo nagesse a'a kadesse  
ku'bu kada, tatarü'böönö ya ussu ka  
arü'böönö ya, ömö'dü öccö tarü'bünü kide  
afe'de, lakiini fa ka ömö'dü könö iiröönö  
ara tarü'böönö nya?

<sup>11</sup> Taalo ömö'dü ma tambaanya  
tanangnga kadesse ku'bu illi ömö'dü ya illi  
ka anangnga ku'bu ya illi Yasu Almasiihi.

<sup>12</sup> Lakiini üürü ömö'dü ara tarü'bünü ka  
kadesse tanno ana dahaba nja fudda nja  
nduguri nja kee'di nja ooyo nja kaforo.

<sup>13</sup> Ara linggo niini saga tussu adene,  
kudumma uuru kara sa köö'dö ana eege ka  
töyeene kara sa köö'dö ana issi, issi saga  
türi ta'dilla ma linggo tanno ömö'dü.

<sup>14</sup> Üürü tarü'böönö niini ka talingga no  
kütü ya, i'i ara ta'duga talinggae niini.

<sup>15</sup> A ömö'dü ya linggo tanno iini ka  
talingga no ka tafinne, taalo ara taluna  
faana yiini, lakiini i'i ara toolonadene afa  
miini ka tigaala ka issi kungngo.

<sup>16</sup> Aaga ka eyi tiya ada taalo kussu a'da  
aaga ka la ma Masala, a Koronggore ya  
Masala ungno ada ka oona?

<sup>17</sup> Ömö'dü ya aga'da la ma Masala ya, ara  
Masala taga'da i'i, kudumma la ma Masala  
ka tinsili, aaga ka eyi tiya ada la ma Masala  
aaga kungngo ka la ma Masala tiya miini  
ya.

<sup>18</sup> Aaga fa tüsinii nanggeyi naada.  
Ömö'dü öccö kara tümmü eyi yiini ka  
ta'dara ka 'büdhüü tiya, fa kiri a'baga  
amang kini ta'dara.

<sup>19</sup> Kudumma ta'dara ma 'büdhüü tiya a  
taa'baga a Masala, kudumma sorne ka tiki,  
"Masala mümmü kadu na 'dara no ana  
ünggü tammo eene."

<sup>20</sup> Iki sorne afe'de, "Uugaara ussu  
nanggeedi na kadu tanno 'dara no,  
ka tumma ün'dügüngngö."

<sup>21</sup> Ömö'dü tafa tabbü 'daniüsö ana ömö'dü,  
kudumma eema nye'de ata yaada.

<sup>22</sup> Bölis üürü Apölös üürü Bütrüs üürü  
'büdhüü üürü tefe ka 'dü üürü inde nja iini  
ka teema ma 'bitüngngö nja tiya unggunu  
tö'dö ya, eema ya nye'de yaada,

<sup>23</sup> lakiini aaga ka kadu tanno Almasiihi,  
Almasiihi i'i ya Masala.

### 4

#### *Kadafünii na Almasiihi*

<sup>1</sup> Fa ka kadu kümmü angnga kada  
kadu ma linggo tanno Almasiihi, unggno  
kungngo kümmü tumma na Masala na  
dhorro na küdhü no unggno tafa kide.

<sup>2</sup> Nüümö ya asasadene ka kadu tanno  
ümmü tumma na Almasiihi dhorro a'da  
kaduna ömö'dü ya afa ka eema dhorro ya.

<sup>3</sup> Taalo agu'du a'a ka oona 'do a'da aaga  
kara tümmü a'a, üürü kadu ma 'büdhüü  
köönö kara tümmü a'a, dhorro taalo a'a  
nara tümmü eyi yeede.

<sup>4</sup> Taalo eedi yeede a'doore ma nüümö,  
lakiini taalo a'a nara tiki a'da ninsili a'a,  
kudumma Uugaara oogo mungngo mara  
tümmü a'a.

<sup>5</sup> Nggeege aaga fa tapügü tumma ka  
ömö'dü ka oona a'da küfürü uuru miini  
tö'dö, aaga öödhü ara Uugaara ka öö'dö.  
Ara sa köö'dö a nüümö tiya küdhü ka  
'buugu tiya lüllü ya öö'dö iini ka töyeene  
adhere tumma ma nanggeedi tanno kadu  
ko'do. Ka uuru tanno miini no ara

ömö'di saga a'duga tafünügünja ko'do ni-ni ndama Masala.

<sup>6</sup> Nagöre eede, nanangnga a'a eyi yeede ka linggo tanno, a'a nya Apölös kudumma aaga, amang kada tussu teema tumma miini, "Aaga fa takiki iïye co ku'b'ba aaga tadheedhe ka tumma tanno ka sorne no ko'do." Ömö'di könö tafa tabbü 'daniüsö ana ömö'di könö, ara aaga kafa ka könö.

<sup>7</sup> Mada i'i yungngó anangngá o'o ka tambananjaana ku'bu nya kadu? Taalo Masala oogo mungngó manangngá eema ya o'o nye'd'de? Aminna agu o'o nabbbü 'daniüsö afa taalo o'o na'duga adha?

<sup>8</sup> Asa aaga tüüsü, aaga tana eema, asa aaga ta naguugaara, aaga tafa kidi, kasaasa ungngó a'da aaga ta naguugaara dhorro amang kidi tosso ka tauugaara nya aaga.

<sup>9</sup> Niji a'a a'da Masala manangngá ungngó kada kadafiní tanno ka kadu keere afa maaja ka tümmününja ka inde 'biiñi kungngó, kudumma iïdi ka tümmünü eyi yiidü ka kadu ma modolo ku'bu nya kadhangga nya kadu.

<sup>10</sup> Kanagaaga ungngó ka üüdü ma Almasiihi, aaga ta'dara ka Almasiihi, ungngó tagi'di aaga tana türü. Kadu kündhigü aaga ko'do, kadaana ungngó kalamä.

<sup>11</sup> Ta'bütängngö aleefe iire tagu ungngó nya tenege, en'di titaalo kidi ka oona, ungngó tabbü adene, a nöö'di titaalo kidi ma tanna kide.

<sup>12</sup> Ungngó tadhügürü a linggo ana iisine tanno iïdi. A kadu talingga ungngó, ungngó tanangngá baraka eene, illi ungngó kütü ka tambaanya a tidhi oona ku'bu.

<sup>13</sup> Kamidhi ungngó illi ungngó ka kï'döönö, ungngó tafeene nya kadu tanno nyoro ka 'büdhülü, a kadu ma 'büdhülü tanu kidi.

<sup>14</sup> Taalo a'a narigiri tumma no a'da nangngá modolo kagu aaga, lakiini a'a nalaana aaga kada laala tiya eede ka asasa eege ya.

<sup>15</sup> Üürü katalaana kungngó ada kö'dö na alif kada'baaga ka Almasiihi, taalo kupupa naada kadhabbu ka Almasiihi Yasu, a tumma ma İnjülli tanno eede köö'dö iini aaga no.

<sup>16</sup> I'i yungngó eede ka asasa a'da aaga takinya a'a.

<sup>17</sup> Tumma no eege kungngó eede ka kürünü Timosaws, kada 'bii'bala tiya eede ka asasa i'i dhorro ya kidha ma Uugaara. I'i yungngó ara tadirina linggo neede nya taneene tanno eede aaga ka Almasiihi, afa ma tiya eede ka talaana kadu ka nakaniisa ka na'buugu koona nye'd'de kungngó.

<sup>18</sup> Kadu könö ana kada ka'diniga oona coo'do, kudumma eene kiki kide a'da taalo a'a nara tö'dö kada.

<sup>19</sup> Lakiini ara a'a tö'dö kada kanna areere ka Uugaara ka nüüsö, ara a'a tö'dö tussu nüümö ya nagaaga tanno 'dinigi oona coo'do kadeema no, lakiini nasaasa a'a tussu türü neene.

<sup>20</sup> Lakiini tauugaara na Masala taalo a tumma lakiini a türü.

<sup>21</sup> Öjö i'i yungngó ada kasaasa? Nöö'dö kada a tama'daka alla a koronggore ma tasaasa nya ta'dila?

## 5

### Temelö

<sup>1</sup> Tumma ka nyala ku'bu 'do a'da temelö kungngó ada ka söödö, temelö afa ma tanno kitaalo ka kadu na taalo kussu Masala no, ömö'di könö afüngngö nya aka tammo pupa tiya iini.

<sup>2</sup> Aaga tüü kabbü na'dugiisine aaga ta'diniga oona coo'do! Taalo a'diila ada kara tafara amang kada tasoro ömö'di ya alinggo eema afa ma tiya kada ka söödö?

<sup>3</sup> Salla a'a saga titaalo a tuu'da, lakiini a'a nungngó ada ka söödö a koronggore nagümmü a'a ömö'di ya kalinggo tumma no afa a'a nungngó kada ka söödö.

<sup>4</sup> Kada kara temmi, a'a tanna kada ka söödö a koronggore ana eere tiya Uugaara Yasu a'a taneene nya aaga a koronggore nya türü tanno Uugaara tiya aja Yasu kungngó aja.

<sup>5</sup> Aaga ümmünü ömö'di ya a Ebliisi, amang ka tuu'da tanno iimi taama, a koronggore yiini toolonadene ka uuru tanno Uugaara.

<sup>6</sup> Tabbü na'dugiisine naada taalo ka'diila, taalo aaga kussu a'da 'bandigüüdi afa tanangngá elö ka tüüfö nye'd'de kungngó?

<sup>7</sup> Aaga dhifigi tigüüdi ma illi mo co, amang kada ta kadu tanno issi nya tanno insili no a'da taalo tigüüdi kide, afa ma aaga 'bitängngö. Kudumma Almasiihi i'i ya dhünggü ma Taanyara ma Tada'da, agatendhe ka üüdü ma angngá.

<sup>8</sup> Kada afa ka taanyara, lakiini taalo a tigüüdi tanno illi mo, ma toroko nya tam'baga, lakiini a tefe ka 'dii tammo issi no, ya a'diila nya timin'da.

<sup>9</sup> Narigiri ada a'a aaga ka waraga tiya eede, a'da aaga tafa taneene nya kadu tanno atemelö no.

<sup>10</sup> Taalo a'a niki a'da kadu ma 'büdhülü tiya na katemelö no allogo no, kanyoro, kanyoro, alla kümmü eema ma namasala. Üürü nggeege ara aaga tagöö'dö küröndama kadu ma 'büdhülü.

<sup>11</sup> Lakiini 'bitingngö a'a narigiri waraga aaga a'da aaga tafa taneene nja ömö'di tiya iki a'da i'i ya örre, assa ka fungngö ana iiya alingga eema ya toroko ya nja tiya ümmü eema ma namasala ya nja teelaana ma kadu nja take ka ngeeli nja tiya anyoro ya, ömö'di afa ma tiya miini ya aaga fa temmi nja iini ma tagu eema.

<sup>12</sup> Taalo a'a nama tümmü kadu na taalo kama kaniisa no? Taalo aaga kungngö kara tümmü kadu na ka teene miini no?

<sup>13</sup> Kudumma kadu tanno kürö miini no, ara Masala tümmü eege, "Aaga asoro ömö'di ya toroko ya kada ka söödö."

## 6

### Tasigi kadu ma kaniisa

<sup>1</sup> Üürü nüümö ungngo ömö'di tököön ana kada nja tööje ara tana rüsü ma co tasigi i'i kidha ma kadu tanno taalo kussu Masala no nya, lakiini i'i adha ya ara co tasigi kidha ma kadu tanno insili no?

<sup>2</sup> Taalo aaga kussu a'da kadu na insili no eege kungngö kara tümmü kadu ma 'büdhülü? A kada kara tümmü kadu ma 'büdhülü 'dee, taalo aaga kara tambaanya tümmü nüümö ya dhilli ya?

<sup>3</sup> Taalo aaga kussu a'da ara angnga tahükümü kadhangga? Üürü ara angnga tahükümü kadhangga dee, ara angnga tagambaanya ma tahükümü eema ma 'büdhülü tiya.

<sup>4</sup> Üürü tumma kungngö ada ka söödö ma eema afa ma tiya, aaga emmi nja kadu ma kaniisa salla na kadu ka titaalo kümmü eege ka ta'dara no ka kaniisa no.

<sup>5</sup> A' nadirina tumma no aaga amang ka modolo tagu aaga. Taalo ömö'di ya 'dara ya ka tambaanya tindinaana tumma ka kadu ku'bu kada nagöre?

<sup>6</sup> Lakiini agala ömö'di ka 'duga örre yiini aco tasigi i'i kidha ma kadu tanno taalo kamma ka Masala no.

<sup>7</sup> Tumma dhorro aaga tasigi ajeene ka nanggeyi tanno ada, afeene afa aaga ka ki'di 'do taalo a'diila ada katidhi oona ku'bu ka tüüninja ku'bu. A'diila ada kara tamma kada nyoorodene?

<sup>8</sup> Lakiini aaga ka eyi tiya ada kagalaa aaga ka tüünä ada kadu naada ku'bu, aaga tanyoro nagöre naada.

<sup>9</sup> Taalo aaga kussu a'da kadu na üünä ada aaga ku'bu no taalo kara takarna ka tauugaara ma Masala? Aaga fa tüüsini nanggeyi naada, alla ka temelö nja kadu tanno ümmü masala ma 'büdhülü no nja kadu tanno oroko no nja nagiide tanno temelö no, nja nageldo,

<sup>10</sup> alla kanyooro no nja tanno allogo no nja tanno ake ka ngeeli no nja tanno eela kadu no nja tanno arumuru eema ka kadu no, taalo kara co ka tauugaara tanno Masala.

<sup>11</sup> Kadu könö ana kada kütü kafeene nggeege, lakiini aaga katanggala, aaga tinsili eema ya titaalo ada ka oona ana eere ma Uugaara Yasu Almasiihi, a Koronggore ma Masala tammo aja.

### Temelö na toroko no

<sup>12</sup> "Eema nye'de a'dila nja a'a," lakiini taalo eema nye'de adho ka fiin. "Eema nye'de a'dila ana a'a," lakiini taalo a'a nara tafa ka nüümö üünä tadasaga ana a'a.

<sup>13</sup> "Kuri ama eedi, eedi ama kuri," lakiini Masala oogo mungngö mara taga'da eege in'dili kudumma tuu'da taalo kama ma eema ya toroko ya, lakiini eege ama Uugaara, Uugaara ama tuu'da.

<sup>14</sup> A Masala oogo mungngö manangnga Uugaara ka fiki'dö ka inde, mara tanangnga angnga ka fiki'dö tekere a türü tanno oono.

<sup>15</sup> Taalo aaga kussu a'da tuu'da naada ka unggodho nja Almasiihi? 'Bitingngö 'dee ara a'a ta'duga tuu'da na Almasiihi nanangnga ka aka tammo temelö mo? Taalo ata'dilia!

<sup>16</sup> Alla taalo aaga kussu a'da ömö'di ya atarefe nja madatemelö ya, a tuu'da neene ta unggodho? Sorne iki, "A kadu tanno eera no, ara tuu'da neene ta unggodho."

<sup>17</sup> A ömö'di ya ara tamma'da ka Uugaara ya, a koronggore yiini ta unggodho nja tiya iini.

<sup>18</sup> Aaga arünö ka temelö na toroko no koona. Kudumma tatoroko tanno ömö'di ka talinggo no, kungngö kürö ma tuu'da, lakiini ömö'di ya afüngngö nja aka a nyooro ya i'i agüüni ada tatoroko ka tuu'da tanno iini.

<sup>19</sup> Taalo aaga kussu a'da tuu'da naada eege ka la ma Koronggore tiya Insili ya anna kada ka oona, yaada ka'duga ka Masala? A tuu'da naada no taalo ka ma eyi tiya ada unggodho aaga.

<sup>20</sup> Oogo mungngö mana aaga mafaana, aaga indhiäi Masala ko'do ka tuu'da tanno ada.

## 7

### Tarna

<sup>1</sup> A tumma nüüdü ka tunggu waraga a'a miini no, a'diila a ömö'di afa tarna.

<sup>2</sup> Lakiini kudumma fungngö kadhoonyo ün'düngngö, fa ka ömö'di arma aka miini, aka tarna nyori yoono.

<sup>3</sup> A nyori tamana eema aka tammo iini yoono ka asaasa ya, aka tamana eema ya nyori ka asaasa ya iini.

<sup>4</sup> Tuu'da na aka na nyori eege kameemi, a nyori tekere tuu'da niini na aka tammo iini.

<sup>5</sup> Ömö'di tafa ta'dükü tuu'da niini a tööje illi ada kara timi'di tumma ma uuru töccö, amang kada töödhi ka teema nja Masala aaga sa ka tapadaga ka taneene ma tanyori afe'de kudumma Eblisi ara tanggaaga tüsin'i aaga kudumma ada ka titaalo kümmü nanggeyi naada ma tidhi oona ku'bu.

<sup>6</sup> A'a nadirina tumma no aaga, lakiini taalo a'a na'buna aaga kide, lakiini ka teemaana kide.

<sup>7</sup> Nasaasa a'a kadu nye'de a'da ka tafeene afa a'a, lakiini Masala masümünaana eema ka kadu ku'bu kambananajaan ku'bu, ömö'di könö tafsiigi kungno aya tafugi kungno.

<sup>8</sup> A'a niki a kadu tanno taalo karna no nja iiya ma nagüüme, a'diila nggeege eene kara tüü afa ma a'a kungno.

<sup>9</sup> Lakiini üürü eege taalo kambaanya tümmü nanggeyi neene ya, fa kene karna kudumma tarna ka'diila ka tagii'bi tagu'du ajeene atemelö.

<sup>10</sup> A kadu na arna no ara a'a tiki eene, taalo ndama a'a lakiini Uugaara miki a'da, aka tafa tadheene nja nyori tiya oono.

<sup>11</sup> Üürü madheene nja iini, müütü mafa tarnadene üürü masaasa mapadaga ka nyori tiya oono. A nyori tafa tadheene nja aka tammo iini.

<sup>12</sup> A türeene ma kadu, ara a'a tiki eene, a'a taalo na Uugaara, üürü örre ma angnga ana aka, aka taalo mümmü tumma ma kaniisa, masa ka asaasa taneene nja iini, afa tapa kono.

<sup>13</sup> Üürü aka ma kaniisa mana nyori taalo ümmü tumma ma kaniisa, assa ka asaasa taneene nja oono mafa tadheene nja iini.

<sup>14</sup> Nyori ya taalo amma ka kaniisa ya, insili ka aka tammo iini, aka mitaalo mamma ka kaniisa mo, minsili ka nyori tiya oono, üürü taalo nggeege a laala yeene tanyoro a'da kinsili.

<sup>15</sup> Üürü ömö'di ya taalo amma ka kaniisa assa asaasa tadheene nja tööje ya, fa kini adheene ka tumma örre nja inye taalo nüümö ma timi'di eege ka oona, lakiini Masala oogo mungno magümmünü aaga a'da aaga taneene a ta'diila.

<sup>16</sup> Nussu o'o nya a'da ara o'o na aka tammo amma ka Masala mo a'da ara o'o toolona nyori yüüdü? Ömö'di ya amma ka Masala nussu o'o nya a'da ara o'o toolona aka müüdü mitaalo mamma ka Masala mo?

<sup>17</sup> Nggeege fa ka ömö'di aneene taneene na Masala ka tagümmünü i'i iini no, tumma no eege kungno eede ka talaana kadu iini ka nakaniisa nye'de kungno.

<sup>18</sup> Ömö'di ya Masala ka tagümmünü i'i a'da atendhe ya afa tatendhe afe'de. Ömö'di ya taalo aga tendhe a'da magümmünü Masala i'i ya, afa tatendhe.

<sup>19</sup> Tatendhe taalo ka nüümö, a titaalo ka tendhe taalo ka nüümö. Tümmü tumma na Masala eege kungno kasaasadene.

<sup>20</sup> Fa ka ömö'di ütü ka taneene taneene na Masala ka tagümmünü i'i iini no.

<sup>21</sup> Üürü naga tasaga o'o ka uuru tanno üdü ka tagümmünüdene no fa tadiniögöö miini lakiini üürü o'o niji fiinü ma tahürra a linggo iini.

<sup>22</sup> Kudumma ömö'di tiya Uugaara ka tatümmünü i'i a'da a tasaga i'i ya hurra kidha ma Uugaara, afe'de nja ömö'di tiya Almasiihi ka tagümmünü i'i ya hurra, i'i ya tatasaga tiya Almasiihi.

<sup>23</sup> Masala mana aaga manangnga faana miini ku'bu, aaga tafa ta kasaga ma kadu.

<sup>24</sup> Nagöre eede, aaga fa ka ömö'di ütü ka taneene tanno iini afa ma tiya Masala ka tagümmünü i'i ya kungno.

*Kadu na iiya ka titaalo kene nja iiya ma nagüüme*

<sup>25</sup> Lakiini tumma ma laala tiya lömü ya taalo karna no taalo kö'dönja a'a ndama Uugaara meene, lakiini ara a'a tadiri tumma kada ömö'di ya 'bangnga ma Uugaara ka tamma kini ana eedi ya dhorro ya.

<sup>26</sup> A'a niki a'da ka tatoroko ma 'buugu tiya 'bitingngö ya, ara ta'diila ka ömö'di kara tüü kungno.

<sup>27</sup> Üürü narna o'o aka fa tawwa fiin'i ma tadheene nja oono. Üürü taalo o'o narna aka ya, fa tarna aka.

<sup>28</sup> Üürü narna o'o taalo o'o natoroko, üürü tölömü marnadene taalo matatoroko, lakiini kadu na arna no kara taluna dhügürü ka 'büdhüli tiya, i'i yungno eede ka titaalo nasaasa a'da takete kide.

<sup>29</sup> Nagöre eede, a'a niki aaga a'da, 'buugu 'bitingngö anda kete. A kadu tanno ana iiya no, kafeene afa ma iiya ka titaalo kene kungno.

<sup>30</sup> A kadu na fara no tafeene afa taalo kafara, a kadu na dhodho no, a kadu na ana eema no kafeene afa ma eema ka titaalo kene.

<sup>31</sup> A kadu na linggo eema ka 'büdhüli tiya, kafeene afa taalo kalinggo, kudumma 'büdhüli tiya ara titaalo.

<sup>32</sup> Taalo a'a nasaasa aaga ka tinigöögö. Ömö'di ya taalo arna no ana iiye ka linggo

ma Uugaara, amang ka Uugaara tamma kene ana eedi dhorro.

<sup>33</sup> Ömö'di ya arna ya atinigöögö ma eema ma 'büdhülü, amang kini tanangnga aka miini ka'diila nja iini.

<sup>34</sup> I'i asümününjaana ku'bu, aka mitaalo marnadene mo nja 'badaada tammo tölömü mo, katinigöögö ma linggo ma Uugaara amang kono taluna tinsili ma tuu'da nja koronggore. Lakiini aka marnadene mo, matinigöögö ma eema ma 'büdhülü, moono kanangnga nyori ka'diila nja oono.

<sup>35</sup> A'a nadiri tumma no ma ta'diila tanno ada, taalo meede ka imi'dina aaga ku'bu, lakiini amang kada tüüni eema ya adho ka fiin'i ya, aaga talingga ada Uugaara a'da taalo eedi eera.

<sup>36</sup> Üürü ömö'di iji eyi yiini taalo atambaanya tündhig'i 'bala miini ka tagümmänü oogo ku'bu mo, üürü atügöögö, fa kini arna, i'i taalo üüni nüümö ya toroko ya.

<sup>37</sup> Lakiini ömö'di ya indinaana taneene ma eyi tiya iini ku'bu ya, aneene ma eyi tiya iini, taalo arna 'bala ma tölömü mo. Ömö'di ya üüni nüümö ya a'diila ya.

<sup>38</sup> Nggege ya, ömö'di ya arna ya a'diila, a ömö'di ya ütü a'da taalo arna 'bala ya, agala ka'diila.

<sup>39</sup> Aka mimi'di adene a tarne ka nyori tiya oono kaleefe ka 'di. Kini kara teyi ya, möödhi ma eyi tiya oono marna ömö'di yonna koasaasa i'i kidha ma Uugaara.

<sup>40</sup> Lakiini nijöögö a'a a'diila oono kara tüü a'da taalo marnadene, niki a'a kide a'da Koronggore ma Masala ungngo eede ka oona tekere.

## 8

*Eema ya aranja ka eema ma namasala ya*

<sup>1</sup> Lakiini eema ya kadu karaana a namasala, kussu angnga eema ya. Tussu eema ka anangnga ömö'di ka tan'dinigi oona coo'do, a tasaasa euge kungngo ka inggiri kadu.

<sup>2</sup> Ömö'di ya ümmü eyi yiini a'da i'i ya ussu nüümö ya, taalo ara tussu nüümö afa yiini kara ká tussu ya kungngo.

<sup>3</sup> Lakiini ömö'di ya asaasa Masala ya, oogo mussu i'i.

<sup>4</sup> Lakiini kudumma ma kuri ma eema tiya aranja eema ma namasala. Kussu ungngo a'da eema na namasala taalo a nüümö ka 'büdhülü, ungngo tussu a'da mitaalo Masala illi ma unggodho.

<sup>5</sup> Üürü namasala kungngo ka 'dotombo'do nja 'büdhülü, afa ma kadu katiki, salla üürü namasala ka dhabbu nja naguugaara,

<sup>6</sup> lakiini ana ungngo ya, Masala minggide ma unggodho Pupa, oogo magalinggo eema nye'd'e, ungngo taneene ma tafünükü oogo ko'do, Uugaara inggide unggodho Yasu Almasiihi, eema nye'd'e kó'dö ana i'i, ungngo taneene ana i'i.

<sup>7</sup> Lakiini taalo kadu nye'd'e kussu tumma no, kadu könö kamma ka namasala ma 'büdhülü ta'bitingngö, kaleefe tagu uu'da moono tuu'da ma taranja ka eema ma masala ma 'büdhülü kümmü nanggeyi neene a'da euge kagi'di ka nyoro.

<sup>8</sup> Lakiini taalo eema ma taguri i'i yungngo ara tunggu angnga kidha ma Masala, angnga saga taguri taalo angnga kara tö'dö keere a nüümö, angnga saga taalo kaguri taalo angnga katümmü nüümö kide.

<sup>9</sup> Lakiini aaga adinö ko'do ii'di tähürra naada takara ka kadu tanno agi'di no.

<sup>10</sup> Kudumma ömö'di tiya taalo ümmü Masala dhorro ka tasala o'o naguri ka la ma masala ma 'büdhülü, taalo ara tümmü rüüsü ana eedi aguri tekere?

<sup>11</sup> Tussu eema nüüdü no, euge kungngo kanangnga örre yüüdü ka tagi'di ya Almasiihi ka teyi ka üüdü miini ya ka taama.

<sup>12</sup> Kada kadüünü tatoroko ana nagöre tanno ada, aaga tici nanggeedi neene na agi'di no, nggege aaga küünü tatoroko ana Almasiihi.

<sup>13</sup> Üürü kuri i'i yungngo ara tafa ka örre tiya eede aama, taalo a'a nara tagu uu'da ta'billi, ii'di a'a tanangnga örre yeede ka 'dinggö ka tatoroko.

## 9

*Kadafüni*

<sup>1</sup> Taalo a'a na hurra? Taalo a'a na tafünni? Taalo a'a nadinö ka Uugaara tiya aja Yasu? Taalo aaga ka kadu ma linggo tanno eede ka Uugaara?

<sup>2</sup> Üürü taalo a'a na tafünni ma kadu könö ya, a'a na tafünni ana aaga, kudumma ada kada hitimi ma tafünni tanno eede ka Uugaara.

<sup>3</sup> A tumma no euge kungngo eede ka tümmönökü ka eyi tiya eede co kadu tanno ümmü a'a no.

<sup>4</sup> Taalo ungngo kama tagu eema angnga tooye?

<sup>5</sup> Taalo ungngo kama ta'duga aka ma amma mo ka Masala nja ungngo afa türeene ma kadafüni nja nagöre tanno Uugaara nja Bütrüs?

<sup>6</sup> Alla nja Barnaba unggodho ungngo tumma dhorro kitaalo kidi, illi ungngo taluna kuri ma eyi tiya ii'di?

<sup>7</sup> Mada i'i yungngo alingga tasigira ndama eyi tiya iini? Mada i'i yungngo adinö ki'bim'bi assa ka taalo aguri? Mada

i'i yungngo aguri a ki'biini assa ka taalo ooye siiga miini?

<sup>8</sup> Tumma neede no ka tumma ma tadü'dü? Taalo seriye iki afe'de?

<sup>9</sup> Sorne ma seriye ya Müüsa iki a'da, "Aaga fa takumu kodha ya ka 'deeli ya ka nüünö, kini ka tödhe migile." Kagu'du tumma ma nagodaha Masala ka oona?

<sup>10</sup> Taalo i'i ya eema dhorro ma tümmöönö kaja? Ii, arigirinja ka Sorne ka üüdü ma angnga a'da amang ka ömö'di tiya aleele ya, taleele ku'bu ömö'di ya ödhe ya, tödhe kalinggo nggeege kindhiigü uuru meene kara tosso ka migile ateera meene.

<sup>11</sup> A kiidü ka tadin'i ada eema ma koronggore ya a'diila ya kada ka oona, ara tadhabbu kiidü kara tara eema ma 'büdhüü'lü kada?

<sup>12</sup> Üürü kadu könö kama eema kada 'dee, taalo ungngo kama ta'duga ya dhabbu ya? Lakiini taalo ungngo kagalinggo nggeege, lakiini kidhi ungngo nanggeedi ku'bu amang kiidü tafa taga'da fiini ma tumma ma Almasiihi.

<sup>13</sup> Taalo aaga kussu a'da kadu na linggo ka la ma Masala no, kagu eema ma faana miini, a kadu na linggo ka müsi ma türri no kosso ka eema tiya amanaja ka müsi ma türri?

<sup>14</sup> Nggeege yungngo Uugaara ka tiki a'da kadu na eema tumma ma sorne no kaguri kide.

<sup>15</sup> Lakiini a'a taalo nagalinggo nggeege, na a'a taalo narigiri tumma no ma tasaasa nüümö ma eyi tiya eede. A'diila kede kara teyi a'da taalo ömö'di ma tafaga a'a keere ka abbü 'danüüsö.

<sup>16</sup> Üürü a'a nadünnü tumma ma Masala, taalo a'a nara tabbü 'danüüsö, kudumma eede ka taga'bununja kide. Am'ba kede eede ka titaaloo nadünnü tumma ma Masala.

<sup>17</sup> Üürü a'a neema tumma ma eyi tiya eede ya, ara a'a ta'duga faana, üürü taalo a'a nadünnü tumma ndama eyi tiya eede ya, a'a nalinggo linggo na ümmününja a'a no.

<sup>18</sup> Faana yeede i'i ya iiye? Faana yeede a'da nadünnü tumma ma İnjilli a'da taalo faana kide naadha ka faana tiya eede ka linggo ma tumma ma İnjilli.

<sup>19</sup> Naneene a'a ka eyi tiya eede kidha ma kadu, lakiini a'a nümmü eyi yeede kada tasaga ma kadu nye'd'e amang kede tödö a kadu kadhabbu.

<sup>20</sup> Nümmü eyi yeede kada taga Yahüüdü ka Yahüüdü kidha. Amang kede tödö ana Yahüüdü. Nümmü eyi yeede kidha ma kadu ma seriye ka tamö'di ma seriye, (a'da

nitaalo a'a ka nüüsö ma seriye,) amang kede tödö a kadu ma seriye.

<sup>21</sup> Naneene a'a nja kadu tanno taalo kamma ka seriye no afa meede ka titaaloo namma ka seriye kungngo, amang kede tödö a kadu tanno taalo kanna ka seriye no, (a'da seriye ungngo eede, namma ka seriye tiya Almasiihi).

<sup>22</sup> Naneene a'a nja kadu tanno agi'di no, afa meede ka tagi'di kungngo, amang kede tödö a kadu tanno agi'di no, na a'a teema nye'd'e ka kadu kidha amang kede toolona köön.

<sup>23</sup> A'a nalinggo eema ya ka üüdü ma tumma ma İnjilli, amang kede tosso ka eema miini ya a'diila ya.

<sup>24</sup> Taalo aaga kussu a'da kadu no ambrinanago no, küüsö in'dili, lakiini ököön unggodho ara tadhe eene? Aaga iisö afa miini kungngo amang kada ta'duga ndalembö.

<sup>25</sup> Ömö'di ya ambrinanago ya idhi oona ku'du ma eema nye'd'e, kudumma ma ndalembö kara tatangga'da. Lakiini ungngo ka iisö kudumma ndalembö no ara tutü ta'billi.

<sup>26</sup> Taalo a'a nüüsö weerö ün'dügüngngö a'da taalo a'a niji nüümö miini, taalo a'a neema koro'bo nabbü 'dolodho ün'dügüngngö.

<sup>27</sup> Lakiini a'a napusu ada oona neede kide nüünü tadasaga iini, kede ka tagadünögü tumma co a kadu könö amang kede tafa tafeene nya kadu tanno ütü ka teene no.

## 10

### Talaana ma Israyil ka dhüüle

<sup>1</sup> Taalo a'a nasaasa a'da aaga tüürü nagöre eede, kafaafa ma angnga nye'd'e de kaganna ka tülüügü ka tüm'bü kada'da to egee in'dili.

<sup>2</sup> Egee in'dili kakambeesedene ka nüüsö ma Müüsa ka tülüügü nya to.

<sup>3</sup> Egee in'dili kagu kuri ma koronggore ya unggodho ya.

<sup>4</sup> Egee in'dili kungngo kakooye ndama koronggore tiya unggodho ya, ndama 'dokon'da ma koronggore ma unggodho nya eene, a 'dokon'da mo Almasiihi i'i ya miini.

<sup>5</sup> Lakiini taalo Masala mamma ka tadhabbu meene, kagirinadene ka dhüüle uu'da neene tasananjaana ku'bu ka dhüüle.

<sup>6</sup> Eema ya nye'd'e agalinggo adene, amang kaja tessu iini angnga tafa tasaasa eema ya toroko ya, afa meene ka talinggo kungngo.

<sup>7</sup> Aaga fa tümmü eema ma namasala afa kadu könö katümmöönö ya, afa ma sorne

ka tiki a'da, "Kemmi kadu kagu eema kooye kassa kafiki'dö kalinggo eema ma temelö."

<sup>8</sup> Ungngo tafa ta temelö afa ma kadu könö ka temelö, könö ana kene taaya na alif kukumu ömö'dü kafünü iidoona ka uruu ka unggodho.

<sup>9</sup> Kada fa taka'b'ba Almasihi ka oona afa kadu na ka'b'ba i'i ka oona a nööni tagirina eege no.

<sup>10</sup> Aaga fa ta'digineene afa kadu könö ka'digineene, a tadhangga ma inde kagirina eege.

<sup>11</sup> Eema ya agüünii adene ana eege ya nye'd'e amang kene tussu iini, sorne iki a'da amang kini talaana angnga, angnga na ürüünü ka ndafaradene ana angnga no.

<sup>12</sup> Ömö'dü ya ümmü eyi yiini a'da i'i a'düngnge ana ko'do ya, fa kini a'düngnge dhorro i'i'di ta'dünggö.

<sup>13</sup> Taalo ta'b'badene no kara tüünii nüümö ana aaga kada nakömö'dü, Masala ma'diila taalo mara tafa kada aaga ta'b'badene na dhiiri no, lakiini mara tala aaga ka fiinii ma takara tö'dö kürö ndama iini, amang kada tidhi oona ku'bu.

<sup>14</sup> Nggege nagöre eede, aaga fa takete ka eema ma namasala.

<sup>15</sup> A'a neema nja aaga kada kadu tanno 'dara no, aaga saasaan tumma neede ka teema no ku'bu.

<sup>16</sup> Taalo ker'de ma baraka maaja kanangnga baraka kide mo oogo mungngo ma tosso ka eriidö tiya Almasihi? A miteene maaja ka'düsünü mo taalo tosso ka tuu'da tanno Almasihi eege kamiini?

<sup>17</sup> A tadhabbu tanno aja no, tuu'da naaja ka unggodho kudumma miteene ma unggodho angnga nye'd'e tosso ka miteene ma unggodho mo.

<sup>18</sup> Aaga iiri laala ya Israyil, taalo kadu na agu eema ma tirri no eege kosso ka misü ma tirri?

<sup>19</sup> A'a niki a'da minna? Eema ma namasala ya 'dee taalo a nüümö alla nüümö ya aranja ka eema ma namasala ya i'i yungngo a nüümö?

<sup>20</sup> Kaw, nüümö ya aranja ka eema ma namasala ya, taranja na nagana'bu taalo na Masala, niküri a'a ka titaaloo nasaasa a'da aaga tosso kide nja nakana'bu.

<sup>21</sup> Taalo aaga kara tamabanya tooye ker'de ma Uugaara nja ker'de ma nakana'bu, taalo aaga kara tosso kagu eema ka tarabeesa nja Uugaara nja nakana'bu.

<sup>22</sup> Ara angnga tasaasa Uugaara kana kirimi? Angnga kana türü angnga tagii'bi i'i?

*Tahürra ma ömö'dü tiya amma ya*

<sup>23</sup> "Angnga kama tüünii eema in'dili," lakiini taalo eema nye'd'e a'diila nja angnga. "Eema nye'd'e a'diila," lakiini taalo eema nye'd'e ara tak'i'dü angnga ku'bu.

<sup>24</sup> Taalo ömö'dü öccö tisi ka eema ma eyi tiya iini keere, lakiini fa kini isi ka eema ma kadu töccö afa miini kungngö.

<sup>25</sup> Aaga agu uu'da na kadu kanadene iini ka mansala no, aaga tafa tindineene kudumma nüünö ma nongnge.

<sup>26</sup> Sorne iki, "Büdhü'lü ya Uugaara nja eema ya inggide ya nye'd'e."

<sup>27</sup> Üürü ömö'dü ya taalo amma ka Masala ya, ümmünü aaga aaga co, aaga agu nüümö yiini kara tanangnga aaga ya, aaga tafa tindineene, kudumma nüümö ma nongnge.

<sup>28</sup> Lakiini ömö'dü könö kara tiki aaga a'da, "Eema ya aranja ka eema ma namasala ya," aaga fa taguri, kudumma ömö'dü tiya adirina aaga nja nüünö ma nongnge.

<sup>29</sup> Taalo a'a niki a'da eedi yaada lakiini eedi ya ömö'dü könö, aminna agu eedi ya ömö'dü könö afaga a'a keere ka nüünö ma eedi tiya eede?

<sup>30</sup> Üürü nanangnga a'a ta'diila a Masala nassa kaguri, aminna agu kadu könö kamidhi a'da namana a'a ta'diila a Masala?

<sup>31</sup> Üürü kagu aaga eema aaga tooye nya nüümö tiya ada ka talingga ya, aaga linggo eema nye'd'e a tidhindhi ma Masala.

<sup>32</sup> Aaga fa takara ka Yahüdü kidha nja kadu ya Yünan nja kaniisa tammo a Masala.

<sup>33</sup> Lakiini aaga aneene afa ma a'a kungngo, nasaasa a'a kadu ka'diila ana eema tiya eede ka talingga ya nye'd'e kungngo, taalo a'a nawwa nüümö ma eyi tiya eede, lakiini a'a nawwa ta'diila a kadu kadhappu amang kene toolonadene.

## 11

<sup>1</sup> Aaga ümmü fiinii yeede afa meede ka tümmü fiinii ya Almasihi kungngö.

### *Taküdhü üüdü*

<sup>2</sup> Nafünögü aaga ko'do, kudumma ada ka tagiigü a'a ka eema nye'd'e, aaga tafa ka talaana tanno eede ka tümmünü aaga no.

<sup>3</sup> Lakiini a'a nasaasa a'da aaga tussu a'da Almasihi i'i ya üüdü ma ömö'dü ya a miide ya, ömö'dü ya miide ya i'i ya üüdü ma aka, a Masala oogo ma üüdü ma Almasihi.

<sup>4</sup> A miide ka fara ka Masala nja iini ka teema tumma ma tane'bi assa ka taküdhü üüdü ya, i'i ya midhi üüdü yiini.

<sup>5</sup> A aka mafara ka Masala nja oono ka teema tumma ma tane'bi a'da taalo

maküdhü üdü ya, oogo ma midhi üdü yoono mafeene afa moono ka takemme üdü kungngo.

<sup>6</sup> Üürü taalo aka ma küdhü üdü yoono, fa kono masiimi awu yoono, lakiini ürü ara tamodolo ka aka ka temmedene nja ka tasiimi awu ya, fa kono ma küdhü üdü yoono.

<sup>7</sup> Taalo a'diila nja ömö'di ya miide ya ka taküdhü üdü, kudumma iini ka ta Koronggore nja tidihindhi ma Masala aala tidihindhi noono ku'bu, illi aka mala tidihindhi ma miide.

<sup>8</sup> Taalo ömö'di ya miide ya ö'dö ndama aka, lakiini aka mö'dö ndama ömö'di ya miide ya.

<sup>9</sup> A Masala taalo madina ada miide a aka, lakiini oogo madina ada aka a miide.

<sup>10</sup> Nggegee kudumma kadhangga, aka mama taküdhü üdü yoono, taneene ma tamma egee kamiini.

<sup>11</sup> Kidha ma Uugaara ya, taalo aka ma taneene unggodho oogo a'da taalo miide kono, a miide taalo ara taneene unggodho i'i a'da mitaalo aka kini.

<sup>12</sup> Üürü aka mö'dö ndama miide ya, aka oogo mungngo meene miide, lakiini eema nye'de ö'dö ndama Masala.

<sup>13</sup> Aaga iiröönö unggodho aaga, a'diila ka aka kono kara tafara ka Masala ana üdü ku'bu?

<sup>14</sup> Taalo tafiigi ma taneene kakalaana aaga ka eyi tiya ada a'da a modolo ka ömö'di ya miide ya ka tinggiri awu yiini,

<sup>15</sup> lakiini a'diila ka aka kara tinggiri awu yoono? Kudumma Masala manangnga awu oono maküdhü üdü iini.

<sup>16</sup> Üürü ömö'di inggide asaasa tanu ka tumma tanno ya, taalo taneene naaja egee kungngo, itaalo taneene ma nakaniisa tanno Masala egee kamiini.

<sup>17</sup> Lakiini tumma neede ka tirina aaga no, taalo a'a nara tindihiyi aaga ko'do, temni naada no, taalo kara tö'dö keere a nümö tiya a'diila ya, lakiini kara tö'dö a tatoroko aaga.

<sup>18</sup> Naföönyö a'a ka dhidha a'da ada ka temmi ka kaniisa aaga tasümünü njaaana ku'bu, na a'a tamma kide idhilli.

<sup>19</sup> Timin'da tumma na toroko no tanna kada ka söödö, amang ka kadu tanno ümmü Masala dhorro no tessu adene,

<sup>20</sup> a kada kara temmi ya, taalo aaga kö'dö tagu kuri ya Uugaara.

<sup>21</sup> Ömö'di tagu kuri ma eyi tiya iini ara iire kagu kadu öccö, anno taaya ka ngeeli.

<sup>22</sup> Taalo nöö'di kada ma taguri kide, aaga tooye kide? Alla aaga kamidhi kaniisa ma Masala, aaga tanangnga modolo kagu kadu no eema ka titaalo kene no? Ara a'a tiki

aaga nya? Ara a'a tafünüğü aaga ko'do ka eema tiya? Kaw.

*Kuri ma taamu ya Uugaara ya eere ya  
(Matta 26.26-29; Murkus 14.22-25;  
Liüka 22.14-20)*

<sup>23</sup> Kudumma a'a na'duga ka Uugaara nanangnga aaga tekere, ka ooso tanno Uugaara Yasu kara tümmünü eyi yiini a kadu a'duga miteene.

<sup>24</sup> Anangnga ta'diila a Masala a'düsünü iki, "Aaga 'duga, aaga tagu tuu'da neede egee kungngo kananja aaga, aaga üünü nggege amang kada tagiigi tumma ma a'a."

<sup>25</sup> Afada a'duga ker'de kene ka ndagu kuri ma ooso iki, "Ker'de mo, oogo ma timi'di tumma ma 'bitingngö ma eriidö tiya eede, aaga üünü nggege ada kara tooye, aaga tagiigi tumma ma a'a."

<sup>26</sup> Kada kara tagu miteene mo, aaga tooye ka ker'de tammo ya, aaga teema tumma ma inde tanno Uugaara kadara ka uuru ma tö'dö tanno iini.

<sup>27</sup> Ömö'di ya agu miteene mo, alla oyoye ka ker'de tammo Uugaara a'da taalo yiini ya, i'i ya hetti ada ka tuu'da nja eriidö tiya Uugaara.

<sup>28</sup> Fa ka ömö'di iiri eyi yiini dhorro assa ka agu miteene oyoye ka ker'de tammo.

<sup>29</sup> Kudumma ömö'di tiya aguri ada kooye a'da taalo amma ka tuu'da tanno Uugaara ya, i'i ya aguri adagooye, ö'dö a tapusu ka eyi tiya iini.

<sup>30</sup> I'i yungno a kadu könö kada ki'di kamaara, anno taaya.

<sup>31</sup> Lakiini ürü angnga kagümü nanggeyi naaja ya, taalo angnga kara ta kapusu adene.

<sup>32</sup> Lakiini Uugaara ümmü angnga apusu angnga amang kini tafa tapusu angnga nja kadu ma 'büdhülü.

<sup>33</sup> Nagöre eede, kada kara temmi ma tagu eema aaga tindihiyi ajeeene.

<sup>34</sup> Ömö'di ya iire kagu i'i ya, fa kini agu eema ka 'dii kita iini, amang kada tafa tüüpü nanggeyi naada ka tapusu adene. Lakiini türeene ma eema könö kede kara tö'dö nassa tirina aaga.

## 12

*Türü ma Koronggore*

<sup>1</sup> A 'bitingngö kudumma türlü ma koronggore nagöre eede, taalo a'a nasaasa a'da aaga türlü miini.

<sup>2</sup> Kussu aaga a'da kagiisö aaga ka eema ma namasala tanno nakinggirii no keere, a'da taalo aaga kussu fiinii.

<sup>3</sup> Amang kada tessu a'da taalo ömö'di ma teema a Koronggore ma Masala iki a'da, "Yasu aga'dadene," a ömö'di taalo

tambaanya tiki a'da, "Yasu Uugaara," illi a Koronggore tiya Insili ya.

<sup>4</sup> Türü ma koronggore kambananaaja ku'bu, lakiini Koronggore unggodho.

<sup>5</sup> Linggo kambananaaja ku'bu, lakiini Uugaara unggodho.

<sup>6</sup> Linggo kinggide kambananaaja ku'bu, illi Masala ma unggodho malinggo ada eema a kadu nye'd'de.

<sup>7</sup> Türü ka ananja ömö'di ma linggo ma Koronggore tussu adene ma ta'diila ma kadu nye'd'de.

<sup>8</sup> Ömö'di ta'duga tumma ma ta'dara ka Koronggore, aya ta'duga tumma ma tussu eema ka Koronggore ya unggodho ya,

<sup>9</sup> a Koronggore ya unggodho ya tamana tamma a Masala ana eedi, anangnga a tiya a türü ma toolona kadu ka namaara,

<sup>10</sup> öccö anangnga türü ma talinggo eema keefe, anangnga a tiya linggo ma ne'bi, aya tussu nagoronggore, könö teema tumma keefe taalo niini, aya tasaana ku'bu.

<sup>11</sup> Eema ya nye'd'de Koronggore ya unggodho ya i'i yungngo alinggo ka eyi tiya iini, asümünaana türü niini ka kadu ku'bu afa ma tiya iini ka asaasa kungngo.

### Oona ka unggodho nja kolelle

<sup>12</sup> Afa ma tuu'da kada unggodho a kolelle kungngo eene kadhabbu, lakiini eege ka unggodho, Almasiihi afeene nggege afe'de.

<sup>13</sup> Angnga nye'd'de kungngo, Yahüüdü nja kadu ma Yünan no, kasaga nja tanno taalo ka kasaga no, kakambeesedene angnga a Koronggore tiya unggodho ya, angnga ta unggodho ka tuu'da, angnga tagooye ka Koronggore tiya unggodho ya.

<sup>14</sup> A tuu'da taalo niimö ya unggodho ya i'i ya miini, lakiini kolelle miini kadhabbu.

<sup>15</sup> Üürü awwa kara tiki a'da, "Taalo a'a na niisö, taalo a'a na takolelle ma tuu'da," taalo i'i yungngo tafaga eege keere kada ta'ba ma tuu'da.

<sup>16</sup> A neeso tiki a'da, "Taalo a'a na ööye, taalo a'a na ma tuu'da," ara taadha kada kolelle ma tuu'da.

<sup>17</sup> Üürü tuu'da nye'd'de kara taga ööye, a tafoönyö eema eege kiïye? Üürü tuu'da nye'd'de kara taga neeso, a tü'd'dü eege kiïye?

<sup>18</sup> Lakiini Masala manangnga kolelle ka tuu'da afa ma tiya oono ka asaasa ya kungngo.

<sup>19</sup> A kene kara taga tagolelle ka unggodho 'dee, a tuu'da eege kiïye?

<sup>20</sup> Lakiini kolelle kadhabbu, a tuu'da ka unggodho.

<sup>21</sup> Taalo ööye ara tiki a niisö a'da, "Taalo a'a nasaasa o'o," alla üüdü tiki uune a'da, "Taalo a'a nasaasa aaga."

<sup>22</sup> Lakiini tagolelle öccö ka ijöögö ka tuu'da kada ki'di no, eege kungngo kasaasadene dhorro.

<sup>23</sup> A 'ba'dakeyi yaaja ka tümmü i'i kada idhilli ya, ümmü adene katitalao a'diila ya, i'i yungngo ümmü adene ka'diila,

<sup>24</sup> a kolelle na 'diila no taalo kasaasa niimö, lakiini Masala marü'bü tuu'da manangnga ta'diila dhabbu a 'bandakolelle tiya dhilli ya.

<sup>25</sup> Amang ka tuu'da tafa tasümünü njaana ku'bu, amang ka kolelle tümmü ajeene ka fin'dinanjaana koona nye'd'de.

<sup>26</sup> Niimö kara tagu tagolelle könö, agu kolelle nye'd'de kungngo, a takolelle könö ka ta'deema, a türeene ma kolelle tad-hodho nja iini nye'd'de.

<sup>27</sup> Aaga ka tuu'da tanno Almasiihi, aaga ka kolelle miini.

<sup>28</sup> Masala manangnga kadafiini ka kani-sa ka dhidha a nagane'bi tisi kide, a katalaana tisi kide masa tanangnga türü a türeene ma kadu ma talinggo eema keefe, a türü ma toolona ka maara nja türü ma takinyi kadu öccö ko'do nja türü ma tindinaana kadu ku'bu nja kadu keema tumma öccö a'da taalo neene.

<sup>29</sup> Eege no in'dili kungngo 'dee, eege ka kadafiini? Eege in'dili ka nagane'bi? Eege in'dili ka katalaana? Eege in'dili ka türü ma talinggo eema keefe?

<sup>30</sup> Eege in'dili kana türü ma toolona ka maara? Eege in'dili keema tumma keefe? Eege in'dili kasaana tumma ku'bu?

<sup>31</sup> Lakiini aaga asaasa eema ya a'diila ya, ara a'a tala aaga ka fiinü tiya dhorro ya.

## 13

### Tasaasa

<sup>1</sup> Üürü a'a ka neema a tumma tanno a kadu nja tanno kadhangga, lakiini taalo a'a nasaasa kadu ya nafeene nja fara ma tanyaanya nja eliili kafara.

<sup>2</sup> Üürü Masala manangnga tumma ma tane'bi a'a nussu eema ya kaküdhü ya in'dili, nümmü Masala ana eedi niki a naanya a'da mooso a'da taalo a'a nasaasa kadu ya, taalo a'a na niimö.

<sup>3</sup> Nassa ka tadhifi almaala yeede a kadu nye'd'de, nümmü tuu'da neede ka tatinyogo a'da taalo nasaasa kadu, taalo a'a nagüünä niimö ya a'diila.

<sup>4</sup> Tasaasa ka anangnga ömö'di ka tidhi oona ku'bu kana 'bangnga, tasaasa taalo kussu kirümi nja ta'diniga oona coo'do taalo kabbü 'daniiüsö.

<sup>5</sup> Tasaasa taalo kamidhi, taalo ka asaasa ma eyi tiya eene, taalo kagoroo'bo ün'dügüngngö, taalo kümmü tumma na toroko no ka eedi.

<sup>6</sup> Tasaasa taalo kadhodho a nüümö tiya toroko ya, lakiini kadhodho a nüümö tiya dhorro ya.

<sup>7</sup> Tasaasa kidhi oona ku'bu ka eema nye'd'de kungngo, kamaama ka eema in'dili, ma indihig'i ta'diila.

<sup>8</sup> Tasaasa taalo kara taama 'do, lakiini tumma ma tane'bi kara titaalo a tumma ma nagonggo'do kara titaalo a tussu eema titaalo afe'de.

<sup>9</sup> Kudumma tussu eema naaja ka ta'ba a tumma ma tane'bi naaja ka ta'ba,

<sup>10</sup> Nüümö ya tigin ya ka tö'dö, aya ta'ba ya titaalo.

<sup>11</sup> Eede ka takaleefe tadhilli ya, nageema a'a kada 'bii'bala, nussu eema afa 'bii'bala, nadinigöögö afa 'bii'bala, lakiini kede kanda miide ya naadha ka eema ma ta'bii'bala.

<sup>12</sup> Koronggore yaaja kadünö kide 'bitingngö ka almandara kada irifirifi ya, lakiini ka uruu tanno miini no ara angga tiji nadhugudha, a 'bitingngö nussu a'a eema öccö, lakiini ka uruu tanno miini no ya, ara a'a tussu eema nye'd'de afa meede ka tussu adene kungngo.

<sup>13</sup> A 'bitingngö ya ara tamma na Masala tüü nja tindihig'i nja tasaasa, aya adhabbu ana kene na iidoona no tasaasa.

## 14

### Türü ma teema nja nagonggo'do

<sup>1</sup> Aaga ümmü tasaasa ka dhidha, aaga tasaasa türlü ma koronggore, mündä eema ma tane'bi.

<sup>2</sup> Kudumma ömö'di tiya eema ana onggo'do ka tonggoonyo ya, taalo eema nja kadu, lakiini eema nja Masala kudumma kadu taalo kaföönöy tumma niini, lakiini Koronggore eema tumma na küdhü no.

<sup>3</sup> Lakiini ömö'di ya eema tumma ma tane'bi ya, i'i eema nja kadu ma takü'di ege ku'bu ma tindihig'i ege ko'do a talüü'lü iïye.

<sup>4</sup> Ömö'di ya eema tumma keefe ya, i'i indinaana eyi yiini, ömö'di ya eema tumma ma tane'bi ya, i'i ya arü'bü kaniisa.

<sup>5</sup> Nasaasa a'a a'da aaga teema tumma keefe aaga in'dili, lakiini aaga eema tumma ma Masala ka dhidha, kudumma ömö'di tiya eema tumma ma Masala agi'bi ömö'di ya eema tumma keefe ya, illi kini ka tasaana ege ku'bu amang ka kadu ma kaniisa tussu kindinaana kaniisa ku'bu.

<sup>6</sup> A 'bitingngö nagöre eede, kede ka tö'dö kada kanna neema nja aaga a tumma keefe 'dee, ara a'a a tümmüñ minna aaga, ürü taalo tumma neede kö'dö a tumma na tö'dö no nja tussu eema nja tumma ma Masala nja talaana.

<sup>7</sup> Eema ya taalo eela tanya ya, afa kaaru nja perempeera, ürü kitalo kö'dö a fara tiya eene ka tonggoonyo, ara angnga tussu a'da öjö i'i yungngo a kadu kabaana?

<sup>8</sup> Ürü tñiidö taalo ana fara ka'diila 'dee, mada i'i yungngo ara takü'di oona ku'bu aco ka koro'bo?

<sup>9</sup> Aaga kafiqi nggeege afe'de, onggo'do maada kara madere ka tumma taalo kussu adene, ara ömö'di tussu nüümö yaada kadeema ya nya? Taalo tanya kara tama tumma naada?

<sup>10</sup> Tumma kungngo ka 'büdhüü kadhabbu ka tonggoonyo, lakiini eege nye'd'e kussu adene.

<sup>11</sup> Ürü taalo a'a nussu türlü ma tumma, ara a'a ta tajeene ka ömö'di tiya eema ya, ömö'di ya ara teema nja a'a, afeene afa tajeene ana a'a.

<sup>12</sup> Aaga tekere. Ada kasaasa türlü ma Koronggore, aaga arangnga agusunja kada kide ma tarü'bü kaniisa.

<sup>13</sup> Ömö'di ya eema tumma kadhabbu keefe ya, fa kini afara ka Masala amang kini tana türlü ma tasaana ku'bu iini.

<sup>14</sup> Kudumma eede kara tafara ka Masala a tumma keefe ya, koronggore yeede i'i yungngo a tafara ka Masala, lakiini üdüü yeede taalo ara taluna nüümö.

<sup>15</sup> Ara a'a tönyño 'bitingngö? Ara a'a tafara ka Masala a koronggore, nafara ka Masala ana üdüü afe'de. Nüwe tüüsü a koronggore, nüwe tüüsü ana üdüü afe'de.

<sup>16</sup> Ürü o'o namana ta'diila a Masala a koronggore 'dee, ömö'di ya taföönöy saga tiki "Amin" nya ka baraka tiya üdüü kudumma iini taalo aföönöy tumma nüüdü ka teema no?

<sup>17</sup> Nanangnga o'o ta'diila a Masala, lakiini ömö'di könö taalo aduna nüümö 'do.

<sup>18</sup> Namana a'a ta'diila a Masala kudumma eede ka teema tumma keefe ada naada ka teema no aaga nye'd'de kungngo.

<sup>19</sup> Lakiini ka kaniisa a'diila eede kara tadiri tumma ka iïdümüñ na ussudene no nalaana kadu könö ka kaniisa kadagii'bi tumma nö'dö na alif kada'baaga neede ka teema ana onggo'do no.

<sup>20</sup> Nagöre eede, aaga fa tafeene nja laala tiya idhiidhi ya ka nanggüüdü, lakiini aaga afeene nja laala tiya dhiidhi ya ka eema tiya toroko ya, aaga tümmü ta'dara dhorro.

<sup>21</sup> Iki tumma ka Sorne ma seriye a'da, Uugaara iki, "Ara a'a teema nja kadu tanno ana onggo'do ka tonggoonyo,

a nüünö ka tonggoonyo,  
lakiini eege taalo kara taföönöy."

<sup>22</sup> Tumma ma nagonggo'do ka tonggoonyo taalo ka türlü ka kadu ma kaniisa, lakiini ka türlü ka kadu tanno taalo kamma

no, illi teema tumma ma Masala ka türü ka kadu tanno amma, taalo na ka kadu no taalo kamma no.

<sup>23</sup> Üürü kadu ma kaniisa katemmi in'dili, a ömö'di ya teema tumma niini unggodho i'i a kadu na aleefe tamma no, tö'dö katoodo kide taalo katiki a'da aaga ka nagaaga?

<sup>24</sup> Lakiini eene kadeema tumma ma tane'bi eege in'dili kungngo, a ömö'di ya aleefe tö'dö ka Masala nja tiya taalo amma ya, ö'dö atoodo kide ara tamma ana eedi a'da i'i taalo a'diila, ara kadu nye'd'de katümmü i'i.

<sup>25</sup> Eema ya akaküdhü kini ka eedi ya, tatele oona. Üürü ku'bu a dhugudha afara ka Masala amma a'da "Masala maneene nja aaga timin'da."

*Tamma ka Masala aki'dinja ku'bu ta'bitta*

<sup>26</sup> A'a nikii nya nagöre eede? Kada kara temmi ma tafara ka Masala, ömö'di ya tüwe tüüsü, aya talaana, aya tama tumma ka Masala, aya tö'dö a tumma keefe, aya tasaana tumma ku'bu, eema nye'd'de kungngo ya ama tindinaana kaniisa.

<sup>27</sup> Üürü ömö'di eema tumma keefe ya, kadu keera üürü kiidoona, aya teema apa a tiya eema, ömö'di öccö asaana eege ku'bu.

<sup>28</sup> Üürü taalo ömö'di ma tasaana tumma ku'bu, fa kini aki'döönö kafa teema ka kaniisa a tumma keefe, eema ka eyi tiya iini nja Masala.

<sup>29</sup> Lakiini nagane'bi, fa kene keema keera üürü kiidoona, a kadu könö türi tumma na eemadene no.

<sup>30</sup> Üürü ömö'di öccö emmi a tumma tö'dönja iini ndama Masala, a ömö'di ya ageema ka dhidha ya töödhü.

<sup>31</sup> Aaga nye'd'de kungngo kama teema tumma ma Masala, aya teema apa a tiya, amang ka kadu talaadene nye'd'de kafünügü nja ko'do.

<sup>32</sup> A nagoronggore ma nagane'bi ungngo a nagane'bi ka nüüsö.

<sup>33</sup> Taalo Masala ma eema ma weerö, lakiini Masala ma ta'diila afa ma tiya ka nakaniisa ma kadu tanno Masala kungngo.

<sup>34</sup> Tafa ka iiya tanno ada kafa teema ka kaniisa. Taalo ungngo kamma kene kadeema, lakiini kaföönyö tumma afa ma sorne ka tiki kungngo.

<sup>35</sup> Kene ka asaasa tussu nüümö, fa kene kindini naganyori neene ka 'dii, kudumma iini taalo a'diila aka ka teema ka kaniisa.

<sup>36</sup> Kiki aaga kide a'da tumma na Masala kö'dö ndama aaga? Alla eege köödhü kada unggodho aaga?

<sup>37</sup> Üürü ömö'di inggide ümmü eyi yiini kada ne'bi nja türü ma koronggore könö,

fa kini ussu a'da nüümö yeede ka rigiri ada aaga ya, tumma na Uugaara eege kamiini.

<sup>38</sup> Ömö'di ya taalo ümmü tumma no ya, aaga aadha iini koonaa.

<sup>39</sup> Nagöre eede, aaga asaasa türü ma koronggore, aaga tafa tafaga ömö'di öccö keere ka teema tumma keefe.

<sup>40</sup> Eema in'dili talingga adene aki'dinja ku'bu ta'bitta.

## 15

*Almasiiji afiki'dö ka inde*

<sup>1</sup> Nagöre eede, ara a'a tadirina tumma ma İnjiili neede ka öö'dö iini no aaga, aaga tamma kide, aaga tüütü kafa kide no.

<sup>2</sup> Aaga toolonadene iini, üürü aaga kafa kide afa meede ka tagadünnü aaga no, alla kamma aaga ka weerö ün'dügüngngö.

<sup>3</sup> Nagümmünü a'a aaga ka dhidha afa miini ka tagananja a'a kungngo, a'da Almasiiji eyi kudumma tatoroko tanno aja afa ma kasorne ka tiki kungngo.

<sup>4</sup> Atatü'büdene afiki'dö a füngngö idoona afa ma kasorne ka tiki kungngo.

<sup>5</sup> Adele oona a Bütrüs assa ka ala oona a kadafünnü tanno iïdümmü kafünü eera no.

<sup>6</sup> Assa ka tatele oona a nagöre tanno ö'dö na miya ka iïdümmü kadhabbu meene taleefe tefe ka 'dii, könö taaya.

<sup>7</sup> Afada adele oona a Yaguub nja kadafünnü in'dili.

<sup>8</sup> Idhi adele oona a'a keere kungngo afa 'bii'bala ya ageenedene ka titalo adho ka fiinj ya.

<sup>9</sup> A'a nungngo nadhilli ka kadafünnü tanno in'dili no, taalo nama a kadu ka tümmünü a'a a'da tafinji, kudumma eede ka tagalinggo kaniisa ma Masala.

<sup>10</sup> Lakiini a türü tanno Masala a'a nungngo naneene nja türü tanno oono ka anangnga a'a no, taalo kananja a'a ün'dügüngngö, lakiini a'a nadhügürü natagi'bi türeene ma kadafünnü, lakiini taalo a'a nungngo na dhögürü, lakiini türü na Masala na eede ka oona no.

<sup>11</sup> Tumma no kö'dö ndama a'a alla ndama eene, eege kungngo iidi kadeema iini, aaga tamma kide.

*Tafiki'dö ka inde*

<sup>12</sup> Üürü angnga keema tumma ma Almasiiji a'da i'i afiki'dö ka inde, a kadu könö saga tiki a'da, taalo kadu kafiki'dö ka inde nya?

<sup>13</sup> Üürü taalo kadu na ake no kafiki'dö ka inde, Almasiiji taalo afiki'dö tekere.

<sup>14</sup> Üürü taalo Almasiiji afiki'dö ka inde ya, a tumma naaja kara tatumma ün'dügüngngö, a tamma ka Masala naada kara ta ün'dügüngngö.

<sup>15</sup> Nggege ara angnga tafünü korokoro ka Masala ka oona, kudumma aja ka tiki a'da Masala manangnga Almasiihi ka fiki'dö a'da taalo afiki'dö, üürü taalo kadu kafiki'dö ka inde.

<sup>16</sup> Üürü taalo kadu na aaya no kafiki'dö ya, taalo Almasiihi afiki'dö.

<sup>17</sup> Üürü taalo Almasiihi afiki'dö, a tamma ka Masala naada ta nüümö ün'dügüngöö, aaga tüütü ka tatoroko tanno ada.

<sup>18</sup> Üürü nggege ya, kadu na aaya keere ma Almasiihi no, kaama.

<sup>19</sup> Üürü tindögüü naaja ka Almasiihi ka'diila ka tefe ka 'dii tanno, angnga kungno küüni muuyu ka kadu ka teene nye'd'de kungno.

<sup>20</sup> Lakiini tumma timin'da, Almasiihi afiki'dö ka inde amang ka kadu tanno iifyü ka inde no kara tafiki'dö afe'de.

<sup>21</sup> Inde ka kannka ka nüüsö ma ömö'dii, a ka nüüsö ma ömö'dii ara tafiki'dö ka inde tanna kide.

<sup>22</sup> Afa ma kadu nye'd'de ka taaya ka Adam ya, egee nye'd'de kara tafiki'dö ka inde nja Almasiihi.

<sup>23</sup> Lakiini ara ömö'dii töödhü ka 'buugu tiya iini. Almasiihi i'i yungngo adhidha assa tapa a kadu tanno indögüü Almasiihi iini kara tö'dö no.

<sup>24</sup> Keere kungno Almasiihi saga öö'dö tümmüünü tauugaara a Masala Pupa, mara tagirina tauugaara nye'd'de.

<sup>25</sup> I'i ara tauugaara idhi anangnga nadiidi miini kini ka uune.

<sup>26</sup> Djidi ya ara tiididene keere ya inde.

<sup>27</sup> Kudumma, "Eema nye'd'de ananja kini ka uune." Lakiini iini ka tiki a'da eema nye'd'de ananja kini ka uune, taalo nja Masala ka eyi tiya oono mo, manangnga eema in'dili ka Almasiihi ka uune.

<sup>28</sup> Lakiini ka eema in'dili kara tananja iini, a 'Bii'bala ka eyi tiya iini ara tananja ömö'dii tiya anangnga iini, a Masala oogo ma eema nye'd'de.

<sup>29</sup> Üürü taalo kadu na aaya no kara tafiki'dö 'dee, aminna agu kadu kambeesedene kudumma inde? Minna agu egee kambeesedene kudumma eene.

<sup>30</sup> Aminna agu angnga angnga tadhögürü a nakuuru.

<sup>31</sup> Nagöre eede, nake a'a a nakuuru a'a tan'dinigi oona neede coo'do ana aaga ka Yasu Almasiihi Uugaara yaaja.

<sup>32</sup> A'a ka tamö'dii kungno nageema a'a koro'bo nja eema ma toroko ka Afosus taalo ara ta nüümö ana a'a üürü kadu na aaya no taalo kafiki'dö ka inde.

"Kada aguri, angnga tagooye,  
kudumma aja kara taaya takaa."

<sup>33</sup> Aaga fa taama nanggeyi naada, "Taneene na toroko no kara taga'da taneene na 'diila no."

<sup>34</sup> Aaga adinö ko'do ma ta'diila, aaga tafa tüünü tatoroko, kudumma kadu töccö kinggide taalo kussu Masala, a'a neema nggege amang ka modolo tagu aaga.

*Tafiki'dö ma tuu'da*

<sup>35</sup> Ömö'dii könö indineene iki a'da, "Ara kadu na aaya no tafiki'dö ka inde nya? Kara tafada a tuu'da töccö?"

<sup>36</sup> Ka 'baga, nüümö yüüdü ka tüügü ya, taalo ara tafü'döönö illi kini ka teyi.

<sup>37</sup> A nüümö yüüdü ka tüügü ya, taalo tuu'da miini egee kungno kara taneene. Lakiini ndaniiye ma tinggile üürü nüümö könö afe'de.

<sup>38</sup> Lakiini Masala manangnga tuu'da eene a maraada tammo oono, tinggile no, tuu'da neene unggodho egee.

<sup>39</sup> Taalo tuu'da nye'd'de a kafeene, tuu'da ma ömö'dii a tuu'da ma eema ma eriidö kinggide, a tuu'da ma uyi kinggide, a tuu'da ma kilögö köönö.

<sup>40</sup> Nja tuu'da ma 'dotombo'do nja tuu'da ma 'büdhüü, tuu'da ma 'dotombo'do ka öyeeene, a töyeene könö ka tuu'da ma 'büdhüü.

<sup>41</sup> Ndanaaya ka öyeeene, a tere töyeene, midigi kömö taalo mafeene ka töyeene nja köje.

<sup>42</sup> Tafiki'dö ka inde kafiigi nggege, tatü'bü tuu'da ka teyi ka fiki'dö taalo ka teyi afe'de.

<sup>43</sup> Atü'büdene kada midhi afiki'dö ka ta'diila, atü'büdene kada ki'di afiki'dö a türü.

<sup>44</sup> Atü'büdene kada tuu'da afiki'dö kada tuu'da ma koronggore, üürü tuu'da ma ömö'dii ka inggide, a tuu'da ma koronggore ka inggide tekere.

<sup>45</sup> Sorne iki a'da, "Adam ömö'dii ya dhidha ya tuu'da ka adinö," Adam ya eere ya a koronggore ya amana teefe ka 'di angnga.

<sup>46</sup> Lakiini taalo koronggore öö'dö ka dhidha, lakiini tuu'da assa kanda koronggore.

<sup>47</sup> Ömö'dii ya dhidha ama kuraaga ndama 'büdhüü, a ömö'dii ya eere ya ama 'dotombo'do.

<sup>48</sup> Afa miini ka ama 'büdhüü kada kadu ma 'büdhüü afe'de, afa miini kada kadu ma 'dotombo'do kara ta kadu ma 'dotombo'do.

<sup>49</sup> Afa maaja ka kirmi koronggore ma 'büdhüü kaja ka oona, ara angnga sa ka kirmi koronggore ma 'dotombo'do kara ta kadu ma 'dotombo'do.

<sup>50</sup> Ara a'a tiki aaga nagöre eede, taalo tuu'da nja eriidö ka takarna ka tauugaara ma Masala, inde taalo ka takarna ka tefe ka 'dī ta'billi.

<sup>51</sup> Ara a'a tadirina tumma na küdhü no aaga, taalo angnga kara takaaya in'dili, lakiini ara angnga takatem'bele in'dili.

<sup>52</sup> Tasala areere afa talimi ma ööye, fara ma tiniidö tiya eere ya, kudumma tiniidö kara tafara, a kadu na aaya no tafiki'dö kagirni tefe ka 'dī kene ka oona angnga takatem'bele.

<sup>53</sup> Ömö'dii ya eyi ya, tagirn'i tefe ka 'dī kini ka oona taalo a teyi, aya ara teyi ya tagirn'i tefe ka 'dī iini ka oona.

<sup>54</sup> Ka tuu'da tanno aja na aaya ka sürdö no kara tatenggere. Yungngo a tumma na kirinja ka sorne no kara tatimin'da, "Inde a'duurudene a tii'baana."

<sup>55</sup> "Tii'baana nüüdü euge ka iifye inde?"

A türü nüüdü euge ka iifye inde?"

<sup>56</sup> A timmü ma inde tatoroko euge kamiini, türü ma tatoroko euge kungno ka seriye.

<sup>57</sup> Kada nangnga ta'diila a Masala kudumma oono kamana tii'baana angnga ana eere ma Uugaara tiya aja Yasu Almasiihi.

<sup>58</sup> Aaga idhi oona ku'bu nagöre eede, aaga tarigi awwa caa'bū, aaga kardha ku'bu ka linggo ma Uugaara, amang kada tussu a'da takardha ku'bu naada ka linggo ma Uugaara taalo kara titalo.

## 16

### *Monsoona ma kadu ma kaniisa*

<sup>1</sup> A kudumma ma tawaana gürüüsü koona ma kadu ma kaniisa, aaga üünii afa meede ka tünögü co kadu ma kaniisa ma Galatiya a'da küüni nggeege.

<sup>2</sup> Ka uuru ma Lahada, ömö'dii tonsaana ligi nagürüüsü koona aaga tamana ku'bu taalo kama tawaana gürüüsü koona ana a'a kide.

<sup>3</sup> Kede kara tö'dö nagürünü kadu yaada kadagesse euge no a'da kaco tunggu eema ma monsoona yaada co a kadu ma Örsaliim a'a ka kürünü kene a tumma.

<sup>4</sup> Üürü a'diila eede ka tunggeene afe'de ya kara tunggeene nja a'a.

### *Tasaasa ma eema ma eyi tiya iini*

<sup>5</sup> Ara a'a sa köö'dö kada kanna eede ka tadigaala ka Makadoniya, kudumma eede kara tadigaala ka Makadoniya a 'dagawwa ko'do.

<sup>6</sup> Kede ka taneene nja aaga ara feele ka co a kürö aaga sa ka tattooga a'co kita eede kara co kita.

<sup>7</sup> Kudumma eede taalo a'a nasaasa tassa kada a 'dagawwa ko'do nasaasa a'a tagünü nja aaga dhabbu ka Uugaara ka niisö.

<sup>8</sup> Lakiini ara a'a tanna ka Afosus ara uuru ma Taanyara ma Koronggore ka öö'dö.

<sup>9</sup> Kudumma Masala ka tafa'da fiin'i ma linggo ka'diila a'da nadidi ma a'a kinggide kadhabbu.

<sup>10</sup> Timosaws kara tö'dö kada kanna ya, aaga afa kini idhi oona ku'bu kudumma iini ka talingga ada Uugaara afa a'a.

<sup>11</sup> Taalo ömö'dii ma tamidhi i'i, lakiini aaga tattoog i'i a ta'diila öö'dö kede kita kudumma eede ka tindhig'i i'i nja nagöre ma angnga.

<sup>12</sup> Lakiini örre ma angnga Apölös ya, neema a'a nja iini dhabbu a'da öö'dö kada kanna nja nagöre ma angnga, illi i'i anu lakiini eedi yimi taalo asaasa tö'dö kada kanna 'bitängngö ara i'i sa köö'dö a fiin'i tiya iini kara tatanfa'da.

### *Tumma no eere no*

<sup>13</sup> Aaga adinö ko'do aaga tidhi oona ku'bu dhorro ana eedi ma tamiide aaga kardha ku'bu a türü dhorro.

<sup>14</sup> Aaga linggo eema in'dili a tasaasa ajeene.

<sup>15</sup> Kussu aaga a'da kadu ma 'dī tiya Istifanüüs euge kungno kagamma ka Almasiihi ka Akaiya ka dhidha. Kümmünü nanggeyi neene ka linggo ma kadu ma kaniisa, a'a niki aaga nagöre eede,

<sup>16</sup> amang kada taföönyö tumma neene nja kadu tanno alinggo ka dhügürü nja eene no.

<sup>17</sup> Yungngo eede ka tadhodho ka tö'dö tanno Istifanüüs nja Frtunatos nja Akayos kudumma eene katakarna ka 'buugu tiya kada katitalo.

<sup>18</sup> Kanangnga tiicolo eede ka eedi afa meene ka anangnga kada ka nanggeedi kungno, aaga ümmü kadu afa ma tanno.

### *Tööjü'lü na eere no*

<sup>19</sup> Kadu ma nakaniisa ma Asiya kööjü'lü aaga. Akilla nja Berskillä kööjü'lü aaga ana eere ma Uugaara dhabbu nja kadu ma kaniisa tammo ka 'dī kita eene mo.

<sup>20</sup> Nagöre ma angnga no kööjü'lü aaga nye'de aaga tööjü'lü tööjü'lü na insili no.

<sup>21</sup> A'a na Bölis narigiri tööjü'lü no a niisö tanno eede.

<sup>22</sup> Ömö'dii ya taalo asaasa Uugaara ara linggi tagu i'i. Ka Uugaara aayu.

<sup>23</sup> A türü na Uugaara Yasu taneene nja aaga.

<sup>24</sup> A tasaasa neede taneene nja aaga nye'de ana eere ma Yasu Almasiihi, Amiin.

## Waraga ya Bölis ma co Kürünsüs ya Eera ya Tafa'da tumma

Bölis arigiri waraga ya unguu co kadu ma kaniisa ka Kürünsüs anya ma Yünan ma dhabbu mo, kini ka tunggeene ka fiinii ma tara co tassa kene. I'i agadunnü tumma ma İnjülli co eene a kadu tamma ka Yasu kadhabbu. I'i aguu'bu eege ka nanggeedi iini ka ticci kene kannaa nja iini ka arigiri ada nawaraga co eene lakiini kaleefe tatoroko eene ku'bu. İkiri ka tarigiri waraga ya ma takinyi tagi'di tanno eene ku'bu a'da üfürü tala eege ka oona.

Afeene afa kadu ma kaniisa ka Kürünsüs kafünü eema a Bölis ka oona a'da i'i atamü gürüüsü ya kadu ka kürünüğü iini ma co tunggu co kadu ma kaniisa na eema ka titalo kene no, a'da taalo tafiinii. Ka waraga tiya, i'i arigiri tumma ma eyi tiya iini dhabbu nya linggo ma teema tumma ma İnjülli ma Yasu ya Masala ka tagümümünü i'i iini ya. I'i afe'de agalaana kadu ma kaniisa a tumma ma tafa ka gürüüsü tiya eene ta'diila amang kene tamana a kadu tanno Masala nya linggo ma kaniisa ka na'buugu tököönö (2 Kürünsüs 9.10).

<sup>1</sup> A'a na Bölis tafiinii ya Yasu Almasiihi a tasaasa tanno Masala, a'a nya örre ma angnga Timosaws ungngo tunggu waraga ya co kaniisa tanno Masala ka Kürünsüs nya kadu ma kaniisa nye'de de ka Akaiya.

<sup>2</sup> A Masala ma Pupa tiya aja nya Uugaara tiya aja Yasu Almasiihi tanangnga türü aaga nya ta'diila.

### Bölis amana ta'diila a Masala

<sup>3</sup> Kada nangnga ta'diila a Masala Pupa tiya Uugaara yaaja Yasu Almasiihi, Pupa ya ana 'bangnga ya, nya Masala ma alüülü angnga ka iiye.

<sup>4</sup> I'i alüülü angnga ka iiye ka dhögürü tiya aja ya in'dili amang kaja tambaanya talüülü kadu na dhögürü no ka iiye a talüülü tanno iidü ka'duga ka Masala ka eyi tiya iidü no.

<sup>5</sup> Afa maaja kagosso ka dhögürü ma Almasiihi, angnga afe'de kagosso ka talüülü iiye.

<sup>6</sup> Üürü ungngo kadhäögürü ungngo kalüülü aaga ka iiye nya toolona kidi kara talüülü iiye, talüülü iiye naada eege kamiini ya anangnga aaga ka tidhi oona ku'bu a tümmünü eedi ku'bu ma dhögürü tiya unggodho ya iidü kadhäögürü ya.

<sup>7</sup> Tindhígü iidü kada kütü ka ööye miini ka takardha ku'bu ma tindhígü Masala,

kudumma iidü ka tessu afe'de aaga tosse ka dhögürü tanno iidü, afe'de koso aaga ka ta'baga nanggeedi tanno aja.

<sup>8</sup> Nagöre niidü taalo ungngo kasaasa aaga katüürü ma tatoroko tanno agalinggo adene ana ungngo ka Asiya no, eema ya agalinggo adene ana ungngo ya adhabbu indhü ungngo taalo ka kambaanya ungngo taalo kamma a'da ara ungngo tefe ka 'd'i.

<sup>9</sup> Kiki ungngo kide dhorro kidi ka nanggeedi a'da kagümmü adene ma inde, tumma kagüüni adene amang kidi tafa türü ka nanggeyi tanno iidü ka oona, lakiini ka Masala tammo iji kadu na ake no.

<sup>10</sup> Oogo moolona ungngo ka tatoroko ma inde afa ma tanno, oogo mara toolona. Kümmü angnga nanggeyi niidü oono ma tindhígü oogo kono ka tüttü ka katoolona ungngo.

<sup>11</sup> Afa maada ka takinyi ungngo a tafara ka Masala tanno ada. A'da kadu kadhabbu kamana ta'diila a Masala ka üüdü ma ungngo, a Masala mara tanangnga baraka ya a'diila ya ungngo kono ka tamma kafara tanno kadu kadhabbu.

### Bölis agere tumma niini

<sup>12</sup> A bïtingngjö kabbü ungngo 'daniisö ma nanggeedi tanno niidü, yungngo iki ungngo a'da taneene niidü ka 'büdhülü nya taneene tanno iidü nya aaga no, ka tiicolo türü na Masala eege kamiini taalo a ta'dara ma tamö'di, lakiini a türü tanno Masala.

<sup>13</sup> Taalo ungngo karigiri ada tumma no co aaga no ada kara türöönö aaga tessu no, a'a nasaasa aaga a'da aaga tessu nye'de de.

<sup>14</sup> Afa maada ka tessu ungngo ara aaga saga tessu ungngo nye'de de aaga tabbü 'daniisö ana ungngo afa mungno kara tabbü 'daniisö ana aaga ka uuru tanno Uugaara Yasu.

<sup>15</sup> Nakussu a'a tumma no nye'de de kede ka tasaasa tö'dö kada kanna ka dhidha amang ka türü tagusunja aaga teera.

<sup>16</sup> Kede kara co Makadoniya, ara a'a tadho kada kanna, a kede kara tafada ka Makadoniya ya, ara a'a tö'dö kada amang kada tattoog a'a ma co a Yahüüdiya.

<sup>17</sup> Kede ka tasaasa tumma 'dee, nakiisini ömö'dü alla nagalinggo a'a kada midhi, ara a'a tiki a'da ii ii nya kaw kaw ta unggodho kafeene co?

<sup>18</sup> Masala mussu a'da tumma niidü nya aaga no, taalo kiki ii nya kaw,

<sup>19</sup> Kudumma i'i ya 'Bii'bala ma Masala yiidü kadeema tumma miini nya aaga, ungngo nya Salwans nya Timosaws, taalo kiki ii, alla kaw, lakiini kini taalo kaw illi ii ya miini.

<sup>20</sup> İi ya miini ka tumma tanno in'dili, nggege yungngo iidi ka tiki a'da "Amiin" ana Yasu Almasiihi a tindhigü ko'do ma tidihindhi ma Masala.

<sup>21</sup> Masala oogo mungngo manangnga angnga ka takardha ku'bu ana eere ma Almasiihi oogo mungngo ma'bunaana angnga.

<sup>22</sup> Oogo mabbünnü hitimi yoono kaja ka oona, manangnga Koronggore yoono kaja ka nanggeedi.

<sup>23</sup> A Masala tussu a'da nanu a'a ka öö'dö ka Kürünsüs, a 'bangnga ma aaga kagu a'a.

<sup>24</sup> Taalo ungngo kasaasa ta'bunu aaga ka tamma ka Masala, lakiini ungngo ka linggo nya aaga amang kada ta dhadho kudumma maada katütü ka tamma ka Masala dhorro.

## 2

<sup>1</sup> I'i yungngo eede ka tiki a'da nafa tö'dö kada kanna ii'di a'a tanangnga aaga ka tümmü nanggeedi a'a a tagoroo'bo.

<sup>2</sup> Kudumma eede kara tanangnga aaga ka tümmü nanggeedi 'dee, a mada i'i yungngo ara tanangnga a'a ka tadhodho afa taalo kadu neede ka anangnga egee ka tümmü nanggeedi ka koroo'bo no?

<sup>3</sup> A'a narigiri waraga ya kudumma tanno kede kara tö'dö kada nafa tanangnga kadu na amana a'a ka tadhodho tafa tanangnga a'a ka koroo'bo. Nussu tumma aaga nye'd'e de dhorro a'da ara aaga tosso ka dhadho nya a'a aaga in'dili.

<sup>4</sup> Narigiri ada a'a waraga ya co aaga ana eedi ka tigine a tatoroko nya tadinigöögö ma eedi a fara tasuuру kede ka iiye, tumma neede no 'do ya a'a taalo nasaasa tanangnga aaga ka koroo'bo, lakiini a'a nagala ka asaasa a'da aaga tussu a'da nasaasa a'a aaga dhorro.

### Taadha ka tatoroko tanno kadu

<sup>5</sup> Lakiini ömö'di ya ö'dö a tagoroo'bo ya, taalo anangnga a'a ka koroo'bo unggodho a'a, lakiini anangnga aaga ka koroo'bo nye'd'e de kungngo, lakiini taalo tagoroo'bo in'dili, ii'dü tumma tadhabbu ka indhi kini.

<sup>6</sup> Anda'dimo ka takapusu adene tanno ömö'di tiya ada kada kalinggo ana i'i aaga in'dili kungngo.

<sup>7</sup> A 'bitingngö a'diila ada kara tafünügü i'i ko'do aaga tafa kini ii'di tagoroo'bo dhindho.

<sup>8</sup> Ara a'a tiki aaga a'da aaga takogoona ma tasaasa i'i dhindho.

<sup>9</sup> A'a narigiri ada aaga tumma no co aaga amang kede tussu a'da kaföönyö aaga tumma neede nye'd'e de.

<sup>10</sup> Kada kara ta'diila nya ömö'di ka tatoroko tanno iini ya, na a'a taadha

ka ömö'di ka tatoroko tanno iini, ara a'a taadha kini kide kidha ma Almasiihi kudumma aaga.

<sup>11</sup> Kudumma Ebliisi kara tanggaaga tii'bi angnga, taalo angnga küürü ma tumma niini.

*Kadu ma linggo ma timi'di tumma ma 'bitingngö*

<sup>12</sup> Kede ka öö'dö ka Tarwas ma teema tumma ma sorne tanno Almasiihi a fiinü ma linggo ma Uugaara tafa'da nya a'a.

<sup>13</sup> Lakiini a'a naga tinigöögö kudumma eede taalo naduna örre ma a'a ya Tito ya kanna, kikirü ka tattoog a'a nunggeene naco Makadoniya.

<sup>14</sup> Tanangnga ta'diila a Masala tammo unggene ana angnga ka fiinü ma tii'baana 'bucca ana Almasiihi. Masanna kondho ma tussu Almasiihi ka na'buug in'dili.

<sup>15</sup> Kadu na efe ka 'di no taalo kara tefe ka 'di ma nanggeyi tanno eene, lakiini ma ömö'di tiya eyi ka üüdü meene afiki'dö afe'de.

<sup>16</sup> Kondho mo ka kadu tanno aama no ma feene nya kondho ma inde a kadu na olonadene no tunya ma tefe ka 'di ma tamana kadu keefe ka 'di. Mada i'i yungngo ara tampaanya eema ya?

<sup>17</sup> Taalo ungngo kanadene a tumma ma Masala dhabbu afa kadu öccö, lakiini keema ungngo tumma ma Almasiihi dhorro kidha ma Masala kada kadu tanno oono.

## 3

<sup>1</sup> Kafada ungngo angnga tafünügü nanggeyi naaja ko'do afe'de? Alla kasaasa unggono waraga afa kadu könö ma talaana ndama aaga alla co aaga?

<sup>2</sup> Aaga ka waraga tiya iidi ya ikirinja kidi ka nanggeedi ussudene a kadu nye'd'e de tiiröönö.

<sup>3</sup> Kussudene aaga ka waraga tiya Almasiihi, ö'dö ndama linggo niidi taalo arigiridene ana ünggülü, lakiini a Koronggore tiya Masala ma adinö mo, taalo ikirinja ka maraayo ma müsi, lakiini ka maraayo ma nanggeedi ma tadiü'ddü.

<sup>4</sup> Kamma ungngo ana eedi dhorro ana Almasiihi ka Masala kidha.

<sup>5</sup> Taalo ungngo kiki a'da ungngo küünü eema a tussu tanno iidi, lakiini türü niidi ndama Masala.

<sup>6</sup> Oogo mungngo manangnga ungngo ka tampaanya linggo ma timi'di tumma ma 'bitingngö, ya taalo ma tarigiri ma seriye, lakiini ma Koronggore, seriye ya arigiridene ö'dö ana inde, lakiini Koronggore ö'dö a tefe ka 'di.

*Tidhindhi ma timi'di tumma ma 'bitingngö*

7 Üürü linggo ma inde ko'dodene a kireere'be ka niigisi kö'dö a tidihindhi amang ka laala ya Israyil taalo kambaanya tadinö dhugudha ya Müüsa kudumma tidihindhi ma dhugudha tiya iini ya ara saga titalo ya.

8 Taalo linggo ma Koronggore kara kakogona ma tidihindhi?

9 Üürü linggo ma tasigi kadu ka tidihindhi ya, ara tii'baana dhorro a linggo ma tidihindhi tanno ara tö'dö a toolona.

10 Niimö ya akadhindhi ya taalo tidihindhi kini 'bitingngö a'dugadene kudumma tidihindhi ka tagii'bi i'i 'bitingngö no.

11 Üürü niimö ara titalo ya öö'dö a tidihindhi ara tidihindhi na tiya ara tö'dö a tefe ka 'di ta'billi ya tafaanya.

12 Kudumma aja ka tindhigü no ya, kalinggo ungngo 'büni kungno.

13 Taalo ungngo kafeene nja Müüsa ya kaküdhü ten'di iini ka iiye, amang ka laala ma Israyil tafa tiji töyeene ma titalo ma tidihindhi tanno eene.

14 Nanggüdü neene ka tangga'da ta'bitingngö, nanggüdü neene katünküdhü a ten'di tiya miini ya, kene ka türi sorne ma timi'di tumma ma 'billi, ara ten'di tatandhaka ka ömö'dü kara tuurna Almasiihi keere.

15 Lakiini ta'bitingngö aleefe ten'di kene ka nanggeedi ka tüörönö ma seriye ya Müüsa.

16 Ka ömö'dü kara tapadaga ka Uugaara ara ten'di ma taküdhü iiye tatandhaka.

17 'Bitingngö Uugaara i'i ya Koronggore, a 'buugu ya Koronggore ya Uugaara ka tanna kide ya, ara tähürra tanna kide.

18 Angnga in'dili kungno kiji angnga tidihindhi ma Uugaara ana iiye ka tatandhaka afa almandara angnga takatem'bele kada Koronggore tiya miini ya, ka tidihindhi na öö'dö ndama Uugaara, i'i ya Koronggore.

## 4

### Eema ka nadhafala

1 I'i yungngo a Masala ka anangnga 'bangnga ungngo ka linggo tanno, taalo ungngo kara tariba.

2 Kaadha ungngo ka eema tiya ka raaya ya, taalo kaneene ana ünggu ka nanggeedi, ungngo taalo küsini kadu a tumma ma Masala. Lakiini kala ungngo tumma ma timin'da ungngo takindhigü oona nüüdö ko'do a tumma miini co ka kadu ka nanggeedi kidha ma Masala.

3 Üürü tumma ma İnjiili nüüdö ka tadünnü no ka küdhü, euge ka tünggündü a kadu tanno aama no.

4 Ege taalo kamma, kudumma masala ma 'büdhüli tiya a'binynyi euge ka iiye amang kene tafa tiji töyeene na öyeene ada kene no, töyeene ma tumma ma İnjiili ma tidihindhi na Almasiihi, ya koronggore ma Masala ya.

5 Taalo ungngo keema tumma ma eyi tiya üüdö, lakiini a tumma ma Yasu Almasiihi ya Uugaara ya, kalinggo ada aaga kada kasaga ka üüdö ma Yasu.

6 Kudumma Masala ka tiki a'da, "Fa ka töyeene ka öö'dö kürö ndama ndüüli mo," oogo mungngo manangnga töyeene noono kädi ka nanggeedi, amang ka töyeene ma tussu eema ma tidihindhi na Masala ka dhugudha tiya Yasu Almasiihi.

7 Ungngo ka nadhafala ma tam'bala ma tüümü eema ya, amang kini tussu adene in'dili a'da türi na Masala euge kamiini taalo nüüdö.

8 Tatoroko ka dhigi ungngo ku'bu ka na'buugu in'dili, lakiini taalo ka'dinggö, ungngo tadhere lakiini taalo ungngo kagi'di.

9 A kadu talingga ungngo, illi Masala taalo maadha kädi, ungngo ta'dinggeeene illi ungngo taalo ka taaya.

10 Ungngo 'bucca kümmü dhügürü ma inde tanno Yasu amang ka tefe ka 'di tanno iini tanna kädi ka oona.

11 Ungngo na efe ka 'di no ara ungngo takeke 'bucca ka üüdö ma Yasu amang ka tefe ka 'di tanno iini tijidene ka tuu'da tanno üüdö kara titao no.

12 Nggege inde kalinggo kädi ka oona, lakiini tefe ka 'di kungngo ada.

13 Sorne iki, "Nageema a'a kudumma eede ka tamma." A koronggore ma tamma tiya kädi ya, angnga tageema kudumma aja ka tagamma.

14 Kussu ungngo a'da Masala mafiki'dö Uugaara Yasu ka inde ya, ara tanangnga angnga ka fiki'dö ka inde afe'de ana Yasu, öö'dö ana aaga nja ungngo kono kidha.

15 Eema ya nye'de kudumma aaga, Masala mamana eema angnga dhabbu, a kadu no amana ta'diila a Masala nja tidihindhi tanno adhabbu no.

### Tefe ka 'di a tamma ka Masala

16 Nggege taalo angnga kara kari'ba, salla a tuu'da naaja saga titalo, illi ömö'dü ya ka tuu'da ka teene ya, ara tindinaana oona a naganuuru.

17 Kudumma 'bandhügürü tiya idhilli ya ya ara titalo ya yaaja ka dhügürü ya indinaana tidihindhi angnga ta'billi.

<sup>18</sup> Kudumma aja taalo kanaana iïye ka eema tiya aja kijöögö ya, illi eema yaaja ka titalo kijöögö ya, eema yaaja kijöögö 'bitüngngö ara titalo, illi eema yaaja ka titalo kijöögö ya, i'i yungno ara tütu ta'billi.

## 5

*Tefe ka 'dï naaja ka 'dotombo'do*

<sup>1</sup> Kussu angnga a'da fangga ma 'büdhüli maaja ka taganna kide mo mara türküdü, nöö'dï naaja kungno ka 'dotombo'do ta'billi a Masala ka tarü'bünü angnga taalo ka arü'bü adene ana iisine ma nakömö'di.

<sup>2</sup> Angnga 'bitüngngö ka tadinigöögö angnga ma tasaasa 'dï ya 'dotombo'do ka kırninja kaja ka oona.

<sup>3</sup> A kaja kara tagirni i'i kaja ka oona ya, taalo angnga kara taganeene ana oona ku'bu.

<sup>4</sup> A 'bitüngngö kaganna angnga ka fangga ma 'büdhüli, angnga tagüünii muuyu ana eema ka tündhi kaja taalo a'da angnga kasaasa takirnö ku'bu, lakiini angnga tagirni kide ko'do amang ka tefe ka 'dï ta'duuru niimö ya ara titalo ya.

<sup>5</sup> Lakiini Masala oogo mungno makindinaana fiinii ya kaja ku'bu manangnga tümmü ku'bu ma Koronggore angnga amang kaja tussu iini.

<sup>6</sup> Lakiini ta'bitüngngö kütü angnga ka tamma dhorro, kussu angnga tumma aja ka tanna ka tuu'da tanno ka ku'b'ba ka Uugaara ku'bu no.

<sup>7</sup> Angnga keefe ka 'dï a tamma ma Masala taalo a niimö tiya aja ka tïnö kide ya.

<sup>8</sup> Kidhi angnga oona ku'bu angnga tasaasa tö'dö kürö ndama tuu'da tanno ara angnga ka taneene nja Uugaara.

<sup>9</sup> Salla angnga saga taneene aja ka tanna ku'b'ba, angnga kasaasa Uugaara ka tamma kaja.

<sup>10</sup> Kudumma aja in'dili kungno ara angnga ka'dingnge kidha ma tahükümü ya Almasiihi, amang ka ömö'dï taluna niimö yiini ka tagalinggo a'da akaleefe ka tuu'da, üürü ka'diila üürü ka toroko.

*Lingga nja ta'diila nja Masala*

<sup>11</sup> Kussu ungngo tikiiri ka tussu ri'ba ma Uugaara, ungngo teema nja kadu a'da Masala mussu ungngo dhorro a'a nasaasa a'da aaga tussu ungngo ana eedi tiya ada afe'de.

<sup>12</sup> Taalo ungngo kafünügü nanggeyi niidi ko'do kada kidha afe'de, lakiini kasaasa ungngo tafa'da fiinii aaga, amang kada tafünügü ungngo ko'do, amang kada taluna niimö yaada ka asaasa tüünii iini a kadu tanno alaala oona a kadu ndama

kürö ün'düngngö a'da taalo ndama eedi ka teene.

<sup>13</sup> Üürü ungngo kanagaaga ya, kanagaaga ungngo a Masala. Üürü ungngo ka'dara ya ungngo ka'dara kudumma aaga.

<sup>14</sup> Kudumma aja kada kasaga ma tasaasa tanno Almasiihi a'bunu ungngo kide, kaja ka ndagussu a'da ömö'dï unggodho eyi ka üüdü ma kadu nye'd'de, kadu nye'd'de kaaya nja iini.

<sup>15</sup> I'i eyi ka üüdü meene nye'd'de kungngo, kadu na efe ka 'dï no taalo kara tefe ka 'dï ma nanggeyi tanno eene. Lakiini ma ömö'dï tiya eyi afiki'dö afe'de ka üüdü meene ya.

<sup>16</sup> Ndama uuru tanno taalo ungngo kussu ömö'dï ka tatuu'da, kakussu ungngo Almasiihi ka tuu'da, illi 'bitüngngö taalo ungngo kussu i'i nggeege afe'de.

<sup>17</sup> Üürü ka ömö'dï kara taneene nja Almasiihi ya, ara tamö'dï tiya insili ya, eema ya illi ya anda taalo, eema nye'd'de anda issi.

<sup>18</sup> Eema ya nye'd'de ö'dö ndama Masala muuraana angnga ka oona nja Almasiihi mo, manangnga linggo ungngo ma tuuraana a kadu ka oona.

<sup>19</sup> Masala muuraana kadu ka oona nye'd'de nja Almasiihi a ta'diila ma eyi tiya oono, taalo ümmü eäge ka tatoroko tanno eene, manangnga ungngo ka teema tumma ma tuuraana ka oona.

<sup>20</sup> Angnga kungno keema tumma ma Almasiihi, afa Masala oogo mungno ma eema ana onggo'do tanno aja, yungno iidi kadeema nja aaga ana eere ma Almasiihi a'da aaga ta töönjülü, aaga tümmü ajeene nja Masala.

<sup>21</sup> Masala manangnga ömö'dï ya taalo üüni tatoroko ka tatoroko ka üüdü ma angnga amang kaja ta'diila kidha ma Masala ana i'i.

## 6

<sup>1</sup> Ka linggo tanno iidi nja Masala no, kasaasa ungngo aaga na amma ka türü tanno Masala no, aaga tafa tümmöönö kada eema ün'düngngö.

<sup>2</sup> Oogo makiki,  
"Ka uuru meede ka tamma ya, naföönyö a'tumma niüdü,  
a ka uuru ma Masala ka tamma, uuru ma toolona naga kinyi a'a o'o ko'do."  
Ara a'a tadirina tumma o'o 'bitüngngö uuru ma toolona eäge kungno.

*Dhügürü ya Bölis*

<sup>3</sup> Ungngo taalo kasaasa takara ka ömö'dï kidha ii'di tumma tagu ungngo.

<sup>4</sup> Linggo nüüdii ka talinggo no kasaasa ungngo a'da kussu adene a'da linggo na Masala eege kamiimi, a tidhi oona ku'bu ka dhügürü miini, ka talinggo adene nja dhügürü.

<sup>5</sup> Tabbü adene nja tapusu adene nja taga'da 'buugu adhügürü tadinigöögö a taneene ana ïire.

<sup>6</sup> Ka tinsili ma eedi nja tussu eema nja tidhi oona ku'bu, nja 'bangnga nja muuyu ka Koronggore tiya Insili ya, nja tasaasa ajeene dhorro.

<sup>7</sup> A tumma ma timin'da nja türü tanno Masala nja eema ma koro'bo tiya a'diila ya ka nüüsö ma kuri nja nüüsö ma küüle.

<sup>8</sup> Ka tihhindhi nja midhi, kümmü ungngo kada oroko kümmü ungngo ka'diila ungngo katimin'da, lakiini kümmü ungngo kada korokoro.

<sup>9</sup> Taalo kussu adene ungngo lakiini kümmü ungngo a'da kussu adene, ungngo taaya lakiini kefe ungngo ka 'dii, ungngo tabbü adene lakiini taalo kagirinadene.

<sup>10</sup> Kamüürü ungngo lakiini ungngo ka dhodho turi kungngo, taalo eema kide illi kadu ka tüüsü kadhabbu, afeene afa taalo eema kide illi ungngo kana eema ïn'diili.

<sup>11</sup> Ka kadu ma Kurnusus ka keema ungngo tumma ma timin'da nja aaga, ungngo tafa'da nanggeedi nüüdii aaga nye'd'de,

<sup>12</sup> taalo ungngo kümmü nanggeedi ma aaga, lakiini aaga kungngo kümmü nanggeedi ma ungngo adha.

<sup>13</sup> Nggeege a'a neema a'a nja aaga 'bütüngö afa maada kada laala tiya eede kungngo, aaga üümii ana ungngo afa müüdi ka tüümii ana aaga, aaga fada nanggeedi naada ungngo ka sigüüri.

### *Aaga fa tosso nja kadu tanno kitaalo kamma ka Masala no*

<sup>14</sup> Aaga fa tosso ka dholle tanno ungodho no nja kadu tanno taalo kamma ka Masala no. Minna yungngo ara tuuraana ta'diila ka oona nja tatoroko? A minna i'i yungngo ara tuuraana töyeene ka oona nja ndüüli?

<sup>15</sup> Taalo nüümö ma tuuraana Almasiihi ka oona nja Ebliisi? A minna i'i yungngo ara tuuraana ömö'dii ya amma ka Masala ya ka oona nja tiya taalo amma ya?

<sup>16</sup> Taalo la ma Masala ara tullu ana koona nja la ma namasala ma 'büdhüü? Angnga ka nöö'dii ma Masala tammo efe ka 'dii mo, afa ma Masala ka tiki, "Ara a'a taneene nja eene nunggeene nja eene kene ka söödö na a'a ta Masala tammo eene kada kadu tanno eede."

<sup>17</sup> I'i yungngo a Masala ka tiki,

"Aaga aadha eene ka oona,  
aaga tafa taneene nja eene.

Aaga fa tümmü eema ya nyoro ya ka oona,  
amang kede tamma kada."

<sup>18</sup> Masala mana türü mo miki, "Ara a'a ta  
Pupa tiya ada  
aaga ta laala tiya eede."

## 7

<sup>1</sup> Üürü timi'di tumma no nye'd'de kungngo, Masala manangnga angnga nagöre eede, kada kagala tuu'da naaja kinsili ka tatoroko ma tuu'da nja koronggore, angnga taganeene ka tinsili ma ri'ba ma Masala.

### *Bölis adhodho*

<sup>2</sup> Aaga amma kidi a nanggeedi, taalo ungngo küünii ada ömö'dii ku'bu, nja talinggo eema ya toroko ya nja tallogo ma eema tiya ömö'dii töccö.

<sup>3</sup> Taalo a'a nadiri tumma no ma tasigi aaga, nilli a'a ka tiraana kadhahda a'da aaga kungngo iidi ka nanggeedi a'da angnga taganeene ka'dügüllü angnga takaya ka'dügüllü.

<sup>4</sup> Namma a'a kudumma aaga dhorro nabbü 'danüüsö ana aaga nafunügenja ko'do nja dhügürü tiya iidi ya, eedi yeede adigine a ta'diila dhorro a dhodho.

<sup>5</sup> Taalo tuu'da nüüdii ka kagünü 'do jiddi müüdi köö'dö ka Makadoniya, ka'dingga ungngo ka ta'digineene nja diidi kürö nja ri'ba ka teene.

<sup>6</sup> Lakiini Masala mamana tiicolo aja ka nanggeedi muu'bu ungngo ka eedi ka tö'dö tanno Tito.

<sup>7</sup> Taalo ka tö'dö tanno iini unggodho ege, lakiini ka ta'diila tanno iini ka tuna kada no, ka'diila oona eede kini ka tirina tumma ma aaga ungngo, ka tasaasa tanno ada nja fara tiya ada nja tagu'daana ka eedi tanno ada kudumma a'a, amang kede tadhodho dhorro.

<sup>8</sup> Üürü a'a nangnga aaga ka koroo'bo a waraga tiya eede ya, taalo a'a nara teema kada kussu a'da aaga kada kussu a'a adha, nussu a'a a'da waraga ya anangnga aaga ka koroo'bo lakiini ara tagünü idhilli.

<sup>9</sup> Nadhodho a'a 'bütüngö taalo kudumma eede kafa kada aaga tagoroo'bo, kudumma ada kagoroo'bo a fiinii ma tussu kide afa ma Masala ka asaasa ungngo taalo killi aaga ka oona.

<sup>10</sup> Kudumma tagoroo'bo ma tussu kide ana Masala ya kiji atö'dö a taadha ka tam'baga ma toolonadene a'da kitaalo tagoroo'bo kide, lakiini tagoroo'bo ma kadu ma 'büdhüü ya, kicci tö'dö ana inde.

<sup>11</sup> Aaga assa ka tagoroo'bo tanno ada a tussu kide tanno Masala no manangnga aaga kanaana iïye kide, ri'ba naada nja tasaasa nja tagu'daana ka eedi nja ta'diïmö ka eema nye'de, kussu kadu kinsili aaga ka nanggeedi ka eema tiya 'do.

<sup>12</sup> Amunna üürü a'a narigiri ada aaga, taalo kudumma ömö'di tiya üünï ada kadu ku'bu ya nja tiya üünïnja ku'bu ya, lakiini amang kada tijöögö kadha ma Masala a nanggeyi tanno ada kadakardha ku'bu ma ungngo.

<sup>13</sup> Aaga kungngo kanangnga ungngo ka tidhi oona ku'bu, lakiini dhodho nüdi kadhabbu 'do kudumma dhodho tanno Tito kudumma koronggore tiya iini ka ta'baga oona ku'bu ana aaga in'dili kungngo.

<sup>14</sup> Nala a'a ta'diniga oona coo'do neede iini ana aaga taalo kanangnga a'a kaana modolo. Lakiini eema yüdi kadiraana aaga ya nye'de aga timin'da, yungngo ta'diniga oona nüdi ana aaga co Tito, kütü ka co ööye miini dhorro.

<sup>15</sup> Eedi yiini akogoona ma tasaasa aaga, kini kara tagiigü taföönö eema naada in'dili nja tamma kini nja tamma kini tanno ada a ri'ba ma Masala a ta'deedene ka oona.

<sup>16</sup> Ka'diila oona eede namma ka tumma tanno ada ma eema nye'de.

## 8

### Tawaana ma gürüüsü koona

<sup>1</sup> A 'bitingngö nagöre eede, kasaasa ungngo a'da aaga tussu a'da minna a türü ma Masala ka tagalinggo a kadu ma nakaniisa ka Makadoniya.

<sup>2</sup> Ka dhülgürü tiya eene ya dhabbu ya, ya Masala ka ta'b'ba eege iini ya, kadhadho dhodho na dhabbu no, a tassa keema neene dhindho no, tagala kanangnga eege kana eema dhabbu a tamana eema ku'bu tanno eene.

<sup>3</sup> Ara a'a tiki aaga a'da kanangnga ku'bu dhabbu ndama nanggeedi tanno eene ka teene, adhabbu adagii'bi türü neene.

<sup>4</sup> Kaga'bunu angnga kide, kasaasa a'da eege tosso ka tonsoona ma eema ma tunggu co a kadu ma kaniisa.

<sup>5</sup> Kagala kadagalinggo adhabbu adha, yüdi ka tagümöönö ka nanggüdü ya, kümmün nanggeyi neene Uugaara ka dhidha, kassa ka tamma kiid a tasaasa ma eedi tiya Masala.

<sup>6</sup> Kiki ungngo a Tito a'da atüümö linggo ma baraka nja aaga, afa miini ka ata tümbü miini ku'bu kungngo.

<sup>7</sup> Kana aaga eema nye'de kungngo, tamma ka Masala nja tumma, nja ta'dara, nja tasaasa ta kinya eema a kadu nja

tasaasa tanno ada nja ungngo no, ungngo tasaasa aaga afe'de a'da aaga takardha ku'bu ka linggo ma tasaasa ajeene ma türü,

<sup>8</sup> taalo a'a na'buna aaga kide, lakiini a'a nasaasa tassa ka tasaasa ma kadu könö ka dhorro ma tara tussu a'da ka köje tasaasa naada nya?

<sup>9</sup> Kussu aaga türü na Uugaara tiya aja Yasu Almasiiji üüpü eyi yiini co kudumma angnga a'da eema ungngo iini nye'de, amang kada tana eema a ta'döngngönyö tanno iini.

<sup>10</sup> Tumma neede kiki, a'diila nja aaga ada kara tatüümö naada ka tata tümbü miini kambele no, kudumma ada aaga kungngo kasaasa ka dhidha.

<sup>11</sup> Aaga tiümö linggo 'bitingngö amang ka tasaasa tanno ada tunggeene nja tatüümö tanno kada no.

<sup>12</sup> Üürü aaga kasaasa tanangnga eema ku'bu, ara Masala tamma ka nüümö tiya ada kanangnga ku'bu ya, taalo ka eema tiya taalo ya.

<sup>13</sup> Taalo a'a niki a'da aaga tadhügürü ara kadu öccö ka lingnge, lakiini a'a niki a'da aaga taneene kada köje.

<sup>14</sup> Aaga tinya eema a kadu tanno eema katitaalo kene no, amang kene tinya eema aaga kini kara titaaloo kada tako öccö, amang ka eema taköje kada.

<sup>15</sup> Sorne ma Masala iki, "Ömö'di ya awaana eema koona dhabbu ya, taalo ara türeene kini, ömö'di ya awaana eema koona idhilli ya, taalo nüümö ara titaaloo kini."

### Tito agürünüdene ma co Kürünsüs

<sup>16</sup> Nanangnga a'a ta'diila a Masala kono ka anangnga tumma ma linggo tanno ka Tito ka eedi afa meede kanaana iïye kada kungngo.

<sup>17</sup> Taalo i'i akogoona ma tamanaga eema angnga sugi, lakiini i'i akardha ku'bu adinigöögö ma tasaasa tödö kada kanna ndama eedi tiya iini unggodoh i'i.

<sup>18</sup> Kagürünü ungngo örre ma angnga ya nja iini, ya kadu ma nakaniisa ka tafünüğü i'i ko'do ka linggo kudumma ma İnjili ya.

<sup>19</sup> Afe'de ya, kadu ma kaniisa kagesse i'i miini ka tunggeene nja ungngo ma talingga linggo na 'diila no, nüdi ka talingga no ma tafünüğü Uugaara ko'do, ma tussu a'da ungngo kasaasa takinyi aaga,

<sup>20</sup> kakardha ungngo ku'bu ii'di ömö'di öccö tanangnga hetti ungngo ka eema ya a'diila ya.

<sup>21</sup> Tumma nüdi ka tümmöönö ka nanggeedi no 'do, a'da ungngo talingga eema ya a'diila ya, taalo ka Uugaara kidha

unggodho oogo, lakiini ka kadu kidha afe'de.

<sup>22</sup> Kagürünü ungngo örre ma angnga nja eene, yiidi ka tagiiri linggo niini ungngo taluna i'i ussu ka eema dhabbu, a 'bitingngö amma kada ana eedi dhorro.

<sup>23</sup> A Tito ya akinyi linggo nja a'a kada kanna, a nagöre ma angnga na unggeene nja iini no, egee kadafüni ma nakaniisa, Almasiihi ara tafününge ko'do ana euge.

<sup>24</sup> Nggeege aaga ala tasaasa naada a kadu dhorro a nüümö ya anangnga angnga ka ta'diniga oona naaja coo'do ana aaga amang ka nakaniisa tijöögö.

## 9

<sup>1</sup> Taalo ama eede ka rigiri ada ka waraga aaga ma eema tiya kadu kagürünigü iini ma tunggu co kadu tanno Masala.

<sup>2</sup> Nussu a'a linggo naada na a'a tadhodho iimi kidha ma kadu ma Makadoniya, niki eene a'da nagöre ma angnga no ka Akaiya no kindinaana oona ku'bu ma kambele ma tanangnga ku'bu, a tagu'daana ka eedi naada ka anangnga egee ka tüüni nggeege.

<sup>3</sup> Lakiini a'a nagürünü nagöre ma angnga no kada, kudumma ta'diniga oona tanno iidü ana aaga, tanggaaga ta nüümö ün'dügüngö amang kada tindinaana oona ku'bu afa ma tiya eede ka tiki aaga ya kungno.

<sup>4</sup> Nari'ba eede kara tö'dö nja kadu ma Makadoniya, öccö kaluna aaga kitaalo kindinaana oona ku'bu, a modolo tümmü angnga amang kede tafa teema a'da aaga kungno ka anangnga ungngo ka tadhodho.

<sup>5</sup> Yungno eede ka tiki a'da a'diila eede kara tiki a nagöre ma angnga a'da kadhe a'a köö'dö kada aaga tindinaana eema yaada kindinaana ku'bu dhabbu taalo ndama rüsü.

### Leele dhabbu

<sup>6</sup> Amang kada tagiiri a'da ömö'di ya adiniigü idhilli ya ara migile miini tidhilli, ömö'di ya adiniigü dhabbu ya ara migile miini tadhabbu.

<sup>7</sup> Ömö'di ya asaasa tamana eema ku'bu amana ku'bu afa ma tiya iini ka tiraana ana eedi tiya iini ya, taalo tümmü rüümü taalo ömö'di ma ta'bunu i'i kide, a tagussu tafa tagu i'i kudumma ömö'di tiya amana eema a kadu ana eedi ka tinsili ya Masala masasa i'i.

<sup>8</sup> Masala mambaanya tagusu türü nye'de ka eema nye'de nja naganuuru aaga tana eema yaada kasaasa ya eema ya a'diila ya tagusunja aaga ka linggo tanno a'diila no in'dili.

<sup>9</sup> Afa ma sorne ka tiki,

"Asümünaana eema ku'bu na anangnga a kadu tanno eema katitalo kene no dhabbu, ta'diila niini a tüütü ta'billi."

<sup>10</sup> Masala mamaana tööyö a taleele nja miteene ma taguri ya mo, mara tanangnga nasigeene ka'diila a migile tadhabbu ma ta'diila ma nanggeedi tanno ada.

<sup>11</sup> A Masala tanangnga aaga kadüüsü ka eema nye'de kungno, amang kada tamana a kadu turi amang ka kadu tamana ta'diila a Masala kudumma ungngo.

<sup>12</sup> Tafiki'dö a linggo tanno a'diila no taalo köödhi ka tamana eema a kadu tanno Masala sugi, lakiini anangnga kada kamana ta'diila a Masala dhabbu afe'de.

<sup>13</sup> Kadu katafünüğü Masala ko'do kudumma tamma tanno ada nja taföönyö tumma ma İnjülli nja ada kamana eema tanno ada ku'bu. Aaga tosse kide nja eene nya kadu töccö afe'de.

<sup>14</sup> Kafara ka Masala kudumma aaga ana nanggeedi tanno eene, ara co kada kudumma türü tanno Masala na dhabbu no kanangnga aaga no.

<sup>15</sup> Angnga tanangnga ta'diila a Masala ka türü tiya oono ka amana angnga dhabbu, taalo ömö'di ma tampaanya teema kide.

## 10

### Bölis ümmöönö ka eyi tiya iini

<sup>1</sup> A'a na Bölis, nasaasa aaga ana eedi ka tiicolo nja tidhi oona ku'bu na Almasiihi, a kadu könö tiki a'da, kede kara taneene nja aaga niicolo ka eedi, lakiini eede ka tanna ku'b'ba na rüsü.

<sup>2</sup> Nasaasa a'da eede kara taneene nja aaga ya, aaga tafa tanangnga a'a ka tarüsü, rüsü neede kara taneene nja kadu iini kara tiki kide a'da ungngo kaneene taneene ma tuu'da.

<sup>3</sup> Kaneene angnga a tuu'da ma tadü'dü, lakiini angnga taalo keema koro'bo ma eema ma tuu'da.

<sup>4</sup> Eema ma koro'bo yiidi taalo ama tuu'da ma tadü'dü, lakiini türü na Masala kara ta'böyö tarü'böönö na kidhö no ku'bu.

<sup>5</sup> Ungngo tarüdü ta'diniga oona coo'do nja nüümö tiya akara ada diidi ma tussu tumma ma Masala anangnga tumma nye'de ka pabuuus, angnga tanangnga i'i kaföönyö tumma na Almasiihi.

<sup>6</sup> Kada ka tümmü tumma ma Masala dhorro ya, ikirü ungngo ka tapusu kadu na silli eema no a tatüümö taföönyö naada.

<sup>7</sup> Kadino aaga nüümö ndama kürö miini, ömö'di ya ussu eyi yiini a'da i'i ya ömö'di tiya Almasiihi ya, fa kini ada dhorro kudumma iini ka tatiya Almasiihi

ya, ungngo afe'de ka tanno Almasiihi afa i'l.

<sup>8</sup> Taalo modolo magu a'a salsa na'diniga oona coo'do a tauugaara tanno Masala ka anangnga ungngo no, ma tindinaana aaga taalo ma taga'da aaga.

<sup>9</sup> Afa tafeene afa nuurugu ri'ba ada ka nanggeedi, ana kawaraga tiya.

<sup>10</sup> Ara ömö'di könö ana kada a tiki a'da, "Waraga ya Bölis idhindhi indhi, lakiini kini ka taneene nya angnga a 'bangnga ka oona, a tumma niini taalo ka idhindhi."

<sup>11</sup> Amang kene tessu kidi karigiri ada ka waraga a'da kitaalo ungngo kütü kafeene nya tiya iidit kataneeene nya aaga ya kungno.

<sup>12</sup> Taalo ungngo kara tambaanya tosse nanggeyi niidi ku'bu afa kadu na funugü nanggeyi neene no ko'do, euge kagesse nanggeyi neene ku'bu unggodho euge ka köje ana oona neene ka oona unggodho euge a'da taalo ka'dara.

<sup>13</sup> Lakiini ungngo taalo kara ta'diniga oona ko'do iini, lakiini tamana ma ndhiginö tanno Masala ka anangnga ungngo no ndhiginö na Masala afa kaja ungno tala aaga.

<sup>14</sup> Taalo ungngo karisi ko'do a ta'diniga oona coo'do tanno iidit. Üürü ungngo taalo kö'dö kada, kudumma iidit ka tagöö'dö kada dhorro a'da İnjili ma Almasiihi mungno iidit.

<sup>15</sup> Taalo ungngo ka'diniga nanggeyi niidi coo'do ka linggo tanno kadu könö ka talinggo no, lakiini kasaasa ungngo tassa ka tumma naada tinggiridene ikiri ndhiginö ma linggo naaja tadhabbu ka ndhiginö.

<sup>16</sup> Ara ungngo teema tumma ma İnjili no ku'b'ka ka naanya tanno ada no, taalo ungngo ta'diniga oona niidi coo'do ka linggo tanno ömö'di töccö ka ndhiginö ma linggo tanno iini.

<sup>17</sup> Lakiini, "Ömö'di ya 'dinigi eyi yiini coo'do ya, fa kini a'diniga eyi yiini coo'do ana Uugaara."

<sup>18</sup> Taalo ömö'di ya afünugü eyi yiini ko'do, i'i yungno adho ka fiini, illi ömö'di ya Uugaara ka tafünugü i'i ko'do ya.

## 11

### Bölis nya kadafiini tanno korokoro no

<sup>1</sup> A'a nasaasa a'da aaga tidhi nanggeedi ku'bu a 'banda'baga tiya eede ya idhilli ya, lakiini aaga kümmü aaga a'a nggege.

<sup>2</sup> A'a nagu'daana ka eedi ma aaga ka Masala kidha, kudumma eede ka tagümmüni aaga ku'bu ma ömö'di unggodho ya Almasiihi amang kede tanangnga aaga iini afa talomü minsili mo.

<sup>3</sup> Lakiini a'a nari'ba afa ni ka taküüsini Hawa ana ünggü tammo iini, ara nanggüdü naada taga'dadene nggege ka fiini ma tamma ka Almasiihi.

<sup>4</sup> Üürü ömö'di öccö öö'dö kada, eema tumma ma Yasu könö a'da taalo Yasu iidit ka teema iini nya ada kara ta'duga koronggore öccö keefe taalo afeene nya tiya ada ka'duga, alla İnjili keefe taalo mafeene nya tammo ada ka'duga mo, ara kagala ka'diila.

<sup>5</sup> Niiri a'a eyi yeede a'da taalo a'a no idhilli ka kadafiini tanno iffi no.

<sup>6</sup> Üürü tumma ka kii'bi a'a ya, taalo tessu eema kara tii'bi a'a, lakiini kussu adene ungngo ka eema nye'd'de.

<sup>7</sup> Alla a'a natoroko kudumma eede ka öö'dö a tumma ma Masala aaga a'da taalo faana kide, nüpu eyi yeede co, ara aaga kico aadha?

<sup>8</sup> Namma a'a ma ta'duga gürüüsü ka nakanisa könö amang kede tamünügü aaga ko'do iini.

<sup>9</sup> Kede ka taganeene nya aaga a'da taalo niimö kede, lakiini taalo nakan'dana ka ömö'di a'da anangnga niimö a'a, nagöre ma angnga na ö'dö ndama Makadoniya no kamana eema a'a nye'd'de, yungno eede ka takardha ku'bu a'da nafa tanyamanya aaga ka oona ma eema i'ndili, yungno eede ka tümmü eyi yeede dhorro.

<sup>10</sup> Ka tumma tanno Almasiihi ka tanna kede timin'da ya, taalo ömö'di ka naanya ma Akaiya tafaga a'a keere ka a'diniga oona tanno eede coo'do.

<sup>11</sup> Aminna? Kudumma a'a taalo nasaasa aaga? Masala mussu tumma eede ka aasaasa aaga.

<sup>12</sup> Lakiini yeede ka talinggo 'bitüngö ya, ara a'a tüütü ka tüünü eema yeede ka tüünü, amang kede taadha kadu na kiki a'da euge ka'diniga oona coo'do, kalinggo afa mungno kungno.

<sup>13</sup> Euge ka kadafiini tanno korokoro no, kalinggo ma tüüsüni kadu kümmü nanggeyi kada kadafiini tanno Almasiihi.

<sup>14</sup> Taalo aaga kama tadhere, kudumma Ebliisi kara temet'bele oona niini afeene nya tadhangga ma töyeeene.

<sup>15</sup> Taalo tadhere euge kungno, üürü kadu ma linggo niini küünü ünggü a'da euge ka kadu ma linggo tanno a'diila no. Keere kungno Masala mara tapusu euge ka tatoroko ma linggo tanno eene no.

### Bölis eema tumma ma dhügürü tanno iini

<sup>16</sup> Ara a'a teema afe'de, taalo ömö'di öccö tiki kide a'da a'a na'baga, lakiini aaga amma kede salsa ka taa'baga amang

kede taduna niimö yeede ka ta'diniga oona coo'do iini.

<sup>17</sup> Tumma neede ka teema no taalo tumma na Uugaara eege kamiini, lakiini a'a na'diniga oona coo'do afa 'baga.

<sup>18</sup> Tumma ma kadu ma 'büdhü'lü ka'diniga oona coo'do, ara a'a ta'diniga tekere.

<sup>19</sup> Aaga na 'dara no, aaga ambaanya kadu na nagaaga no a dhodho!

<sup>20</sup> Aaga ambaanya taneene ma kadu tanno ümmü aaga kada kasaga no, kanyooro aaga, kagu eema yaada, kamidhi aaga, kabbü aaga ka dhugudha.

<sup>21</sup> Magu modolo a'a meede kara tiki a'da ungngó kagi'di ka oona ma linggo tanno. Üürü ömö'di öccö asasa tabbü 'daniisö ma iini ya, neema a'a afa 'baga, ara a'a takardha ku'bu nabbü 'daniisö.

<sup>22</sup> Üürü eege ka Ebraniin, a'a ka eyi yeede a'a na taga Ibrani taga Israyil, üürü ka kadaada tiya Abrahiim ya, a'a na 'bii'bala tiya Abrahiim afe'de.

<sup>23</sup> Üürü eege ka kadu ma linggo tanno Almasiihi ya, ara a'a tiki afa ömö'di ya 'baga nagii'bi eege, nakambaanya a'a ta'b'badene nadagii'bi eege, nakete ka inde turi kungngo, naganna a'a ka pabusu dhabbu nadagii'bi eege, nadakidhi oona ku'bu ka tabbü adene nadagii'bi eege.

<sup>24</sup> Kabbü Yahüdü a'a tiidümmü, a tiiso kukumu ömö'di kaco iisine kafünü iidümmü afünü egüsö.

<sup>25</sup> Nabbü adene a maguuifi tiidoona, katüüri a'a a nüügsi ta unggodho, a babüürü ta'bu ana a'a tiidoona, nüyü ka söödö ma to uuru ana ooso miini.

<sup>26</sup> Ka tino tanno eede na dhabbu no, agalinggo 'büdi a'a ka naato, a kanyooro tagalinggo a'a, a Yahüdü tagalinggo a'a nja tanno taalo ka Yahüdü no, a kadu tagalinggo a'a ka naanya nja dhiile nja nagöre ma angnga no korokoro no.

<sup>27</sup> Nadhügürü a'a nüünü mananggööyö nja tadinigögö turi, nja iire a tenenge, nümmü tenege turi, natambaanya olle nja taneene ana oona ku'bu.

<sup>28</sup> Eema köönö inggide afe'de, dhügürü meede ka tinigögö ma nakaniisa nye'de kungngo.

<sup>29</sup> Ömö'di ka tagi'di na a'a tagi'di tekere? Ömö'di tara tünnü tam'baga a 'bangnga miini taalo tagu a'a?

<sup>30</sup> Üürü dhodho ma ta'diniga oona coo'do ka inggide, ara a'a ta'diniga oona neede coo'do a tagi'di tanno eede.

<sup>31</sup> Masala nja Pupa tiya Uugaara Yasu mara tafünügünja ko'do ta'billi mo, mussu a'da taalo a'a nakorokoro.

<sup>32</sup> Uugaara tiya linggo ada uugaara ya dhabbu ya ana eere a'da Alharis ya ma Demasak ya, anangnga kadu ka teere ka naginyyeene maanya meene kara tümmü a'a.

<sup>33</sup> Lakiini nagöre ma angnga kanangnga a'a ka singgili kimi'dina aru kide kadhiik a'a caa'bu ndama ööye ma ar'da, noolon-adene kini ka iisine.

## 12

*Bölisiji eema ya tö'dö ya*

<sup>1</sup> Ara a'a ta'diniga oona coo'do nadhodho. A'da nussu a'a taalo taduna niimö kide ara a'a tunggeene a tumma na ö'dönja no tanno Uugaara noono kala a'a kide no.

<sup>2</sup> Nussu a'a ömö'di ya Almasiihi inggide aga'dugadene aco 'dotombo'do tanno iidoona. A nagürüünü miini ka ndö'dö kada'baaga kafünü ka egüsö, taalo a'a nussu ömö'di ka tuu'da alla kürö ma tuu'da tanno iini, Masala oogo mussu.

<sup>3</sup> Yeede ka tussu ya, ömö'di a'dugadene aco 'dotombo'do a tuu'da tanno iini alla ana oona ku'bu, taalo a'a nussu Masala oogo mussu.

<sup>4</sup> Nussu a'a a'da a'dugadene aco 'di ma singgi nataföönyö tumma kide taalo tadü'dü ara tussu ka teema, itaalo ama iini ka tadünnü.

<sup>5</sup> Ömö'di ya miini ya ara a'a ta'diniga oona coo'do miini, lakiini a'a taalo nara ta'diniga oona coo'do illi a tagi'di tanno eede.

<sup>6</sup> Üürü a'a nasaasa ta'diniga oona coo'do ya, taalo a'a na taa'baga, kudumma eede ka teema tumma ma timin'da. Lakiini taalo a'a na ta'diniga oona coo'do ii'di ömö'di öccö teema tumma ma a'a nja iini ka tiji aföönyö kede.

<sup>7</sup> Amang kede tafa ta'diniga oona coo'do ma tidhindhü ma tiya alanja a'a kakanangnga tiimmü kede ka tuu'da kada tafüni tiya Ebliisi ma tabbü a'a.

<sup>8</sup> Nafara a'a ka Uugaara tiidoona a'da ma'duga kede ka oona.

<sup>9</sup> İkiri ka tiki a'a, "Türü neede ka 'dimo küdü, kudumma türü tanno eede kussu adene ka tagi'di." Nikiri a'a ka tadhodho na'diniga oona coo'do a tagi'di tanno eede no amang ka türü tanno Almasiihi taküdüm a'a ka oona.

<sup>10</sup> Nggeege ya yungngó eede ka tadhodho ka tagi'di tanno eede nja teeladene nja midhi, a mananggööyö nja dhügürü ka üüdü ma Almasiihi, kudumma eede kara tagi'di nana türü.

*Bölis adinigögö ma kadu ma Kürünsüs*

<sup>11</sup> A'a nungngo nanda'baga, aaga kungngo kaga'bunu a'a kide. Aaga kama tafünögü a'a ko'do, üürü taalo a'a na nüümö ya, lakiini taalo a'a nadhilli ka "kadafüni tanno iifi no."

<sup>12</sup> Natakalaala eema aaga nidhi oona ku'bu kada ka söödö amang kada tussu a'da a'a tafüni, eema keefe a türü ma tale'bele eema.

<sup>13</sup> Nüümö öccö yungngo ada ka titalo kafeene nya türeene ma nakaniisa iini, illi tumma eede ka titalo nanyamanya aaga ka oona a'da aaga tanangnga faana ma linggo tanno eede a'a. Aminna aaga fa kede ka eema tiya eede ka tagüünä ana aaga ya!

<sup>14</sup> A'a nungngo nakindinaana oona ku'bu ma tara tö'dö kada kanna asa tiidoona taalo a'a nara tanyamanya aaga ka oona lakiini nasaasa a'a aaga taalo almaala yaada, taalo laala indinaana eema ka kafaafa meene ku'bu, lakiini kafaafa ege kungngö kindinaana kene ku'bu.

<sup>15</sup> Ara oona ta'diila eede kede kara taama eema yeede naama eyi yeede afe'de. Üürü a'a nasaasa aaga dhabbu 'dee ara aaga tasaasa a'a idhilli?

<sup>16</sup> Afifgi nggeege taalo a'a nanyamanya aaga ka oona ma nüümö. Lakiini könö kiki a'da a'a nakorokoro.

<sup>17</sup> Na'duga a'a nüümö kada ndama kadu tanno eede ka agürünü ege kada no?

<sup>18</sup> Naga'bunu a'a Tito ka öö'dö kada nagürünü örre ma angnga nya iini, aga'duga Tito nüümö kada? Taalo ungngo kagalinggo a Koronggore tiya unggodno ya, taalo ungngo kuurna fiinä ya miini ya keere?

<sup>19</sup> Kiki aaga kide a'da tamma nüüdi no a'da ungngo ka ümmönö ka eyi tiya iidi kada kidha? Keema ungngo ka Masala kidha ana Almasiihi, tumma no in'dili nagöre eede ma tindinaana aaga ku'bu.

<sup>20</sup> Nari'ba a'a eede kara tö'dö kada kanna ara a'a taluna ka fiinä tiya ada kitaalo kasaasa a'a iini ya, aaga taduna a'a ka nüümö yaada taalo kasaasa ya, nya eede ka taluna tagoroo'bo kada ka söödö, nya kirimä nya midhi nya tisaana ka oona nya tanu aana ka oona nya tadhe kadu nya tabbü na'dugiisine nya taga'da 'buugu.

<sup>21</sup> Eede kara tö'dö afe'de ara Masala meede teela a'a nafara ma kadu kadhabbu na agüünä tam'baga ka dhidha no, kitaalo kaadha kide no, temelö nya fungngö nya kadu kadhoonyo nya tatoroko.

<sup>1</sup> Tö'dö kada kada kanna neede kanda iidoona. Sorne iki a'da, "Nüümö ya ara teemadene ma kadu keera nya eene ka tiidoona kadinö kide."

<sup>2</sup> Tö'dö kada kanna neede teera no, naganangnga a'a tumma a kadu tanno üünä tatoroko no, a'a nungngo nadirina afe'de a'da nitaalo a'a. Kede kara tafada taalo nara tana 'bangnga ma kadu tanno agüünä tatoroko kadhabbu no, alla kadu öccö.

<sup>3</sup> Kudumma ada kasaasa tussu a'da Almasiihi eema ana onggo'do tammo eede, Almasiihi taalo agi'di ka oona ma talinggo nya aaga, lakiini i'i ana türü kada ka söödö.

<sup>4</sup> A'da i'i abünnünja ka salii'bi a tagi'di tanno iini, illi i'i 'bitingngö efe ka 'di a türü tanno Masala. Ungngo afe'de kagi'di kini, lakiini a türü ma Masala ara ungngo tefe ka 'di ana i'i ma talinggo ada aaga.

<sup>5</sup> Aaga iiri nanggeyi naada ta'diila, kümmü aaga tumma ma Masala dhorro aaga iiri eyi yaada alla taalo aaga kussu nanggeyi naada a'da Yasu Almasiihi ungngo ada ka oona? Illi kada ka tagi'digi ko'do ka ta'b'badene.

<sup>6</sup> Kasaasa ungngo a'da aaga tussu a'da taalo ungngo kagi'di.

<sup>7</sup> Kafara ungngo ka Masala a'da aaga tafa talinggo eema ya toroko ya, taalo a'da ungngo kii'baana, lakiini amang kada tüünä eema ya a'diila ya salla ungngo a kadu saga tümmü ungngo kagi'digi ko'do.

<sup>8</sup> Taalo ungngo kara tamaanya tüünä nüümö ma tadiidi timin'da, lakiini kalinggo ada ungngo a timin'da.

<sup>9</sup> Kudumma iidi ka tadhodho kidi kara tagi'di, aaga tana türü, nüümö yüidi ka afara ka Masala kide ya a'da aaga tadhö ka fiinä aaga tinsili.

<sup>10</sup> Narigiri ada aaga a'da nitaalo a'a kada kete amang kede tafa tüünä tatoroko ana aaga a'da a'a nungngo ata kete afa ma türü tanno Uugaara ka anangnga a'a no ma tindinaana aaga ku'bu taalo ma taga'da ada aaga ku'bu.

### Tööjüü na eere no

<sup>11</sup> Keere kungngö nagöre eede, aaga ad-hodho, nunggeene a'a ka fiinä ma ta'diila, aaga toodo kede nasaasa a'a a'da aaga timi'di tumma ka unggodho aaga taneene a ta'diila, a Masala ma tasaasa nya ta'diila, mara taneene nya aaga.

<sup>12</sup> Aaga tööjüü tööjüü na insili no.

<sup>13</sup> Kadu ma kanüüa kööjüü aaga nye'd'de kungngö.

<sup>14</sup> Fa ka türü tanno Uugaara Yasu Almasiihi nya tasaasa ma Masala nya tagureene ma Koronggore tiya Insili aneene nya aaga nye'd'de kungngö.

## 13

### Tumma na eere no

## Waraga ya Bölis ma co Galatiya Tafa'da tumma

Galatiya ma ka riifö ma söödö ma 'büdhüllü tiya ana eere 'bitingngö a'da Türkiye ya. Bölis nija Barnaba kageeme tumma ma İnjili ma Yasu ka naanya ma Galatiya könö, a kadu tö'dö ka kaniisa kadhabbu (Kadafiin 13—14). Lakiini ndama uuru tanno miini no köö'dö kadu kadagalaana kadu ma kaniisa a'da kümmü eema ma Yahüdüd nja serije miini a nagiide meene tatendhe. İkiri Bölis ka tiki a kadu ma kaniisa a'da Masala moolona kadu na amma ka Almasiihi no nye'd'de, taalo kadu na uurna eema keere afa ma tiya kungngo. Iki a'da tumma kakki'din ja ku'bu nya a kadafiin tanno Almasiihi ka Örsaliim (Kadafiin 15).

Bölis iki a'da, iideene aja kara tanangnga Masala ka dhodho ana eema tiya aja ka talingga ya, ara angnga ta'diila nja Masala a tamma nya, afa Abrahiim ya taada ma Yahüdüd ya dhidha ya. (Galatiya 3:4). I'i ala angnga a'da taneene kada kadu ma kaniisa ya Koronggore ya Insili ya i'i yungno alaala angnga kide amang kaja tafoonyö tumma na Masala na idhindhi no amana angnga kasaasa ajeene dhadha no (Galatiya 5:6).

### Tööjüllü

<sup>1</sup> A'a na Bölis, a'a na tafiiñi, taalo kadu alla ömö'dü agürünü a'a, lakiini Yasu Almasiihi nja Masala tammo Pupa mo, mij i'i ka inde mo.

<sup>2</sup> Nja nagöre ma a'a nye'd'de, kunggu tumma no co nakaniisa ka Galatiya.

<sup>3</sup> Masala ma Pupa tiya aja nja Uugaara Yasu Almasiihi, tanangnga türü nja ta'diila ada ka oona.

<sup>4</sup> Yasu üpü eyi yiini co ka üdü ma tatoroko tanno aja, oolona angnga ka tatoroko ma kadu ka 'büdhüllü, tamana ma tasaasa ma eedi tiya Masala nja Pupa tiya aja mo turi ta'billi. Amiin.

<sup>5</sup> A Masala idhindhi turi ta'billi.

### Tumma na Masala ka unggodho

<sup>6</sup> Nadhere 'do ada ka taadha ka talaana a türü tanno Almasiihi niini ka tagümmünü aaga iini no, ara aaga ka tuurna talaana ököönö.

<sup>7</sup> Taalo tumma ma Masala ököönö afe'de lakiini kadu könö ka asaasa taga'da aaga ka nanggüdü kaga'da tumma na Yasu na 'diila no.

<sup>8</sup> Üürü ungngo alla tadhangga ndama 'dotombo'do ya eemaga tumma ma toolonadene aaga keefe, taalo kafeene nja tanno iidü ka tageema co aaga no, ara Masala taga'da i'i.

<sup>9</sup> Nagadirina aaga 'billi na'birneene 'bitingngö afe'de, üürü ömö'dü ököönö alaana aaga a tumma ma toolona taalo kafeene nja tanno ada kadussu no, ara Masala taga'da i'i turi.

<sup>10</sup> Taalo a'a neema tumma no a'da a'a nasaasa ta'diila ka kadu koona. A'a nasaasa Masala ma'diila nja a'a ana eedi. Niki o'o a'a nasaasa ta'diila nja kadu. Üürü a'a nasaasa tüünü nggeege taalo a'a nara tadasaga tiya Almasiihi.

### Masala magümmünü Bölis

<sup>11</sup> Nagöre eede, nasaasa a'a aaga tessu a'da tumma neede ka teemaga co aaga no, taalo ma tadü'dü egee kamiini.

<sup>12</sup> Taalo eema ma elle ma kadaada i'i ya miini, itaalo ömö'dü agalaana a'a kide, lakiini Yasu Almasiihi agalaana a'a kide.

<sup>13</sup> Kaföönyö aaga a'da a'a nagümmü Masala ma Yahüdüd dhorro, neede ka alingga kadu ma kaniisa na Masala, nasaasa tagirina eege.

<sup>14</sup> A'a nagümmü tumma ma Masala ma kadaada ma angnga dhorro, nümmü tumma ma Yahüdüd nadagii'bi köje ma a'a.

<sup>15</sup> Masala milli ka tagümmünü a türü tanno oono a'a a'da naleefe a'a ka nümmü tammo eede ka eedi manangnga a'a ka talingga linggo noon.

<sup>16</sup> Moono ka ala 'Bii'bala yoono Yasu a'a a'da nadünüğü tumma miini co kadu ma kajeene ya, taalo a'a nakindini ömö'dü öccö 'do.

<sup>17</sup> Taalo a'a nasirö co Örsaliim naco tassa ka kadu tanno kadafiin na kede kidha no lakiini nunggeene a'a naco anya ma Piirigide, nassa ka tafada naco Demasak.

<sup>18</sup> Kede ka ndagu'du nagürüünü kidoona ya nasirögö co Örsaliim ma tassa ka Bütrüs natüümö kide füngngö ada'baaga ana awwa.

<sup>19</sup> Nitaalo nadinö ka tafiiñi töccö nja iini, illi Yaguub ya öorre ma Uugaara Yasu ya.

<sup>20</sup> A Masala tadinö mussu a'da taalo tu'du eema egee kungngo kede ka rigiri ada co aaga.

<sup>21</sup> Ndama kanna naco Süüriya nja Kiliikiya.

<sup>22</sup> Nitaalo nagussudene ka nakaniisa tanno Yasu Almasiihi ka naanya ma Yahüüdiya.

<sup>23</sup> A'da kaföönyö a'da ömö'dü ya agalingga angnga ya, i'i 'bitingngö eema tumma ma tamma ka Masala niini ka tasaasa taga'da no.

24 Kanangnga ta'diila a Masala kudumma a'a.

## 2

### *Bölis nja kadafin'i ka Örsaliim*

1 Kede ka ndagu'du nagürüünü kada'baaga kafünü egüsö nunggeene naco Örsaliim nja Barnaba, na'duga Tito nja a'a afe'de.

2 A'a naco Örsaliim kudumma Masala ka tiki a'a a'da naco nalaala tumma neede ka teema a kajeene. A'a nalinggo tumma no ka küdhü nja kadiifii, ii'dü tumma neede tadhügürü 'billi no nja 'bitingngö kada tumma ün'dügüngngö.

3 Münda Tito yeede ka tunggeene nja iini ya, taalo ka'bunu i'i ka aradene kudumma iini taalo ataga Yahüdü.

4 Nagöre ma angnga kinggide kö'dö kaja ka söödö ka küdhü ka korokoro kümmü nanggeyi neene a'da egee nja angnga kaga'da tähürra naaja ta ungodho ka Yasu Almasiihi kasaasa angnga kada kasaga.

5 Ungngo taalo kamma kene kide salla id-hilli kungngo, kudumma ungngo kasaasa aaga a'da aaga tüü ka tamma ka tumma timin'da tanno Masala na 'diila no.

6 A kadu na iiffi no ka tamma na Masala no taalo kagusu niimö kide ka tumma. Nijöögö a'a ka eyi tiya eede taalo ta'bakala kene, kudumma Masala taalo müünü ada kadu köön ku'bū taalo kagusu niimö ka tumma tanno eede.

7 Lakiini egee kussu a'da Masala manangnga a'a ka talaana kadu na taalo ka Yahüdü no afa moono ka anangnga Bütrüs ka talaana Yahüdü kungngo.

8 Kudumma Masala manangnga Bütrüs ka tafin'i ma Yahüdü manangnga a'a ka tafin'i ma kadu na taalo ka Yahüdü no.

9 Yaguub nja Bütrüs nja Yühanna, egee kungngo ka nagiide ma kaniisa, kassa ka türü na Masala ka anangnga a'a no, kamma kede nja Barnaba kanangnga ungngo ka talaana kadu na taalo ka Yahüdü no, ara egee ka talaana Yahüdü.

10 Niimö yeene ka asaasa kiidü ya a'da ungngo tafa tüürü ma kadu ma kaniisa ya eema ka titalo kene no ka Örsaliim no, a niimö yeede ka asaasa ka talinggo 'bucca ya.

### *Bölis agirnaana ka Bütrüs*

11 Ka Bütrüs ka öö'dö ka Antakiya, nagir-naana kini kudumma iini ka talinggo eema ya toroko ya ka kadu kidha.

12 Ka kadu tanno Yaguub ka kürünü egee no ka tüfürü tö'dö ya, aagu Bütrüs eema nja kadu tanno taalo ka Yahüdü no, a kene ka ndö'dö ya ikiri ka taadha kini ka

oona taalo aguri nja eene kini ka ari'ba a Yahüdü tanno asaasa taradene no.

13 I'i aduna Yahüdü na ma kaniisa no ka Antakiya kafeene nja iini ka taadha kagu eema nja kadu tanno taalo ka Yahüdü no, a Barnaba ka eyi tiya iini uurna egee keere ma eema ma tatoroko tiya eene no.

14 Kede ka tasala egee, taalo kunggeene ka fiin'i ma Masala tiya dhorro ya, nükir'i ka tiki a Bütrüs ka kadu kidha niki iini, "O'o na taga Yahüdü naneene afa kadu na taalo ka Yahüdü no na o'o saga asaasa kadu na taalo ka Yahüdü no ka taneene afa Yahüdü amana?"

15 Ungngo kageenedene kada Yahüdü taalo ungngo ka kajeene tanno oroko no,

16 kussu angnga a'da Masala taalo manangnga ta'diila ömö'dü kudumma iini ka tümmü seriye tiya Müüsä, illi ömö'dü ya amma ka Yasu Almasiihi ya. Ungngo afe'de kamma ka Yasu Almasiihi taalo linggo ma Seriye. Ömö'dü taalo a toolon-adene alingga ma seriye.

17 A kaja kara tasaasa ta'diila ka Almasiihi kaduna angnga nanggeyi naaja ka toroko afe'de kafeene ungngo nja kajeene, nggeege 'dee Almasiihi ya üünü tatoroko? Kaw, taalo nggeege.

18 A kede ka tapadaga oona keere naco ka seriye afe'de yeede ka takanu kide nye'd'e, nggeege ara a'a taga'da seriye ya Masala.

19 Ka seriye neyi a'a ka seriye amang kede tefe ka 'dii ka Masala.

20 Neyi a'a nja Almasiihi a tefe ka 'dii neede 'bitingngö no na Almasiihi, tefe ka 'dii neede 'bitingngö ka tuu'da a tamma ma 'Bii'bala ma Masala ya asaasa a'a ümmünü eyi yiini a'a.

21 Taalo a'a nanu ka türü tanno Masala, kadu kata'diila ka nanggeyi neene kene ka tümmü seriye 'dee, ara inde na Almasiihi taga tumma ün'dügüngngö?

## 3

### *Seriye alla tamma ka Masala?*

1 Ka nagaaga ma Galatiya, mada aga'da aaga ka nanggiüdü? Taalo aaga ka kürü tumma neede ka taggeomaga dhorro ka kadu kidha a'da Yasu abünnünja ka salii'bi ka üüdü ma angnga?

2 Aaga adirina tumma a'a ka ungodho, Koronggore ma Masala ya 'dee ö'dö kada ka oona kudumma ada ka tamma ka seriye tiya Müüsä, alla kamma aaga kide kudumma ada ka taföönyö kede?

3 Kanagaaga aaga nya? Kiki aaga kide a'da aaga fatümö linggo na Koronggore ma Masala ka tagüünü ana aaga ya?

4 Kadhägürü aaga dhabbu ün'dügüngngö? Ara tadhügürü ün'dügüngngö nya?

<sup>5</sup> Masala 'dee manangnga Koronggore aaga nja linggo ma türü kada ka söödö kudumma ada ka talinggo a tumma ma seriye alla kudumma ada ka tamma kada ka taföönyö tumma kidi?

<sup>6</sup> Aaga iiri Abrahiim, afa ma Sorne ka tiki, "Amma ka Masala ana eedi dhorro. Mamma kini ka tamö'di tiya a'diila ya."

<sup>7</sup> Amang kada tussu a'da kadu na amma ka Masala no eege ka laala tiya Abrahiim.

<sup>8</sup> Sorne ma Masala illi ka takiki a'da Masala mara tanangnga kadu na taalo ka Yahüdü no ka tamma kini a tamma. Yungno oono ka tiki Abrahiim, "Ara a'a tanangnga baraka a kadu ka 'büdhülü ana o'o."\*

<sup>9</sup> Ömö'di na amma no kara tosso ka baraka nja Abrahiim ömö'di ya adho ka fiinii ya.

<sup>10</sup> Kadu na a'dana ka seriye tiya Müüsa koona no, ara Masala taga'da eege kudumma sorne ma Masala ka tiki a'da, "Taama ka tö'dö ka ömö'di ya taalo ümmü seriye ya Müüsa tiya kirinja ka Sorne ma seriye tiya Müüsa ya nye'de de kungngo."†

<sup>11</sup> Tumma dhorro taalo Masala mamma ka ömö'di kudumma iini ka tümmü tumma ma seriye tiya Müüsa. Kudumma Sorne ma Masala iki, "Ömö'di ya a'diila ka eedi a tamma ara taluna tefe ka 'di na Masala."‡

<sup>12</sup> Fiinii ma tamma ma Masala, ambana njaana ku'bu nja taneene ma seriye ya iki a'da, "Ömö'di ya aföönyö tumma ma seriye ya, ara taluna tefe ka 'di."§

<sup>13</sup> Almasiihi oolona angnga ka tatoroko ma seriye, kini ka toroko ma angnga kudumma iini ka takirinja ka sorne, "Ömö'di ya toroko ya a'da a'dalanja ka fa."

<sup>14</sup> Kudumma niimö tiya Yasu Almasiihi ka takalinggo ya, baraka ya a tananja Abrahiim, agananja a kajeene, kafiqi nggeege ara angnga ta'duga timi'di tumma ma Koronggore tiya Insili ya.

#### Seriye ya Müüsa nja timi'di tumma nja Abrahiim

<sup>15</sup> Nagöre eede, ara a'a teema tumma ma nakömö'di taalo ömö'di ma tambaanya tagildhe timi'di tumma na ömö'di nja eene kagusu niimö könö kide üürü kakidöhö.

<sup>16</sup> Masala mageema tumma nja Abrahiim nja 'bandaada miini. Sorne ma Masala taalo iki a'da, "kadaada kadhabbu," lakiini iki, "'bandaada unggodho," i'i yungno Almasiihi.

<sup>17</sup> A'a nasaasa tiki aaga a'da, Masala mimi'di tumma noono nja Abrahiim. A

seriye ya ka anangnga a Müüsa küfürü ka köö'dö a nagürüünü 430 a seriye ya taalo taga'da timi'di tumma na Masala aga'da tumma ka takiki a Abrahiim.

<sup>18</sup> A Masala ma tanangnga baraka aaga kudumma ada ka tümmü tumma ma seriye, iiya tumma noono ta tumma ün'dügüngngö. Tumma dhorro, Masala mana 'bangnga manangnga baraka Abrahiim a timi'di tumma.

<sup>19</sup> Aminna tumma ma seriye tiya Müüsa köö'dö nya ka kusunja kide afe'de? Kagusunja kide ma tala eema ya toroko ya kadu ka tüümü ya a taneene indhiği 'bandaada ma Abrahiim yoono ka takiki a'da atö'dö ya. Masala magürünü tadhangga a tumma ö'dö iini, a Müüsa ta'duga öö'dö iini a kadu kudumma iini anna ka söödö ma kadu nja Masala.

<sup>20</sup> Ömö'di ya anna ka söödö ma kadu nja Masala ya taalo alinggo ada ömö'di unggodho, alinggo ada a kadu nye'd'e de, a Masala ma unggodho.

<sup>21</sup> Seriye 'dee ma ta'bana ko'do nja tumma tanno Masala ka tageema no? Kaw, üürü seriye agananja a kadu ara tö'dö a tefe ka 'dii, nggeege ara tinsili tagöö'dö ana seriye timin'da.

<sup>22</sup> Lakiini Sorne ma Masala iki a'da kadu nye'd'e de kungngo ka niisö ma türü ma tatoroko. I'i yungno a Masala ka anangnga Koronggore tiya oono ka tamma ka Yasu Almasiihi, ka a kadu tanno amma kono no.

<sup>23</sup> Angnga 'do kaganna angnga ka pabusu ma tumma ma seriye tiya Müüsa, ara Almasiihi ka öö'dö assa ka tafa'da fiinii ma tamma ka Masala na dhorro no ana eere tiya Almasiihi.

<sup>24</sup> A tumma ma seriye tiya Müüsa ka taafa kaja ara Almasiihi ka öö'dö amang kaja ta'diila ka Masala kidha kaja ka tamma kini.

<sup>25</sup> A bütängngö kamma angnga ka Almasiihi a nanggeedi dhorro, taalo tumma ma seriye tiya Müüsa ka tafa kaja afe'de.

#### Laala ma Masala ka tamma

<sup>26</sup> Aaga nye'd'e de kungngo ka laala tiya Masala ada ka tamma ka Yasu Almasiihi.

<sup>27</sup> Kudumma aaga nye'd'e de ka tagambeesedene aaga ta unggodho nja Almasiihi, a tefe ka 'dii na Almasiihi ta'bürü aaga ka ona.

<sup>28</sup> Taalo tambanjanjaana ku'bu nja Yahüdü nja kadu tanno taalo ka Yahüdü no, nja kasaga nja kadu tanno dhorro no, nja iiya nja nagiide kudumma aaga in'dili ka unggodho ka Yasu Almasiihi.

\* 3:6 3.6 Takwiin 15.6; Rööma 4.3

\* 3:8 3.8 Takwiin 12.3

† 3:10 3.10 Seriye ya eera ya 27.26

‡ 3:11 3.11

Habakök 2.4

§ 3:12 3.12 Lawi 18.5

3:13 3.13 Seriye ya eera ya 21.23

3:16 3.16 Takwiin 12.7; 13.15; 24.7

<sup>29</sup> Üürü aaga ka kadu tanno Almasiihi, aaga ka laala tiya Abrahiim, a Masala tanangnga faka moono ka takadirina Abrahiim ya aaga.

#### 4

<sup>1</sup> Niimö yeede ka tiki ya 'dee, ka 'bii'bala ka taleefe tidhilli ya afeene afa tasaga, kussu angnga a'da i'i atakarna ka eema tiya faafaa miini i'i üfürü tadhabbu ma tafa kide.

<sup>2</sup> I'i aleefe tanna ka kadu könö ka niisö kaafa kini, ara ka öö'dö ka nagirüünü na faafa miini ka takiki no, assa afa ka eema tiya iini.

<sup>3</sup> Angnga ka eyi tiya aja kaja ka tagaleefe taga laala, angnga kagasaga ma naguu-garaa ma 'büdhülü.

<sup>4</sup> Ka uuru tanno Masala ka timi'di tumma no ka ndö'dö ya, ikiri Masala magürünü 'Bii'bala yoono ya agageenedene ndama aka mo, adageenedene ka serije.

<sup>5</sup> Amang kini ma toolona na aganeene taneene ma serije, angnga ta laala ma Masala.

<sup>6</sup> Kudumma angnga ka laala tiya Masala dhorro, yungno oono ka kürünig'i a Korrongore tiya 'Bii'bala tiya oono aco kaja ka nanggeedi iidhe a'da, "Abba, Pupa."

<sup>7</sup> A 'bitingngö taalo o'o na tasaga afe'de, o'o na 'bii'bala tiya Masala, Masala man-angnga o'o ka takarna ka eema tiya oono.

#### Kadu ma Galatiya

<sup>8</sup> Ka dhidha a'da küfürü aaga tagussu Masala, kagasaga aaga ma namasala ka 'büdhülü mitaalo ka dhorro no.

<sup>9</sup> A 'bitingngö sa aaga tussu Masala, a Masala mussu aaga, aminna agu aaga, ara aaga tapadaga ka eema tiya agi'di na oroko no afe'de? Kasaasa aaga tapadaga ka tadasaga afe'de?

<sup>10</sup> Kanaana aaga iïye ka naguuru nja nagatereene nja tagu'du ma ürüünü.

<sup>11</sup> Nari'ba a'a ada aaga ka linggo tanno eede ka tagalinggo ada aaga no nye'de tanggaaga ta niimö ün'dügündüngö.

<sup>12</sup> Nagöre eede, a'a nasaasa aaga a'da aaga tafeene nja a'a, kudumma eede ka afeene nja aaga. Taalo aaga ka küünii niimö ya toroko ya ana a'a.

<sup>13</sup> Amang kada tussu a'da kede ka tamaara taalo aaga kakaanu kede, aaga taalo kagamidhi a'a, kagala aaga ka tamma kede adha.

<sup>14</sup> Kada ka tagaama miini aaga taanu kede aaga tagamidhi a'ka ka tin'di tanno eede, illi aaga taalo ka küünii nggeege, kagala aaga katamma kede 'do afa tadhangga ya Masala afa a'a na Yasu Almasiihi ka eyi iini kungno.

<sup>15</sup> Kadodho aaga ka uuru tanno miini no, a dhodho na miini no könynyö aaga 'bitingngö? Ara a'a tiki a'da kasaasa aaga a'a dhindho afa maada ka tagodhe laala ma iïye yaada aaga tanangnga a'a.

<sup>16</sup> Asa aaga tümmü a'a 'bitingngö kada kirimi ka oona kudumma eede ka tageemaga ka tumma na dhorro no aaga?

<sup>17</sup> Kadu no kasaasa aaga dhorro, lakiini taalo a'diila nja aaga, eege kafaga aaga keere kede ka oona amang kada tasaasa eege.

<sup>18</sup> A'diila nggeege kada ka tarna iiya yaada ka eema tiya a'diila ya, aaga tünni nggeege turi aaga tafa tan'dana kede nöö'dö, aaga sa ka talingga.

<sup>19</sup> Laala eede, nadhügürü a tin'di kudumma aaga, afa aka ma eedi kagu oogo ma teene mo kungngo, ara a'a tüü kadhügürü nggeege ara tumma na Almasiihi kaco kada ka nanggeedi dhorro amang kada ta kadu tanno Almasiihi dhorro.

<sup>20</sup> Nasaasa a'a taneene nja aaga 'bitingngö amang kede tagere tumma neede co ada ka nanggüdü kudumma eede taalo nussu minna agu aaga, aaga tünni kungno.

#### Hajir nja Sara

<sup>21</sup> Aaga tirina a'a, aaga no asaasa serije ya Müüsa ka anangra a Yahüdü no, kussu aaga a'da serije ya Müüsa kiki nya?

<sup>22</sup> Sorne ma Masala iki a'da, laala aganna ka Abrahiim keera, ya 'bii'bala ma madasaga, aya ta'bii'bala ma aka tammo dhorro mo.

<sup>23</sup> 'Bii'bala ya madasaga ageenedene ka tuu'da kungngo, a 'bii'bala ya aka tammo dhorro mo ya ageenedene ka tumma tanno Masala ka tageema ara ateenedene no.

<sup>24</sup> Iiya na eera no kafeene nja timi'di tumma keera, timi'di tumma na Masala nja Israyil ka anya ma Siina noono ka anangra tumma noono eene no, afeene nja laala tiya Hajir ka tageene kada kasaga kungno.

<sup>25</sup> Hajir mafeene nja anya ma Siina manna ka anya ma Piirigide mafeene nja anya ma Örsaliim ma 'bitingngö mo manna ka tadasaga nja laala tiya oono nja kadu miini kada kasaga mo mümmü tumma ma serije tiya Müüsa mafa kide mo.

<sup>26</sup> Lakiini Örsaliim ma 'dö ma Masala mo, mafeene nja tammo dhorro mo, oogo mungno ma niimö tammo aja.

<sup>27</sup> Sorne ma Masala iki, "O'o namele, nitaalo nageene no, ikijene, nadhodho o'o nitaalo nussu tin'di ma teene no,

kudumma aka maneene unggodho oogo  
a'da taalo nyori kono,  
ara laala tanno oono tadhabbu  
mii'bı aka ma ana nyori mo."

<sup>28</sup> Aaga na nagöre eede, kafeene aaga nja Ishak kudumma aaga ka laala ma tumma tanno Masala ka tadirina Abrahiim, afa ma Ishak kungno.

<sup>29</sup> 'Billı ka naguuru tanno miini no 'bii'bala ya ageenedene a tuu'da ün'dügüngö agalinggo adene 'bii'bala ya ageenedene ndama Koronggore ya, üünidene 'bitingngö.

<sup>30</sup> Lakiini tumma na Masala kiki nya ka sorne? Iki sorne kungno, "Uru madasaga ka tino nja 'bii'bala tiya oono, taaloatakarna ka nüümö 'do. A 'bii'bala ya aka tammo dhorro mo ara takarna ka eema nye'd'e kungno."

<sup>31</sup> Angnga 'bitingngö nagöre eede taalo angnga ka laala tiya aka tammo ma madasaga mo, angnga ka laala ma aka tammo dhorro mo.

## 5

### Tahurra ka Yasu Almasiihi

<sup>1</sup> Almasiihi anangnga kada hurra amang kaja taneene kada kadu tanno hurra no. Aaga idhi oona ku'bu aaga tafa tapadaga ka tadasaga afe'de.

<sup>2</sup> Aaga toodo ka tumma tanno eede a'a no Bölis no, üürü aaga katendhe ma nanggeyi tanno ada ara Almasiihi ta nüümö ün'dügüngö ana aaga.

<sup>3</sup> Ara a'a teema nja aaga afe'de ömö'di ya afa ka eyi tiya iini atendhe ya, fa kini afa ka tumma ma seriye nye'd'e.

<sup>4</sup> Aaga na asasa ta'diila nja Masala a tümmöönö ma seriye no ka tadheene nja Almasiihi aaga tagu'b'ba ka türü ku'bu.

<sup>5</sup> Lakiini angnga kündhiigü Masala manangnga angnga ka a'diila nja oono, angnga tündhiigü oogo a tamma nja türü ma Koronggore tiya oono.

<sup>6</sup> Kaja ka tamma ka Yasu Almasiihi ya, nassa ka tatendhe alla taalo o'o natendhe, taalo a nüümö 'do. Niümö ya asaadene ya, tamma na linggodene a tasaasa no.

<sup>7</sup> Kaganeene aaga ka dhidha ka'diila, a mada afada ana aaga ka fiin'i tiya dhorro ya?

<sup>8</sup> Niümö ya agüün'i adene ya taalo ndama Masala tammo magümmünü aaga mo.

<sup>9</sup> "Bandigüdi idhilli kungno atanangnga elö ka tüfü."

<sup>10</sup> Namma a'a ka tumma tanno Uugaara ana eedi a'da aaga 'bitingngö ya taalo kaföönyö tumma ma fiin'i ün'dügüngö

afe'de. Ömö'di ya aga'da aaga ka nanggüdü ya ara Masala saga tüün'i tatoroko ana i'i salsa i'i ka tafaanya.

<sup>11</sup> Nagöre eede, üürü a'a naleefe teema tumma ma taradene, aminna aju a'a nalinggo adene? Nggeege ara takara ka salii'bı ka'dugadene.

<sup>12</sup> A'a nagala ka asasa kadu no anyamanya aaga ka oona a tumma ma taradene kunggunu co iini ka'dili nanggeyi neene.

<sup>13</sup> Nagöre eede, Masala magümmünü aaga a'da aaga tafa ta kasaga ma eema ma tuu'da, tumma na Masala ka tümmünü aaga iini ki'i'di tanangga aaga ka tüün'i eema ya toroko ya, aaga asasa kadu nye'd'e aaga takinyi linggo eene a tasaasa.

<sup>14</sup> Tumma na Masala ka öö'dö iini a Yahüdü no, kananja ka nüümö unggodho a'da, "Asaasa ömö'di ya kete küdü ya afa müüdü ka asaasa eyi yüüdü kungno."

<sup>15</sup> Kada ka tüü ka tamidhi ajeene a taguri ajeene unggodho aaga, aaga afa ka oona aaga adini ko'do ii'di aaga tili ajeene ka oona unggodho aaga.

*Tefe ka 'dii ma Koronggore tiya Insili ya*  
<sup>16</sup> Nikiiri a'a ka tiki aaga a'da aaga taneene a türü ma Koronggore tiya Masala amang kada tafa tüün'i eema ya toroko ya a tuu'da ma tamö'di.

<sup>17</sup> Eema ya tuu'da tanno aja kasaasa ya, i'i yungngö a Koronggore tiya Insili ya ka faga angnga keere iini ya i'i ya miini, a Koronggore ya Insili ya asaasa angnga ka talingga eema ya a'diila ya tuu'da tanno aja katitaalo kasaasa no, tumma neene taalo kicaana ka oona nja tiya ada ka asasa talingga yo.

<sup>18</sup> Kada ka talingga a tumma tanno Koronggore ma Masala ka tiki aaga no, taalo aaga ka tanna ka tadasaga ma tumma ma seriye tiya Müüsa ka öö'dö iini a Israyil no.

<sup>19</sup> Linggo na toroko na tuu'da ka asasa no kussu adene, temelö nja tadinögöö ma füngngö nja kadu kadhoonyo.

<sup>20</sup> A namasala tanno toroko mo kabbü tamirö, kamidhi kadu, keema koro'bo, kanggoroo'bo kete kete, kasaasa nanggeyi neene, kanu ka kadu, kadhegedhe nanggeyi niini nja kadu töccö.

<sup>21</sup> Linggo ma kirimi, kooye ngeeli keke kide, ana eema tiya toroko ün'dügüngö ana eema töccö 'do, ara a'a tadirina tumma afa ma tiya ka dhidha ya kungno, kadu na aneene kungno no taalo kara takarna ka tauugaara ma Masala.

<sup>22</sup> Lakiini ta'diila ma Koronggore ma Masala tasaasa, dhodho, ta'diila ma eedi,

tidhi oona ku'bu, 'bangnga, taneene ta'diila, tinsili ka eedi nja kadu.

<sup>23</sup> Ta'diila ma tamö'di nja tümmü eyi yüdü nafa takordo kordo kada kadüünü nggeege ya taalo aaga ka taga'da tumma na Masala kungngo ka seriye no.

<sup>24</sup> Kadu na Yasu Almasiihi no kabünnü oona neene na oroko no ka salii'bi nye'de nja tasaasa ma eema ma 'büdhüllü.

<sup>25</sup> Angnga kefe ka 'di a Koronggore ma Masala a kaja ka tefe ka 'di a Koronggore ya Masala keere.

<sup>26</sup> Kada fa tan'dinigi oona naaja ko'do angnga tafa teela kadu angnga ta'digineene nja eene, angnga tafa takirimi kadu ma tasaasa eema yeene.

## 6

### *Tüünii ada ta'diila a kadu nye'de*

<sup>1</sup> Ka nagöre eede, ka ömö'di töccö ana kada ka tümmü adene ka niimö tiya toroko ya, aaga na ümmü tumma ma Masala no ana eedi dhorro no, aaga kungngo ka talaala i'i ka fiini ta'diila, afa ka eyi tiya üdü ii'di o'o ta'dingga ka tatoroko ka eyi tiya üdü afe'de.

<sup>2</sup> Aaga faana ka oona aaga takinyi njaana ko'do a linggo, nggeege ara aaga talinggo eema ana seriye tiya Almasiihi ka asaasa angnga iini ya.

<sup>3</sup> Ömö'di ya üünii eyi yiini a'da i'i ii'baana ya tumma dhorro taalo i'i ya niimö, i'i üssini eyi yiini.

<sup>4</sup> Ömö'di türi linggo niini ta'diila, üürü i'i ya a'diila ya asa ka tan'dinigi eyi yiini coo'do asa kafa türi eyi yiini afa ömö'di öccö.

<sup>5</sup> A'a niki nggeege kudumma ömö'di tiya talinggo niimö ya, i'i yungngo assa ka tammo iini unggodho i'i.

<sup>6</sup> Kadu na laadene ka tumma ma Masala no, fa kene kosso ka eema tiya eene ya a 'diila ya nja kadu tanno laana egee no.

<sup>7</sup> Aaga fa tüsinii nanggeyi naada, taalo Masala ma tüsinidene, ömö'di ya adinigile ya i'i yungngo ataraana.

<sup>8</sup> Ömö'di ya adinigii a tasaasa ma tuu'da ya, ara taluna tuu'da ma tatoroko, ömö'di ya adinigii a Koronggore ya ara taluna tefe ka 'di ka Koronggore.

<sup>9</sup> Aaga fa tagi'di ka linggo tanno 'diila no keere, ara angnga taluna eema ya a'diila ka uuru tanno Masala ka tö'dö no kaja ka tafa tagi'di ko'do.

<sup>10</sup> Nggeege kada kalinggo eema ya a'diila ya a kadu aja ka taduna fiini, münda kadu na amma ka Yasu Almasiihi no angnga ta'diila nja eene nye'de kungngo.

<sup>11</sup> Aaga assa ka kireere'be tanno dhabbu no, eede ka tarigiri ada aaga a niisö tanno eede no.

<sup>12</sup> Kadu na asaasa talinggo eema ma tuu'da ün'dügüngngö ma tasaasa Yahüdü a'da ka'diila nja eene no, egee kungngo ka asaasa ta'bunu aaga karadene, egee kalingngo nggeege amang ka kadu tafaga egee keere kudumma tamma ka salii'bi tiya Almasiihi.

<sup>13</sup> Münda kadu na aradene no, taalo kümümü tumma ma seriye, egee kasaasa a'da aaga taradene amang kene tabbü 'danisö a'da aaga kuurna taradene ma tuu'da keere.

<sup>14</sup> Üürü a'a nasaasa tafünügү eyi yeede ko'do ya, nafünügү i'i ko'do ana Yasu Almasiihi kudumma iini ka teyi ka üdü ma angnga, kudumma inde tanno iini no kafa ka eema ma 'büdhüllü itaalo a niimö ana a'a, a'a ka eyi tiya eede taalo a'a na niimö ka 'büdhüllü.

<sup>15</sup> Ömö'di saga tatendhe üürü taalo atatendhe taalo Masala manu kini, niimö ya agu'daana ya taluna tefe ka 'di ma Koronggore ma Masala ya 'diila ya.

<sup>16</sup> Ara Masala tanangnga ta'diila a 'bangnga a kadu tanno uurna tumma noono keere no, nja kadu na amma kono no nye'de.

<sup>17</sup> Ndama uuru tanno taalo a'a nasaasa ömö'di anyamanya a'a ka oona, nagoola neede ka oona no, nagoola ma kadu tanno adiidiiri a'a kudumma eere tiya Yasu.

<sup>18</sup> Nagöre eede, fa ka türü tanno Uugaara Yasu Almasiihi ka aneene nja aaga in'dili. Amiin.

## Waraga ya Bölis ma co Afosus Tafa'da tumma

Bölis arigiri ada waraga a kadu ma kaniisa ka Afosus anya mo ka 'büdhü'lü tiya ana eere 'bütingngö a'da Türkiya mo. Bölis aganna ka Afosus a nagürüünü kiidoona adünnü tumma ma İnjili a kadu tamma ka Almasiihi kadhabbu kaadha katümmü eema ma masala ma Artamis (Kadaifiin 19).

Bölis arigiri ada waraga co kadu ma Afosus a'da ungnog ka pabuusu ka Rööma (Afosus 3.1). Arigiri iki a'da naganuru kanda afaradene ya ara eema nye'd'de tanna ka nüüsö ma Almasiihi. Ka kadu kanda uruna Yasu keere kara ta unggodho ka Almasiihi kada kadu ka unggodho. Bölis eema nja tanno üri waraga no a'da kasaasa ajeene kicolo ka nanggeedi nja kadu könö kaadha ka taneene ma 'billi no ma korokoro nja tam'baga, kaneene taneene ma timin'da nja 'bangnga nja tafa ka tatoroko tanno kadu dhidha.

### Tööjü'lü

<sup>1</sup> Waraga ö'dö ndama Bölis tafiinü ya Yasu Almasiihi a tasaasa ma eedi tiya Masala na unggu co kadu ma kaniisa no ka Afosus no nja tanno amma ka Yasu Almasiihi no.

<sup>2</sup> A Masala ma Pupa tiya aja nja Uugaara Yasu Almasiihi, tanangnga türü aaga nja ta'diila.

### Baraka ma koronggore ka Almasiihi

<sup>3</sup> Kada nangnga ta'diila a Masala nja Pupa tiya Uugaara tiya aja Yasu Almasiihi manangnga baraka ma koronggore angnga, baraka ya Almasiihi ka 'dotombo'do.

<sup>4</sup> Masala magesse angnga ka Almasiihi a'da müfürü tarü'bü 'büdhü'lü amang kaja tinsili a'da taalo hetti kide kidha moono ka tasaasa.

<sup>5</sup> Masala milli ka takiki a'da oogo tümmü angnga kada laala tiya oono ana Yasu Almasiihi oogo masaasa ka eyi tiya oono.

<sup>6</sup> Kadagafünüğü Masala ko'do ka türü tanno oono yoono ka anangnga angnga a'da taalo faana kide ka 'Bii'bala tiya oono ka asasa i'i ya.

<sup>7</sup> Kagoolonadene angnga ana eriidö tiya iini ma taagala tatoroko aja ka oona, a tüüsü ma türü tanno oono

<sup>8</sup> yoono ka anangnga angnga ka tadhabbu ma ta'dara tanno oono nja tussu eema.

<sup>9</sup> Eema ya Almasiihi ka tagüünü, Masala mala fiini ma eema tiya oono ya küdhü ya angnga.

<sup>10</sup> Linggo na Masala kara tatuumö eege ka uuru miini kono ka tö'dö ana eema tiya oono ka tarü'böönö no nye'd'de ya ka 'dotombo'do ya nja tanno ka 'büdhü'lü ka nüüsö tanno Almasiihi tiya Uugaara ya.

<sup>11</sup> Masala magesse angnga afe'de manangnga angnga kada unggodho ka Almasiihi, kudumma oono masaasa tüünin ggege. Oogo magüünü eege nye'd'de afa moono ka asasa kungngo.

<sup>12</sup> Kada kafünüğü töyeeene na Masala ko'do angnga na kindhügi oogo jiddi ma 'billi no, ana eere ma Almasiihi.

<sup>13</sup> Aaga afe'de aaga ka kadu tanno Masala ka taföönyö tumma ma timin'da, tumma na 'diila no toolona aaga no aaga tamma aaga tabünnü hitimi a Koronggore ya Insili ya oono ka tatiraana ya.

<sup>14</sup> I'yungno afaana maaja kara takarna kide idhi a Masala tafa kadu noono ma tafünüğü oogo ko'do ka tidhindhü tanno oono.

### Tamana ta'diila nja tafara ka Masala

<sup>15</sup> I'yungno eede ka taföönyö tamma naada ka Uugaara Yasu nja tasaasa tanno ada ka kadu ma kaniisa in'dili kungngo.

<sup>16</sup> Namana a'a ta'diila a Masala 'bucca kudumma aaga turi kungngo nagüngi tumma aaga eede ka teema nja Masala.

<sup>17</sup> Nasaasa a'a Masala mo Uugaara tiya aja Yasu Almasiihi, Pupa ma tidhindhü, a'da manangga koronggore ma ta'dara adele i'i aaga amang kada tussu oogo tussu ma timin'da.

<sup>18</sup> Nafara a'a ka Masala a'da aaga tafa'da nanggüdü naada amang kada tiji töyeeene noono amang kada tussu tündhügi noono ka ümmünü aaga iini no, eema yoono kara tanangnga angnga no ma kaniisa no.

<sup>19</sup> Türü noono na idhindhü no alinggo kaja ka oona angnga na amma ka türü tanno alinggo kaja no a türü na Masala na ii'baana no

<sup>20</sup> noono ka tagalinggo ka Almasiihi kono ka fiki'dö i'i ka inde manangnga i'i ka temmi kono ka nüüsö ma kuri ka 'dotombo'do.

<sup>21</sup> Almasiihi yungno ko'do ma tauugaara nja türü nja türü nja tauugaara, i'i ya uugaara ma eema nye'd'de ka 'büdhü'lü tiya. Ara ta uugaara ma tiya ara tö'dö ya afe'de.

<sup>22</sup> A Masala tanangnga eema iini ka uune in'dili mümmü i'i kada üüdü ma eema in'dili ma kaniisa.

<sup>23</sup> Kaniisa oogo ma tuu'da tanno Almasiihi madigi i'i, i'i yungno adigi eema nye'd'de.

**2***Tefe ka 'dī ka Almasiihi*

<sup>1</sup> A 'billi kakaaya aaga ka tatoroko nja tam'bag'a tanno ada,

<sup>2</sup> kisi aaga ka eema ma 'büdhü'lü keere aaga tamma ka tumma ma uugaara ma türü ma koronggore tiya toroko ya ka 'dotombo'do, koronggore na ümmü kadu no anu ka Masala no.

<sup>3</sup> Angnga nye'd'e kafeene angnga nja eene, angnga taganeene taneene ma 'büdhü'lü angnga tagalinggo eema ya toroko ya nja eene ma tasaasa eema ma nanggüdü tanno aja, angnga ka laala ma tagoroo'bo, ara angnga tapusu adene afa türeene ma kadu.

<sup>4</sup> Lakiini 'bangnga ma Masala ma dhabbu nya tasaasa tanno oono nja angnga dhabbu no.

<sup>5</sup> Mafiki'dö angnga ka inde nja Almasiihi a'da asa angnga takaaya ka tatoroko tanno aja. A türü tanno Masala, kaduna aaga toolonadene.

<sup>6</sup> Mafiki'dö angnga nja Yasu Almasiihi manangnga angnga ka temmi nja iini ka 'dotombo'do.

<sup>7</sup> Ara tö'dö ka nagürüünü tanno ara tö'dö no, a türü tanno oono a 'bangnga tammo oono maala angnga ka Almasiihi mo.

<sup>8</sup> A türü tanno Masala ka tuna aaga toolonadene a tamma, taalo ndama aaga lakiini Masala manangnga aaga.

<sup>9</sup> Taalo linggo naada eege kamiini, lakiini linggo na Masala eege kamiini ii'dü ömö'dü könö tabbü 'daniüsö iini.

<sup>10</sup> Masala marü'bü angnga, karü'bü adene angnga ka Almasiihi Yasu ma linggo ma eema tiya a'diila ya, ya Masala ka takindinaana kaja ku'bu ka dhidha amang kaja talingga.

*Angnga ka unggodho ka Almasiihi*

<sup>11</sup> Nggeege kussu aaga a'da taalo aaga ka Yahüüdü dhorro, Yahüüdü keerna a'da eege karadene ka tuu'da no taalo kümmü aaga kada kadu ma taradene.

<sup>12</sup> Kaganeene aaga 'billi a'da taalo aaga kussu Almasiihi kagu'b'ba aaga ka kadu ma Israyil ku'bu, aaga ta kölöge aaga taalo kakete ka timi'di tumma tanno Masala ka takiki no. Kaneene aaga ka 'büdhü'lü tiya a'da taalo tündhigü kada a'da taalo Masala kada.

<sup>13</sup> Lakiini 'bitüngnö ka Yasu Almasiihi asa aaga takete ana eriüdö tiya Almasiihi a'da kagu'b'ba aaga.

<sup>14</sup> Almasiihi i'i yungngo ata'diila anangnga Yahüüdü nja kadu tanno taalo ka Yahüüdü no kada unggodho, ürrüdü ndhiüdhö ma takirimi na aganna kene ka söödö ya.

<sup>15</sup> I'i aadha ka seriye nja tumma miini nja linggo miini ka tuu'da tanno iini, eedi yiini a'da adina ömö'dü öccö unggodho ana ka kadu tanno eera no ka eyi tiya iini ma tüünä ta'diila.

<sup>16</sup> Indinaana eege ku'bu a teera meene nja Masala ana salii'b'i tiya iini, ürrüdü dhüüdhö ma kirimü, uuraana kadu ka oona nye'd'e ka tuu'da kada unggodho.

<sup>17</sup> Almasiihi ö'dö adageema ka tumma ma ta'diila aaga na kajeene no kaku'b'ba ka Masala no nja ta'diila ka kadu tanno akete no.

<sup>18</sup> Angnga nye'd'e kungngo, kajeene nja Yahüüdü ana eere ma Almasiihi ara angnga tagöö'dö a Koronggore unggodho kidha ma Pupa.

<sup>19</sup> Ndama uuru tanno taalo aaga ka kölöge taalo ka kafala afe'de aaga nja kadu tanno Masala ka unggodho aaga kadu ma 'dö tiya Masala.

<sup>20</sup> Karü'bününja aaga ka kadese tanno kadafiüni nya nagane'b'i a müsi ma kadese a'da Yasu Almasiihi ka eyi tiya iini.

<sup>21</sup> I'i yungngo anangnga tarü'böönö ka tümmü ajeene nye'd'e inggidene anangnga i'i kada la ma Masala ya insili ya.

<sup>22</sup> Aaga nja iini afe'de karü'bü adene aaga nja iini amang kada ta'buugu ma taneene ya Masala kadanna kide a koronggore ya.

**3***Bölis alaana kajeene*

<sup>1</sup> Kudumma tumma tanno a'a na Bölis, a'a na ka pabuuus tiya Yasu Almasiihi kudumma aaga na kajeene no.

<sup>2</sup> Kussu aaga tumma na türü tanno Masala ka anangnga a'a ka üüdü ma aaga no.

<sup>3</sup> Madele taküdhü ma linggo tanno oono a'tiya eede ka tarigiri ada aaga idhilli ka dhidha ya kungno.

<sup>4</sup> Üürü kaginüri aaga tumma neede ka tunggu aaga no ara aaga tussu a'da nussu a'ta taküdhü na Almasiihi.

<sup>5</sup> Taalo ömö'dü ma tussu tumma küdhü no, idhi a Koronggore ya Masala tadirina a kadafiüni tanno Masala na insili no nja nagane'b'i.

<sup>6</sup> A taküdhü no, eege ana eere ma İnjüili, ara kajeene tosse ka takarna ka eema nja Israyil, ka unggodho ka tuu'da, kosso ka timi'di tumma ka Almasiihi Yasu.

<sup>7</sup> A'a na ömö'dü ma linggo ma İnjüili tammo a türü ma eema tiya Masala ka anangnga a'a ya a linggo ma türü tanno oono.

<sup>8</sup> A'a nungngo nadhilli ka kadu ma Masala ka teene nye'd'de, Masala manangnga türü no a'a a'da nalaana kadu na taalo ka Yahüdü no, taalo ndhgïnö ka tüüsü tanno Almasiihi.

<sup>9</sup> A kadu nye'd'de tessu linggo na Masala na küdhü no kümmü oono ma 'billi ma Masala ka tarü'bü eema in'dili.

<sup>10</sup> A naguuru na 'bitengngö no ana kaniisa a naguugaara nja naguugaara ka 'dotombo'do kussu ta'dara noono ka eema kadhoonyo nye'd'de kungngo.

<sup>11</sup> Masala magalinggo kungngo a tessu kide tanno oono ka tagüünı ma 'billi ana eere ma Masala tiya aja Yasu Almasiihi.

<sup>12</sup> Tamma kini naaja no ara angnga tana rüüsü ma takete ka Masala a'da taalo ri'ba a tagu angnga.

<sup>13</sup> Nikiri a'a ka tiki aaga a'da, aaga tafa tadinögöög kudumma dhügürü tiya eede ya ka üüdü ma aaga i'i agala ka'diila nja aaga adha.

#### *Bölis afara ka Masala*

<sup>14</sup> Kudumma a tumma tanno, na a'a türü ku'bu ana küüge nafara ka Masala Pupa yaaja.

<sup>15</sup> I'i yungngo a kadu tanno ka 'dotombo'do no nja 'büdhüli ka'duga eere yiini.

<sup>16</sup> Nasaasa a'a Masala ma türü ma tidihindhi tiya oono a'da manangnga türü ma Koronggore tiya oono kada ka oona.

<sup>17</sup> A'a nafara ka Masala a'da Almasiihi anna kada ka nanggeedi a tamma. A'a nafara ka Masala a'da aaga tarigü uune caa'bu dhorro, aaga takidhö ka tasaasa,

<sup>18</sup> Nye'd'de nja kadu tanno Masala kaana türü ma tessu tadhappu nja tadhonggoro nja ta'doogo nja ta'buugu a tasaasa na Almasiihi kada eegə kamiini.

<sup>19</sup> Aaga tessu tasaasa na Almasiihi agii'bi tessu eema amang tadigine ana eema nye'd'de ya Masala ka tigaana ya.

<sup>20</sup> Fa ka Masala manangnga türü malingga kaja ka oona, oogo mambaanya talingga eema dhabbu adagii'bi niümö yaaja ka asasa ya.

<sup>21</sup> Tidihindhi kungngo oono ka kaniisa nja Yasu Almasiihi ka sere in'dili, turi ta'billi! Amiin.

#### **4**

#### *Ta unggodho ka tuu'da ma Almasiihi*

<sup>1</sup> A'a nanna ka pabuuusu kudumma linggo ma Uugaara, nasaasa aaga a'da aaga taneene taneene afa ma tanno Masala ka tagümmünü aaga iini no kungngo.

<sup>2</sup> Aaga tiicolo aaga ta'diila nja kadu aaga tidhi oona ku'bu aaga tümmünügü njaana ko'do dhadha a tasaasa ajeene.

<sup>3</sup> Aaga kardha ku'bu aaga tafa kada unggodho ka Koronggore a tam'i'daana ma ta'diila.

<sup>4</sup> Kudumma aaga ka tuu'da ka unggodho a Koronggore unggodho afa ma Masala ka tagümmünü aaga ka tidhi oona ku'bu ka unggodho ya Masala ka tagümmünü aaga ya.

<sup>5</sup> Kudumma Uugaara ma ungnego ada ma unggodho a tamma ka unggodho a tambeese ka unggodho.

<sup>6</sup> A Masala ma unggodho Pupa ma kadu nye'd'de alinggo ada eene in'dili kungngo i'i aneene nja eene in'dili.

<sup>7</sup> Lakiini Almasiihi amana türü a kadu töccö ana kaja tamana ma faka tammo eene ma linggo tamana miini ka asasa.

<sup>8</sup> Afa ma sorne ka tiki,  
"Kini ka sirö coo'do ka 'dotombo'do  
a'duga kasaga nja iini kadhabbu  
adamana eema a katadü'dü."

<sup>9</sup> Minna i'i yungngo ana eere a'da,  
"asirigö coo'do ka 'dotombo'do" ungnego?  
I'i ya iki a'da i'i ya öö'dö ka 'büdhüli ka ta'buugu ka dhidha.

<sup>10</sup> Yasu ka eyi tiya iini yungngo öö'dö ku'bu asirigö coo'do ka 'dotombo'do ma tagidi 'buugu nye'd'de ana oona miini.

<sup>11</sup> I'i yungngo ümmünü kadu köönö kada kadaflin'i, köönö kada nagane'bi, anno teema tumma ma İnjülli, anno ta ka'boge, anno ta katalaana.

<sup>12</sup> I'i ya agüünü nggege amang kene tindinaana kadu ma Masala ku'bu nye'd'de ka linggo ma kaniisa ma tarü'bü tuu'da na Almasiihi.

<sup>13</sup> Amang kaja tala ta unggodho ka tamma nja tessu 'Bii'bala ma Masala, kada ömö'dü kadigine, angnga ma tala tadhonggoro na Almasiihi.

<sup>14</sup> Amang kaja tafa taga laala a tanya ma talaana tanno atoroko no tafa tagürünü eegə ko'do a kadu tiisini eegə ana ünggü ma tanangnga eegə ka taama.

<sup>15</sup> Lakiini angga tageema tamma ma timin'da a koronggore ma tasaasa angnga taginggiridene ka eema in'dili ana Almasiihi i'i ya üüdü ya.

<sup>16</sup> I'i yungngo anangnga tuu'da ka tümmü ajeene kimi'dinjaana koona nye'd'de, a 'dakeyi alinggo linggo niini, a tuu'da tinggiridene nye'd'de, a tarü'böönö miini ta unggodho a tasaasa ajeene.

#### *Taneene na 'diila no ka Almasiihi*

<sup>17</sup> Nggege ara a'a tiki aaga ana eere ma Uugaara Yasu aaga fa taneene afa kadu ma 'büdhüli kadu no adinögöögö ma tam'baga no.

<sup>18</sup> Eegə kungngo ka kisinsoro taalo kaföönöy tumma na Masala a tam'baga

tanno eene a takidhö ka nanggeedi tanno eene kagu'b'ba ka taneene tanno Masala.

<sup>19</sup> A modolo taalo magu eege kümmünü nanggeyi neene ka temelö nya füngngö nya iiya kadhoonyo nya talloko taalo küüsü kide.

<sup>20</sup> Lakiini taalo tumma na Almasiihi yungngö ada ka talaadene kide ya i'i ya miini.

<sup>21</sup> Timin'da aaga kaföönyö tumma miini aaga takalaadene talaana ma timin'da no ka Yasu no.

<sup>22</sup> Aaga aadha ka taneene tanno illi no, aaga unggü eema ya toroko ya illi ya keere eema ma tuu'da ya iisiniidene no a taga'dadene ya.

<sup>23</sup> A aaga padaga oona keere aaga tinsili ka nanggeedi nya nanggüüdü.

<sup>24</sup> Aaga agirnä ömö'di ya issi ya ada ka oona ya Masala ka tarü'bü i'i ya kafeene nya oono ya ka'diila nya tinsili nya timin'da ya.

<sup>25</sup> I'i yungngö ada kara taadha ka korkoro, ömö'di ana kada teema tumma ma timin'da nya tööje kudumma aja kada unggodho ka tuu'da na Almasiihi.

<sup>26</sup> Üürü kagoroo'bo aaga, aaga fa tüünü tatoroko, aaga fa tafa ka ndanaaya ka 'dänggö caa'bü a'da kagoroo'bo aaga.

<sup>27</sup> Aaga fa tafa da fiini a Eblisi.

<sup>28</sup> Ömö'di ya tanyooro ya aadha ka nyooro, lakiini fa kini adhügürü a linggo ana iisine tanno iini ana eema, amang kini tinya a kadu tanno eema ka titalo kene no.

<sup>29</sup> Aaga fa tindiri tumma na toroko no illi tumma na 'diila ma tindinaana kadu ku'bu no, na kadu kasaasa taföönyö no.

<sup>30</sup> Aaga fa tanangnga Koronggore ma Masala ya Insili ya ka agoroo'bo a taneene tanno ada no, i'i abbünnü hitimi kada ka oona kada tanno iini ma uuru ma toolonadene.

<sup>31</sup> Aaga aadha ka kirümi nye'de nya midhi nya koro'bo nya tagoroo'bo nya tiidhaana ka oona nya teelaana nya eema tiya toroko ya 'do.

<sup>32</sup> Aaga faana ka oona a ta'diila nya 'bangnga, aaga afa ka kadu tanno alinggo tatoroko ana aaga no afa ma Masala ka afa kada ana kada ka tamma ka Almasiihi.

## 5

### Taneene ka töyeene

<sup>1</sup> Aaga aneene afa ma Masala kungngö kada laala tiya asaasadene.

<sup>2</sup> Aaga unggenee ka fiini ma tasaasa ajeene, fiini ya Yasu Almasiihi tiya asaasa angnga ya, üpü eyi yiini co ka üüdü ma

angnga kada niimö ma tirri ya eedhenja a Masala a ndüigö miini tü'dü ka ti'dü.

<sup>3</sup> Lakiini temelö nya linggo ma nyoro nya talloko nye'de kungngö taalo kama teemadene kada ka söödö aaga na kadu tanno Masala no.

<sup>4</sup> Tindiri tumma na toroko no nya ker'de ker'de nya tam'baga taalo ka'diila nya aaga illi tamana ta'diila nya tafünögü Masala ko'do.

<sup>5</sup> Kussu aaga a'da ömö'di ya atemelö nya eema tiya toroko ya nya talloko i'i afeene nya ömö'di ya ümmü masala ma 'büdhüli taalo ara takarna ka tauugaara ma Almasiihi nya Masala.

<sup>6</sup> Aaga fa tafa ka ömö'di könö iisini aaga a tumma tanno atoroko no kudumma eene kara tanangnga tagoroo'bo ma Masala kara tala kadu no taalo kaföönyö tumma noono no.

<sup>7</sup> Nggege aaga fa taneene nya eene 'do.

<sup>8</sup> Kaganna aaga ka ndüüli ka dhidha a 'bitingngö sa aaga tanna ka töyeene ma Uugaara, asa aaga aneene taneene ma laala ma töyeene.

<sup>9</sup> Kudumma tööyö ma töyeene unggno ka eema tiya a'diila nya nye'de ka tinsili nya timin'da.

<sup>10</sup> Aaga alaadene ka eema tiya Uugaara ka asaasa ya.

<sup>11</sup> Aaga fa tosso ka linggo ma ndüüli na toroko no, lakiini aaga unggü eege kürö ndama iini kaco ka töyeene adha.

<sup>12</sup> Eema ya kadu na taalo kaföönyö tumma na Masala kalinggo ka küdhü no magu modolo unggno ma teema iini.

<sup>13</sup> Lakiini niimö ya agalinggo adene ka küdhü ya, a kadu kara tijöögö iini kö'dö kürö ka töyeene.

<sup>14</sup> Niimö ya ijidene ya i'i ya töyeene, kudumma iini ka tiki,

"Ajeene o'o na arigide no,

fiki'dö ka kadu tanno aaya no ka söödö,

amang ka Almasiihi töyeene ada küdü ka oona."

<sup>15</sup> Aaga adinö ko'do dhorro aaga taneene taneene ma kadu tanno 'dara no, taalo taneene ma kadu tanno nagaaga no.

<sup>16</sup> Aaga 'digaana 'bitingngö aaga tüünü eema ya 'diila ya, kudumma naganuuru tanno, taalo ka'diila in'dili kungngö.

<sup>17</sup> Aaga fa taneene kada nagaaga, lakiini aaga tussu niimö ya Uugaara ka asaasa ya.

<sup>18</sup> Aaga fa take ka ngeeli ma taga'da aaga ka nanggüüdü, lakiini aaga tigine a Koronggore ya.

<sup>19</sup> Aaga eema a tumma ma tüüsü ma sorne nya natüüsü ma koronggore, aaga

üwe tüüsü aaga tafünögü Uugaara ko'do ndama nanggeedi ka teene.

<sup>20</sup> Aaga amana ta'diila a Masala tammo Pupa mo ka eema nye'de ana eere ma Uugaara tiya aja Yasu Almasiihi.

### *Iiya nja naganyori tanno eene*

<sup>21</sup> Aaga föönyö ana tumma ka oona dhadha a ri'ba ma Almasiihi.

<sup>22</sup> Iiya, aaga föönyö eema ya naganyori tanno ada afa maada ka föönyö eema ya Uugaara kungngo.

<sup>23</sup> Kudumma miide i'i ya üdü ma aka afa Almasiihi kada üdü ma kaniisa kungngo, i'i yungno oolona kaniisa oogo ma tuu'da tanno iini.

<sup>24</sup> Afa ma kaniisa ka föönyö tumma na Almasiihi, fa ka iiya ka föönyö eema na naganyori tanno eene ka eema nye'de kungngo.

<sup>25</sup> Nagiide, aaga asaasa iiya naada afa ma Almasiihi ka asaasa kaniisa kungngo üpü eyi yiini co ka üdü moono.

<sup>26</sup> Anangnga oogo ka tinsili aagala oogo ka oona a 'bïidü ma tumma ma tagunaana.

<sup>27</sup> Amang kini ta'duga oogo ma eyi tiya iini kada kaniisa ka a'diila a'da taalo niimö ya toroko ya kide, a koola titaaloo kide a mirindhi titaaloo kide alla niimö ya nyoro ya kide, lakiini minsili a tatoroko titaaloo kono ka oona.

<sup>28</sup> Nggeege afe'de fa ka nagiide ka asaasa iiya neene afa meene ka asaasa oona neene kungngo, ömö'di ya asaasa aka miini asaasa eyi yiini.

<sup>29</sup> Taalo ömö'di ma tanu ka tuu'da tanno iini, lakiini anaana iïye kide amana kuri iini afa ma Almasiihi ka afa ka kaniisa kungngo.

<sup>30</sup> Angnga kagosso angnga ka tuu'da tanno Almasiihi.

<sup>31</sup> "I'i yungno ömö'di ka tinyi pupa yiini ku'bu nja niimö tammo iini ara ka tosso kada tuu'da na unggodho no nja aka tammo iini."

<sup>32</sup> Tumma na küdhü dhorro no euge kungngo, a'a nasaasa tiki a'da taküdhü ma Almasiihi nja kaniisa.

<sup>33</sup> Fa ka ömö'di asaasa aka miini afa miini ka asaasa eyi yiini kungngo fa ka aka mümmü nyuri yoono dhorro.

## 6

### *Laala nja kupupa tanno eene*

<sup>1</sup> Laala, aaga föönyö tumma na kupupa tanno ada nja nakaniimö tammo ada ana eere ma Uugaara, tumma dhorro euge kungngo.

<sup>2</sup> "Ümmü pupa yüdü nja niimö tammo üdü," tumma ma seriye ma Masala na dhidha no ma timi'di tumma euge kamiini,

<sup>3</sup> "amang kada taluna ta'diila a nagürüünü naada tadhabbu ka 'büdhüllü."

<sup>4</sup> Aaga na kupupa no, aaga fa tanangnga laala yaada ka kóroo'bo, lakiini aaga ingiri euge afa ma tiya Uugaara ka tiki ya kungngo.

### *Naguugaara nja kasaga*

<sup>5</sup> Kasaga, aaga aföönyö eema ya naguugaara tanno ada ka 'büdhüllü ya, a ri'ba a ta'deedene ka oona ana eedi ka tinsili afa maada ka taföönyö tumma na Almasiihi kungngo.

<sup>6</sup> Taalo kudumma eene kiji aaga a'da tadiinö kada, lakiini kada kasaga tanno Almasiihi kalinggo niimö ya Masala ka asasa ya.

<sup>7</sup> Aaga alingga ana eedi dhorro afa maada ka talingga ada Uugaara taalo a kadu.

<sup>8</sup> Kudumma ada kussu ara Uugaara saga nangnga talingga e katu in'dili üürü tasaga üürü ömö'di ya dhorro ya, ka linggo niini na 'diila no.

<sup>9</sup> Aaga na naguugaara no, aaga üünü a kasaga tanno ada nggeege, aaga fa tuuru ri'ba eene ka nanggeedi aaga tussu aaga a'da Uugaara yeene i'i ya Uugaara yaada ka 'dotombo'do taalo üünü ada ömö'di köön ku'bu.

### *Mudugusi ma Masala*

<sup>10</sup> Tumma na eere no a'da aaga tana türü a Uugaara ka türü tanno oono na idhindhü no.

<sup>11</sup> Aaga adhifi eema ma koro'bo ma Masala nye'de amang kada tambaanya takara ka ünggü tammo Eblisi.

<sup>12</sup> Taalo angnga keema koro'bo nja diidi ma tuu'da nja eriidö, lakiini nja naguugaara nja kadu tanno iïfi no nja kadu ma türü, kadu no anna ka ndüüli no nja nagoronggore tanno oroko no ka 'dotombo'do.

<sup>13</sup> Yungno ada kara tadhifi eema ma koro'bo ya Masala nye'de amang kada tambaanya tümmöönö ka eyi tiya ada ka uuru tanno atoroko no, aaga tidhi oona ku'bu ada ka ndatiümö linggo nye'de.

<sup>14</sup> Aaga kardha ku'bu ana jönnö ma timin'da, aaga tagirni mudugusi ma tadhorrmo ada ka nooro,

<sup>15</sup> aaga tagirni egiide ma tindinaana ku'bu nanggeyi naada ma teema tumma ma Masala na 'diila no.

<sup>16</sup> Ana kide nye'de aaga a'duga toona ma tamma, amang kada tata magusule ma tatoroko ma finne mo.

<sup>17</sup> Aaga kïrnï barnete ma toolonadene ada ka nanggüüdü aaga ta'duga kulu'ba ma Koronggore kada tumma ma Masala.

<sup>18</sup> Aaga eema nja Masala turi kungngo a Koronggore ya Insili ya aaga fa taadha kide, aaga adinö ko'do miini aaga fara ka Masala ka üüdü ma kadu tanno oono.

<sup>19</sup> Nja a'a afe'de amang kede kara tafa'da nüünö ma teema ya, a Masala tanangnga rüsü kede ka eedi neema tumma na 'diila na Masala na küdhü no.

<sup>20</sup> A'a na tafüñi miini nadimi'di adene a kadholle, aaga afara ka Masala amang kede tana rüsü ma teema tumma na Masala taalo ri'ba kagu a'a.

*Tööjüü na eere no*

<sup>21</sup> Lakiini taneene neede nja linggo tanno eede ara Tikikos saga tirina aaga in'dili, örre yeede ya akinyi linggo a'a, yeede ka asaasa i'i ya adho ka fiinii ka linggo ma Uugaara ya.

<sup>22</sup> Nagürünü a'a i'i kada amang kini tadirina taneene nüüdi aaga amang ka nanggeedi naada ka tiicolo.

<sup>23</sup> Ta'diila nja tasaasa nja tamma ma nagöre ma Masala Pupa ndama Uugaara Yasu Almasiihi.

<sup>24</sup> Fa ka türü nja kadu nye'd'de no asaasa Uugaara yaaja Yasu Almasiihi tasaasa na taalo kara titalo no.

## Waraga ya Bölis ma co Filippi Tafa'da tumma

Anya ma Filippi maganna ka Makadoniya maga müriya ma füni ma niisö ma küüle ma Yünan tammo 'bitingngö ma Bölis ageema tumma ma İnjili ma Yasu kanna a kadu tamma ka Yasu (Kadafiin 16). Bölis agananja ka pabuusu a nagürüünü kadhabbu ka naanya kadhoonyo, a kadu ma kaniisa ka Filippi tagürünigü ana gürüüsü ma tamünögü i'i ko'do, kuu'bu i'i ka eedi. I'i arigiri waraga ya ma tanangnga ta'diila eene.

I'i iki a kadu ma kaniisa a'da kümmü tumma na Almasiihi a'da a kadu tiicolo ka nanggeedi nya köje kakinyi linggo a köje dhadha. I'i iki eene a'da taneene na a'diila no kungno Almasiihi, kuurna talaana tanno iini taalo talaana na kataalaana tanno korokoro no asaasa eege a'da kuurna eema ma taanyara ya Masala ka anangnga a Yahüüdü ya.

### Tamana ta'diila

<sup>1</sup> Waraga ya ö'dö ndama Bölis nya Timosaws kadu ma linggo na Yasu Almasiihi kungno co nagöre ma angnga ma kaniisa no ka Filippi nye'de kungno, kadu no ungodho nya Yasu Almasiihi no, nya ka'boge nya kadifü tanno eene.

<sup>2</sup> Fa ka Masala ma Pupa tiya aja nya Uugaara tiya aja Yasu Almasiihi ka anangnga türü aaga nya ta'diila.

### Tafara ka Masala nya tamana ta'diila

<sup>3</sup> Namana a'a ta'diila a Masala tammo eede turi kede kara tagüigü tumma aaga.

<sup>4</sup> Nafara a'a ka Masala turi a dhodho kudumma aaga in'dili kungno.

<sup>5</sup> Kudumma ada ka takinyi linggo ma İnjili a'a ndama uuru tanno dhidha no ta'bitingngö.

<sup>6</sup> Nussu a'a dhorro a'da Masala ma kafü'dü linggo na 'diila kada mo, mara tüü ka talinggo ka saga tatimö kadara ka uuru tanno Yasu Almasiihi kara tö'dö no.

<sup>7</sup> A tumma dhorro eede ka tinigöögö ma aaga in'dili kudumma aaga 'do aaga kungno ka eedi tiya eede turi kungno, aaga in'dili kosso aaga ka türü tanno Masala nya a'a, üürü ka pabuusu üürü ka tümmöönö ka tumma na 'diila no a tefe kide dhorro.

<sup>8</sup> Masala oogo mungno mussu tumma meede ka teema tumma ma timin'da eede ka tiki a'da a'a nana 'bangnga ma aaga

in'dili 'bangnga mö'dö ndama eedi ya Yasu Almasiihi.

<sup>9</sup> Tafara ka Masala neede kudumma aaga a'da a tasaasa naada ka takogoona ma tadhabbu dhorro ka tussu eema nya ta'dara.

<sup>10</sup> Amang kada tesse niimö ya a'diila ya amang kada tinsili, a tatoroko titao kada ka uuru tanno Almasiihi kara tö'dö no.

<sup>11</sup> Aaga tadigine a tööyö ma 'diila ana eere ma Yasu Almasiihi ma tüdhindhi nya tündhigü Masala ko'do.

### Tefe ka 'dii ana Almasiihi

<sup>12</sup> Nagöre eede, nasaasa a'a a'da aaga tussu niimö ya agalinggo adene ana a'a, agala kadu kakogoona ma tanangnga tumma na 'diila no ka tanyaala ku'bu.

<sup>13</sup> 'Bitingngö kadu nye'de ka 'dii ma nasigira ma Rööma nya kadu könö kussu a'da a'a na ka pabuusu ka üüdü ma Almasiihi.

<sup>14</sup> Tanna ka pabuusu neede no, kafa ka nagöre ma angnga kadhabbu katamma ka Uugaara Yasu kakogoona ma tümmü rüsü ma teema tumma ma Masala a'da taalo ri'ba eene ka nanggeedi.

<sup>15</sup> Kadu könö keema tumma ma Almasiihi a kirümi a tisaana ka oona a kadu könö talaana i'i ana eedi ka tinsili.

<sup>16</sup> Kadu na miini no kalaana ana eedi ma tasaasa a'a, kussu a'da Masala manangnga a'a ka talaana kadu ka tumma tanno oono na 'diila no.

<sup>17</sup> Kadu na miini no taalo keema tumma ma Almasiihi ana eedi ka'diila, kussu a'da eege kara takogoona ma tanangnga dhügürü a'a ka tanna ka pabuusu.

<sup>18</sup> Lakiini taalo agu'du a'a ka oona, kagala oona ka'diila eede a tumma tanno Almasiihi ka teemadene üürü ka'diila alla taalo ka'diila ka nanggeedi, lakiini nad-hodho a'a ara a'a tüü ka tadhadho.

<sup>19</sup> Kudumma eede ka tussu a'da alinggo adene ma toolona a'a ka pabuusu kudumma tafara ka Masala tanno ada a tikinyaana ma Koronggore tiya Yasu Almasiihi.

<sup>20</sup> Niimö yeede ka asaasa nündhigü i'i ya, a'da nafa tagi'di ka linggo tanno eede keere 'do, lakiini 'bitingngö turi ara a'a tüüsö ka linggo keere ana oona nye'de, üürü nefe a'a ka 'dii üürü neyi a'a.

<sup>21</sup> Tefe ka 'dii neede a'da nussu Almasiihi, inde neede tö'dö keere a niimö.

<sup>22</sup> Üürü a'a tefe ka 'dii neede ma talinggo linggo ma tö'dö keere iini ya, taalo a'a nussu ara a'a tesse öjö?

<sup>23</sup> Nadhere a'a ka eema keera, nasaasa a'a taadha ka tefe ka 'dii ara a'a ka taneene nya Almasiihi i'i yungngö a'diila.

<sup>24</sup> Agala ka'diila nja aaga eede kara tüütü ka tefe ka 'di.

<sup>25</sup> Nussu a'a ara a'a tüütü nja aaga in'dili kungngo amang kada tunggunu co a dhoodho tanno ada ka tamma ma Masala.

<sup>26</sup> Nggege taneene neede nja aaga afe'de no, kanangnga aaga ka tindhiigii Yasu Almasiihi ko'do kudumma ma nüümö tiya Masala ka talinggo ada a'a ya.

<sup>27</sup> Nüümö ya agu'daana 'bitüngngö ya a'da a taneene naada ka tefe ka 'di kaneene nja tumma tanno Almasiihi amang kede tara tö'dö kada kanna ya, üürü a'a nafoonyö kede ka tüürü nitaalo kada kete, aaga tüütü kada unggodho ka Koronggore, aaga takardha ku'bu ana eedi unggodho ka üdü ma tamma ka Yasu Almasiihi nja tumma tanno 'diila no.

<sup>28</sup> Aaga fa tari'ba a diidi tiya ada ka nüümö töccö 'do nggege kara tussu adene a'da eege kandaama, a toolonadene naada ka Masala ka nüüsö.

<sup>29</sup> Masala mafa'da fiini aaga ma talinggo ada Almasiihi, taalo tamma kini sugi, lakiini ma tadhügürü ka üdü miini afe'de.

<sup>30</sup> Aaga kardha ku'bu aaga teema koro'bo afa ma tiya ada ka tadinö kede ka takardha ku'bu iini ya, aaga foonyö 'bitüngngö a'da naleefe a'a takardha ku'bu 'bitüngngö.

## 2

### Tiicolo na Almasiihi nja tüdhindhi tanno iini

<sup>1</sup> Tefe ka 'di naada ka Almasiihi 'dee ka anangnga aaga kana tüürü? Tasaasa niini ka 'baga o'o ku'bu ka eedi? Ka unggodho aaga ka Koronggore nja 'bangnga nja muuyu?

<sup>2</sup> Nggege a'a nasaasa aaga a'da aaga tanangnga a'a ka tadhodho a tasaasa ka unggodho ana eedi unggodho a tumma ka unggodho.

<sup>3</sup> Aaga fa tasaasa nanggeyi naada aaga tan'dinigi oona coo'do, aaga ümmünü nanggeedi ku'bu aaga tümmü kadu könö ka ti'bä aaga.

<sup>4</sup> Aaga fa takirü iifye ka eema ma nanggeyi tanno aada, lakiini aaga asaasa kadu könö iini.

<sup>5</sup> Aaga ümmü nanggeyi naada afa ma Yasu ka tümmü tumma ma eyi tiya iini.

<sup>6</sup> I'i afeene nja Masala ka eema in'dili kungngo,

lakiini i'i taalo a'bunu eyi yiini kide ma taköje nja Masala.

<sup>7</sup> Nggege i'i adha agala ka tüpü eyi yiini co a'duga tuu'da ma tasaga

afeene nja ömö'di abbü 'dala kada tuu'da ma tadü'dü.

<sup>8</sup> Tiicolo aföonyö tumma na Masala idhi eyi,

eyi ka salii'bi.

<sup>9</sup> A Masala ta'diniga i'i ko'do ka 'buugu tiya ku'b'ba ya manangnga eere iini agii'bi nagereene nye'd'e.

<sup>10</sup> A kadu nye'd'e tüürü ku'bu a nagüüge kidha ma Yasu, ka 'dotombo'do nja 'büdhüllü ka tüm'bü.

<sup>11</sup> A nagongo'do nye'd'e teema a'da Yasu Almasiihi i'i ya Uugaara ma tafünügü Masala ma Pupa ma ko'do mo.

### Aaga öyeene ada ka 'büdhüllü

<sup>12</sup> Nagöre eede, afa maada kada kaföonyö tumma neede 'bucca kungngo ana a'a kide, aaga föonyö tumma neede 'bitüngngö a'da taalo a'a kada kete, aaga kardha ku'bu a linggo ma toolonadene tanno ada a ri'ba a ta'deedene ka oona ma tanangnga kadu ka tussu a'da Masala moolona aaga.

<sup>13</sup> Kudumma Masala oogo mungngo ma linggo kada amang kono tafa kada aaga tasaasa talinggo linggo noono, aaga tambaanya talinggo linggo noono.

<sup>14</sup> Aaga üünii eema in'dili, aaga tafa ta'digineene, aaga tafa takirümi ajeene.

<sup>15</sup> Amang kada tinsili ka nanggeedi a'da kitaalo tatoroko kada, aaga ta'diila kada laala ma Masala ka söödö ma kadu tanno oroko no, aaga töyeene kide afa midigi ka 'dotombo'do.

<sup>16</sup> Aaga ümmü tumma ma tefe ka 'di amang kede tabbü 'danüüsö ana aaga ka uuru tanno Almasiihi kara tö'dö a'da taalo a'a nagalinggo nitaalo kadhügürü weerö ün'dügüngngö.

<sup>17</sup> Üürü a'a neyi ara tafeene nja tuuru ngeeli a Masala, kudumma linggo tanno ada ka talinggo ada Masala no kafeene nja türrü, kudumma ada ka tamma ka Yasu. A'a nadhodho nja aaga in'dili kungngo.

<sup>18</sup> Aaga dhodho nja a'a aaga ta'deema nja a'afe'de.

### Timosaws nja Abafriuditös

<sup>19</sup> Üürü tasaasa na Uugaara Yasu, nasaasa a'a tagürünü Timosaws kada kete kungngo amang kede taföonyö tumma kada, oona ta'diila kede eedi ta'baga kede ku'bu.

<sup>20</sup> Taalo ömö'di kede afa i'i ma tara tanaana iifye kada dhorro afa miini kungngo.

<sup>21</sup> Kadu könö nja a'a in'dili kalinggo ada ka nanggeyi tanno eene taalo kalinggo ada Yasu Almasiihi.

<sup>22</sup> Aaga kussu linggo na Timosaws, agalinggo tumma ma Masala nja a'a afa 'bii'bala nja pupa tiya iini.

<sup>23</sup> Nasaasa a'a tagürünü i'i kada, lakiini ara a'a ka tiiri dha yeede tikinggi.

<sup>24</sup> Nussu a'a a'da ara Uugaara Yasu Almasiihi tafa'da fiinii a'a nö'dö kada kanna afe'de kete kungngo.

<sup>25</sup> Lakiini nijöögö a'a a'diila eede kara tagürünü Abafrüditös kada örre ma a'a ya tatanenee ma a'a ya akinyi linggo a'a yaada ka kürünü i'i kede a'da öö'dö tamünögü a'a ko'do ya.

<sup>26</sup> Adinigöögö ma tasaasa tassa kada in'dili kungngo, katoroko oona iini kudumma ada ka taföönyö a'da i'i akamaara.

<sup>27</sup> Akamaara 'do akete ka teyi, lakiini Masala mana 'bangnga miini nja a'a afe'de, amang kede tafa tagusu müürü ka müürü.

<sup>28</sup> I'i yungngo eede ka tiki a'da nuurugu i'i kada areere, amang kada tasala i'i, oona ta'diila kada, taalo nara tamüürü.

<sup>29</sup> Aaga amma kini ana eere ma Uugaara Yasu a dhodho afa ma örre tiya ada kungngo, aaga tamma ka kadu töccö afa miini kungngo afe'de.

<sup>30</sup> Kudumma iini ka ndakete ka teyi ka üdü ma linggo tanno Almasiihi, amünögü eyi yiini co amang kini takinyi linggo a'a ka üdü ma aaga.

### 3

#### *Ara Masala toolona angnga nya*

<sup>1</sup> Keere kungno nagöre eede, aaga dhodho ka Uugaara Yasu. Tarigiri ma waraga tiya eede ka tunggu co aaga ya, taalo agu'du a'a ka oona, kagala kara ta'diila nja aaga adha.

<sup>2</sup> Aaga adini ko'do kudumma kadu tanno afeene afa tiini no, egee ka kadu tanno alinggo eema ya toroko ya, egee ka kadu tanno aga'da tuu'da no.

<sup>3</sup> Angnga ka kadu ma tatendhe na dhorro no, kudumma aja ka tümmü Masala a Koronggore angnga tagadhodho ana Yasu Almasiihi, taalo angnga kadho üdü ka eema ma tuu'da.

<sup>4</sup> A'da a'a ka eyi tiya eede nussu a'a nüümö yeede ka tümmü tumma miini dhorro ya. Üürü ömö'di inggide iki a'da ara i'i töödhü ka eema ma tuu'da ya, a'a ka eyi tiya eede, a'a na miini.

<sup>5</sup> Nageenedene a'a natüümö füngngö iidümmü afiinü iidoona natendhe, a'a na taga Israyil, siliga ya Binyamiin, a'a na taga Yähüüdü tiya dhorro ya, ka tumma ma seriye ya, a'a na taga Fariisi.

<sup>6</sup> Üürü ndama tagu'daana ma eedi ya, nagakirümi a'a kaniisa nalinggo oogo, üürü ndama ta'diila ma seriye ya, a'a nümmöönö dhorro, taalo nüümö ya toroko ya kide.

<sup>7</sup> Lakiini taalo a'a nö'dö keere a nüümö kide, lakiini nümmöönö a'a ka taama ka üdü ma Yasu Almasiihi.

<sup>8</sup> Lakiini a'a nümmü eema ya nye'd'de ka taama amang kede taduna nüümö ya idhindhi ya tussu ma Yasu Almasiihi Uugaara yeede, naama a'a eema nye'd'de kungngo ka üüdü miini, nüri eema nye'd'de kada nyoro ün'dügüngngö amang kede taluna Almasiihi.

<sup>9</sup> Na a'a tanna kide taalo a ta'diila ma seriye, lakiini kudumma ma tamma ma Almasiihi egee ka ta'diila tanno Masala ka anangnga angnga no.

<sup>10</sup> Amang kede tussu Almasiihi nussu türü na anangnga i'i ka fiki'dö ka inde, nossu ka dhügürü ma tin'di tanno iini, nafeene nja iini ka inde tanno iini.

<sup>11</sup> Nggeege ara a'a tindhig'i tafiki'dö neede ka inde.

#### *Tisi ka fiinii tiya dhorro ya keere*

<sup>12</sup> Taalo a'da a'a naduna, nja eede ka tafara ta'diila nye'd'de, lakiini a'a nawwa fiinii ma taluna nüümö yeede ka tawwa ya, kudumma Yasu Almasiihi agala ka 'duga a'a kada tanno iini.

<sup>13</sup> Nagöre eede taalo a'a nümmü eyi yeede a'da a'a naduna, lakiini nüümö inggide unggodho eede ka tüüni, nüürü ma eema tiya eede keere ya ara a'a ka takardha ku'bu ma tiya eede kidha ya.

<sup>14</sup> Nunggunu a'a nüüsö co aadha ka nüümö tiya eede kasaasa ya amang kede taluna tumma ka Masala ka tümmünö a'a maco no 'dotombo'do kudumma eede ka tamö'di tiya Yasu Almasiihi.

<sup>15</sup> Fa kaja angnga in'dili no adho ka fiinii ma Masala no angnga taguurna fiinii ya miini ya keere. Üürü fiinii könö ungnö ada afe'de, ara Masala tala aaga kide ya.

<sup>16</sup> Lakiini 'bitingngö ya fa kaja angnga tagunggeene ka fiinii tiya Masala ka ala angnga kide ya.

<sup>17</sup> Aaga kinyi a'a ka taneene tanno eede nagöre eede, aaga anaana iiye ka taneene tanno neene afa ma kadu tanno uurna fiinii yeede keere no.

<sup>18</sup> Nadünögü a'a aaga 'bucca a 'biiddi ka iiye, kadu kinggide kadhabbu a taneene tanno eene ka anangnga egee kada diidi ma salii'bi tiya Almasiihi.

<sup>19</sup> Kadu na miini no 'do kara saga taaya, Masala meene a'da nanggeedi neene a tidhindhi neene a'da modolo, egee no isi ka eema ma 'büdhüli keere no.

<sup>20</sup> Lakiini 'buugu yaaja ungnö ka 'dotombo'do, i'i yungngö aja ka takindhig'i Uugaara yaaja dhorro Tatoolona Yasu Almasiihi ndama iini.

<sup>21</sup> I'i yungngö ara ta'bele tuu'da naaja na ki'di no anangnga egee kafeene nja tuu'da

tanno iini no kada idhindhi kudumma iini ka ana türü ma tanangnga eema nye'd'de kaföönyö tumma niini.

## 4

### Talaana

<sup>1</sup> Ka nagöre eede neede ka asaasa eege nadinigöögö meene, eege kanangnga a'a ka tadhodho nadho ndalondo eede ka üdü no, aaga idhi oona ku'bu ka eema tiya in'dili kungngo nagöre eede kidha ma Uugaara Yasu Almasiihi.

<sup>2</sup> Nasaasa a'a Afütiya nja Santiika a'da ka unggodho kidha ma Uugaara Yasu Almasiihi

<sup>3</sup> O'o afe'de na teefe ma a'a na adho ka fiin no, nasaasa a'a o'o a'da nakinyigi eege ko'do kudumma eene ka tadhügürü ka linggo ma Masala nja a'a, eege nja Aklimindis nja türeene ma kadu tanno kakinyi linggo a'a no, eege na nagereene tanno neene kadanna ka sorne ma tefe ka 'di no.

<sup>4</sup> Aaga dhodho 'bucca kungngo ka eere ma Uugaara niki aaga afe'de aaga dhodho.

<sup>5</sup> Aaga fa ka kadu nye'd'de kussu tidhi oona ku'bu naada. Amang kada tussu a'da Uugaara Yasu Almasiihi anda kete kara tö'dö.

<sup>6</sup> Aaga fa tadinigöögö ma niimö 'do, lakiini aaga asaasa eema yaada ka Masala a tafara kono nja tamana ta'diila oono nja tindhig'i oogo ko'do.

<sup>7</sup> Ta'diila na Masala na agii'bi ta'dara nye'd'de no nafa ka nanggeedi nja nanggüdü tanno ada kidha ma Yasu Almasiihi.

<sup>8</sup> Ka nagöre eede, aaga naana iiye ka niimö ma timin'da a tindhiginja ko'do nja tiya dhorro ya, nja tiya adho ka fiin nja tiya insili ya.

<sup>9</sup> Aaga alingga niimö yaada ka talaanadene kede ya, aaga ta'duga kede ya, nja eema yaada kiji a'a ka talinggo aaga taföönyö kide ya, a Masala ma ta'diila taneene nja aaga.

### Tamana ta'diila a kadu ma Filippi

<sup>10</sup> Nadhodho a'a a Masala dhorro eede ka tussu a'da kapadaga aaga kanaana iiye kede, kagamma aaga ma tagüün'i ana a'a nggeege ma 'billi, lakiini aaga taalo ka kaluna fiin.

<sup>11</sup> Taalo a'a niki nggeege a'da a'a nasaasa niimö, nussu a'a kafa ka eyi tiya eede.

<sup>12</sup> Nussu a'a kafa ka eyi tiya eede ka 'buugu ka tatoroko, nussu ka taneene eede kara tüüsü ka eema nye'd'de, nadinö a'a ka iiire nja tüüsü nja ta'diila nja dhügürü.

<sup>13</sup> Ara a'a tambaanya linggo ma eema in'dili a türü tanno Yasu Almasiihi ka amana a'a no.

<sup>14</sup> A'diila a'da ada ka tamünügü a'a ko'do ka dhügürü tiya eede.

<sup>15</sup> Kussu aaga tumma no aaga no kadu ma Filippi no jiddi meeđe ka tafü'dü linggo ma Masala nunggeene ka Makadoniya taalo kaniisa ma takara tanangnga niimö illi aaga unggodho aaga.

<sup>16</sup> Ka Tasalanükü kagürünügi aaga ana eema yeede ka asaasa ya teera ma tamanaga a'a kungngo.

<sup>17</sup> Taalo a'a neema nggeege a'da a'a nasaasa eema, lakiini a'a nasaasa Masala manangna ta'diila aaga ka eema tiya ada ka talinggo ka'diila ya.

<sup>18</sup> Eema yeede ka asaasa unggoo eede 'bitüngnö i'i ka eyi tiya iini ya dhabbu a tiya eede ka asaasa ya asa a'a tana eema dhabbu ka Abafrüditös ka öö'dö ana eema tiya ada a'a, afeene afa kondho tammo unynya ti'd'di mo, türri na Masala ka tamma kide no eege kamiini.

<sup>19</sup> Fa ka Masala meeđe mana eema dhabbu a'da kitaalo ndhiginö kide, manangna eema yaada ka asaasa ya nye'd'de kungngo ana eere ma Yasu Almasiihi.

<sup>20</sup> A tihindhi na Masala ma Pupa tiya aja taneene ta'billi turi. Amii.

### Tööjüü na eere no

<sup>21</sup> Aaga ööjüü kadu ma kaniisa ana eere ma Yasu Almasiihi. Nagöre ma angnga no neene nja a'a no kööjüü aaga.

<sup>22</sup> A nagöre ma angnga no ma kaniisa kita in'dili kungngo kööjüü aaga, mündä kadu ma 'di ma uugaara ma Rööma ööjüü aaga afe'de.

<sup>23</sup> Fa ka türü tanno Uugaara Yasu Almasiihi taneene nja aaga nye'd'de kungngo.

## Waraga ya Bölis ma co Kölösi Tafa'da tumma

Kölösi magaanya ma Asiya ka niimö ma ndanaaya maanya tammo eene 'bitingngö a'da Türkiya. Bölis ya tafiiñi, taalo aganna kide ma eyi tiya iini. Lakiini i'i anaana iÿye kono kudumma iini ka taföönyö a'da kataalaana na miini no kiki a kadu ma kaniisa a'da kalinggo eema ma Yahüdü, afa tafaradene nya tafara ka kadhangga amang ka Masala ta'diila nya eene. Yungngo Bölis ka tarigiri waraga ya adirina eema a kadu ma kaniisa a'da inde na Almasiili koolona eege, Almasiili ungngo ka 'dotombo'do Uugaara ma kadhangga in'dilli nya nagoronggore nya eema tiya ka 'buugu ka oona ya nye'd'de. İkürü ka tiki a'da eege taalo kümmü masala meene kanangnga kadu ka tussu a'da eege ka kadu tanno Masala nya talaana. Fa kene kümmü Almasiili. Iki eene afe'de, taneene neene kanangnga kadu ka tussu a'da eege ka kadu tanno Masala ka tagesse eege no.

### Tööjüli

1 A'a na Bölis tafiiñi ya Yasu Almasiili tasaasa ma eedi ya Masala, a'a narigiri waraga nya örre ma angnga Timosaws.

2 Nunggu co kadu tanno Masala no ka anya ma Kölösi no, nagöre ma angnga no amma ka Almasiili no, a Masala ma Pupa tiya aja tanangnga ta'diila nya türü tanno oono aaga.

*Bölis afara ka Masala nya tamana ta'diila oono*

3 Kidü kara tafara ka Masala 'bucca kungno kudumma aaga Pupa yaaja Uugaara Yasu Almasiili, ungngo tanangnga ta'diila oono kudumma aaga.

4 Kidü ka taföönyö tamma ka Yasu Almasiili naada, a tasaasa ma kadu tanno amma ka Masala nye'd'de.

5 Kudumma tindhigü tanno Masala ka takindinaana kada ku'bu ka 'dotombo'do no, tindhigü naada ka taföönyö ka tumma tanno timin'da no ka İnjilli no,

6 İnjilli mö'dö kada ka na'buugu koona nye'd'de kungno mana iÿye madigi ku'bu afa meene ka tagüünü adene kada ka söödö jiddi ma uuru tanno ada ka taföönyö no, aaga tagusus türü na Masala nye'd'de dhorro kungno.

7 Kalaadene aaga ka tumma tanno Abafaraas örre ma angnga yüdi ka asaasa i'i ya, ya alinggo nya ungnego linggo ma Masala ya ömö'di ma linggo tanno Yasu Almasiili ya dhorro ya ka üdü ma angnga.

8 I'i yungngo adirina ungnego afe'de ma tasaasa tanno ada ka Koronggore.

### Almasiili i'i ya tatoolona

9 I'i yungngo eede ka fara ka Masala turi kudumma aaga jiddi meede ka taföönyö, ungnego tafara ka Masala a'da manangnga tussu eema ma fiinü tiya oono aaga, a ta'dara ma Koronggore.

10 Ungngo keema tumma no amang kada taneene taneene na Masala ka asaasa no amang ka oona ta'diila kono ka eema nye'd'de, aaga tö'dö a tööyö ka linggo tanno a'diila no nye'd'de.

11 Aaga takidhö a türü nye'd'de afa ma tidihindhi ma türü tanno oono, amang kada tana tidhi oona ku'bu nya tümmü eedi ku'bu nya dhoodho.

12 Angnga tamana ta'diila a Masala mananaga angnga ka tosso ka tauugaara ma töyeeke.

13 Oogo mungngo moolona angnga ka türü ma ndüüli mapadaga angnga ka tauugaara tanna 'Bii'bala tiya oono, yoono ka asaasa i'i ya.

14 I'i yungngo afa angnga, oolona tatoroko naaja.

### Almasiili agii'bi kadu nye'd'de

15 Yasu Almasiili i'i ya koronggore tiya Masala tammo aja kitaalo kijöögö mo, i'i aageenedene ka eema tiya arü'bü adene ya ka dhidha in'dilli kungno.

16 Eema nye'd'de arü'bü adene ana i'i, eema ya ka 'dotombo'do ya nya tiya ka 'büdhülü ya, ya ijidene ya nya tiya taalo ijidene. Üürü nagööyö nya türü üürü tauugaara üürü naguugaara, eema in'dilli ana i'i ananja iini.

17 I'i yungngo ka eema kidha nye'd'de kungno, eema nye'd'de ümmü ajeene ana i'i.

18 I'i ya üdü ma tuu'da, kaniisa i'i ya ama dhidhdha, adageenedene kadhadha ma kadu tanno aaya no, amang kini tama eema nye'd'de kungno.

19 Kudumma Masala ka a'diila oona oono amang ka eyi tiya oono nye'd'de taneene ka Almasiili.

20 Amang kini tanangnga kadu nye'd'de kada tanno oono ka 'büdhülü nya 'dotombo'do, ö'dö a ta'diila ana eriidö tiya iini ya uurunja ka salii'bi ya.

21 Billi ka ku'b'ba aaga ka Masala ku'bu, aaga takadiidi oogo, a nanggeedi tanno ada na nyoro no.

22 A 'bitingngö ka inde ma tuu'da tanno iini no, anangnga aaga kada kadu ma Masala na insili no a'da taalo modolo nya hetti tagu aaga.

23 Kada kara tümmü tumma ma Masala ana eedi dhorro ya, aaga tüütü kide, aaga

tafa tooso ka tumma ma ïñjïlli naada ka taföönyö na kadu ka tagalaana kadu iini ka na'buugu koona nye'd'de i'i yungngo eede a'a na Bölis ka talinggo.

### *Lingga na Bölis ma kaniisa*

<sup>24</sup> A'a 'bitingngö nadhodho a'a ka dhügürü ma tuu'da tanno eede kudumma aaga no tümö dhügürü ya Almasiihi ka tuu'da tanno eede ka üdü ma tuu'da tanno iini na kaniisa no.

<sup>25</sup> Masala mümmünü a'a ka linggo ma kaniisa a'da neemaga tumma na Masala co aaga in'dili.

<sup>26</sup> Niimö ya Masala ka taküdhü i'i ma nagürüünü ma 'billi nja sere 'do, mala a kadu tanno oono na insili ka nanggeedi no.

<sup>27</sup> Kadu na Masala kasaasa euge a'da kussu ka kajeene ka söödö tihindhü ma tumma tanno küdhü no, ya Almasiihi ka tanna kada ka oona, i'i yungngo a tihindhü ma tihindhü.

<sup>28</sup> Angnga talanaa kadu ka tumma tanno Almasiihi nye'd'de a tumma ma ta'dara ma tanangnga kadu kada unggodho a tadho ka fiini ka Almasiihi.

<sup>29</sup> Yungngo anangnga a'a kadhügürü nalinggo a türü tanno Almasiihi na linggo kede no.

## 2

<sup>1</sup> Amang kada tussu nadhügürü, a'a kudumma aaga nja kadu ma Ladükya nja kadu tanno taalo kadin'i kede no nye'd'de kungngo.

<sup>2</sup> Amang kene tana türü ka nanggeedi a tumma naada ta unggodho aaga asasa ajeene, aaga taneene a ta'dara ma tussu eema nye'd'de ma niimö tiya Masala ya tüngüdhü ya Almasiihi.

<sup>3</sup> I'i yungngo eema ya a'diila ya nye'd'de ma ta'dara nja tussu eema kadunadene kini.

<sup>4</sup> A'a nadirina aaga ü'di ömö'di öccö tüüsini aaga a tumma tanno i'di no anangnga aaga katuurna fiini ya toroko ya.

<sup>5</sup> Nitaalo a'a naneene nja aaga a tuu'da, lakiini a'a nungngo ada ka söödö a korongore, nadhodho a'a eede kiji tidhi oona ku'bu a taneene tanno ada no ma tümmü tumma na Almasiihi dhorro.

### *Tefe ka 'di nja Almasiihi*

<sup>6</sup> Aaga unggeene ka fiini tiya Yasu Almasiihi afa maada ka tamma kini kada Uugaara.

<sup>7</sup> Aaga kardha ku'bu aaga tamma kini dhorro, aaga tümmü tumma naada ka tagalaadene kide no, aaga tamana ta'diila a Masala.

<sup>8</sup> Aaga adin'i ko'do, ömö'di ökönö tafa tüüsini aaga a tumma ma ker'de ker'de ana

eema ma kadaada ma 'billi ana eema ma 'büdhülü ya itaalo aya Almasiihi ya.

<sup>9</sup> Kadigine taneene na Masala ka tuu'da tanno Almasiihi.

<sup>10</sup> O'o nadigine ana Almasiihi, i'i yungngo üdü ma naguugaara 'do nja türü.

<sup>11</sup> Kadu na Almasiihi karadene, lakiini taalo taradene ma niisö, lakiini kadhaga aaga tuu'da ma tatoroko ma tamö'di a taradene tanno Almasiihi.

<sup>12</sup> Kada kambeesedene ana eere tiya Almasiihi, kadü'büdene aaga nja iini, aaga tafiki'dö nja iini afe'de kudumma ada ka tamma ka türü tanno Masala na anangnga i'i ka fiki'dö no.

<sup>13</sup> Kaganeene aaga afa kadu no aaya no ka tatoroko tanno ada, kudumma ada ka titaalo karadene ka tuu'da. A Masala tanangnga aaga ka tefe ka 'di nja Almasiihi ma'duga tatoroko kaja ka oona nye'd'de kungngo.

<sup>14</sup> Agagala eema ma 'billi ya arigirinja ku'bu ya taalo a'diila nja angnga ya, ada'dingnge kada diidi ma angnga, i'i a'duga kaja abbünnü i'i ka salii'bi.

<sup>15</sup> Amuru türü ma tauugaara anangnga euge ka tussu adene ka kadu kidha adagii'bi euge ana salii'bi.

<sup>16</sup> Nggege aaga fa tafa ka ömö'di töccö ahükmü aaga kudumma ma eema tiya ada ka taguri nja tooye nja taanyara nja tere nja uuru ma Sa'bidi.

<sup>17</sup> Eema ya nye'd'de kungngo a korongore ma eema tiya unggunu atö'dö ya, lakiini tumma dhorro kungngo Almasiihi.

<sup>18</sup> Aaga tafa ka ömö'di tiya üfü korokoro a'da i'i iicolo ka eedi nja tumma ma kadhangga a'duga talingnge naada. Ömö'di afa ma tiya miimi ya inynyo ka tasaana eema ku'bu dhabbu ma eema tiya iini ka tijöögö ya, adigine a ta'dinga oona coo'do a tumma ma tadü'd'dü ün'dügüngngö.

<sup>19</sup> Taalo ümmü ajeene nja üdü, ya tuu'da nye'd'de katümmünü ajeene kakaraganja ko'do ana areere nja agillö, inggiridene afa ma Masala ka anangnga i'i ka tinggiridene kungngo.

### *Inde nja tefe ka 'di nja Almasiihi*

<sup>20</sup> Kada ka ndaaya nja Almasiihi aaga taadha ka eema ma 'büdhülü, aaga sa köö'dö nya aaga taneene afa aaga kama 'büdhülü, minna agu aaga aaga taleefe kide, minna agu aaga, aaga tümmünü eyi yaada ka türü tanno iini.

<sup>21</sup> "Fa taa'ba niimö ya ka oona, fa tagolo ya, fa tümmü ya ka oona"?

<sup>22</sup> Eema ya nye'd'de ara titaalo a kadu kara talinggo iini, talaana ma 'büdhülü euge kamiini.

<sup>23</sup> Kijöögö angnga kafeene nja eema ma tussu eema, tümmöönö ma Masala kinggide a tiocolo ma eedi a tüünö midhi ku'bu a tuu'da, lakiini taalo adho ka fiinö ma tafaga eema ya tuu'da ka asaasa ya keere.

### 3

#### *Taneene na insili no*

<sup>1</sup> Kada ka fiki'dö nja Almasiihi, aaga asaasa eema ya ka 'dotombo'do kita Yasu ka tanna kide ya, ya emmi ka Masala ka niisö ma kuri ya.

<sup>2</sup> Aaga anaana iifye ka eema tiya ka 'dotombo'do ya taalo ka eema ma 'büdhü'lü.

<sup>3</sup> Kudumma ada ka taaya, a tefe ka 'dö naada ta küdhü ka Almasiihi a türü tanno Masala.

<sup>4</sup> Yasu i'i yungngo a tefe ka 'dö tanno ada, a kini kara tabbü 'dala ya, ara aaga tabbü 'dala nja iini ka tihhindü tanno iini.

<sup>5</sup> Aaga körnö eema ma 'büdhü'lü yaada ka oona ya, füngngö nja kadu ka dhoonyo, nyoro ma eedi, temelö a tallogo, ya anangnga kadu ka tamma ka eema ma 'büdhü'lü tiya.

<sup>6</sup> Eema ya i'i yungngo tanangnga tagoroo'bo na Masala ka ala kadu.

<sup>7</sup> Kagafigi aaga nggege, ada kaleefe ka eema tiya miini ya 'billi.

<sup>8</sup> Lakiini 'bitingngö sa aaga aadha ka eema tiya tamana aaga ka koroo'bo ya nja tam'baga nja teela ajeene,

<sup>9</sup> aaga tafa tüünö ajeene ana eema ma korokoro ün'dügüngngö, kudumma ada ka taadha ka eema ma 'billi nja linggo miini 'do.

<sup>10</sup> Aaga körni tuu'da na 'diila no ma tussu eema no ka koronggore ma ömö'dö tiya adina i'i ya.

<sup>11</sup> Kita taalo taga Yünan alla taga Yahüdü alla ya tendhe alla ya taalo atendhe alla tölege alla tajeene alla tasaga alla ömö'dö ya hurra ya, lakiini Almasiihi i'i in'dili ada ungngo ka eema in'dili.

<sup>12</sup> Aaga na Masala ka asaasa aaga ka tagesse aaga, manangnga aaga ka tinsili no, aaga körni 'bangnga kada ka oona, aaga tana muuyu ma kadu, nja tiocolo ka nanggeedi, aaga tana 'bangnga ma tasaasa ajeene nja tidhi oona ku'bu.

<sup>13</sup> Aaga faana ka oona aaga tanaana ma kadu tanno ünni tatoroko ana aaga no, üürü tamma na toroko no kungngo ada nja iini, afa ma Yasu ka 'duga tatoroko kaja ka oona, a'diila nja angnga kungngo.

<sup>14</sup> Eema ya in'dili ya aaga agusu tasaasa kide, kudumma tasaasa eege kungngo

kawagaana eema ya koona nye'd'de kungngo kada unggodho.

<sup>15</sup> A ta'diila na Almasiihi tanna kada ka nanggeedi, i'i yungngo a Masala ka tagümmünö aaga a'da aaga ta unggodho, aaga tamana ta'diila a Masala.

<sup>16</sup> Aaga fa ka tumma tanno Almasiihi kanna kada ka nanggeedi a ta'diila miini, aaga talaana ajeene a ta'dara, aaga tüwe tüüsü ma sorne ma nakaaru, nja tüüsü ma koronggore, aaga tamana ta'diila a Masala ndama nanggeedi tanno ada ka teene.

<sup>17</sup> Niimö yaada kara talinggo üürü ada kara teema ya, aaga linggo ana eere tiya Uugaara Yasu. Aaga tanangnga ta'diila a Masala Pupa ana i'i.

#### *Tumma ma taneene ma kadu ma öö'd'i tiya unggodho ya*

<sup>18</sup> Iiya, aaga föönyö tumma na naganyori tanno ada, afa ma tiya Yasu ka asaasa ya kungngo.

<sup>19</sup> Nagiide, aaga asaasa iiya naada aaga tafa tüünö tatoroko ana eege.

<sup>20</sup> Laala ya dhiidhi ya, aaga föönyö eema na kafaafa ma aaga nja nakanüümö tanno ada ana eema nye'd'de, eema ya Yasu ka asaasa i'i ya miini.

<sup>21</sup> Kupupa, aaga fa tamidhi laala yaada kudumma eene kara tagi'di ka oona.

<sup>22</sup> Kasaga, aaga aföönyö tumma na kadu tanno ada ka tagalinggo ada eene no, ka 'büdhü'lü kita. Taalo a'da aaga talinggo amang kene tadöñö ka linggo, amang ka kadu ta'diila nja aaga, lakiini a ri'ba ma Masala ana eedi ka tinsili.

<sup>23</sup> Niimö yaada kadalingga ya, aaga linggo a nanggeedi ka teene afa maada ka talinggo ada Masala taalo a kadu.

<sup>24</sup> Aaga tussu a'da ara Masala tanangnga talingnge naada aaga ndama niisö tanno oono, kada ka talinggo ada Uugaara Almasiihi.

<sup>25</sup> Ömö'dö ya ünni eema ya toroko ya, ara sa aluna tapusu adene niini kide, kitaalo talomodene kide.

### 4

<sup>1</sup> Naguugaara, aaga fa tüünö ada kasaga naada ku'bu, amang kada tussu a'da Uugaara ma aaga ungngo ko'do ka 'dotombo'do.

#### *Talaana*

<sup>2</sup> Aaga fara ka Masala turi aaga tadöñö ko'do aaga tamana ta'diila a Masala.

<sup>3</sup> Aaga ümmü Masala amang kono tafa'da ungngo ka nanüünö amang kede teema tumma na Almasiihi neede ka tanna ka pabuusu miini no.

<sup>4</sup> Aaga afara ka Masala amang kede teema tumma na dhorro no amang ka kadu taföönyö.

<sup>5</sup> Aaga aneene nja kadu no taalo kama ka kaniisa no a ta'dara ma tussu eema ya adho ka fiini ya.

<sup>6</sup> Aaga eema tumma na a'diila no 'bucca kungngo ki'd'i afa tangga'dala, aaga tussu ka tapadaga tumma co kadu nye'd'de ka'diila.

*Tööjüü no eere no*

<sup>7</sup> Tikiros assa ka tirina taneene neede aaga ya akinyi linggo a'a ya. I'i ya örre tiya eede ka asaasa i'i, ya adho ka fiini ya ma linggo ma Uugaara.

<sup>8</sup> I'i yungngo eede ka kürünü i'i kada amang kini tadünüğü taneene niidi aaga, a nanggeedi tiicolo kada.

<sup>9</sup> Nagürünü a'a Önisimös nja iini örre yaaja ya a'diila i'i ya yaada, euge kara tadirina eema ya alinggo adene kiidä kita ya aaga.

<sup>10</sup> Arestarkos ta taneene yeede ka pabuusu ööjüü aaga nja Murkus moole ma Barnaba i'i yungngo eede ka tiki a'da aaga tada'da i'i kini kara tö'dö kada kanna.

<sup>11</sup> Nja Yashu tiya ana eere afe'de a'da Yustus ya. Euge kungngo kalinggo nja a'a euge na Yahüüdü no unggodho euge ka fiini ma tauugaara ma Masala ka kakinyi linggo a'a 'do.

<sup>12</sup> A Abafaraas ööjüü aaga, ömö'di yaada könö i'i ya müni tatalingga ya Yasu Almasihi i'i ya müni afe'de akardha ku'bu dhorro kudumma aaga ma tafara ka Masala amang kada tidhi oona ku'bu aaga talinggo linggo na Masala ka asaasa no.

<sup>13</sup> A'a nungngo nadinö ka dhügürü tiya iini ka talinggo kudumma aaga nja kadu tanno ka Ladükiya no nja Hirabolis.

<sup>14</sup> Lüüka ya dictörö ya teefe ma angnga ya, nja Dimas kööjüü aaga.

<sup>15</sup> Aaga ööjüü kadu no ka Ladükiya no nja Nifa nja kaniisa tammo oono ka 'di mo.

<sup>16</sup> Kada kara türi waraga ya, aaga kürünigü iini aaga tunggu co kadu ma kaniisa ka Ladükiya, amang kene türöönö tekere. Aaga üri waraga könö inggide, yeede ka tunggo co kadu ma Ladükiya.

<sup>17</sup> Aaga iki a Arkibus adinö ko'do ma linggo tanno Masala ka tümmünü i'i iini no afa kide atiimö euge.

<sup>18</sup> Tumma no a'a narigiri a nüüsö ma a'a na Bölis, aaga küügi ma tanna ka pabuusu tanno eede no. A türü na Masala taneene nja aaga.

## Waraga ya Bölis ma co Tasalanüki ya Dhidha ya Tafa'da tumma

Bölis ya tafiiñi i'i agafü'dü linggo ma kaniisa ka Tasalanüki (Kadafiiñi 17), oogo ma ka anya tammo dhabbu ka Makadoniya ka ta'doogo ma Yünan. Unggeene kide areere kudumma Yahüdü köönö kasaasa tako'do kini. Ömö'di ya akinyi linggo iini ya ana eere a'da Timosaws ya ö'dö adirina eema iini a'da kadu ma kaniisa no ka Tasalanüki no kütü ka tümmü tumma ma Masala a'da kalinggo kadu eege. A Bölis tarigiri waraga ma tuu'bu eege ka nanggeedi nja iini ka tapadaga tindineene neene eene.

Bölis anangnga ta'diila a Masala kudumma tamma nja tasaasa tanno kadu ma kaniisa ma Tasalanüki, adirina eema eene ma taneene tanno iini nja eene. İkiri ka tasaana tumma no agalingga adene a kadu ma kaniisa co eene ma inde nja nüümö tiya ara tö'dö ka Yasu Almasiihi kara tafada öö'dö ka 'büdhülü. Adagadünögü eema eene, meene kara taneene nya, idhi Almasiihi tafada.

### Tööjüü

1 A'a na Bölis narigiri waraga ya nja Silwans nja Timosaws ungngo tunggu waraga co kadu ma kaniisa ma Tasalanüki, kadu na Masala ma Pupa nja Uugaara Yasu Almasiihi, a türü nja ta'diila tanna nja aaga.

### Tamma na kaniisa ma Tasalanüki

2 Kamana ungngo ta'diila a Masala kudumma aaga turi kungno, ungngo tadiri aaga ka fara tiya iidi nja Masala ya kungno, kafara ungngo ka Masala a naguuru.

3 Kütü ungngo kadagiigü tumma naada ka talinggo a tamma kidha ma Masala tanno aja Pupa ma linggo naada ka tümmöönö a tasaasa nja tidhi oona ku'bu na öö'dö a tündhigü ka Uugaara tiya aja Yasu Almasiihi.

4 Nagöre eede, Masala masaasa aaga, ungngo tussu a'da oogo magesse aaga.

5 Küdi köö'dö a tumma tanno a'diila no aaga, taalo a tumma ma nüünö unggodho eege, lakiini a türü ma Masala nja Koronggore tiya Insili ya, taalo tumma ma nüünö ün'dügüngögö. Kussu aaga a'da ka kaneene ungngo nja aaga nya kaga'diila nja aaga.

6 Kada ka tamma ka tumma, kagümmü aaga fiin'i yüdi nja fiin'i tiya Masala,

kadhügürü aaga dhabbu, lakiini Korongore ya Insili anangnga aaga ka tadhodho.

7 Aaga kungngo kala ta'diila a kadu ma Makadoniya nye'd'e nja Akaiya.

8 Kudumma tumma tanno Masala ka dhala ku'bu ndama aaga, taalo ka Makadoniya nja Akaiya sugi, lakiini tamma nüüdü ka Masala no kussu adene ka na'buugu nye'd'e, i'i yungngo iidi ka titaaloo kasaasa tadiri nüümö miini.

9 Kadu 'do keema tumma maada ka tamma küdi, yüdi köö'dö kada ya, aaga aadha ka eema ma namasala aaga tümmü tumma ma Masala tammo dhorro mefe ka 'dii mo.

10 Ma tündhigü 'Bii'bala yoono kara tö'dö ndama 'dotombo'do, a Masala ka fiki'dö i'i ndama inde, Yasu i'i yungngo ara toolona angnga ka tagoroo'bo tanno Masala na ara tö'dö no.

## 2

### Linggo na Bölis ka Tasalanüki

1 Nagöre eede, tö'dö kada kanna nüüdi no, taalo ka toroko.

2 Afa maada ka tussu a'da ka kalinggo adene ungngo, ungngo tageeladene ka Filippi, lakiini Masala manangnga türü ungngo müüdi ka teema ka tumma moono co kadu a'da kagünni kadu tatoroko ana ungngo.

3 Taalo ungngo keema tumma na toroko no nja aaga, ungngo taalo küsin'i ömö'di, a taalo nüümö ya toroko küdi ka eedi nja aaga.

4 Lakiini Masala ma'diila nja ungngo manangnga tumma noono ungngo, taalo ungngo keema a'da a kadu ta'diila nja angnga, lakiini Masala oogo mungngo müüri angnga ka nanggeedi.

5 Taalo ungngo köö'dö kussu aaga a'da taalo angnga tasaasa tadünnü eema na a'diila no ma aaga alla tallogo ungngo ma nüümö, illi Masala oogo mungngo mussu.

6 Ungngo taalo kasaasa a'da a kadu tündhigü ungngo ko'do alla aaga tündhigü ungngo ko'do alla kadu köönö.

7 A'da kömüsü müüdi mungngo ada ka ona, kudumma iidi kadaffiñi tanno Almasiihi, lakiini 'bangnga ma aaga magu ungngo afa ma nüümö kaana 'bangnga ma laala tiya oono.

8 Ungngo kasaasa aaga dhorro, kasaasa ungngo aaga, aaga tosse ka taneene nya ungngo, taalo ka tumma ma İnjilli sugi, lakiini kudumma ada ka a'diila nja ungngo.

9 Tamma dhorro nagöre eede, kagüigü aaga dhügürü yüdi nja linggo na' dhabbu no, iidi kadalinggo osooso nja naguuru amang küdi tafa tanyamanya ömö'di öccö

ka oona a'da keemaga ungngo tumma ma İnjilli ma Masala co aaga.

<sup>10</sup> Aaga nja Masala ka tünö aaga ka taneene tanno iidü nja aaga a nanggeedi ka tinsili a'da taalo niimö ya toroko ya kide, aaga no amma ka Masala no.

<sup>11</sup> Aaga afe'de kussu aaga a'da ka kalinggo ada ungngo eema nye'd'e afa ma pupa ka tüünii ada laala tiya iini ya kungngo.

<sup>12</sup> Kafünögü ungngo aaga ko'do, ungngo tagalaanaga, ungngo tageema nja aaga, aaga taneene taneene ma Masala na dhorro no, mümmüni aaga a tauugaara nja tidihindhi tanno oono.

<sup>13</sup> Yungngo iidü kamana ta'diila a Masala turi kungngo, kudumma ada ka tümmü tumma ma Masala naada ka taföonyö kidü no, aaga tamma kide no. Taalo tumma ma ömö'di eege kamiini, lakiini tumma ma timin'da ma Masala ka linggo kada ka oona aaga na amma ka Masala no.

<sup>14</sup> Nagöre eede, eema ya linggodene ana aaga, agalinggo adene ana kaniisa tanno Masala no ka Yahüüdiya no ana eere tiya Yasu Almasiiji. Siliga ma aaga eege kungngo kalinggo aaga, eege tekere kagalinggo Yahüüdü eege.

<sup>15</sup> Eege kagiidi Uugaara Yasu nja nagan'bi, küünii tatoroko ana angnga, taalo kamma ka Masala, kadiidi kadu in'dili.

<sup>16</sup> Kasaasa tafaga angnga ka teema ka tumma ma Masala co ajeene, tumma na ara tö'dö a toolona eene no, eege kagoonaa ma tüünii eema ya toroko ya, a'bütüngögö sa tagoroo'bo na Masala a tö'dö kene.

### Bölis asaasa tassa kene afe'de

<sup>17</sup> Lakiini nagöre eede, ka kaadha ungngo kada ka oona idhilli kungngo a dhugudha ün'düngögö, lakiini taalo ana nanggeedi, katinigöögö ungngo ma tassa kada a 'bangnga ma aaga kagu unngno.

<sup>18</sup> Kasaasa ungngo tö'dö kada kanna, a'a ka eyi tiya eede na Bölis no nasaasa a'a tö'dö ta unggodho üürü teera illi Ebliisi afaga ungngo keere.

<sup>19</sup> Ka Uugaara Yasu kara tö'dö ya, aaga kungngo kara tanangnga tidihindhi angnga nja dhodho, anangnga ungngo ka 'diniga oona niidü coo'do a tii'bara ma türü tanno ada ka anangnga ungngo no.

<sup>20</sup> Aaga ka tarünögünja ko'do tanno iidü, aaga tadhodho tanno iidü.

### 3

<sup>1</sup> Kidü ka ndasala tidhi oona ku'bu niidü ka ndafaradene ya, ungngo tikirü ka tiki a'da ungngo töödhü ka Asiina unggodho unngno.

<sup>2</sup> Kagürünü ungngo örre ma angnga Timosaws, ya alinggo linggo ma Masala nja ungngo ya, adünnü tumma ma Almasiiji a'da öö'dö tamünögü aaga ko'do ma türü ma tamma tanno ada.

<sup>3</sup> Amang ka ömö'di töccö tapadaga oona keere kudumma tatoroko tanno, kussu aaga a'da ara angnga tagadhügürü.

<sup>4</sup> Kidi ka takaleefe nja aaga ya, kakilli ungngo ka takiki aaga a'da ara ungngo tadhügürü afa maada ka tussu iini dhorro kungngo.

<sup>5</sup> I'i yungngo anangga a'a ka kürünü Timosaws, kudumma eede ka titalo nara tamaanya tidhi oona ku'bu tafifinni miini kara tö'dö tassa ka tamma ka Masala naada, ri'ba kagu ungngo a'da iidü Ebliisi tö'dö ta'b'ba aaga a lingngo niidü tanggaaga ta niimö ün'düngögö.

### Tumma na Timosaws

<sup>6</sup> A 'bitingngö Timosaws ungngo ö'dö ndama aaga kanna adirina tumma ma tümmü Masala naada ungngo nja tasaasa, iki ungngo a'da aaga kiigü tumma ma ungngo turi kungngo a ta'diila, aaga kasaasa tassa kidü afa miidü ka asasa tassa kada kungngo.

<sup>7</sup> Nagöre eede, kadhügürü tiya iidü ya nja tüünii muuyu, kidhi ungngo oona ku'bu, ungngo tana türü a tamma ka Masala tanno ada.

<sup>8</sup> A 'bitingngö ya, kefe ungngo ka 'dö kudumma ada ka tidhi oona ku'bu ka Uugaara.

<sup>9</sup> Ara ungngo tanangnga ta'diila a Masala ma aaga ka dhodho tanno iidü ka oona kidha ma Masala no.

<sup>10</sup> Ungngo tafara ka Masala oosooso nja naganuru turi, amang kidü tassa kada ka dhugudha amang kidü tö'dö a niimö tiya itaalo ka tamma tanno ada.

<sup>11</sup> Fa ka Masala Pupa yaaja nja Uugaara Yasu indinaana fiinii kidü ku'bu ma tö'dö kada.

<sup>12</sup> Nasaasa a'a Masala ma kusu tasaasa ajeene aaga ma kadu nye'd'e, afa miidü ka asasa aaga kungngo.

<sup>13</sup> Manangnga türü ada ka nanggeedi aaga tinsili a niimö ya toroko taalo kide, kidha ma Masala tammo aja Pupa yaaja, ka uuru ma tö'dö ma Uugaara tiya aja Yasu nja kadu tanno amma kono no.

### 4

#### Tefe ka 'dö ma tanangnga Masala ka tadhodho

<sup>1</sup> Keere kungngo nagöre eede, ungngo kasaasa aaga ana eere tiya Uugaara Yasu a'da aaga tagusu taneene ka taneene tanno ada ka tunggeene iini 'bitingngö no ma tanangnga oona ka'diila ka Masala.

<sup>2</sup> Kussu aaga tumma nüüdii ka tünügü aaga ndama Uugaara Yasu.

<sup>3</sup> Niimö ya Masala ka asaasa a'da aaga tinsili iini i'i yungngo, a'da aaga taadha ka temelö,

<sup>4</sup> amang ka ömö'dii töccö ana kada tussu ka taneene nja aka tammo iini ka tinsili ka tadho ka fiinii.

<sup>5</sup> li'di temelö tako kini afa kadu no taalo kussu Masala no.

<sup>6</sup> Ömö'dii öccö tafa talinggo örre yiini alla amidhi i'i, kakilli ungngo ka tirina tumma no aaga, Masala oogo mungngo mara ta'diinö ka tumma tanno.

<sup>7</sup> Taalo Masala magümmänü angnga ma eema tiya nyoro ya, lakiini ma eema tiya insili ya.

<sup>8</sup> Ömö'dii ya anu ka talaana tanno ya, taalo a tanu ka tadü'ddü lakiini Masala mungngo manangnga Koronggore yoono ya Insilä ya aaga.

<sup>9</sup> Aaga tasaasa ajeene ma tanagöre, taalo nama tarigiri ada ka waraga aaga no miini, kudumma Masala ka tagalaana aaga a'da aaga tasaasa ajeene dhidha.

<sup>10</sup> Aaga üünii nggeege a nagöre ma angnga tanno ka Makadoniya no nye'd'de. Ungngo tiki kasaasa nagöre eede a'da aaga talinggo nggeege aaga tii'bi ya.

<sup>11</sup> Aaga tadinö ko'do aaga taneene ka tiicolo, aaga talinggo eema ma eyi tiya ada, aaga tagu eema ma linggo ma iisine tanno ada afa ma tiya iidi ka kadünnü aaga ya kungno.

<sup>12</sup> Amang ka taneene tanno ada ta'diila ka kadu tanno taalo ka ma kaniisa no amang kada tafa tarangnga kadu.

#### Tö'dö na Uugaara

<sup>13</sup> Nagöre eede, taalo ungngo kasaasa a'da tüürü ma kadu tanno aaya no, ii'dii aaga tanggaaga tamüürü afa kadu na taalo ka indhigä Masala no.

<sup>14</sup> Üürü kagamma angnga a'da Yasu eyi asa fiki'dö afe'de ya, i'i yungngo aco kada kamma a'da kadu na aaya a'da kamma kini no, ara Masala sa ka öö'dö ana eege nja Yasu.

<sup>15</sup> Afa ma tumma tanno Uugaara ka eyi tiya iini, ungngo tiki aaga a'da angnga na öreene na aleefe tefe ka 'di no, ara Uugaara ka öö'dö, taalo angnga kara co ka kadu tanno aaya no kidha.

<sup>16</sup> Kudumma Uugaara Yasu ka eyi tiya iini ara tö'dö ku'bu ndama 'dotombo'do ana ndhiidhe ma tümmüneene ma uugaara ma kadhingga, a fara ma tünidö tanno Masala, ikiri kadu na aaya ka tamma ka Almasihi no kafiki'dö ka dhidha.

<sup>17</sup> Ikiri angnga ka takoreene nja eene ka tülüögü, angnga na öreene kefe ka 'di

no, angnga takoreene nja Uugaara Yasu ka 'dotombo'do angnga taneene nja iini turi.

<sup>18</sup> Kada kindhigä njaana ko'do a tumma tanno.

## 5

#### Uuru na Uugaara

<sup>1</sup> Nagöre eede, taalo nama tarigiri ada waraga aaga, aaga ma nagürünü nja naguuru.

<sup>2</sup> Kudumma ada ka tussu dhorro a'da uuru ma tö'dö na Uugaara kafeene nja tanyooro ya unggene ooso kungngo ya.

<sup>3</sup> Ka kadu kara tiki a'da, "A'diila 'buugu insili ya," ikiri ka tako'd'do kene ma taga'da ada eege ku'bu afa teene na ö'dö ka aka magüröönö mo ka tin'di kungngo kitaalo kara tampaanya toolona nanggeyi neene.

<sup>4</sup> Lakiini aaga nagöre eede, taalo aaga kanna ka na'būugu tiya lüllü ma uuru tanno miini no kara tükü aaga ko'do afa tanyooro.

<sup>5</sup> Kudumma ada kada laala ma töyeeene nja laala ma uuru, taalo kama ma ooso alla ma ndüüli.

<sup>6</sup> Fa kada fa tafeene nja kadu köönö na arigide no, lakiini kada tadinö ko'do angnga tümmü oona naaja dhorro.

<sup>7</sup> Kudumma kadu tanno arigide no karigide ooso kungngo, a kadu na oyoye no, kooye ooso kungngo.

<sup>8</sup> Lakiini angnga no laala ma uuru no ka tadinö, angnga tagümmü madagussi ma tamma nja tasaasa nja barnete ma tindhigä toolonadene.

<sup>9</sup> Masala taalo mö'dö ana angnga maaja ka dhügürü, lakiini ma toolonadene ana eere ma Uugaara tiya aja Yasu Almasihi.

<sup>10</sup> I'i ya eyi ka üüdü ma angnga amang kaja tageefe ka 'dii' nja iini, üürü kadinö angnga üürü kaaya angnga.

<sup>11</sup> Aaga indhigä njaana ko'do, aaga takinyi njaana ko'do afa ma tiya ada ka tünii'büttingngö ya kungngo.

#### Talaana na eere no nja tööjüü

<sup>12</sup> Ungngo tasaasa aaga nagöre eede a'da aaga tanaana iifye ka kadu tanno alinggo kada ka söödö no na alaana aaga ka fiinii ma Uugaara no.

<sup>13</sup> Aaga tasaasa eege dhorro ka linggo tanno eene no, aaga aneene a ta'diila ma nanggeyi tanno ada.

<sup>14</sup> Nasaasa aaga nagöre eede, a'da aaga talaana kadu no taalo kalinggo no, aaga afünügü kadu no ari'ba no ko'do, aaga akinyi kadu no ki'di no ko'do, aaga idhi ona ku'bu ma kadu nye'd'de.

<sup>15</sup> Aaga fa ka oona ömö'dii öccö tafa ta'diinö ka ömö'dii tiya a küünii tatoroko ana i'i, lakiini aaga üünii eema ya a'diila

ya 'bucca kungngo anangnga eyi tanno ada  
nja kadu köönö.

<sup>16</sup> Aaga dhodho turi kungngo,

<sup>17</sup> Aaga eema nja Masala 'bucca  
kungngo.

<sup>18</sup> Aaga füñgü Masala ko'do ka eema  
in'dili, kudumma fiñi tiya Masala i'i ya  
miini kada ana eere ma Yasu Almasiihi.

<sup>19</sup> Aaga fa taga'da linggo ma Koronggore  
tiya Insili ya.

<sup>20</sup> Aaga fa tamidhi linggo ma tane'bi.

<sup>21</sup> Lakiini aaga anaana iiye ka eema  
nye'd de aaga sa katümmü ya a'diila ya.

<sup>22</sup> Aaga fa takete ka nüümö tiya toroko ya.

<sup>23</sup> A Masala ma ta'diila ka eyi tiya oono  
manangnga ka tinsili ka eema in'dili mafa  
kada a nüümö ya toroko titaalo ada ka oona.  
A koronggore yaada ta'diila a tuu'da miini  
nja koronggore ka uuru tanno Uugaara  
tiya aja Yasu Almasiihi kara tö'dö kide ya.

<sup>24</sup> A ömö'di ya ka ümmünü aaga ya, i'i  
ya adho ka fiñi, i'i taalo arumu timi'di  
tumma niini.

<sup>25</sup> Aaga fara ka Masala kudumma  
ungngo, nagöre eede.

<sup>26</sup> Aaga ööjülü nagöre ma angnga  
nye'd de tööjülü na insili no.

<sup>27</sup> Ara a'a teema nja aaga ana eere ma  
Uugaara a'da aaga tiiri waraga ya a nagöre  
ma angnga nye'd de.

<sup>28</sup> Fa ka türü tanno Uugaara Yasu Almasi-  
ihî taneene nja aaga.

## Waraga ya Bölis ma co Tasalanükü ya Eera ya Tafa'da tumma

A Bölis tarigiri waraga ya co kadu ma kaniisa ka Tasalanükü kini ka ndatüümö nangtereene köön iini ka tarigiri waraga ya Tasalanükü ya dhidha ya. Ka waraga tiya i'i uu'bu kadu ma kaniisa ka nanggeedi a'da kütü katümmü tumma neene ka kadu ka talinggo eäge. Kadu könö kadünüğü eema eene a'da Almasiihi andagöö'dö afe'de nya iini ka ndakete kara tö'dö, taalo kasaasa talinggo afe'de. Bölis anangnga tumma eene a'da kafa taföönyö tumma na kadu tanno miini no. I'i ageema iki a'da a kadu ma kaniisa tafa tadhunu. Uuru ma tatoroko kara tadigi 'büdhü'lü kara saga öö'dö a'da üfürü Almasiihi tafada, uugaara ya toroko ya ara saga ka tafünü kadu kada diidi ma Masala.

<sup>1</sup> A'a na Bölis narigiri waraga ya nya Siila nya Timosaws ungngo tunggu co kadu ma kaniisa ma Tasalanükü kadu na Masala Pupa yaaja nya Uugaara Yasu Almasiihi.

<sup>2</sup> Fa ka Masala Pupa yaaja nya Uugaara Yasu Almasiihi anangnga türü aaga nya ta'diila.

### Tamana ta'diila nya tafara ka Masala

<sup>3</sup> Nagöre eede, kama ungngo ma tanangnga ta'diila a Masala turi kudumma tamma tanno ada ka inggiridene dhabbu, nya tasaasa ajeene tanno naada ka tadhabbu.

<sup>4</sup> Ungngo ka eyi tiya iidi kabbü ungngo na'dugiisine ana aaga ka nakaniisa tanno Masala naada ka tanna kide no, aaga kidhi oona ku'bu nya tamma ka eema tiya ada ka tambaanya ma dhügürü nya tüüninja ku'bu ya.

<sup>5</sup> Nggeege kussu angnga a'da tümmü na Masala ka adho ka fiin'i ma tindinaana aaga ka tauugaara ma Masala tanno aada ka dhügürü ka fiin'i miini no.

<sup>6</sup> Ara Masala saga tüün'i nüümö ya adho ka fiin'i ya, oogo mara sa ka tapusu kadu na üün'i tatoroko ana aaga no.

<sup>7</sup> Ara Masala saga nangnga talingnge aaga aaga na dhügürü ta'bütängnö no nya angnga afe'de. Ara talinggo adene ka Uugaara Yasu kara tö'dö ndama 'dotombo'do nya kadhingga tanno iini na ana türü no.

<sup>8</sup> Ana onggo'do ma issi ka finne ma tapusu kadu na taalo kussu Masala no nya kadu tanno taalo kaföönyö tumma na Uugaara tiya aja Yasu.

<sup>9</sup> Eege kara tapusu adene kaama ta'billi, taalo kara takete ka dhugudha tiya Uugaara Yasu nya türü ma tiddhindhi tanno iini

<sup>10</sup> kini kara tö'dö ka uuru tanno miini no, a tiddhindhi nya tinsili a kadu na amma kini no tadhore nye'd'e nya aaga afe'de, kudumma ada ka tamma ka tumma tanno iidi.

<sup>11</sup> I'i yungngo iidi ka teema nya Masala a'da aaga ta kadu ma linggo tanno oono in'dili matüümö linggo a türü ma ta'diila nya linggo ma tamma tanno ada.

<sup>12</sup> Fa ka eere tiya Uugaara tiya aja Yasu iihindhi, a türü niini tanna kada ka oona aaga tanna kini ka oona a türü ma Masala tammo aja nya Uugaara Yasu Almasiihi.

## 2

### Uuru ma Yasu ka tö'dö

<sup>1</sup> Lakiini nagöre eede, a'a nasaasa aaga aaga tussu tö'dö na Uugaara tiya aja Yasu Almasiihi, angnga taganeene nya iini,

<sup>2</sup> aaga tafa ta'deedene ka oona areere ka nanggüüdü tanno ada kudumma a tamma kö'dö ndama koronggore alla ndama angnga kiki kide a'da uuru ma Uugaara killi ka töö'dö a tamma no taalo ka timin'da.

<sup>3</sup> Aaga fa tafa ka ömö'di töccö iisiñi aaga a fiin'i tököönö, kudumma uuru na Uugaara taalo kara tö'dö illi a tasilli eema tö'dö, ömö'di ya toroko ya tabbü 'dala ma tara teyi.

<sup>4</sup> I'i ara tadiidi a'diniga eyi yiini coo'do ka eema nye'd'e ya ana eere a'da Masala nya kadu kafara kini ya amang kini temmi ka la ma Masala eema ka eyi tiya iini a'da i'i ya Masala.

<sup>5</sup> Taalo aaga kagiüü yeede ka taganeene nya aaga ya, na a'a tageemaga tamma na miini no co aaga 'bucca kungno?

<sup>6</sup> A 'bitingngö kussu aaga nüümö ya afaga i'i keere ya, amang kini tabbü 'dala ka uuru miini tanno dhorro no.

<sup>7</sup> Taküdhü ma ömö'di tiya atoroko ya kanda tüünidene 'bitingngö, lakiini nüümö ya ara tüünidene ya, taalo ara tüünidene ana ömö'di ya afaga eege keere ya, ka'dugadene ka fiin'i.

<sup>8</sup> Idhi ömö'di ya toroko ya saga abbü 'dala ka Yasu Almasiihi ka tiidi i'i a teela tanya a nüümö tanno iini, aginyi i'i a tali-maanma tabbü 'dala tanno iini.

<sup>9</sup> Ömö'di ya toroko ya ara tö'dö a türü ma Ebliisi, alinggo eema ma türü keefe ma tüsini kadu.

<sup>10</sup> I'i alinggo eema ya toroko ya nye'd'e ma tüsini kadu na aaya no, kudumma eene kitaalo ka tasaasa tamma tanno dhorro no meene ka toolonadene.

<sup>11</sup> I'i yungngo a Masala ka kürünü türü ma tam'baga kene amang kene tamma ka korokoro,

<sup>12</sup> amang ka kadu nye'd'de tanno taalo kamma ka tumma ma timin'da kara kasaasa eema ya toroko ya, ara eege ka tahükümüdene.

### Aaga idhi oona ku'bu

<sup>13</sup> Lakiini ara ungngo tamana ta'diila a Masala 'bucca kungngo, kudumma aaga nagöre eede na Uugaara ka asaasa eege no, kudumma Masala ka tagesse aaga ka dhidha amang kono toolona aaga a tinsili ma Koronggore, a tamma ka tumma ma timin'da.

<sup>14</sup> Tumma no eege kungngo a Masala ka tagümmünü aaga a toolonadene ma tumma ma Yasu niidi ka tagöö'dö iini aaga amang kada tosse ka tidihindhi na Uugaara tiya aja Yasu Almasiihi

<sup>15</sup> Aaga kardha ku'bu nagöre eede, aaga tafa ka talaana tanno ada ka taföönyö kidi no, üürü a tumma ma nñinö üürü ka waraga tiya iidi ka tunggu aaga ya.

<sup>16</sup> Uugaara yaaja Yasu Almasiihi ka eyi tiya iini nja Masala Pupa yaaja masaasa angnga manangnga türü angnga a ta'diila ta'billi a tindhigü tanno a'diila no.

<sup>17</sup> Anangnga aaga ka takidhö ka nanggeedi ümmünü eege ku'bu ka eema tiya ada ka talinggo ka'diila ya nye'd'de nja tiya ada ka teema ya.

## 3

### Aaga afara ka Masala kudumma ungngo

<sup>1</sup> Keere kungngo nagöre eede, aaga afara ka Masala kudumma ungngo, amang ka tumma tanno Masala tala kadu areere kidhindhi afa meene nja aaga kungngo.

<sup>2</sup> Aaga afara ka Masala afe'de amang kono toolona ungngo ka kadu tanno oroko no, taalo kadu nye'd'de de kamma.

<sup>3</sup> Lakiini Uugaara ya adho ka fiini dhorro ya, ara tanangnga aaga kana türü, afa kada kudumma koronggore tiya toroko ya.

<sup>4</sup> Kamma ungngo 'do ka Uugaara a'da kalinggo aaga eema yiidi ka takiki aaga ya a'da kütü aaga ka lingngo iini.

<sup>5</sup> Fa ka Uugaara anangnga nanggeedi naada ka tasaasa ma Masala nja tidhi oona ku'bu na Almasiihi ka anangnga angnga no.

### Aaga fa taneene nja kadu tanno adhunu no

<sup>6</sup> Ara ungngo tadirina eema aaga nagöre iidi ana eere ma Uugaara Yasu Almasiihi a'da aaga tafa taneene nja kadu tanno adhunu no kitaalo kaföönyö talaana niidi ka tagalaana aaga iini no.

<sup>7</sup> Kussu aaga dhorro a'da ara aaga turna fiini yiidi ka tunggeene iini ya, taalo ungngo kadhunu iidi ka taganeene nja aaga ya.

<sup>8</sup> Ungngo taalo kagu nñimö ma takuri ya ömö'di ün'dügüngngö, lakiimi kagalinggo ungngo oosooso a naguuru ungngo tadhögürü amang kidi tafa tanyamanya ömö'di öccö.

<sup>9</sup> Taalo a'da ungngo taalo kama tagu eema yaada, lakiini ungngo kasaasa a'da aaga tiiri taneene niidi aaga tuurna i'i keere.

<sup>10</sup> Kidi ka taganeene nja aaga ya, kadirina ungngo tumma no aaga, "Ömö'di ya taalo asaasa linggo ya, taalo ama tagu eema."

<sup>11</sup> Kadiri ungngo tumma no, kudumma iidi ka taföönyö a'da kadu könö kungngo ada ka söödö kadhunu, kitaalo linggo kene illi keema ka tumma tanno kadu ün'dügüngngö.

<sup>12</sup> Kadu afa ma tanno miini no ungngo tiki eene ana eere ma Uugaara Yasu Almasiihi a'da angnga tasaasa a'da kalinggo amussu kagu kuri yeene.

<sup>13</sup> Lakiini aaga nagöre iidi, aaga fa tagi'di ka linggo ma eema tiya a'diila ya keere.

<sup>14</sup> Üürü ömö'di ungngo ada ka söödö ya, taalo aföönyö tumma niidi ka waraga tiya no, aaga iiri i'i aaga taadha iini ka oona amang ka modolo tagu i'i.

<sup>15</sup> Aaga fa tümmü i'i kada diidi tiya ada, lakiini aaga eema nja iini kada örre tiya ada.

### Tööjülü na eere no

<sup>16</sup> Fa ka Uugaara ma ta'diila Yasu Almasiihi ka eyi tiya iini amana ta'diila aaga a naganuuru ka eema nye'd'de, fa ka Uugaara aneene nja aaga in'dili.

<sup>17</sup> A'a narigiri tööjülü no a nñösö ma a'a na Bölis no, kiji aaga kala miini yeede ka anangnga ka waraga tanno eede yeede ka rigiri no.

<sup>18</sup> Fa ka türü tanno Uugaara Yasu Almasiihi kaneene nja aaga in'dili kungngo.

## Waraga ya Bölis ma tunggu co Timosaws ya Dhidha ya Tafa'da tumma

Timosaws aga ömö'di ma kaniisa ya tadimöögö ya, nagürüünü kungngo iini kadhabbu afara ka Masala, i'i aga unggunaana ku'bu nja Bölis tiya tafüni ya, akinyi teema tumma ma İnjilli ma Yasu Almasiihi iini. Keere kungngo a Bölis tagürünü Timosaws aco tauugaara ma kaniisa ka anya ma Afosus.

Bölis agürünügi a waraga tiya ungu co Timosaws ma tanangnga tumma iini ma tümmü tumma ma Masala ka nakaniiisa nja tanaana iïye ka katalaana tanno oroko no. Waraga ya afe'de eema ma kadu öccö eäge kungngo kara tessedene ma ta naguugaara ma kaniisa kara talingga iini nja kadhoonyo ka kaniisa afa ma kadimöögö kungngo nja kidhindharu nja iyya ma nagüüme.

<sup>1</sup> Waraga ya ö'dö ndama tafüni ya Yasu Almasiihi a türü tanno Masala tatoolona yaaja Yasu Almasiihi yaaja ka tündhigü i'i ya.

<sup>2</sup> Nunggu co Timosaws 'bii'bala yeede ya dhorro ya, a tamma ka Masala, fa ka Masala Pupa yaaja nja Uugaara tiya aja Yasu Almasiihi anangnga türü o'o nja 'bangnga nja ta'diila.

### Tidhi oona ku'bu ka dhügürü

<sup>3</sup> Afa meede ka tageema nja o'o a'da ara a'a co Makadoniya, a'da nanna ka Afosus amang küdü teema nja kadu töccö a'da kafa talaana kadu ka talaana ma korokoro afe'de.

<sup>4</sup> Kafa tatoodo ka eema ma elle nja nagraene ma kadaada tanno dhabbu no, kara tö'dö ndama nagonggo'do a tumma na taalo kara talingga tumma no ma tamma ka Masala no.

<sup>5</sup> Fiin'i ma tumma tanno a'da tasaasa na ö'dö ndama eedi tiya insili ya nja eedi tiya a'diila ya nja tamma tanno dhorro no.

<sup>6</sup> Kadu köön kaadha ka tumma tanno kaama ka fiin'i kara kiirada ka tisaana ka oona ma taa'baga ün'dügüngngö.

<sup>7</sup> Kiki a'da eege ka katalaana ma seriye kassa kitaalo kussu niimö yeede ka teema ya, kitaalo kö'dö iini ta'diila.

<sup>8</sup> Kussu angnga 'bitüngngö a'da seriye a'diila kene kara talingga imi dhorro.

<sup>9</sup> Kussu ungngo a'da seriye taalo ö'dönja a kadu tanno a'diila no, lakiini ö'dönja a kadu tanno oroko no nja tanno asilli eema no nja tanno anu ka tumma ma Masala no nja tanno anyoro ka nanggeedi

no nja tanno agirina kafaafa meene nja nakaniimö no nja tanno agirina kadu no,

<sup>10</sup> kadu no üünü eema ya toroko ya nja nageldo nja kadu tanno anadene a kasaga no nja tanno korokoro no nja kadu tanno aküdöönö ün'dügüngngö no nja kadu tanno anu ka talaana tanno a'diila no.

<sup>11</sup> Tumma na ungueene nja İnjilli na nanja a'a no, tumma ma Masala na baraka ka tanna kide nja tidihindhi no.

### Türü na Masala kungngo a Bölis

<sup>12</sup> Namana a'a ta'diila Uugaara tiya aja Yasu Almasiihi ya anangnga türü a'a ka linggo tanno iini. Kudumma iini ka tümmü a'a kada ömö'di ya adho ka fiin'i ya.

<sup>13</sup> A'a nungngo nakeela i'i natakeemidhi i'i nadagalinggo i'i, lakiini Masala möödöhi kede kudumma eede nafürü tamma kono nitaalo nussu niimö yeede ka talingga ya.

<sup>14</sup> İkiri Uugaara yaaja ka anangnga türü a'a dhabbu ma tamma nja tasaasa ma Almasiihi Yasu.

<sup>15</sup> Tumma dhorro eäge kungngo, kama tamma dhorro a'da Yasu Almasiihi ö'dö ka 'büdhüü ma toolona kadu na oroko no a'a nadhidha.

<sup>16</sup> Lakiini 'bangnga ma kananja a'a amang ka Yasu Almasiihi tala 'bangnga miini a'a, ömö'di ya adho tatoroko 'do ya, ma tala a kadu tanno amma kini no in'dili ta'duga tefe ka 'di ta'billi.

<sup>17</sup> A 'bitüngngö ta uugaara ta'billi no, Masala tammo unggodho mo, mefe ka 'di turi mitaalo mijidene ümmü oogo ana eedi nja tidihindhi ta'billi. Amiin.

<sup>18</sup> 'Bii'bala eede Timosaws, nanangnga a'a tumma o'o afa ma tanno ka tumma ma tane'bi tanno ageema tumma ma o'o kadhadha no afa kene amang küdü teema koro'bo ya a'diila ya.

<sup>19</sup> Ümmü tamma ana eedi ka tinsili ya, a kadu köön kana kide, a mürkabü ma tamma meene ta'bu.

<sup>20</sup> Kadu na miini no Himinas nja Askander neede ka tümmünü eäge Ebliisi amang kene talaadene kafa teela Masala.

## 2

### Tafara ka Masala

<sup>1</sup> Niinö yeede ka asaasa ka dhidha ya, aaga tafara ka Masala aaga teema nja oono a tamana ta'diila oono ka üüdü ma kadu nye'de kungngo.

<sup>2</sup> Aaga afara ka Masala kudumma naguugaara nja kadu tanno afa ka anya no amang ka 'buugu ta'diila a niimö ya toroko ya tafa tö'dö kada.

<sup>3</sup> A'diila nggeege ka Masala tatoolona yaaja.

<sup>4</sup> Asaasa kadu in'dili ka toolonadene kussu tumma ma timin'da.

<sup>5</sup> Kudumma Masala ma unggodho, ömö'di ya ka söödö ma Masala nja kadu ya unggodho i'i ya ömö'di Yasu Almasiihi.

<sup>6</sup> I'i üpu eyi yiini co ma tafa kadu in'dili, tumma na Masala manangnga a kadu ma 'büdhüü ka uru miini.

<sup>7</sup> I'i yungngo eede ka kürünüdene ka tafüni nja tatalaana ma kajeene ma teema tumma ma tamma nja timin'da, taalo a'a nakorokoro, lakiini a'a neema tumma ma timin'da.

<sup>8</sup> Nasaasa a'a nagiide a'da keema nja Masala ka na'būugu in'dili kamünügү ii-sine coo'do ka tinsili, taalo tagoroo'bo kide nja tanu aana ka oona.

<sup>9</sup> Nasaasa a'a iiya kümmü en'di ya a'diila ya ka oona kindinaana oona, kaana modolo, kafa tüüfү awu, kafa tümmü dahaba nja kisi nja en'di tiya agu'daana ya,

<sup>10</sup> lakiini a linggo tanno a'diila no, fa ka iiya küüni linggo ma Masala na 'diila no.

<sup>11</sup> Fa ka iiya kalaadene kaföönyö tumma amussu kaafaa teema ko'd'o.

<sup>12</sup> Taalo a'a namma ka aka ka talaana nja oono ka tüüni ada nyuri yoono ku'bu, lakin'i matoodo ka tumma tanno iini amussu.

<sup>13</sup> Kudumma Masala ka töörü'bü Adam ka dhidha massa ka töörü'bü Hawa.

<sup>14</sup> A Eblisi taalo agüüsini Adam, lakiini i'i agüüsini aka ma'dinggö ka tatoroko.

<sup>15</sup> Lakiini mara toolonadene kono kara teene laala minggiri egee ka tamma ma Masala nja tasaasa nja tinsili ma eedi nja tafa ka oona ka'diila.

### 3

#### *Ka'boge ma kaniisa*

<sup>1</sup> Tumma dhorro egee kungno ma ömö'di tiya asaasa tata'boge ma kaniisa ya, i'i awwa linggo na 'diila no.

<sup>2</sup> Ka ka ta'boge ma kaniisa insili a'da taalo hetti kini, arna aka ma unggodho, a'dara, ümmü eyi yiini, a'diila nja kadu, a ambaanya talaana.

<sup>3</sup> Taalo ake ka ngeeli, taalo a rüü lakiini a'diila nja kadu, taalo asaasa tumma na toroko no, taalo allogo ma eema dhabbu.

<sup>4</sup> Alaana kadu ma 'dii tiya iini amang ka laala tiya iini taföönyö eema yiini nye'd'de kungno.

<sup>5</sup> (Üürü ömö'di ya taalo indinaana kadu ma 'dii tiya iini ku'bu, ta'diila ya ara tafa ka kaniisa tammo Masala?)

<sup>6</sup> Ta'boge afa tamma ka Masala kete kungno, kudumma iini kara ta'diniga oona niini coo'do a'dinggö ka tahükümü tanno Eblisi no kungno.

<sup>7</sup> A kadu na kürö ma kaniisa no tussu dhorro amang kini tafa ta'dingga ka modolo nja küdhü ma Eblisi.

#### *Kadiüfi ma kaniisa*

<sup>8</sup> Kadiüfi afe'de kada kadu tanno 'dara no, taalo kakorokoro, taalo kake ka ngeeli, taalo kallogo ma eema dhabbu.

<sup>9</sup> Fa kene kafa ka tumma ma Masala ana eedi ka tinsili.

<sup>10</sup> A kadu türi taneene neene ka saga tümmünü egee kalinggo ma kadiüfi kene kitaalo kaduna niimö ya toroko ya kene.

<sup>11</sup> Fa ka iiya afe'de kada kadu tanno dhorro ka fiin'i no, taalo kadhe kadu, ka'dara, ka'diila ka eema nye'd'de.

<sup>12</sup> A kadiüfi tarna iiya ka unggodho, kinggiri laala yeene ka fiin'i tiya a'diila a niimö ya toroko ya titaalo kene ka nøö'di.

<sup>13</sup> Kadu na alinggo ka'diila no kaluna 'buugu ya a'diila ya, kara teema tumma ma tamma tanno eene ka Yasu Almasiihi.

<sup>14</sup> A'a narigiri ada waraga ya co o'o kudumma eede ka asaasa tö'dö küdü kanna kete kungno.

<sup>15</sup> Üürü a'a nadoono ku'bu ya, ara o'o tussu a'da kadu ka tindinaana nanggeyi neene ku'bu ka 'dii ma Masala nya, ma kaniisa ma Masala tammo efe ka 'dii mo, miide ma kuudhu ma timin'da.

<sup>16</sup> Taalo tam'bana ko'do kudumma tanno, lakiini taküdhü ma tamma tanno aja ka Masala idhindhü,

I'i abbü 'dala ka tuu'da,  
ya insili a koronggore,  
a kadhangga tadinö kini,  
kadgeemaa tumma miini ka naanya,  
a kadu ma 'büdhüü tamma kini,  
ada'dininja coo'do ka tidhindhü.

### 4

#### *Katalaana no korokoro no*

<sup>1</sup> Koronggore ma Masala ya iki 'biin'i a'da, ara kadu tapadaga keere ka tamma ma Masala ka naguuru tanno eere no, kisi ka nagoronggore tanno toroko no keere nja talaana ma nakana'bu.

<sup>2</sup> Talaana ma kadu tanno 'dinigi oona coo'do ka korokoro no, nanggeedi neene ka tinyogo kaaya.

<sup>3</sup> Kafaga kadu keere karna nja kuri könö ya Masala ka tadina ya nye'd'de a'diila a niimö ma tanu kide titaalo üürü ara ta'dugadene a ta'diila.

<sup>4</sup> Eema ya Masala ka tagalinggo ya nye'd'de a'diila, a niimö ma kadu kara tanu kide itaalo, a kadu tamma ka eema nye'd'de ya, mamana ta'diila a Masala.

<sup>5</sup> Kudumma tumma na Masala nja tafara kono anangnga Masala ka tamma kide.

*Ömö'di ma linggo ma Yasu Almasiihi ya a'diila ya*

<sup>6</sup> Üürü nala o'o eema a nagöre ma angnga ya, ara o'o tamö'di ma linggo ma Almasiihi Yasu ya a'diila ma tagu kuri ma koronggore ma timin'da ma tamma nja talaana tanno a'diila no üüdü ka tümmönö no.

<sup>7</sup> Aadha ka eema ma tam'baga ün'dügüngngö nja eema ma elle ma kidhindharu, indinaana oona nüüdü ku'bu ka linggo ma Masala.

<sup>8</sup> Üürü riada ma tuu'da ka'diila ya, lakiini riada ma koronggore a'diila ka eema nye'de kungngo, kudumma ka tümmü tamin'di tumma a teera mini, tefe ka 'dii ma 'bitüngngö nja tefe ka 'dii tanno ara tö'dö no.

<sup>9</sup> Tumma no ka tumma ma timin'da kama kadu ka tamma kide.

<sup>10</sup> Yungngo aja ka talingga angnga tadhügürü, kudumma aja ka tamününgü eyi yaaja ka tindhügi ma Masala tammo efe ka 'dii mo oogo mungngo matatoolona ma kadu nye'de nja münda tanno amma no.

<sup>11</sup> Alanaan kadu ka tumma tanno.

<sup>12</sup> Fa tafa ka ömö'di amidhi o'o a'da nadhilli lakiini alingga ada a kadu tanno amma no, ka tumma nja taneene nja tasaana nja tamma ma Masala nja tinsili ka eedi.

<sup>13</sup> Münü eyi yüüdü ka tüörönö ma Sorne co kadu nja teema tumma ma Masala nja talaana idhi eede ka öö'dö.

<sup>14</sup> Fa tüünö tö'bö a türü tanno Masala ka anangnga o'o no, türü no kananja o'o a tumma ma tane'bi a kadüüfi tümmünü iisine üüdü ka üüdü.

<sup>15</sup> İri tumma ta'diila nümmünü eyi yüüdü kide amang ka linggo tanno üüdü tijidene ka kadu nye'de.

<sup>16</sup> Adinö ko'do ma eyi tiya üüdü nja talaana tanno üüdü nütüngü kide keere, küdü kara tüünö nggeege ya ara o'o toolona eyi yüüdü nja tanno toodo küdü no.

## 5

### *Taneene nja kadu tököönö*

<sup>1</sup> Fa teela ömö'di ya dharu ya, lakiini eema tumma na 'diila afa pupa yüüdü kungngo, naneene nja laala tiya kadimöögö ya afa nagöre nütüngü kungngo.

<sup>2</sup> Nümmü kidhindharu na iiya no afa nakanüümö nüüdü, nüüni ana laala tiya lamü ya afa nagöre nüüdü.

### *Iiya ma nagüüme*

<sup>3</sup> Aaga asaasa iiya ma nagüüme na eema katitaalo kene ma timin'da no.

<sup>4</sup> Üürü aka ma küüme mana laala nja kadaada ya, fa kene kanaana iiye ka linggo ma Masala kadhadha ma tanaana iiye ka kadu ma 'dii tiya eene, kassa kamana eema a nakanüümö nja kafaafa nja kadaada meene, linggo no eege kungngo ka'diila ka Masala ka oona.

<sup>5</sup> Lakiini aka ma küüme ma dhorro mo, ömö'di ma tamana eema oono kitaalo, mündhügi Masala mafara kono ooso kungngo nja uuru.

<sup>6</sup> Lakiini aka ma küüme müüni eyi yoono ka eema ma 'büdhüülü ya a'diila oogo meyi salsa mefe ka 'dii.

<sup>7</sup> Nanangnga tumma no a kadu afe'de, amang ka ömö'di tafa tana hetti.

<sup>8</sup> Ömö'di ya taalo anaana iiye ka kadu na kete kini no, münda kadu ma 'dii tiya iini, i'i ya a'düsünü tamma ka Masala adagii'bi kadu na taalo kamma no.

<sup>9</sup> Fa takiri eere ya aka ma küüme ka waraga ma iiya ma küüme illi ma nagürüünü a kadu kiidoona mo, ma ta aka ma nyori unggodho.

<sup>10</sup> A kadu nye'de de tessu linggo noono na a'diila no ma takinggiri laala yoono tinggirana na a'diila no, mümmü kafala, madagunu kadu ma kaniisa ka uune, makinyi kadu no eema katitaalo kene no, madagalinggo eema ya a'diila ya.

<sup>11</sup> Lakiini iiya ma küüme na aleefe ta idhiidhi no, fa takiri nagereene neene ka waraga ma iiya ma nagüüme, kudumma nanggeedi tanno eene kasaasa taadha ka tumma ma Almasiihi kara tasaasa tarna.

<sup>12</sup> Nggeege ya kaadha ka timi'di tumma na dhidhdha no a hetti tümmü eege.

<sup>13</sup> Nggeege kara talaana nanggeyi neene korro tino ün'dügüngngö kalööle ka na'büögöri kalaadene ka tedhe ma kadu keema tumma na taalo kadho ka fiinö no kaker'de ker'de.

<sup>14</sup> Yungngo eede ka asaasa a'da iiya ma nagüüme no dhiidhi no tarnadene keene laala kümmü nöö'di neene, amang ka diidi ma angnga tafa taluna fiinö ma tamidhi angnga.

<sup>15</sup> Afa könö ana kene kuurna Ebliisi keere.

<sup>16</sup> Üürü aka ma amma ka Masala mo, mana iiya ma nagüüme ka 'dii tiya oono, fa kono mamana eema eene amang kene tafa takiki iiye ka kaniisa ko'do, mamünögü iiya ma nagüüme no ma timin'da no.

<sup>17</sup> A naguugaara ma kaniisa na ana iiye ka linggo ma kaniisa dhorro no, aaga amana eema eene dhabbu münda kadu na alingga ma teema tumma ma İnjilli nja talaana.

<sup>18</sup> Sorne iki, "Aaga fa takumu kodha ya ödhdhe ya ka nüönö iini ka türri migile ka 'deeli.' Iki afe'de, "Ömö'di ya alinggo a'duga talinggae niini."

<sup>19</sup> Fa tamma ka eema ma tafünaana ka kadiifi, illi a kadu keera nja eene illi kiidoona no, saga tamma.

<sup>20</sup> Lakiini kadu no hetti no kirnaana kene ka kadu kidha amang ka türeene ma kadu tar'i'ba.

<sup>21</sup> Neema a'a nja o'o kidha ma Masala nja Yasu Almasiihi nja kadhingga na Masala ka tagesse eege no a'da nümmü tumma no nafa kide nafa tasaasa kadu öccö no üünö ada öccö ku'bu.

<sup>22</sup> Fa ta'digaana namünögü iisine nüüdü ka ömö'di ka üüdü, nafa tosse ka tatoroko tanno kadu könö. Ümmü oona nüüdü ka tinsili.

<sup>23</sup> Fa tooye 'biidi unggodho i'i, angkolo 'bangeeli idhilli, kudumma ma maara tammo agu o'o ka eedi mo.

<sup>24</sup> Kadu könö tatoroko neene kussu adene a'da küfürü uuru ma tapusu tö'dö, a kadu könö tatoroko neene taalo kussu adene a'da küfürü uuru ma tapusu adene tö'dö.

<sup>25</sup> A linggo na 'diila no tussu adene afe'de, a linggo no taalo kussu adene no taalo kara tadünggündü.

## 6

<sup>1</sup> Fa ka kadu tanno ka tadasaga no kaföönyö eema ya kadu tanno eene, ii'di ömö'di öccö teela eere ma Masala nja talaana.

<sup>2</sup> Üürü kadu neene kada kasaga tanno eene no kamma ka Masala ya, kafa tamidhi eege kudumma eene kada nagöre. Eege adha ya kama talingga ada eene dhorro kudumma kadu tanno aduna eema ka linggo tanno eene, eege ka kadu tanno amma no kasaasa eege. Eema ya yungngö üüdü kara talaana iini nadho üüdü kide.

*Katalaana na korokoro no nja tasaasa ma almaala*

<sup>3</sup> Üürü ömö'di könö alaana a tumma ka'bana ko'do taalo unggenee nja tumma na Yasu Almasiihi Uugaara nja tumma na unggenee nja tumma ma Masala no,

<sup>4</sup> i'i ya akisinsoro taalo ussu nüümö öccö. Eedi yiini anyoro ma tasaasa ta'digineene a ta'bununjaana ku'bu a tumma tanno ara tö'dö a kirimi a tüsümünjaana ku'bu nja teelaana nja eedi tiya a toroko ya,

<sup>5</sup> nja kadu tanno a'digineene anangngä üüdü neene tatangga'da kaama ka nüümö tiya a'diila ya, kummü tumma ma Masala ma taluna eema kide.

<sup>6</sup> Tamma ka Masala ka anangngä ömö'di ka tüüsü kini kara tamma ka eema tiya kini ya.

<sup>7</sup> Taalo angnga köö'dö ka 'büdhüli a nüümö kaja ka nüüsö, angnga taalo kara ta'duga nüümö kide.

<sup>8</sup> En'di yaaja ka oona ya nja kuri tiya aja ka taguri a'a dimo kaja sugi.

<sup>9</sup> Lakiini kadu no asaasa eema dhabbu no ka'dinggö ka ta'b'badene nja küdhü nja tallogo ma eema tiya atoroko ya ma taama eege ma tanangngä kadu ka taama kagirinademe.

<sup>10</sup> Tasaasa ma almaala a'da tatoroko eege kamiini, a kadu könö kummüni eyi kide kaama ka fiini ma Masala, a tin'di tümmü eege dhabbu.

*Füni ma tamma ka Masala nja ta'diila*

<sup>11</sup> Lakiini o'o na ömö'di ma Masala no, nafa takete ka eema tiya, asaasa ta'diila nja tumma ma Masala nja tamma nja tasaasa nja tidhi oona ku'bu.

<sup>12</sup> Fünü sigiri neema koro'bo dhorro, ta'beene ma tamma, 'duga tefe ka 'dö ta'billi ma Masala ka tagümmüni o'o iini no, üüdü ka tageema tumma miini ka kadu kadha kadhabbu kada ijöögö no.

<sup>13</sup> Ara a'a teema nja o'o kidha ma Masala ma amana eema nye'd'de kefe ka 'dö mo nja kidha ma Yasu Almasiihi ya ageema tumma dhorro kidha ma Bilatos Albunti ya.

<sup>14</sup> Ümmü tumma no nafa kide ka tinsili a'da taalo nüümö ya toroko ya kide ara uuru ma tö'dö na Uugaara tiya aja Yasu Almasiihi ka öö'dö.

<sup>15</sup> Ya Masala kara tö'dö iini ka uuru miini, Masala mungngo mana baraka, ma uugaara unggodho oogo, Uugaara ma naguugaara Masala ma namasala.

<sup>16</sup> Oogo mungngo mefe ka 'dö ta'billi unggodho oogo, 'dö yoono a'da töyeene, taalo ömö'di ma takete kide, taalo ömö'di ijöögö, ömö'di ma tadinö kide titaaloo. Kadagafünögü oogo ko'do a türü ta'billi. Amiin.

<sup>17</sup> Nanangngä tumma a kadu tanno ana almaala dhabbu no ma ürüünü tiya no, kafa tamanaga oona neene coo'do, kafa tan'dana ka almaala tiya ara titaaloo ya konna, lakiini kindhügi Masala mamana eema angnga ya aja ka taganeene iini ya.

<sup>18</sup> Fa kene kalinggo eema ya a'diila ya, kütüsü a linggo tanno a'diila no, kamana eema a kadu kosso ka eema nja tiya eene nya kadu könö.

<sup>19</sup> Nggege yungngö eene katawaana eema ma eyi tiya eene indinaananja ku'bu ma ürüünü tiya ara tö'dö ya, kaduna tefe ka 'dö ta'billi.

<sup>20</sup> Ka Timosaws, ümmü tumma na a'diila no nafa kide. Naadha ka tumma ma ker'de ker'de na taalo kara tö'dö keere a niimö no,

<sup>21</sup> na kadu ökönö ka tümmöönö, nggeege adha ya kaama ka fiinī ma tamma ka Masala.

Fa ka türü tanno Masala ka aneene nja aaga.

## Waraga ya Bölis ma tunggu co Timosaws ya Eera ya Tafa'da tumma

Ka Bölis ka tarigiri waraga ya, i'i ya aganna ka pabuusu ussu a'da kete kungngo ara tiididene. İkürü ka asaasa a'da Timosaws öö'dö kini areere. Timosaws akakinyi linggo a Bölis dhabbu kadhadha, yungno a Bölis ka asaasa i'i afa 'bii'bala yiini.

Ka waraga tiya Bölis ala tasaasa niini a kadu ma kaniisa na ussu dhügürü no. I'i uu'bu Timosaws ka eedi a'da ütü ka tamma ka tumma tanno Almasiihi, eema eema iini 'büni kungngo salla ka naguuru ma linggo i'i agirnaana ka katalaana tanno oroko no.

### Töötü

<sup>1</sup> A'a na Bölis tafiiñi ya Yasu Almasiihi narigiri a'a tumma ma eedi tiya Masala ma co teema tumma ma tefe ka 'dii na ka Yasu Almasiihi no.

<sup>2</sup> Nunggu co Timosaws, 'bii'bala yeede ya dhorro ya, türü nja 'bangnga nja ta'diila ndama Masala tammo Pupa mo nja Yasu Almasiihi Uugaara yaaja.

### Tafünügü ko'do

<sup>3</sup> Namana a'a ta'diila a Masala tammo eede ka talingga ada oono mo afa ma kafaafa ma a'a ka tagüünii ana eedi ka tinsili, nagüügi a'a tumma ma o'o turi ooso ana uuru ka fara tiya eede.

<sup>4</sup> Kede ka tagüügi fara yüdü ya, nasaasa tassa küdü amang kede tadigine a dhoodho.

<sup>5</sup> Nagüügi a'a tamma nüüdü na dhorro no, na aganna ka ndaada ma o'o Lööyüs ka eedi no, nja eedi tiya nüümö tammo üdü Afanüükü, a'a 'bitüngngö nussu a'a a'da kungngo üdü afe'de.

<sup>6</sup> Nggeege nikürü a'a ka tiki o'o a'da nüümmü nüümö ya Masala ka anangngä o'o ka finne ya, eede ka tagümmüni iisine üdü ka üdü.

<sup>7</sup> Kudumma Masala taalo manangngä Koronggore ma ri'ba angnga, lakiini Koronggore ma türü ma tasaasa nja tafa ka oona.

<sup>8</sup> Fa tana modolo ma teema tumma ma Uugaara tiya aja, alla nana modolo ma a'a ömö'dü ma pabuusu yiini. Lakiini o'o nüümmü ajeene nja a'a ka dhügürü ma İnjilli a türü ma Masala,

<sup>9</sup> Oogo moolona angnga mümmüni angnga ka tefe ka 'dii tanno insili no, taalo a'da angnga kagüünii nüümö, lakiini kudumma eedi tiya oono nja türü, türü

kagananja angnga ana Yasu Almasiihi a'da üfürü uuru miini tagöö'dö,

<sup>10</sup> Lakiini 'bitüngngö alanja angnga a tabbü 'dala tanno Uugaara tiya aja Yasu Almasiihi ya asiraana ka inde ya öö'dö a tefe ka 'dii ta'billi a töyeene ana İnjilli.

<sup>11</sup> A'a nagümmünüdene kada tatalaana nja tafiiñi neema tumma ma İnjilli.

<sup>12</sup> Yungno eede ka dhügürü 'bitüngngö nitaalo nana modolo, kudumma eede ka tussu a'da mada yungno eede ka tamma kini namma a'da i'i ara tambaanya tafa ka nüümö tiya iini ka tümmü a'a ya kadara ka uuru tanno miini no.

<sup>13</sup> Alinggo a nüümö yüüdü ka taföönyö kede ya ma oono ka talaana tanno a'diila no a tamma nja tasaasa tanno ka Yasu Almasiihi no.

<sup>14</sup> Afa ka eema tiya a'diila ya agümmününja o'o ya afa kide a türü tanno Koronggore tiya Insili ya anna kaja ka oona ya.

<sup>15</sup> Nussu o'o a'da kadu na ka anya ma Asiya no in'dili kungngo ka anya kinyi a'a ku'bu, nja Ficiloos nja Hirmaanös afe'de.

<sup>16</sup> Fa ka Uugaara ala 'bangnga a kadu ma 'dii tiya Önisiforos, kudumma iini ka tafünügü a'a turi kungngo itaalo ana modolo ma nakilli tammo imi'di a'a no.

<sup>17</sup> Afe'de kini ka taganna ka Rööma ya agawwa 'buugu ma a'a 'do idhi aduna a'a.

<sup>18</sup> Uugaara tafa'da fiini iini aduna 'bangnga ka Uugaara ka uuru tanno miini no, nussu dhorro a'da agalinggo ada ököje nya ka Afosus ya.

## 2

### Tasigira ya a'diila ya Yasu Almasiihi

<sup>1</sup> O'o na 'bii'bala tiya eede no, ana türü a türü tanno ka Yasu Almasiihi no.

<sup>2</sup> Inya eema tiya üüdü ka taföönyö eede ka teema kadu kidha kadhabbu ya, nanangngä kadu tanno a'diila no ara tussu ka talaana kadu könö no.

<sup>3</sup> Idhi oona ku'bu ka dhügürü nja ungno afa tasigira ya a'diila ya Yasu Almasiihi.

<sup>4</sup> Taalo ömö'dü ma talingga tatasigira assa ka talingga nüümö öccö afe'de, i'i ya asaasa uugaara yiini ka tadhodho.

<sup>5</sup> Afe'de üürü ömö'dü iisö ma tambri-nanago ya, taalo ara ta'duga ndalembö ma ti'baana, illi kini ka tambrinanago afa na asaasadene no.

<sup>6</sup> A taleele ya kardha ku'bu aleele ya, i'i yungno ara ta'duga talıngnge ma migile niini ka dhidha.

<sup>7</sup> Ussu eema yeede ka tadünügü ya, ara Uugaara tanangngä o'o ka tussu eema ya nye'd'e.

<sup>8</sup> Agüigüi Yasu Almasiihi ya afiki'dö ka inde ya 'bandaada ma Dawud ya. İnjili meede oogo mungno

<sup>9</sup> meede ka dhügürü miini nidhi nimi'didene a nakilli afa ömö'di ya weerö ya. Lakiini tumma na Masala taalo tafin'dadene.

<sup>10</sup> Nggege ya yungno eede ka tidhi oona ku'bu ma eema in'dili ka üüdü ma kadu tanno agessedene no amang kene taluna toolonadene no ka Yasu Almasiihi nya tihindhi ta'billi.

<sup>11</sup> Tumma ma timin'da eege kungno, Üürü angnga kakaya nya iini, ara angnga taganeene nya iini afe'de.  
<sup>12</sup> Kaja kara tidhi oona ku'bu, ara angnga taga naguugaara nya iini. Kaja kara ta'düsünü i'i a'da ta'düsünü angnga tekere.

<sup>13</sup> Üürü taalo angnga kamma, i'i ara tüü ka tamma, kudumma iini taalo ara ta'düsünü eyi yiini.

*Ömö'di ma linggo ya Masala ka asaasa i'i ya*

<sup>14</sup> Fa kene kagüigü ma eema tiya, neema nya eene kadha ma Masala afa ta'digineene ma tumma ün'dügüngngö na taalo kara tö'dö keere a niimö no, kaga'da kadu na toodo kide no.

<sup>15</sup> Indinaana oona ku'bu dhorro nümmü eyi yüüdü a Masala amang küdü ta'duga tamma noono, ömö'di ya alinggo ya taalo ana modolo kudumma iini ka talingga kada adho ka fiinä alaana ka tumma ma timin'da dhorro.

<sup>16</sup> Aadha ka tumma tanno taalo ka'diila no, kanangnga kadu na miini no kada oroko.

<sup>17</sup> Talaana neene kara tanyala ku'bu afa issi, Himinas nya Filitös eege kungno kakalaana ka tumma tanno.

<sup>18</sup> Eege naadha ka tumma ma timin'da, kiki a'da tarfik'i dö ka inde kandö'dö kadaga'da tamma na kadu töccö.

<sup>19</sup> Lakiini kadesa na Masala ka a'düngne dhorro, kabünnü hitimi kide a'da, "Uugaara ussu kadu noono," "Ömö'di ya amma ka eere tiya Uugaara ya, aadha ka tatoroko."

<sup>20</sup> Eema ungno ka la tiya adhabbu ya taalo ama dahaba nya fudda sugi, lakiini ama kee'di nya tam'bala afe'de, könö kama ma eema tiya a'diila ya, könö tama linggo tanno nyoro no.

<sup>21</sup> Üürü ömö'di ara tagala eema ya toroko kini ka oona, i'i ara ta niimö tiya a'diila insili ya, ara ta'diila ka ömö'di ma 'di ka oona ama ma linggo tanno a'diila no.

<sup>22</sup> Aadha ka tatoroko ma eema ma kadümöögö ka oona, ara o'o tisi ka fiinä tiya a'diila keere, tamma nya tasaasa nya ta'diila nya kadu tanno ümmüñ Uugaara ana eedi katinsili no.

<sup>23</sup> Fa takete ka kadu tanno nagaaga nya tisaana ka oona ma tam'baga, kudumma üüdü ka tussu a'da kara tö'dö a koro'bo.

<sup>24</sup> Ömö'di ma linggo ya Uugaara taalo a'digineene agala kara tana muuyu ma kadu nye'd'e, ambaanya talaana nya tidhi oona ku'bu.

<sup>25</sup> Kadu na diidi i'i no alaana eege a tumma ka'diila amang ka Masala tala eege ka taadha ka tatoroko manangnga eege ka tussu eema ma timin'da.

<sup>26</sup> Kiküri ka tapadaga ka nanggeedi tanno eene karünö ka küdhü tammo Ebliisi ku'bu ya ümmü eege anangnga eege ka aföönyö tumma niini.

### 3

#### *Naguuru na eere no*

<sup>1</sup> Lakiini aaga tussu a'da naguuru na toroko no kinggide kara sa köö'dö ka naguuru tanno eere no.

<sup>2</sup> Ara kadu sa kasaasa nanggeyi neene, kallogo ma gürüüsü, kabbü na'dugiisine, ka'diniga oona coo'do, keela kadu, taalo kaföönyö tumma na pupa nya nakanüümö tanno eene, taalo kamana ta'diila, taalo kinsili,

<sup>3</sup> taalo kasaasa kadu, taalo 'bangnga kene, kadhe kadu, taalo kümmü nanggeedi neene, ka oroko, kanu ka niimö tiya a'diila ya,

<sup>4</sup> Kana ünggü, kakorokoro, kasaasa ta'deema kadagii'bi tasaasa ma Masala.

<sup>5</sup> Kümmü tumma ma Masala ndama kürö, lakiini eege kanu ka türü miini. Aadha eene koona.

<sup>6</sup> Eege ka kadu tanno afiri co na'büggöörü kadaana iiya na ki'di no na tigine a tatoroko kasi ka eema ma tatoroko keere nye'd'e kungno.

<sup>7</sup> Kalaadene turi kungno lakiini kitaalo kussu tumma ma timin'da.

<sup>8</sup> Afa ma Yanisi nya Yambriis kada kadiidi Müüsa, kadu no afe'de kadiidi ma timin'da. Kadu no nanggüdü tanno eene kadasügüni katoroko eege kagu'b'ba ka tamma na Masala.

<sup>9</sup> Lakiini eege taalo kara taluna niimö koona, kudumma taa'baga tanno eere no, eema yeene ya assa kalanja a kadu nye'd'e kungno.

#### *Tumma na Bölis nya Timosaws*

<sup>10</sup> Nussu o'o talaana yeede nye'd'e kungno nya taneene tanno eede nya niimö

yeede ka eedi ya, tamma, tidhi oona ku'bu, tasaasa, takardha ku'bu,

<sup>11</sup> dhögürü nya tüünü muuyu, eema ya agalinggo adene ana a'a ka Antakiya nya Ikonija nya Lestra, dhögürü yeede ka tidhi oona ku'bu miini ya, lakiini Uugaara olona a'a kene nye'd' de kungno.

<sup>12</sup> Tumma dhorro, ömö'di ya asaasa tanna taneene ma Masala ana Yasu Almasiihi ya, ara tadögürü.

<sup>13</sup> Illi kadu na oroko no nya tanno iisini kadu no kara tunggeene ndama tatoroko kaco ka tanno 'diiri no küüsini kadu a'da küüsindene.

<sup>14</sup> Lakiini o'o ya, ütü ka eema tiya üdü ka takalaadene kide ya, namma kide ya, kudumma üdü ka tussu a'da mada yungngo akalaana o'o.

<sup>15</sup> Jiddi müdü ka tidhilli nussu kasorne ma seriye na insili no ara tanangngä o'o ka ta'dara ma toolonadene a tamma ka Yasu Almasihi.

<sup>16</sup> Kasorne ma Masala in'dili Masala mö'dö iini ka'diila ma talaana kadu ma tala eege ka fiin, kalaala kadu ka eema tiya a'diila ya alaana kadu ka tinsili ma Masala.

<sup>17</sup> Amang ka ömö'di ma Masala tadigine ana eema ma linggo tiya a'diila ya in'dili.

#### 4

<sup>1</sup> Neema a'a nya o'o kidha ma Masala nya Yasu Almasihi ya ara tümmü kadu na efe ka 'dii nya tanno aaya no ka tö'dö tanno iini nya tabbü 'dala tanno iini nya tauugaara tanno iini,

<sup>2</sup> Eema tumma ma Masala nalinggo ka uru miini salsa taalo uru miini, alaana kadu, nagirnaana kene, indinaana eege ku'bu, uu'bu eege ka nanggeedi a tidhi oona ku'bu dhorro nalaana eege ta'diila.

<sup>3</sup> Uuru kinggide kara sa kö'dö a kadu tanu ka talaana na adho ka fiin, kagala kara tisi ka eema ma nanggeedi tanno eene keere, kara tawaana katalaana eene koona kadhabbu ma tema eema ya iisine kasaasa taföönyö ya.

<sup>4</sup> Kara tüdhü iisine neene a'da kafa tatoodo ka tumma ma timin'da kara kaföönyö eema ma elle.

<sup>5</sup> Lakiini o'o ümmü eyi yüdü nadinö ko'do ka kudumma ma eema tiya in'dili ya, ümmünü ana oona ka tadögürü, alinggo linggo ma talaana kadu ka tumma ma Masala, ümmü linggo nüüdü dhorro.

<sup>6</sup> Lakiini a'a nungno na nüümö ma tirri, eriidö miini tuurunja co, uru neede ka ndö'dö meede kara tunggeene.

<sup>7</sup> Nageema a'a koro'bo ya a'diila ya, natüümö tambirineene, natafa ka tamma ma Masala.

<sup>8</sup> A 'bitingngö ndalembö na a'diila no ka indhgü a'a na Uugaara tiya a'diila ya ara tümmü kadu ya ara tanangngä a'a ka uru tanno miini no taalo a'a unggodho a'a, lakiini a kadu in'dili no kasaasa tassa ka tabbü 'dala tanno iini.

#### Tumma na eere no

<sup>9</sup> Unggeene areere nöö'dö kede.

<sup>10</sup> Kudumma Dimas inya a'a ku'bu kudumma iini ka asaasa eema ma 'bühühü, unggene aco Tasalanük. A Kirisküs unggene aco Galatiya, a Tito co Dalmatiya.

<sup>11</sup> Lüüka i'i yungngo ütü unggodho i'i. 'Duga Murkus nöö'dö nya iini, kudumma iini ka takinyi linggo a'a.

<sup>12</sup> Nagürünü a'a Tikikos ka Afosus.

<sup>13</sup> Küdü kara tö'dö nagufu ten'di ma 'doogo mo meede ka tinyi ka Karbis ka Tarwas, nya kasorne tanno eede mündä tanno ma forogo no.

<sup>14</sup> Askander ya ma modoo'do ma tanyaanya ya agüüni tatoroko ana a'a 'do, ara Uugaara saga tüünä ana i'i afa miini ka tagüünä kungno.

<sup>15</sup> O'o afe'de afa ka oona kudumma iini, kudumma iini ka talingga a'a dhorro, aanu ka linggo tanno aja.

<sup>16</sup> Ka dhidha kede ka tagümmönö ka eyi tiya eede ya, taalo ömö'di ma tagöödhü nya a'a, lakiini kadu in'dili ka 'bilnaana a'a ku'bu, fa ka Masala mafa tüünä nüümö ya toroko ya ana eege.

<sup>17</sup> Lakiini Uugaara aga'düngne nya a'a anangngä türü a'a ma tambaraanya teema tumma ma Masala co kajeene in'dili, na a'taga tulub'i ka tagaamu ka nüünö.

<sup>18</sup> Ara Uugaara toolona a'a ka tatoroko tanno kö'dö kede no, öö'dö ana a'a ka'diila ka tauugaara ma 'dotombo'do, tidhindü kungno iini ta'billi turi. Amiin.

#### Tööjüüli na eere no

<sup>19</sup> Ööjüüli Berskillia nya Akilla nya kadu ma 'di tiya Önisiforos.

<sup>20</sup> Arastus ütü ka Kürünsüs, nakinyi a'a Trifimöös ka Miliits ka tamaara kagu i'i.

<sup>21</sup> Areere nöö'dö kannaa a'da kaleefe feele küfürü tö'dö. Ablüüs ööjüüli o'o nya Böödiis nya Liinös nya Külüüdüya nya nagöre ma angnya nye'd'e.

<sup>22</sup> Fa ka Uugaara aneene nya koronggore tiya üdü. Aaga aneene a türü.

## Waraga ya Bölis ma tunggu co Tito Tafa'da tumma

Tito taalo aga taga Yahüüdü, i'i ya ömö'dü ma kaniisa adakakinji linggo a Bölis ka tino tanno iini na dhabbu no, kini ka teema tumma ma İnjüili ma Yasu Almasiihi (2 Kürünsüs 7.6-7; Galatiya 2.3). Keere kungngo a Bölis tagürünü i'i aco tauugaara ma nakaniisa ka anya ma Kireet.

Bölis adirina eema a Tito ka waraga tiya, a'da agona kadu na ussudene no kada naguugaara ma kaniisa. Afe'de anangga tumma iini ma talaana kadu kada tonggoonyo ka kaniisa, nagiide na kidhindharu no nja iiya tanno kidhindharu no, laala ya kadimöögö ya nja tiya lamü ya nja kasaga. Keere kungngo iki Tito a'da, a kadu ma kaniisa in'dili ka'diila kada kateefe kafa tanu oona ka oona nja ta'digineene nja tambanjanjaana ku'bu kanangnga eyi tanno eene.

### Tööjülli

<sup>1</sup> Waraga ya ö'dö ndama a'a Bölis tasaga ya Masala nja taffin'i tiya Yasu Almasiihi. Masala magesse a'a nalaana kadu noonka tagesse eege no kudumuma tamma ma timin'da ma fiin'i ma Masala,

<sup>2</sup> Tamma nja tussu eema kama tindhigü ma tefe ka 'di ta'billi na Masala ka takiki angnga taalo ma korokoro, mimi'di tumma a'da küfürü uuru miini tö'dö.

<sup>3</sup> Ka uuru tanno miini no, ö'dö a tumma tanno iini kada töyeene a teema tanno ananja a'a no, ndama tumma tanno Masala moolona angnga mo.

<sup>4</sup> Nikirii a'a ka tunggu co Tito 'bii'bala yeede ya dhorro ya, ka tamma tanno aja na unggodho no. Fa ka türü tanno Masala ka aneene nja o'o nja ta'diila tanno Masala Pupa nja Yasu Almasiihi tatoolona yaaja.

### Tito alingga ka Kireet

<sup>5</sup> Yungngo eede ka tinyi o'o ku'bu ka Kireet amang küdü tindinaana eema ya aleefe ya ku'bu ya, ara o'o ka tümmünü kadüfü ma kaniisa ka naanya afa meede ka takiki o'o kungngo.

<sup>6</sup> Tadiüfü ma kaniisa afa tana hetti, arna aka ma unggodho, a laala yiini tamma ka Masala kafa talingga eema ya toroko ya nja tasilli eema.

<sup>7</sup> Kudumma tadiüfü ma kaniisa Masala mümmünü i'i ka linggo tanno oono, taalo hetti kini, taalo a'diniga oona niini coo'do, taalo agoroo'bo, taalo oyoye ngeeli ake kide, taalo üünü eema ma rüsü, taalo allogo ma gürüsü.

<sup>8</sup> Lakiini ada ömö'dü ma kafala, asasa eema ya a'diila ya, a'dara, taalo üünü ada kadu ku'bu, ümmü tumma ma Masala ana eedi, ümmü eyi yiini ka eema tiya toroko ya koona.

<sup>9</sup> Ümmü tumma na dhorro no na unggenee nja talaana tanno aja no. Amang kini tamaanya teema tumma ma talaana tanno ma timin'da nja tapadaga tumma a kadu tanno amidhi tumma ma Masala no.

<sup>10</sup> Kadu kinggide kadhabbu kanu ka tumma, kiisini kadu a tumma na taalo kadho ka fiin'i no, münda Yahüüdü no kakogoona a'da ma tasaasa kadu ka tatendhe amang kene toolonadene.

<sup>11</sup> Fa kene keere ka naninö tanno eene, kudumma eene kaga'da nöö'di nye'd'de kalaana kadu a tumma tanno itaalo ka'diila no, meene kasaasa gürüsü.

<sup>12</sup> A könö ana kene a ne'bi iki a'da, "Kadu ma Kireet kakorokoro 'do, eema ma oroko nanggeedi neene ka nyoro kadhunu kasaasa kuri."

<sup>13</sup> A tumma ma timin'da eege kamiini. Fa tafa kene eela eege dhorro amang ka tamma tanno eene ta tatimin'da.

<sup>14</sup> Kafa tümmü tumma ma eema ma elle ma Yahüüdü nja tumma ma kadu tanno anu ka tumma ma timin'da no.

<sup>15</sup> Eema nye'd'de insili ka kadu tanno insili no, lakiini taalo nüümö ya insili ka kadu tanno nyoro no nja tanno taalo kamma ka Masala no, nanggeedi neene nja nanggüüdü tanno eene kanyoro afe'de.

<sup>16</sup> Kiki a'da eege kussu Masala, lakiini eege ka'düsünü oogo ana eema tiya eene ka tüün'i ya. Eege kanyoro, kitaalo kaföönyö eema, kitaalo kama talingga nüümö ya a'diila ya.

## 2

### Minna a talaananja a kadu kadhoonyo

<sup>1</sup> Lakiini o'o ya, alaana talaana na unggenee nja talaana tanno dhorro no.

<sup>2</sup> Alaana nagiide na üfi no kiicolo ka nanggeidi no amang kene tadinö ko'do ka'dara kümmü nanggeyi neene a ta'diila a tamma nja tasaasa nja tidhi oona ku'bu.

<sup>3</sup> Nggeege, alaana kidhindharu na iiya no amang kene taneene taneene ma iiya kuurna fiin'i ma tinsili, taalo kadhe kadu, taalo kallogo, taalo tatasaga ma tooye ngeeli, lakiini kalaana kadu ka fiin'i tiya a'diila ya.

<sup>4</sup> Fa kene kalaana iiya na nagönönyö no ka tasaasa ma naganyori tanno eene nja laala tiya eene.

<sup>5</sup> Ka'dara kümmü nanggeyi neene, kin-sili, kümmü nöö'dü neene dhorro, kaana 'bangnga, kaföönyö tumma na naganyori

tanno eene, i'i'dü ömö'dü tanggaaga tamidhi tumma na Masala.

<sup>6</sup> Nggeege, nalaana laala ya kadümöögö ya afe'de, amang kene tümmü nanggeyi neene afa nagönönyö, kidhi oona ku'bu.

<sup>7</sup> Kalinggo ma eema in'dili alaala eege ka fiinü ma tuurna o'o keere ma linggo ma eema tiya a'diila ya, ka talaana tanno üdü, la ta'diila eene dhorro.

<sup>8</sup> Neema tumma ma timin'da na hetti ka titalo kide no, amang ka modolo tagu kadu na kirimii o'o no, kudumma niimö tiya toroko ya ka titalo meene ka teema kaja ko'do iini.

<sup>9</sup> Alaana kasaga amang kene taföönyö eema ya kadu tanno eene, kamma kene ka eema in'dili, kafa tanu ka tumma tanno eene.

<sup>10</sup> Kafa tanyooro kene, lakiini kaala taneene na a'diila no kafünügünja ko'do ka eema nye'de ma talaana ma Masala ma olona angnga mo.

<sup>11</sup> Türü na Masala kö'dö a toolona abbü 'dala ka kadu in'dili kungngo.

<sup>12</sup> Alaana angnga ka tiki a'da kaw a kadu tanno anu ka Masala no nja tallogo ma eema ma 'büdhülü, angnga taneene taneene ma tümmü nanggeyi naaja, angnga tümmü tumma ma Masala na adho ka fiinü no ka ürüünü tiya.

<sup>13</sup> Angnga takindhigü uuru ma baraka yaaja ka takindhigü i'i ya, ka uuru ma tihindhü ma tö'dö tanno Masala tammo aja ma idhindhü mo nja tatoolona tiya aja Yasu Almasiihi.

<sup>14</sup> Ya üpü eyi yiini co ka üdü ma angnga, amang kini toolona ka toroko no in'dili no, aagala angnga ka oona angnga ta kadu tanno iini na agu'daana ka nanggeedi no ma linggo tanno a'diila no.

<sup>15</sup> Eema ya i'i yungno üdü kara talaana nafünügü eege ko'do, nasanna kene a türü nye'de, fa tafa ka ömö'dü amidhi o'o.

### 3

#### Üün'i eema ya a'diila ya

<sup>1</sup> Adünügü eema a kadu ma kaniisa a'da kaföönyö eema ya naguugaara maanya, kamma ka tumma tanno eene kindinaana oona ku'bu ma linggo tanno a'diila no.

<sup>2</sup> Kafa teela kadu, lakiini kada kadu ma ta'diila tanno eene nja kadu nye'de ana eedi ka tiicolo.

<sup>3</sup> Angnga in'dili afe'de ka nagaaga angnga, angnga tasilli eema, kagaama angnga, angnga taga kasaga ma eema ka tatonggoonyo, angnga tagüünii eema ma tallogo, nja kirimii, angnga tasaasa eema ya kadu, angnga tanu aana ka oona.

<sup>4</sup> Lakiini ka 'bangnga nja tasaasa ma Masala tatoolona yaaja akabbü 'dala ya,

<sup>5</sup> moolona angnga taalo a'da angnga kagüünii niimö ya a'diila ya, lakiini kudumma 'bangnga tammo oono. Oogo moolona angnga ma tagala angnga ka oona ma teenedene afe'de ma tefe ka 'dii na issi no a Koronggore tiya Insili ya.

<sup>6</sup> Masala muuru Koronggore yoono ya Insili ya kaja ka oona adhabbu ana eere ma Yasu Almasiihi tatoolona yaaja.

<sup>7</sup> Amang kaja tadho ka fiinü a türü tanno oono angnga takarna ka tefe ka 'dii a tündhigü ma tefe ka 'dii ta'bille.

<sup>8</sup> Tumma dhorro eege kungngo. Nasaasa a'a o'o a'da naki'dü iïye ka eema tiya, amang ka kadu tanno amma ka Masala no tanaana iïye ka linggo tanno a'diila no. Tumma no eege kungngo kara ta'diila nja kadu nye'de.

<sup>9</sup> Lakiini ta'digineene na toroko no a tindiri kadaada nja tisi aana ka oona ma tumma ma seriye aadha kide, kudumma eene kitaalo kara tö'dö keere a niimö a kadu.

<sup>10</sup> Lakiini ömö'dü ya sümünaana kadu ku'bu ya, aadha iini ka oona küdü kara tanangnga tumma iini teera.

<sup>11</sup> Nussu o'o a'da ömö'dü afa ma tiya, tatoroko kaama i'i, a tumma niini na toroko no kara tanangnga i'i ka tahükümüdene.

#### Tumma na eere no

<sup>12</sup> A kede kara tagürünü Artimas küdü alla Tikikos, areere nöö'dö kede keere ka Nikööpölis, kudumma eede ka asaasa tiidi feele kanna.

<sup>13</sup> Amünügü Zinas ko'do ya tatalaana ma seriye ya nja Apölös meene kindinaana oona ku'bu ma tunggeene amang ka niimö könö tafa titalo kene.

<sup>14</sup> Fa ka kadu tanno aja ma kaniisa no kalaadene ka linggo tanno a'diila no, amang kene tö'dö ana eema tiya asaasadene ya, kafa taneene kada dhunu ka oona.

<sup>15</sup> Kadu na aneene nja a'a no, kööjülü o'o nye'de kungngo. Ööjülü kadu ma kaniisa naaja na asaasa ungngo no.

Fa ka türü tanno Masala ka aneene nja aaga in'dili.

## Waraga ya Bölis ma tunggu co Filimon Tafa'da tumma

Bölis ya taflin'i ya aganna ka pabuusu ya, yiini ka tarigiri waraga ya. Filimon aga ömö'di ma kaniisa ya ana almaala dhabbu ya, a tasaga tiya iini Önisimös ka arünö ya. I'i amma ka Yasu akinyi linggo a Bölis. A Bölis tuurugu Önisimös co Filimon a waraga tiya, iki iini a'da afa kini. Ka seriye ma Rööma iki a'da, ömö'di tidi tasaga yiini kini ka tarünö. A Bölis tiki a Filimon a'da amma ka tasaga tiya iini kada ömö'di ma kaniisa kada örre tiya iini.

### Tööjüü

<sup>1</sup> Waraga ya ö'dö ndama a'a na Bölis no, ömö'di yungngo ka pabuusu ka üüdü ma ya Yasu Almasiihi ya nja örre ma angnga Timosaws, ungngo takunggu co o'o Filimon ömö'di ma linggo yïidì nja tata'dila ma ungng.

<sup>2</sup> Nunggu co inye tammo aja Abafiya nunggu co nja Arkibus teefe ma angnga ya alinggo nja angnga nunggu co kaniisa tammo küdü ka 'di mo.

<sup>3</sup> Aaga aneene a türü tanno Masala Pupa yaaja a ta'diila miini nja Uugaara Yasu Almasiihi.

### Tasaasa na Filimon nja tamma ka Masala

<sup>4</sup> Filimon, üürü eede ka tafara ka Masala nagüügi a'a eere yüüdü namana ta'diila a Masala

<sup>5</sup> kudumma a'a ka taföönyö a'da o'o namma ka Uugaara Yasu nja tasaasa kadu ma kaniisa nye'de kungng.

<sup>6</sup> Afa müüdü ka tosse ka tamma ka Masala nja kadu töccö, ara a'a tafara ka Masala amang kene tö'dö tussu baraka nye'de ya Almasiihi ka anangnga angnga ya.

<sup>7</sup> Ka'diila oona eede ka tasaasa tanno üüdü no küdü ka anangnga kadu ma kaniisa ka tadhodho ka nanggeedi.

### Teema tumma ma Önisimös

<sup>8</sup> Nggeege ara a'a takuru rüsü ana Almasiihi kada örre tiya üüdü niki o'o a'da nüün'i nüümö yüüdü ka tüün'i ada a'a ya.

<sup>9</sup> A kudumma eede ka asaasa o'o, yungngo eede ka tirina o'o, a'a na Bölis no kada dharu kungng, nanna ka pabuusu kudumma Yasu Almasiihi.

<sup>10</sup> A'a nasaasa o'o a'da namma ka Önisimös ka üüdü miini, kudumma iini ka taganna ka pabuusu nja a'a afa 'bii'bala yeede.

<sup>11</sup> Ka dhidha taalo a'diila nja o'o, a 'bitingngö anda 'diila nja o'o nja a'a afe'de.

<sup>12</sup> Ara a'a tapadaga i'i co o'o yeede ka asaasa i'i ana eedi.

<sup>13</sup> Nasaasa a'a tafa kini akarna ka 'buugu tiya üüdü üütü kita nja a'a akinyi linggo a'a eede ka tanna ka pabuusu, kudumma tumma ma Masala.

<sup>14</sup> Taalo a'a nasaasa ta'bunu o'o kide, nasaasa a'a o'o nalinggo ndama eedi tiya üüdü, a'a taalo nara tüün'i nüümö a'da nitaalo o'o namma kide.

<sup>15</sup> Afeene afa ma Önisimös ka tunggeene üüdü ka 'dii agünü idhilli amang kini tapadaga küdü ka 'dii turi.

<sup>16</sup> A ndama uuru tanno taalo ara ta tasaga afe'de, lakiini agii'bi ta tasaga, anda teefe ma a'a dhorro, a küdü agii'bi ta tasaga anda örre küdü tanögöre ma Uugaara.

<sup>17</sup> Üürü nümmü o'o a'a kada örre tiya üüdü ka Masala kidha ya, amma kini afa müüdü ka tamma kede kungng.

<sup>18</sup> Üürü i'i agüünü tatoroko ana o'o, üürü nasaasa o'o kömüsü kini ka oona ya, asaasa kede ara a'a ka anangnga o'o.

<sup>19</sup> A'a na Bölis, narigiri a'a tumma no a nüüsö ma a'a, ara a'a tanangnga eema ya o'o. Taalo a'a nara tüütü ka kömüsü tammo eede küdü ka oona, kudumma eede ka tanangnga o'o kada ömö'di ma Almasiihi.

<sup>20</sup> Örre eede, üün'i ta'diila ana a'a ka Uugaara kidha, 'baga eedi yeede ka Almasiihi kidha.

<sup>21</sup> Nussu a'a a'da ara o'o talingga tumma neede ka tirina o'o no, nütü ka tussu a'da ara o'o talingga eege ka tagii'bi neede ka tirina o'o no.

<sup>22</sup> Indinaana 'buugu ma füngngö eede ku'bu, kudumma eede ka tindhiig'i a'da Masala mara tamma ka tafara tanno ada kono mo, mapadaga a'a kada kanna.

### Tööjüü na eere no

<sup>23</sup> Abafaraas yungngo ka pabuusu nja a'a kudumma Yasu Almasiihi ya ööjüü aaga.

<sup>24</sup> Nja Murkus nja Arestarkos nja Dimas nja Lüüka no alinggo nja a'a no.

<sup>25</sup> Fa ka türü tanno Uugaara Yasu Almasiihi ka neene nja aaga in'dilli kungng.

## Waraga ma co Ebraniin Tafa'da tumma

Tatalaana yungngo agarigiri co kadu ma kaniisa tanno Yahüdü no. I'i uu'bu eege ka nanggeedi a'da kütü ka takidhö ka tamma tanno eene ka uuru ma kadu kadalingga eege.

Waraga ya ala angnga a'da Yasu i'i ya 'Bii'bala ma Masala. I'i ana türü adagii'bi kadhangga na Yahüdü ka tamma kene no, i'i agu'daana dhorro adagii'bi nagane'bi ma 'billi, agu'daana dhorro adagii'bi Müüsä, ya anangnga seriye ya Masala a Yahüdü ya. I'i agu'daana dhorro adagii'bi ka'boge ma Yahüdü, kudumma iini taalo agüün'i nüümö ya toroko ya. I'i ümmünü eyi yiini kada nüümö ma türri ma tagala tatoroko na kadu nye'd'de ka naguuru nye'd'de. A tatalaana afünögü nagiide ko'do nja iiya ma 'büdhüü na aganeene a tamma no. I'i adirina eema a kadu ma kaniisa a'da eege tüüta tamma ka Masala taalo kama tüüru ma eema tiya Yasu ka talinggo ya.

*Tumma na Masala nja 'Bii'bala tiya oono*

<sup>1</sup> Billi Masala magürünü nagane'bi kadgeema nja kafaafa ma angnga a naguru nja nafinii kada tonggoonyo.

<sup>2</sup> Lakiini ka naguuru tanno eere no, mageema nja angnga a 'Bii'bala tiya oono, ya ara takarna ka eema nye'd'de yoono ka tadina 'büdhüü ana i'i ya.

<sup>3</sup> 'Bii'bala i'i ya töyeene ma tüdhindhi ma Masala i'i ya koronggore ma taneene tanno oono afa ka eema nye'd'de a türü ma tamma tanno iini, a kini ka ndagalatatoroko naaja emmi ka nüüsö ma kuri ma tüdhindhi ma Masala ka 'dotombo'do.

<sup>4</sup> Nggege i'i idhindhö adagii'bi kadhangga kudumma iini ka a'duga eere adagii'bi nagareene neene.

<sup>5</sup> Taalo Masala miki a tadhingga töccö, "O'o no 'Bii'bala tiya eede,  
a'a nageene o'o ka uuru tanno."

Miki afe'de,  
"Ara ta Pupa tiya iini  
ata 'bii'bala tiya eede."

<sup>6</sup> Ka Masala ka agürünü 'Bii'bala yoono ya dhidha ya ka 'büdhüü ya, miki a'da, "A kadhangga ma Masala tüüru kini kidha."

<sup>7</sup> A Masala meema tumma ma kadhangga miki,

"Marü'bü kadhangga kada tanya,  
a kadu ma linggo noono ka nagonggo'do ma issi."

<sup>8</sup> Lakiini kudumma ma 'Bii'bala miki,  
"Ka Masala, tauugaara nüüdü kara tüü  
turi ta'billi,

a kuufi ma tauugaara ta tiya üüdü  
dhorro turi.

<sup>9</sup> Nasaasa o'o tumma no dhorro nanu ka tanno atoroko no,  
yungngo a Masala, Masala müüdü ka

tagesse o'o  
masiri uu'ba üüdü ka üüdü ma dhodho  
masa ka titaaloo manangnga a ki-jöögö."

<sup>10</sup> Miki afe'de,  
"Ka Uugaara, narü'bü 'büdhüü ka dhidha,  
narü'bü o'o 'dotombo'do ana iisine ma o'o.

<sup>11</sup> Eege kara tamanyaga, ara o'o ka tüü,  
kara toorodo afa ten'di.

<sup>12</sup> Ara o'o ta'dukunjaana eege ko'do  
afa ten'di ka tem'bele,  
lakiini o'o naganuuuru nüüdü taalo kara titaaloo."

<sup>13</sup> Taalo Masala miki a kadhangga,  
"Emmi kede ka nüüsö ma kuri kita,  
ara a'a tanangga diidi yüüdü küdü  
ka uune nasiri kene."

<sup>14</sup> Kadhangga eege ka nagoronggore tanno linggo ada Masala, na oono ka kürünü eege köö'dö takarna ka toolonadene?

## 2

*Aaga adinö ko'do*

<sup>1</sup> İkirü angnga kara tagümmü talaana na 'diila naaja ka taföönö no ii'di angnga tagamaa.

<sup>2</sup> Ürü tumma na kadhangga ka tageema no katimin'da ya, ömö'di ya asilli tumma no anu kide ya, ara taluna tapusu adene miini ka teyi.

<sup>3</sup> Ara angnga tarünö nya aja ka tagüün'i tö'bö a toolonadene tanno idhindhö? Na Uugaara ka titiraana ana oona miini ka dhidha, a kadu na fööönö no kiki angnga a'da katimin'da.

<sup>4</sup> A Masala tamma ka tumma tanno eene ana eema keefe yoono ka tagalinggo ya nye'd'de a türü ka tatonggoonyo ana eema tiya oono ka amana a kadu a Koronggore tiya Insili ya.

*Yasu afeene nja nagöre tanno iini*

<sup>5</sup> Taalo Masala manangnga kadhangga kada naguugaara ma 'büdhüü tiya ara töö'dö, yiidü ka tageema miini ya.

<sup>6</sup> Afa ma sorne ka tiki a'da,  
"Ömö'di a'da minna nagüügi tumma miini?"

Tadü'dü a'da minna na o'o tafa kini?  
<sup>7</sup> Nagalinggo o'o i'i ka idhilli ka ta'buugu  
 ka kadhangga keere,  
 nanangnga ndalembö iini nya  
 tidhindhi,  
<sup>8</sup> nanangnga eema in'dili kini ka  
 uune."

Iki a'da Masala manangnga i'i ka tauugaara ma eema in'dili eema nye'de kungngo iini, lakiini taalo angnga kiji tadü'dü ka tauugaara ma eema nye'de 'bitingngö.

<sup>9</sup> Lakiini kiji ungngo Yasu ömö'di ya agal-  
 inggo adene idhilli ka ta'buugu ma kadhangga ya, amang kini a türlü ma Masala ara teyi ka üdü ma kadu nye'de kiji ungngo i'i a türlü a tidhindhi, kudumma iini ka teyi a tadhügürü.

<sup>10</sup> Tumma dhorro Masala oogo mungngo marü'bü eema in'dili ma tidhindhi tanno oono, kono ka anangnga Yasu ka tinsili ka dhügürü, tö'dö ana laala kadhabbu ka toolonadene nye'de.

<sup>11</sup> I'i amana kadu ka tinsili ka tatoroko tanno neene i'i nya kadu tanno insili no nye'de, pupa yeene unggodho. Yungngo Yasu ka taalo ana modolo ma tümmünü ege a'da nagöre.

<sup>12</sup> Iki,  
 "Ara a'a teema nya nagöre tanno eede ana eere tiya üdü  
 nawe tüüsü ka kaniisa."

<sup>13</sup> Iki afe'de,  
 "Ara a'a tümmünü eyi yeede a Masala."  
 Afada iki afe'de,

"A'a nungngo kita nya laala tiya Masala ka anangnga a'a ya."

<sup>14</sup> Aga laala katocco ka tuu'da nya eriidö, a Yasu osso kide nya eene afeene afa ege amang ka inde tanno iini tiidi Ebliisi ya ana türlü ma inde.

<sup>15</sup> Oolona kadu no ka kasaga, eene kari'ba inde ya.

<sup>16</sup> Taalo i'i ö'dö toolona kadhangga, lakiini i'i ö'dö toolona laala ya Abrahiim.

<sup>17</sup> Nggeege ikiri kara tafeene nya nagöre tanno iini ka eema in'dili, amang kini tana 'bangnga ada uugaara ma ka'boge ya adho ka fiini ka linggo na Masala, amang kini taagala tatoroko na kadu.

<sup>18</sup> Kudumma iini ana oona miini adhügürü adaka'b'badene amang kini toolona kadu na a'b'badene no.

### 3

#### *Yasu agii'bi Müüsa*

<sup>1</sup> Nggeege nagöre eede na ma kaniisa no insili no na osso ka tümmüneene ma 'dotombo'do, aaga iirü Yasu ya tafiiñi ma

tamma tanno aja uugaara ma ka'boge yaaja ka tamma kini ya.

<sup>2</sup> I'i ümmü tumma na ömö'di tiya agesse i'i ya, afa ma Müüsa ka tagümmü tumma ma Masala ka 'dö ma Masala nye'de kungngo.

<sup>3</sup> Yasu i'i yungngo idhindhi adagii'bi Müüsa afa ma tatürü'böönö ka tidhindhi adagii'bi 'dö ka eyi tiya iini.

<sup>4</sup> Ömö'di ya arü'bü 'dö ya inggide, lakiini Masala oogo mungngo marü'bü eema in'dili.

<sup>5</sup> A Müüsa aga'dila ka 'dö ma Masala nye'de kada ömö'di ma linggo eema tumma na ara teemadene ka naguru tanno tö'dö no.

<sup>6</sup> Lakiini Almasiihi kada 'Bii'bala ya a'dila ya ka 'dö ma Masala. Angnga ka 'dö tiya iini, üürü kafa angnga taalo kari'ba angnga ma tafa ka eema tiya aja ka tindhigü i'i ya.

*Aaga adinö ma kadu na taalo kamma no*

<sup>7</sup> Afa ma Koronggore tiya Insili ya ka tiki, "Uuru no kada kara taföönyö 'bugeyi ya Masala ya,

<sup>8</sup> aaga fa tasilli tumma miini  
 afa tiya maaga ka tagüünii ka uuru ma ta'b'badene ka dhiile ya kungngo.

<sup>9</sup> Kita a kafaafa ma aaga ka takab'bä ka gawwa a'a ka eedi kiji linggo neede nya eene a nagürünnü kukumu kadu keera.

<sup>10</sup> I'i yungngo eede ka tagoroo'bo nya sere tiya niki a'da,  
 'Nanggeedi neene turi kungngo kaama,  
 taalo kussu nafiiñi yeede.'

<sup>11</sup> A'a naküdöönö ka tagoroo'bo tanno eede,  
 'Eege taalo kara co ka talengnge tanno eede.'

<sup>12</sup> Nagöre eede, aaga adinö ko'do, ömö'di köönö ana kada afa tana eedi ya toroko ya, amma ka Masala apadaga oona keere ka Masala tammo efe ka 'dö mo.

<sup>13</sup> Adha ya, aaga fiinügünja ko'do 'bucca kudumma tumma ma uuru kungngo ka sorne ii'dü tatoroko tiisini ömö'di öccö ana kada asilli eema.

<sup>14</sup> Angnga ka unggodho nya Almasiihi kaja kara tagümmü ajeene dhorro ta'bili ata'dila tanno aganna kaja ka dhidha no.

<sup>15</sup> Sorne ma Masala iki,  
 "Uuru no, kada ka taföönyö 'bugeyi ya Masala,

aaga fa tasilli eema afa maada ka tagasilli tumma na Masala kungngo."

<sup>16</sup> Kadu öccö eege kungngo kakaanu ka tumma? Taalo kadu no nye'd'de na Müüsä ka öö'dö ana eege ndama Misiri no?

<sup>17</sup> Kamada eege kungngo a Masala ka tagoroo'bo ada kene a nagürüünükukumu kadu keera no? Nja kadu tanno agüuni tatoroko no ka'dünggö kaaya ka dhüile.

<sup>18</sup> Kamada eege kungngo a Masala ka taküdöönö a'da taalo kara co ka talıngnge tanno oono? Taalo kadu na silltumma noono no?

<sup>19</sup> Kiji angnga eege taalo kambaanya co, kudumma eene kitaalo kamma.

## 4

### *Uuru ma Sa'bidi uuru ma talıngnge*

<sup>1</sup> 'Bitıngngö Masala mafa'da fiin'i co 'diyiya oono angnga ka tadınö ko'do ii'di ömö'di könö türri eyi iini ka tütü ka teene.

<sup>2</sup> Kaföönyö angnga tumma na 'diila no afa meene ka taföönyö kungngo, lakiini eege taalo kümmü nüümö ka tumma tanno eene ka taföönyö no, kudumma eene taalo kamma kide.

<sup>3</sup> A 'bitıngngö angnga na amma no, ara angnga co talıngnge ma Masala, kudumma oono ka tiki,

"Naküdöönö a'a a tagoroo'bo 'do

'Taalo kara co talıngnge tanno eede.' "A'da asa linggo no tagalinggo adene ada jiddi ma uuru ma 'büdhüli ka tarü'bü adene,

<sup>4</sup> kudumma oono ka tiki ka sorne ka tumma uuru tanno iidümmü kafünü eera no, "A Masala talıngnge ka linggo tanno oono nye'd'de kungngo ka uuru tanno iidümmü kafünü eera no."

<sup>5</sup> Miki afe'de, "Taalo kara co ka talıngnge tiya eede."

<sup>6</sup> Üürü kadu na föönyö tumma na 'diila no ka dhidha asa kitaalo kinnyo ka talıngnge ma Masala kudumma eene ka silltumma, a kadu könö kinggide kara co ka talıngnge tanno miini no.

<sup>7</sup> Yungngo Masala ka kusu uuru kide ana eere a'da uuru no, afa moono ka teema ana onggo'do tammo Dawud 'billi miki, "Kada ka föönyö 'bugeyi ya Masala ka uuru tanno ya,

aaga tafa tasilli tumma iini."

<sup>8</sup> Ka Yashu kara takunggu eege ka talıngnge, taalo Masala mageema tumma ma uuru könö afe'de.

<sup>9</sup> Lakiini öreene uuru ma Sa'bidi talıngnge na kadu tanno Masala.

<sup>10</sup> Kudumma ömö'di tiya innyo ka talıngnge ma Masala ya, ara talıngnge ndama linggo tanno iini afa ma Masala ka lingnge ka linggo tanno oono kungngo.

<sup>11</sup> Kada kardha ku'bu amang kaja co ka talıngnge tanno miini no, ii'di ömö'di öccö ta'dünggö ma tuurna fiin'i yeene keere ma tasilli eema.

<sup>12</sup> Tumma na Masala ka tünö ka linggo, kana kuri kadagii'bi kulu'ba ma ana na'dugugini keera mo, ara teedhe kadara co ta'buugu tiya tuu'da nja koronggore, nja tuu'da agillö nye'd'de, nja 'dongngē nja ku'buuni, ümmü tumma ma üüdü nja tumma ma eedi.

<sup>13</sup> Taalo nüümö mitaalo ussudene ka Masala kidha, eema nye'd'de ijidene kada 'döngngönyö kono ka iifye, ara angnga tagöö'dö kono kidha.

*Yasu ya ta'boge tiya dhabbu ya*

<sup>14</sup> Nggege kada kümmü tumma ma Yasu 'Bii'bala ya Masala ya dhorro ya, i'i ya Uugaara ma Ka'boge ya idhindhü ya, ata'da aco 'dotombo'bo.

<sup>15</sup> Kudumma uugaara ma ka'boge yaaja taalo agi'di ma tana 'bangnga ma angnga ka tagi'di tanno aja, i'i aka'b'badene afa angnga. Ta'b'baana in'dili illi i'i taalo agüüni tatoroko.

<sup>16</sup> Fa kaja angnga caago a kööyö ma türü a tamma dhorro, amang kaja taduna 'bangnga nja türü, akinyi angnga kaja kara tasaasa.

## 5

<sup>1</sup> Kudumma uugaara ma ka'boge agonadene ndama kadu tanno iini ümmünüde ma talınggo ada linggo ma Masala eene miini ka türri ma tafaana ma tatoroko ka kadu ka oona iini.

<sup>2</sup> I'i ambaanya tana 'bangnga ma na-gaaga nja kadu tanno aama no, kudumma iini ka eyi tiya iini agi'di.

<sup>3</sup> Nggege i'i ya ama türri tatoroko ma eyi tiya iini nja tatoroko tanno kadu.

<sup>4</sup> Taalo ömö'di ma tümmünü eyi yiini kada uugaara ma ka'boge, illi a Masala ka tümmünü i'i iini afa moono ka tagümmünü Harüün kungngo.

<sup>5</sup> Almasihi afe'de taalo afunügü eyi yiini ko'do a'da amang kini ta uugaara ma ka'boge, lakiini Masala miki iini, "O'o na 'Bii'bala tiya eede

nageene a'a o'o ka uuru tanno."

<sup>6</sup> Afada miki ka 'buugu töccö afe'de, "O'o na ta'boge ta'billi

ma ta'duga 'buugu ya Maliksadik."

<sup>7</sup> Ka naguuru tanno Yasu ka takaleefe ka 'büdhüli afara ka Masala a tumma

ko'd'o do nja 'bii'di ma iifye co ömö'di tiya ara tamaanya toolona i'i ka inde, ada aföönyö kudumma tamma tanno iini nja tümmünü eyi iini.

<sup>8</sup> A'da i'i aga 'bii'bala agalaadene ka taföönyö eema ndama kita iini ka tadhügürü ya.

<sup>9</sup> Kini kara tasere adhabbu ikirü anda nduguli ma toolona ta'billi ma kadu tanno aföönyö tumma niimi no.

<sup>10</sup> Kudumma Masala ma kümmünü i'i a'da a ta uugaara ma ka'boge akarna ka 'buugu tiya Maliksadik.

#### *Aaga fa tanu ka tumma ma Masala*

<sup>11</sup> Tumma kadhabbu eede ka asaasa teema eege, lakiini kiideene tasaana ku'bu miini, kudumma ada ka titalo kaföönyö eema areere.

<sup>12</sup> Tumma dhorro, ta'bütängngö aaga ta katalaana, kasaasa aaga ömö'di alaana aaga ka tumma ma timin'da na Masala na dhidha no afe'de. Kasaasa aaga siiga taalo kuri ya kidhö ya.

<sup>13</sup> Ömö'di ya aleefe tooye siiga ya, i'i aleefe tidhilli taalo ussu eema ya a'diila ya.

<sup>14</sup> Lakiini kuri ya kidhö ya, ama kadu tanno iifi no, na agalaadene kussu niimö ya a'diila ya nja tiya toroko ya.

## 6

<sup>1</sup> Nggeege kada kasisigi co aadha ka talaana ma Almasiihi ma ta'dara, nggeege fa ka talaana tanno dhidha ma Almasiihi ara kico kada ömö'di dhorro. Ungngo tafa tamana kadesa ma taadha ka linggo tanno ma inde no afe'de nja tamma ka Masala,

<sup>2</sup> talaana ma tambeese nja tümmünü iisine ka kadu ka nanggüdü nja tafirk'i dö ka inde nja tapusu adene ta'billi.

<sup>3</sup> I'i yungngo aja kara tagalinggo a Masala ara tamma kide.

<sup>4</sup> A tiideene a kadu na kanna ka töyeene ta unggodho, kagolo eema ma 'dotombo'do ya a'diila ya, kussu ka Koronggore tiya Insili ya,

<sup>5</sup> kagolo tumma nja Masala na 'diila no nja eema ma türü ma ürüünü tiya ara tö'dö no,

<sup>6</sup> Kassa ka taadha ka tumma ma Masala, a tafada ma tapadaga eege ka tamma a'da kaadha ka tatoroko, kiideene 'do kudumma eene ka bünnü 'Bii'bala ma Masala ka salii'bi teera kanangnga modolo iini ka oona.

<sup>7</sup> 'Büdhülü in'dili a kooye 'bii'di ma tombo'do ka tede ada kide 'bucca, a naafa tafü'döönö kide ka'diila ma kadu tanno adin'iigü no ka üdü meene ka'duga baraka ma Masala.

<sup>8</sup> Lakiini 'büdhülü kara teene immi nja ooyo tiya atoroko ya, ara linggi ma Masala tümmü i'i üpünja ka issi a tonyoko.

<sup>9</sup> Keema ungngo tumma no, kateefe ma a'a, a'da kussu ungngo a'da eema ya a'diila ungngo ada ara tanangnga aaga ka toolonadene.

<sup>10</sup> Masala taalo müünü ada kadu ku'bu taalo mara tüürü ma eema tiya ada ka tagalinggo ya nja tasaasa tanno ada kaala oono ka eema tiya kamana a kadu tanno oono, aaga taleefe talinggo ada eene.

<sup>11</sup> Lakiini ungngo kasaasa a'da aaga tutü ka linggo tanno miini no nggeege turi amang ka eema tiya ada ka tindhigü ya tananja aaga ya a timin'da.

<sup>12</sup> Taalo ungngo kasaasa a'da aaga tadhunu, lakiini aaga tafeene nja kadu tanno amma ka Masala kidhi oona ku'bu kaduna niimö ya Masala ka tiki eene ya.

#### *Tumma na Masala ka timin'da*

<sup>13</sup> Ka Masala ka tageema nja Abrahiim maküdöönö ka eyi tiya oono a'da taalo ömö'di ma tagii'bi eyi tiya iini aküdöönö ana eere tiya oono.

<sup>14</sup> Miki iini a'da, "Tumma dhorro ara a'a tanangnga baraka o'o nanangnga laala o'o dhabbu."

<sup>15</sup> Yungngo Abrahiim ka takidhi oona ku'bu aluna niimö ya Masala ka tadirina iini ya.

<sup>16</sup> Kadu kaküdöönö ana ömö'di tiya adhabbu eene, a taküdöönö tümmünü niimö ya ageemadene kindinaana ku'bu kaadha ka ta'digineene.

<sup>17</sup> Kudumma Masala masaasa tanangnga nafüünü ma taneene tanno oono ka tussu adene ka kadu tanno ara takarna ka tumma tanno oono ka tatiraana no, oogo ma tiraana a taküdöönö.

<sup>18</sup> Masala magüünü tumma no, ma eema inggide eera taalo ara tatenggere, iideene 'do a Masala ka tatoroko i'i yungngo aja katümmü tindhigü na ananja angnga no, tafünügü angnga ko'do.

<sup>19</sup> Tindhigü no kungngo aja afa niimö tiya afa kaja ka koronggore ka takidhö afa kaja aco a taneene keere ma ten'di.

<sup>20</sup> Yasu inynyo kannna kaja kidha ka üdü ma angnga anda uugaara ma ka'boge ta'billi ka 'buugu ya Maliksadik.

## 7

#### *Maliksadik ya ta'boge ya*

<sup>1</sup> A Maliksadik ya aga uugaara ma Salim ta'boge ma Masala tammo dhabbu mo. Maliksadik akoreene nja Abrahiim kini ka ndafada ka koro'bo tiya iini nja naguu-gaara ya, anangnga baraka iini.

<sup>2</sup> Abrahiim agona unggodho ndama eema yiini ya ada'baaga ya, eere yiini ya dhidha ya, i'i ya "Uugaara ma ta'diila," afe'de "Uugaara ma Salim" iki a'da, "Uugaara ma tööjü'lü."

<sup>3</sup> Taalo pupa iini a nüümö titaalo kini a kadaada titaalo kini, taalo ageenedene, taalo a teyi, lakiini i'i afeene nja 'Bii'bala ma Masala ara tüüt kada ta'boge ta'billi.

<sup>4</sup> Aaga iji tiddhindhi niimi, salsa faafa ma angnga Abrahiim anangnga faana ma 'dakeyi ma almaala tiya iini ku'bu ndama eema ma koro'bo.

<sup>5</sup> Lakiini ka'boge na laala tiya Laawi no, seriye iki a'da kama eema ka kadu na nagöre tanno eene no 'dakeyi, kudumma eene kada laala tiya Abrahiim.

<sup>6</sup> Lakiini Maliksadik taalo 'bii'bala ya Laawi, lakiini i'i agona eema ya ada'baaga ka Abrahiim anangnga baraka iini, i'i ya Masala ka timi'di tumma nja iini ya.

<sup>7</sup> Taalo nüümö ya toroko kide ma ömö'di tiya adhabbu ya ka anangnga baraka a tiya idhilli ya.

<sup>8</sup> Katamana eema tiya ada'baaga ya, ya ka'boge a kadu na aaya no eege kungngo kamaana. Lakiini ömö'di ya a'duga ya ikirü ka tussu adene a'da i'i ya efe ka 'di.

<sup>9</sup> Ara angnga tiki a'da, Laawi ka eyi tiya iini ama eema ya ada'baaga, anangnga ku'bu ka nüüsö tanno Abrahiim.

<sup>10</sup> Kudumma iini ka takaleefe ka Abrahiim ka sikiri ka uuru tanno Maliksadik ka toteene nja iini no.

#### *Yasu afeene afa Maliksadik*

<sup>11</sup> Üürü tadho ka fiinü kalinggo adene a tata'boge na Laawi a'da i'i yungngo ama seriye ya kadu ka'duga, taalo angnga kasaasa ta'boge ka öö'dö ma ta'duga 'buugu ya Maliksadik taalo ya Harüün.

<sup>12</sup> Üürü katenggere tata'boge, ara seriye tatenggere tekere.

<sup>13</sup> Ömö'di ya kadu ka teema tumma miini ya, ama siliga töccö, taalo ömö'di anna ka siliga tiya iini agalinggo ta ta'boge.

<sup>14</sup> Kussu angnga a'da Uugaara yaaja ö'dö ndama siliga tiya iini ya Yahüüsä, Müüsä taalo adiri tumma ma kadu tanno, kini ka keema tumma ma ka'boge.

<sup>15</sup> A tumma nüüd ka tirina no kussu adene dhorro, üürü ta'boge könö abbü 'dala afa Maliksadik.

<sup>16</sup> Ömö'di ya ümmü adene kada ta'boge taalo ndama tumma na nakömö'di nja kadaada, lakiini a türü ma tefe ka 'di na taalo kara titaalo no.

<sup>17</sup> Sorne eema tumma miini iki, "O'o no ta'boge ta'billi ka 'buugu ya Maliksadik."

<sup>18</sup> Tumma ma 'billi no kara co keere, kudumma eene ka tagi'di, taalo öö'dö keere a nüümö.

<sup>19</sup> Kudumma seriye tiya Müüsä taalo atüümö linggo dhorro, yungngo tindhigi na 'diila no anangnga kadu ka kete ka Masala ana eege.

<sup>20</sup> Taalo kagalinggo adene a'da kitaalo ka taküdöönö kide, a könö taga ka'boge a'da taalo kaküdöönö.

<sup>21</sup> Lakiini Yasu akodhodene ada ta'boge a taküdöönö ma Masala miki, "Uugaara aküdöönö taalo tagussu kide, 'O'o na ta'boge ta'billi.' "

<sup>22</sup> Kudumma ma taküdöönö ya, Yasu i'i yungngo anda tamaana ma timi'di tumma, adagii'bi timi'di tumma na dhidha no.

<sup>23</sup> Ka'boge na miini no kadhabbu, kudumma inde taalo kafa kene kafe ka 'di.

<sup>24</sup> Lakiini Yasu ya ara tüüt ka 'di ta'billi ya, tata'boge miini taalo kara titaalo.

<sup>25</sup> I'i 'bitingngö nja angnga 'bucca kungngo, ara toolona kadu na icci ka Masala ana eere tiya iini no, kudumma iini kefe ka 'di ta'billi, miini tageema nja Masala kudumma eene.

<sup>26</sup> Yasu i'i ya uugaara ma ka'boge ya a'diila nja angnga ya i'i ya insili, taalo nüümö ya toroko ya kini, taalo osso ka nüümö nja kadu tanno oroko no, a'diniga co fiinü ma ndanaaya ma 'dotombo'do.

<sup>27</sup> Taalo afeene nja ka'boge töccö taalo ama tara eema ma tirri 'bucca kungngo ma tagala tatoroko niini ka dhidha, assa ka tagala tatoroko na kadu in'dili, i'i akirri ma tatoroko tanno eene ta unggodho, ma kadu nye'de kini ka tümmü eyi yiini ka inde.

<sup>28</sup> A seriye ya Müüsä anangnga kadu na ki'di kada naguugaara ma ka'boge, lakiini taküdöönö tumma na Masala köödö keere a seriye, tanangnga 'Bii'bala ya insili ya ta'billi ya kide.

## 8

#### *Uugaara ma ka'boge ma timi'di tumma ma 'bitingngö*

<sup>1</sup> Lakiini üüdü ma tumma tanno iidü ka teema no a'da uugaara ma ka'boge ungngo iidü, ya emmi ka nüüsö ma kuri ma kööyö ma tiddhindhi ka 'dotombo'do,

<sup>2</sup> ya alingga ka 'buugu tiya insili nja tiya dhorro, ya Uugaara ka tarü'böönö ya a'da taalo ömö'di i'i yungngo arü'böönö.

<sup>3</sup> Uugaara ma ka'boge öö'dö ma tirri, ikirü angnga ka tiki a'da, uugaara ma ka'boge yaaja ara töö'dö a nüümö ma tirri iini.

## 9

*Tafara ka Masala ka fangga ma 'büdhüllü*

<sup>1</sup> A 'bitüngnöö taf'i'di tumma na dhidha no kaganna fiinü ma tümmü Masala nja fangga ma 'büdhüllü afe'de.

<sup>2</sup> Fangga magüfününja ka la tiya oono ya dhidha ya, ya koyo ma lamba ka tanna kide mo, tarabeesa nja miteene ma tirri, i'i yungngo ana eere a'da 'buugu tiya Insili ya.

<sup>3</sup> Aga kanna keere ma ten'di tiya eera ya, la yeene ka tümmüneene a'da 'buugu ya Insili dhindho ya.

<sup>4</sup> Fü'deene ma dahaba ka tadhüigö kondho kide mo, nja sandü ma timi'di tumma ma taküdhü ana dahaba koona nye'd'e. Sandü ma timi'di tumma mana alman nja kuufi tiya Harüün ka tasiri kide ya nja maraayo ma timi'di tumma.

<sup>5</sup> Karoba ma tidihindhi taganna ka sandü ko'do amana 'buugu ma fa ka takara 'buugu ma tatoroko ka tandha ya, lakiini taalo fiinü 'bitüngnöö ma tesaana tumma no ku'bu nye'd'e.

<sup>6</sup> Eema nye'd'e aga indinaana ku'bu ta'bitta kungno, a ka'boge ticci co la tiya dhidha ya a naguuru kalinggo eema ma Masala kide.

<sup>7</sup> Lakiini uugaara ma ka'boge i'i yungngo icci co la tiya eera ya unggodho ka ürüünü, itaalo ara co illi kini ka tümmünü eriidö ma tirri ka niisö ma tagala tatoroko niini ka tagüünii no nja tatoroko tanno kadu, kadu küüni a'da taalo kussu iini no.

<sup>8</sup> Koronggore ya Insili ya eema iki a'da fiinü ma co a 'buugu tiya Insili dhindho ya, taalo atanfa'da, kudumma la tiya dhidha ya ka aleefe ta'dingne.

<sup>9</sup> I'i yungngo tala angnga ka fiinü ma ürüünü ma 'bitüngnöö ana eema ma eriidö nja eema ma tirri ka Masala, itaalo ara tanangnga ömö'di ya ümmü Masala ya ka tinsili ka eedi.

<sup>10</sup> Eema ma tuu'da ma kuri nja tooye nja eema ka tatonggoonyo nja tagunaana ma eema, i'i ara uuru na Masala ka öö'dö a tumma töccö.

*Eriidö ya Almasiihi*

<sup>11</sup> Almasiihi andö'dö kada uugaara ma ka'boge ma eema tiya a'diila ya ya illi ka taganna kita, ada'da fangga mo idhindhi mo, ma tümö no, ya taalo alinggo adene ana iisine ma ömö'di, taalo ama eema ma 'büdhüllü.

<sup>12</sup> I'i taalo inynyo teene miini ana eriidö ma ki'biini nja leefo. Lakiini inynyo a 'buugu tiya Insili ya ta unggodho ana

<sup>4</sup> Ka Yasu kara taganna ka 'büdhüllü ya, taalo ara taga ta'boge, kudumma kadu kinggide kara tirri afa ma seriye ka tiki kungngo.

<sup>5</sup> Kadu na kalinggo ka 'buugu tiya insili ya kafeene afa koronggore nja tallappa tiya ka 'dotombo'do ya, ka Müüsa ka asaasa tüüfü fangga, a Masala tö'dö kini miki iini, "Ijöögö, alinggo eema nye'd'e afa ma tiya eede kala o'o ka 'dikinya ya kungngo."

<sup>6</sup> Lakiini linggo ma tata'boge kananja Yasu ka idhindhi a tanno eene, kudumma timi'di tumma na ka söödö no nja kadu tanno kagi'i bi timi'di tumma na dhidha no, agalinggo adene ka timi'di tumma tanno a'diila no.

<sup>7</sup> Üürü timi'di tumma na dhidha no ka ka'diila 'dee, taalo kara tagalinggo timi'di tumma köönö.

<sup>8</sup> Lakiini Masala maluna hetti ka kadu miki a'da,

"Uuru kinggide kara tö'dö, Uugaara ka tiki, ara a'a sa kimi'di tumma ma 'bitüngnöö nja 'di tiya Israyil nja 'dü tiya Yahüüsa.

<sup>9</sup> Taalo afa timi'di tumma neede nja kafaafa meene ka uuru tanno eede ka tümmü eege ka niisö nunggu eege kürö ndama 'büdhüllü ma Misiri, kudumma eene taalo kütü ka timi'di tumma tanno eede, yungngo eede kafa kene, a'a na Uugaara na tiri tumma no.

<sup>10</sup> Timi'di tumma neede ka tüünii nja laala ma Israyil ka naguuru tanno ara tö'dö no, Uugaara iki.

Ara a'a tanangnga seriye yeede kene ka nanggüüdü narigiri ada kene ka nanggeedi neene. Na ta Masala tammo eene ka ta kadu tanno eede.

<sup>11</sup> Taalo ömö'di ana kene ara talaana kadu na kete kini no alla örre yiini tiki iini, 'Ussu Uugaara,'

kudumma eene kassa ka tessu a'a nye'd'e ndama ömö'di tiya idhilli ya nja tiya adhabbu ya.

<sup>12</sup> Ara a'a ta'duga tatoroko eene ka oona nitaalo nara tagüigi tam'baga neene afe'de."

<sup>13</sup> Tumma na Masala ka timi'di tumma na issi no manangnga timi'di tumma na dhidha no ka tilli a niimö ya illi ya ya ara tamanyaga.

eriidö tiya iini ma kadu nye'd'de öö'dö a toolona angnga ta'billi.

<sup>13</sup> Üürü eriidö ma nakoromo nja nagodha ya uurunja ku'bu ya nja fü'dö ma 'bileeo amana kadu na nyoro no katinsili, agala eege ka oona.

<sup>14</sup> Taalo eriidö ya Almasiihi ya ümmünü eyi yiini a Masala a koronggore ta'billi ümmü eyi yiini a Masala a Koronggore ta'billi ümmünü eyi yiini a'da taalo hetti kide, agala nanggeedi naaja ka eema tiya amanaga angnga ka inde ya amang kaja tagalinggo ada a Masala tammo efe ka 'dämo.

<sup>15</sup> Nggeege ya Almasiihi yungngo anna ka söödö ma timi'di tumma ma 'bitingngö, amang ka kadu tanno ümmünüdene no kara takarna ka eema ta'billi nja timi'di tumma, a 'bitingngö eyi kada nüümö ma faana anangnga eege ka toolonadene ka tatoroko tanno agüümü adene ka timi'di tumma tanno dhidha no.

<sup>16</sup> Ka ömö'dii kara tarigiri timi'di tumma ya, fa ka kadu kussu inde niini, amang kene tessu a'da i'i ya eyi.

<sup>17</sup> Kudumma tumma tanno ömö'dii ya ö'dö iini ya, ara teyi a linggo kitaalo kene kudumma ömö'dii tiya ageema ya, efe ka 'dii.

<sup>18</sup> I'i yungngo a timi'di tumma na dhidha no taalo agalinggo adene a'da taalo eriidö kide.

<sup>19</sup> Aga Müüsa ka ndadünüğü tumma co kadu ma tumma ma Masala nye'd'de afa ma seriye ka tiki, a'duga eriidö ma leefo nja nakoromo nja 'büüdi nja musa tammo dhöyö mo nja ndhaaru asanna ka Sorne ma seriye tiya iini nja kadu nye'd'de kungngo.

<sup>20</sup> İkiri ka tiki, "Eriidö ma timi'di tumma na Masala ka tiki aaga no eege kungngo aaga tafa kide."

<sup>21</sup> Afada atasanna eriidö ka fangga nja eema ma linggo ma Masala nye'd'de kungngo.

<sup>22</sup> Tumma dhorro seriye iki a'da asaasa eema nye'd'de tagunadene ana eriidö, üürü eriidö taalo ya, taalo tatoroko kara ta'dugadene.

<sup>23</sup> Üürü koronggore ma eema ma 'dotombo'do ama ma tatanggala ana eema tiya, aya ma 'dotombo'do ka eyi tiya iini ama tatanggala ana eema ma türri ya agii'bi i'i ya.

<sup>24</sup> Kudumma Almasiihi taalo innyyo a 'buugu tiya insili ya kalinggo adene ana iisine ya, yungngo a koronggore ma timin'da ya, lakiini i'i imnyyo 'dotombo'do

ka eyi tiya eene abbü 'dala ka Masala kidha ka üdü ma angnga.

<sup>25</sup> Taalo kudumma iini a'da ümmünü eyi yiini a Masala a naguuru afa uugaara ma ka'boge ya icci co 'buugu tiya Insili dhindho ya ta unggodho ka ürüünü ana eriidö a'da taalo eriidö yiini ya müni.

<sup>26</sup> I'i ya ma tadhügürü 'bucca jiddi ma 'büdhüüli ka tarü'bü adene, lakiini i'i abbü 'dala ta unggodho a'da asa nagürüünü takete ka tatümö ma tagala tatoroko iini ka tümmünü eyi yiini a Masala kada nüümö ma türri.

<sup>27</sup> Kadu 'do kara taaya ta unggodho a Masala kara tümmünü eegē.

<sup>28</sup> Nggeege afe'de Almasiihi agümmünü eyi yiini kada nüümö ma türri ta unggodho ma ta'duga tatoroko na kadu kadhabbu assa ka abbü 'dala afe'de, taalo kudumma ma tam'baga, lakiini ma tö'dö toolona kadu no indhägi i'i no.

## 10

*Almasiihi agirri ta unggodho ka üdü ma kadu nye'd'de*

<sup>1</sup> Seriye i'i yungngo a koronggore ma eema tiya a'diila ya unggunu tö'dö ya taalo tumma ma timin'da eege kamiini ka eyi tiya eene. Nggeege taalo kara tamaanya a türri tanno miini no neene kara talinggo a nagürüünü ma tanangnga tanna ka Masala kete iini no kada dhorro.

<sup>2</sup> Üürü nggeege, eege taalo tagussu ka nanggeedi ma tam'baga afe'de ana türri töödhü niye'd'de? Kudumma kadu tanno ümmü Masala no kara ta tanggala ka tatoroko tanno eene, ta unggodho, lakiini tagussu aleefe tanna kene ka nanggeedi tatoroko tanno eene ka talinggo no.

<sup>3</sup> Tumma ma türri tanno ö'dö kama tagüügi ma tam'baga ma nagürüünü

<sup>4</sup> lakiini eriidö ma nagodha nja nakoromo taalo kara tamaanya tagala tam'baga.

<sup>5</sup> Nggeege yungngo Almasiihi ka tiki a Masala kini ka ndakete köö'dö ka büdhüüli, iki,

"Taalo o'o nasaasa türri nja eema ma taraana,

lakiini nagalinggo ada o'o tuu'da a'a.

<sup>6</sup> Taalo o'o nadhodho kudumma ma eema ma eriidö nye'd'de kagu'dudene ka müsi ma türri alla türri ma tagala tatoroko.

<sup>7</sup> İkiri a'a ka tiki, 'Ka Masala a'a nungngo nara tö'dö, nö'dö talinggo linggo nüüdü afa ma sorne ka teema tumma ma a'a kungngo.'

<sup>8</sup> Iki ka dhidha, "Tirri nja eema ma taraana nja tiya agu'dudene ya, ka müsi ma tirri ya, nja taradene ma ta'duga tatoroko ya, taalo o'o nasaasa, o'o taalo na dhadho meene," a'da seriye asasa eege katalingga adene.

<sup>9</sup> Afada iki, "A'a nungngó nara tö'dö talingga linggo nüdü." Naadha ka linggo tanno dhidha no ara ka talingga na asigi kide no.

<sup>10</sup> Kudumma ma maraada ka kütünidene, angnga kada insili ana Yasu Almasiihi ya tuu'da tanno iini ka takirri iini ta unggodho.

<sup>11</sup> Ta'boge ma Yahüdü a'dingnge ana ko'do ma tara eema ma eriidö ka eyi tiya eene a naguru, eege taalo kara tambaanya ta'duga tatoroko.

<sup>12</sup> Lakiini ka ta'boge tiya ka tirri a naguru in'dili ma ta'duga tatoroko ya, emmi ka nüüsö ma kuri tanno Masala.

<sup>13</sup> I'i 'bitüngngö indhigü Masala a'da manangnga diidi miini kini ka uune ka teene.

<sup>14</sup> I'i anangnga kadu niini ka anangnga eege ka tinsili ka'diila ta'billi a tirri ka unggodho.

<sup>15</sup> I'i yungngó a Koronggore tiya Insili ya ka tırina angnga afe'de iki a'da,

<sup>16</sup> "Uugaara iki, Timi'di tumma no eege kungingo eede kara tamidaana nja eene,

nagürüünü no, ara tö'dö no.

Ara a'a a'a tanangnga seriye yeede kene ka nanggeedi,

narigiri ada kene ka nanggüüdü."

<sup>17</sup> Iki afe'de, "Taalo a'a nara tagüügi tatoroko neene nja tam'baga tanno eene afe'de."

<sup>18</sup> Ka tatoroko kara ta'dugadene nye'de kungingo ya, taalo nüümö ma tirri ma tatoroko afe'de.

#### Tumma ma tidhi oona ku'bu

<sup>19</sup> Nggeege nagöre eede, kamma angnga dhorro ma tara co 'buugu tiya Insili dhindho ya ana eriidö tiya Yasu.

<sup>20</sup> Ndama fiinü ya issi ya efe ka 'dö ya, afa'danja angnga a ten'di tammo a tuu'da tano iini.

<sup>21</sup> Kudumma ma ta'boge unggngo aja idhindü afa ka 'dö ma Masala,

<sup>22</sup> kada kete ka Masala ana eedi ma timin'da a tamma nye'de, a nanggeedi ka tinsili a'da taalo nüümö ya toroko ya kide, a tuu'da naaja tagoodene a 'biidi tiya insili ya.

<sup>23</sup> Kada kafa ka tündhigü tanno aja ka teema no, angnga tafa takeele ka riifö, kudumma Masala madho ka fiinü ka tumma tanno oono ka teema no.

<sup>24</sup> Kada kafaana ka oona, angnga tagamünügü njaana ko'do a tasaasa ajene nja linggo tanno a'diila no.

<sup>25</sup> Aaga fa tarumeene ka tamiimi ma teema afa ma kadu könö ana kada kalinggo, lakiini aaga amünügü njaana ko'do dhidhdha afa maada ka tessu a'da asa uuru ma Masala takete kungngo.

<sup>26</sup> Üürü kagüüni angnga tam'baga ndama eyi tiya aja, ara angnga taluna tessu eema ma timin'da, taalo tirri ma eriidö kara ta'duga tam'baga ka kadu ka oona.

<sup>27</sup> Lakiini tündhigü ma ri'ba ma uuru ma Masala kara tümmü kadu mamana ka issi kinyogo kadu na diidi Masala no.

<sup>28</sup> Ömö'dö ya anu ka tumma tanno Müüsä ya, ara teyi a'da taalo 'bangnga miini kide a kadu keera katadinö kide nja eene ka tiidoona.

<sup>29</sup> Kiki aaga nya, ara tapusu adene na ömö'di tiya asiraana ka 'Bii'bala ma Masala ana uune, ya agüünü midhi ku'bu ana i'i afa nüümö tiya taalo insili ya, eriidö ma tamin'di tumma tanangnga i'i ka tinsili, i'i ya ageela Koronggore ma türü ya?

<sup>30</sup> Kussu angnga ömö'di ya iki, "Ta'diinö kungingo eede, a'a nungngó nara tümmü kadu." Iki afe'de, "A'da Uugaara assa kara tümmü kadu niini."

<sup>31</sup> Am'ba ka ömö'di tiya ara ta'dinggö ka Masala tammo efe ka 'dö mo ka nüüsö.

<sup>32</sup> Aaga küügi naganuuru na dhidhdha no, ada ka tadhügürü aaga takakardha ku'bu a'da asa aaga tagussu fiinü ma töyeene.

<sup>33</sup> A kadu tagalinggo aaga, keela aaga ka naguru töccö asa aaga ta unggodho nja kadu tanno agalinggo adene nggeege no.

<sup>34</sup> Kosso aaga ka dhügürü nja kadu ma pabusu, ana eema tiya ada ka'dugadene ya kakidhi aaga oona ku'bu a dhodho kudumma ada ka tessu a'da eema unggngo ada adhabbu ara taneene ta'billi.

<sup>35</sup> Aaga fa tariba kudumma eene kara tö'dö a talinggae kadhabbu.

<sup>36</sup> Aaga idhi oona ku'bu amang kada talingga linggo na Masala aaga taluna timi'di tumma noono.

<sup>37</sup> Sorne iki, "Kudumma iini kete kungngo ara tö'dö areere, taalo ara tadoono ku'bu.

<sup>38</sup> Ömö'dö ya a'diila ka eedi ya tefe ka 'dö a tamma.

A kini kara tapadaga oona keere afe'de ya,

taalo a'a nara tamma kini."

<sup>39</sup> Taalo angnga ka kadu na padaga oona keere kaaya no, lakiini kadu na amma koolonadene no.

## 11

### *Tamma ka Masala*

<sup>1</sup> Tamma ka Masala a'da ussu a'da nüümö yaaja tïndhïgi ya, angnga tamma ka nüümö tiya aja ka titalo kijöögö ya.

<sup>2</sup> Tamma na kadu ma 'billi ka anangnga Masala ka tamma kene.

<sup>3</sup> A tamma kussu angnga a'da Masala marü'bü 'büdhülü a tumma, manangnga nüümö ya ijidene ka titalo ijidene.

<sup>4</sup> A tamma Habiil ümmünü eyi yiini a Masala kada nüümö ma tïrrä i tagii'bi tïrrä na Kayiin, a Masala tamma kini a tamma a'da ya insili oono ka tamma ka nüümö ma tïrrä tiya iini, aleefe teema a tamma a'da eyi.

<sup>5</sup> A tamma Masala ma'diniga Akanuk kono ka 'dotombo'do a'da taalo jji inde, taalo ömö'di ma taluna i'i kudumma Masala ka ta'diniga i'i kono ka 'dotombo'do. Kini ka tûfûru co 'dotombo'do ya, iki sorne a'da Masala mamma kini.

<sup>6</sup> Lakiini üürü taalo tamma ma Masala, taalo Masala mara tamma ka ömö'di tiya taalo amma kono a'da oogo ma tefe ka 'dî mamana eema a kadu tanno asaasa oogo dhorro no.

<sup>7</sup> Tamma eege kungngo kanangnga Nööh ka taföönyö tumma na Masala ma eema tiya unggunu tö'dö ya a'da taalo ijöögö, a ri'ba tümmü atarü'bü mürkabü ma toolona kadu ma 'dî tiya iini. A tamma tanno iini agümmünü kadu ma 'büdhülü akarna ka ta'diila tanno ö'dö a tamma no.

<sup>8</sup> A tamma ka anangnga Abrahiim ka föönyö tümmüneene na Masala, unggene aco anya tammo Masala ka tiki iini akarna kide mo, ö'dö kürö ndama iini unggenee taalo ussu kita iini kara co ya.

<sup>9</sup> Tamma ka anangnga i'i ka tanna ka 'büdhülü tiya Masala ka tiki iini akarna kide ya, afa tajeene adaganna ka angga nja Ishak nja Yaguub, eege no osso ka tumma tanno unggodho ya.

<sup>10</sup> Kudumma iini ka takindhïgi anya ma kadesa ma Masala ka tarü'böönö ma takindianaango mo.

<sup>11</sup> Tamma eege kungngo ka anangnga Abrahiim kanda inggiyö a Sara ka eyi tiya oono ma mele, anangnga i'i kada pupa, kudumma iini ka tümmü i'i ka'diila ada im'i'di tumma.

<sup>12</sup> Madageene ka ömö'di unggodho anda kete ka teyi, kadaada kadhabbu ököje

nja midigi ma 'dotombo'do ököje nja ndamugu ma tinggini ma to.

<sup>13</sup> Kadu no in'dili kaaya ka tamma tanno eene a'da taalo kaduna nüümö ya Masala ka tadirina eene ya, lakiini kijöögö ndama ku'b'ba kamma kide kussu a'da eege ka kajeene ka 'büdhülü.

<sup>14</sup> A kadu na eema tumma no, kussu adene tumma neene a'da eege kawwa anya ma eyi tiya eene.

<sup>15</sup> Kene kara tagiigii 'buugu yeene ka öö'dö kürö ndama iini ya, kara taduna fiinä ma tafada.

<sup>16</sup> Lakiini eege 'bitüngngö kawwa anya ma 'diila mo ka 'dotombo'do, yungngo a Masala taalo mara tana modolo ma ta Masala tammo eene kudumma oono mungngo mindinaana anya eene.

<sup>17</sup> A tamma kafa ka Abrahiim ümmünü 'bii'bala yiini ya unggodho ya Ishak ka tatendhe ma tïrrä ka Masala ka asaasa tussu eedi yiini. Abrahiim ümmünü i'i a Masala a'da i'i yungngo Masala ka tirina tumma tam'i'daana iini.

<sup>18</sup> Yungngo iini katiki iini, "Ara kadaada tanna küdü kadhabbu ana Ishak."

<sup>19</sup> Abrahiim iki kide a'da Masala ma ambaanya tiji kadu ka inde, afeene afa Abrahiim afada a 'bii'bala tiya iini ka inde.

<sup>20</sup> Tamma ka anangnga Ishak ka anangnga baraka a Yaguub nja Iiso ma eema tiya ara tö'dö ka'diila ya.

<sup>21</sup> Tamma ka anangnga Yaguub ka anangnga baraka a laala tiya Yüüsif kini ka ndakete ka teyi, üürü kidha ma Masala amang kini ka anangnga oona ka kuufi ma tino tiya iini.

<sup>22</sup> Tamma ka anangnga Yüüsif ka tirina eema ma laala tiya Israyil, kini ka ndakete ka teyi ma tö'dö kürö tanno eene ndama Misiriadirina kita eene kara co tatü'bü i'i kide ya.

<sup>23</sup> Tamma eege kungngo ka anangnga pupa ya Müüsa nja nüümö tammo iini kini ka tageenedene, kaküdhü i'i a nagatereene kiidoona, kudumma eene kiji 'bii'bala ka'diila kitaaal kari'ba a tumma tanno uugaara ma Misiri.

<sup>24</sup> Tamma ka anangnga Müüsa kini ka ndasere aanu kada 'bii'bala tiya 'badaada tammo Faröön.

<sup>25</sup> Amma ka tosse ka dhügürü nja kadu tanno Masala, anu ka eema ma tanangnga i'i ka tüüni tam'baga ya.

<sup>26</sup> Amma ka tamidhidene ma Almasiiji ara kaanu ka almaala ma Misiri ya tïndhï

ya, kudumma iini ka tussu a'da ara i'i sa kaduna talingnge.

<sup>27</sup> A tamma akunggeene Müüsa ka Misiri a'da taalo ari'ba a tagoroo'bo ma uugaara ma Misiri, i'i ya idhi oona ku'bu kudumma iini kiji ömö'dii ya taalo ijidene ya.

<sup>28</sup> A tamma agalinggo adene Taanyara ma tada'a da ka eriidö tiya asanjanja ku'bu ya, ii'dii tadhingga ma inde tümmü laala ma Israyil ya dhidha ka oona.

<sup>29</sup> A tamma kungngo laala ma Israyil ka tada'a to ma Dhöyö mo afa moono ka rume kungngo, yungngo a kadu ma Misiri kasaasa tada'a ka'duuru 'biidü.

<sup>30</sup> A tamma ka anangnga ndhiidö ma Ariha ka tarüdü, a kadu ma Israyil ka tagu'daana oogo ko'do a füngngö iidümmü afünü eera.

<sup>31</sup> A tamma ka konjoko Rihab ma madatemelö mo taalo magiididene nja kadu tanno oroko na taalo kaföönyö eema no, kudumma oono ka tafa ka kadu ma ünggü ma Israyil.

<sup>32</sup> Ara a'a tiki nya afe'de? Taalo fiini eede ma tadirina tumma ma Jadaon nja Barak nja Samüsün nja Yaftah nja Dawud nja Samwiil nja nagane'bi.

<sup>33</sup> A tamma neene kagii'bi kageema koro'bo nja kadu ma naanya, kadagii'bi eege, kadagalinggo ta'diila, kaduna niimö ya Masala ka tiki ya, keere ka naniinö ma agaamu.

<sup>34</sup> Kadadühüü nagonggo'do ma issi, katulu'bi ka tagirinadene a kulu'ba, kadagii'bi tagi'di neene, kana türü ka koro'bo kadagii'bi nasigira ma nadiidi neene.

<sup>35</sup> A tamma ka anangnga iiya ka'duga kadu neene na aaya no katafiki'dö, anno takapusu adene kanu ka tamma ka tonjokodene amang kene taluna tafiki'dö na 'diila no.

<sup>36</sup> A könö tabbü adene kadagüünö midhi ku'bu ana eene nja könö afe'de timi'didene a nagili nja tanna ka pabuuus.

<sup>37</sup> Eege ka tadiidiridene a niigisi, kadhagaana eege ku'bu teera, kagirina eege a magulu'ba, kunggeene ana orogo ma kidheefele ka oona nja orogo ma ki'biini ka oona, küünö ada eege ku'bu, küünö tatoroko ana eege, küünö midhi ku'bu ana eege.

<sup>38</sup> 'Büdhüü 'do taalo yeene kalööle ka dhüüle nja na'dikinya nja kubumba nja kijeene ma 'büdhüü.

<sup>39</sup> Kadu no in'dili kagamma kene kudumma ma tamma tanno eene, lakiini taalo könö ana kene ka'duga niimö ya adirinja eene ya.

<sup>40</sup> Kudumma Masala ka tindinaana niimö ya a'diila angnga adagii'bi yeene, masaasa a'da kafa tunggeene unggodho eege illi nja angnga.

## 12

### Masala malaana laala yoono

<sup>1</sup> Nggeege kaku'du talüögü angnga ka oona ma kadu tanno adinö kide no, angnga tadhifi eema ya indhi ya toroko nye'd'de ya amma'da kaja ka oona ya, fa kaja angnga tagiisö a tidhi oona ku'bu ya dhonggoro kaja kidha ya.

<sup>2</sup> Kada kigigi iye ka Yasu, i'i ya Uugaara ma tamma tiya aja tatüimö tamma naaja ya, akambaanya tümmöönö ma salii'bi ya taalo modolo magu i'i, kudumma dhodho tanno indhigü i'i no, ikirri ka temmi ka nissö ma kuri tanno kööyö tiya Masala.

<sup>3</sup> Aaga agügi ka ömö'dii tiya adhügürü adakidhi oona ku'bu ma eema tiya kadu tanno oroko no ka takirimi i'i ya, ii'dii aaga tanggaaga tagi'di kide keere, aaga taadha.

<sup>4</sup> Ka ta'beene tanno ada ma tanu ka tam'baga, taalo aaga kala 'buugu ma tuuru eriidö co.

<sup>5</sup> Küürü aaga ma tumma tafünögü ko'do tanno Masala ka tagadünögü aaga kada laala no,

"Fa tamidhi talaana na Uugaara, 'bii'bala eede,

o'o tafa tagi'di kini ka teela o'o.

<sup>6</sup> Kudumma ömö'dii tiya Uugaara ka asaasa i'i ya, malaana i'i,

mabbü ömö'di yoono ka asaasa ya."

<sup>7</sup> Aaga ümmünaana oona ka talaana kudumma ma linggo anangnga aaga kada laala tiya oono. 'Bii'bala inggide a pupa tiya iini ka titalo alaana i'i?

<sup>8</sup> Üürü aaga taalo kalaadene nye'd'de kada laala tiya oono ya, nggeege aaga ka laala ma nyoro.

<sup>9</sup> Üürü kafaafa ma angnga kalaana angnga, angnga tari'ba angnga taföönyö tumma neene, taalo angnga taföönyö tumma na Pupa tiya aja ka nagorongore adha, amang kaja taduna tefe ka 'di?

<sup>10</sup> Kafaafa ma angnga kakalaana angnga a naguuru kadhilli a tussu kide tanno eene, lakiini Masala malaana angnga ma ta'diila ma eyi tiya aja amang kaja tosso ka tinsili tanno oono.

<sup>11</sup> Aja ka taleefe a talaadene ya, angnga tagoroo'bo taalo dhodho, lakiini keere kungngo a kadu na kalaadene no saga taduna talingnge ma ta'diila miini.

<sup>12</sup> Nggeege aaga 'diniği iisine naada na ki'di no coo'do, aaga tafa ka uune tanno ada na 'deedene no ka kidhö.

<sup>13</sup> Aaga unggenee ka fiin'i ya dhidho ya, ii'di ömö'di ya sogo'do ya taser'de lakiini a'diila.

### Aaga fa tanu ka Masala

<sup>14</sup> Aaga kardha ku'bu aaga ta'diila nja kadu nye'de, aaga taneene taneene na insili no, kudumma ömö'di tiya anu ka tinsili ya, taalo ara tiji Uugaara.

<sup>15</sup> Aaga adinö ko'do anggaaga ömö'di tüüni ada eyi yiini ku'bu afada ka türü ma Masala, aaga fa tafeene nja tiya taalo a'diiri, ya aga'da taneene anangnga kadu ka toroko nye'de.

<sup>16</sup> A ömö'dii öccö ana kada tafa tatemelö afa taa'baga afa Iiso ya adanege ana baraka ma 'bii'bala tiya dhidhdha ya a kuri unggodho.

<sup>17</sup> Kussu aaga afe'de a'da kini ka asasa ta'duga baraka ya pupa tiya iini, i'i taalo aduna fiin'i ma taadha ka tatoroko a'da i'i agasasa baraka a fara ka iifye.

<sup>18</sup> Taalo aaga kakete ka 'dikinya ma Siina, aaga tümmü oogo ka oona ana issi ka finne ana ndüüli nja tadhüigö nja tanya tiya iisö dhindho no,

<sup>19</sup> fara ma tiniidö a tumma ma kadu tanno toodo kide no, kitaalo kasaasa taföönöy tumma afe'de.

<sup>20</sup> Lakiini kudumma eene taalo ka kam-baanya eema ya adirinja eene ya, "Salla niimö ma eriidö saga taadaanya ka oona mara tiriidene meyi."

<sup>21</sup> Eema ya ijidene ya ari'ba 'do salsa Müüsä ka eyi tiya iini iki, "Kagu ri'ba a'a na 'deedene ka oona."

<sup>22</sup> Lakiini kakete aaga ka 'dikinya ma Sahyyün, ka anya ma Masala ma efe ka 'di mo Örsaliim ma 'dotombo'do, nja kadhangga kö'dö aaga na alif kadhabbu aaga tüüni taanyara.

<sup>23</sup> Co kaniisa ma kadu tanno ageenedene ka dhidha no, nagareene tanno eene ka takiridene ka 'dotombo'do no. Kö'dö aaga ka Masala ma tahükümü kadu nye'de no, ka nagonongore ma kadu tanno a'diila no na tüümö nye'de no.

<sup>24</sup> Ka Yasu ya anna ka söödö ma timi'di tumma ma 'bitingngö no, eriidö ya asanjanja ku'bu ya agii'bi eriidö ya Habiil ya.

<sup>25</sup> Aaga adinö ko'do kudumma ada kara tanggaaga tanu ka ömö'di tiya eema a tumma ma Masala ka 'büdhülü. Üür tümmü Masala neene.

keere ka tumma ma ömö'di tiya eema ndama 'dotombo'do ya?

<sup>26</sup> I'i yungngö a tumma tanno oono ka tagi'di 'büdhülü konna ka uuru tanno miini no, lakiini 'bitingngö akageema nja angnga iki, "Ara a'a tagi'di 'dotombo'do konna taalo 'büdhülü unggodho i'i afe'de."

<sup>27</sup> Tatiraana niini a'da, "Ta unggodho afe'de," nuussudene a'da eema ya arü'bü adene ya ara tatänggi'di itaalo, ara ya taalo tatänggi'di ya a tüü.

<sup>28</sup> Nggeege angnga tamana ta'diila a Masala kudumma aja ka taduna tauugaara na taalo ka 'digi'di ajeene ka oona no, kada amana ta'diila angnga tagamma ka Masala a ri'ba a tinsili ma eedi na Masala ka tamma kide no.

<sup>29</sup> Kudumma "Masala tammo aja oogo ma issi tanno afinne eema."

## 13

### Talaana na eere no

<sup>1</sup> Aaga tasaasa ajeene ma tanagöre.

<sup>2</sup> Aaga fa tüürü ma kajeene, nggeege kadu könö kagüüni tatafala a kadhangga a'da taalo kussu.

<sup>3</sup> Aaga küügi tumma a kadu tanno ka pabuusu no, afa maada ka tanna ka pabuusu nya eene kungngö, aaga tagiigüi kadu na pusudene no afa maada ka tapusu adene ka tuu'da kungngö.

<sup>4</sup> Fa ka kadu nye'de kümmü tarana dhorro kafa kide, a 'buugu ma fungngö ma tanyuri tinsili, kudumma Masala mara saga tapusu kadu na oroko no nja katemelö.

<sup>5</sup> Aaga fa tasaasa almaala kada niimö tiya agu'daana ya, aaga tamma ka tiya unggö kada ya, kudumma Masala ka tiki, "Taalo a'a ara tüürü ma o'o nitaalo nara tafa küdü."

<sup>6</sup> İkiri angnga kara tagamma, angnga takiki,

"Uugaara mafa kede taalo a'a nara tari'ba, ara ömö'di tüüni minna ana a'a?"

<sup>7</sup> Aaga küügi katalaana naada na tüngü tumma ma Masala aaga no, aaga iiri egee kaganeene nya kaaya nya aaga kinyi tüümü Masala neene.

<sup>8</sup> Yasu Almasiili i'i ya miini ka ooso ana uuru tanno nja ta'billi.

<sup>9</sup> Aaga fa to'd'o ka tatoroko keere ma talaana tanno eefe kada tonggoonyo, ara ta'diila adha ada kara takidhö ka nanggeedi a türü, taalo kuri ma tamasaladene ya taalo tö'dö keere a niimö a kadu tanno akuri no.

<sup>10</sup> Misii ma türri mungngo aja taalo ama ma ka'boge tanno alingga ka fangga kaguri kide.

<sup>11</sup> Kudumma eema ma eriidö ya uugaara ma ka'boge kaco iini ka 'Buugu tiya Insili dhindho ya, kada türri ma eema tiya toroko ya, lakiini tuu'da ma eema ma eriidö ya katinyogo kürö ma 'booro.

<sup>12</sup> Yungngo a Yasu ka teyi kürö ka ïnye maanya, amang kini taagala kadu ka oona ana eriidö tiya iini.

<sup>13</sup> Kico aago kini kürö ka 'booro, angnga tosso ka modolo miini.

<sup>14</sup> Taaloanya ma öreene ka 'büdhülü kide, lakiini angnga kasaasaanya maratö'dö mo.

<sup>15</sup> Kadafünögü eere ya Masala ko'do turi kungngo, a türri ma tafünögü ko'do ana eere ma Yasu ana nanjönö tanno aja.

<sup>16</sup> Aaga fa tüürü ma linggo tanno a'diila no, aaga amünögü njaana ko'do, nggeege afeene nja eema ma türri ya Masala ka tamma kide ya.

<sup>17</sup> Aaga aföönyö tumma na naguugaara tanno ada, aaga tamma ka tumma tanno eene. Kudumma eene ka tinigöögö ma aaga afa ma Masala ka anangnga eema eene. Aaga aföönyö tumma neene amang kene talingga a dhadho, taalo a müürü üürü eegel kalingga a müürü, taalo kara tö'dö keere a niimö.

<sup>18</sup> Aaga fara ka Masala kudumma ungnego. Kussu ungnego tinsili ma nanggeedi tanno iidü, kasaasa ungnego tüünii eema ya a'diila ya turi.

<sup>19</sup> Nasaasa a'a tumma no kada 'do aaga tafara ka Masala, amang ka Masala tapadaga a'a kada kanna areere.

<sup>20</sup> Masala ma ta'diila mafiki'dö ndama inde ana eriidö ma tafidi tumma turi ta'billi, tadasaana ma kidheefele ya dhabbu ya Uugaara yaaja Yasu.

<sup>21</sup> Manangnga aaga kada kadu dhorro, aaga talingga linggo ma eyi tiya oono ka eema nye'd'de ka'diila malinggo kaja, moono ka tamma kide ana eere ma Yasu Almasiihi ya idhindhi ta'billi turi. Amiin.

<sup>22</sup> Nasaasa aaga nagöre eede, a'da aaga tidhi oona ku'bu kudumma waraga tiya eede ya ma tafünögü ko'do, kudumma eede ka tarigiri ada aaga taalo adhonggoro.

<sup>23</sup> Nasaasa aaga aaga tussu a'da örre yaaja Timosaws kapa kini ndama pabusu. A kini ka tö'dö areere ara a'a tö'dö nja eene ma tassa kada.

<sup>24</sup> Aaga öojülü kadu no alaana aaga no nye'd'de nja kadu ma kanisa nye'd'de. Kadu na ka Italiya no köojülü aaga.

<sup>25</sup> Fa ka türü tanno Masala ka neene nja aaga nye'd'de kungngo.

## Waraga ya Yaguub Tafa'da tumma

Yaguub arigiri sorne ya, örre ya Yasu könö i'i ya miini ya aga uugaara ma kaniisa ka Örsaliim. I'i arigiri ada co kadu ma kaniisa tanno agasananja ku'bu ndama Örsaliim kaco anaanya kadhoonyo no.

Tumma na Yaguub ka asaasa ndama sorne tiya, iki a kadu ma kaniisa a'da tamma ka Almasiihi neene asaasa kadu ki-jöögö kadalinggo adene nya taneene neene na a'dila no. Yungno iini ka teema nya eene a'da kindinaana taneene ku'bu, ta'dinigi oona co'o'do, titaalo ma eema, tallogo, temelö, ta'b'badene, ta'digineeme. I'i afe'de eema tumma ma tinsili, tiicolo, tafara ka Masala, tidhi oona ku'bu, nya ta'dara ka taneene ma kadu ma kaniisa.

### Tööjüü

<sup>1</sup> Waraga ö'dö ndama Yaguub ya ömö'di ma linggo ya Masala nya Uugaara Yasu Almasiihi ööjüü siliga ma Israyil na ö'dö kada'baaga kafünü eera no na asananaaja ka na'buugu koona nye'd'de.

### Tamma ka Masala nya tussu eema

<sup>2</sup> Aaga ümmönö ka tadhodho, eege kamiini ada kara ta'dingga ka ta'b'badene ka dhoonyo ya.

<sup>3</sup> Kussu aaga a'da ta'b'baana ma tamma naada kara tanangnga aaga ka tidhi oona ku'bu.

<sup>4</sup> Amang kada tussu a'da tidhi oona ku'bu naada kümmünü aaga ka tino ka linggo tanno dhorro no, amang kada tadhorro ka eema in'dili a nüümö könö tafa ttaalo.

<sup>5</sup> Üürü ömö'di öccö ana kada taalo ussu eema ya, fa kini arangnga Masala manangnga iini, kudumma Masala mamana eema a kadu dhabbu a'da taalo mana hetti.

<sup>6</sup> Lakiini fa kini arangnga a tamma ma eedi dhorro afa taloolo ka eedi, kudumma ömö'di tiya aloolo ka eedi ya afeene nya 'büdü ma to a tanya kara tüüsö iini alumuli ajeene.

<sup>7</sup> Ömö'di ya afiigi nggeege ya tafa tiki kide a'da ara taluna nüümö ka Masala.

<sup>8</sup> Ömö'di ya eedi ka teera kini ya, ara tadhügürü ka eema in'dili kungno.

### Ömö'di ya üüsü ya nya tadhooogo

<sup>9</sup> Fa ka ömö'di tiya iicolo ka eedi ya, adhodho ka tumma Masala ka 'dinigi i'i coo'do.

<sup>10</sup> Kudumma ömö'di ya üüsü ya iicolo ka eedi ya, afeene nya tuli ma ooyo tiya arume ya.

<sup>11</sup> Ndanaaya ka tö'dö ko'do a tagu'daana miini ya, ooyo tatinyogo a tuli miini tasusuli a ta'dila miini titaalo. Ömö'di ya üüsü ya ara tatinyogo nggeege iini ka takürraada ka linggo tanno iini.

### Dhügürü nya ta'b'badene

<sup>12</sup> A'dila nya ömö'di tiya idhi oona ku'bu ya ka uuru ma dhügürü ya, kudumma iini kara tö'dö kürö ka ta'b'badene ya, aduna talingnge ma tefe ka 'di afa ma Masala ka takadirina a kadu tanno asaasa oogo no kungngó.

<sup>13</sup> Ömö'di kara ta'b'badene taalo ömö'di ma tiki a'da, "Masala ma'b'ba a'a." Kudumma Masala taalo ma'b'badene ka tatoroko, mitaalo ma'b'ba ömö'di.

<sup>14</sup> Lakiini ömö'di a'b'badene ma eyi tiya iini kini kara ta'b'badene a tafilli ma tatoroko ma eyi tiya iini.

<sup>15</sup> Aga tafilli kara tagüröönö, keene tatoroko, aga tatoroko kara tinggiridene kadhabbu ya keene inde.

<sup>16</sup> Aaga fa taama nanggeyi naada nagöre eede neede ka asaasa ana eedi dhorro no.

<sup>17</sup> Nüümö ya ananja ömö'di ka'dila nya nüümö tiya adigine ya, ndama ta'doogo, öö'dö ku'bu ndama Pupa ma töyeeene ma 'dotombo'do, taalo tatenggere afa töyeeene ka tino tanno eene.

<sup>18</sup> Oogo mageene angnga ndama eyi tiya oono a tumma ma timin'da amang kaja ta kadu tanno eema tiya ö'deene ka dhidha ya yoono ka tarü'böönö no.

### Aaga toodo kide aaga talingga iini

<sup>19</sup> Amang kada tussu tumma nagöre eede, aaga 'digi tatoodo ka tumma areere, aaga adoono ku'bu ka tumma, aaga tafa tagoroo'bo areere.

<sup>20</sup> Kudumma ömö'di tiya agoroo'bo ya, taalo ara talingga nüümö ya a'dila ya kidha ma Masala.

<sup>21</sup> Aaga aadha ka tumma tanno anyoro no nya eema tiya a toroko ya nye'd'de kungno, aaga ümmünü eyi yaada ka tumma tanno Masala ka anangnga aaga no, na ara tamaanya toolona aaga no.

<sup>22</sup> Lakiini aaga fa töödhü ka tatoodo ka tumma ma Masala a'da taalo aaga kalingngo iini nggeege, ara aaga tüüsini nanggeyi naada.

<sup>23</sup> Ömö'di ya aföönyö tumma assa ka titaalo alingga iini ya, afeene nya ömö'di tiya asala koronggore ma dhugudha tiya iini ka almandara ya kungngó.

<sup>24</sup> Assa ka oona tanno iini unggeene, arooro ka tüürü miini areere taalo ussu a'da ka faanya.

<sup>25</sup> Illi ömö'dii ya adinö ka seriye tiya dhorro ya, seriye ma tahurra alinggo iini turi ya, itaalo aföönyö üürü, lakiini alinggo iini ara baraka tananja iini ka linggo tanno iini ka talinggo no.

<sup>26</sup> Ömö'dii ya iki a'da i'i ya amma ka Masala assa ka titalo ümmü onggo'do miini ya, iisiñi eyi yiini, a tamma niini ta tamma taalo kadho ka fiñi.

<sup>27</sup> Tamma ma Masala na insili na 'diila kidha ma Masala Pupa yaaja no eege kungngo, a'da ömö'dii tafa ka nagüülo njä iiya ma nagüüme ka dhügürü tiya eene, aafa ka oona tanno iini, kudumma eema ma 'büdhülü tiya nyoro ya.

## 2

*Aaga fa tasaasa kadu a'da aaga taanu ka kadu tököön*

<sup>1</sup> Nagöre eede, kamma aaga ka Uugaara tiya aja Yasu Almasiihi ya Uugaara ma tidihindhi ya, aaga fa tasümünaana kadu ku'bu.

<sup>2</sup> Üürü ö'dö ömö'dii ma almaala ka 'buugu ma temmi tiya ada, a dahaba ka ungngi iini ka 'baniisö ana en'di tiya agu'daana ya ka oona, ömö'dii ya tadhoogo ya tö'dö ana en'di tiya arodo ya ka oona ya.

<sup>3</sup> Aaga tasala ömö'dii ma en'di ka'diila ya, aaga tanaana iiye kini, aaga tiki iini, "Emmi kita." Aaga tiki a tiya anyoro ka en'di ya, "Öödhi kaana," nja üdüü ka tiki a'da, "Emmi kede ka uune kita."

<sup>4</sup> Taalo aaga kambanaana kadu ku'bu sa? Aaga tümmü nanggeyi naada ka tanna ka uugaara ma manggeedi tanno nyoro no?

<sup>5</sup> Aaga toodo kide nagöre eede, taalo Masala magesse kadhoogo ka iiye ma kadu ma 'büdhülü amang kene tüüsü a tamma ka Masala kakarna ka tauugaara tanno Masala ka tadirina a kadu tanno asaasa oogo no?

<sup>6</sup> Aaga kadaana kadu na kadhoogo no kalama. Kamada eege kungngo künüü ada aaga ku'bu küküü aaga kamana aaga kidha ma naguugaara, taalo kadu ma almaala eege kamiini?

<sup>7</sup> Taalo eege kungngo keela eere ya a'diila ya ada ka tümmöönö ya?

<sup>8</sup> Üürü kalinggo aaga a tamma ma seriye ma tauugaara afa ma sorne ka tiki a'da, "Asaasa ömö'dii ya akete küdü ya afa müüdü ka asaasa eyi yüüdü kungngo," kungngo a'diila ada ka tüünii nggeege.

<sup>9</sup> Lakiini üürü kasaasa aaga ömö'dii öccö, afa aaga tüünii tatoroko, a seriye tümmü aaga, tümmöönö ma kadu tanno asilli eema no.

<sup>10</sup> Ömö'dii ya alinggo a tamma ma seriye nye'de ya, assa ka taga'da 'dakeyi miini unggodho ya, i'i agüümü tam'baga iini in'dili kungngo.

<sup>11</sup> Kudumma ömö'dii tiya iki a'da, "Fa temelö," iki a'da, "Fa tagirina afe'de." Üürü nagiidi o'o ömö'dii nitaalo natemelö, o'o naga'da seriye.

<sup>12</sup> Aaga eema, aaga talinggo afa kadu no Masala kara tümmü eege ana seriye ma hurra no.

<sup>13</sup> Kudumma Masala taalo mara tana 'bangnga kono kara tümmü kadu no taalo kana 'bangnga no, lakiini 'bangnga mara tii'bini ka tahükümü.

### *Tamma ka Masala nja linggo*

<sup>14</sup> Minna i'i yungngo a 'diila nja ömö'dii nagöre eede, iini kara tiki a'da amma i'i ka Masala asa kitaalo alinggo iini, tamma afa ma tanno miini no kara toolona i'i?

<sup>15</sup> Üürü örre ungngo ada, a en'di ka titalo kini nja inye maada a en'di ka titalo kono a kuri titalo kene.

<sup>16</sup> Tumma naada kara tadirina eene no kara tö'dö a minna eene, "Unggeene a ta'diila aaga co taküdhü oona a ten'di, agu'daana kada ka oona aaga taguri," üürü aaga taalo kanangnga nüümö ma tefe ka 'di eene.

<sup>17</sup> Tamma ma Masala ka fiigi nggeege, üürü taalo linggo kide ara teyi.

<sup>18</sup> Üürü ömö'dii öccö ana kada iki, "Tamma kungngo üüdü a linggo kungngo eede." Nikiri a'a ka tiki iini, "Ala tamma nüüdü a'a ka tafaanya a'da kitaalo linggo, ara a'a kala o'o a'da ara tamma neede tafaanya nja linggo tanno eede."

<sup>19</sup> Namma o'o a'da Masala ma unggodho. A'diila nggeege. A nagana'bu afe'de kamma kono nggeege ka'deedene ka oona.

<sup>20</sup> Ka 'baga, nasaasa o'o tessu a'da ara tamma ta'döngönyö a'da kitaalo linggo kide nya?

<sup>21</sup> Aaga assa ka pupa tiya aja Abrahiim, taalo Masala manangnga i'i ka 'diila ka linggo tanno iini, iini ka a'duga 'bii'bala yiini Ishak ma feedhe i'i ka müsi ma tirri?

<sup>22</sup> Kijöögö aaga tamma niini ka unggene nja linggo tanno iini, a tamma niini tatüümö a linggo.

<sup>23</sup> A tumma na sorne tö'dö dhorro, "Amma Abrahiim ka Masala, a Masala tanangnga ta'diila ka tamma tanno iini," a Abrahiim tana eere a'da teepe ma Masala.

<sup>24</sup> Kijöögö aaga 'ba, ömö'dii ara toolonadene a linggo taalo a tamma tanno iini unggodho eege.

<sup>25</sup> A Rihab madatemelö mo afe'de, taalo Masala manangnga ta'diila oono ka linggo

tanno oono, oono ka tamma ka kadu ma ünggū tanno eera no muuru eege ka tino a fiin̄i tököön?

<sup>26</sup> Afa tuu'da no koronggore ka titalo kide no ka eyi, nggeege tamma ka Masala a'da kitaalo linggo kide ka eyi.

### 3

#### *Tafa ma onggo'do*

<sup>1</sup> Ka nagöre eede, aaga fa ta katalaana kadhabbu, kussu aaga a'da angnga no katalaana no ara angnga tagümmü adene dhabbu.

<sup>2</sup> Lakiini kakorokoro angnga ka nafiiñi kadhabbu, üürü taalo ömö'di adiri tatoroko ka eema tiya iini ka teema ya, i'i ya ömö'di dhorro ambaanya tafa ka oona tanno iini in'dili kungngo.

<sup>3</sup> Aaga iiri naguttu aja kara tanangnga kili eene ka nanüñö amang kene taföönyö eema yaaja, 'buugu yaaja ka asaasa i'i ka co.

<sup>4</sup> Aaga assa ka namürkabü, a tadhabbu tanno eene no nja tanya ka agürü eege a türü no, lakiini ndagee'di inggide idhilli agürünü oogo ka tino a taga sawaaga ka asaasa co ya.

<sup>5</sup> Onggo'do afe'de ma 'baniimö idhilli ka tuu'da, lakiini a'diniga oona coo'do ana eema dhabbu. 'Bandnissi idhilli, lakiini ka nyigo dhüle dhabbu.

<sup>6</sup> Onggo'do oogo mafeene nja issi ma 'büdhüli ma toroko manna kaja ka tuu'da, maga'da oona na ömö'di in'dili kungngo manangnga issi ka tuu'da ma tefe ka 'di nye'de ana issi tanno ö'dö kono ndama Jahanan no.

<sup>7</sup> Ara ömö'di tambaanya tunyu uu'da ma dhüle nye'de nja uyi nja eema tiya ürneeene ya nja kilögö, tumma dhorro kadu kagunyu eege.

<sup>8</sup> Lakiini onggo'do taalo ömö'di ma tambaanya tümmöönö, oogo ma toroko taalo niimö ma tafa kide, ma tigine a tümmü ma inde.

<sup>9</sup> Angnga tafünügü Uugaara Pupa yaaja ko'do iini, ungngo teela kadu iini na Masala ka tarü'bü eege kafeene nja koronggore tiya oono no.

<sup>10</sup> Baraka nja teelaana kicci a kürö ndama niinö tanno unggodho no. Nagöre eede, taalo tumma kama tüünidene.

<sup>11</sup> Ara 'biidü ya insili nja tiya nye'denye'de tüüsö ndama nduguli tanno unggodho no?

<sup>12</sup> Nagöre eede, ara indiyye teene 'dikidiyyö a ki'bim'bi kara teene indiyye? Alla nduguli kara tüüsö 'biidü tiya nye'denye'de nja tiya i'düdii ya.

#### *Tussu eema ma 'dotombo'do*

<sup>13</sup> Mada ana kada ussu eema a'dara, fa kini aala a kadu a taneene tanno iini, a linggo tanno iini ka talinggo no a tiicolo ma eedi nja ta'dara.

<sup>14</sup> Üürü tagu'daana kungngo ada ka nanggeedi nja tallogo ya, aaga fa ta'diniga oona coo'do, aaga tafünü korokoro ka timin'da ka oona.

<sup>15</sup> Tussu eema afa ma tanno miini no, taalo kö'dö ndama fiin̄i ma ndanaaya, lakiini tussu eema ma 'büdhüli ma nakömö'di nja Eblisi.

<sup>16</sup> 'Buugu ya kiriimi nja tallogo ka tanna kide ya, ri'ba kinggide nja tatoroko kad-honyo.

<sup>17</sup> Lakiini tussu eema na ö'dö ndama 'dotombo'do, eege kinsili ka dhidha, tekere ta'dila, tasaasa, tana muuyu nja linggo tanno a'dila no, taalo küsümünaana kadu ku'bu, taalo ka korokoro.

<sup>18</sup> A ta'dila eege ka töyü tammo adini ada ka ta'dila ma kadu tanno üünä ta'dila no.

### 4

#### *Tateefe ma 'büdhüli*

<sup>1</sup> Koro'bo nja ta'digineene kö'dö ndama kiga kanna kada ka söödö? Taalo ndama ti'düdii ma eema tiya ada ka'beene kide kada ka tuu'da ya?

<sup>2</sup> Kasaasa aaga eema, aaga sa kitaalo kara taluna, aaga tisaana ka oona aaga tagirina ajeene, taalo aaga kara taluna, kudumma ada taalo ka arangnga ka Masala.

<sup>3</sup> Üürü karangnga aaga, taalo aaga kara taluna, kudumma ada kasaasa a nanggeedi ka tanyoro aaga talinggo eema ma nanggeyi tanno ada.

<sup>4</sup> Aaga na taalo kadho ka fiin̄i ma Masala no, taalo aaga kussu a'da tasaasa eema ma 'büdhüli a'da tadiidi ma Masala eege kamiini? Ömö'dü ya asaasa eema ma 'büdhüli ya, i'i ya diidi ma Masala.

<sup>5</sup> Kiki aaga kide a'da tumma na sorne ka tumma ün'dügüngö, Koronggore ya Masala ka tuuru kaja ka oona ya asaasa kiriimi?

<sup>6</sup> Lakiini i'i amana türü dhorro, sorne iki a'da, "Masala manu oona koona nja kadu tanno indhigü oona coo'do no, lakiini kadu no iicolo ka nanggeedi no mamana türü eene."

<sup>7</sup> Aaga ümmünü eyi yaada a Masala, aaga keema koro'bo nja Eblisi amang kini tüüsö aaga.

<sup>8</sup> Aaga kete ka Masala amang kono takete kada. Aaga agala iiwine naada, aaga na

oroko no, fa ka eedi tiya üüdü insili, aaga na eera ka eedi no.

<sup>9</sup> Aaga muuyu aaga tafara aaga tiisigi ka oona. Amang ka takijeene tanno ada temet'bele kada fara, a dhodho naada temet'bele ka tagoroob.

<sup>10</sup> Aaga iicolo ka nanggeedi kidha ma Masala amang kono ta'diniga aaga ko'do.

<sup>11</sup> Aaga fa teemaana ka oona a tumma tanno atoroko no, nagöre eede, kudumma ömö'di tiya eema tatoroko ka örre ya, i'i eema tatoroko ana seriye, i'i ya diidi ma seriye.

<sup>12</sup> Ömö'di unggodho i'i yungngo amana seriye a kadu, ömö'di ya ara tümmü kadu unggodho, i'i yungngo a tambaanya toolona kadu aama kadu. O'o na mada nümmü kadu?

### Aaga indhgii Masala

<sup>13</sup> Aaga niki a'da, "Bütüngögö üürü taka ara ungngo co anya tammo, üürü ümmü ungngo tanna kide ürüünü ungngo tanadene ungngo tö'dö keere ana eema dhabbu."

<sup>14</sup> Taalo aaga kussu minna i'i yungngo ara tö'dö taka, tefe ka 'di naada eege kiiye? 'Bütüngögö aaga aföönyö, aaga niki a'da 'bütüngögö alla taka, ara ungngo co anya tammo aja tümmü, ungngo tanna kide a nagürüünü, ungngo talingga tanadene, ungngo tö'dö anaa gürüüsii.

<sup>15</sup> Aaga kama tiki, "Ka niisö ma Masala, angnga tefe ka 'di angnga talingga ya nja tinni."

<sup>16</sup> Lakiini aaga 'bütüngögö ka'diniga aaga oona naada ko'do aaga tamidhi 'buugu, midhi afa ma tammo iini mo matoroko.

<sup>17</sup> Ömö'di ya ussu linggo na 'diila no assa ka taalo alingga ya, i'i üünii tatoroko.

## 5

### Am'ba ka kadu tanno üüsü no

<sup>1</sup> 'Bütüngögö aaga toodo kede aaga na üüsü no, aaga fara aaga tiisigi ka oona ma tatoroko tanno a tö'dö kada ya toroko.

<sup>2</sup> Almaala yaada asürdö, a en'di yaada, alimi oro.

<sup>3</sup> Dahaba yaada nja fudda tiya ada kümmü kü'düü'dü tasüüri euge, kawaana, a laala kadu ka taguri tuu'da naada afa issi. Almaala yaada katawaana koona ku'bu ma naguuru tanno eere no.

<sup>4</sup> Talingnge na kadu tanno agalinggo ka nasigeene tanno ada ka tanyooro no kafara ko'do, a takeere na kadu tanno araana ka siga no, tala iisine na Masala mana türü mo.

<sup>5</sup> Taneene naada ka 'büdhüüli kadigine ana eema tiya a'diila ya nja ta'deema, aaga tindhi afa fiyo ma taradene

<sup>6</sup> Kümmü aaga ömö'di ya a'diila ya, aaga tagiidi i'i a'da taalo agümmöönö ka eyi tiya iini.

### Tidhi oona ku'bu nja tafara ka Masala

<sup>7</sup> Aaga idhi oona ku'bu nagöre eede, aña uuuru ma tö'dö tanno Uugaara ka öö'dö. Aaga iiri taleele idhi oona ku'bu nya indhgii tööyö ma 'büdhüüli ma 'diila mo a tombo'do ma koogoya nja tüyä ka öö'dö.

<sup>8</sup> Aaga idhi oona ku'bu tekere aaga takidhö ka nanggeedi, kudumma tö'dö tanno Uugaara ka ndakete

<sup>9</sup> Aaga fa tisaana ka oona nagöre eede, kudumma Masala kara tanggaaga tümmü aaga, tümmü kadu a'dingnge ka inye.

<sup>10</sup> Nagöre eede, aaga uruna fiini ya naganne'bi keere, eene ka tageema ana eere tiya Uugaara, kadakidhi oona ku'bu, a kadu tagapusu egee.

<sup>11</sup> A'diila nja kadu tanno idhi oona ku'bu no, kaföönyö aaga tumma ma tidhi oona ku'bu na Ayüb, aaga tussu a'da manangna Masala talingga niini nya oogo mana 'bangna mana muuyu.

<sup>12</sup> Keema tiya in'dili ya nagöre eede, aaga fa taküdöönö a 'dotombo'do nja 'büdhüüli alla a nüümö töccö 'do. Aaga afa ka "ii" tiya ada ada ii, aaga fa "Kaw" tiya ada ada kaw, kudumma tatoroko kara tala aaga.

### Tafara ka Masala ma tamma

<sup>13</sup> Ömö'di ungngo ada amüürü? Fa kini afara ka Masala ko'do. Ömö'di ungngo ada oona ka'diila iini? Fa kini afünügü Masala ko'do.

<sup>14</sup> Ömö'di ungngo ada amaara? Fa kini ümmünü kadüüfi ma kaniisa kafara ka Masala nja iini a'bunaana uu'ba iini ka üüdü ana eere ma Uugaara Yasu.

<sup>15</sup> Tafara ka Masala nja tamma ma Masala koolona ömö'di ya amaara ya, a Uugaara ka nangnga i'i ka fiki'dö. Üürü i'i agalinggo tatoroko, Masala mata'duga kini ka oona.

<sup>16</sup> Fa ka ömö'di amma a'da agalinggo i'i tatoroko, aaga tafara ka Masala kudumma tatoroko tanno kijöögö, amang kada taluna toolonadene. Tafara ka Masala tanno a'diila no türü kinggide.

<sup>17</sup> Iliya aaga ömö'di afa ma angnga ka eema nye'de. Adafara ka Masala dhorro amang ka tombo'do tafa tede, assa taalo ede ka 'büdhüüli a nagürüünü kiidoona a nagatereene ka iidümmü kafünü ungodho.

<sup>18</sup> Afada adafara ka Masala afe'de a tombo'do teede, eema ma 'büdhüüli tageeene.

<sup>19</sup> Ka nagöre eede, üürü ömö'dü ungn go  
aama ka fiin'i ma timin'da ya, ömö'dü öccö  
tafada ana i'i.

<sup>20</sup> Amang kada tussu a'da ömö'dü ya  
afada ana ömö'dü ka fiin'i ma taama ya, i'i  
ya oolona ömö'dü ka inde a'duga tam'baga  
kene ka oona kadhabbu.

## Waraga ya Bütrüs ya dhidha ya Tafa'da tumma

Bütrüs ya tafiini ya arigiri waraga ya, ungu co kadu ma kaniisa na anna ka anya tammo ana eere 'bitingngö a'da Türkiye mo. I'i arigiri uu'bu eege ka nanggeedi kudumma eene ka talingga adene kudumma eene ka tümmü tumma na Almasiihi. I'i iki eene a'da Yasu Almasiihi agadhügürü adagapusu adene adaganna ka 'dī tanno iini ka 'büdhülü no, ikirī kadu ma kaniisa ka tussu a'da ara eege tadhügürü. I'i anangnga tündhigü Masala, oono ka tümmü dhügürü yaada, ya amanaga aaga kada kadu tanno oono noono kara tanangnga talingga eene ana baraka dhabbu. Yungno a Bütrüs ka tuu'bu kadu ma kaniisa ka nanggeedi a'da kütü kataneene kada kadu tanno Masala.

### Tööjüli

<sup>1</sup> A'a na Bütrüs tafiini ya Yasu Almasiihi a'a narigiri waraga nunggu co kadu tanno Masala ka tagesse eege no na asananja ku'bu ka Büntüs nja Galatiya nja Kabadökiya nja Asiya nja Basiiniya,

<sup>2</sup> Kadu na Masala tammo Pupa ka tagesse eege no a'da milli ka tagussu ka dhidha manangga eege ka tinsili a Koronggore, amang kene taföönyö tumma na Yasu Almasiihi ka tanggala ana eriidö ka asananja kene ka oona. A Masala tanangnga ta'diila aaga nja türü dhabbu.

### Tündhigü ma tefe ka 'dī

<sup>3</sup> Kadagafünüğü Masala ko'do Pupa ya Uugaara tiya Yasu Almasiihi, anangnga teene na issi no angnga a 'bangnga tammo iini ma dhabbu mo a tefe ka 'dī ma tündhigü a tefe ka 'dī tanno Yasu Almasiihi ndama inde.

<sup>4</sup> Masala manangnga eema aaga ka 'dotombo'do kita iini ka titalo ara tasügüni, taalo ara tasürdö taalo ara taama.

<sup>5</sup> Tammo naada turi no kara tafa kada a türü tanno Masala idhi tö'dö ma toolon-adene tanno andakete kala oona ku'bu ka nagürüünü tanno eere no.

<sup>6</sup> Aaga tadhodhi iini dhorro, a'da kaga-la aaga ka tagoroo'bo adha 'bitingngö a tatoroko kara tümmü aaga ka dhoonyo.

<sup>7</sup> Ya ara ta'b'ba tammo naada afa ma issi ka ta'b'ba dahaba kungno a'da i'i a'gudaana adagii'bı dahaba ya ara titalo ya kungno, ara taluna tafünüğünja ko'do

nja tihindhi nja ta'diila ka uuru tanno a Yasu Almasiihi kara tö'dö kide no.

<sup>8</sup> Kasaasa aaga i'i a'da taalo aaga kiji i'i, aaga tammo kini a'da taalo aaga kiji i'i 'bitingngö, ara aaga tadhodho ka tihindhi taalo aaga tadünnü iini,

<sup>9</sup> ara aaga toolona nanggeyi naada kudumma ada ka tammo ka Masala dhorro.

<sup>10</sup> Kudumma ma toolona tanno nagan'e bi tanno ageema tumma ma türü tanno tagöö'dö kada no, kadagawwa amussu dhorro.

<sup>11</sup> Kaga'b'ba tussu ma uuru ma tö'dö ma türü tanno Koronggore tiya Almasiihi kene ka oona iini ka tiki ka dhidha ma dhügürü tiya Almasiihi kene kaala eege kide iini, ma tihindhi tanno ara tö'dö no.

<sup>12</sup> Agaalanja eene a'da eege taalo kagalinggo ma nanggeyi tanno eene, lakiini kudumma aaga kene ka teema tumma ma eema tiya a kadu tanno agadünüğü tumma ma İnjilli aaga a Koronggore tiya Insili ya agürünüdene ndama 'dotombo'do. Salla kadhangga kasaasa tassa ka eema tiya.

### Aaga aneene ka tinsili

<sup>13</sup> Aaga indinaana nanggüdü naada ku'bu aaga tadinö ko'do aaga tanangnga tündhigü naada ka türü tanno ara tö'dö ka Yasu Almasiihi kara tabbü 'dala.

<sup>14</sup> Aaga föönyö eema ya Masala kada laala tiya oono, aaga tafa tuurna ka tallogo ma tatoroko keere naada ka talingga no a'da kaleefe aaga taga nagaaga.

<sup>15</sup> Lakiini aaga ka kadu tanno insili no ka linggo tanno ada ka talingga no, kudumma Masala tammo agümmüñü aaga mo ma insili.

<sup>16</sup> Sorne ma Masala iki, "Aaga insili kudumma eede ka tinsili."

<sup>17</sup> Aaga kümmünü Masala a'da Pupa a'da oogo mungno mara tümmü kadu, mitaalo mümmöönö ka ömö'di töccö mafa ka tiya mümmü ömö'di a linggo tanno iini, aaga aneene kada kölöge a ta'diila a ri'ba ma Masala.

<sup>18</sup> Aaga tussu a'da oogo moolona aaga ka taneene tanno ada na toroko no, naada ka takarna kide ka kafaafa ma aaga no, taalo ana fudda nja dahaba tiya ara titalo ya.

<sup>19</sup> Lakiini ana eriidö tiya agu'daana ya, eriidö ma dhüngü tiya taalo a sogo'do iideene ya, eriidö ya Almasiihi.

<sup>20</sup> Masala milli ka tagesse i'i a'da aleefe 'büdhülü üfürü tarü'bü adene, i'i abbü 'dala kudumma aaga ka nagürüünü tanno eere no.

<sup>21</sup> I'i yungno anangnga aaga ka tammo ka Masala tammo anangnga i'i ka fiki'dö ka inde manangnga tihindhi

iini, a Masala oogo mungngó manangná tindhgí ma tamma tanno ada.

<sup>22</sup> A 'bitingngó ada ka tagala oona naada a taföönyö eema ma timin'da, aaga tasaasa nagöre naada tasaasa na dhorro no, aaga asasa ajeene tasaasa na insili no ndama eedi ka teene.

<sup>23</sup> Kageenedene aaga teenedene na eera no, taalo ndama tööyö ma titalo, lakiini ndama tööyö ma taalo mara titalo mo, ana tumma na Masala na efe ka 'dii ta'billi no.

<sup>24</sup> Sorne iki a'da,  
"Kadu in'dili kafeene nja ooyo  
a tihindhi neene kafeene nja tuli ma siga.

Ooyo ara tarume  
a tuli tasuli.

<sup>25</sup> A tumma na Masala tüü ta'billi."  
A tumma nüüdi ka tageemaga co aaga no eege kungngó.

## 2

<sup>1</sup> Aaga aadha ka eema ma tam'baga nye'd'de nja ünggü nja korokoro nja kirim'i nja tar'daana eema nye'd'de.

<sup>2</sup> Afa laala ya aleefe tageenedene ya aaga asaasa siiga ma koronggore na insili no amang kada tinggiridene iini ma toolon-adene.

<sup>3</sup> Afa ma Masala ka tiki, kagolo aaga ta'diila na Uugaara kafaanya.

*Misi ma efe ka 'dii nja kadu tanno insili no*

<sup>4</sup> Aaga ödö ka Uugaara, kudumma iini kada misi tammo efe ka 'dii mo ma kadu kaanu kide mo, ya Masala ka tagesse i'i kagu'daana ya.

<sup>5</sup> Aaga afe'de aaga ka nüigisi tanno efe ka 'dii no ma tarü'bünü la ma koronggore ya, aaga ka ka'boge na insili no aaga ara eema ma türri ma koronggore ya Masala ka tamma kide ana eere ma Yasu Almasiiji ya.

<sup>6</sup> Sorne iki,  
"A'a nungngó nara tanangngá misi ma kadesé  
ma agu'daana mo agessedene ka Sahyüün,  
ömö'dii ya amma kide  
taalo ara tana modolo."

<sup>7</sup> I'i agu'daana kada aaga na amma ka Masala no. Lakiini ka kadu tanno taalo kamma no,

"T'i ya misi tammo a katarü'böönö kaanu kide mo  
oogo mungngó ma misi ma kadesé."

<sup>8</sup> "T'i yungngó a misi ma taseene

nja 'dokon'da ma ta'dinggeene ka kadu tanno inseene kide no."

Kudumma eene taalo kamma ka tumma ma Masala, taama neene eege kamiini.

<sup>9</sup> Lakiini aaga na kadu kagessedene no, tauugaara ma ka'boge nja kadu na insili no nja kadu tanno Masala ma teema tumma ma eema tiya oono ya a'diila ya, Masala magümmünü aaga ka 'buugu tiya alüllü ya munggu aaga ka 'buugu tiya öyeene keefe ya.

<sup>10</sup> Ka dhidha taalo aaga ka kadu, lakiini aaga 'bitingngó aaga ka kadu tanno Masala, taalo aaga kagaana 'bangngá ma Masala, lakiini 'bitingngó asa aaga taluna 'bangngá.

### Taneene ma Masala

<sup>11</sup> Nasaasa a'a aaga nagöre eede aaga no kafala nja kölöge ka 'büdhüli tiya, aaga aadha ka eema ma tallogo ma tuu'da ma tamö'dii kudumma iini ka teema koro'bo nja koronggore.

<sup>12</sup> Aaga fa ka taneene tanno ada ka kadu ma ajeene ka söödö ka'diila salla sa katiki a'da aaga ka oroko ya, kiji linggo naada na 'diila no kamana tihindhi a Masala ka uuro moono kara tö'dö tassa kaja.

### Aaga föönyö eema ma naguugaara

<sup>13</sup> Aaga föönyö tumma na naguugaara ka üüdü ma Masala, ka uugaara ma anya kudumma iini i'i yungngó adhabbu ma kadu ka anya 'do,

<sup>14</sup> aaga föönyö tumma na naguugaara kudumma Masala ka kürünü eege a'da köö'dö tümmü kadu kara ka tafünügü kadu na a'diila no ko'do.

<sup>15</sup> Tumma na Masala a'da aaga tüüni, eema ya a'diila, nggege aaga tanangngá kadu tanno nagaaga na taalo ka'dara no kak'i'döönö.

<sup>16</sup> Aaga aneene ma nanggeyi tanno ada, lakiini aaga fa ta'duga taneene no miini no, aaga talingga eema ya toroko ya, aaga taküdhü kide, lakiini aaga aneene kada kasaga tanno Masala.

<sup>17</sup> Aaga asaasa kadu in'dili kungngó aaga asaasa nagöre naada in'dili aaga ümmü Masala ana eedi aaga aföönyö eema ya uugaara.

<sup>18</sup> Aaga na kasaga no, aaga föönyö tumma na kadu tanno ada ka tagalinggo ada eene no, aaga tariba eene salla kasa ka'diila, üürü ka oroko.

<sup>19</sup> Ara Masala sa kanangngá baraka aaga kide kada kara tidhi oona ku'bu ka dhügürü nja tüüninja ku'bu, kudumma ada ka tussu a'da fiini ya Masala ya miini.

<sup>20</sup> Kümmü aaga minna ka tatoroko tanno ada, aaga tidhi oona ku'bu kide ma dhügürü tiya, lakiini kada kara tüni nüümö ya a'diila ya, aaga tidhi oona ku'bu ka dhügürü, ara aaga taluna türü ka Masala.

<sup>21</sup> Nggege ya Masala ka tagümmünü aaga, Almasihi agadhügürü ka üdü ma aaga, aafa kada ka fiin amang kada tunggeene kide.

<sup>22</sup> "Taalo agüün i tatoroko  
a nüön niini taalo ka korokoro."

<sup>23</sup> Taalo a'diinö ka kadu kateela i'i, adhügürü taalo iki a'da ara i'i ta'diinö kómüstü, lakiini ümmünü eyi yiini a ömö'di tiya taalo üni ada kadu ku'bu ya.

<sup>24</sup> I'i a'duga tatoroko naaja ka tuu'da tanno iini ka salii'bi amang kaja takaaya ka tatoroko anangnga ta keefe ka 'di kudumma ma timin'da. Nüümö yiini ya in'di ya, anangnga aaga ka aleme ka oona.

<sup>25</sup> Kudumma ada ka kidheefele tanno agaama no, lakiini kafada aaga co ka tadasaana tiya ada ya afa ka nanggeyi tanno ada ya.

### 3

#### *Iiya nja naganyori*

<sup>1</sup> Aaga na iiya no afe'de, aaga aföönyö tumma ma naganyori tanno ada sala könö ana kene taalo tamma ma Masala eene ka nanggeedi ara taneene naada na 'diila no tö'dö ana egee a'da taalo aaga kalneege nya eene.

<sup>2</sup> Kene kara tiji taneene ma tümmü tumma ma Masala, aaga taneene ka tinsili ka nanggeedi.

<sup>3</sup> Aaga fa tindinaana oona ndama kürö, tar'daana ma awu nya tümmü dahaba nya en'di tiya ada ka tümmönö ka oona ya.

<sup>4</sup> Lakiini ta'diila naada kara tama eedi ka teene kanna kita kündhü kita a ta'diila ma koronggore, taalo ara taga'dadene, agu'daana faana miini ka Masala ka oona.

<sup>5</sup> Iiya ma 'billi na insili no afe'de kümmü nanggeyi neene a Masala kindinaana oona ka'diila kaföönyö eema ya naganyori tanno eene.

<sup>6</sup> Afa Sara ka taföönyö eema ya Abrahiim mümmünü i'i a'da uugaara yoono, aaga 'bitingngö aaga ka laala tiya oono kada kara tindinaana oona ku'bu ta'diila a'da taalo aaga kari'ba a nüümö.

<sup>7</sup> Aaga na kadu tanno nagiide no, aaga aneene nya iiya tanno ada aaga tussu a'da aka ma ki'di, taalo mafeene nya aaga, aaga afa kene dhorro aaga tussu a'da egee koso ka eema tiya Masala kara tanangnga aaga ma tefe ka 'di ya, aaga üün nggege a

nüümö könö tafa taga'da tafara ka Masala naada.

*Dhügürü ma linggo tanno a'diila no*

<sup>8</sup> Nüümö ya öreene keere ya, a'da aaga in'dili ta unggodho ka tumma 'bangnga ma tanagöre nya muuyu nya tiicolo ka eedi.

<sup>9</sup> Aaga fa ta'diinö ka ömö'di kara tatoroko nya aaga, ömö'di ka teela aaga, aaga fa ta'diinö tekere, aaga agala ka'bana ko'do nya iini, lakiini aaga amana baraka eene amang kada taluna baraka ya Masala ka tagümmünü aaga iini ya.

<sup>10</sup> Kudumma sorne ka tiki,

"Ömö'di ya asasa tefe ka 'di ya,

a nagüürüünü ka 'diila ya,  
ümmü onggo'do miini nya nüön

ka tumma tanno atoroko no nya korokoro.

<sup>11</sup> Afa takete ka nüümö tiya toroko ya,  
lakiini üün eema ya a'diila ya,  
asaasa taneene na 'diila no isi kini  
keere.

<sup>12</sup> Kudumma iifye tiya Uugaara iji kadu na  
insili no  
a neeso noono ka toodo ka fara tiya  
eene,

lakiini dhugudha yoono anu ka kadu tanno  
üün eema ya toroko ya."

<sup>13</sup> A mada i'i yungngo ara tili aaga ka  
oona a'da kasi aaga ka linggo tanno a'diila  
no keere.

<sup>14</sup> Üürü aaga kadhügürü kudumma fiini  
ya timin'da ya, a'diila nya aaga, aaga afa  
tari'ba a ömö'di, aaga tafa ta'deedene ka  
oona.

<sup>15</sup> Aaga afa ka Almasihi anna kada ka  
nanggeedi aaga tümmü i'i kada Uugaara,  
aaga tindinaana oona ku'bu ma tapadaga  
tumma ömö'di tiya ara tasaasa kada a'da  
aaga tala tindhgü ma Masala na kada no  
iini a ri'ba a tiicolo ka eedi.

<sup>16</sup> Aaga linggo nggege a nanggeedi ka  
tiicolo a ta'diila miini, aaga tafa ka ta'diila  
ma nanggeedi tanno ada, salsa a kadu  
saga tüni ada tatoroko ana aaga ya, ara  
taneene naada ka Almasihi ara tanangnga  
modolo kagu egee ka tumma tanno eene ka  
teema no.

<sup>17</sup> A'diila ada kadhügürü a'da küün  
aaga eema ya a'diila ya, kini kara tasaasa  
ma eedi na Masala egee kamiini a'da  
aaga tadhügürü a'da küün aaga eema ya  
toroko ya.

<sup>18</sup> Almasihi ka eyi tiya iini eyi ta unggodho  
ka üdü ma tatoroko tanno aja. I'i  
taalo agüün i tatoroko eyi a'da a'diila ka  
üdü ma kadu tanno oroko no, amang kini  
tasigi aaga ka Masala kete. Eyi ka tuu'da,  
lakiini Masala manangnga i'i keefe ka 'di  
ka koronggore.

<sup>19</sup> İkiri ka tunggeene a koronggore tiya iini aco tadünüğü eema co nagoronggore tanno ka pabuusu no,

<sup>20</sup> na aanu ka tumma tanno Masala 'billi no a'da makidhi Masala oona ku'bu ka ürüünü tiya Nööh ka uuru tanno Nööh ka tarü'bü mürkabü no, a kadu toolonadene ka 'biidi iini, kidhilli kadu ka iidümmü kafünü iidoona.

<sup>21</sup> I'i yungngo agalaala angnga ka fiinii ma tambeese tanno oolona aaga 'bitingngö no, taalo ka tagala nyoro ma tuu'da, lakiini ma timi'di tumma ana eedi ka tinsili nya Masala a tafiki'dö tanno Yasu Almasiihi.

<sup>22</sup> I'i ya asirigö co 'dotombo'do emmi ka Masala ka niisö ma kuri a kadhangga taföonyö eema yiini nya türü ma eema ma 'dotombo'do nya naguugaara miini.

## 4

### Taneene a Masala

<sup>1</sup> Üürü Almasiihi agadhügürü a tuu'da tanno iini, aaga tekere aaga kardha ku'bu ka fiinii tiya miini ya nggeege, kudumma ömö'di tiya adhügürü a tuu'da ya aadha ka linggo ma eema ma tam'baga.

<sup>2</sup> Aneene ma türeene ma nagürüünü tanno iini ka linggo a tamma ma eedi tanno Masala taalo a tallogo ma ta ömö'di.

<sup>3</sup> Asa aaga tüüsü ka linggo ma eema 'billi ka kadu ma 'büdhülü, temelö nya tallogo, nya tooye ma ngeeli nya eema ma weerö nya tumma ma eema ma namasala tanno atoroko no ma Masala kaanu kide ya.

<sup>4</sup> A kadu ma namasala ma 'büdhülü tadhere, kudumma ada taalo kalinggo tam'baga na miini no, kikiri ka teela aaga.

<sup>5</sup> Lakiini egee kassa ka tümmünü eyi yeene a Masala mara tümmü kadu na adinö no nya tanno aaya no.

<sup>6</sup> Yungngo a tumma tanno Masala kaala kadu na aaya no afe'de, amang kene tahükümüdene afa kadu no kanna ka tuu'da, kefe ka 'di ka koronggore afa ma Masala kungeno.

<sup>7</sup> A 'bitingngö asa 'buugu ndakete ma eema nye'de de kara tittaalo, aaga kardha ku'bu aaga tadinö ko'do ma tafara ka Masala.

<sup>8</sup> Aaga asaasa ajeene dhorro kudumma tasaasa ka taküdhü eema ma tatoroko adhabbu.

<sup>9</sup> Aaga amma ka kafala a'da kitaalo tagoroo'bo kide.

<sup>10</sup> Ömö'di ya Masala ka anangnga türü kadhoonyo ma linggo töccö iini ya, fa kini alinggo eema ya a'diila ya nya kadu könö.

<sup>11</sup> Ka ömö'di kara tasaasa teema, eema tumma ma Masala. Ömö'di kara tasaasa

talinggo, alingga niimö ya Masala ka tümmünü iini ya. Fa ka tidhindhi nya türü kada tanno Masala türü ta'billi. Amiin.

### Tidhi oona ku'bu ka dhügürü

<sup>12</sup> Kateefe ma a'a, aaga fa tadhere ka eema tiya öö'dö kada agu'du aaga afa issi ya ma tasaasa türi aaga ka nanggeedi afa niimö ya öö'dö kada keefe ya.

<sup>13</sup> Aaga tadhadho kudumma aaga ka tosse ka dhügürü nya Almasiihi, amang ka kada tiji tidhindhi nya aaga tadhadho.

<sup>14</sup> A'diila nya aaga a kadu kara teela aaga kudumma eere tiya Almasiihi kudumma Koronggore ma tindhigi nya Koronggore ma Masala ara tanna kada ka oona.

<sup>15</sup> Üürü o'o nadhügürü ya taalo afa müüdü ka kiidi ömö'di alla kanyoro alla ta'dinggö ka eema ün'dügüngngö.

<sup>16</sup> Lakiini kini kara tadhügürü kudumma iini kada Masiihi ya, tafa tana modolo, fa kini afünügü Masala ko'do ana eere tiya miini ya.

<sup>17</sup> Asa uuru ma Masala kara tümmü kadu kandö'dö, üürü oogo mara tümmü kadu noono ka dhidha 'dee, ara tafaanya nya kadu tanno taalo kasaasa tumma na Masala no.

<sup>18</sup> Sorne iki,  
"Üürü kadu no 'diila koolonadene a dhügürü 'dee,  
ara tafaanya nya ömö'di tiya üünii tam'baga anu ka Masala ya?"

<sup>19</sup> Kadu na Masala ka anangnga egee ka dhügürü, fa kene kalinggo eema ya a'diila ya kümmünü nanggeyi neene a Masala tammo dhorro mo.

## 5

### Kadiifi nya kadimöögö

<sup>1</sup> A kadiifi naada ka söödö no, neema a'a nya eene kada tüfi afa egee ya adinö ka dhügürü tiya Almasiihi, ömö'di ya ara tosse ka tidhindhi tanno ara tö'dö no.

<sup>2</sup> Aaga kuri a ki'biini tanno Masala naada kaafa kene no ndama eyi tiya ada taalo aaga ka'bununja kide afa ma Masala ka asaasa aaga kadalingga kungno taalo ma tallogo ma gürüüsü, lakiini tasaasa linggo.

<sup>3</sup> Aaga fa tüümii ada kadu naada kafa kene no ku'bu. Lakiini aaga alaala egee ka fiinii tiya a'diila ya.

<sup>4</sup> Ka uuru ma Uugaara ma katasaana kara tö'dö, ara aaga ta'duga talingga ma ndalembö ma tidhindhi, ya taalo ara toorodo ya.

<sup>5</sup> Aaga na kadimöögö no afe'de, aaga aföönyö tumma na kadiifi, aaga kirnë en'di ma tiicolo ka nanggeedi ada ka oona ma tasaasa ajeene dhidha kudumma,

"Masala taalo masaasa kadu na 'dinigi  
oona coo'do no,  
lakiini masaasa kadu na iicolo no."

<sup>6</sup> Aaga iicolo ka nanggeedi ka nüüsö ma  
Masala tammo ana türü mo ara tamünügү  
aaga ko'do ka uuru tanno oono.

<sup>7</sup> Aaga 'duga eema yaada in'dili aaga  
tapügү kini ko'do amang kini tafa kada.

<sup>8</sup> Aaga adinö ko'do aaga tafa tarigide  
kudumma diidi ma aaga Ebliisi unggunaana  
ku'bu afa tagaamu mafara mawwa  
niimö moono ka tatamü.

<sup>9</sup> Aaga idhi oona ku'bu ka tamma ma  
Masala tanno ada aaga eema koro'bo nja  
iini aaga tessu a'da nagöre naada ka  
'buugu ka oona nye'd'de kadhägürü ma  
eema tiya.

<sup>10</sup> Masala ma türü nye'd'de Masala  
magümmünü aaga ka tidhindhi ta'billi ka  
Yasu Almasiihi, i'i yungno anangnga aaga  
kada kadu dhorro ada ka tadhägürü idhilli  
mümmü aaga ku'bu manangnga türü ada  
ka oona manangnga aaga ka takidhö.

<sup>11</sup> Türü kungngo oono turi ta'billi.  
Amiin.

#### *Tööjüllü na eere no*

<sup>12</sup> Narigiri a'a waraga ya adhägüngü ya  
a nüüsö ya Siila örre yeede, ya adho ka fiin'i  
ya, ma tuu'bu aaga ka nanggeedi, nussu  
a'a a'da türü na Masala na dhorro no eege  
kungngo, aaga idhi oona ku'bu kide.

<sup>13</sup> Kaniisa ma Babil, mafeene nja aaga  
mo, Masala magesse oogo, oogo mööjüllü  
aaga a Murkus ya 'bii'bala tiya eede ya,  
tööjüllü aaga.

<sup>14</sup> Aaga tööjüllü tööjüllü ma tasaasa  
ajeene, a'a nööjüllü aaga in'dili kungngo  
aaga na kadu tanno Almasiihi no.

## Waraga ya Bütrüs ya eera ya Tafa'da tumma

Bütrüs ya tafiiñi ya arigiri waraga ya unggū co kadu ma kaniisa ka naguuru tanno iini ka tussu a'da asa i'i takete ka tiididene asala kide no. I'i asaasa kadu ma kaniisa a'da kaneene ka fiin̄i tiya a'diila ka Masala ka oona 'bucca kungngo. Eema nja eene a'da kafa tanu ka talaana ma Masala nja Yasu Almasiihi yeene ka 'duga kini nya kadu könö na kaneene nya Yasu. I'i adirina tumma eene ma katalaana tanno korokoro na icci ka kaniisa no. Katalaana na korokoro no ka'bunu kadu ma kaniisa kataneene ka fiin̄i tiya atoroko ya, kiki a'da Almasiihi taalo ara tafada. Bütrüs iki a'da Almasiihi ara tafada timin'da, a Masala taga'da eema ya arü'bü adene 'bitingngö ya, magere eema könö köyee meene kita tatoroko kara titalo kide kita. Bütrüs uu'bu eege ka nanggeedi a'da kütü ka tinggiridene ka türü nja tussu eema ma Uugaara tiya aja Yasu.

<sup>1</sup> Waraga ö'dö ndama Samaan Bütrüs, tasaga ya Yasu Almasiihi nja tafiiñi tiya iini, nunggu co kadu tanno kaluna toolon-adene ana eere ma Masala nja tatoolona tiya aja Yasu Almasiihi, a tamma tanno agu'daana afa ma tamma tanno aja no kungngo.

<sup>2</sup> Fa ka türü nja ta'diila kada tanno ada kadhabbu a tussu ma Masala nja Uugaara tiya aja Yasu.

### Tümmüneene na Masala nja tesse dhorro

<sup>3</sup> Masala manangnga türü ma tauugaraa tanno oono manangnga eema ma tefe ka 'dī angnga nja tanna taneene ma Masala a türü ma tussu eema tanno aja ka tagümmünü angnga a tidhindhü tanno oono nja ta'diila.

<sup>4</sup> Nggeege oogo manangnga eema ya agu'daana ka tidhindhü yoono ka tiki ya amang kada taadha ka eema ma 'büdhüllü tiya toroko ya, aaga tosso ka taneene ma Masala.

<sup>5</sup> Nggeege ya aaga kardha ku'bu amang kada tagusu ta'diila ka tammo tanno ada, nja aaga tagusu tussu eema ka ta'diila,

<sup>6</sup> aaga tagusu tafa ka oona ka tussu eema, nja ada ka tagusu tidhi oona ku'bu ka tafa oona ka oona, aaga tagusu tümmü eedi ma Masala ka tidhi oona ku'bu,

<sup>7</sup> nja ada aaga tagusu tanagöre tanno ada ka tümmü eedi ma Masala, nja tagusu tasaasa ka tanagöre tanno ada.

<sup>8</sup> Üürü eema ya a'diila ya ungngo ada adhabbu, anangnga aaga kadalingga dhorro aaga tö'dö keere a tussu eema ma Yasu Almasiihi Uugaara yaaja.

<sup>9</sup> Lakiini üürü ömö'dü ya eema tiya ka titalo kini ya, i'i asoro taalo iji 'buugu üürü miini ka tatanggala ka eema ma tatoroko tanno iini na illi no.

<sup>10</sup> Nggeege aaga kardha ku'bu aaga tanaana iiye ka Masala ka tagümmünü aaga, magesse aaga. Kada kara talingga nggeege ya, taalo aaga kara ta'dünggö 'do, <sup>11</sup> nggeege ya inye ka tafa'da nja aaga kadühföölä maada kara co ka tauugaara turi, tauugaara no Uugaara tiya aja Yasu Almasiihi tatoolona yaaja.

### Tumma ma tane'bi ka sorne

<sup>12</sup> I'i yungngo eede kara tadümügi tumma aaga ma eema tiya a'da killi aaga ka tagussu iini aaga tütü ka tumma ma tatimin'da tanno kada no.

<sup>13</sup> Nussu a'a a'da tumma dhorro eege kamiini, nükirü a'a ka asaasa tanangnga tumma no ada ka nanggüdü a'da naleefe a'a ka 'dī ka tuu'da.

<sup>14</sup> Kudumma eede nussu ara a'a tinyi tuu'da no ku'bu kete kungngo afa ma Uugaara tiya aja Yasu Almasiihi ka tirina a'a nataföönyö kungngo.

<sup>15</sup> Ara a'a takardha ku'bu amang kada tagügi eema ya 'bucca kede kara teyi.

<sup>16</sup> Taalo ungngo kasi ka eema ma elle ma korokoro ma ta'dara ün'düngngö kadirina ungngo tumma ma türü tanno Uugaara tiya aja Yasu Almasiihi nja tö'dö tanno iini, kudumma iidü ka tadinö ka tidhindhü tanno iini.

<sup>17</sup> Kaganna ungngo kide ka uuru tanno kini ka tamana ta'diila nja tidhindhü nja Masala ma Pupa mo, a tammo köö'dö kini ndama Masala tammo idhindhü mo kiki, "Bii'bala yeede ka asaasa i'i ya yungngo eede ka tammo kini."

<sup>18</sup> Kaföönyö ungngo tumma no köö'dö ndama 'dotombo'do a'da kaganna ungngo ka 'dikinya tammo insili mo.

<sup>19</sup> Ungngo takogoona ma tümmü tumma na nagane'bi dhorro, aaga 'bitingngö ya agüünö dhorro ma tanaana iiye kide, kudumma iini ka afeene nja lamba tammo öyeeene ka 'buugu tiya alüllü ya, ara taka ka taadha a ndalfoore ma taka töyeeene ada kada ka nanggeedi.

<sup>20</sup> Amang kada tussu tadhorro a'da taalo ömö'dü ma tasaana tumma ma tane'bi ku'bu ndama üüdü tiya iini.

<sup>21</sup> Kudumma tumma ma tane'bi taalo köö'dö ndama tasaasa ma eedi ma ömö'di, lakiini Koronggore ya Insili ya anangnga kadu ökönö ka teema tumma na Masala.

## 2

*Katalaana na korokoro no nja taama tanno eene*

(Yahüüisa 1.4-13)

<sup>1</sup> Lakiini nagane'bi na korokoro no ka takabbü 'dala ka kadu ka söödö 'billi ya, a 'bitüngngö ara katalaana na korokoro no sa kabbü 'dala kalaana kadu ka eema ma taama kadu, ka'düsünü Uugaara ya ana türü ya ya oolona eege ya kara tö'dö ana inde ka eyi tiya eene areere.

<sup>2</sup> A kadu kadhabbu kara tuurna ka tatoroko tanno eene no keere ka anangnga kadu ka tamidhi fiinii ya ma timin'da.

<sup>3</sup> Ka tallogo tanno eene kadaana aaga kalama ana eema ma elle tiya eene köö'dö iini ndama nanggüdü tanno eene, tümmü adene neene killi taalo kara titaalo nja inde tanno eene taalo arigide.

<sup>4</sup> Taalo Masala mana 'bangnga ma kadhangga tanno agütüni tam'baga no, madhifigi eege co koolo ma inde kadimi'didene ana nakilli ka 'buugu tiya lüllü ya ara uuru ma Masala kara kindhügi tähükümüdene.

<sup>5</sup> Taalo Masala mana 'bangnga ma kadu ma 'billi, lakiini mö'dö a faaya a kadu tanno oroko no masa kafa ka kadu ka iïdümüü kafünü eera nja Nööh tiya ageema tumma ma Masala ya.

<sup>6</sup> A Masala mümmü naanya ma Sadöma nja Amuura midhi manangnga eege kada fü'dö amang ka kadu tanno anu ka Masala no kara tö'dö kene keere no tussu iini.

<sup>7</sup> Moolona Luut ya adho ka fiinii ya, agadhügürü nya kadu ma temelö ka fiinii tiya kadu tanno oroko no na asilli eema no.

<sup>8</sup> Ömö'di ya miini, ya adho ka fiinii ya ada kaneene nja eene 'bucca adinö aföönyö atoodo ka eema ma tatoroko tiya eene adinö kide a naguuru a tuu'da niini tagu i'i, kudumma iini ka a'diila.

<sup>9</sup> Nggege Uugaara ara tussu ka toolona kadu niini na 'diila no ka dhügürü tiya eene ara kafa ka kadu tanno oroko no ka uuru ma tapusu adene nya tähükümü.

<sup>10</sup> Afä kadu no uurna tallogo ma tuu'da na nyoro kamidhi tauugaara na Masala. Eema ma oroko ya na 'dinigi oona neene coo'do no, taalo ri'ba kagu eege ma tamidhi eema ma 'dotombo'do ya idhindhü ya.

<sup>11</sup> Salla kadhangga na agii'bi eege a türü no, taalo kümmü eege kamidhi eege kidha ma Uugaara.

<sup>12</sup> Lakiini kadu no miini no kafeene nya eema ma eriidö tiya taalo kussu eema ya ageenedene ma tatorodene ma take, kamidhi eema yeene ka titaalo kussu ya. Meene kara tagirinadene.

<sup>13</sup> Eege kassa amana faana ma tad hügürü ku'bu, ma tin'di ma eema tiya eene ka talingga ya. Taneene ma tadhadho neene ma tümmü oona neene ka eema ma tatoroko ka töyeene ma uuru ka teene. Eege ka eema ma modolo, kene kara temmi nya aaga ma tagu eema ma taanyara kadhodho kiisini aaga.

<sup>14</sup> Laala ma iyye yeene adigine a temelö taalo kiisini ka tatoroko, kiisini kadu na agi'di no, nanggeedi neene kakalaadene ka tallogo ma eema, eege ka laala ma linggi.

<sup>15</sup> Kaadha ka fiinii tiya dhidho ya kaama kuurna fiinii ya Balam 'bii'bala ya Baür keere ya asaasa faana ma eema tiya toroko ya.

<sup>16</sup> Lakiini aduna teeladene ka tatoroko tanno iini, ka kisine kada niimö ma eriidö talnege a tumma afa ömö'di agirnaana ka ne'bi aadha ka taa'baga tanno iini.

<sup>17</sup> Kadu na miini no kafeene nya nduguli tanno 'büüdi ka titaalo kide no nja tülügü tanno tanya ka tiisö iini no, yungngö Masala ka takindinaana 'buugu ya sigürii ya eene ku'bu ka talüllü na dhiiri no.

<sup>18</sup> Kindiri eema ma taa'baga ün'dügüngngö, ma tiisini kadu a temelö ma tuu'da eege kiisini kadu na kete karünö ka kadu tanno anna ka tatoroko no.

<sup>19</sup> Kiki eene a'da kafa ta kasaga a'da ka nanggeyi tanno eene ka kasaga ma tiya aga'da eege ya, kudumma a niimö tiya agii'bi ömö'di ya, ara ömö'di tadasaga tiya iini.

<sup>20</sup> Lakiini kadu no koolonadene ka tatoroko ma eema ma 'büdhülü no, a'da kandussu tatoolona yaaja Yasu Almasiihi kassa ka tapadaga ka linggo ma tam'baga afe'de, iküri kanda toroko dhindho ka til'bi yeene ka dhidha ya.

<sup>21</sup> Kama taalo ka tagussu fiinii ya a'diila ya, kassa ka tafada kapadaga oona keere ka tumma tanno insili no kümmününja eene no.

<sup>22</sup> A tafeene ma tumma no ka timin'da, "Tiira apadaga ka toofo tanno niini," "A küdürü ma kadu ka tagala oogo ka oona mo, masa ka tapadaga ka'buna oona ka ndinco."

**3***Uuru na Uugaara*

<sup>1</sup> Waraga ökönö yungngó eede ka rigiri ada aaga kateefe ma a'a, neede ka asasa egee no, nadirina eema aaga kide amang kede tafa'da aaga ka nanggüüdü na insili no.

<sup>2</sup> Amang kada tagüügi tumma na nagan'e'bi tanno insili no nja tanno kadafüni tanno ada kada tırina aaga ma tumma tanno Tatoolona nja Uugaara tiya aja.

<sup>3</sup> Ka dhidha aaga kama tussu a'da ka naguuur tanno eere no, kadu ökönö kinggide kara sa köö'dö kamidhi aaga kuurna ka eema ma tatoroko yeene keere.

<sup>4</sup> Eege kara tiki a'da, "Ara 'tö'dö' assa kiiye?" Kafaafa ma angnga kaaya eema nye'd'e tüütü ka taneene jiddi ma Masala ka tarü'bü 'büdhüülü."

<sup>5</sup> Eege kussu tumma no, kassa kanu kide ma Masala ka tarü'bü 'dotombo'do nja 'büdhüülü a 'büüdi ndama 'büüdi a tumma ma niinö tanno oono.

<sup>6</sup> A 'büüdi tiya miini ya afe'de ka anangnga 'büdhüülü ma 'billi ka'duuru 'büüdi kaaya.

<sup>7</sup> Lakiini 'dotombo'do nja 'büdhüülü ma 'bitüngngö kütü matara co ka issi a tumma ma Masala ka eyi tiya oono ma tündhüügi uuru ma Masala kara tapusu kadu no taalo kussu tumma noono kaaya.

<sup>8</sup> Niimö inggide eede ka asasa aaga a'da aaga tafa tüürü miini kateefe ma a'a, uuru ka unggodho ka Uugaara kafeene nja nagürüünü alif, alif ürüünü ka Uugaara kafeene afa uuru ka unggodho.

<sup>9</sup> A niimö ya Uugaara ka tiki ya taalo mara tafa kide afa ma kadu töccö kadeema, tadoono ku'bu noono. Lakiini midhi oona ku'bu mündhüügi aaga kudumma oono taalo masaasa a'da kadu taaya, lakiini a'da a kadu taadha ka tatoroko nye'd'e kungngo.

<sup>10</sup> Lakiini uuru na Uugaara kara tö'dö afa ma tanyooro kungngo. Ara 'dotombo'do saga titalo ka uuru tanno miini no a tabaana ma tombo'do a 'buugu tatumuli ana issi, a 'büdhüülü nja eema tiya kide ya nye'd'e ara tamanyaga.

<sup>11</sup> Üürü eema nye'd'e de ara taga'dadene afa ma tiya kungngo, ara aaga ta kadu tanno afaanya no? Aaga aneene taneene ma tinsili nja taneene ma Masala.

<sup>12</sup> Afa maada ka tündhüügi uuru ma Masala kungngo, aaga kardha ku'bu aaga tanangnga oogo ka öö'dö areere, uuru ma 'dotombo'do kara tatinyogo ka tangga'da, a eema ya ka 'dotombo'do ya tatumuli a tagu'daana.

<sup>13</sup> Lakiini kada kündhüügi afa ma tiya Masala ka takiki ya, 'dotombo'do tanno issi

no nja 'büdhüüli tiya issi ya ara ta 'dii ma kadu tanno a'dila no.

<sup>14</sup> Aaga kardha ku'bu kateefe ma a'a, aaga tündhüügi uuru no miini no a Masala tö'dö maduna aaga ka ta'diila a'da taalo a niimö ya toroko nja hetti kada kidha moono.

<sup>15</sup> Aaga iirri tidhi oona ku'bu na Uugaara ma tafinii ma toolonadene iini afa ma tiya örre ma angnga tata'diila yaaja Bölis ka tarigiri ada aaga ya kungngo, a Masala ka anangnga ta'dara nja tessu eema iini.

<sup>16</sup> Afa ma tiya ungnego ka nawaraga tanno iini nye'd'e no, taalo kussu adene a kadu no nagaaga kabaana ka riifö iini afa ma tiya ka tagalinggo a türeene ma kasorne tanno insili no ma taama nanggeyi neene.

<sup>17</sup> Nggege kateefe ma a'a, kadirina ungnego tumma no aaga a'da aaga tadinö ko'do, amang kada tafa turuna tatoroko ma kadu tanno taalo kussu seriye no. Aaga tamma ka 'buugu tiya ada ya a'dila ya.

<sup>18</sup> Lakiini aaga inggiridene ka türü nja tessu eema ma Uugaara nja tatoolona tiya aja Yasu Almasihi ya ana tidhindhi 'bitüngngö nja ta'billi. Amiin.

## Waraga ya Yühanna ya Dhidha ya Tafa'da tumma

Yühanna ya tafiiñi ya arigiri waraga ya ungu co kadu ma kaniisa niini ka asasa egee no afa meene kada laala tiya iini kungngo. I'i uu'bu egee ka nanggeedi a'da kaneene ka unggodho nja Masala nja Yasu Almasiihi. I'i ümmünü Yasu a'da tumma ma tefe ka 'dī ya aganeene nja Pupa jiddi ma 'billi öö'dö ka 'büdhülü kada ömö'dü. Agadünügū eema ma katalaana tanno oroko no, na alaana a'da Yasu taalo Almasiihi. Yühanna anangnga tumma a kadu ma kaniisa a'da i'i ka eyi tiya iini aganeene nja Yasu, yungno iini ka tussu dhorro a'da Yasu aga ömö'di ma timin'da ada 'Bii'bala ma Masala. I'i ya adirina eema eene kada kadu ma kaniisa a'da kasaasa Masala 'bucca kungngo kasaasa ajeene dhadha. I'i afünügū egee ko'do amang kene tüü ka tündhögü tanno eene ara Uugaara Yasu ka öö'dö afe'de.

### Tumma ma tefe ka 'dī

<sup>1</sup> Ungno karigiri ada aaga waraga ya co aaga a tumma ma tefe ka 'dī tanno aganna kide ka dhidha ma eema nye'de no. Kaföönyö ungno, ungno tadinö kide ana laala ma iifye tiya iidi kadiñö inggide, ungno iisine nüüdi kagümmü i'i ka oona, yungno iidi ka teema iini a'da tumma ma tefe ka 'dī.

<sup>2</sup> Ka tefe ka 'dī ta'billi miini no ka tatele oona, ungno tasala egee. Yungno iidi ka teema iini, ungno kungngo kadünügü tumma ma tefe ka 'dī ta'billi na aganeene nja Pupa kassa ka tele oona ungno no.

<sup>3</sup> Yiidi ka taföönyö a tiya yiidi ka tadinö kide ya kadadünügü ungno co aaga afe'de, amang kada tagusu oona ka taneene tanno iidi nja Pupa nja 'Bii'bala tiya oona Yasu Almasiihi.

<sup>4</sup> Ungno karigiri adaga ka eema ya co aaga amang ka dhodho tanno aja tattümö.

### Masala a töyeene

<sup>5</sup> Tumma nüüdi ka taföönyö ka Yasu no, egee kamiini kidi ka tadünügü aaga a'da Masala ma töyeene a talüllü titaaloo kono.

<sup>6</sup> Aminna, kaja ka takiki a'da kagoosso angnga ka taneene nja Masala angnga saga tagala ka takütü ka tanna ka talüllü ya, ra angnga taga kadu tanno korokoro no nitaalo naneene taneene ma timin'da.

<sup>7</sup> Illi kaja ka taganna ka töyeene afa moono ka tanna ka töyeene kungngo, angnga taganeene ka'dügüllü angnga tafaana ka oona, eriidö ya 'Bii'bala tiya

oono Yasu Almasiihi tagunu tatoroko kaja ka oona.

<sup>8</sup> A kaja ka tiki a'da taalo angnga koroko, angnga tiisini nanggeyi naaja a timin'da titaaloo kaja ka oona.

<sup>9</sup> A kaja ka tamma a'da angnga koroko angnga tatiraana dhorro ka Masala kidha, Masala ma dhorro mo madho ka fiini mara tamma kaja magala angnga ka oona madho angnga ka fiini.

<sup>10</sup> A kaja ka tiki a'da taalo angnga kagalingga tatoroko ya, ara angnga tanangnga Masala ka takorokoro a tumma noono taalo ka tanna kaja.

## 2

### Almasiihi oolona kaja

<sup>1</sup> Laala eede, a'a narigiri ada waraga aaga a'da aaga tafa ta'dinggö ka tatoroko. Üürü ömö'di saga 'dingngö ka tatoroko ya, Yasu Almasiihi ya adho ka fiini ya eema nja Pupa kudumma angnga.

<sup>2</sup> A Yasu Almasiihi ka eyi tiya iini a türri ma tagala tatoroko naaja, taalo unggodho angnga lakiini ara tagala tatoroko ma kadu ka 'büdhülü nye'de kungngo.

<sup>3</sup> Kaja ka taföönyö talaana na Masala, ara angnga tagamma a'da ka kussu angnga oogo.

<sup>4</sup> Ömö'di ya iki a'da i'i ussu oogo ya, lakiini taalo alinggo a tumma tanno oono, akorokoro, taalo tumma dhorro kini.

<sup>5</sup> A ömö'di ya ümmü tumma na Masala alinggo iini ya, tasaasa na Masala ka tigi kini ka oona ara angnga tagussu a'da angnga ka unggodho nja Masala.

<sup>6</sup> Ömö'di ya amma a'da i'i afünü sigiri nja Yasu ya, fa kini aneene taneene na Yasu Almasiihi.

### Talaana ma 'bitüngngö

<sup>7</sup> Nagöre eede, talaana neede ka rigiri ada co aaga no, taalo tumma na issi no egee kamiini, talaana na illi no egee kamiini, ya taganna kada ka dhidha aaga taföönyö.

<sup>8</sup> Lakiini a'a narigiri ada aaga tumma na issi no co aaga timin'da miini kijidene ka Yasu nja aaga kudumma talüllü kinynyo a töyeene ma timin'da ka öyeeene.

<sup>9</sup> Ömö'di ya iki a'da i'i ama töyeene assa ka kirimi nagöre niini, i'i ya miini ya ta'bitüngngö aleefe tanna ka talüllü.

<sup>10</sup> A ömö'di ya asaasa nagöre niini ya, i'i yungno efe ka töyeene, a nüümö matara tüpü i'i ka tatoroko kungngo ya titaaloo.

<sup>11</sup> A ömö'di ya akirimi nagöre niini, i'i anna ka talüllü awwa fiini taalo ussu kita iini ka tapadaga co, kudumma ma talüllü ka ta'bürü i'i akisinsoro.

<sup>12</sup> A' narigiri ada aaga laala eede,

kudumma Masala mara tagala tatoroko naada kudumma ma eere tiya Yasu Almasiihi.

<sup>13</sup> Aaga na kafaafa no, a'a narigiri adaga co aaga, kudumma ada ka ndussu Yasu ya ma dhidha ya.

Kadimöögö, narigiri ada a'a co aaga kudumma ada ka tagii'bi Eblisi.

<sup>14</sup> A'a narigiri ada tumma aaga, aaga na kafaafa no, kudumma ada ka tussu i'i ya aganna ka dhidha.

Kadimöögö, a'a narigiri ada co aaga kudumma ada kana türü, a tumma ma Masala tafünü sigiri kada ka nanggeedi aaga kagii'bi Eblisi.

*Aaga fa tasaasa eema ma 'büdhüllü*

<sup>15</sup> Aaga fa tasaasa eema ma 'büdhüllü alla eema ya ka 'büdhüllü ya. Üürü ömö'di asaasa eema ma 'büdhüllü ya, taalo tasaasa a'da Pupa ka tanna kini ka eedi.

<sup>16</sup> Eema nye'de kungngo ya ma 'büdhüllü ya, tallogo ma tuu'da a tallogo ma tasaasa eema ana iïye, eema ka 'büdhüllü tiya nye'de kungngo taalo ö'dö ndama Pupa, ö'dö ndama 'büdhüllü.

<sup>17</sup> A 'büdhüllü ana eema tiya inggide nye'de ya kadu ka asaasa ya, ara tamanyaga itaalo. A ömö'di ya ara tafünü sigiri ka Masala ya, ara tefe ka 'dii ta'billi.

*Nadiidi na Almasiihi*

<sup>18</sup> Laala eede, asa 'büdhüllü takete ka titaalo, a tumma killi ka tirina co aaga a'da diidi ma Almasiihi inggide ara tö'dö. A 'bitingngö asa nadiidi ma Almasiihi ka ndadele oona, yungngo aja ka tagussu a'da 'büdhüllü ndakete ka titaalo.

<sup>19</sup> Kagedhe oona kaja ka oona, kudumma eene taalo ka kadu tanno aja. Kene ka ta kadu tanno aja katakütü nja angnga, eege kagedhe oona amang kene tussu adene a'da eege kitaalo nja angnga.

<sup>20</sup> Illi aaga Koronggore ya Insili ya ungngo ada ka oona aaga nye'de tussu tumma ma timin'da.

<sup>21</sup> Taalo a'a narigiri ada aaga, kudumma ada kitaalo kussu timin'da, lakiini kudumma ada ka tussu i'i, kudumma korokoro taalo atö'dö ndama timin'da.

<sup>22</sup> Mada yungngo a korokoro adha? Ömö'di ya iki a'da Yasu taalo Almasiihi ya i'i yungngo a diidi ma Almasiihi. I'i a'düsünü Pupa nja 'bii'bala eege a teera ma eene.

<sup>23</sup> Ömö'di ya a'düsünü 'Bii'bala ya, a'düsünü Pupa tekere, a ömö'di ya amma ka 'Bii'bala ya, amma ka Pupa tekere.

<sup>24</sup> Aaga assa kide so, yaada ka taföönyö ka dhidha ya ütü kada. Üürü nggeege ya, ara aaga tekere tüü ka 'Bii'bala nja Pupa.

<sup>25</sup> Tumma no eege kungngo a Yasu ka takiki a'da i'i ara tanangnga angnga no, tefe ka 'dii ta'billi.

<sup>26</sup> A'a narigiri ada aaga a tumma co aaga ma kadu tanno kasaasa tüüsü aaga no.

<sup>27</sup> A Yasu Almasiihi uuru Koronggore yiini kada ka oona, a Koronggore yiini kara tüü kada ka oona, taalo aaga ka tasaasa ömö'di a'da alaanaga aaga. Kudumma Koronggore alaana aaga ka eema nye'de, talaana niini eege kamiini, timin'da eege kamiini, taalo korokoro. Aaga linggo, aaga ütü ka talaana ma Koronggore so, aaga ütü ka taneene nja Yasu.

### *Laala ya Masala*

<sup>28</sup> A 'bitingngö laala eede, aaga idhi oona kini, amang kini tadhe, angnga kaana türü ana i'i, a modolo miini tafa tagu angnga kini ka tö'dö.

<sup>29</sup> Kussu aaga a'da Yasu adho ka fiinü, aaga tussu a'da ömö'di ya alingga tumma na dhorro no, i'i ya 'bii'bala ma Masala.

## 3

### *Laala ma Masala*

<sup>1</sup> Aaga sala ka Pupa ka asaasa angnga nya idhi angnga kana eere a'da laala ma Masala, a'da timin'da angnga ka laala tiya oono, a kadu ka 'büdhüllü taalo kussu angnga kudumma eene taalo kussu Masala.

<sup>2</sup> Kadu eede, 'bitingngö ya angnga ka laala ma Masala, a ta'bitingngö ara angnga taga minna. Illi angnga kagussu a'da Yasu ka tabbü 'dala ya, ara angnga tafeene rja iini kudumma aja ka takassa kini ana oona miini.

<sup>3</sup> Ömö'di ya ümmü tündhügi ma Almasiihi ya, anangnga tuu'da niini ka tinsili afa Yasu ka tinsili kungngo.

<sup>4</sup> A ömö'di ya weerö a'bana ko'do a tumma ana seriye tiya Masala, kudumma weerö a'da ta'bana ko'do ana seriye.

<sup>5</sup> Kussu aaga a'da Yasu Almasiihi ö'dö ka 'büdhüllü kita amang kini ta'duga tatoroko niidi, taalo tatoroko kini ka oona.

<sup>6</sup> A ömö'di ya amma'da kini nja tiya taalo a tüü ka tüüni weerö ya. A kadu na weerö no taalo kadinö kini kitaalo kussu i'i 'do.

<sup>7</sup> Laala eede, aaga tafa ka ömö'di töccö iisii aaga. Ömö'di ya üümü ta'diila ya insili oona afa ma Yasu ka tinsili kungngo.

<sup>8</sup> I'i ya ütü ka tüüni weerö ya ama ma Eblisi, kudumma Eblisi jiddi ma 'billi üümü weerö. A 'Bii'bala ma Masala agöö'dö ka 'büdhüllü miini ka öö'dö tarigi linggo na Eblisi.

<sup>9</sup> Taalo ömö'dii ya ageenedene ndama Masala ya ara tütü ka linggo tatoroko kudumma tööyö tammo Masala müütü kini itaalo ara tamaanya tüünii tatoroko kudumma iini ka tageenedene ndama Masala.

<sup>10</sup> A tambanajaana ku'bu ma laala ma Masala nja laala ma Ebliisi euge kungngö, ömö'dii ya taalo üünii ta'diila anu ka örre tiya iini ya, taalo ö'dö ndama Masala.

### Aaga asaasa ajeene

<sup>11</sup> Talaana naada ka taföönyö ka dhidha no, kiki a'da angnga tasaasa ajeene.

<sup>12</sup> Angnga tafeene afa ma Kayiin ya agiidi örre yiini ya. Kayiin aha 'bii'bala ma Ebliisi. I'i agiidi örre yiini amana? I'i agiidi örre kudumma linggo tanno Kayiin ka kalinggo ma weerö, a linggo na örre tiya iini tagalinggo ma ta'diila.

<sup>13</sup> Aminna, nagöre eede, aaga fa tadhere üürü kadu ma 'büdhülü kagirii aaga.

<sup>14</sup> Kussu angnga a'da kada'da angnga ka inde, angnga tagata'daga ka tefe ka 'dii, kussu angnga tumma no nya? Kussu angnga euge kudumma aja ka tasaasa nagöre naaja. Ömö'dii ya anu ka nagöre ya, ara tütü ka inde.

<sup>15</sup> Ömö'dii ya akirimi örre yiini ya i'i ya ömö'dii tiya agirina kadu ya miini. Aaga kussu a'da ömö'dii ya agirina kadu ya taalo tefe ka 'dii ta'billi kara tanna kini.

<sup>16</sup> Kussu angnga minna yungngö tasaasa, Yasu üpü eyi yiini co ka üüdü ma angnga, angnga tekere tüpü nanggeyi naaja co ka üüdü ma nagöre tanno aja.

<sup>17</sup> Ömö'dii ya eema ma 'büdhülü ya a'diila ya ka tanna kini assa taalo ana 'bangga ma örre ya eema ka titalo kini, ömö'dii ya miini ya ara tasaasa na Masala tafinü sigirii kini nya?

<sup>18</sup> Ka laala eede, katafa tageema tafaana ka oona a tumma ma niinö nya onggo 'do ün'dügüngngö, lakiini a linggo nya timin'da.

### Fünü sigirii ka Masala kidha

<sup>19</sup> Nggeege ya, ara angnga tagussu a'da angnga ka kadu ma timin'da a ri'ba taalo a tagu angnga ka Masala kidha.

<sup>20</sup> Üürü nanggeedi naaja ko'deere angnga, angnga tagussu a'da Masala ma dhabbu a nanggeedi tanno aja, mussu eema nye'd'de.

<sup>21</sup> Kadu eede, ka nanggeedi tanno aja taalo ko'deere ya, taalo ri'ba ma ta'dingne ka Masala kidha kara tagu angnga.

<sup>22</sup> Ara angnga taduna niimö yaaaja ka tasaasa kono ya nya? Kaja ka taföönyö tumma kono angnga tagalinggo a tumma tanno 'diila kono ka oona no.

<sup>23</sup> Talaana noono ka anangnga angnga no, anangnga tagamma ka eere ma Yasu Almasiihi 'Bii'bala yoono, angnga tafaana ka oona afa moono ka tagalaana angnga kungngo.

<sup>24</sup> Ömö'dii ya ara talingga a talaana tanno Masala ya, ara tafünü sigirii ka Masala a Masala tafünü sigirii kini. Angnga kagussu a'da Masala mafünögü sigirii kaja, a Koronggore tiya oono ka anangnga angnga ya.

## 4

### Koronggore ma timin'da ya nya tiya ma korokoro ya

<sup>1</sup> Kadu eede, aaga fa tamma ka nagoronggore 'do ün'dügüngngö, aaga asaana nagoronggore ku'bu kudumma nagane'bi tanno korokoro no kö'dö ka 'büdhülü kadhabbu.

<sup>2</sup> Ara aaga tessu Koronggore ya Masala nya? Koronggore ya tamma ka Yasu Almasiihi ya ö'dö ka tamö'dii ya, koronggore ya miini ya ndama Masala.

<sup>3</sup> Lakiini koronggore ya taalo amma a'da Yasu ö'dö ndama Masala ya, i'i ya koronggore ya diidi ma Almasiihi yaada ka taföönyö a'da ara tö'dö, i'i yungngö ka 'büdhülü 'bitingngö.

<sup>4</sup> Laala eede, aaga ka ma Masala, aaga tagii'bi nagane'bi na korokoro no. A Masala mungngö kada mamana türü adagii'bi Ebliisi, ya ungngö ka 'büdhülü 'bitingngö ya.

<sup>5</sup> Euge keema a tumma ma 'büdhülü, a 'büdhülü taföönyö kene kudumma eene ka ma 'büdhülü.

<sup>6</sup> Angnga ka ma Masala. A ömö'dii ya ussu Masala ya aföönyö tumma naaja. A ömö'dii ya taalo ama Masala ya taalo aföönyö tumma naaja, nggeege yungngö aja ka tagussu tambananago ma korokoro nya Koronggore tiya dhorro ya.

### Masala ma tasaasa

<sup>7</sup> Ka tasaasa ajeene so kadu eede, kudumma tasaasa kö'dö ndama Masala. A ömö'dii ya asaasa kadu ya ageenedene ndama Masala, ussu Masala.

<sup>8</sup> Ömö'dii ya taalo asaasa kadu ya, taalo ussu Masala, kudumma Masala oogo ma tasaasa.

<sup>9</sup> A Masala mala tasaasa noono angnga, kono ka kürünü 'Bii'bala yoono ya ungodho ya, öö'dö ka 'büdhülü a'da amang kaja teke fa 'dii ana i'i.

<sup>10</sup> Tasaasa euge kungngö, tasaasa naaja ka asaasa Masala no taalo ka dhorro, lakiini Masala masaasa angnga magürünü 'Bii'bala yoono kada tirri ma ta'duga tatoroko naaja.

<sup>11</sup> Kadu eede, ka Masala ka ndasaasa angnga tasaasa no 'dee, kada asaasa ajeene tekere.

<sup>12</sup> Taalo ömö'di ma tadinii ka Masala ana ööye, a kaja ka tasaasa ajeene ara Masala tüü ka taneeene nja angnga a tasaasa noono tüü kaja ka oona.

<sup>13</sup> Angnga ka kussu a'da angnga köödhii nja Masala, a Masala töödhii nja angnga kono ka anangnga Koronggore yoono angnga.

<sup>14</sup> A angnga ka kussu, angnga tadinii kide, ungngo tadirina a kadu a'da Masala magürünü 'Bii'bala yoono tatoolona ma 'büdhüü.

<sup>15</sup> Ömö'di ya amma a'da Yasu a 'Bii'bala ma Masala ya, ara Masala töödhii mafünü sigirii, i'i tafunü sigirii nja Masala.

<sup>16</sup> Angnga kussu tasaasa na Masala ka anangnga angnga no. Masala ma tasaasa, a kadu na aneene ka tasaasa no, kafünü sigirii kono, Oogo mafünü sigirii kene.

<sup>17</sup> Tasaasa katüümö kaja amang kaja tana rüüsü ka uuru ma tahükümü kudumma tefe ka 'di tanno aja ka 'büdhüü tiya kafeene angnga nja Almasiihi.

<sup>18</sup> Taalo ri'ba ka tasaasa, tasaasa na dhorro no ya kasoro ri'ba kaja ka oona, kudumma a ri'ba kama tapusu adene. Ömö'di ya ari'ba ya taalo tasaasa na Masala kadigine kini ka oona.

<sup>19</sup> Angnga tafaana ka oona kudumma Masala masaasa angnga ka dhidha.

<sup>20</sup> Ömö'di ya iki a'da, "Nasaasa a'a Masala," a'da agirii örre tiya iini, ömö'di ya miini ya a korokoro, kudumma iini ka anu ka örre tiya iini ka iji i'i ana ööye ya, ara tambaanya tasaasa Masala miini ka itaalo adinö kono ana ööye mo?

<sup>21</sup> Tumma na öö'dö ndama Yasu Almasiihi no kiki, Ömö'di ya asaasa Masala ya a tasaasa örre ya iini.

## 5

### Tamma ka 'Bii'bala ma Masala

<sup>1</sup> Ömö'di ya amma a'da Yasu ya Almasiihi ya ageenedene ndama Masala nja ömö'di tiya asaasa pupa ya, ara tasaasa 'bii'bala yiini.

<sup>2</sup> Kakussu angnga a'da kasaasa angnga laala ma Masala kaja ka tasaasa Masala angnga tagalinggo a talaana tanno oono.

<sup>3</sup> Kudumma tasaasa ma Masala a'da angnga tagalinggo a talaana tanno oono, a talaana noono taalo kagu'daana.

<sup>4</sup> Ömö'di ya ageenedene ndama Masala ya ara tii'bi eema ma 'büdhüü, tamma ka Masala naaja eege kungngo kara tanangnga angnga ka kilinigi eema ma 'büdhüü co.

<sup>5</sup> Mada yungngo ara takilinigi 'büdhüü co? Illi ömö'di ya amma a'da Yasu a 'Bii'bala ma Masala.

<sup>6</sup> Ömö'di ya ö'dö ya, Yasu Almasiihi i'i ya miini ö'dö a 'büdü nja eriidö, taalo 'büdü unggodho i'i lakiini a 'büdü nja eriidö. A Koronggore i'i yungngo atiraana, kudumma Koronggore a timin'da.

<sup>7</sup> Eege na iidoona no kadünnü tumma ma timin'da.

<sup>8</sup> Koronggore nja 'büdü nja eriidö eege na iidoona no ka unggodho.

<sup>9</sup> Üürü kamma angnga ka tumma tanno kadu, lakiini tumma na Masala ka idhündhi. A tumma na Masala noono ka tageema ma 'Bii'bala tiya oono eege kungngo.

<sup>10</sup> Ömö'di ya amma ka 'Bii'bala ma Masala ya, tumma no miini kungngo iini ka eedi. A ömö'di ya taalo amma ka Masala ya, anangnga Masala kada korokoro, kudumma iini taalo amma ka tumma tanno Masala ka tiraana ma 'Bii'bala tiya oono.

<sup>11</sup> Tumma eege kungngo, Masala manangnga tefe ka 'di ta'billi angnga, a tefe ka 'di na miini no kungngo a 'Bii'bala tiya oono.

<sup>12</sup> Ömö'di ya amma ka 'Bii'bala ya, tefe ka 'di na miini no kungngo ömö'di tiya miini ya. A ömö'di ya taalo amma ka 'Bii'bala ma Masala ya taalo tefe ka 'di na miini no kini.

### Tefe ka 'di ta'billi

<sup>13</sup> A'a narigiri ada aaga amang kada tussu a'da kana aaga tefe ka 'di ta'billi, aaga na amma ka 'Bii'bala ma Masala no.

<sup>14</sup> Ka kussu angnga dhorro a'da ara Masala taföönyö fara yaaja kaja ka tasaasa niimö tiya oono ya a'dila kono ka oona ya.

<sup>15</sup> A kaja ka tagussu a'da oogo maföönyö fara ma niimö tiya aja ka taafara kono ya, angnga tagussu a'da niimö ya miini ya ara tananja angnga.

<sup>16</sup> Üürü naduna o'o örre yüüdü ka tüünü tatoroko na taalo kara tüüp i'i ka inde no, fa kini afara ka Masala, oogo mara tanangnga tefe ka 'di iini. A'a neema ka kadu tanno weerö tammo eene taalo ma tüüp eege ka inde mo. Tatoroko kinggide kuurugu kadu ka inde. Taalo a'a niki a'da ara tafara ka Masala kudumma iini.

<sup>17</sup> Eema ya toroko nye'de ama tatoroko, illi tatoroko ökömö kinggide taalo mara tüüp angnga ka inde.

<sup>18</sup> Kussu angnga a'da ömö'di ya ageenedene ndama Masala taalo talinggo tatoroko, ömö'di ya ageenedene ndama Masala ara tafa kini, a Ebliisi taalo ara tilii i'i ka oona.

<sup>19</sup> Kussu angnga a'da angnga ka kadu tanno Masala, a kadu ma 'büdhülü nye'd'de ungngo ka niisö ma tauugaara ma Eblisi.

<sup>20</sup> Kussu angnga a'da 'Bii'bala ma Masala ö'dö anangnga ta'dara angnga amang kaja tussu oogo, oogo ma timin'da. Angnga takütü kono oogo ma dhorro nja 'Bii'bala tiya oono Yasu Almasiihi. Oogo ma Masala tammo dhorro mo nja tefe ka 'dii ta'billi.

<sup>21</sup> Laala eede, agadinö ko'do aaga tafaana ka oona ma namasala ma korokoro.

## Waraga ya Yühanna ya Eera ya Tafa'da tumma

Tafüni Yühanna arigiri waraga ya adhügündü ya, unggu co kaniisa tammo iini ka tümmünü oogo a'da "aka mo." I'i asaasa tö'dö tassa kene kita kungngo. I'i iki a kadu ma kaniisa a'da kaföönyö tumma na Yasu kungeene ka fiinii ma tasaasa ajeene nja ka könö. Adünögü eema eene ma katalaana tanno oroko no na iisini kadu no eene ka tiki a'da Yasu taalo ö'dö ka 'büdhülü kada ta ömö'dü.

### Tööjüllü

<sup>1</sup> A'a na tadiifi, nunggu tumma no co aka tammo a Masala ka tagesse oogo mo nja laala tiya oono, neede ka asaasa eege ma timin'da nye'd'de no. Taalo a'a unggodho a'a nungngo nasaasa o'o, a kadu nye'd'de na ussu timin'da no kasaasa o'o.

<sup>2</sup> Kudumma a timin'da tutü kaja ka eedi ya, kara tutü kaja ta'bili.

<sup>3</sup> A türü nja 'bangnga nja ta'diila ndama Masala Pupa nja Yasu Almasiihi 'Bii'bala ma Pupa aneene nja angnga ka timin'da nja tasaasa.

### Timin'da nja tasaasa

<sup>4</sup> Ka'diila oona eede nadhodho 'do kede ka tuna laala yüüdü öccö ka tunggunu ka fiinii ma timin'da, afa ma tiya Pupa ka tadirina angnga ya.

<sup>5</sup> A 'bitingngö, 'badaada eede, nasaasa a'a nüümö unggodho küdü, taalo talaana könö afe'de, talaana na illi kaja no eege kamiini, lakiini a'a nasaasa küdü a'da angnga tafaana ka oona.

<sup>6</sup> Tasaasa eege kungngo, a'da angnga tagunggunu ka fiinii ma talaana tanno oono, a talaana eege kamiini, afa maada ka taföönyö ka dhidha kungngo, fiinii ma tasaasa.

<sup>7</sup> 'Büdhülü ya tigine a kadu ma tüüsineene no, taalo kamma a'da Yasu Almasiihi öö'dö ka 'büdhülü a tuu'da ma tadü'dü. Tatüüsineene ya diidi ma Yasu i'i ya miini.

<sup>8</sup> Aaga adinö ko'do amang kada tafa taama linggo tanno ada ka tagalinggo ün'dügündüngö. Lakiini ara aaga ta'duga talingnge naada kadigine.

<sup>9</sup> Ömö'dü ya ata'da ka tumma tanno Yasu ko'do itaalo idhi oona ka talaana tanno Almasiihi ya, taalo Masala ma taneene nja iini. Ömö'dü ya idhi oona ku'bu ka talaana tanno Almasiihi, ara taneene nja Pupa nja 'Bii'bala nye'd'de.

<sup>10</sup> Ka ömö'dü töccö ka tö'dö a talaana tanno eefe no, aaga fa tamma kini kada ka 'dü.

<sup>11</sup> Kudumma ma ömö'dü tiya ara tamma kini ya ara tosso ka eema ma tatoroko nja iini.

<sup>12</sup> Tumma kungngo eede kadhabbu neede kadarigiri adaga co aaga no, illi a'a niki a'da nüüdhi tikinggi, ara a'a kaala aaga kide ana oona ma a'a, angnga saga tageema angnga tagadhodho.

<sup>13</sup> Laala ya inye tammo üüdü ya Masala ka tagesse eege no kööjülü o'o.

## Waraga ya Yühanna ya Iidoona ya Tafa'da tumma

Yühanna ya tafümi i'i arigiri waraga ya adhügüngü ya ungu co uugaara ma kaniisa ya ana eere a'da Kayis ya. Yühanna indhägi Kayis ko'do kudumma iini ka tagüuni tatafala amana eema a kadu tanno öleele kalaana tumma ma İnjili ma Yasu. I'i eemaga tumma co Kayis a'da ümmü taneene ma kadu ma kaniisa na üünii eema ya a'diila ya. I'i iki iini a'da, afa tuurna kadu na üünii tam'baga no keere nja tanno ümmü nanggeyi neene ka tii'baana ka nakaniisa no.

### *Tööjüllü*

<sup>1</sup> Waraga ya ö'dö ndama a'a na tadiifi no nunggu co teefe ma a'a Kayos yeede ka asaasa i'i ana eedi timin'da ya.

<sup>2</sup> Teefe ma a'a, nasaasa a'a a'da o'o taneene a ta'diila ka eema nye'd'de. Ka ta'diila ma tuu'da ma oona nja o'o ka'diila ka koronggore.

<sup>3</sup> Ka'diila oona eede a nagöre köö'dö kadiri tumma ma o'o ka tümmü timin'da na o'o tunggunu ka fiini ma timin'da.

<sup>4</sup> Taalo niimö ma tanangnga a'a ka tadhodho afa ma tiya eede ka föonyö a'da laala yeede kunggunu ka fiini ma timin'da.

### *Yühanna afünügü Kayis ko'do*

<sup>5</sup> Teefe ma a'a, a'diila nggeege üdü kafa ka nagöre ma angnga nja kölöge.

<sup>6</sup> Kadirina tumma ma o'o kidha ma kaniisa a'da o'o nümmü eege a tasaasa. Ara ta'diila küdü kara tattoog eege, a tumma no kara ta'diila ka Masala ka oona no.

<sup>7</sup> Eege kunggeene kudumma eere tiya Almasiili, kaanu ka kona niimö ka kadu no taalo kamma ka Almasiili no.

<sup>8</sup> Angnga ama tada'da kadu no, amang kaja tosso ka linggo ma timin'da nja eene.

### *Ditriifös nya Dimitrios*

<sup>9</sup> A'a narigiri ada waraga co kadu ka kaniisa, illi Ditriifös ya asaasa a'da i'i ta uugaara meeene ya, taalo asaasa angnga.

<sup>10</sup> Kede kara tö'dö, ara a'a sa tirina eema yiini ka tüünii ya o'o, i'i adünnü tumma na toroko no kaja ka oona. I'i taalo aadha ka eema tiya miini ya, i'i anu ka tada'da nagöre ma angnga, adünügü tumma a kadu töccö a'da kafa takinyi eege. Kene ka takinyi eege ya, ikirü ka tasoro eege ka kaniisa.

<sup>11</sup> Teefe ma a'a, fa takinya tumma na toroko no, o'o adha ya, üünii eema ya a'diila ya. Ömö'di ya a linggo tumma na

'diila no, i'i ama Masala. A ömö'dü ya üünii tumma na Ebliisi ya, taalo adinö ka Masala.

<sup>12</sup> A kadu nye'd'de kungngo keema a tumma na 'diila na Dimitrios ka tüünii no, a taneene niini tanangnga kadu ka tussu a'da a'diila a angnga teema kini ka oona nggeege, na o'o tussu a'da tumma naaja ka timin'da.

<sup>13</sup> Eema inggide a dhabbu 'do yeede ka asaasa tarigiri ada o'o iimi, lakiini a'a taalo nasaasa i'i kada hibiri nja galamu.

<sup>14</sup> Nadinö a'a fiini a'da na a'a tassa küdü kete kungngo angnga saga temaana ka oona.

<sup>15</sup> A'a nööjüllü o'o. Kateefe no eege kungngo kita no na asaasa o'o no kööjüllü o'o. Ööjüllü kateefe na asaasa angnga no a nagereene tanno eene.

## Waraga ya Yahüusa Tafa'da tumma

Waraga ya adhüküdhükü ya, Yahüusa i'i yungngo agarigiri. I'i aga örre ya Yasu. I'i arigiri waraga ya co kadu ma kaniisa könö na tumma ma kadalaaadene tanno korokoro no ka'bana ko'do nja eene. Kataalaana no ka'bana ko'do a talaana ma türü ma Masala ka'bunu kadu ma kaniisa a'da kaneene ka füni tiya toroko ya. A Yahüusa tageema nja kadu kaniisa a'da kümmü ajeeene dhorro ka tumma ma timin'da ma Masala nja İnjilli tammo Yasu afa meene ka taföönyö ka kadafööni tanno Yasu no kungngo.

### Töötüü

<sup>1</sup> Waraga ya ö'dö ndama a'a Yahüusa ömö'di ma linggo ya Yasu Almasiihi nja örre tiya Yaguub, nunggu co ka kadu tanno Masala Pupa ka tümmünü euge no Pupa yaaja kasaasa euge mafa kene ana Yasu Almasiihi.

<sup>2</sup> 'Bangnga mungngo ada dhabbu nja ta'dila nja tasaasa.

### Katalaana na korokoro no (2 Bütrüs 2.1-17)

<sup>3</sup> Kadu eede nasaasa a'a tagarigiri ada waraga aaga ma toolonadene tanno aja no, a'da niji a'a eedi yeede ka anangnga a'a ka rigiri adaga waraga aaga amang kada takardha ku'bu aaga talingga dhorro ma tümmöönö ka tammo tanno Masala ka anangnga a kadu tanno oono nye'de te unggodho.

<sup>4</sup> Kudumma kadu könö kinggide kalinggo diidi ma Masala kafiri kada ka söödö kada ünggü ma taga'da türü na Masala kafa kaja taganeene taneene ma tatoroko. Egee ka'düsünü Uugaara yaaja Yasu Almasiihi ya unggodho ya.

<sup>5</sup> Nasaasa a'a tadirina tumma aaga, kussu aaga a'da Masala kono ka toolona kadu noono ka Misiri, lakiini amussu kungngo ya magirina kadu no taalo kamma kono no.

<sup>6</sup> Nja kadhangga tanno taalo kümmü linggo neene dhorro no, kaadha ka 'buugu ma taneene tiya eene, mafi'dini Masala egee ku'bu a nakilli ta'billi manangnga egee ka 'buugu tiya alüllü ya ara uuru ma tasigidene na dhabbu no köö'dö.

<sup>7</sup> Afa Sadöma nja Amuura nja naanya tanno akete kene no, kagalinggo eema ya toroko ya temelö ya taalo adho ka füni ya,

kara tapusu adene ka issi ta'billi amang ka kadu töccö tussu.

<sup>8</sup> Kadu no kaneene afa kadu ma kümböödö no, ma taga'da tuu'da neene ana eema ma temelö, kanu ka tauugaara keela kadhangga.

<sup>9</sup> Mündä Mikayiil ya uugaara ma kadhangga ya kene ka tisaana ka oona ma oofo tiya Müüsa nja Ebliisi ya, taalo agasigi i'i a tumma ma midhi agala ka tiki iini, "A Masala teela o'o."

<sup>10</sup> A kadu na miini no kar'daana eema a'da taalo kussu, lakiini eema yeene ka tussu ya, kussu i'i afa ma eema ma eriöö ya taalo ussu niimö ya, i'i yungngo anangnga egee ka taama.

<sup>11</sup> Am'ba kene kudumma eene ka tuurna ton'd'o ya Kayin keere, kümmünü eyi yeene ka tam'baga afa Balam kisi ka eema ma almaala keere, kaaya afa Koreh iini ka tagaanu ka tumma tanno Masala.

<sup>12</sup> Kafeene nja nyoro ka 'buugu ma tagureene ma tanagöre kaguri a'da taalo modolo magu egee, kanaana iyye ka eyi tiya eene, kaguri küüsü. Kafeene nja tütlüögü na 'büdü ka titaalo kide no, a tanya tüös iini. Egee ka naafa ma tüyi taalo iyye kide kaaya teera kafannadene ana ereere.

<sup>13</sup> Kafeene nja 'büdü ma to tiya lumuli ya üpü ndoore kada modolo, egee kafeene nja midigi tammo öleele ün'dügüngö mo. Masala mafa kene ma tanangnga egee ka 'buugu tiya lüllü ya turi.

<sup>14</sup> Akanuk ya iidümmü afünü eera ka Adam keere ya adirina tumma eene iki, "Aaga assa ka Uugaara ka öö'dö nja kadhangga tanno iini na insili no kadhabbu.

<sup>15</sup> Ara tö'dö tümmü kadu nye'de asigi kadu no oroko, neene ka teema kini ko'do egee na oroko no ka eema tiya eene ka talingga ya nja eema tiya toroko ya."

<sup>16</sup> Kadu no ka'digineene kar'daana eema, karuna eema ma tatoroko ma nanggeedi tanno eene, ka'diniga oona neene coo'do killi kadu könö ma tasaasa eema ma nanggeyi tanno eene.

### Taneene ma kadu ma kaniisa

<sup>17</sup> Illi aaga kadu eede, aaga kfügi tumma na kadaffiini tanno Uugaara tiya aja Yasu Almasiihi ka tageema 'billi no.

<sup>18</sup> Kiki aaga, "Kadu kinggide kara sa köö'dö ka uuru tanno eere no kamidhi aaga, kuurna füni ma tatoroko yeene keere."

<sup>19</sup> Egee kasümünaana kadu ku'bu kasaasa eema ma 'büdhüllü taalo Korongore eene ka oona.

<sup>20</sup> Lakiini aaga kadu eede, aaga idhi oona ku'bu ka tammo ma Masala tammo insili

mo, aaga tafara ka Masala a Koronggore  
tiya Insili ya.

<sup>21</sup> Aaga fa ka oona ka tasaasa ma Masala,  
aaga tündhigï 'bangnga ma Uugaara tiya  
aja Yasu Almasiihi ma tö'dö a tefe ka 'dï  
ta'billi aaga.

<sup>22</sup> Aaga ana 'bangnga ma kadu tanno  
aleefe ta'doore ka nanggeedi no.

<sup>23</sup> Iisi kadu ökönö na asaasa toolonadene  
ka issi no unguu euge kürö, ala 'bangnga  
a kadu ökönö a ri'ba, lakiini anu ka en'di  
tiya yeene ya nyoro a tuu'da tanno eene ka  
tanyoro euge.

*Tamana ta'diila a Masala*

<sup>24</sup> Masala mana türü ma tafa kada  
kudumma ma eema tiya toroko ya, mara  
kanangnga aaga ka 'dingnge kidha ma  
tïdhïndhï tanno oono, aaga tadhadho a  
tumma ma toroko ya titaalo ada ka oona.

<sup>25</sup> A tïdhïndhï na Masala ma unggodho  
mo tatoolona yaaja ana Yasu Almasiihi  
Uugaara yaaja, tïdhindhï nja tauugaara  
nja nagûrûnû tanno dhidha no, nja  
'bitïngngö nja ta'billi. Amiin.

## Waraga ya Yühanna ma Tumma tanno Yasu Tafa'da tumma

Sorne ya tafiiñi Yühanna, i'i yungngó arigiri ma tanangná tindhgíi njá tafünügú kadu ma kanuisa ko'do na kadu kadalingga ege kudumma ma tamma tanno eene ka Yasu Almasiihi no. I'i arigiri a'da Almasiihi ara tii'bi kadu na anu ka tumma tanno Masala no, ara ka anangná talingnge a kadu tanno ütü ka tamma ka Masala no. I'i arigiri nawaraga co nakaniisa tanno iidümmü kafünü keera no ma tuu'bu ege ka nanggeedi a'da kütü ka tamma kafada ka fiiní ma talaana tanno toroko no nja ungnó ma tam'baga (Tumma na Yasu 2–3). Yühanna ikiri eema yiini ka tijöögö ma Masala ka kööyö nja tanno amana tidhindhi iini (Tumma na Yasu 4). Yühanna iji 'buugu ma dhünggú ya agiididene, Almasiihi ya a'duga sorne ka nüisö ma Masala ya kudumma iini i'i yungngó ama tafa'da i'i. Tiji 'buugu no kaala angnga a'da Masala nja Almasiihi ege kungngó kafa ka eema tiya ka 'büdhülü ya (Tumma na Yasu 4–5).

Yühanna iji 'buugu ma tahükümü tanno ara tö'dö ka kadu tanno anu ka Masala no, tiji 'buugu ma nahitimi ka iidümmü kafünü eera (Tumma na Yasu 6.1–8.5), tijöögö ma iidö ka iidümmü kafünü eera (Tumma na Yasu 8.6–11.19), nja tijöögö ma naadho ka iidümmü kafünü eera (Tumma na Yasu 16.1–21). Almasiihi ara tii'bi tatoroko ara tümmü kadu na anu ka timin'da tanno iini in'dili kungngó (Tumma na Yasu 17–20). Masala mara taga'da 'büdhülü ya, mara ka talinggo 'büdhülü ya issi ya, a kadu na ümmü i'i kada dhorro no kara taneene kada unggodho ta'billi. Taalo 'büdü ma iïye ma tad Hügürü alla tin'di alla inde (Tumma na Yasu 21–22).

<sup>1</sup> Tumma na Yasu Almasiihi ka öö'dö iini ndama Masala, aala a kasaga tanno oono minna ara talinggo adene areere. Magürünü tadhangga yoono a'da aco adrina a tasaga tiya oono Yühanna.

<sup>2</sup> A Yühanna tadiri eema yiini ka tadiñö kide ya nye'de ma Masala nja tumma tanno Yasu Almasiihi.

<sup>3</sup> A'diila nja ömö'dü tiya iirü tumma ma tane'bi no, a'diila nja kadu na toodo kide kamma kide, kanangná tumma na kirinja kide no ka nanggeedi, kudumma uuru ka ndakete.

*Tööjüllü nakaniisa na iidümmü kafünü eera no*

<sup>4</sup> A'a na Yühanna nunggu a'a tumma no co nakaniisa tanno iidümmü kafünü eera no ka anya ma Asiya no.

A türü nja ta'diila tanno Masala a tananja aaga ndama Masala ndama tiya inggide ya nja tiya aganna kide ya nja tiya ara tö'dö ya, ndama nagoronggore tanno iidümmü kafünü eera no kidha ma kööyö tiya iini,

<sup>5</sup> ndama Yasu Almasiihi ya adho ka fiiní ya, ya adinö ka tumma ma Masala, ya afiki'dö ka inde ka dhidha ya, a tauugaara ma naguugaara ma 'büdhülü. I'i asasa angnga olona angnga ka tatoroko tanno aja ana eriñdö tiya iini.

<sup>6</sup> Anangná angnga kada tauugaara nja ka'boge ma talinggo ada a Masala nja Pupa tiya iini, tidhindhi nja türü kungngó iini turi ta'billi. Amiin.

<sup>7</sup> Aaga assa kini inni unggunu atö'dö ndama tülüögü,  
a kadu nye'de kara tiji i'i  
nja kadu tanno üfö i'i no,  
a kadu ka 'büdhülü nye'de tafara kudumma iini.  
Kara tatimin'da. Amiin.

<sup>8</sup> Masala Uugaara mikí, "A'a na dhidha na ta eere, oogo ma 'bitüngngö, maganeene, oogo mungngó mara tö'dö, mana türü ma eema nye'de."

*Tata tüm'bü ma tumma tanno Yasu*

<sup>9</sup> A'a na örre tiya ada Yühanna, angnga ta unggodho ka dhügürü nja tauugaara nja tidhi oona ku'bu naaja ka Yasu. Naganna a'a ka jasiira ma Batümüs kudumma tumma ma Masala nja tumma tanno Yasu.

<sup>10</sup> İkiri Koronggore ka 'dingngö kede ka oona ka uuru ma Uugaara, ikiri a'a ka föonyö ömö'dü kalneege ko'd'o afa fara ma tiniidö.

<sup>11</sup> Iki, "Kiri eema yüdü ka ijöögö ka sorne ya ku'bu nunggu co a nakaniisa tanno iidümmü kafünü eera no ka Afosus nja Samirna nja Pregamus nja Tiyatira nja Saardis nja Filadilifa nja Ladüküya."

<sup>12</sup> Nikiri a'a ka tassa keere ma tiiri ömö'dü ya eema nja a'a ya, nasala nakoyo ma nagalamba ma dahaba iidümmü kafünü eera.

<sup>13</sup> Nasala a'a ömö'dü ka 'dingngö ka söödö ma nakoyo ma nagalamba afeene nja 'Bii'bala ma Tadü'dü, ten'di ma ungnó iini ka oona ma dhonggoro malla maco uune, a jönnö ma dahaba mimi'didene kini ka orro.

<sup>14</sup> Awu ma üüdü yiini a'bassa afa musa, afeene nja ndugaara, iiye niini ta'dangnga'da afa issi.

<sup>15</sup> Uune niini kalimaana afa tanyaanya na lukulukadene ka motoo'do no, tumma niini kafeene nja fara ma 'biidü tiya iisö ku'bu dhabbu ya.

<sup>16</sup> Ümmü midigi mündümümü mafünü eera ka nüsö ma kuri nja kulu'ba ma dhonggoro mo, mana kuri ka na'dugugini ateera meene micci akürö ndama miini ka nünnö, alimaana ka dhugudha afa ndanaaya ma uuru ka teene.

<sup>17</sup> Kede ka tasala i'i ya na'dingga kini ka uune afa ömö'di ya eyi ya, ikirü ka tümmünü nüsö ma kuri niini eede ka oona iki, "Fa tariba, a'a na dhidha na ta eere,

<sup>18</sup> a'a nefe ka 'dii ya naga eyi a'a nungngo nefe ka 'dii ta'billi turi ta'billi, a'a nana türü nadagii'bi inde nangafata ma inde ungngo eede nja 'buugu ma inde.

<sup>19</sup> "Nggege arigiri eema yüüdü ka ijöögö ya so, eema ya 'bitingngö nja tiya ara tö'dö keere afe'de ya.

<sup>20</sup> A nünmö ya küdhü ma midigi tammo iidümümü mafünü keera mo müüdü kijöögö kede ka nüsö ma kuri mo, nja nakoyo ma nagalamba ma dahaba nüüdü na iidümümü kafünü eera no, midigi tammo iidümümü mafünü keera mo eege ka kadhangga ma nakaniisa tanno iidümümü kafünü keera no, nja nakoyo ma nagalamba ma dahaba na iidümümü kafünü eera no eege ka nakaniisa tanno iidümümü kafünü keera no."

## 2

### Tumma ma co kaniisa ma Afosus

<sup>1</sup> "Arigiri ada tumma co tadhangga ma kaniisa ma Afosus,

Tumma no ö'dö ndama ömö'di tiya ümmü midigi mündümümü mafünü eera mo a nüsö ma kuri, unggene ka söödö ma nakoyo ma nagalamba ma dahaba ma iidümümü kafünü eera no.

<sup>2</sup> Nussu a'a linggo nüüdü a dhügürü tiya üüdü nja tidhi oona ku'bu tanno üüdü. Nussu a'a a'da taalo o'o nasaasa tumma na kadu tanno oroko no, nussu a'da nagürii o'o taneene ma kadu tanno iki a'da eege kada kadafüni a'da eege taalo kada kadafüni naduna eege kada korokoro.

<sup>3</sup> O'o nidhi oona ku'bu nadagalinggo dhorro kudumma eere tiya eede nitaalo nagi'di.

<sup>4</sup> Lakiini nünmö yeede ka koroo'bo nja o'o miini ya, kudumma üüdü ka taadha ka tasaasa nüüdü na dhidha no.

<sup>5</sup> Agüögü kiga yungngö üüdü ka 'dinggö ndama iini, naadha ka tatoroko napadaga ka linggo tanno üüdü ka dhidha no, üürü taalo o'o naadha ka tatoroko ya, ara a'a tö'dö küdü na'duga nakoyo ma lamba yüüdü ka 'buugu tiya oono.

<sup>6</sup> Lakiini tumma no kanangnga a'a ka 'diila nja o'o kudumma üüdü ka anu ka tumma na naNikola afa meeđe ka anu kide kungngö.

<sup>7</sup> Ömö'di ya ana iisine ya fa kini atoodo ka tumma tanno Koronggore ka teemaga co nakaniisa no. Ara a'a tanangnga ömö'di ya ii'baana kagu fa ma tefe ka 'di ya ka 'di ma singgi ma Masala ya."

### Tumma ma co kaniisa ma Samirna

<sup>8</sup> "Arigiri ada tumma co tadhangga ma kaniisa ma Samirna,

Tumma no kö'dö ndama ömö'di tiya dhidha ya nja tiya eere ya, ömö'di ya aga eyi efe ka 'dii afe'de.

<sup>9</sup> Nussu a'a dhügürü yüüdü, nussu a'a a'da na'döngngönyö o'o, lakiini tumma dhorro nana o'o eema dhabbu, nussu a'a tumma ma midhi ma kadu tanno iki a'da eege ka Yahüüdü no, lakiini eege taalo ka Yahüüdü, lakiini eege ka la ma talaana kadu tanno Ebliisi.

<sup>10</sup> Fa tariba a dhügürü tiya ara tö'dö küdü ya, ara Ebliisi tanangnga kadu könö ana kada ka pabusu ma ta'b'ba aaga, aaga tüüni muuyu kide a fungngö ada'baaga. Aaga ümmü tumma neede dhorro sala aaga taaya, ara a'a tanangnga ndalembö ma tefe ka 'di aaga.

<sup>11</sup> Ömö'di ya ana iisine ya fa kini atoodo ka eema tiya Koronggore ka teemaga co a nakaniisa ya, ömö'di ya ii'baana ya taalo inde kara tili i'i ka oona teera ara."

### Tumma ma co kaniisa ma Pregamus

<sup>12</sup> "Arigiri ada tumma co tadhangga ma kaniisa ma Pregamus,

Tumma na ömö'di ya ana kulu'ba mo dhonggoro mana kuri ka na'dugugini a teera meene mo.

<sup>13</sup> Nussu a'a a'da nanna o'o kiga, 'buugu ma kööyö tiya Ebliisi ya kiga. Nümmü o'o tumma ma a'a dhorro taalo o'o nanu ka tamma tanno eede, münda ka uuru tanno Antibas ömö'di ya amma kede ya, eema tumma neede dhorro ya, agiidene kada kanna ka 'buugu tiya Ebliisi ka tanna kide ya.

<sup>14</sup> Lakiini nünmö inggide idhilli anangnga a'a ka koroo'bo nja o'o, kudumma kadu könö kungngö üüdü kümmü talaana na Balam, ya kalaana Blak ma tanangnga kadu ma Israyil a'da

ka'dingga ka kodhi ma tatoroko kagu uu'da ma türri ma namasala, küünii eema ma weerö ma temelö.

<sup>15</sup> Afe'de kadu könö kungngo üüdü kümümü talaana na naNikola.

<sup>16</sup> Nggege aadha ka tatoroko, üürü nanu o'o ya, ara a'a tö'dö küdü kannareere nö'dö teema koro'bo nja eene a kulu'ba tammo dhonggoro mo meeđe ka niinö mo.

<sup>17</sup> Ömö'dii ya ana iisine ya fa kini atoodo ka tumma tanno Koronggore ka teemaga co nakaniisa no. Ömö'dii ya ii'baana ya, ara a'a tanangnga alman ya kaküdhü ya, nanangngä müsi ma 'bassa mo iini ma eere tiya issi ya, ka takirinja kide, taalo ömö'dii ma tussu illi ömö'dii ya ananja iini ya."

*Tumma ma co kaniisa ma Tiyatira*  
<sup>18</sup> "Arigiri ada tumma co tadhangga ma kaniisa ma Tiyatira,

Tumma no kö'dö ndama 'Bii'bala ma Masala ya afinne ka iiye afa issi ya, uune niini ka afeene nja tanyaanya tanno alukulukadene no.

<sup>19</sup> Nussu a'a linggo nüüdü, nussu tasaasa nüüdü nja tamma nja linggo nja tidhi oona ku'bu, nussu a'a a'da nalinggo o'o dhabbu nadagii'bi linggo na dhidha no.

<sup>20</sup> Lakiini a'a nagoroo'bo nja o'o kudumma üüđü ka toolomana aka mana eere a'da Isabeel mo ko'do, mümmü eyi yoono a'da oogo ma ne'bi, malaana kadu neede a'da küünii eema ma temelö kagu uu'da ma türri eema ma namasala.

<sup>21</sup> Nanangngä a'a naguuru oono a'da maadha ka tatoroko illi oogo manu ka taadha ka temelö tanno oono.

<sup>22</sup> Yungno eede kara tapügü oogo ka tenggere ma dhügürü, nadhifi kadu na füngngö ana oogo no kadhägürü, üürü kene ka titaaloo kaadha kalinggo ma tatoroko tanno oono.

<sup>23</sup> Ara a'a tagirina laala yoono afe'de, amang ka nakaniisa tussu a'da nawwa a'a nanggeedi nja nanggüüdü, ara a'a tamana eema aaga kada köje nja türü tanno üüđü.

<sup>24</sup> A 'bitüngngö niki aaga, aaga na türeene ka Tiyatira no, aaga no taalo kata'da ka talaana tanno oono, taalo kussu tumma neene ka teema a'da tumma na Eblisi na küdhü no, ara a'a tiki aaga a'da, taalo a'a nara tadho aaga ka oona a niimö tiya indhi ya afe'de.

<sup>25</sup> Lakiini aaga fa ka tiya kada ya, ara a'ka öö'dö.

<sup>26</sup> Ömö'dii ya ii'baana ya, ütü ka tumma tanno eede turi ya, ara a'a tanangnga tauugaara iini ma kadu nye'd'de kungngo.

<sup>27</sup> 'Ara i'i tauugaara meene a kuufi ma ndalili, a'böyö ana eege ku'bu afa nadhafala ma tam'bala kungngo,' afa meeđe ka 'duga tauugaara ka Pupa tiya eede.

<sup>28</sup> Ara a'a tanangnga ndalfoore ma taka iini afe'de.

<sup>29</sup> Ömö'dii ya ana iisine ya fa kini atoodo ka eema tiya Koronggore ka teemaga co a nakaniisa ya."

### 3

*Tumma ma co kaniisa ma Saardis*

<sup>1</sup> "Arigiri ada tumma co tadhangga ma kaniisa ma Saardis,

Tumma na ömö'dii tiya ana nagoronggore ma Masala ka iidümmü kafünü eera nja midigi ma iidümmü mafünü eera ya, nussu a'a linggo nüüdü, o'o nefe ka 'di ana eere, lakiini neyi o'o.

<sup>2</sup> Adinö ko'do nafa ka 'bandefe ka 'dii ya öreeene ya ndakete kara teyi kudumma linggo tanno üüđü taalo kadho ka fiinii kidha ma Masala tammo eede.

<sup>3</sup> Agüji eema yüüđü ka takalaadene kide na tafoönyö ya, amma kide, naadha ka tatoroko. Küdü ka titaaloo nadinö ko'do ya, ara a'a tö'dö küdü afa tanyooro, taalo o'o nara tussu uuru neede kara tö'dö küdü iini no.

<sup>4</sup> Lakiini ligi kadu könö ungngo üüđü ka Saardis, taalo kanyoro ten'di yeene, kara tunggeene nja a'a ana en'di tiya ka'bassa ya ka oona, kudumma eene kama tümmöönö.

<sup>5</sup> Ömö'dii ya ara tii'baana ya ara tümmü ten'di ya ka'bassa ka oona afa meene, taalo a'a nara ta'duga eere yiini ka sorne ma tefe ka 'dii, lakiini ara teema tumma niini kidha ma Pupa tiya eede nja kadhangga tanno iini.

<sup>6</sup> Ömö'dii ya ana iisine ya fa kini atoodo ka tumma na Koronggore ka teemaga co nakaniisa no."

*Tumma ma co kaniisa ma Filadlifya*

<sup>7</sup> "Arigiri ada tumma co tadhangga ma kaniisa ma Filadlifya,

Tumma ndama ömö'dii tiya insili ada timin'da ya ana ngafata na Dawud kini kara tafa'da inye, taalo ömö'dii ma teere kide, a kini kara teere kide ya, taalo ömö'dii ma tafa'da.

<sup>8</sup> Nussu a'a linggo nüüdü. Assa, a'a nungngo nafa'da inye o'o taalo ömö'dii ara tambaranya teere kide. Nussu a'a a'da o'o a 'bantürü yüüđü ya dhilli ya, nümmü o'o tumma neede nafa kide, niatalo na'düsünü eere yeede.

9 Ara a'a tanangnga kadu no ma la ma talaana ma Eblisi na ümmü nanggeyi neene a'da egee ka Yahüdü lakiini egee taalo ka Yahüdü, a'da kakorokoro, ara a'a tanangnga egee ka tüürü küdü kidha ana kütüge, amang kene tessu a'da a'a nasaasa o'o.

10 Kudumma üüdü ka tamma nidhi oona ku'bu ka tumma tanno eede, ara a'a tafa küdü ka uuru ma tatoroko tanno ara tö'dö, ma tara tö'dö ta'b'ba kadu ka oona nye'de na anna ka 'büdhülü no.

11 Ara a'a tö'dö areere, afa ka eema tiya üüdü 'bitingngö ya ii'di ömö'di öccö ta'duga ndalembö nüüdü.

12 Ara a'a tanangnga ömö'di ya i'i'baana ya kada miide ma la ma Masala tammo eede, taalo atö'dö kürö ndama iini. Ara a'a tarigiri eere kini ka oona ana eere ma Masala tammo eede nya eere ma anya tammo Masala tammo eede Örsaliim ma issi mo, mara tö'dö ku'bu ndama 'dotombo'do ndama Masala tammo eede. Nakiri eere yeede ya issi ya kini ka oona.

13 Ömö'di ya ana iisine ya fa kini atoodo ka tumma tanno Koronggore ka teemaga co nakaniisa no."

#### *Tumma ma co kaniisa ma Ladüküya*

14 "Arigiri ada tumma no co tadhangga ma kaniisa ma Ladüküya,

Tumma na ömö'di tiya Amiin adho ka fiini adhorro nya timin'da, i'i ya üüdü ma eema tiya Masala ka tadina ya.

15 Nussu a'a linggo nüüdü, nussu a'a a'da taalo o'o niicolo alla nagu'daana, nasaasa a'a a'da o'o niicolo alla nagu'daana.

16 Kudumma üüdü ka tayuyu taalo niicolo nitaalo nagu'daana ara a'a tunggu o'o kürö ndama niinö tanno eede.

17 Niki o'o a'da, 'Nüüsü a'a nana eema dhabbu, taalo a'a nasaasa niimö,' lakiini taalo o'o nussu tumma üüdü ka tarodo ka en'di ka oona, nüüni muuyu, nüüni mananggööyö, eema titalo küdü, nakisinsoro, naneene ana oona ku'bu.

18 A'a tadirina tumma o'o a'da nana dahaba kede, ya lukuladene ana issi, amang küdü tüüsü, afe'de nana en'di ya ka'bassa ya, nagirni küdü ka oona amang küdü taküdhu oona ma modolo nüüdü no. Nana müri ma iiye namana küdü ka iiye amang küdü tiji 'buugu.

19 Ara a'a talaana ömö'di yeede ka asaasa i'i ya nagirnaana kini. Nagu'daana ka eedi naadha ka tatoroko tanno üüdü.

20 Na'dingne a'a ka ïnye nadhoodho, ömö'di ya föönyö tumma neede afa'da

ïnye ya, ara a'a co naguri nya iini, aguri nya a'a.

21 Ömö'di ya ara tii'baana ya, ara a'a tanangnga i'i ka temmi ka kööyö nya a'a, afa meede ka tii'baana nemmi nya Pupa tiya eede ka kööyö tiya iini.

22 Ömö'di ya ana iisine ya fa kini atoodo ka eema tiya Koronggore ka teemaga co nakaniisa no."

## 4

#### *Kööyö na ka 'dotombo'do ya*

1 Nikiri a'a ka tasala ïnye ma 'dotombo'do ka tafa'da. Tumma ma ömö'di yeede ka aföönyö ka dhidha ya eema nya a'a a tumma kafeene nya tiinöö iki, "Sürigi ko'do kita na a'a tala o'o ka niimö tiya ara talingga adene ka tiya keere ya."

2 Amussu kungngö ya, a Koronggore ka 'dingngö kede ka oona, kede kidha kanna nasala kööyö ka 'dotombo'do ana ömö'di ka temmi kide.

3 Ömö'di ya emmi ya, afeene nya müsi ma dhöö mo nya niigisi tanno kirikiri mo nya tam'billi taku'du kööyö ko'do afeene nya samaret.

4 A nagööyö kukumu kadu kafünü egüsö no (24), kaku'du kööyö ko'do, a kadiiñi no kukumu kadu kafünü egüsö no, kemmi ka kööyö kümümü en'di kada ka'bassa, kalembö ma dahaba kungngö eene ka nanggööyüd.

5 A talimaana ma tombo'do ticci aküro ndama kööyö, a fara ma baana ma tombo'do. Kidha ma kööyö a nakoyo ma lamba ka iidümmü kafünü eera kafinne, nagoronggore ma Masala na ö'dö ka iidümmü kafünü eera no eege kumiini.

6 A kidha ma kööyö afeene nya to ma gasasa ka tinsili afa nduguri.

A ka söödö miini, taku'du ma kööyö eema tiya efe ka 'dö ya egüsö ya, iiye ungngo eene kadhabbu kidha nya eere.

7 Niimö ya adinö ya dhidha ya afeene nya tagaamu, aya asigi kide ya afeene nya kodha, a niimö ya adinö ya iidoona ya afeene ka dhugudha ma ömö'di, a niimö ya adinö ya egüsö ya afeene nya kolo tiya alagala ya.

8 Ndama eema tiya efe ka 'dö ya egüsö ya nye'de, egedhe ungngo eene iidümmü kafünü unggodho, iiye aku'du egee ka oona ndama teene nya kürö, taalo tüüsü meene ma rumeeene osooso a naguuru, "Tinsili, tinsili, tinsili,

Masala Uugaara ma ana türü mo, ma 'billi nya 'bitingngö mara tö'dö."

<sup>9</sup> Eema ya egüsö ya efe ka 'dī ya tüwe tüüsü ma tafünögü ko'do nja ta'diila nja tindhgü ko'do a ömö'dī tiya emmi ka kööyö ya efe ka 'dī turi ta'billi.

<sup>10</sup> A kadiifi no kukumu kadu kafünü egüsö no, tüürü ka ömö'dī tiya emmi ka kööyö ya kidha kamma ka ömö'dī ya efe ka 'dī ta'billi, kadhifi kalembö neene kidha ma kööyö kiki,

<sup>11</sup> "Ka Uugaara müdi nja Masala, o'o nama tindhgü ko'do nja tamma nja tüürü, kudumma üüdü ka talingga eema nye'd'de ndama eedi tiya üüdü eefe ka 'dī."

## 5

### Sorne nya dhünggü

<sup>1</sup> Nikirii a'a ka tasala sorne ka niisö ma kuri, tanno ömö'dī ya emmi ka kööyö ya ikirinja ka teene miini nja 'dugeere miini, kabunnü nahitimi kide ana hitimi na iidümmü kafünü eera no.

<sup>2</sup> Nasala tadhangga ana türrü eema ko'd'o iki, "Mada i'i yungno ama ta'buna nahitimi ku'bu afa'da sorne?"

<sup>3</sup> Taalo ömö'dī ka 'dotombo'do nja 'büdhülü nja 'büdhülü ka tüm'bü atambaanya tafa'da sorne assa ka nüümö tiya inggide ya.

<sup>4</sup> Natafara 'do kudumma ömö'dī ka titalo adunadene ma tama tafa'da sorne iiri nüümö ya inggide ya assa kide.

<sup>5</sup> İkirii tadiifi könö ka tiki a'a, "Fa tafara, assa tagaamu ma siliga ma Yahuusa, a 'bereere a ma Dawud i'i akii'baana ana türrü, a'bunaana nahitimi na iidümmü kafünü eera no afa'da sorne."

<sup>6</sup> Nikirii a'a ka tassa ka dhünggü kafeene afa miini ka tendhe a'dingnge ka söödö ma kööyö nja eema tiya efe ka 'dī ya egüsö ya nja kadiifi. Nja dhünggü ya ana iidö ka iidümmü kafünü eera nja iyye ka iidümmü kafünü eera no, egee ka nagoronggore na Masala na iidümmü kafünü eera no, kagürünüdene ka 'büdhülü ka oona nye'd'de.

<sup>7</sup> İkirii dhünggü ka öö'dö a'duga sorne ka niisö ma kuri tanno ömö'dī tiya emmi ka kööyö ya.

<sup>8</sup> Kini ka 'duga sorne ya, ikirii eema ya egüsö ya efe ka 'dī ya nja kadiifi no kukumu kadu kafünü egüsö no ka tüürü ka dhünggü kidha a nagüüge, kisirin'di unggö eene ka iisine egee in'dili, a naadho ma dahaba kadigine a kondho, teema nja Masala na kadu tanno insili no egee kamiini.

<sup>9</sup> Katagüüwe tüüsü ma issi mo kiki,

"O'o nama ta'duga sorne nafa'da nahitimi miini kudumma üüdü ka takatendhe na o'o taana kadu a Masala ana eriidö tiya üüdü ndama kadu kasiliga nja tumma ka tambanajaana ku'bu nja kadu nja naanya 'do."

<sup>10</sup> Nanangga eege kada tauugaara nja ka'boge na Masala, kada naguugaara ma 'büdhülü."

<sup>11</sup> Nassa co afe'de nafoönyö tumma ma kadhangga dhabbu. Kaku'du kööyö ka oona nja eema tiya efe ka 'dī nja kadiifi. Eege na alif kafünü kide ana alif kada'baaga.

<sup>12</sup> Kalnege ko'd'o kiki, "Dhunggü ya atendhe ya i'i yungno ama ta'duga türü nja eema dhabbu nja ta'dara nja türü nja tindhgü ko'do nja tafünögü ko'do."

<sup>13</sup> Naföönyö a'a eema tiya ka 'dotombo'do ya nja tiya ka 'büdhülü nja tiya ka 'büdhülü ka tüm'bü ya nja tiya ka to ya nja 'buugu ka oona nye'd'de iki, "Ömö'dī tiya emmi ka kööyö ya nja dhünggü,

kada kanangnga ta'diila a Masala nja tindhgü ko'do nja tafünögü ko'do nja türü turi ta'billi."

<sup>14</sup> Eema ya efe ka 'dī ya egüsö ya tiki, "Amiin," a kadiifi tüürü ku'bu a nagüüge kafara kini.

## 6

### Tafa'da nahitimi na iidümmü kafünü eera no

<sup>1</sup> Nasala a'a dhünggü ka tafa'da hitimi ya dhidha ya ana ka na iidümmü kafünü eera no, nikirii a'a ka föönyö nüümö tiya efe ka 'dī tiya egüsö ya, alneege ko'd'o kafeene afa fara ma baana ma tombo'do, "Aayu!"

<sup>2</sup> Nikirii a'a ka tassa co kanna nasala muttu a'bassa, ömö'dī ya aka kide ya ana taprpara ka niisö a ndalembö ma tii'baana ananja iini, öö'dö kürö ma tii'baana ii'baana.

<sup>3</sup> Ka dhünggü ka tafa'da hitimi ya eera ya, naföönyö a nüümö tiya efe ka 'dī ya eera ya ka tiki, "Aayu!"

<sup>4</sup> A muttu könö adhöyö ö'dö kürö. Ömö'dī ya aka kide ya, ananja türü iini ma tö'dö a'duga ta'diila ka 'büdhülü, amang ka kadu tagirina ajeene. Kanangnga kulu'ba ma dhonggoro mo iini.

<sup>5</sup> Aga dhünggü ka ndafa'da hitimi ya iidoona ya, naföönyö a nüümö tiya efe ka 'dï ya iidoona ya ka tiki, "Aayu!" Nasala muttu ya 'dü'dü ya, ömö'dï ya aka kide ya, misaana ungngo iini ka nüüsö.

<sup>6</sup> Naföönyö tumma ka söödö ma eema tiya efe ka 'dï ya egüösö ya, katiki, "Almiti ma dhokoro ana jine ama uuru ka ungodho, almiti ma mudeere ma iidoona ana jine ma uuru ka unggodho, lakiini fa taga'da uu'ba nja ngeeli."

<sup>7</sup> Ka dhünggü ka tafa'da hitimi ya egüösö ya, naföönyö a nüümö tiya efe ka 'dï ya egüösö ya ka tiki, "Aayu!"

<sup>8</sup> Nikirï a'a ka tassa co nasala muttu iirifi kaseere, ömö'dï ya aka kide ya, ana eere a'da inde, nja 'buugu ma inde kuurna i'i keere kete, Türu kungngo eene ma 'dakeyi ma 'büdhü'lü ma tiidi eege a kulu'ba tammo dhonggoro mo, ana üre nja maara nja eema ma toroko ma 'büdhü'lü.

<sup>9</sup> Aga dhünggü ka ndafa'da hitimi ya iidümmü no, nasala nagoronggore tanno kadu na aradene no ka üüdü ma tumma tanno Masala no nja tumma tanno eene ka tageema no ka müsi ma türri ka tüm'bü.

<sup>10</sup> Kikirï katiidhe ko'd'o kiki, "Taagaada Uugaara ya Insili, ya tatimin'da ya, taalo o'o nara tümmü kadu ma 'büdhü'lü na'dünö ada ungngo ma eriidö tiya üid?"

<sup>11</sup> En'di ya ka'bassa ya, kananja kene ku'bu, iki eene a'da kagünü idhilli ara türeene ma köje nja kadu na alinggo no nja nagöre tanno eene no ara tagirinadene afa eege a'dimo.

<sup>12</sup> Nikirï a'a ka tasala dhünggü ka tafa'da hitimi ya iidümmü afünü ungodho ya. A 'büdhü'lü tatinggi'di dhindho, a ndanaaya ta 'dü'dü kafeene nja taliisi ma fara, a tere tafeene nja eriidö nye'd'e kungngo,

<sup>13</sup> a midigi ma 'dotombo'do ta'dünggö ka 'büdhü'lü afa üye ma indiyye na arume no ka 'dinggö ndama 'daafa a tanya ka tagi'di eege ka oona dhindho.

<sup>14</sup> A 'dotombo'do tadum'budu ko'do afa sekede, a na'dikinya nja najaseera tooso ka na'buugu tanno eene nye'd'e kungngo.

<sup>15</sup> A naguugaara ma 'büdhü'lü nja kadu nüifi no nja kadu ma eema dhabbu nja naguugaara ma nasigira, a naguugaara nja kasaga in'dili kungngo nja tanno taalo ka kasaga no, nye'd'e karünö kaco kubumba nja naagara ma na'dikinya.

<sup>16</sup> Kiki a na'dikinya nja naagara, "Aaga 'dinggö kidi ko'do aaga taküdhü ungngo kudumma üye tanno ömö'dï tiya emmi ka kööyö ya nja tagoroo'bo tanno dhünggü.

<sup>17</sup> Kudumma uuru ma tagoroo'bo tanno eene na dhabbu no ka ndö'dö, a mada i'i yungngo ara tambaanya eege?"

## 7

*Kadu ma Israyil nø'dö 144,000*

<sup>1</sup> Nggeege afe'de nasala a'a kadhangga ka egüösö ka'düngnge ko'do ka na'dugugini ma 'büdhü'lü ada egüösö miini, kakara a tanya ma 'büdhü'lü na egüösö no, amang ka tanya tafa tüüsö ka 'büdhü'lü nja to alla naafa.

<sup>2</sup> Nafada nasala tadhangga könö ö'dö ko'do ndama fiinä ma ndanaaya, hitimi ya Masala tammo efe ka 'dï mo ungngo iini. Ümmünü kadhangga na egüösö no ko'd'o na ana türü ma taga'da 'büdhü'lü nja to no.

<sup>3</sup> Iki eene, "Aaga fa taga'da 'büdhü'lü nja to nja naafa, ara ungngo kabünnü hitimi ka kasaga tanno Masala tammo aja ka nadhugudha."

<sup>4</sup> Nikirï a'a ka aföönyö a'da kadu na kabünnü hitimi kene ka nadhugudha no kö'dö na alif a kadu ka iidümmü a kadu keera kafünü egüösö (144,000) ndama siliga ma Israyil nye'd'e kungngo.

<sup>5</sup> Na alif kada'baaga kafünü eera (12,000) ndama siliga tiya Yahüusa

na alif kada'baaga kafünü eera (12,000)

ndama siliga tiya Röbin

na alif kada'baaga kafünü eera (12,000)

ndama siliga tiya Jad.

<sup>6</sup> Na alif kada'baaga kafünü eera (12,000)

ndama siliga tiya Ashir

na alif kada'baaga kafünü eera (12,000)

ndama siliga tiya Naftali

na alif kada'baaga kafünü eera (12,000)

ndama siliga tiya Manasi.

<sup>7</sup> Na alif kada'baaga kafünü eera (12,000)

ndama siliga tiya Shamön

na alif kada'baaga kafünü eera (12,000)

ndama siliga tiya Lawi

na alif kada'baaga kafünü eera (12,000)

ndama siliga tiya Yasakir.

<sup>8</sup> Na alif kada'baaga kafünü eera (12,000)

ndama siliga tiya Zabaloon

na alif kada'baaga kafünü eera (12,000)

ndama siliga tiya Yüüsif

na alif kada'baaga kafünü eera (12,000)

ndama siliga tiya Binyamiin.

*Kadu na dhabbu no*

<sup>9</sup> Nikirï a'a ka tasala kadu kadhabbu taalo ömö'dï ma tambaanya tinni eege ndama naanya nja kadu 'do nja tumma ka tambananajaanä ku'bu, ka'düngnge ana kö'dö kidha ma kööyö nja kidha ma dhünggü, kümmü en'di ya ka'bassa ya ka ona, kümmü iisine ma naafa ma tamuru.

<sup>10</sup> Kidhe ko'd'o kiki,

"Toolona kungngo a Masala tammo aja  
ma emmi ka kööyö mo

nja dhünggü afe'de."

<sup>11</sup> A kadhangga nye'd'e takaku'du kööyö ko'do nja kadiifii nja eema tiya efe ka 'dï

ya egüsö ya. Küürü ka kööyö kidha ana dhugudha kümmü Masala,  
 12 kiki a'da,  
 "Amiin, tafünögü ko'do nja tindhígí ko'do  
     nja tussu eema  
 nja tamana ta'diila nja tindhígí ko'do  
     nja türü nja tamaanya ka na Masala  
     tammo aja turi ta'billi.  
 Amiin."

<sup>13</sup> Ömö'di könö ana ka kadiifi iki a'a,  
 "Kadu öjö eege kungno kümmü en'di  
 ya 'bassa ya ka oona, eege kö'dö ndama  
 kiga?"

<sup>14</sup> Nikirii a'a ka tiki iini, "Ömö'di eede,  
 nussu o'o."

Iki a'a a'da, "Kadu no eege kungno  
 koolonadene ka dhügürü tiya dhiiri ya,  
 eege kamiini, kagunu en'di yeene ana  
 eriidö ma dhünggü anangnga eege kada  
 ka'bassa.

<sup>15</sup> Yungngo eene ka tanna kidha ma kööyö  
     tanno Masala  
     kalinggo ada oono uuru ana ooso  
         kungno ka la tiya oono,  
 nja ömö'di tiya emmi ka kööyö ya  
     ara taküdhü eege ka oona ka fangga  
         tammo iini.

<sup>16</sup> Taalo iire ara tagu eege,  
     a tenege ka tagu eege afe'de,  
 taalo ndanaaya ara tagu'du eege,  
     a tagu'daana taalo kara tala eege ka  
         oona.

<sup>17</sup> Kudumma dhünggü ya ka söödö ma  
     kööyö ya ara tadasaana afa kene  
     uurugu eege ka nduguli ma 'bïidö ma  
     tefe ka 'dï.

A Masala tayugu 'bïidö ma iiye eene ka  
     iiye."

## 8

*Hitimi ya üdümmü afünü eera ya*

<sup>1</sup> Ka dhünggü ka ndafa'da hitimi ya  
 üdümmü afünü eera ya, a 'buugu tamud-  
 hudhuli 'dotombo'do a dhüdhü ma  
 ndanaaya.

<sup>2</sup> Nasala kadhangga na üdümmü kafünü  
 eera no ka'dingnge ana ko'do kidha ma  
 Masala, üdö tananja eene ka üdümmü  
 kafünü eera.

<sup>3</sup> A kadhangga könö tö'dö ümmü dha  
 ma kondho ma dahaba öö'dö a'dingnge  
 ka misi ma tirri. A kondho tananja iini  
 dhabbu ma tirri iini, amang kini tagusu  
 ka fara ma kadu tanno Masala nye'de ka  
 misi ma tirri ma dahaba kidha ma kööyö.

<sup>4</sup> A ndhüögö ma kondho tisi a kürö ndama  
 niisö ma kadhangga in'dili nja tafara ma

kadu tanno Masala kaco oo'do kidha ma  
 Masala.

<sup>5</sup> İkiri tadhingga ka tümmü dha ma  
 kondho adigi issi ma tirri kide, apügü i'i  
 co 'büdhülü, tabaana ma tombo'do nja  
 talimaana ma tombo'do nja tatinggi'dü ma  
 'büdhülü.

*İdö na üdümmü afünü eera no*

<sup>6</sup> A kadhangga na üdümmü kafünü eera  
 no kümmü üdö ya üdümmü kafünü eera  
 no, kindinaana oona ku'bu ma tabbü eege.

<sup>7</sup> A tadhingga ya dhidha ya tabbü tñiidö  
 niini, ikiri olle tö'dö nja issi atonggoonyo  
 ana eriidö, öö'dö uurunja ka 'büdhülü. A  
 'dakeyi ma 'büdhülü tatinyogo, a 'dakeyi  
 ma naafa tatinyogo nja ooyo tiya agiiri ya  
 nye'de.

<sup>8</sup> A tadhingga ya eera ya tabbü tñiidö  
 niini, a nüümö adhabbu afa 'dikinya afinne  
 nye'de apügünja co to a 'dakeyi ma to  
 tatem'bele kada eriidö.

<sup>9</sup> A 'dakeyi ma eema ya efe ka 'dï ya anna  
 ka to ya taaya, a 'dakeyi ma namürkabü  
 tatangga'da.

<sup>10</sup> A tadhingga ya iidoona ya tabbü  
 tñiidö niini, a timidigi kadhabbu ka  
 a'dingga ndama 'dotombo'do ka finne afa  
 issi ka'dingga ka 'dakeyi ma neeri nja  
 nakanduguli ma 'bïidö.

<sup>11</sup> Eere ma timidigi a'da Tamaara. A  
 'dakeyi ma 'bïidö ta'bele a'diiri, a kadu na  
 kooye no taaya kadhabbu kudumma iini  
 ka'diiri.

<sup>12</sup> A tadhingga ya egüsö ya tabbü tñiidö  
 niini, a 'dakeyi ma ndanaaya tabbü adene,  
 nja 'dakeyi ma tere nja 'dakeyi ma midigi,  
 idhi a türeene ma töyeene neene talüllü,  
 a türeene ma töyeene ma uuru nja ooso  
 titaaloo.

<sup>13</sup> Nassa co nasala kolo ka alagala ka  
 söödö ma 'dotombo'do, eema ko'd'do,  
 "Am'ba, am'ba, am'ba ka kadu ma  
 'büdhülü kudumma türeene ma fara ma  
 fidö na kadhangga tanno iidoona no kara  
 tabaana."

## 9

<sup>1</sup> A tadhingga ya üdümmü ya, tabbü  
 tñiidö niini, nasala timidigi ka 'dingga ka  
 'büdhülü ndama 'dotombo'do, anangnga  
 ngafata ma ööye tiya adhonggoro ya  
 iini. A tadhingga ya üdümmü ya, tabbü  
 tñiidö niini, nasala timidigi ka 'dingga ka  
 'büdhülü ndama 'dotombo'do, anangnga  
 ngafata ma ööye tiya adhonggoro ya iini.

<sup>2</sup> A timidigi tafa'da ööye tiya dhonggoro  
 ya, a ndhüögö tisi kürö ndama iini afa  
 ndhüögö ma tambürüü'dü na dhabbu no,

a ndanaaya nja 'dotombo'do tandüüli nja 'buugu 'do kudumma ndhiigö ma ööye.

<sup>3</sup> A müdüünö tö'dö kürö ndama ndhiigö kaküdhü 'büdhüüli, a'duga türü afa türü ma na'baja ma 'büdhüüli kungngö.

<sup>4</sup> Kiki iini a'da afa taga'da ooyo ma 'büdhüüli alla ooyo ya kirikiri ya nja naafa, illi kadu na taalo kana hitimi ma Masala ka nadhugudha tanno eene.

<sup>5</sup> Taalo kananja türü eene ma tiidi eege, lakiini apusu eege a nagatereene küdümümü, tapusu niini kafeene nja tuföönö ma 'baja.

<sup>6</sup> Ara kadu tasaasa inde ka naguru tanno miini no taalo kara taluna, kasaasa taaya, inde tüsö eene ku'bu.

<sup>7</sup> A müdüünö tafeene nja naguttu no kindinaana oona ku'bu ma koro'bo no, eema ungngö eene ka nanggüüdi afeene nja kalembö ma dahaba, dhugudha yeene afeene nja dhugudha ma ömö'di.

<sup>8</sup> Awu yeene afeene afa awu ma iiya, igini neene kafeene nja kiselle ma agaamu.

<sup>9</sup> A naaro neene tafeene nja mudugusi ma ndaliili, a fara ma egedhe tiya eene kafeene afa uune ma karru ma naguttu kadhabbu kiisö ka koro'bo.

<sup>10</sup> Nakatiidi miini kaföönö afa nakatiidi ma na'baja, türü kungngö iini ma tili kadu ka oona a nagatereene küdümümü.

<sup>11</sup> Uugaara ungngö eene i'i ya tadhangga ma ööye ya dhanggoro ya, ana eere a tangga Ebriya yiini a'da Abbdün, a tangga Yünan a'da Abulion.

<sup>12</sup> Tagoroo'bo na dhidha no kanco, a tagoroo'bo öccö keera kara tö'dö afe'de.

<sup>13</sup> A tadhangga ya iidümümü afünü unggodho ya tabbü tiniidö, naföönyö fara köö'dö kürö ndama iidö tanno egüsö no ka misi ma tirri ma dahaba mo ka Masala kidha mo.

<sup>14</sup> A tumma tiki a tadhangga tiya iidümümü afünü unggodho ya ümmü tiniidö ya, "Apa ka kadhangga tanno egüsö no na imi'dinja ka ri ma Fürat ya dhabbu ya."

<sup>15</sup> A kadhangga tanno egüsö no kindinaana oona ku'bu nja ndanaaya nja urunu tere nja ürüünü, amang kene tagirina türeene ma kadu.

<sup>16</sup> Naföönyö a'a a'da nasigira ma naguttu kö'dö na alif kadhabbu.

<sup>17</sup> Nasala naguttu nja kadu tanno aka kide no a kümböödö kana namudugusi kafeene nja issi adhöyö öödhe, a 'dü'dü'dü, a kirikiri kafeene afa kebriit. A nanggüüdi ma naguttu kafeene nja nanggüüdi ma agaamu, issi tici kürö ndama eene ka niinö nja ndhiigö nja kebriit.

<sup>18</sup> A türeene ma kadu tagirinadene a tagoroo'bo tanno iidoona no, issi nja ndhiigö nja kebriit ya icci a kürö ndama niinö ma naguttu no.

<sup>19</sup> Türeene ma naguttu ka kaneene ka niinö nja nakatiidi tanno eene, kudumma nakatiidi tanno eene kafeene nja nöönö a nanggüüdi kagi'di kadu iini.

<sup>20</sup> A türeene ma kadu tanno ooladene ka tagoroo'bo no kitaalo kaadha ka tatoroko tanno eene ka tagalinggo ana iisine tanno eene no, kamma ka nagana'bu ana eema ma namasala ya ma dahaba ya nja fudda nja tanyaanya nja misi nja ndagee'di ma eema namasala taalo kara tambaanya tiji 'buugu kitaalo kaföönyö eema kitaalo kunggeene.

<sup>21</sup> Kitaalo kaadha ka tagirina kadu nja tageene nja temelö nja nyoro.

## 10

### Tadhangga nja sorne ya idhilli ya

<sup>1</sup> Nikirii a'ka tasala tadhangga könö ana türü unggunu ku'bu ndama 'dotombo'do. Aküdhü oona a tülüyüü, a tam'biili kungngö iini ka üüdü, dhugudha yiini afeene nja ndanaaya, uune niini tafeene nja nagiide ma issi.

<sup>2</sup> Sorne ya idhilli ya ma ungngö iini ka niisö, ma tanfa'da. Anangnga awwa ma niisö ma kuri yiini ka to, anangnga awwa ma niisö ma küüle yiini ka 'büdhüüli.

<sup>3</sup> Adhiya a tumma ko'do afa fara ma tagamu. Kini ka ndakiidhe ya, a baana ma tom'bo'do na iidümümü kafünü eera no talneegä a fara tiya eene.

<sup>4</sup> Kene ka ndageema ya, a'da nakindinaana a'oona ku'bu ma tarigiri, nikirii ka föönyö tumma ndama 'dotombo'do iki a'a, "Nafa takiri eege ku'bu bünñü hitimi kide afa tabaana ma tombo'do na iidümümü afünü eera no ka takiki."

<sup>5</sup> İkiri tadhangga yeede ka tasala i'i ka 'dingnge ana ko'do ka to nja 'büdhüüli ya, alaga niisö ma kuri niini co 'dotombo'do.

<sup>6</sup> Aküdöönö ana eere ma ömö'di tiya efe ka 'di ta'billi ya, marü'bü 'dotombo'do ana eema tiya inggide ya nye'de, nja 'büdhüüli ana eema tiya inggide ya, nja to ana eema tiya inggide ya nye'de, iki, "Taalo tadoono ku'bu afe'de.

<sup>7</sup> Lakiini ka naguru tanno tadhangga tiya iidümümü afünü eera ya ka tabbü tiniidö niini ya, ikiri tumma na Masala na küdhü no ka ndatiimö afa ma nagane'bi na alinggo ada oono no ka tageema i'i kungingo."

<sup>8</sup> A tumma neede ka taföönyö ndama 'dotombo'do no, eema nja a'a afe'de iki,

"Kolo na'duga sorne ya tanfa'da ya ka nüüsö ma tadhingga ya 'dïngnge ana ko'do ka to nja 'büdhü'lü ya."

<sup>9</sup> Nikir'i a'a kaco ka tadhingga niki iini anangnga sorne ya idhilli ya a'a. Iki a'a, "Duga naguri ara tanangnga eedi yüüdü ka 'diiri, i'digi'di afa kükü üdü ka nüünö."

<sup>10</sup> Nikir'i a'a ka 'duga sorne ya idhilli ya ka tadhingga ka nüüsö natümö i'i. A'digi'di afa kükü kede ka nüünö, lakiini kede ka tatamü a'diiri kede ka eedi.

<sup>11</sup> A tumma tiki a'a, "Eema a tumma tiya tö'dö no afe'de co a kadu 'do nja nagonggo'do nja naguugaara."

## 11

*Kadu na adinö kide na eera no*

<sup>1</sup> Kanangnga tam'bala a'a kafeene nja kuufi iki a'a, "Fiki'dö ninni la ma Masala nja müsi ma türri, ninni kadu na afara ka Masala kide no.

<sup>2</sup> Lakiini 'dadillö na kürö ma la ma Masala no, fa kene nafa tinni eege kudumma eene kananja a kadu tanno taalo ka Yahüüdü no, kara tisiraana ka anya tammo insili mo a nagatereene kukummu kadu keera kafünü eera (42).

<sup>3</sup> Ara a'a tanangnga türü a kadu tanno adinö kide no keera ndama a'a, en'di ma natalisi ungngo eene ka oona, kara teema tumma na Masala a füngngö alif miyateene sitiin (1,260)."

<sup>4</sup> Kadu na eera no eege ka naafa ma 'dikidiyö nja nakoyo ma lamba tanno eera no, a'dingnge ana ko'do kidha ma Uugaara ma 'büdhü'lü no.

<sup>5</sup> Ka ömö'di töccö kara tasaasa tilii eege ka oona ya, issi tö'dö kürö ndama eene ka naniinö kagirina nadiidi neene, nggeuge ömö'di ya asasa tili eege ka oona ya ara tiididene.

<sup>6</sup> Türü kungngo eene ma teere ka 'dotombo'do a tombo'do taalo kara tede ka naguuru tanno eene kara teema kide no, a türü kungngo eene ma ta'bele 'biidü kada eriidö kabbü 'büdhü'lü a maara kadhoonyo kene ka asasa.

<sup>7</sup> 'Bitüngngö kene ka ndatüümö tumma neene ya, a nüümö ma toroko ya ö'dö kürö ndama ööye tiya dhonggoro ya ara tako'do kene ii'bi eege agirina eege.

<sup>8</sup> Oofo yeene tapügünja ka nafüünö ma anya tammo dhabbu mo, ana eere ma taköje a'da Sadöma nja Misiri, kita Uugaara tiya eene ka tabünnü ka salii'bi ya.

<sup>9</sup> A kadu ndama naanya nye'de de nja kadu 'do nja tumma ka tambanajaana ku'bu tadinö ka oofo tiya eene a füngngö

iidoona a dhüdhü miini, taalo kara tafa ka ömö'di töccö a'da atü'bü eege.

<sup>10</sup> Kadu ma 'büdhü'lü kara tadhodho küüni taanyara ma inde tanno kadu tanno eera no, kamana eema eene kudumma nagane'bi tanno eera no köö'dö a dhügürü a kadu ka 'büdhü'lü.

<sup>11</sup> Ka naguuru tanno iidoona a dhüdhü miini no ka ndafaradene ya, a koronggore ma tefe ka 'di tö'dö ndama Masala öö'dö kene ka oona, kafiki'dö ka'dingnge ko'do, ari'ba tümmü kadu na adinö kene no.

<sup>12</sup> Kaföönöyö tumma kalneege ko'd'o öö'dö ndama 'dotombo'do iki eene, "Aaga sörö ko'do kita." Kikir'i ka sörö co 'dotombo'do ka tülüögü, nadiidi meene tadinö kene.

<sup>13</sup> Ka uuru tanno miini no a 'büdhü'lü tatünggi'di dhindho, a 'dakeyi ma anya ada'baaga türri. A kadu taaya na alif ka iidümmü kafünü eera (7,000) kudumma ma tatünggi'di ma 'büdhü'lü, ari'ba tümmü türeene ma kadu kafünögü Masala ma 'dotombo'do ko'do.

<sup>14</sup> A tagoroo'bo na eera no co, a tagoroo'bo na iidoona no ara tö'dö kete kungno.

*Tinüödö ya iidümmü kafünü eera*

<sup>15</sup> A tadhingga ya iidümmü afünü eera ya tabbü tinüödö niini, a tumma talneege ko'd'o ndama 'dotombo'do kiki, "Tauugaara ma 'büdhü'lü kanda tauugaara tiya Uugaara tiya aja nja Almasiiji tiya iini,

i'i ara tauugaara turi ta'billi."

<sup>16</sup> A kadiifi no kukumu kadu kafünü egüsö no, temmi ka nagööyö tanno eene ka Masala kidha no, küürü ku'bu ana dhugudha kümü Masala.

<sup>17</sup> Kiki,  
"Kanangnga ungngo ta'diila o'o, Masala Uugaara mana türü,  
ma 'bütingngö mo, maganeene ma 'billi,  
kudumma üüdü ka a'duga türü nüüdü na tauugaara.

<sup>18</sup> Kadu ma kajeene kagoroo'bo,  
kudumma uuru ma tagoroo'bo tanno üüdü ka ndö'dö  
nja uuru ma tapusu kadu na aaya no.  
Uuru ka ndö'dö ma üüdü kara tanangnga talüngnge a kadu tanno üüdü na gane'bi,

nja kadu na insili no nja kadu tanno ari'ba eere tiya üüdü no,  
na dhiidhi no nja tanno iifi no,

nagirina kadu na ka'da 'büdhü'lü no."

<sup>19</sup> A la ma Masala tatanfa'da ka 'dotombo'do, sandü ma timi'di tumma

noono tabbü 'dala ka la ma Masala. A tombo'do talimaana, kabaana, a 'büdhü'lü tatünggi'di ajeene, a köröörö ta'dinggeene.

## 12

### *Aka nja nü ma 'büdü*

<sup>1</sup> A nüümö tabbü 'dala ka 'dotombo'do keefe, aka magirnii ndanaaya oono ka oona, a tere kono ka uune ka teene, a kalembö ma midigi tammo ada'baaga mafünü eera no, a ndalembö mungno oono ka üüdü.

<sup>2</sup> Magüröönö mafara kudumma tim'di ma teene.

<sup>3</sup> A nüümö könö tabbü 'dala ka 'dotombo'do keefe nja nü ma 'büdü ya dhabbu ya öödhe afa issü, nanggüüdü kungno iini ka iidümmü kafünü eera ana iidö kada'baaga, nja ndalembö ka iidümmü kafünü eera.

<sup>4</sup> Öös'i 'dakeyi ma midigi ma 'dotombo'do ana tüüdi tiya iini üüp co 'büdhü'lü, ikirii nü ma 'büdü ka 'dingnge ka aka kidha miini ka asaasa ta'duuru 'bii'bala kono kara teene.

<sup>5</sup> Mikirii ka tageene 'bii'bala ya miide ya, i'i yungno ara tauugaara ma 'büdhü'lü nye'de kungno a kuufi ma ndaliili, lakiini 'bii'bala yoono atongoso aco ka Masala nja kööyö tiya iini.

<sup>6</sup> Aka marünö maco a dhüile kita Masala ka takindinaana kono ku'bu, ma Masala kara tafa kono mamana eema oono a füngngö ö'dö alif miyateene sitiin 1,260.

<sup>7</sup> A koro'bo tafiki'dö ka 'dotombo'do, Mikayiil nja kadhangga tanno iini nja nü ma 'büdü tageema koro'bo nja kadhangga tanno iini.

<sup>8</sup> Lakiini eege taalo kana türü, a 'buugu yeene ta'dugadene ka 'dotombo'do.

<sup>9</sup> A nü ma 'büdü ya dhabbu ya apügü i'i co 'büdhü'lü, nü ya ma 'billi ya ana eere a'da Eblisi nja Sitan ya iisiiñi kadu nye'de, a 'dingngö ku'bu i'i nja kadhangga tanno iini.

<sup>10</sup> Nikirii ka aföönyö tumma ka alneege ka 'dotombo'do ko'd'do kiki,

"Bitüngngö katüümö toolona, a Masala tammo aja a türü nja tauugaara ma Masala tiya aja,  
nja tauugaara tanno Almasiihi tiya oono.

Kudumma ömö'dü üüfünü eema ka nagöre tanno aja ka oona kidha ma Masala ya oosooso a naguuru, kapügü i'i caa'bu.

<sup>11</sup> Ege kagii'bi i'i ana erüdö ma dhünggü nja tumma tanno eene ka tageema no,

kapügü nanggeyi neene co meene kasaasa inde.

<sup>12</sup> Nggeege 'dotombo'do saga tadhodho nja kadu tanno anna inggide no, lakiini am'ba ka 'büdhü'lü nja to kudumma Eblisi a'bardaga ku'bu öö'dö kada.

I'i adiginigo a tagoroo'bo kudumma iini ka tussu a'da uuru niini ka öreeene idhilli."

<sup>13</sup> Kini ka tassa kini ka 'dingngö ka 'büdhü'lü ya, ikirii ka talinggo aka ma keene 'bii'bala kada miide mo.

<sup>14</sup> Ikirii egedhe ma kolo tiya dhabbu ya eera ya kananja aka, moono ka taagala iini ku'bba ndama nü ma 'büdü ma co 'buugu tiya oono ka dhüile, kafa kono a nagürüünü kiidoona a dhüdhü miini.

<sup>15</sup> A nü ta'binyaga 'büdü kürö ndama nüünö tanno iini kafeene afa ri amang kini ta'duga oogo unggene iini.

<sup>16</sup> Lakiini 'büdhü'lü oolona ka aka afa'da nüünö niini a'duuru ri ya nü ka tuuru ka co kürö ndama nüünö tanno iini ya.

<sup>17</sup> Ikirii nü ka koroo'bo ka aka, unggene aco teema koro'bo nja kadaada moono, ya aföönyö tumma ma Masala na ümmü tumma ma Yasu no.

<sup>18</sup> A nü ma 'büdü ta'dingnge ana ko'do ka nadamugu ma to.

## 13

### *Nüümö ma toroko öö'dö kürö ndama to*

<sup>1</sup> Nasala a'a nüümö ma toroko ka tunggunu aküro'ndama to nanggüüdü kungno iini ka iidümmü kafünü eera ana iidö kada'baaga, iidö nye'de kana kalembö, nanggüüdü na miini no nagereene ma teela Masala kinggide.

<sup>2</sup> A nüümö ma toroko yeede kadasala ya afeene nja ünggü, uune niini kafeene nja uune ma 'böö, afeene ka nüünö afa nüünö ma tagaamu, ikirii nü ka anangnga türü niini nja kööyö tanno iini nja tauugaara nye'de.

<sup>3</sup> Üüdü ma nüümö ma toroko unggodho afa ma tana nüümö ya in'di ya akete ka teyi illi nüümö ya in'di ya aleme, a kadu ma 'büdhü'lü tadhere nye'de kungno kuurna nüümö ma toroko keere.

<sup>4</sup> A kadu türü ka nü tiya dhabbu ya kidha kamma kini kudumma iini ka anangnga türü niini a nüümö ma toroko kürüü ka nüümö ma toroko afe'de kamma kini kiki a'da, "Mada i'i yungno afeene nja nüümö ma toroko ma tambaanya koro'bo nja iini?"

<sup>5</sup> Mada anangnga nüünö a nüümö ma toroko eema indhgü oona coo'do eela Masala, a'duga türü miini ka talinggo a

nagatereeene kukumu kadu keera kafünü eera.

<sup>6</sup> İkiri ka tafa'da nüümö niini eela Masala, eela eere yoono nja 'buugu ma taneene tanno oono nja kadu tanno anna ka 'dotombo'do no.

<sup>7</sup> A'duga türü ma teema koro'bo nja kadu tanno Masala ii'bi eege, a 'duga türü ma tauugaara ma naanya nye'd'de nja kadu 'do nja tumma ka tambananaajaana ku'bu nja kadu.

<sup>8</sup> Amang ka kadu ma 'büdhülü tamma kini nye'd'de kungngo, kadu na nagereene tanno eene ka titaaloo kakirinja ka sorne ma tefe ka 'di' sorne ma dhünggü tiya atendhe ya jiddi ma 'büdhülü ka tagarü'bü adene.

<sup>9</sup> Ömö'dii ya ana iisine ya fa kini atoodo kide.

<sup>10</sup> Üürü ömö'dii ya ara co ka tatasaga ya,

i'i ara co ka tadasaga,

üürü ömö'dii kara tiididene a kulu'ba  
ara tiididene a kulu'ba.

Tumma no kasaasa tidhi oona ku'bu ma kadu tanno insili no nja tamma.

*Nüümö ma toroko anna kürö ka  
'büdhülü'*

<sup>11</sup> Nikiri a'a ka tasala nüümö ma toroko öccö ka tunggunu ko'do ndama 'büdhülü ana iidö keera kafeene nja iidö ma dhünggü, eema afa nii ma 'büdü ya dhabbu ya.

<sup>12</sup> I'i alingga a türü tanno nüümö ma toroko tiya dhidha in'dili ana i'i kide kungngo. Anangnga 'büdhülü nja kadu tanno anna kide katamma ka nüümö ma toroko tiya dhidha ya 'dokotere tammo iini ma inde ma kaleme mo.

<sup>13</sup> Adagiüni eema keefe a dhabbu ung-gugu issi ka 'büdhülü ndama 'dotombo'do ka kadu kidha.

<sup>14</sup> İissin kadu ma 'büdhülü alingga tanno iini ma tamma kini, niini ka 'duga türü adagalingga kidha ma nüümö ma toroko ya dhidha ya. A'bunu kadu ma 'büdhülü karü'bü koronggore ma nüümö ma toroko ya abbü adene a kulu'ba ya assa ka aleefe tefe ka 'di'.

<sup>15</sup> A'duga türü ma tafülle a'duga koronggore ka nüümö ma toroko ya dhidha ya ka oona, amang kini teema, agirina kadu na anu katüürü ku'bu ka koronggore ma nüümö ma toroko no nye'd'de kungngo.

<sup>16</sup> Anangnga kadu nye'd'de afe'd'e na dhiidhi no nja tanno iifi no, nja tanno ana eema dhabbu no, nja tanno eema kitaalo kene no, nja kasaga, nja tanno taalo ka kasaga no, kanangnga kala eene ka niisö ma kuri üürü kene ka nadhugudha.

<sup>17</sup> Taalo ömö'dii ma tampaanya tana nüümö üürü anadene a nüümö illi ömö'dii ya ana kala ana eere ma nüümö ma toroko üürü tamana ma eere tiya iini.

<sup>18</sup> Ara tana eere ma ta'dara, ömö'dii ya ussu eema ya fa kini inni nagereene ma nüümö ma toroko kudumma iini kada tamana ma ömö'dii ya ö'dö namiya ka iidümmü kafünü unggodho a kadu kidoona ka iidümmü kafünü unggodho (666).

## 14

*Dhünggü nja kadu tanno iini*

<sup>1</sup> Nikiri ka tassa co nasala dhünggü ka 'dünge ka 'dikinya ma Sahyün nja kadu kungngo iini kö'dö miya arba arbaiin alif (144,000), eere yiini nja eere tiya Pupa tiya iini ikirinja kene ka nadhugudha.

<sup>2</sup> Naföönöy tumma ndama 'dotombo'do kafeene nja fara ma 'büdü tiya dhabbu ya afeene nja fara ma tombo'do tanno abaana dhindho no, afeene nja fara ma erempeera a kadu miini kabaana.

<sup>3</sup> Küüwe tüüsü ma issi mo ka kööyö ma Masala kidha ma eema tiya efe ka 'di' ya egüsö ya kidha ma kadüifi, taalo ömö'dii ma tampaanya talaanadene ka tüüsü tammo illi no ka kadu na öö'dö miya arba arbaiin alif (144,000) na oolonadene ka 'büdhülü no.

<sup>4</sup> Kadu no eege kungngo taalo kanyoro nanggeyi neene nja iiya, kudumma eene kadaafa ka nanggeyi tanno eene katin-sili. Kadu na miini no eege kungngo ko'd'o ka dhünggü keere kita iini kara co ya, eege kungngo koolonadene ka türeene ma kadu, kümmü nanggeyi neene a Masala nja dhünggü kafeene nja eema tiya ö'deene ka dhidha ya.

<sup>5</sup> Taalo nanüünö neene keema korokoro, eege ka insili ka nanggeedi.

*Kadhangga na iidoona no*

<sup>6</sup> Nikiri a'a ka tasala tadhangga könö ka lagala ka söödö ma 'dotombo'do, tumma ma injüili ta'billi co ka kadu ma 'büdhülü nja kadu ma naanya nja kadu ma tumma kadhoonyo nja kadu in'dili.

<sup>7</sup> Iidhe ko'd'o iki, "Aaga ri'ba a Masala aaga taftünügü oogo ko'do kudumma uuru ma tahükümü kadu no ndö'dö, aaga üürü ku'bu aaga tamma ka ömö'dii tiya arü'bü 'dotombo'do nja 'büdhülü ya nja to nja nakanduguli ma 'büdü."

<sup>8</sup> A tadhangga könö tuurna i'i keere iidhe iki, "Ma'dinggö, ma'dinggö Babil ma dhabbu mo, kudumma oono manangnga kadu ma tooye ngeeli na itoto no ma temelö tanno oono."

<sup>9</sup> Íkíri tadhangga ya iidoona ya ka tuurna ege keere eema ko'd'do iki, "Ömö'di ya üürü amma ka nüümö ma toroko nja koronggore tiya iini amma ka kala tammo iini kini ka dhugudha üürü kini ka nüüsö ya,

<sup>10</sup> i'i afe'de ara tooye ngeeli ma tagoroo'bo na Masala na uurunja ka ker'de ma tagoroo'bo tanno oono, ara tapusu adene ana issi nja albaarü kidha ma kadhangga tanno insili no nja dhünggü.

<sup>11</sup> A ndhüigö ma tapusu tisi coo'do turi ta'billi a talingnge titaaloo uuru nja ooso ka kadu tanno üürü kamma ka nüümö ma toroko nja koronggore tiya iini no a nakömö'di tiya ana kala ma eere tiya iini ya.

<sup>12</sup> Ya asaasa tidhi oona ku'bu ma kadu tanno insili no kaföönyö tumma na Masala no, kütü katammas ka Yasu."

<sup>13</sup> Naföönyö a'a tumma ndama 'dotombo'do kiki, "Arigiri tumma no, a'da a'diila nja kadu tanno ake ka linggo tanno Uugaara ndama uuru tanno."

Koronggore iki, "Íi amang kene talingnge ka dhügürü tiya eene kudumma linggo tanno eene ka tunggeene nja eene."

### Tawaana migile koona ma 'büdhüülü

<sup>14</sup> Nikíri a'a ka tasala co nasala tülüügü ka ta'bassa, ömö'di ya emmi ka tülüügü ya, afeene nja 'bii'bala ma tadü'd'dü ndalembö ma tauugaara kungngo iini ka üüdü ma dahaba a manjala ma ungngo iini ka nüösö mana kuri.

<sup>15</sup> A tadhangga könö tö'dö kürö ndama la ma Masala iidhe a tumma ko'd'do ka ömö'di tiya emmi ka tülüügü ya, "Duga manjala müüdü nara migile kudumma uuru ka ndö'dö a migile ma 'büdhüülü kanda ö'deeme ma taraaana."

<sup>16</sup> Ömö'di ya emmi ka tülüügü ya tapügü manjala miini co 'büdhüülü a migile ma 'büdhüülü taradene.

<sup>17</sup> A tadhangga könö tö'dö kürö ndama la ma Masala ka 'dotombo'do, manjala mungngo iini mana kuri.

<sup>18</sup> A tadhangga könö ya afa ka issi ya tö'dö kürö ndama misi ma tirri iidhe eema ko'd'do ka tadhangga tiya ana manjala ya ana kuri ya, "Duga manjala müüdü naruma ki'bim'bi ma 'büdhüülü kudumma iiye miini ka ndö'dööne."

<sup>19</sup> A tadhangga tapügü manjala miini ka 'büdhüülü a taruma ki'bim'bi ma 'büdhüülü uuru ka 'doonya ma tiyaana ma tagoroo'bo tanno Masala na dhabbu no.

<sup>20</sup> Kasiraana ka ki'bim'bi ka misi kürö ma anya, eriidö tisi akürö ndama 'doonya ma tiyaana iisö faaya idhi ala kili ma

muttu akete kala nameele namiya keera (200).

## 15

### Kadhangga na iidümmü kafünü eera no nja namaara ka iidümmü kafünü eera

<sup>1</sup> Nikíri a'a ka tasala nüümö keefe ka 'dotombo'do adhabbu ka'diila, kadhangga ka iidümmü kafünü eera kümmü namaara no iidümmü kafünü eera no, ege kungngo keere a Masala ka tatüümö tagoroo'bo noono iini.

<sup>2</sup> Nasala a'a 'buugu kafeene nja to tammo insili afa gasasa mo katonggoonyo ana issi, nasala kadu no kii'bi nüümö ma toroko nja koronggore tiya iini ana tamana ma eere tiya iini. Ka'dingnge ana ko'do ka tinggi ma gasasa mo, kümmü erempeera na Masala ka anangnga eene ka nüüsö no.

<sup>3</sup> Küwe tüüsü ma Müusa tasaga ya Masala, nja tüüsü ma dhünggü kiki, "Ka Masala Uugaara ma ana türü mo, kadhabbu linggo nüüdü keefe, nafinii nüüdü ka dhidho ka dhorro, Uugaara ma nagürüünü nye'd'de.

<sup>4</sup> Ka Uugaara, mada i'i yungno taalo ara tariba o'o, afünügü eere yüüdü ko'do?

O'o na insili unggodho o'o.  
Ara kadu nye'd'de sa köö'dö küürü küdü kidha  
kudumma linggo üüdü a dhidho, a kadu tadinö kide nye'd'de."

<sup>5</sup> Nikíri a'a ka tassa co nasala la ma Masala nja fangga ma tumma ma Masala ka tatanfa'da ka 'dotombo'do.

<sup>6</sup> A kadhangga tö'dö kürö ndama la ma Masala ka iidümmü kafünü eera, maara ma iidümmü mafünü eera mungngo eene, kümmü en'di ya insili ya alimaana ya ka oona kimi'di naaro ana jónnö ma dahaba.

<sup>7</sup> Könö ka eema tiya efe ka 'di ya egiisö ya tanangnge naadho ma dahaba ka iidümmü kafünü eera a kadhangga tanno iidümmü kafünü eera no kadigine a tagoroo'bo ma Masala, tammo efe ka 'di turi ta'billi mo.

<sup>8</sup> La ma Masala tadigine ana ndhüigö ma tihhindhi nja türü tanno Masala, taalo ömö'di ma tampaanya co la ma Masala, ara maara ma iidümmü mafünü eera ma kadhangga tanno iidümmü kafünü eera no köö'dö iini no ka titao.

## 16

### Naadho ma tagoroo'bo na Masala

<sup>1</sup> Naföönyö a'a tumma ko'd'do ndama la ma Masala eemaga ka kadhangga tanno iidümmü kafünü eera no, "Aaga agolo

aaga tuurugu naadho ma tagoroo'bo na Masala na iidümmü kafünü eera no ka 'büdhüllü."

<sup>2</sup> A tadhingga ya dhidha ya tunggeene ateefe tuuru ker'de miini ka 'büdhüllü, eema ya in'di ya tatoroko abbü 'dala ka kadu na ana kala ma nüümö ma toroko nya kadu na türü ka koronggore no kamma kini.

<sup>3</sup> İkiri tadhingga ya eera ya ka tuuru ker'de miini co to, a 'büdü tafeene nya eriidö ma ömö'dü tiya eyi ya, eema ya adinö ka to ya taaya nye'd'de.

<sup>4</sup> A tadhingga ya iidoona ya tuuru ker'de miini co a neeri nya nduguli ma 'büdü atem'bele kada eriidö.

<sup>5</sup> Nikiri a'a ka aföönyö a tadhingga ma 'büdü ka tiki,

"O'o taalo nüüni ada kadu ku'bu, o'o nadho ka fiini,

yungngó kide adaganna kide, o'o na insili no,

kudumma üüdü nadho ka fiini,

<sup>6</sup> kudumma eene ka tuuru eriidö ma kadu tanno Masala co nya nagane'bı, yungngó üüdü ka anangnga eriidö eene a'da kooye,

kikiri kaluna yeene ka asaasa ya."

<sup>7</sup> Naföönyö a'a tumma afe'de ndama müsi ma türri iki,

"İ, Masala o'o na Uugaara ma ana türü mo,

fiini yüüdü ka dhidho atatimin'da."

<sup>8</sup> A tadhingga ya egüsö ya tuuru ker'de miini ka ndanaaya a türü tananja eene ma tinyogo kadu ana issi.

<sup>9</sup> A kadu tatinyogo a tagu'daana, keela eere ya Masala, mana türü ma maara, lakiini taalo kaadha ka tatoroko, kitaalo kafünügü Masala ko'do.

<sup>10</sup> İkiri tadhingga ya iidümmü ya uuru ker'de miini ka kööyö tanno nüümö ma toroko, a tauugaara niini talifi. İkiri kadu ka agi'di nagonggo'do neene kudumma eene ka tin'di.

<sup>11</sup> Keela Masala ma 'dotombo'do kudumma tin'di tanno eene nya 'dokotere tanno eene, kitaalo kaadha ka linggo tanno eene.

<sup>12</sup> A tadhingga ya iidümmü kafünü ungodho ya tuurugu ker'de miini co ri ma Fürat ya dhabbu ya, a 'büdü miini taa'du amang kini tindinaana fiini ma naguugaara ma fiini ma ndanaaya no.

<sup>13</sup> Nikiri a'a ka tasala nagoronggore na nyoro no kiidoona kafeene nya namürö kunggunu kürö ndama nüümö ma nü ma 'büdü ya dhabbu ya nya nüümö ma nüümö ma

toroko nya nüünö ma ne'bi tiya akorokoro ya.

<sup>14</sup> Eege ka nagoronggore ma na'bu na ale'bele eema keefe no, kaco ka naguu-gaara ma 'büdhüllü nye'd'de ka wagaana eege ka oona keema koro'bo ka uuru tanno dhabbu, uuru ma Masala tammo ana türü mo.

<sup>15</sup> "Adinö ko'do, ara a'a tö'dö afa tanyooro, a'dila nya ömö'dü tiya adinö ko'do ya afa ka en'di amang kini tafa tunggeene ana oona ku'bu a kadu tiji i'i ka ta'döngngönyö ka oona."

<sup>16</sup> Awagaana eege ka oona ka 'buugu tiya ana eere a tangga Ebriya a'da Harmajdün.

<sup>17</sup> A tadhingga ya iidümmü kafünü eera ya tuurugu dho miini coo'do, a tumma tö'dö kürö ko'd'o ndama kööyö ka la ma Masala iki, "Ndafaradene."

<sup>18</sup> İkiri tombo'do ka limaana, fara ma abaana ma tombo'do, a 'buugu tatänggi'dü dhindho taalo agüün'i adene nggeege jiddi ma ömö'dü ka taganna 'büdhüllü.

<sup>19</sup> Anya ma dhabbu mo tasümününja ku'bu ma iidoona ka oona, a naanya ma kajeene tatangga'da a Masala tagüügi Babil ma dhabbu mo manangnga oogo ka tooye ngeeli ka ker'de tanno oono, ngeeli ma tagoroo'bo noono.

<sup>20</sup> A najasiira tarünö nye'd'de kungngo a na'dikinya tamanyaga.

<sup>21</sup> A köröörö ya iifi ya, ta'dünggö ka kadu ko'do ndama 'dotombo'do adhabbu, a kadu teela Masala kudumma tabbü adene ma köröörö, kudumma tabbü adene miini ka tatoroko 'do.

## 17

### Aka nya nüümö ma toroko

<sup>1</sup> A tadhingga könö ana ka tanno na iidümmü kafünü eera no ana naadho ka iidümmü kafünü eera no iki a'a, "Aayu halaga o'o ka tapusu adene tanno madatemelö tammo dhabbu mo memmi ka 'büdü ya dhabbu ya.

<sup>2</sup> Naguugaara ma 'büdhüllü kafüngö ana oogo, a kadu ma 'büdhüllü taaya kene ka tagooye ngeeli ma temelö noono."

<sup>3</sup> İkiri tadhingga ka 'duga a'a a koronggore aco a lodho iini, nasala aka memmi ka 'dugeere ma nüümö ma toroko öödhe ana nagereene ma teela Masala ka oona nye'd'de, nanggüüdü niini ka iidümmü kafünü eera ana iidö kada'baaga.

<sup>4</sup> Madagümmü en'di ya dhöyö ya nya tiya öödhe, mümmü dahaba nya nüügsi tanno agu'daana no nya lüülü, dho ma dahaba mungngó oono ka nüüsö madigine

ana eema tiya toroko ya nja nyoro ma temelö tanno oono.

<sup>5</sup> Ikirinja eere oono ka dhugudha a'da, kume, "Babil ma dhabbu, niimö ma katemelö nja nyoro ka 'büdhülü."

<sup>6</sup> Nasala a'a aka ka teyi ka eriidö tiya oono ka tagooye ma kadu tanno insili no, nja kadu tanno agirinadene kudumma eene ka tamma ka Yasu no. Kede ka tasala oogo nadhere 'do.

<sup>7</sup> İkirri tadhangga ka tindini a'a a'da, "Minna agu o'o nadhere? Ara a'a tadirina niimö ya afeene nja aka nja niimö ma toroko tiya ümmü oogo ka 'dugeere ya a nanggüdü ka iidümmü kafünü eera ana iidö kada'baaga no.

<sup>8</sup> Niimö ma toroko yüdü ka tijöögö ya akeefe ka 'di, illi i'i anda taalo 'bitingngö, lakiini i'i anda kete köö'dö kürö ndama ööye ya dhonggoro ya ma co teyi. A kadu na ka 'büdhülü no tadhere, nagereene tanno eene taalo kakirinja ka sorne ma tefe ka 'di jiddi ma 'büdhülü ka tarü'bü adene kene kara tasala niimö ma toroko, kudumma iini ka takeefe ka 'di, a 'bitingngö taalo efe ka 'di, illi i'i ara tafada öö'dö.

<sup>9</sup> "Kasaasa tumma no, tussu eema nja ta'dara, nanggüdü na iidümmü kafünü eera no eege ka nakürünggürü na iidümmü kafünü eera, aka ka temmi kide no. Eege ka naguugaara na iidümmü kafünü eera afe'de.

<sup>10</sup> Na iidümmü no ka'dingga, aya iidümmü kafünü unggodho ya aleefe tauugaara, aya iidümmü kafünü eera ya ara üfürü tö'dö, lakiini tauugaara niimi taalo ara tadhonggoro.

<sup>11</sup> Lakiini niimö ma toroko ya akeefe ka 'di, asa katitaalo efe ka 'di ya, i'i ya uugaara ya iidümmü afünü iidoona ya. I'i ya miini ama tanno iidümmü kafünü eera no, i'i ara co teyi.

<sup>12</sup> "Illi iidö na ada'baaga yüdü ki-jöögö no eege ka naguugaara na ada'baaga küfürü tümümü tauugaara no, kara sa ka'duga türü ma tauugaara nja niimö ma toroko ana ndanaaya ka unggodho.

<sup>13</sup> Eege no, tumma neene ka unggodho meene ka anangnga türü neene nja tauugaara a niimö ma toroko.

<sup>14</sup> Kara teema koro'bo nja dhünggü, lakiini dhünggü ara ti'bi eege kudumma iini ka ta Uugaara ma naguugaara, ada Uugaara ma naguugaara na iifi no, a kadu na aneene nja eene no eege kagümmünüdene, nja tanno akessedene no, nja tanno amma ka Masala no."

<sup>15</sup> İkirri tadhangga ka tiki a'a, "'Büdü yüdü ka tijöögö aka tammo a temelö mo

ka temmi kide ya, i'i ya kadu nja kajeene nja naanya nja tumma kadhoony.

<sup>16</sup> İidö na ada'baaga nüüdü ka tijöögö no nja niimö ma toroko, kara saga diidi aka ma temelö mo kara tamuru eema ya kono nye'd'e kafa kono ana oona ku'bu, kagu uu'da noono kinyogo oogo ana issi.

<sup>17</sup> Kudumma Masala oogo manangnga tumma no kene ka nanggeedi a'da kalinggo afa ma tiya oono ka asaasa ya kungngo, meene kimi'di tumma ma tümümü tauugaara neene a niimö ma toroko, amang ka tumma tanno Masala co ööye miini.

<sup>18</sup> Aka müüdü ka tiji oogo mo, oogo ma anya tammo dhabbu mo, ma uugaara ma naguugaara ma 'büdhülü."

## 18

### Ta'dingga na Babil

<sup>1</sup> Nikirri a'a ka tasala tadhangga könö afe'de unggunu aku'bu ndama 'dotombo'do ana türü kadhabbu, a 'büdhülü ta'dara a töyeene tanno iini.

<sup>2</sup> Lidhe a tumma ko'd'o,

"Ma'dingga, ma'dingga Babil ma dhabbu

mo,  
ma ta'buugu ma na'bu kadanna kide  
ndama 'buugu ma taneeene ma na-  
gana'bu tanno oroko no  
nja uyi tiya nyoro ya, ya kadu kanu  
kide ya nye'd'e.

<sup>3</sup> Kadu ma 'büdhülü nye'd'e tagooye  
ngeeli na itoto na ma temelö tanno  
oono,  
a naguugaara ma 'büdhülü kafüngngö  
ana oogo,  
a kadu ma na anadene ana eema  
tüüsü ka eema tiya oono ya dhabbu  
ya."

<sup>4</sup> Nikirri a'a ka föönyö tumma afe'de  
ndama 'dotombo'do kiki,  
"Akö'dö kürö ndama oono, kadu eede,  
amang kada tafa tosso ka eema tiya  
toroko ya nja oono,  
amang kada tafa tosso ka tapusu  
adene ka namaara nja oono.

<sup>5</sup> Kudumma tatoroko tanno oono kakod-  
honcoko kalla kala 'dotombo'do,  
a Masala tagüngi tatoroko noono.

<sup>6</sup> Agüünii midhi ku'bu ana oogo afa moono  
ka tagüünii midhi ku'bu 'do ana aaga  
kungngo,  
aaga kusu midhi kono kide ma dhabbu  
ada yoono ka tagüünii ana aaga ya  
kungngo.  
Aaga konyaana ker'de ma ngeeli tanno  
oono kafünü kide no.

<sup>7</sup> Aaga apusu oogo, aaga tafa kono mafara  
dhindho

tamana moono ka takidhindhü ma taküüsü.

Mindhigü eyi yoono miki,  
'A'a nungngó nemmi kita ka tauugaara,  
taalo a'a na aka ma kütümé,  
nitaalo nussu muuyu.'

<sup>8</sup> Nggege ara tagoroo'bo tümmü oogo ana uuru ka unggodho,  
inde nya müürü nya iire,  
ara issi tinyogo oogo  
kudumma türü kungngó Masala Uu-gaara, mara tasigi oogo mo."

<sup>9</sup> Ara naguugaara ma 'büdhülü sa fara kamüürü, eäge na füngngó ana oogo kad-hodho nya oono, kafara kene kara tasala ndhüögö ma issi tanno oono.

<sup>10</sup> Köödhi ku'b'ba eene kari'ba a tapusu adene tanno oono kiki, "Am'ba! Am'ba küdü anya ma dhabbu, anya ma Babil ma ii'baana mo, ara o'o tasigidene ana ndanaaya ka unggodho."

<sup>11</sup> Ara kadu ma 'büdhülü na anadene ana eema no, saga fara oogo kamüürü, kudumma ömö'dii ma tana eema kene taalo.

<sup>12</sup> Eema ma dahaba nya fudda nya nduguri nya lüülü tiya agu'daana ya, nya en'di ma hariir nya en'di ma silik tiya öödhe ya, nya naafa nye'de na afeene nya togoogo no, nya eema tiya agalinggo adene ana igini ma mongngo ya nya kee'di tanno agu'daana no, nya tanyaanya nya elili nya nduguri.

<sup>13</sup> Nja girfa nya kondho ma ndhüögö nya russu, nya maaga nya felengidhi, nya ngeeli nya uu'ba nya müösö tammo ilollo mo nya migile, nya eema ma eriidö nya ki'biini nya naguttu nya karru nya kasaga nya nagoronggore ma nakömö'di.

<sup>14</sup> A kadu na anadene no tiki oono, "Eema ya a'diila ya kanna küdü ya akunggeene. Eema ya kanna küdü ad-habbu ya nya tidhindhü a'dugadene taalo o'o taluna afe'de."

<sup>15</sup> Kadu nanadene ka anya kana almaala dhabbu no kara ta'dingnge ku'b'ba kanna kudumma eene ka ari'ba a tapusu adene tanno oono, katafara kamüürü.

<sup>16</sup> Kiki,

"Am'ba! Am'ba küdü, anya ma dhabbu mo,  
magümmü en'di ma ndugaara na ku'daana no ka oona nya en'di tiya öödhe ya,  
ümmü dahaba nya kisi tanno agu'daana no nya lüülü.

<sup>17</sup> Eema yoono ya nye'de kungngó ara titaaloo ana ndanaaya ka unggodho."

Namürkabü nye'de nya dhabbu ma nasawaaga miini nya kadu tanno no linggo kide no, nya kadu töccö no kuri ka to ka oona no töödhü ku'b'ba.

<sup>18</sup> Kiidhe ko'd'do kene ka tasala ndhüögö moono ka finne, "Maganna anya ma idhindhü afa ma tammo kungngó?"

<sup>19</sup> Kadhibi kuraaga eene ka nanggüüdü kafara kamüürü kiki a'da,  
"Am'ba! Am'ba ka anya tammo idhindhü mo,  
a kadu na ana namürkabü ka to no eege  
saga tatangga'da ana ndanaaya ka unggodho.

<sup>20</sup> 'Dotombo'do, adhodho kudumma oono ka taga'dadene,  
aaga dhodho kadu na insili no nya kadafüünä nya nagane'bi kudumma Masala ka takapusu oogo ka eema tiya oono ka tagüünä ana aaga ya."

<sup>21</sup> İkürü tadhingga ya dhabbu ya ana türü ya, ka a'duga misi ma köje nya misi ma tawöönö ma dhabbu mo, apügü co to iki, "Nggege ara Babil ma idhindhü mo tapügünja co to a türü mitaalo mara talunadene afe'de.

<sup>22</sup> Taalo kadu kara taföönyö a kadu ka tüwe tüüsü nya fara ma perempeera nya kaaru nya tiniidö taalo kadu ma linggo kara tanna küdü kanna afe'de,

taalo kadu kara taföönyö fara ma tawöönö küdü afe'de.

<sup>23</sup> Taalo töyeeene ma lamba töyeeene küdü afe'de,  
taalo taföönyö tüüsü ma kadu tanno arna no küdü,

kudumma kadu tanno anadene ka kadu ma 'büdhülü na idhindhü no,  
a kadegeene nüüdü no kaama kadu ma 'büdhülü nye'de kungngó.

<sup>24</sup> Kaduna eriidö kono ma nagane'bi nya kadu tanno insili no nya kadu na kirinadene ka 'büdhülü nye'de."

## 19

Tüüsü ma tii'baana ka 'dotombo'do

<sup>1</sup> Ndama kanna nükiri a'a ka aföönyö tumma ko'd'do tumma ma kadu kadhabbu ka 'dotombo' do kiidhe kiki,  
"Halülüya!

Toolona na Masala tammo aja nya türü nya tidhindhü.

<sup>2</sup> Tasigi noonoo kadho ka fiinä kada timin'da.

Agasigi madatemelö ma dhabbu mo  
maga'da 'büdhülü a temelö tanno  
oono,  
a'diinö kömüsü ma eriindö ma kasaga  
tanno oono."

<sup>3</sup> Kalneege ko'd'do afe'de,  
"Halülüya!"

Ndhiigö ma tafinne moono kisi coo'do turi  
ta'billi."

<sup>4</sup> İkiri kadiifö no ukumu ömö'di kafünö  
egüsö no nja eema ya efe ka 'di ya egüsö  
ya, tüürü ku'bu ana küüge küüru ka  
Masala tammo emmi ka kööyö mo. Kiki,  
"Amiin! Halülüya!"

<sup>5</sup> A tumma tö'dö ndama kööyö kiki,  
"Aaga füñögü Masala tammo aja,  
aaga no kasaga tanno oono  
nja kadu nye'd'de na iifi no nja tanno  
idhiidhi no kari'ba oono."

<sup>6</sup> Naföönyö tumma kafeene nya tumma  
ma kadu kadhabbu afa fara ma faaya, afa  
fara ma tabaana ma tombo'do iki,  
"Halülüya!"

Kudumma Uugaara Masala maaja ma  
ana türü mo ara tümmü tauugaara.

<sup>7</sup> Kada kadodho angnga taga'deema,  
angnga takafünögü oogo ko'do  
kudumma uuru ma tarna tanno dhünggü  
ka ndö'dö  
a 'bala miini manda kindinaana oona  
ku'bu.

<sup>8</sup> Kanangnga ten'di ma ndugaara ma'bassa  
ma insili mo oono,  
a'da magirni kono ka oona."

Kudumma ten'di ma ndugaara euge ka  
linggo ma kadu na Masala tanno a'diila no.

<sup>9</sup> İkiri tadhingga ka tiki a'a, "Arigiri  
tumma no, a'diila nya kadu tanno tö'dö  
ka taanyara ma tarna ma dhünggü." A  
tadhingga tiki a'a afe'de, "Tumma na  
Masala dhorro euge kungngo."

<sup>10</sup> Nüürü kini kidha ma tamma kini,  
lakiini i'i iki a'a, "Fa tüünö kungngo, a'a  
na tasaga afa o'o, afa nagöre nüüdü na  
üümmü tumma na Yasu no. Afara ka  
Masala kudumma tumma tanno Yasu euge  
ka koronggore ma tane'bi."

*Ömö'di ya aka ka muttu tiya 'bassa ya*

<sup>11</sup> Nikiri a'a ka tasala 'dotombo'do kata  
tanfa'da, a muttu tö'dö a'bassa ana ömö'di  
ka taka kide ana eere a'da tadhoo ka fiinü  
ya nja dhorro ya. Tasigi kadu kada dhidho  
ma timin'da, eema koro'bo taalo üünö ada  
kadu ku'bu.

<sup>12</sup> İiye niini kafeene nya onggo'do ma  
issi, a kalembö kungngo iini ka üüdü

kadhabbu. Eere ikirinja kini taalo ömö'di  
ma tussu illi i'i.

<sup>13</sup> Ten'di ma ungngo iini ka oona  
manyö'donja ka eriindö ana eere a'da  
tumma na Masala.

<sup>14</sup> A nasigira ma 'dotombo'do ka taka ka  
naguttu kada 'bassa kuurna i'i keere, ana  
en'di ma ndugaara ya ka'bassa ya insili ya  
ka oona.

<sup>15</sup> A kulu'ba ma dhonggoro mo ticci  
aküro ndama iini ka nüümö mana kuri,  
miini kara tabbü kadu ma kajeene iini,  
ara tauugaara meene a kuufi ma ndalili.  
Asiri ka 'doonya tiya ki'bim'bi ma ngeeli  
ma tagoroo'bo nya Masala tammo ana türü  
mo.

<sup>16</sup> Eere taga kirinja ka ten'di tammo iini  
nya tadüüfü tanno iini a'da: Uugaara ma  
naguugaara, ada Uugaara ma naguugaara  
na iifi no.

<sup>17</sup> Nasala tadhingga ka a'dingnge ana  
ko'do ka ndanaaya, iidhe ka uyi ko'd'do ya  
alagala ka 'dotombo'do ka söödö ya, "Aaga  
ö'dö aaga emmi in'dilli ka taanyara tanno  
Masala na dhabbu no.

<sup>18</sup> Aaga kö'dö aaga tagu uu'da ma nagu  
ugaara nya uu'da ma naguugaara ma nasi  
gira nya uu'da ma tanno ana türü no, nya  
uu'da ma naguttu nya kadu tanno kaaka  
kide no, nya kadu nye'd'de, kasaga nya  
tanno taalo ka kasaga no, na idhiidhi no  
nya tanno iifi no."

<sup>19</sup> Nasala nüümö ma toroko nya nagu  
ugaara ma 'büdhülü nya nasigira tanno  
eene kawaana oona ma teema koro'bo nya  
ömö'dü tiya aka ka muttu ya nya nasigira  
tanno iini.

<sup>20</sup> A nüümö ma toroko tümmü adene nya  
ne'bi tiya akorokoro ya, ya agalinggo eema  
keefe kidha ma nüümö ma toroko. İisini  
kadu na ana kala ma nüümö ma toroko no,  
nya kadu tanno üürü ku'bu kamma  
ka koronggore ma nüümö ma toroko no.  
Kapügü nüümö ma toroko nya ne'bi tiya  
korokoro ya co to ma albaru ma issi tanno  
afinne no kadinö kungngo.

<sup>21</sup> A türeene meene tagirinadene a  
kulu'ba tammo icci a kürö ndama nüönö ma  
ömö'dü tiya aka ka muttu ya, uyi tüüsü ka  
uu'da tanno eene nye'd'de kungngo.

## 20

*Eblisi agapusu adene a nagürüünü alif*

<sup>1</sup> Nikiri a'a ka tasala tadhingga ka tung  
guna aku'bu ndama 'dotombo'do ngafata  
ma ööye ya dhonggoro ya ungngo iini ka  
nüsö ana jansiiri isissi.

<sup>2</sup> Ümmü nü ma 'biidü ya dhabbu ya nü ma 'billi ya, ya ana eere a'da Ebliisi nja Sitan, im'i dini i'i ku'bu a nagürüünü na ö'dö alif.

<sup>3</sup> İkiri ka tapügü i'i co ööye tiya ad-honggoro ya eere kide abbünnü hitimi kide amang kini tafa tüsinü kadu afe'de, ara nagürüünü na ö'dö alif no ka tatüümö. Kassa ka tapa kini agünü idhilli.

<sup>4</sup> Nasala a'a nagööyö a kadu tanno a'duga tauugaara ma tasigi kadu. Nasala nagoronggore ma kadu tanno na tendhe kene ka eyi no kudumma eene ka teema ma Yasu ka üüdü ma tumma ma Masala. Taalo küürü ku'bu kamma ka nüümö ma toroko, kitaalo kamma ka koronggore tiya iini, kitaalo kana kala ma nüümö ma toroko ka nadhugudha nja iisine. Kateefe ka 'di kada naguugaara nja Almasiihi a nagürüünü kö'dö alif.

<sup>5</sup> Lakiini türeene ma kadu taalo kara tefa ka 'di a'da üfürü nagürüünü na ö'dö alif tatüümö. Tafiki'dö na dhidha no eege kamiini.

<sup>6</sup> A'diila insili nja kadu tanno ka tafiki'dö tanno dhidha no, taalo türü ma inde tanno eera no kene lakiini eege kara ta ka'boge ma Masala nja Almasiihi, kada naguugaara nja iini a nagürüünü na ö'dö alif.

### Ta'dingga na Ebliisi

<sup>7</sup> Aga nagürüünü na ö'dö alif no kara tatüümö ya kapa ka Sitan ndama pabuusu tiya iini.

<sup>8</sup> Öö'dö körö aga'da kadu ka nanggüüdü ka 'büdhüü ka 'buugu na egüsö no ma 'büdhüü, kana eere a'da Jüj nja Majüj, awagaana eege ka oona ma teema koro'bo eege kaköje nja ndamugu ma to.

<sup>9</sup> Kanyaalaana oona ka 'büdhüü kaku'du angga na kadu tanno insili no ko'do nja anya tammo oono ka asaasa oogo mo, lakin-i issi ka öö'dö ku'bu ndama 'dotombo'do kagirina eege.

<sup>10</sup> Kapügü Ebliisi ya ka'da eege ka nang-güüdü ya co to ma issi nja albaru ka 'buugu tiya nüümö ma toroko nja ne'bi tiya korokoro ka tanna kide ya, kapusu adene kide eege nye'd'e uuru ana ooso turi ta'billi.

### Kööyö ya dhabbu ya a'bassa ya

<sup>11</sup> Nikiri a'a ka tasala kööyö a'bassa adhabbu, nasala ömö'di ya emmi kide ya. 'Büdhüü nja 'dotombo'do ka arünö kini kihda a ton'do meene titaaloo.

<sup>12</sup> Nasala kadu na aaya na iifi no nja tanno dhiidhi no ka'dingga ana ko'do kihda ma kööyö, a kasorne tatanfa'da.

Sorne könö tatanfa'da i'i yungngo sorne ma tefe ka 'di. A kadu na aaya no kümmü adene ka tamana linggo tanno eene afa ma sorne ka tiki kungngo.

<sup>13</sup> A to tadhifigi kadu na kide na aaya no ko'do, a inde nja 'buugu ma inde tadhifigi kadu na aaya kide no ko'do, kagapusu adene nye'd'e ka üüdü ma linggo tanno eene.

<sup>14</sup> Inde nja 'buugu ma inde kapügü co a to ma issi, a to mo, oogo ma inde tanno eera no.

<sup>15</sup> Ömö'di ya eere tiya iini ka titaaloo ka sorne ma tefe ka 'di ya apügünja co to ma issi.

## 21

*'Dotombo'do no issi no nja 'büdhüü tiya issi ya*

<sup>1</sup> Nikiri a'a ka tasala 'dotombo'do no issi no nja 'büdhüü tiya issi ya kudumma 'dotombo'do tanno dhidha no nja 'büdhüü tiya dhidha ya ka manyaga, a to titaaloo afe'de.

<sup>2</sup> A'a na Yühanna nasala a'a anya ma insili mo, Örsalim ma issi mo, ka tung-gunu aku'bu ndama 'dotombo'do ndama Masala, afa 'bala ma indinaana oona ku'bu ka'diila ma toreene nja nyuri tiya oono.

<sup>3</sup> Nikiri a'a ka aföönyö tumma ko'd'o ndama kööyö kiki, "A 'bitüngöngö 'buugu ya Masala ka tanna kide nja kadu ya, i'i yungngo mara tanna kide nja eene kada kadu tanno oono. Masala ana oona moona mara taneene nja eene, mada Masala tammo eene.

<sup>4</sup> Mara tayu fara eene ka iiye, ara inde titaaloo nja müürü, a fara titaaloo nja tin'd'i, eema ya illi ya ara tamanyaga."

<sup>5</sup> A ömö'di ya emmi ka kööyö ya tiki, "Ara a'a tanangnga eema in'dili ka tissi." Afada iki a'a, "Arigiri tumma no ku'bu ka dhorro ka tatimin'da."

<sup>6</sup> Iki a'a, "Afaradene eema nye'd'de. A'a na dhidha na tiya eere ya. Ömö'di ya teneye kagu i'i ya ara a'a tinyi 'biidü iini ndama, nduguli ma tefe ka 'di a'da taalo afaana.

<sup>7</sup> Ömö'di ya ii'baana a'duga eema ya nye'd'e na ta Masala tammo iini a ta'bii'bala tiya eede.

<sup>8</sup> Lakiini kadu nari'ba no nja tanno taalo kamma ka Masala no nja kadu tanno kirina kadu no nja kadu tanno oroko no nja katemelö nja kadegeene nja kadu tanno amma ka eema ma namasala no nja kadu tanno akorokoro no nye'd'de, 'buugu

yeene a'da to ma finne ana issi nja albaru mo, inde na eera no eege kamiini."

### *Örsalim ma issi mo*

<sup>9</sup> A tadhingga könö ana ka tanno iidümmü kafünü eera no, na ana nadho ka iidümmü kafünü eera kadigine ana maara na iidümmü kafünü eera no. Ö'dö iki a'a, "Aayu nala o'o ka 'bala aka ma dhünggü."

<sup>10</sup> A'duga a'a a koronggore asirö anya ma dhonggoro ma dhabbu mo, alaga a'a co Örsalim anya ma insili mo, munggunu ku'bu ndama Masala ka 'dotombo'do.

<sup>11</sup> Alimaana afa töyeeene ma tidihindhi ma Masala, ka liminanago afa misi ma ku'daana mo, kafeene nja misi ma öödhe ma agiiri mo ya insili afa gasasa ya kungngo.

<sup>12</sup> A ndhiidhö kadhabbu adhonggoro, naginyeene ka inggide kada'baaga kafünü eera, a kadhangga kinggide kada'baaga kafünü eera a nagereene kakirinja kide eege ka nagereene ma siliga ma Israyil na ö'dö kada'baaga kafünü eera no.

<sup>13</sup> Ndama fiinä ma ndanaaya naginyeene kinggide kiidoona, ndama küüle naginyeene kinggide kiidoona, ndama küüli naginyeene kinggide kiidoona, ndama niimö ma ndanaaya naginyeene ka inggide kiidoona.

<sup>14</sup> A ndhiidhö ta'dingnge ka kadesa kada'baaga kafünü eera, nagereene kungno eene kana eere a'da nagereene ma kadaifiinä tanno dhünggü na ada'baaga kafünü eera no.

<sup>15</sup> A tadhingga ya ageema nja a'a ya, ümmü tam'bala ma dahaba ma tinni anya iini nja naginyeene miini nja ndhiidhö miini.

<sup>16</sup> İkirii ka takinni oogo möö'dö alif na miya ka iidümmü nameele (1,500) a tadhonggoro miini nja dhüdhü miini nja ta'doogo miini ka unggodho.

<sup>17</sup> İkirii ka takinni ndhiidhö miini öö'dö dhüdhü ma nüsö ma ömö'dü ukumu kadu ka iidümmü a kadu keera kafünü kide egüsö (144), afa tadhingga ka takineene kada köje afa nüsö ma ömö'dü.

<sup>18</sup> A ndhiidhö tarü'bü adene a nügisii na öödhe ka agiiri ya, ya, anya tarü'bü adene ana dahaba unggodho i'kungngó kafeene afa gasasa ma insili mo.

<sup>19</sup> A kadesa ma ndhiidhö ma anya takesedene a nügisii tanno agu'daana no kada tonggoonyo.

Kadesa na dhdha no kama nügisii tanno a kirikiri na öödhe no.

Anno eera no, misi ma kirikiri ma lanja mo, anno iidoona no misi ma 'bassa mo,

anno egüsö misi ma kirikiri mo.

<sup>20</sup> Na iidümmü ya misi ma irriifi mo, aya iidümmü afünü unggodho ya misi ma dhöyö mo, aya iidümmü afünü eera ya misi ma kuuli ma kirikiri, aya iidümmü afünü iidoona ya misi ma kirikiri mo, aya iidümmü afünü egüsö ya misi ma kuuli mo, aya ada'baaga misi ma kirikiri mo, aya ada'baaga afünü unggodho ya, misi ma ngalangala mo, aya ada'baaga afünü eera ya ünggülü miini atonggoonyo.

<sup>21</sup> İnye no tagalinggo adene ana lüülü unggodho, a fiinä ma anya ya adhüföölö ya agalinggo adene ana dahaba tiya insili ya kafeene nja gasaasa tammo aja kiji 'buugu iini no.

<sup>22</sup> Taalo a'a nasala la ma Masala ka anya, kudumma Masala Uugaara ma ana türlü mo nja dhünggü eege ka la ma Masala.

<sup>23</sup> Anya taalo masaasa töyeeene ma ndanaaya nja tere, kudumma töyeeene ma Masala ka töyeeene ada kono, a dhünggü i'i ya lamba tammo oono.

<sup>24</sup> Ara kadu nye'd'e saga tunggeene ka töyeeene tanno oono a naguuغاara ma 'büdhüli töö'dö ana almaala tiya eene oono.

<sup>25</sup> Taalo naginyeene noono ka teere uuru na in'dili no, kudumma ooso ka titaaloo kide.

<sup>26</sup> Tidihindhi nja ta'diila ma naanya kara töö'dö iini kide.

<sup>27</sup> Taalo niimö ya nyoro ya ara co anya nja kadu tanno üünä eema ya toroko ya nja tanno akorokoro no, illi kadu no nagereene tanno eene ka kirinja ka sorne ma tefe ka 'dii ma dhünggü.

## 22

### *Ri ma tefe ka 'dii*

<sup>1</sup> İkirii tadhingga ka laga a'a co ri ma 'büdi ma tefe ka 'dii, insili afa gasasa nduguli kiisö ndama kööyö ma Masala nja dhünggü.

<sup>2</sup> İisö ka söödö ma fiinä anya, fa ma tefe ka 'dii ungnogo ka tinggini ma ri ateera miini, eene laala ada'baaga kafünü eera ta unggodho ka tere. A dhaaru miini toolona kadu ma 'büdhüli ka maara.

<sup>3</sup> Taalo teeladene kara tanna kide ndama uuru tanno afe'de, ara kööyö ya Masala nja dhünggü tanna ka anya, a kadu niini talingga ada iini.

<sup>4</sup> Kara tadinö ka dhugudha tiya iini, eere yiini tanna kene ka nadhugudha.

<sup>5</sup> Taalo 'buugu ara tooso kide, taalo kara tasaasa töyeene ma lamba nja töyeene ma ndanaaya, kudumma Masala Uugaara mara tanangnga töyeene eene kara ta naguugaara turi ta'billi.

<sup>6</sup> A tadhangga tiki a'a, "Tumma ka timin'da ka tadhorro. Masala Uugaara ma koronggore tiya nagane'bi mo, magürünü tadhangga yoono öö'dö tala eema ya ara tüünidene kete kungngo ya a kasaga tanno oono."

#### Tö'dö na Yasu

<sup>7</sup> "Aaga föönyö, a'a nungngo nara tö'dö areere a'dila nja ömö'di tiya talinggo a tumma ma tane'bi ka sorne tiya."

<sup>8</sup> A'a na Yühanna, naföönyö a'a nadinö ka eema tiya, kede ka taföönyö natadinö kide ya, na'dinggö ka uune ma tadhangga tiya anangnga a'a ka tadinö kide ya.

<sup>9</sup> İkiri ka tiki a'a, "Fa tüümü kungngo, a'a nadasaga afa ma o'o nja nagöre tanno üdü nagane'bi nja kadu tanno alingga a tumma ma sorne nye'de no, afara ka Masala."

<sup>10</sup> İkiri ka tiki a'a, "Fa taküdhü tumma ma tane'bi no ka sorne tiya no, kudumma uruu ka ndakete.

<sup>11</sup> Ömö'di ya üümü ada kadu ku'bu ya, fa kini ütü ka tüümü tatoroko, ömö'di ya nyoro ka eedi ya fa kini ütü ka nyoro tanno iini, ömö'di ya a'diila ya fa kini ütü kada ka ta'diila tanno iini, ömö'di ya insili ya fa kini ütü ka tinsili tanno iini."

<sup>12</sup> "Aaga föönyö, a'a nungngo nara tö'dö areere, talingnge ungngo eede ma eede kara tanangnga ömö'di ka taköje nja linggo tanno iini ka tagalinggo ya.

<sup>13</sup> A'a na dhidha na ta eere.

<sup>14</sup> "A'dila nja kadu no kagunu en'di yeene amang kene taduna fiini ma fa ma tefe ka 'dii, eege kama coanya ndama nakinyeene ma ondo miini.

<sup>15</sup> Lakiini kadu no kürö no, eege ka tiini nja kadegeene nja katemelö nja kadu tanno agirina kadu no, nja kadu tanno amma ka eema ma namasala no nja kadu tanno akorokoro kasaasa korokoro no nye'de.

<sup>16</sup> "A'a na Yasu nagürünü a'a tadhangga yeede a'da öö'dö tadünüğü eema ya co a nakanisa, a'a na 'bereere ma 'bandaada ma Dawud, a'a na ndalfoore ma taka na öyeeene no."

<sup>17</sup> Koronggore nja 'bala kiki, "Aayu!" Ömö'di ya aföönyö ya fa kini iki a'da, "Aayu!" Ömö'di ya tenege kagu i'i ya, fa kini öö'dö, ömö'di ya asaasa ya, fa kini a'duga 'biiđi ma tefe ka 'dii a'da taalo faana kide.

<sup>18</sup> Nanangnga a'a tumma ku'bu, ömö'di ya aföönyö tumma ma tane'bi no ka sorne tiya, afa tagusu niimö öccö kide, a Masala tagusu tagoroo'bo na kirinja ka sorne tiya no.

<sup>19</sup> Ömö'di ya agona ka 'bandumma ma tane'bi keere ka sorne tiya, ara Masala takoko faka miini ka fa ma tefe ka 'dii nja anya tammo insili mo, na keemadene ka sorne tiya no.

<sup>20</sup> Ömö'di ya adinii ka eema tiya iki, "İi, ara a'a tö'dö areere."

Amiin, aayu Uugaara Yasu.

<sup>21</sup> Fa ka türü tanno Uugaara Yasu ka aneene nja aaga nye'de kungngo.